


Eta Táurinaquene máechajiriruvahi ema Viya eta
viyehe, ticaijare puito Eta Nuevo Testamento



New Testament in Ignaciano (BL:ign:Ignaciano)

**Eta Táurinaquene máechajiriruvahi ema Viya eta viyehe, ticaijare puito
Eta Nuevo Testamento
New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source files dated 29 Jan 2022
332465cd-916c-5bfc-8721-b0114be92360

Contents

| | |
|----------------------------|-----|
| San Mateo | 1 |
| San Marcos | 76 |
| San Lucas | 125 |
| San Juan | 206 |
| Hechos | 262 |
| Romanos | 332 |
| 1 Corintios | 361 |
| 2 Corintios | 391 |
| Gálatas | 409 |
| Efesios | 420 |
| Filipenses | 430 |
| Colosenses | 437 |
| 1 Tesalonicenses | 444 |
| 2 Tesalonicenses | 450 |
| 1 Timoteo | 454 |
| 2 Timoteo | 463 |
| Tito | 469 |
| Filemón | 473 |
| Hebreos | 475 |
| Santiago | 498 |
| 1 Pedro | 506 |
| 2 Pedro | 514 |
| 1 Juan | 520 |
| 2 Juan | 527 |
| 3 Juan | 529 |
| Judas | 531 |
| Apocalipsis | 534 |

Ema Apóstole Mateo májuequenehahi eta máichararacavahi ema Jesucristo, ticaijare puiti eta **EANGELIO SEGÚN SAN MATEO**

*Ena achaneana máchucáequeneanaini ema Jesús eta acane
(Lc 3.23-38)*

¹ Nuvaraha numetacaheya mayehe ema Jesucristo. Éma, vijaneanahi israelítahi, taicha eta mámariéquenérahi ema viáchucaini Abraham. Énerichuvare, ema Jesús rey-yarehi taicha eta mámariéquenérahi ema víyarahaini rey David. Eta juca eta nalista ena máchucaequeñeanaini ema Jesús.

² Ema víyarahaini Abraham, macachichapa ema Isaac. Ema Isaac macachichapa ema Jacob. Ema Jacob macachichapa ema Judá énapa ena apamuriana maparapenaveana. ³ Ema Judá macachichapa ema Fares émapa ema Zara. (Esu naena ticaijaru Tamar.) Ema Fares macachichapa ema Esrom. Ema Esrom macachichapa ema Aram. ⁴ Ema Aram macachichapa ema Aminadab. Ema Aminadab macachichapa ema Naasón. Ema Naasón macachichapa ema Salmón. ⁵ Ema Salmón macachichapa ema Booz. (Esu maena ticaijaru Rahab.) Ema Booz macachichapa ema Obed. (Esu maena ticaijaru Rut.) Ema Obed macachichapa ema Isaí. ⁶ Ema Isaí macachichapa ema rey David. Ema rey David macachichapa ema Salomón. (Esu máenaini ticaijaru Betseba, esu mayenainihi ema Urías.) ⁷ Ema Salomón macachichapa ema Roboam. Ema Roboam macachichapa ema Abías. Ema Abías macachichapa ema Asa. ⁸ Ema Asa macachichapa ema Josafat. Ema Josafat macachichapa ema Joram. Ema Joram macachichapa ema Uzías. ⁹ Ema Uzías macachichapa ema Jotam. Ema Jotam macachichapa ema Acaz. Ema Acaz macachichapa ema Ezequías. ¹⁰ Ema Ezequías macachichapa ema Manasés. Ema Manasés macachichapa ema Amón. Ema Amón macachichapa ema Josías. ¹¹ Ema Josías macachichapa ema Jeconías énapa ena maparapenaveana, ena nacarataruanahi námaqueneanahi ena apavasanahí te Babilonia.

¹² Te taequenepa eta juca, ema Jeconías macachichapa ema Salatiel. Ema Salatiel macachichapa ema Zorobabel. ¹³ Ema Zorobabel macachichapa ema Abiud. Ema Abiud macachichapa ema Eliaquim. Ema Eliaquim macachichapa ema Azor. ¹⁴ Ema Azor macachichapa ema Sadoc. Ema Sadoc macachichapa ema Aquim. Ema Aquim macachichapa ema Eliud. ¹⁵ Ema Eliud macachichapa ema Eleazar. Ema Eleazar macachichapa ema Matán. Ema Matán macachichapa ema Jacob. ¹⁶ Ema Jacob macachichapa ema José, ema suí mahí esu María, máenahí ema Jesús, ema ticaijare Cristo, ema vicuchapaquenahí.

¹⁷ Tacahe, catorcemuriana ena mámariéquéqueneanainihi ema Abraham. Ema rey David, émapa náichecuinehi eta natupa. Tacahe, ema rey David, catorcemurianavare ena mámariequeneanainihi. Ena nacarataruanahi námaqueneanahí ena apavasanana te Babilonia, énapa náichecuinehi eta natupa. Ema Jeconías, catorcemuriana ena mámariéquéqueneanainihi. Ema Jesucristo, émapa náichecuinehi eta natupa.

*Eta máuchusira ema Jesús
(Lc 2.1-7)*

18 Ani tacahehi eta máuchusirahi ema Jesucristo. Esu maena María, trá turipahi eta suítauchirayarehi ema José. Vuíchahasera nacachanecakahini. Ticajari pahisera ésu, mávajuechirahi ema Espíritu Santo. **19** Ema José, tétavivavahi eta máuriva. Eta tacahe, vahi tisemaimahi. Váhivare mavarahahini máimicatsiri acahini esu María. Mavarahahisera macaepaha eta matratune suyehe ésu. Váhisera mávarahahini náechahini ena achaneana eta tacayemaquenehi. **20** Ema Viya máimamaracahi eta mapanereruhi. Eta tacahe, tiúcupaicapa ema ángele mametapanahi te mavapure ema José. Ánipa máicha*:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajari pahí ésu, mávajuechirahi ema Espíritu Santo. **21** Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

22 (Títauchavapahi tamutu eta juca máechajiriruvanahi ema Viya mayehe ema víyarahaini profeta Isaías. **23** Ani tacahehi: “Sutiarihiyare esu amaperu esena té munahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

24 Tacahe, te téjamiuchavapa ema José eta macavapureirahi, ichaperinehi eta masuapirohi eta máechajiriruvanahi ema ángele mavaneruhi ema Viya, eta máitauchirayarehi esu María. **25** Váhisera nánecakahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

2

Náejirapana ema amuya ena reye mógoana

1 Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásicha, títecapanapa te Jerusalén ena reye mógoana tiásihanahi te tayerehiquene avasare tinapaica te táuchusine eta sache. **2** Nacayasesererupaipahi, ánipa nacahe:

—Víti, tímitecahavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávhahí ema amuya? —nacahepa.

3 Te masamairiricapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi. **4** Tacahe, ema Aluresi máimichuhavacapa namutu ena tuparairucana énapa ena tituruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

5 Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaini Isaías. Máechajicahi éma eta avasare tímicutijiricavahi eta achanénahini. Ánipa macahe: **6** “Piti avasare Belén,

* **1:20** Ema ángele, eta máechajisirahi ema José, manacahi eta nayeherepi náechajisira ena israelítana. Ani macahehi: “Piti José, machicha ema David”.

tachichavihi eta Judea, picunachacarepánayare píti. Taicha eta máuchusihayarehi piyehe ema ichapequeneyarehi eta maháquenucávayare. Éma, téchapajirimurihayare namutu ena vijaneanana israelítana".

⁷ Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui. ⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanuyare, apaesa nuyana nútì apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásicha, náimahavarepa eta jarairiqui náehirupahi. Tiyanapa te namirahu. Étapa te Belén eta tatupihaiyahi, te tainahu eta mávhahí ema amuya. ¹⁰ Tétavicava eta náurisamrevahi ena mágoana eta náimairahi eta tatupihairaripa. ¹¹ Títecapánavanepa eta te peti mávhahí ema amuya. Náimahapa éma, ésupa esu maena María. Tásicha, tépuyucanapa natsiucapa ema amuya. Navecuhapa eta námvahuanapahi. Náijaracasichapa eta oro, eta incienso étapa eta táijiyequene perfume. ¹² Te taequenepa eta náejirairahi ema amuya, tichavanayarepa te návasa. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávhahí ema Aluresi.

Ema José ésupa esu María náimijunapa ema amuya te Egipto

¹³ Tacahe, te taequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Péchepuca, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecayare matanucayare ema amuya, mavairahí macapacayare —máichapa ema ángele.

¹⁴ Tacahesera ema José téchepucapa. Tétupirícavanavanepa te jena yati. Tiyananapa námapa ema amuya tayehe eta Egipto. ¹⁵ Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahí eta juca mametarapi ema Viya eta te Sagrada Escritura, ani macahehi: "Te Egipto nímijunaiyahí ema nuchicha. Te taequenepa, níchuhayarepa éma".

Ema Aluresi máimicapapajicapa ena amuyanaini te avasare Belén

¹⁶ Tacahe, ema Aluresi te masamairiricapa eta nánucuiraripa ena mágoana, tisemarinehi eta navyuasirahi. Máimivanerecapa nacapapajicapaná namutu ena amuyana ajairana tiávihanahi te Belén énapa ena tiávihanahi te tachacayarahana, ena ticayeheanaripa apina año énapa ena náuchusirávana. Máepanaequenehapa eta táuchusihahí eta jarairiqui náimahaquenehí ena mágoana. ¹⁷ Tacahe, te Belén eta títtauchiravahí eta májuchaquenehí ema víyarahaini profetaini Jeremías. Ani tacahehi: ¹⁸ "Tétavicavahí eta najapanuiravahí ena esenana. Ichape eta náiyairahi taicha ena suntaruana nacapapajisirahí ena nachichanaveana. Nájina naratahahini nacamatinacahini taicha eta najapanuiravahí ichape" tacahepa.

¹⁹ Tacahe, te jácani año te taequenepa eta máepenirahi ema Aluresi, tiápechavarepa ema ángele máechajicahi ema José te mavapure ánaqui te Egipto. Ánipa maicha:

²⁰ —Péchepuca, José. Piveha ema amuya ésupa esu maena. Piyana pichava te piávasa Israel taicha vaipa taeñamavacare. Tépenaipahi ema tipanereu-chainihi ticapacayarehini ema amuya —máichapa ema ángele.

²¹ Jéhesare, ema José téchepucapa. Tétupiricavapa, ésupa esu maena ema amuya. Tiyananapa tichavanahai tayehe eta návasa. ²² Tacuhe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásicha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea. ²³ Te títecapanapa, ánaqui étapa náejasihahi. Tacuhehi eta táitauchiravahi eta táchajiriruvanahai eta Sagrada Escritura nájureanahí ena profetanaini eta macaijarerayarehi Nazareno ema Jesús.

3

*Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruuhana
(Mr 1.1-8; Lc 3.1-9, 15-17; Jn 1.19-28)*

¹ Tacuhe, te jácani treinta áñohi, matiarihihivare ema achane ticaijare Juan. Éma, máichuhaqueñehi ema Viya eta macametarairuirayare, máetupiricavacayare ena achaneana. Tacuhe, masuapahi eta matuparahahi. Tiyanapa vámahicuruuhapa. Váipa avasarecuruhainahini. Ticametarairupaipa nayehe ena macutiqueneanahí vámahicuruuhana, ticavasanahi te tachausi eta Jordán te tinapaicahi eta Judea. ² Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha mágajapainapa ema aquenucayare mavaneruhi ema Viya —máichavacapa.

³ Ánaquiapipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apana achane máichuhaqueñeyarehi ema Viya. Macametarairuyarehi, máetupiricavacayare ena achaneana, náinajisirayarehi eta napane-reruana tamauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisihaqueñehi ema Viya, máetupiricavacayare ena achaneana. ⁴ Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticaijare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama. ⁵ Tiyananavare nacipayaca ena achaneana ticavasana te Jerusalén, navarairahi nasamararaca eta máechajisihaqueñehi; énapa ena ticavasana te Judea, énapa ena tiávihanahi tayehe eta cajacure Jordán. ⁶ Tacuhe, eta nametauresiravaipa, navarairahivare náinajica eta napecaturana, ema Juan máicachasicavacapaipa te cajacure Jordán.

⁷ Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacuhe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaraqui. Evarahahipuca iúchucuhayare. ⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana. ⁹ Váhivare ecucajamurava eta mámariéqueneháirahehi ema viáchucaini Abraham. Taicha tayanapane mámarihepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecarachaimahi máepiyaca

achaneanaina eta juca mari, mavarairainahi yátupina ena mámarieque-neanaina ema Abraham. ¹⁰ Ecauneuchava, taicha tiánehipa eta táitecapauchirahaviyare eta ecuñaraqui nayehe ena achaneana máitucaranahanahi téneuchavana, váhivare náitsivachahini eta napaneruana. Tímicutijirícavaipa te máechucayarepa ema achane eta yucuqui máhireana. Ticaechuyarehi tamutu eta tapareana. Tíjuyarehi. ¹¹ Yátupi núti nícacashaicahehi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, tícachashaicaheyareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. Éma, ichapequenehi nuyehe núti. Váiparinehi nácutinasimahi eta máitupajijasiravahi. Váiparinehivare nácaemuñavaimahi macamusuranuhini núti páuresami. ¹² Puiti éma márajapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásicha, máquijicapa eta tapiraquiji. Májuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta namuruira —máichavacapa ema Juan.

Eta macaicachasirahi ema Jesú

(*Mr 1.9-11; Lc 3.21-22*)

¹³ Tacahe, títecapavarepa ema Jesú te cajacure Jordán te mávihahi ema Juan. Éma, másihapahí te tinapaica eta Galilea. Mavarahahi ticaicachasiyare mayehe ema Juan. ¹⁴ Émasera ema Juan, vahi mávarahahini máicachasicahini. Ánipa macahe:

—Tata Jesú, nútira táuricahi nútivaina pícacashicanu. Nusapihana núti picaijuhenuhi eta nícacashicaviya —máichapa.

¹⁵ Émasera ema Jesú majicapapa:

—Tájinachucha táichava. Ticamunucarehi nítouchayare eta mavaraha-quenehi ema Nucaiyaquene —máichapa.

Tásicha, ema Juan tísapavapa. ¹⁶ Te tamutupa eta macaicachasirahi ema Jesú, tiúcupaicapa tayehe eta une. Tásicha, tíjahúchavapa téjiaca eta anuma. Máimahapa ema Espíritu Santo tiúcupaicapaipahi, mavasimahipaipa eta paloma. Tavenesicapa ema Jesú. ¹⁷ Tacahe, tiáramicarepa eta mahu ema Viya tásichaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta nürisamurevahi máicha —macahepa.

4

Ema Váinaraji Satanás mavaraha macaitsamaraji ema Jesú

(*Mr 1.12-13; Lc 4.1-13*)

¹ Tacahe, ema Espíritu Santo enurujipa máimitucaipahi ema Jesú eta mayaniraya te mávapahí apaquehe. Ánaqui macuchapayarehi eta máitsamara-rajiyare ema Váinaraji. ² Tájina manicahini ema Jesú te jena cuarentaquenehi sache, cuarentavare yati eta mayerevahi. Ichapepa eta máecuavahi. ³ Tásicha, ema Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesú majicapapa:

—Váhipuca pecha eta táechajiriruvahi eta Sagrada Escritura, ani tacahéhi: “Vahi tacarichuimahi eta tinicacare ticaitarecayare ena achaneana.

Tacachaneyarehi eta máechajiriruvana ema Viya. Jéhevare, éta ticaitarecarahiyare” macahepa.

⁵ Tásiha, ema Váinaraji mámavarepa tayehe eta tacapicahuquene avasare Jerusalén. Máimiapanapa te táinahu eta Templo. ⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájina píchavaimahi eta pémirisirayare. Pécharichuhi eta taechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajircaviana. Tiámavianayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya, taicha Piáquenuhi éma” —máichapa.

⁸ Tacahe, ema Váinaraji mámavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajircacahini taicha eta máitupajijiasiravahicacha ema Váinaraji. Máimechavarepa eta ichapequeneana náimahaqueneana ena achaneana. ⁹ Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumaserá te numirahu. Pitsiucanu apaesa níjaracavavisarepa tamutu —máichapa ema Vainaraji.

¹⁰ Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta taechajiriruvahi eta Sagrada Escritura. Ani tacahehi: “Macarichu ema Viya vepuyumirauchayare. Macarichuvare vicaematanacayare” tacahepa. Váhiqune táurica nucaematanacavihini —máichapa ema Jesús.

¹¹ Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajircapa ema Jesús.

Ema Jesús tépanavapa ticametarairu

(*Mr 1.14-15; Lc 4.14-15*)

¹² Tacahe, te jena sácheana, nacaratacapa ema Juan. Námapa te jácani tayerehiquene. Tacahe, ema Jesús, eta masamairirisirapa eta macaera-tairahi te cárcel ema macheji Juan, tiyanapa tichava te mávasa Nazaret te Galilea. ¹³⁻¹⁷ Váipasera mánasihini te majurusinehi. Tiyanapa tayehe eta avasare Caperaum. Étapa máejasihahi. Eta juca avasare távhahi te tachausi eta cáquiure Galilea. Eta macametarairuirahi, tamutuhi mapaina eta tinapaica eta provincia Galilea*

—Éneuchava mayehe ema Viya. Ítsivacha eta epanereruana, taicha tiánehi eta sácheyare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Eta juca títauchavahi eta májureanahi ema víyarahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puítisera máitecapauchavacaripahi

* ^{4:13-17} Ema profeta Isaías, ánivare macahehi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana tájareanaini: eta Zabalón étapa Neftalí.) Eta máimitusiravacahi ena achaneana, ánipa maicha ema Jesús:

ema timícauchamurihi. Ticatiuchavacayarehi tayehe eta nacatajivairahi. Éma, téturnechavacahivare eta mamícauchiravacahi” tacahepa.

*Ema Jesús máichuha ena cuátroqueneana ténicarahiana, máimitureanayare
(Mr 1.16-20; Lc 5.1-11)*

¹⁸ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayehe tarrafa. ¹⁹ Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichavacapa.

²⁰ Enevanepa náinajicapa éna eta náenisirahi. Tiyananapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparapecácanavare: ema Jacobo émapa ema Juan. Téjacanahi te napacure. Matiarihihivare ema naiya Zebedeo. Náititijiricahi eta nayehe tarrafa. Ema Jesús máichuhavarepa. ²² Enurujipa náehicavare. Nanaquicavarepa eta napacure, émapa ema naiya. Najuñijicavarepa.

*Ema Jesús máimitucavacapa ena camuriqueneana achaneana
(Lc 6.17-19)*

²³ Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuahuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímerecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracapahivare tamutu eta apanapanequeneanahi jumareana eta najumanapahi ena achaneana. ²⁴ Tacahe, nasamairircapa ena achaneana ticavasanahí eta tasimutuqueneana avasareana te tinapaica eta Siria. Tásiba, nánavacapaipa ena nacajumaqueneana, apanapanenjejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús. ²⁵ Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

5

*Ema Jesús máimitucahi nayehe ena ticunachacareanahi me Viya
(Lc 6.20-23)*

¹ Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacaipahi. ² Ani tacahehi eta máimiturapianahi:

³ —Ena náimatihi eta tacamuñequeneanahi eta náchanevana, téavicavahi eta náuricacarevaya taicha máejerare eta najacapirayare eta máechajiriruva ema Viya, machaneranayarehi.

⁴ Ena nani tijapanujiricavanahi, téavicavahi eta náuricacareva taicha émaripa ema Viya macurisamurechavacayare.

⁵ Ena nani tisuapajirahianahi me Viya, mánsuanahi mayehe, téavicavahi eta náuricacareva taicha máijararuayanayare eta arairu apaquehe náicuchihi me Viya.

6 Ena nani, ichape eta najamurachirahi eta náitaresirahi eta matapiravacare te mamirahu ema Viya, tétavicavahi eta náuricacarevaya taicha máijaracayare éma eta navarahaquenehi.

7 Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

8 Ena nani vahi náisapajirícahavahíni tahapapicahini eta náehisirahi ema Viya, tétavicavahi eta náuricacarevaya; taicha éna, títecapanainapa te mamirahu ema Viya, náimraracainapa éma.

9 Ena nani ticonsejarahianahi nayeheana ena achaneana, nacaepahairahi eta semanereana, tétavicava eta náuricacarevaya éna; taicha máimereuchainapa ema Viya eta machichairavacahi éma.

10 Ena nani ticatajivanahi eta nacatianacasivahi nayehe ena achaneana te juca apauehe táichavenehi eta táurivahi eta náitaresirahi, tétavicavahi eta náuricacarevaya; taicha éna aquenucarananaya majupahanayare ema Viya.

11-12 Eti nuchanceranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha ejacapayare eta icuchiyare te anuma, taicha ichape eta macunachirahéhi ema Viya!

Ema Jesús tímitucahavi eta vicamunucareravayarehi tacutihí eta tacamunucarevahí eta icheve, étapa eta tijarahí

(Mr 9.50; Lc 14.34-35)

13 Eti ímiyanavayare eta ecamunucareravahí nayehe ena achaneana, tacutihí eta tacamunucarevahí eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevevainahíni. Tásiba, nájinapa ticamunuimahi. Náepuruinapa namutu.

14 Tacutiquene éti ecutihi eta tijarahí. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauriqueneana. Ímereuchayarehivrete eti iúriva, ecutiya eta avasare tiávihahi te tajirumane eta anuquehe mari. **15** Tacutiquene, vahi ecucuti nácani súnsuana tiyustacanahi jácani lámpara, tásiba nanacapapucaini te tajuhe eta cajune, nayumurusihahini. Nanacayarehisera te anuquehe apaesa náimairicasarepa namutu ena tiávihanahi te peti, tamicaureanayarehi. **16** Ene caheyare éti, ímerecayare eta ejaraivayare nayehe ena achaneana apaesa eta náimairainahi eta táuriqueneana íchaqueneanayare; tásiba nacunachainapa ema Tata Vicaiyaquene tiávihahi te anuma.

Ema Jesús tímitucahavi tayehe eta tasuapacarevahí eta Sagrada Escritura

17 Vahi étina tímitecanuhi nútí nucaepahahini eta mavanairipiana ema víyarahaini Moisés, étaripa eta náimiturapianaini ena profetanaini. Eta tímitecanuhi nútí, níminecapaequenehaheyare eta nájureanahi. **18** Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apauehe. **19** Eta tacahe, nácani tépuruanayare eta tavairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehe ena apamuriana

achaneana eta náehisiraina; éna, ichapeyare eta nacunachacarevayare eta nasiapiraipa te anuma. ²⁰ Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

*Ema Jesús tímitucahavi vahi tacunasi te visamure eta visemaneva
(Lc 12.57-59)*

²¹ Eti écharichucha eta nayeherepiana ena iáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”. ²² Nútisera numetacahe eta apava: Mácani tisemahi mayehe ema maparape, énerichuvare ticaicuñayare. Mácani tiúmehahi ema maparape, ticayaserehiyare te namirahu nácani tuparairucanahi tayehe eta avasare. Tacutiquene mácani ticaecahihí ema maparape, mávacuhaipahi eta ecuñaraqui tayehe eta infierno.

²³ Eta tacahe, te piámapahi eta piámavahu te mamirahu ema Viya, tásicha, péchapanaínapapuca eta pitapiravahi mayehe ema piparape. ²⁴ Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétupiricanumayare tativa eta píchavaquenevahí mayehe éma. Táuricasarepa pichava píyarakuhapanaínapa eta piámavahu te mamirahu ema Viya.

²⁵ Tacutiquene te matiarihiyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaquenevahí mayehe, mapurare vuíchaha picaeratahini mayehe ema juez tayehe eta cárcel. ²⁶ Taicha te náimisiapavipa tayehe eta cárcel, ticajeraequeñenánapa eta piúchusiraya.

Ema Jesús tímitucahavi vicuneuchavaya eta jácani tímiaquipaica havi tayehe eta pecatu

²⁷ Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apava esena”. ²⁸ Puítisera nútí numetacahe eta apava: Mácani majamurachahi esu apava esena, ticapecaturaipahi te masamure taicha eta majamurachirahi. ²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi támahayare eta tamauriqueneana tájiparacana, tiúripa evecuhauquichava iáquijicaya. Taicha tiúripanahi taejiacava ánichichaina te iáquehe, válisera tacuimicuñacahe eta te yucu infierno, tamutupahi eta iáquehe. ³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahénapapuca íchayare eta tamauriqueneana, tiúripa eyuchatica iáquijica. Taicha tiúripanahi taejiacava eta evahu, válisera tacuimicasiapahe támamu eti iáquehe tayehe eta yucu infierno.

*Ema Jesús manacahi eta máimiturapi nayehe ena tínajicacana
(Mt 19.9; Mr 10.11-12; Lc 16.18)*

³¹ Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tínajicahi esu mayena, máemepiyarecahi eta ajumeruca táchajisihayarehi eta máinajisiraya esu mayena”. ³² Nútisera numetacahe eta apava: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apava achane.) Énerichuvare te tiápechavahipuca ticaima ésu, tamuriacahi ésu eta maviurevahí ema suima. Tásicha, mácani arairuhi suima, émapa tamuriacahi eta máejecapiravahi taicha eta mavirahi esena sucaimaquenehi.

Ema Jesús tímitucahavi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta ítauchiraina tamutu eta íjarasiravahi me Viáquenu” nacahepa. ³⁴ Nútisera numetacahe éti: Vahi táuricahini íchahini eta juramento. Vaipa échajisiyahini eta anuma taicha éta, mávacurehi ema Viya. ³⁵ Váipavare échajisiyahini eta apaquehe taicha éta, macaematanéyahi éma. Váipavare échajisiyahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya. ³⁶ Váipavare échajisiyahini eta ejurachirahi te echuti, taicha vahi áratahaimahi ehapamaichahini, ítsivachirahini eta táimahi, tijapupuca, tiquisapuca. ³⁷ Numetacahe: Te tatiarihipuca eta íjarasiravayare, átupiruva ácae: “Tiuri”. Te váhipuca evarahahi, átupiruva: “Vahi” ácae. Te émunahacavapuca ejuracha, ema Váinaraji titurucaheripa.

*Ema Jesús tímitucahavi eta vahi vicusema ne nácani ticaetemajiricahaviana
(Lc 6.29-30)*

³⁸ Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”. ³⁹ Nútisera numetacahe: Vahi ecujicapa te masema mácani achane váinarajiji. Tiúripana, te náehahepuca nácani te emira, íjaracayare eta apachacaya eta emira. ⁴⁰ Tacutiquene, te natarihipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihi. Íjaracavare eta apana eta epacuha. ⁴¹ Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi. ⁴² Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

*Ema Jesús tímitucahavi eta vémunasirayare nácani ticatianacahaviana
(Lc 6.27-28, 32-36)*

⁴³ Énerichuvare esamairiricahi eta acane eta náimitucasivahi ena iáchucanaveanaini: “Émunasirahi nácani témunacaheanahi. Tásicha, ecatichayarepa nácani ticatianacaheanahi”. ⁴⁴ Nútisera numetacahe: Émunacayareva nácani ticatianacaheanahi. Eyaseaca ema Viya eta nayujarahuina nácani téchajicanahi eyehe. Ímereca eta iúriva nayehe nácani ticatichaqueanahi. Eyu-jaraucha nácani tiúmehaheanahi ticaetemajiricaheanahi. ⁴⁵ Te ítaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tiúriana. Éma, tijaracahavi vimutu eta sache vimícahuhi, étapa eta tiquiva. ⁴⁶ Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipécaturarahiana náichahí eta juca. ⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimati-rahanahi ema Viya tiúrianahi eta nayehe ena naparapenaveana. Étisera tatuparacahe ecachuricayare eta iúriva. ⁴⁸ Tétavicavasareya eta iúriva nayehe namutu. Vahi enerejicaimahi ena achaneana. Váhivare eyavanaimahi eta iúriva. Ecutiyare ema Vicaiyaquene te anuma eta máurivahi.

¹ Eta ecajirayare ena páureana, échapavayare. Ema Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachaheanayare. Tájinavare máitsirijicavahini éma eta eyehe. ² Eta tacahe, te ímicatacayarepuca nácani ticamunuwanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya. ³ Te jácani píjaraca nácani ticamunuwanahi piyehe, vahi picumetajirica. Váhivare picumetaca nácani pémunacasareana. ⁴ Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimararacahi tamutu. Jácani píchaqueneana tayumururevana, éma títsirijiequenehayare, tíjaracaviyare eta píuchihi.

*Ema Jesús tímitucahavi eta viyujarasirayare
(Lc 11.2-4)*

⁵ Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimraracayarehi ena achaneana. Nútisera numetacahe: Tájinachucha nacunachacarevaimahi me Viya. ⁶ Étisera ani tacaheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímararacahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa táchamesahini eápepiricahini eta eyujarasirahi. Vahi ecucuti ena máimatiranahí ema Viya. Tiúpiemanapa eta nayujarasirahi, náimijachaipa tisamacareanahí mayehe ema Viya. ⁸ Vahi ecucuti éna, taicha ema Viya máimatiripahi éma jácani vivarahaquenehi viyaseaca. ⁹ Éti, ani tacaheya eta eyujarau-chiravaina: Tata Vicaiyaquene, piti piáviha te anuma, vipicauchahi yátupi eta píjare. ¹⁰ Vivaraha ichapeina eta tasuapacarevaina eta pivanaipiripiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ¹¹ Pájapanuhavi píjaracahavi puiti jena sache eta vicamunuirava eta vinicaqueneana. ¹² Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe. ¹³ Vahi picuisapahavi eta vicha eta tamauriquene. Picatiuchahavivare mayehe ema Váinaraji. Taicha píti yátupiquenevihi Viáquenuvihi. Nájina pácuti eta pítupajijiasiravahi. Máihecuaraquie eta pijaraivahi. Amén.

¹⁴ Taicha te yátupihi eta erperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheyare éti apanava. ¹⁵ Téhesera te vahi erperdonachahí ena ticaviurevanahi eyehe, ema Tata Vicaiyaquene váhivare tiperdonachahémahi eta ejecapiravanahi éti.

Ema Jesús tímitucahavi tayehe eta ayuna

¹⁶ Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahí eta ayunairanahí. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe. ¹⁷ Étisera, te ayunahepuca, ímiyanava eta esipauquchiravaya, etatasicavavare, apaesa nacuija nacuimatiacahe eta ayunairahehi. ¹⁸ Ema Tata Vicaiyaquene tímararacahehi tamutu eta esamureana. Tisamacareyarehi eta eyasearuhi.

*Ema Jesús tímitucahavi eta vahi vicuisapava vicasamure eta vímahaqueneanahi
(Lc 12.33-34; 11.34-36)*

¹⁹ Váhivare tacuavasamurerecahe eta ímahaqueneana te juca apaquehe. Eta juca ticamitiequenehacareana taicha eta tajararesira eta cachusiri, etapa eta táichasivayare. Natiarihivare ena tiámeyechaheanayare. ²⁰ Epanere-chasera eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinavare tiámerahina tayehe. Tájina témitiacaimahi. ²¹ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehi-chapuca eta ícuchiana te anuma, ánaqui evarahayare eyanavaneyare.

²²⁻²³ Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepapuca eta ímahaquene, tétavicavahi eta tamapicuvahи eta te iáchanevana. Téhesera esuapa eta nímiturapiana, tétavicavahi eta tamicauchiraya eta iáchanevana, tímijunijicayare eta emaurivahi, etapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

²⁴ Tacutiquene éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayare-hivare; tásicha ema apana, apaesarineya eta émunasiraya, váipainapa tisuapa-caremahи éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, etapa eta ecaemataneasirahi éma.

*Ema Jesús tímitucahavi eta majaneasirahavihi ema Viya viti
machichanaveana
(Lc 12.22-31)*

²⁵⁻²⁶ Étasera nuvaraha yátupina eta ecasiñavairaina mayehe ema Tata Vicaiyaquene. Vahi ecuaeñamaracavaicha tayehe eta enicaquenerepi etapa eta emuiriharapi puiti juca ítaresiraichaha. Eta enicaquenerepi, etapa eta emuiriharapi, tájina tábamavacarevahini. Ímararacarichuhi eta cágureana. Vahi táevacahini, váhivare táchetajiricahini, táunacahipucaini eta tanicaqueneyare. Émasera ema Tata Vicaiyaquene máechapajiricahi, máijarasirahi tamutu eta tanicaquenerepiana. Evetijipa éti, iápajupanavahi eta éñamacarévahи me Viya tayehe eta cágureana. ²⁷ Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapanetahapasamurechahehipuca.

²⁸ Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacaeñamaracavahini tacaematanehini, tájururecahipucaini. ²⁹ Táitsivahisera, te tépunehana, tétavicavahi táurinavahi eta taflurene. Nájina táchuti eta nacamuirihaira eta táurinava, émaripa ema víyarahaini rey Salomón eta tajanunusira eta macamui-rihairahi. ³⁰ Apanasicahi, ema Viya máijaracahi eta táurinavahi, ániperichuhinéni eta táitaresirahi. Evetijipa éti eta máechapajirisirahehi, máijarasirahheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe? ³¹ Eta tacahe, vahi ecuaeñamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi. ³² Ena achaneana vahi náimatihini ema Viya, ichapemurihi eta tacaeñamarasiravacahi eta júcana. Vahi nácasíñavahini mayehe ema

Viya, nacuchapahipucahini eta máijararuyarehi éma. Étisera, écharine eta mararihirahi ema Ecaiyaqueña te anuma. Máimatihi ema tamutu eta ecamunuqueneanahi.³³ Tásihasera éti, tativayare íjaracava ecaemataneacaya ema Viya, ecasamureirahi eta ítauchirayare tamutu eta mavarahaqueneanahi. Tíhapasamurechaheyarehivare eta tátupiruvairaya eta ítaresira, ecurisamurechirayare ema. Máimaharinepa ema. Tíjaracaheyare tamutu eta juca ecamunuqueneana.³⁴ Eta tacahe, ácasiñava mayehe ema. Vahi tacuimipanerechahe eta íchararacavayare achichu. Puiti ecuchapaipa eta máimicatasiraheyare. Ímiyanava eta ecuchapirayare eta máimicatasiraheyera.

7

*Ema Jesús tímitucahavi eta vahi vicunemahi eta náejecapiravana ena apamuriana achaneana; vicuneuchavasera víti
(Lc 6.37-38, 41-42)*

¹ Vahi ecunemahi eta náejecapiravana ena apamuriana achaneana, vahivare ecucae Cahivaca, machu étina táimicuñacahe me Viya. ² Te ecunerahipuca nayehe ema apamuriana achaneana, ecaheyare éti eta macunera-hénapa ema Viya tayehé tamutu eta ejecapirávanahi éti. ³ Piti ajaira, pítipa piti esena, vahi táurica eta picunerahi eta ánichichaqueneana náejecapiravanahi éna. Tituparacavi pítijivaina picuneuchava eta táichapeva eta péjecapirava. ⁴⁻⁵ Vahi tatuparacavimahi pétupirica eta jácani náejecapiravahí ichipichuana ena piparaepiyana. Tájina piviyahini eta piconsejachihaimahi. Ichape-sera eta tatuparasiravihi pétupirica eta péjecapiravanahi pítí. Tapaenu-mava pétupirica eta píchavaquenévanahi, táuricapaini piconsejacha ema pi-paraeipyá tayehé eta máichavaquenévahí.

Ena ticaecahirahiana, vahi vicuijaraca jácani téñamacareana

⁶ Vahi ecuimituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étina táemehahe. Vahivare ecuijaraca jácani téñamacareana, machu nácatayayajica.

*Vahi vicuyacuji eta viyaseasiraina ema Tata Vicaiyaquene
(Lc 11.9-13; 6.31)*

⁷⁻⁸ Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapapuca eta jácani íchiraya ichapehi eta tacajeravayarehi, eyaseacayare máijaracahehini eta ítupajijiasiravaya. Éma, tíjaracaheyare. Te jararihipuca eta táichejimiráuchahe, éma macaevuisinaheyarehi.

⁹ Eta juca tímicutijiricavahí te natarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjara-cahini éti eta márijahi. Tímicutijiricava evijaruinahini ena echichanaveana.

¹⁰ Étaripa te tiyaseacaheanapuca eta jima, vahivare táuricaimahi íjaracaimahi eta quichare. ¹¹ Etiarihi éti vahi ecajirahihini nayehe ena achaneana. Iúrihisera nayehe ena echichanaveana. Mavetijicha ema Tata Ecaiyaqueña tiávihahi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta iúriva nayehe. Taicha eta tacahehi eta táimiturapi eta Sagrada Escritura eta eyehe.

*Jararihi eta apina achene
(Lc 13.24)*

¹³⁻¹⁴ Esamanuchaha. Jararihi eta apina achene. Eta ichape achene, vahi táchajéra eta náehisira ena achaneana. Camurianapana ena téhicana eta ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítaresirayare, tájina ecuñaraquina. Váhisera camurianaina ena téhicana éta. Éti epamicava esiapa tayehe eta achene ánicuchicharichu.

*Ema Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi
(Lc 6.43-44)*

¹⁵ Échapavayare tayehe eta náimiturapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihu eta tamansuva eta uvesa. Téhesera te nasamureana, tétavicavahi eta navainarajiva, nacutihu eta ichini. ¹⁶ Ímatiacavacahisera éna táichavene eta náichaqueneana. Nacutihu eta yucuquiana. Eta yucuqui, tímaticarehi eta táhi. Étaripa eta sitavere, váiparinehi tiúchucaimahi eta tacahihini narasahinahipucaini. Tásicha, eta ijicaqui váiparinehivare tacahimahi eta táhi cachicheruhinahipucaini. ¹⁷ Tacutiquene, tímaticarehi eta táhi eta yucuqui tiúrinisi. Tímaticarevare eta táhi eta máurinisiráhana. ¹⁸ Eta yucuqui tiúrinisihi eta táhi, vahi témunahircavaimahi vahi tacurinisihini eta táhi. Étaripa eta máurinisiráhana, váhivare témunahircavaimahi táurinisihini eta táhi. ¹⁹ Tamutu eta yucuquiana máurinisiráhana ticaechuyarehi, tíjuyarepa te yucu. ²⁰ Eta tacahe, ímativacayare ena tépiyahirahiana táichavene eta náichaqueneana tamauriqueneana.

*Vahi námutuimahi titujicavana tisiapanaimahi te anuma
(Lc 13.25-27)*

²¹ Nararihinapa ena achaneana tépiyacavana nuchanerana. Váhisera titujicavanaimahi tisiapanai tayehe eta mávasa ema Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneari ema Tata Nucaiyaque te anuma. ²² Te táitecapapa eta juicio, camurianayare ena táchuanayare: “Tata Viáquenu, víti véchajisihaparacahi eta píjare. Vipiaracavihi te píjare eta viáqujisirahi ena váinarajiana, téhevare te píjare vímerecahi eta tiáramicareana” náichanuinapapuca. ²³ Nútisera nujicapainapa: “Éti vahi nuchanerahéna. Nímatisera núti eta íchaqueneanahí tamauriqueneana. Évuisiha te numirahu” níchainapa éna.

*Ema Jesús máimicuticha ena tisuapajirahiana énapa ena masuapajirairahana
(Lc 6.47-49; Mr 1.22)*

²⁴ Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyarehi mácani titucahi tépiyareca peti, manacayarehi eta túmeana yucuqui emuruquiana. ²⁵ Jéhesare, te járajapapa eta muraca técaticava, tiámaquiha tiquiva, tisiampa etá une, váipasera tacayaya-cahini eta peti, taicha tiúsiapiravacahi. ²⁶ Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihu ema máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha. ²⁷ Te járajapapa eta muraca técaticava, tiámaquiha tiquiva, tisiampa etá une, tacajimuyapaicapa eta apaquehe. Tiáquipaicavapa etá peti, tamutusamipa témitiequeneha –máichavacapa ema Jesús.

²⁸ Te titapiricapa ema Jesús eta máimitusiravacahi ena achaneana, ichaperinehi eta náramirahi eta máimiturapiana. ²⁹ Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

8

*Ema Jesús macanaraca ema émana achane leproso
(Mr 1.40-45; Lc 5.12-16)*

¹ Te tiúcupaicapa ema Jesús tayehe eta cerro te máginehi, camuriana éna achaneana téhicanapahi. ² Tacahe, macahepaipa ema émana achane leproso. Témeñahavapa mayehe ema Jesús. Tépuyucapa te mamirahu. Tásicha, máichapa:

—Tata, nucasiñavahi eta piyeho, picanaracanupaini.

³ Tacahe, ema Jesús majicapapa:

—Nuvaraha nucanaracavi. Tájinapa píchiravaina puiti —máichapa.

Máemamahacapa. Tásicha, enevanepa tinaracahi ema macajumaquenénihi eta máechajisirahi ema Jesús. ⁴ Tásicha, ema Jesús máichapa:

—Pímaha, nacuija picumetaca eta nútirahi nucanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timeta-jiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

*Ema Jesús macanaraca ema manusura ema capitán romano
(Lc 7.1-10)*

⁵ Tacahe, ema Jesús títecápapa tayehe eta Capernaúm. Matiarihihi ema achane apavasana. Comandantehi éma nayehe ena suntaruana romanoana. Capitán eta mágacure. Tiyanapa mapauchapa ema Jesús. ⁶ Mayaserecapa, ánipa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

⁷ Ema Jesús, majicapapa:

—Tiuri, nuyanayare nucanarapanayare —máichapa.

⁸ Tásicha, ema capitán majicapapa:

—Tata, vahi picucaeñamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura. ⁹ Taicha nútí nusuapahi te tivane-canuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane —máichapa.

¹⁰ Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasiñavairahi eta nuyehe.

¹¹ Numetacahe puiti: Járabajapainapa eta sache, náitecapiraya ena camuri-queneana achaneana apavasanana tiásihanayare te tamutu avasareana te juca apaquehe. Tisiapanayare eta mágasa ema Tata, te mávihahi ema viáchucaíni Abraham, ema Isaac, émapa ema Jacob. Tétavicavainapa eta náurisamurevaya. ¹² Tacahe, tamapuruji eta náimatiquenehairahi ena vijaneanana israelítana eta máechajiruva ema Tata, váhisera nácasíñavahini

eta nuyehe. Eta tiviuchavacayarehi tayehe eta nacaicuñaiyaya eta te tamapi-cuquene te távihahi eta táijurequenehi yucu. Ticapitiquiahechavanainapa eta tacativayare nasama. Tíyahanañinapa —máichapa.

¹³ Tásicha, ema Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasi-ñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechaji-risiravahi éna.

*Ema Jesús macanaraca esu máimase ema Pedro
(Mr 1.29-31; Lc 4.38-39)*

¹⁴ Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi. ¹⁵ Máemamahacapa, enevanepa táetaviacahi eta fiebre. Tinara-capá. Enurujipa téchepuca. Tásicha, tépanavapa ésu eta suítátirahi ema Jesús.

*Camuriana ena macanararuanapahi ema Jesús
(Mr 1.32-34; Lc 4.40-41)*

¹⁶ Te yátipa, títecaparácanapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanahi ena nacajumaqueneanahi. Macanaracavacapa ena apamuri-aná tisamanahi eta apana jumareana. ¹⁷ Eta juca títauchavapahi eta táechaji-sihairahi eta májurehi ema víyarahaini profeta Isaías, ani tacahehi: “Masami-nahavihivare eta vijumana eta macanarasirahavihi”.

*Tituparacahavi vahi véñamavaimahi eta víjarasiravahi véhica ema Jesús
(Lc 9.57-62)*

¹⁸ Te máimahapa ema Jesús ena camuriqueneana achaneana nachayachi, macavanairipipa ena máimitureana natsecava eta nánuesirayarehi te apachara cáquiure. ¹⁹ Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaqueneyare piámianu —máichapa.

²⁰ Ema Jesús, ánipa tacahehi eta majicapirohi:

—Tamutu eta sárareana ticapenavaca. Énerichuvare eta cágureana tamacajipachuvare. Nútisera nuti Manerejirunuhi ema Viya, tájina nufiya nusiapi-hahini —máichapa.

²¹ Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumaya-rehini eta máepeniraya ema ticachichanu, nécaranumaya. Tásicha, nucapaya-cavipa néhicaviya —macahepa.

²² Ema Jesús majicapapa:

—Péhicanuchucha. Pésamirica náecaracacaichaha ena máecharaireana. Tájina tájaracavimahi eta juca tihapasamurerecavihi —máichapa.

*Ema Jesús macaesamirica eta táepacusirahi eta une étapa eta técaticava
(Mr 4.35-41; Lc 8.22-25)*

²³ Te titapiricapa ema Jesús, tiávacuropa te pacure. Énapa ena máimitureana, náehicapaipa éma. ²⁴ Te itupierecanapa, járajapapa eta muraca técaticava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma. ²⁵ Tacahe, ena máimitureana tipiarare-canapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

26 Ema majicapavacapa:

—¿Tájaha tacayema epica? ¿Vahi ácasiñavapahini eta nutiarihirapahi eta eyehe? —macahepa.

Tásicha, téchepucapa. Macamatinacapa eta técaticava étapa eta une. Enevanepa tésamiricavahi eta táepacusirahi. Tájinapa táichiravainahini.

27 Ena máimitureana ichaperinehi nárami. Ánipa nacahe:

—¡Tétavicavahi eta máitupajijasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técaticava étapa eta une eta táepacusirahi! —nacahepa.

*Ena apinana ajairana návaháruana ena ichapemuriqueneana éreanana
(Mr 5.1-20; Lc 8.26-39)*

28 Te títecrapapa ema Jesús te apachara eta cáquiure te apaquehe Gadara, tiúchujicanapa te ecari ena apinana ajairana, návaháruuanahi ena éreanana. Tétavicava eta náiñehivavacahi. Náehayarehi nácani tiánucuhanapahi. Tacache, napauchapa ema Jesús. **29** Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevihi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyayare! —nacahepa.

30 Tásicha, tatiarihihivre nacachacayahi eta camuriqueneana cúciana tinhicanahi. **31** Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúciana —náichapa.

32 Tacache, ema Jesús másapapa:

—Tiuri, eyana esiapahacavaca —máichapa.

Tacache, tiúchucanapa ena éreanana nayehe ena návaháruanainihi. Tiáramemurihanaínehi eta cúciana. Tijunaparacanapa témiririjicanapa te tachausi eta cáquiure. Téririjicanapa. **33** Ena tijanearecanainihi eta cúciana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruuanahi ena éreanana. **34** Tacache, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuitecapahini te návasa, machavahini te másinehi.

9

Ema Jesús macanaraca ema émana achane macajumaquene eta muracaquiha

(Mr 2.1-12; Lc 5.17-26)

1 Tacache, ema Jesús tichavapa tiávacuhavarepa te pacure. Tichavapa tayehe te mávasahi Capernaum. **2** Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Péturechava, nuchicha! Nucaepahainavipa eta pipecaturanaini —máichapa.

3 Natiarihi ena escribánoana. Eta nasamirahi ema Jesús, ánipa nacahe te nasamure: “Ema maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!” **4** Émasera ema Jesús máimatihi eta napanerueruanahi. Máichavacapa:

—¿Tájaha tacayema eta éjecapirava nuyehe te epanereruanahi? Núti tájina nutapiravaina eta níchirahi eta juca. **5** Núti, eta nucaepahairahi eta

mapecaturana ema maca, tacutihu eta máejerarerahi eta nucanarasirahi eta máquehe. ⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyeleruva. Piyana te pipena —máichapa.

⁷ Enevanerinehi téchepuca ema macajumaquenéni. Tiyanapa te mapena. ⁸ Ichaperinehi eta náramirahi namutu ena achaneana natarihiqueneanahí. Tétavicavarinehi eta nacunachirahi ema Viya taicha eta máitupajijiasirava ema Jesús etá máijarasirahi ema Maiya.

*Ema Jesús máichuha ema achane ticaijare Mateo, mayeheyare apóstole
(Mr 2.13-17; Lc 5.27-32)*

⁹ Te apanapa sache, nuti Mateo néjacahi eta te nucobrarezirare eta impuesto. Tacahe, tiánucuhapaipa ema Jesús. Te tímahanupa, tíchuanupa.

—Yare, péhicanu —máichanupa.

Enevanepa, néchepucahi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhabacapa ena nuchamuriana ticobrarecarahianahí eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús etá vinisirahi. ¹¹ Títecapanavarepa ena fariséoana. Eta náimairahi namutu ena némunaruqueneana, eta vicachanerahi ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobrarecarahiana eta impuesto? ¡Ticapecaturrahiana éna! —nacahepa.

¹² Te masamairiricapa ema Jesús etá náechajiriruvana, máichavacapa:

—Ena majumareanahí vahi nácamunuimahi ema médico. Nacarichu ena ticajumanahí nacamunuyarehi ema médico. ¹³ Nútiripa vahi étina tímitecanuhi nutanucayarehi nácani matapiravareanahí. Nutanucapahi nútí ena tisipecaturana, apaesa náeneuchava, náinajica eta napecaturana. Tásiba étí, eyana ecaravahu eta máechajiriruvanahí ema Viya. Ánipa macahe: “Núti nivaraha yátupinaini eta ejapanuraivainahini. Taicha te vahi, tamapuruiyare etá ecamavahuirahi eta nuyehe” macahepa ema Viya.

*Nayaserecapa ema Jesús tayehe eta ayuna
(Mr 2.18-22; Lc 5.33-39)*

¹⁴ Títecapanapa ena máimitureana ema Juan Tícachasiricarahí, nayase-recapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

¹⁵ Ema Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahí tinicanahí nayehe ena araimana. Tiúrisamure-nayarehi taicha matiarihihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi etá ayunanainahini ena nímitureana. Járajapainapasera etá sácheyare, ticaverejicasianayare taicha ticaratacanuanainapa ena ticapacanuanaya nútí.

¹⁶⁻¹⁷ Esamanuchaha. Eta juca etá nímiturapihana, amairiha arairu. Mavaraha ema Viya arairuyare etá eyeherepianayare eti achaneana. Vahi

ticuticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tamauriqueneanahi – máichavacapa ema Jesús.

*Ema Jesús macanaraca esu machicha ema Jairo, ésupa esu apana esena sucajumaquenehivare
(Mr 5.21-43; Lc 8.40-56)*

¹⁸ Téchajiricavaichahahi ema Jesús nayehe ena achaneana, títecapanechavare ema émana achane ticaijare Jairo. Tuparairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahini –máichapa.

¹⁹ Tásicha masuapapa ema Jesús. Tiyanapa te mapena ema Jairo, vimutu-paichu viti máimitureana. ²⁰ Tásicha, sutiaríhihivare esu ésuna esena sucajumaquene. Doce áñoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiriha. ²¹ Taicha te supanereru ésu, sucahehi: “Taratarichu jácani te némamaceta ñimuiriha, éta ticanaracanuyare” sucahepa. ²² Émasera ema Jesús masamarichucha eta suémamajiasirahi, macaicutiarahi eta macanararesirahi. Téquerucavapa. Máimahapa eta supisirahi esu esena. Tásicha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi –máichapa.

Tacahe, tinaracapa esu esena. Vaipa tápechahini eta sujumainihi.

²³ Tiyanavarepa ema Jesús. Títecapanapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquéne. Énapa ena achaneana, tijajamurianaripahi eta náiyirahi. ²⁴ Tásicha, ema Jesús máichavacapa:

—Iúchucachaha te aneca. Váhinéni suépenahini esu suca amaperu. Tímacarichucha ésu –máichavacapa.

Énasera nacaecahirichucha éma, téavanapa. ²⁵ Te tiúchucanapa ena achaneana, tisiapapa ema Jesús te suávhahi esu suépenaquéne. Macarata-vauchapa ésu. Macaechepecapapa. Tichavapa titarecahi ésu. ²⁶ Te nasamairiricapa ena ticavasanahi eta te Capernaum, náraminehi namutu. Nacatsatсаicapa timetajiricanapa.

Ema Jesús macanaraca ena apinana púchuquiana

²⁷ Tiuri, tichavayarepa ema Jesús te mapena. Eta mapaisirahi te calle, náehicapaipa ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasíñavi piti yátupique-névihi Cristo! –náichapa.

²⁸ Váhisera masuapavanehini éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásicha, éma mayaserecavacapa. Ánipa máichavaca:

—¿Yátupipuca ecasiñanuhi eta nucanarasiraheyare? –macahepa.

Ena najicapapa:

—Yátupi, tata.

²⁹ Tacahe, ema Jesús máemamacapa eta náuquihana. Tásicha, máichavacapa:

—Tiúri, eta ecasiñairanuhi, enaracayare –máichavacapa.

³⁰ Jéhesare, enevanepa tinaracanahi. Tímairiricanapa. Tásicha, muracapa eta matuparasira vahi nacumetajirica eta macanarasiravacahi éma. ³¹ Váhisera

nácahehini éna. Étarichuhi te tiúchucanapa, timetajiricanapa eta macanarasirvacahi. Tásicha, náechapa namutu te tachacayarahahanahi eta avasare eta juca máichaquenehi ema Jesús.

Ema Jesús macanaraca ema achane upa, macaechajicahi

³² Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana. ³³ Tacahe, ema Jesús máquijicapa ema éreana, ema tiávahácainihi. Tásicha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina táchutihini eta juca vímahaquenehi —nacahepa.

³⁴ Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenu-murihi ena éreanana. Máijararuhi jácani eta máitupajijiasiravahí eta macuchusiravacahi éna —nacahepa.

Ema Jesús majapanuvaca ena achaneana

³⁵ Ema Jesús tamutuhi mapaica eta avasareana étapa eta ánicchicha-queneana avasarechichana. Tímiturecapahi tayehe te jácani máitecapihapahi te nárujisirarevana. Ticametarairupahi eta máechajiriruva ema Viya eta náuchucuirayare ena ticasíñanahi éma, machaneranayarehi éna. Ticanararecapahivare ena ticatajivanahi ticacatiruhanahi. ³⁶ Camuriana ena achaneana tínanajirícavanahi. Taicha ticatajivanahi éna, nájina nácasíñahini. Nacutihi eta uvesa te nájina tijaneacaina. Eta máimairavacahi ema Jesús, ichape eta majapanuiravacahi. ³⁷ Tacahe, ema Jesús máichahavipa viti máimitureana:

—Tétavicavapa eta vicamunuirava ena tímicatakahavianaya tayehe eta juca vématanerepihi. ³⁸ Eyaseacayaresera ema Tata Vicaiyaquene, máijaracahavi ena tímicatakahavianayare. Eta juca tímicutijiricavahí mácani achane eta macamunuiravahí ena tímicatacacanaya te máechatijicaya eta maharusura —máichahavipa.

10

Ena dócequeneana apostóleana manerejiruanahi ema Jesús

(Mr 3.13-19; Lc 6.12-16)

¹ Tacahe, ema Jesús tíchuhahavipa viti dócequeneana, mayeheanayare apóstole. Tíjaracahavipa eta vítupajijiasiravayare viratahairayarehi vicuchucavaca ena éreanana, vicanarasirayareva ena nacajumaqueneana étapa eta nacatiruhavana.

²⁻⁴ Eta juca víjareana viti apóstoleana*: Ema tínapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútipa Mateo, ema apaña Jacobo, ema Lebeo, ema apaña Simón, émapa ema Júlasi Iscariote (ema tíjararecahi ema Jesús).

* **10:2-4** Ena nani apinana ajairana ema Jacobo émapa ema Juan, naparapecacahi, machichanaveanahi ema Zebideo. Ema Mateo, eta máematanerepinih, ticobrareca eta impuesto. Ema apaña Jacobo, machichahi ema Alfeo. Ema Lebeo, mapapihi eta máijare. Ticaijarehivare Tadeo étapa eta Judas. (Te pivaraha pecha, pitanuca te Marcos 3.16-19 étapa te Lucas 6.14-16.) Ema apaña Simón, tímaticarehi éma, nachamurinihi ena revolucionárioana ticaijareanahi “cananístana”. Navaraha náquijica ena extranjeroana romanoana.

Ema Jesú斯 mavanecavacapa ena dócequeneana apóstoleana napaicayare tamutu avasareana, ticametarairuanayarepahi

(*Mr 6.7-13; Lc 9.1-6*)

⁵ Tacahe, ema Jesú斯 tévatacahavipa viti dócequeneana apóstoleana vicametairuyarehi. Ánipa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritánoana. ⁶ Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana. ⁷ Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya. ⁸ Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepecayareva ena náepenaqueneana. Ecuchucayareva ena éreanana. Éti, vahi evachare-ruinahi eta juca ítupajijiasiravahi, váhivare ecobrachaimahi nácani ecanara-ruanayare.

⁹ Váhivare iámaimahi eta oro, eta plata, eta reale. Tacuija iama eta enirrucuha te alforja. ¹⁰ Étanarichuvare emuiriha, éta iámayare. Étapa eta éparupeva, étaripa eta eyupairiquiana. Ema ticaematanerahi, tatuparacahi náenicayarepahi te jácani macaemataneyapahi. Ene ecaheya éti, titátihea-nayare ena tijacapanaya eta ecametarairuirayarepahi.

¹¹ Te ítecapaucha jácani avasare, etanucayare ema achane tiuri, témunarahi. Enasiyare mayehe. Tiámainucava te táitecapa eta iúchusirayareva tayehe eta avasare, epaenumavaya ejunijica eta ítecapihahi. ¹² Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti. ¹³ Te tiúrianahi ena achaneana ticapenana hi eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi. ¹⁴ Étaripa te váhipuca nacujacapahe te jácani avasare, étapa te jácani peti ítecapihayare, váhivare nacuvaraha nacusamahe, iúchucavane-yareva. Étatapevachavanúmayareséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini. ¹⁵ Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana vánara-jiqueneana ticavasanaini te Sodoma étapa eta Gomorra.

Nacatianacainapa ena téhicanapahi ema Jesú斯

(*Lc 12.2-7*)

¹⁶ Esamanuchaha. Núti nuvanecahehi éti eyana epaica. Nararihisera ena achaneana vánarajiqueneanahi étupiaruanayare. Éna nacutihi eta sárare táiñehiqueneánahi. Étisera ecutiyare eta uvesa eta tamansuvahi. Ítucayare eta ecaichepaisirayare eta navainarajivana. Váhisera ecujicapauchava te návarahapuca náehahe. ¹⁷ Échapava, taicha nararihiyare ena achaneana tictorianacaheanayare táchavenehi eta éhisiranuhi. Ticaratacaheanainapa, écayaserehinapa nayehe ena juéseana. Téstacaheanainavarepa eta te náuruji-sirarevana. ¹⁸ Tásicha, etiarihiyare éti tiámaheanaya te namirahu ena aque-nucana, téhevare te namirahu ena Presidenteana gobiernoanahi, ecaviu-revayare táchavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana. ¹⁹ Tacahe, te jácani námahepapuca te nami-rahu ena aquenucana, vahi ecueñamava tayehe eta jácani échajichiravayare, ecatiuchiravayare. Échajicayare eta échajiriruvana máijararuheyare ema

Espíritu Santo te jena sache. ²⁰ Taicha máimahaheinepa, tímitucaheyare eta échajisiraya. Vahi étijivaimahi eta échajisiraya.

²¹ Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi nútì. Natiarihiyareva ena nácani náiyana, navarahayareva náijarareca ena nachichanaveana táichavenehi eta náehisiranuhi nútì. Natiarihiyareva nácani nachichanaveana nacanarainapa ena náiyana, náimicac Cainapa táichavenehi eta náehisiranuhi nútì. ²² Namutuyaréni ena achaneana tictorianacaheanayare táichavenénahi eta éhisiranuhi nútì. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucuhahayare nútì. ²³ Te napanajicahepuca te jácani avasare iávihahi, táichavenehi eta ecametarairuirahi, ejunayare tayehe eta apava avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

²⁴ Éti nímitureana, tictorianacaheanaya ena achaneana. Vahi epicauchacaréimahi nayehe, táichavenehi éhisiranuhi nútì. Tictorianacaheeyaresera tacuti eta nacatianasiranuhi nútì. ²⁵ Tíjarechaheanayare váinarajihe, máurishihepuca, tacuti eta náumehairanuhi nútì. Étisera, evapinavaya eta ecutiranyare eta nacatianasiranuhi nuti iáquenu, nútì eyehenuhi maestro.

²⁶ Váhisera ecupicavaca ena tictorianacaheana. Ema Viya tímarara-caheya. Ticunachaheya eta ecamichirahi, evehainapa eta ícuchihi. ²⁷ Tásicha, étumechava eta ecametarairuiraya tamutu eta nímiturapiána te tamutu avasareana. Jácani néchajiriruvanahi te timapicu, éti ecuchujicayarehi te tijarahi, emicauchiravacaya ena achaneana. Étaripa eta nujajairuhehi te vicarichuhi, epiaracainapa te calle. ²⁸ Vahi ecupica nácani nacapacapuca eta iáquehe, tacarichuchucha náiteturuequenehayare. Váhisera naratahaimahi nacamitiequeneha eta iáchaneva. Macarichu ema Viya epicayare, taicha éma maituruequenehahi tamutu. Maratahahí macamitiequeneha eta iáchanevana tayehe eta táníehiquene infierno, te ecainajiruva táichavenehi eta episirapuca eta nacapasiraheyare.

²⁹ Nímicutichinahe eta cágurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta tátaresirahi, éta etapa eta táepenirahi. ³⁰ Evetijipa éti, éñamacarepanahi me Viya. Éma, tímätipa etá tatupa eta echutimacana. Téchahehivare éma tamutu eta ítaresirana. ³¹ Eta tacahe, vahi ecueñamavahi éti tayehe eta ítaresirana, taicha téavicavahi etá emunavahi mayehe.

*Vímereuchavayare eta véhisira ema Jesús
(Lc 12.8-9)*

³² Tímiyanava ema Jesús tímitucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, nútì apanavare nímereuchavaya eta nuchanerairavacahi éna mayehe ema Tata Nucaiyauquene, ema tiávihahi te anuma. ³³ Nácanisera vahi návarahahini tímereuchavanahi eta náehisiranuhi, nútì apanava nímereuchaya etá vahi nuchaneranainahini éna, te mamirahu ema Tata Nucaiyauquene.

*Ena achaneana náepuruvacainapa nácani téhicanayare ema Jesús
(Lc 12.51-53; 14.26-27)*

³⁴ Éti ímijachaipapuca etá nítésirahi te juca apaquehe, tájina tácayemacarémahi, tiúricacareyarehi nícha. Váhisera ene tacahe. Níchaveneya nútì, ena achaneana tépuruheanaya térajicavanaya eyehe. Eta tacahe, nuvaraha échapirica yátupina etá juca éhisiranuhi. ³⁵ Taicha puiti juca vicaijuheyare,

mácani achane, te natiahi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinenaca, suctianacayareva esu suímase taicha eta suéhisiranuhivare esu apana. ³⁶ Ene nacaheya, nararihiyare ena tachichanaveana eta peti ticatianacana ena náiyana te peti níchavenehi núti.

³⁷ Nácanisera tínajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchaneranainahini. Énaripa nácani tínajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini. ³⁸ Énerichuvare nácani apaesarichu eta navarairahi téhicanuanahi, váhivare náijaracavahini táimicapacahini eta náehisiranuhi, vaipa tátuparacahini nuchaneranainahini. ³⁹ Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehavanaya. Énasera nácani yátupi tíjararecavanahí téhicanuana, táimicaparuanayarepuca eta náehisiranuhi, éna tiúchucuhanayare eta náitaresirayare.

Jararihi eta víuchihi te anuma

(Mr 9:41)

⁴⁰ Ema Viya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahi eta najacapiranuhivare núti; énerichuvare najacapahivare ema Tata Nucaiyaquene. ⁴¹ Énerichuvare nácani tijacapanahí ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máijarasiravacayare eta náicuchi. ⁴² Énaripa ena témunarahianahi nayehe ena nani ánichichaqueneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchiquene –máichahavipa ema Jesús.

11

Ema Juan Tícachasiricarahi mavanecavacapa ena máimitureana (Lc 7:18-35)

¹ Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajiriruvana ema Viya.

² Tiuri puiti, ema Juan Tícachasiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús. ³ Te náitecapauchapa, náichapa:

—Ema viáquenu Juan tivanecahavíhi viyaserepanaviyare te yátupihipuca pítiripahipuca Cristo ema vicuchapaquenéhi, ¿téheserapuca vímiyanavaya-repuca vicuchapa? —náichapa.

⁴⁻⁵ Ema Jesús majicapavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiana. Nímpaisiraipa ena masariana. Nucanaracavacaipa ena leprósoana, énapa ena túhuquíana. Nucaehepusiravacaipavare ena náepena-queaneanaini. Énerichuvare níchuhahi ena páureana náeneuchavaya apaesa náuchucuha. Tásiba, eyana emetaca ema Juan tamutu. ⁶ Vaipa macueñamava ema Juan eta nuyehe. Tétavicavahi eta máuricacarevahi éma, te ticasíñavahi eta nuyehe —máichavacapa.

⁷ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mameetasirvacahí ena achaneana:

—Nuvaraha epanereuchayare ema Juan. Te jácani vuíchaha nacaratacrahini éma, te eyanapa te mávapahi apaquehe te mávihahi, ¿tájaha eta epaneruana tayehe eta macametarairuirahi? Éti ímijachaipapuca mamapachichijiriruvaichucha eta máechajisirahi tacutihi te vímararaca ta taflurena eta acutena te tacayamuririjica eta técaticava. ⁸ Ímijachaipavarepuca tavayuaruhi éma tiúrinanácvayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, vahivare tiyanaimahi te mávapahiana apaquehe. Manasiqueneyarehi te jácani tiúrina peti. ⁹ Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. ¹⁰ Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvane-cayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura. ¹¹ Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranaya, apaesachicha-pucaini eta nacaicutiarairahi eta mapaneruana ema Tata.

¹² Ema Juan tépanavapa eta máimitusirahi ena achaneana tacamunuirahi eta náeneuchirava me Viya. Nararihisera ena vahi náuricahini nasamararacahini. Étapa tímaticahahi témeccatajívachahi éma. Puíticha tanasihi ticticchanuana núti apanava, témeccatajivachuanuanayare. ¹³ Ema víyarahaini Moisés téchajisihanuhi eta te májurehi. Énaripa ena víyarahahanaini profetana náechajisihahi eta nítesirayarehi nuti Manerejirunuhi ema Viya. ¹⁴ Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinapumirauchiranuyare. ¹⁵ Te evarahapuca ecaicutiara, tavaraha eta epanerechinavaya.

¹⁶⁻¹⁷ Etiarihihisera eti achaneana puiti juca sácheana, eta emasuapajiraivahi, nímicutichahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepapuca: “Vépiyacaya eta piéstachicha”. Énasera ena apamuriana vahi náisapavahini. Tásiha, ema apana macahepuca: “Vépiyacaya eta ecari”. Vahivaresera náisapavahini. ¹⁸ Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana. ¹⁹ Nuti Manerejirunuhi ema Viya, eta nítecapauchirahepa, nucachanehepaipa eti achaneana eta enisirahi. Etiarihihivre eti épiyaequenehanahi: “Ímaha ema maca, cánisiuquitataji, cávahárasí. Macachanevacapaipa ena achaneana tisipecaturahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihihini échemarahi, ímatinuhini eta nucavana-hirahi eta me Tata —máichapa ema Jesús.

*Eta táicuñayare eta návasana ena achaneana masuapajirairahana
(Lc 10.13-15)*

²⁰ Ema Jesús tépanavapa máechajisihah eti táicuñayarehi eti avasareana máichinehi eta tiáramicareana. Ticaicuñanayarehi ena tachichanaveanahi

táichavenehi eta namasuapajiraivahi. Váhivare náeneuchavahini, náinajicahipucaini eta napecaturana. Máechajicapa ena achaneana tímicutijircavahi natariihinahini te mamirahu. Ánipa macahe:

²¹ —¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahíni. Ena nani achaneana ticavasanahi te Siria, apavasanahaninéni, téavicavahinéni eta namaurivahi, németeacasera nútia nasapihipucaini téneuchavana te náimahahini eta níchaqueneanapahi. Enévanenahíni náimerecavahini yátupi eta náeneuchiravainahini. ²² Numetacahevanesera: Te jena sácheyare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaicuñairaya ena achaneana apavasanana ticavasanahi te Siria. ²³ Étiripa eti ecavasanahi te avasare Capernaum, tamapurujíhi eta nímitusirahehi étapa eta ímairahi eta tiáramicareana níchaqueneana. Eti ecañavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épuruquichavayare eta te yucu taicha vahi éneuchavaimahi éti. Taicha te nímerecahini eta tiáramicareana tayehe eta avasaréni váinarajiquenehi Sodoma, táchutihini eta ímairahi éti, ichapehipucaini eta náeneuchiravainahini, váipapuca macuicuñacahini ema Viya. ²⁴ Numetacahevanesera: Ichape eta ícuñayare te táitecapapa eta juíciolare. Tacachuricayare eta náicuñayare ena ticavasanaini te avasare Sodoma —macahepa ema Jesús.

*Ema Jesús tiúrisamuréinehi mayehe ema Maiya
(Lc 10.21-22)*

²⁵ Étarichuhi te jena hórahi, ema Jesús ánipa macahe:

—Tata Nucaiyaquene, téavicava eta nucunachiravi. Jéhevare píti tákenuvihi eta anuma étapa te juca apaquehe. Títauchavaipa eta pipanereruhi. Vahi písapahini náitucahini eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena titupajijiacavanahi. ²⁶ Tétavicavahi eta táurivahi eta pipanereruhi píti, Tata Nucaiyaquene.

Ema Jesús máichuhavaca ena navitajiruana, mavaraha macanaracavaca

²⁷ Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájina énajivainahini náimatihini ema Tata. Nucarichu nútia néchinavahi ena nímimatiruanayare éma. Taicha nútia yátupihi eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma.

²⁸ Yare, ecañanu emutu eti evitajiruanahi te iáchanevana eti éyarecarahiana eta ejecapiravana. Nútia nucanaracahayare. ²⁹ Ísapava nunacasicahe eta nuyehe yugo. Nucachanehe apaesa ecaravahu nuyehe, taicha nútia mánsunu, téavicava eta nüriva eta nusamure. Éti téavicavaya eta iúricacarevaya te iáchanevana te ejacapa eta nímiturapiana. ³⁰ Taicha eta nuyehe yugo vahi tácjera. Tipevejiyare esama —máichavacapa ema Jesús.

12

Ena fariséoana náimipicauchahi eta nayeherepiana tayehe eta sávarumuahuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare.

(*Mr 2.23-28; Lc 6.1-5*)

¹ Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapaipahi eta isanitiana. Tac-ahé, eta vipaisirapahi, vécuhapaipa viti máimitureana. Tásicha, vivechuquiha-paipahi étajavapahi eta trigo. Vivepiraquiapaipa, vépurajacachavapaipahi. Vinicapaipa, taicha tísapacareichucha. ² Énasera ena fariséoana etá náimarara-sirapahi, tisemamajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraqui-hapahi eta trigo puiti juca sache téavicavahi eta tacapicahuirahi. Vahi tísapacaremahi eta juca nacaematanérahi puiti —náichapa.

³ Tásicha, majicapavacapa ema Jesús:

—Németeaca éti vahi ecaicutiara eta tacayemaquene etá Sagrada Escritura, eta máichavaquenevahí ema víyarahaini David etá mapaisirapahi técuhapaipa, énerichuva ena téhicanapahi. ⁴ Écharichuhi éti te masiapapa etá mapena ema Viya, tiyaseserécapa etá manicayarehi. Náijaracapa etá pan tacapicahuquenéhi nanacasarehi te mamirahu ema Viya. Nanicasarehi ema tiyujaracarähiana, émasera ema David vahi tátuparacahini manicahini. Étasera etá máecuavahí, manicapa etá pan, énapa ena macachanequeneanapahi. ⁵ Váhipuca échajicuha éti etá te Sagrada Escritura etá mayanairipi ema víyarahaini Moisés etá nayehe ema tiyujaracarähiana téchapajiricanahi etá Templo. Éna, tájina natapiravainahini etá nacaematanérahi te sávarumuahuana. ⁶ Tavetijichapuca puiti nutiarihipahi nútì. Ichápequenénupánahi tayehe etá Templo. ⁷ Éti váhivare ecaicutiara etá juca máechajiruvana ema Viya: “Núti nuvaraha yátupinaini etá ejapanuraivainaini. Taicha te vahi, tamapuruiyare etá ecamavahuirahi etá nuyehe” macahepa. Te ecaicutiara, váhiyarehini ecaecahivaca ema nímitureana, taicha éna tájina natapiravainapahi. ⁸ Tiuri puiti, numetacaheyare: Núti Manerejirunuhi ema Viya, nútirichu néchahi etá sache nanarasiraya ema achaneana —máichapa.

Ema Jesús macanaraca ema achane tépenavahu

(*Mr 3.1-6; Lc 6.6-11*)

⁹ Te apanavarepa sávaru, tiyanavare ema Jesús tisiapahi tayehe etá náurujisirareva. ¹⁰ Ánaqui matiarihi ema achane vaipa tayamuricahini etá mavahu, tépenavahuipa. Natariihihivare ena fariséoana, natanujiricahi etá ticaviure-vayarehi ema Jesús. Nayaserécapa éma:

—¿Táuricapuca vicanaracavaca ema nacajumaqueneana te sávarumuahuana tacapicahuquenéhi? —náichapa.

¹¹ Ema Jesús majicapavacapa:

—Nímicutichinahe puiti. Németeaca májina émanaina achane vahi macuajanuhini etá máitatiquene uvesa, te téchipaicavapuca te pusu te jena sache tacapicahuquenéhi. Eta máeñamirahi, tipatsicava mavecuha etá paure sárare.

¹² Núti numetacahe: Ema maca achane tiápajucavahi etá téñamacare tayehe etá uvesa. Tacahe, tísapacaréchucha víchayare etá táuriqueneana te sávarumuahuana —máichavacapa.

¹³ Tásicha, ema Jesús máichuhapa ema achane ticajumavahuhi:

—Nímaha. Picajaruvauchava, pímereca etá pivahu —máichapa.

Tacahe, ema achane eta macajaruvauachiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa. ¹⁴ Tisemana-rinehi ena fariséoana eta náimairahi eta máichaqueñehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

Ema Jesús tiyanavarepa tipaicahi

¹⁵ Tacahe, ema Jesús, te máechapa eta napanereruhi ena fariséoana, navarairahi nacapaca, tiyanavarepa tipaicahi. Náehicapa ena camuri-queneana achaneana. Énerichuvare, náitecapauchapaipa ena nacajuma-queneana. Macanaracavacapaipa namutu. ¹⁶ Mavanecapaipasera ena macanararuapanahí vahi nacumetajirica eta émairahi ticanaraca. ¹⁷ Eta juca títauchavapahí eta máechajiriruvahí ema Viya tayehe eta májurehi ema víyarahaini profetaini Isaías. ¹⁸ Ánipa tacahehi: “Nuvaraha ímatiya ema vanairucahi nuyehe, nunerejiruhi nútì. Tétavicavahi eta némunasirahi, núrisamurehivare máicha. Ímatiyare éma taicha mávaháruhi ema Espíritu Santo máijararuhi éma. Ema nuvanara, tímitucavacayare ena achaneana te tamutu avasareana eta nuvanairipianahi. ¹⁹ Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaque-neanahi. ²⁰ Mánsuhí éma taicha ticayehehi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare. ²¹ Tásihasera, namutu ena achaneana te avasareana ticunevanayare eta mayehe, navarairayare máurichayare éma” macahepa ema Viya.

Ena fariséoana téjecapavanahi eta náimijachirahi ema Jesús mávaháruhi ema Váinarijí Satanás

(Mr 3.19-30; Lc 11.14-23; 12.10)

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímaírircavarepa. ²³ Ichaperinehi nárami ena achaneana. Tásicha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyarahaini David —nacahepa.

²⁴ Énasera ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijararuhi eta máitupajijiasiravahi mayehe ema Satanás, ema náquenumurihi ena éreanana —nacahepa.

²⁵ Ema Jesús máimatihi eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaimahi apinainahipucaini partido. Te típutsimuriacacanapa, énajicacaipapucaini tiáquipaicacana. Énaripa ena achaneana te avasare, vahi taurica náputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanaimahi náehajiricacahini, énajiricacahini náquipairicacahini. ²⁶ Ene macahehi ema Váinarijí Satanás, váiparinehi másapahini típutsicacana ena machamuriana, taicha mavarahahi tisimutuanayarehi éna, tímiyanavanayarehi eta nacaetemajirisirahaviyarehi. ²⁷ Éti ímijachaipa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicatacanuhi ema

Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁸ Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹ Nájina tisiapaimahi eta námerecahini te jácani peti matiarihihi ema túmequenehi. Tacamunuhi nacaratacanumayare, náitiacanumayarehi éma. Jéhesare, náituruuyechasareyarepa eta máimahaqueneana. Ene nucahehi nútí, túmepananuhi mayehe ema maca Satanás.

³⁰ Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

³¹⁻³² Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táinémahiqueneana. Jácani te ecaecahinuhipuca nuti Manerejirunuhi ema Viya. Jararihisera eta epecatura vahi tiperdonachacaremahí. Éti ímijachahi ema Satanás ema tiávahácanuhi. Ichape eta ejecapiravahi, taicha ema tiávahácanuhi nútí, émaquenehi ema Espíritu Santo. Éti epanararacaripa éma. Tásiba, tájina eperdonachacareimahi puiti juca ítaresiraichaha, evetijipa te apala ítaresira –máichavacapa.

*Ema Jesús máimicuticha eta táhi eta yucuqui
(Lc 6.43-45)*

³³ Tímaticare eta yucuqui te tiúrinisihi eta tacahira. Tímaticarehivare eta apala yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahini, níchahini eta máematanerepiana ema Váinaraji, jéhevareserapucaini eta tímereuchanuhini eta mávahásiranuinahini éma. ³⁴ ¡Étisera machichanaveanatataji ema Váinarajil! Váiparinehi ítucaimahi échajisiha eta táurinaqueneana, taicha éti tamaverasiavahi eta evainarajivana. Eta échajiriruvanahi ticaecherahi eta evainarajiva te esamureana. ³⁵ Nácani tiúriana achaneana, tatupiruvahi eta náechajirisirava taicha tiúrihi eta nasamure. Nácanisera achaneana váinarajiana, vahi tiúrimahi eta náechajirisirava. Tíñemahipivacahi taicha tavayuchahi eta tavainarajiva eta nasamure. ³⁶ Nutupiruva numetacahe: Te táitecapapa eta sache táitecapirayare eta juicio, emutu ecayaserehiyare eta échajisihairana eta tamaeperajiqueneana. ³⁷ Étaripa eta tiviuchaheyare. Téhesera tiúrihipuca eta échajisihairahi, vahi ecaicuñaimahi. Tájina tiviucha-hémahi –máichavacapa.

*Ema Jesús macajachavaca ena fariséoana taicha eta namasuapajiraivahi
(Mr 8.12; Lc 11.29-32)*

³⁸ Tacahe, nayaseacapa ema Jesús ena fariséoana énapa ena escribánoana. Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvihi ema Viya —náichapa.

³⁹ Ema Jesús majicapavacapa:

—¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiba, váhinéni étina tatuparaca ímahahini eta tiáramicareana. Ímahayaresera eta tiáramicare tacutiyare eta máichavquenevahí ema víyarahaini profetaini Jonás. ⁴⁰ Taicha ema Jonás masiapa-juechahi eta ichapequene jima, mapana sache eta mayerevahí, mapanavare

yati. Ene nucaheyare, nútí Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare. ⁴¹ Eta jena sácheyare téchepucanayare namutu, tiúchucuhanayare ena achaneana ticava-sanánihi acane te Nínive. Tisipecaturarahianahinéni éna. Natupiruvahisera nasuapa eta mame tarairu ema Jonás. Téneuchavanavanehi. Tásicha, te jena sácheyare, nacahenapa eyehe éti: “Táuricapa nacaicuñaini ena nani maparajuruana ema Cristo, táichavenehi eta namasuapiroha éma. Taicha éma, máuriquenepanahi mayehe ema Jonás” nacahénapa. ⁴² Tacutiquene esu reina Seba eta acane, te susamairiricapa eta maitupajijiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushiana puiti. Sucahenapapuca: “Táuricapa nacaicuñahini ena nani máetupicushiana, tájina náetseraruina nasamaripa ema Cristo, ema titupajijiápanavahí mayehe ema Salomón, tásicha vuíchahacaruva nasuapa” sucahénapapuca jácani.

*Ema Jesús máimicutichinahi ena masuapajirairahana mayehe
(Lc 11.24-26)*

⁴³ Tímiyanava eta máechajisiravahi ema Jesús, ánipa macahe: —Éneri-chuvare éti ecuti mácani achane máinajiruhi ema émana éreana. Ema éreana tiyana matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava. ⁴⁴ Macahénapapuca: “Nuyanayare nuchava, nusiapayareva mayehe ema návaháruinihi”. Te títecrapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahini ema Viya. ⁴⁵ Tásicha, tiúrisamurepa ema éreana. Tásicha, tíchuarecapa ena siétequeneana machamuriana. Váinarajipanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítecapauchapa esu maena ema Jesús énapa ena maparapenaveana
(Mr 3.31-35; Lc 8.19-21)*

⁴⁶ Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma. ⁴⁷ Natarihihi ena timetapananahi ema Jesús. Ánipa nacahe:

—Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

⁴⁸ Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruuanahivare, nuparapenaveanahí.

⁴⁹ Tásicha, tisuvechahavipa viti mayeheana apóstoleana. Tásicha, macahepa:

—Numetacahe, ena nani ena némunaruuanahivare. ⁵⁰ Taicha namutu nácani ticaematanecanahí me Tata tiávihahi te anuma, énali ena némunaruuanahivare —máichavacapa.

13

*Ema Jesús máimicutichinavaca ena achaneana eta evaraqui tacaevaquenehi te
apanapanenejiquene máteji
(Mr 4.1-9; Lc 8.4-8)*

¹ Te jena sache, tiyanavarepa ema Jesús, macaijuhe te tachausi eta cáquiure. Téjacavarepa eta ánaqui eta máimituresirayarehi. ² Tásicha, camuria-napahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachausi tiájipahi. ³ Tásicha, camurihi eta máimicuti-chaqueneanahi eta máimitusiravacahi. Ánipa macahe:

—Matiarihi ema émana achane. Tévapanahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cágure, tanicapa. ⁵ Eta mayeherepi éma eta máevasira, máevajajapaica eta apaquehe. Tásicha, eta apamuri evaraqui témiricapa te váhirichu tamitutuhini eta máteji taicha máripahi eta apaquehe. Tímarucavanepaneni táicha. ⁶ Téhesera te tíjurepa eta sache, tacapajicapa; taicha váhirichu táuparevacahíni. ⁷ Tacalhe, eta apana evaraqui témiricapaipa te tataracu eta itapepaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca. ⁸ Tacalhe, eta apamuri evaraqui témiricapaipa te tiúrina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimuríchu. Eta apanavare, ticahivare apaesasajiruichu. ⁹ Esamararacanu emutu éti. Te evarahapuca ecaicutiara, tavaraha eta epanerechinavayare.

*Ema Jesús máitametacaquenievacapa ena apóstoleana eta juca máimiturapihi
(Mr 4.10-20; Lc 8.9-15)*

¹⁰ Tacalhe, viti mayeheana apostóleana vémeñahavapa eta mayehe ema Jesús. Viyaserecapa tájahapuca tacayemahi eta máimicutiarachirava-caichucha eta máimitusiravacahi ena achaneana.

¹¹ Tásicha, ema Jesús tijicapahavipa:

—Ema Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepe éna. ¹² Éti, te esuapa yátupihi eta nímiturapiana, ema Espíritu Santo tímítucaheya tamutu eta tacayemaqueneanahi. Énasera nácani vahi návarahahini nasuapa, énajivayare táchavana ticaverejicasianaya eta nasamaqueneanahi. ¹³ Eta tacalhehi eta nímitusiravacahi, nímicutiarachinavacaichucha. Te apesarichu eta navairahí náituca, vahi nacaicutiarahini eta juca nímechaqueneanahi. Nasamahi eta néchajiriruvana, váhisera nacaicutiarahini eta nímitusirahi. ¹⁴ Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamayarenénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi. ¹⁵ Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emavarairahí esuapahini te esamureana. Tájinapa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macanaracahehini” macahepa ema víyarahaini Isaías.

¹⁶ Étisera eti nímitureana, tétavicavahi eta iúricacarevahi, taicha esuapahí eti juca ímahaqueneanahi étapa eti esamaqueneanahi. ¹⁷ Nutupiruva numetacalhe: Acane ichapemuriana ena achaneana tiúriana énapa ena víyarahaini profetana, tétavicavahi eti navairahí tímatinuana, náimahavare eti juca níchaqueneanahi ímahaqueneanahi. Navarahavarepa nasama eti nímiture-sirahi. Váipasera nacapayacahini.

¹⁸ Ácaicutiaraicha eta juca nímicutiarachaquenehi mayehe ema tévacarahi. ¹⁹ Núti níchuhavaca ena achaneana, machaneranayare ema Viya ena téhicanuanayare. Tásiba, natarihi ena achaneana nasamaripahinéni eta nímiturapianahi, émasera ema Váinaraji vahi másapahini tánasihini te nasamureana. Enevanehi macamitisicavaca eta náimitucasivanainihi. Éna nacutihi eta máteji muracapahiquenehi te achene. ²⁰ Natarihivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehi nasuapa, tiúrisamureanainehi. ²¹ Váhisera náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahíni te tatiarihipa eta jácani nacatichaira ena achaneana táichavenehi eta náehisiranuhi. ²² Natarihivare ena apamuriana achaneana nacuti eta máteji te távihahi eta itapequijana. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táchararacavayarehi eta náitaresira. Tavayuacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacapirahi eta nímiturapiana. ²³ Natarihisera ena apamuriana achaneana nacutihi eta tiúrina máteji. Éna, tisamanuanahi. Náunacahi yátupi eta nímiturapiana, náimatiéquenehairahi. Tájinavare náichiravainahíni eta náehisiranuhi. Ichape eta nacaematanasirahi ema Viya. Nararihi ena apesarichu eta nacaematanasirahi. Nararihivare ena apamuriana, nativarehapanapa eta nacaematanasirahi. Tásiba, ena apamuriana, ichapemuripanapa eta nacaematanasirahi ema Viya —macahepa ema Jesús.

Ema Jesús máimicutiarchina eta sucureca trigo eta ejare

²⁴ Ema Jesús máimicutiarchavare ena achaneana eta máimitusiravacahi: —Puiti nuvaraha nímitucae tatarihiyare eta sácheyare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tiúrina evaraqui tayehe eta tiúrina máteji. ²⁵ Étasera te tímacapa ema ticayehe eta sucureca, macahepaipa ema macatianaru. Máimisiriquichinapa eta táñemahiqueneana ejare. Tásiba, tiyanapa. ²⁶ Tacache, te tímarucainipa eta evaraqui trigo, tiúchucavarepa eta ejare, tacachanepaipa eta evaraqui. ²⁷ Náraminehi ena machaneranahí ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriquihini eta táñemahiqueneana ejare. Puítisera tiúchucapa tacachanepaipahi eta pévaraquihi” náichapa. ²⁸ Ema náejaháruhi majicapapa: “Matiarihi mácani tictalianacanuhi. Éma tíchahi eta juca, tímisi-riquichinanuhi”. Tásiba, ema machanerana náichapa: “¿Pivarahapuca, tata, viyana víti vivepuricha eta jena ejareana?” ²⁹ Éma majicapapa: “Vahi tiúririne, taicha machu táimivepurica eta névaraqui trigo. ³⁰ Tácuticacarichaha eta tajurusirayare. Tiámainucava te tacaechatijipa, nuvanecahénapa éti nuchanerana tativayare evepurica eta ejarejiana, ítijicainapa eta tacaijuirayare. Tásiba, evehainasarepa eta trigo, ticaunainapa te tacauairare”.

Ema Jesús máimicuticha eta taqui eta mostaza (Mr 4.30-32; Lc 13.18-19)

³¹⁻³² Ema Jesús máimicutiarchavare eta taqui eta mostaza eta máimituresirahi. Ánipa macahe:
—Puiti nuvaraha nímitucaeleya eta apaza tayehe eta evaraqui ánichi-chaquene, étasera te tijurucapa, tíñejiyarehi. Tacahayare eta tajurusirayare

eta nímiturapiana nayehe nácani tijacapanayare. Ímatichuhi éti eta taqui eta mostaza, eta ánichichapanahi tayehe eta apamuriana evaraquiana. Tásihasera te tímarucapa, tiúnayarehi eta táenaqui, tacutiyarehi eta yucuqui eta táichapeva. Tacachuricayarehi eta apamuriana evaraquiana. Járajapainapa eta cáyureana. Táepiyacainapa eta tamacajiana te tatavavajiana. Ene tacaheyare eta tajurusirayare eta nímiturapiana núti Manerejirunuhi ema Viya.

*Ema Jesús máimicuticha eta levadura
(Lc 13.20-21)*

³³ Énerichuvare máimicutichina eta juca apana máimituresirahi. Ánipa macahe:

—Tacutequene, eta juca nímiturapiana tímicutijircavahi eta levadura. Esu súcani esena tiúrihi eta tasisijisira eta suyehe levadura te tamutu eta suépiyaruhí masa, tayanapane apinapucaini arroba eta suyehe jarina, tasiha-jicahisera. Jéhesare, tiápucayarehi tiuri.

*Camuri eta máimicutichaqueneana
(Mr 4.33-34)*

³⁴ Ema Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichaqueneana.

³⁵ Títauchavahi eta juca máechajiriruvanahi ema émana profeta. Ani macahehi: “Tamutu eta nímiturapianayare nímicutichinayarepahi. Nímicaeherachainapa eta taeñaurevaquenehi te tépanavainapa máepiyacainapa ema Viya eta apaquehe” macahepa.

Ema Jesús máimicaeherachapa eta máimicutichaqueneanahi tayehe eta trigo étapa eta ejare

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeheanahi apóstoleana. Tacahe, te véjacapa vimutu, viyaserecapa máimicaeherachahini eta máimiturapihi máimicutichaquenehi eta ejare tacachanequenehi eta trigo. ³⁷ Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tiúrina evaraqui. ³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tiúrina evaraqui, étihi eti nuchaneranahi núti. Tásicha, eta ejare énahi ena machaneranahi ema Váinaraji. ³⁹ Taicha ema ticatianacanuhi, manacahi eta ejare, mavarairahi máepacuchayarehi eta névaruhí núti. Eta tacaechatijirapa eta trigo, étahi eta tátavirayare eta apaquehe. Nárajamayarepa ena ángeleana, ticurujiricanayarehi. ⁴⁰⁻⁴² Tásicha, te jena sácheyare, nuti Manerejirunuhi ema Viya nuvanecainapa ena nuyeheana ángeleana nacavehasi ena tíchanahi eta máeperajiqueneana énapa ena tímiaquipaicana ena apamuriana achaneana. Tásicha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanaainapa. ⁴³ Tásicha, nácani títauchanahi eta mavanairipianahi ema Viya, tétabicavayare eta najaraivayare tacutiyare eta tajaraiva eta sache. Téjacanainapa tayehe eta macatuparahuayahi ema Vicaiyaquene. Te evarahapuca ecaicutiara, tavaraha eta epanerechinavaya.

Ema Jesús máimicuticha eta entierro

⁴⁴ Eta nímiturapiana nuti násihaquenehi te anuma tacuti eta tayumuru-revaquenehi entierro. Te máichimavahi mácani achane eta entierro, tiúrisamureyarehi. Tásicha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane támijararecayarepa tamutu eta macayehequeneanainihi.

Máimicutichavare eta perla tasivachaquenehi

⁴⁵ Énerichuvare eta najacapirahi ena achaneana eta nímiturapiana nuti násichaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla. ⁴⁶ Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapanne táimijararecayarehi tamutu eta macayehequeneanainihi.

Máimicutichavare eta ichape nayutahe

⁴⁷ Énerichuvare nuvaraha nímitucaehe tayehe eta sácheyare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana. ⁴⁸ Te náimahapa tínica eta nayutahe, navehayarepa nachurupaicapa te tiájipahi tachausi. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi. ⁴⁹ Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahi eta tamauriqueneanahi. ⁵⁰ Náijuchainapa te yucu, táetaviuchahi eta tájureva. Ticapitiquiahechavanainapa eta tacativayare nasama. Tíyahanainapa —macahepa ema Jesús.

Ema Jesús mayaserecavaca te nacaicutiarahipuca eta máimiturapianahi

⁵¹ Tacahe, ema Jesús tiyaserecahavipa. Ánipa macahe:
—¿Ecaicutiarapuca éti tamutu eta juca nímiturapianahi? —máichahavipa.
Tásiha, víti vijicapapa:
—Vicaicutiara, tata —vicahepa.

⁵² Tácahe, máichahavipa:
—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavivacaya eta ítmuturusirayare eta ímituresirayare eta mapanereruana ema Viya —máichapa.

*Tichavapa ema Jesús te mávasa Nazaret
(Mr 6.1-6; Lc 4.16-30)*

⁵³ Te tamutupa eta máimicutichirahi ema Jesús eta juca máimiturapiana, viyanapa. ⁵⁴⁻⁵⁷ Vichavapa tayehe eta mávasa. Te sávarumuahuquenepa, viyanavarepa tayehe eta nárujisirareva eta nayujarauchirahi ena achaneana. Tímiturecasa ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamaiririruanahi. Taicha vímatihí ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo*, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta ani. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

* **13:54-57** Ema maca achane, ticaijarehi Jacobo te náechajiriruva ena israelítana. Te véchajiriruva, ticaijarehi Santiago. Mapaenumavahi máehica ema Jesús te taequenepa eta máechepusirahi te máecari ema Viáquenu.

—Tatuparaca epicauchahaviya vimutu viti mavaneruana ema Viya. Étisera éti nujaneananahi ecavasanahi eta te juca viávasa, étipa eti nuparape-naveana, vahi epicauchanuimahi —máichavacapa.

⁵⁸ Tásiha, tájina máimerecahichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

14

Ema Herodes masamairicapa eta máichaqueneanahi ema Jesús (Mr 6.14-29; Lc 9.7-9)

¹ Tacale, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús. ² Tacale, ema Herodes máimijachahi ema tichavahi téchepuca ema Juan. Tásiha, máichavacapa ena máevanachananahi:

—Ema mácará, émaripa ema Juan Tícacásiricarahi, ema nímicaparuhi. Tichavaripa téchepuca te máecari. Táitusiava máiturucahi macuchuca eta tiáramicareana —macaheda.

³⁻⁴ Taicha ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacale, ema Juan macajachavacaripa éna eta naviracacairahi. Étapa tímicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanaripipa náitiaca te cadena. ⁵ Taicha supamicahi ésu eta máimicapasirayarehi. Tipicahisera éma nasemahini ena achaneana. Taicha ema Juan, tétavicavahi eta náemunasirahi ena achaneana. Náimatihi éma, eta vanairucairahi me Viya.

⁶ Tásihasera, títecapapa eta sache máijaremuhu ema Herodes, sutarihihi esu amaperu, suchicha esu Herodías. Tiúchucapa tírimaica te mamirahu ema Herodes, énapa ena machimaranahi. Ema Herodes máuricainehi ichape.

⁷ Tacale, máichapa ésu:

—Nujuracha te pimirahu, eta níjarasiraviya jácani piyasearunuyare —máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare ani píchaya: “Píjaracanu eta níchuti eñi Juan te curuja” píchayare.

⁹ Tásiha, eta masamirahi eta juca suyasearuhi, ema rey Herodes ichaperinehi eta mapanereresirahi. Tájinapaserá máicharacavahini taicha máechajiriruvaipahi majurachaipahi te namirahu ena machimaranahi eta máijarasirayare eta suyasearuyarehi ésu.

¹⁰ Tacale, macavanairipipa nayuchatipiquenuhapana ema Juan.

¹¹ Tacale, námapaipa te curuja eta machutini, náijaracapa esu amaperu. Tásiha, ésu sujacapapa, suíjaracapa esu suena.

¹² Títecapananecha ena máimitureanahi ema Juan. Navehana eta máquehe, náecarapanapa. Tásiha, tiyananapa nametapanahi ema Jesús.

Ema Jesús máitaparahavaca máenicavaca ena camuriqueneana achaneana (Mr 6.30-44; Lc 9.10-17; Jn 6.1-14)

¹³ Te masamairiricapa ema Jesús eta nacapasirahi ema Juan, viyanapa viávacuhapa tayehe eta pacure. Vicaijuhepa tayehe eta apauehe mávapahi. Énasera ena achaneana náecharichucha eta viyanirahi. Tiyananapa náehicahi tipaicanapahi. ¹⁴ Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvacarinehi eta máimairavacahi. Macanaracavacapa ena nacajumaqueneanahi námaqueneanapahi.

¹⁵ Tacale, viti mayeheana apóstoleana vímahapa eta cáperéhíchicharínehi.

Vimetacapa éma máevatamuríhahini ena achaneana natarihiqueneanahi. Víchapa éma:

—Cáperéhipa jena sache. Tiyerehivacahi eta pétiana. Táuricapa pivane-cavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

16 Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhehini. Íjaraca étina eta nanica.

17 Tásicha, viti víchapa:

—Tájina vácayehe eta tinicacare. Jucarihisera cíncochichahi eta pan, apina eta jima.

18 Ema Jesús máichahavipa:

—Iáma ani.

19 Tacahe, macavanairipipa náejahahapaica ena achaneana te tainahu eta muíjipahi. Mavehapa eta cíncocuene pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásicha, tíjaracahavipa víti. Víti víjaracavacapa ena achaneana. **20** Vinicapa vimutu, visatuhevacapa. Tásicha, vicaemacharichahavare doce saye ichapehiana tainicachaichahava eta vémacharajiana.

21 Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

Ema Jesús mapaicaeca eta une

(Mr 6.45-52; Jn 6.16-21)

22 Tiuri, ema Jesús tivanecahavipa viti mayeheana apóstoleana viávacuhayare eta te pacure. Vínapucayarehi viánueca te apachara eta cáquiure. Émasera manasiyarehi máevatamuríhanumayarehi ena achaneana nachava te napenana. **23** Te tamutupa eta macametavairahi ema Jesús nayehe ena achaneana, tiyanapa tiápanahi tayeha eta cerro. Tiyujaracayarehi tayeha. Étapa tavinehi eta yati, manasipa macarichuhi eta te cerro. **24** Tacahe, viti te túpierecahaviripahi, tichimaracahavipa eta muraca técaticava, viácapaqui-hapaipahi. **25** Te tijarahichichapa, vímahapa ema Jesús mapaicaecapahi eta une eta macapayasirahaviya. **26** Eta vímairahi éma, vipicarinehi. Vímijachapa cunare. Vipiararecpa eta vipsirahi.

27 Émasera ema Jesús téchajicahavipa:

—Vahi ecupica. Nútichucha. Étumechava —máichahavipa.

28 Tásicha, ema Pedro majicapapa:

—Te yátupipuca pítiquenehi, piti Tata, pivanecanu núti apanavare nupainaeca eta une. Nuvaraha nupauchavi —máichapa.

29 Ema Jesús majicapapa:

—Yare, pipauchanu.

Enevanepa tiúcupaicahi te pacure ema Pedro. Tiyanapa mapaicaecapa eta une, macapayacayarehi ema Jesús. **30** Étasera eta máramesirahi taicha eta muraca técaticava, timutserahavapaipa téricapaipa. Tásicha, tipiararecpa:

—¡Picatajicanu, Tata! ¡Néricainapa!

31 Enevanepasera macaratavauchapa ema Jesús eta macuchucuirayarehi. Tásicha, máichapa:

—¿Ticamitisicavipapuca eta pipisirahi eta picasiñanuirahi?

32 Te tíávacuhapa ema Jesús émapa ema Pedro tayeha eta pacure, enevanepa tésamiricavahi eta técaticava. Tíchecapa eta táepacucairahi. **33** Tacahe, viti

apamuriana vicunachainehi ema Jesús eta vímairahi. Vépuyumurihana te mamirahu. Tásicha, víchapa:

—¡Jéhevare piti Tata, Machichaquenévihi ema Viya! —víchapa.

*Ema Jesús macanaraca ena nacajumaqueneana te avasare Genesaret
(Mr 6.53-56)*

³⁴ Tacache, te apanapa sache, viápechavavarepa viánueca eta cáquiure. Vítecápapa eta te apaquehe ticaijare Genesaret. ³⁵ Tásicha, ena achaneana ticavasanahi tayehe náimativanehi eta émairahi ema Jesús. Timetajiri-cacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana. ³⁶ Nayaseacapa éma eta másapirainahíni náemamajiaca eta tache-ayarapi eta mamuiriha. Tacache, nácani témanajiacanapahi, enevanepaipa tinaracanapahi.

15

*Ema Jesús mameata ena achaneana eta timaeperajicarahi
(Mr 7.1-23)*

¹ Tacache, títecapanapa ena apamuriana fariséoana tiásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

² —Píamaha, ena pímitureana vahi náitauchahini eta viyeherepiana. Namaepe-rajicapa eta náchanevana eta nanisirahi taicha vahi nacasipavahunumahíni. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étasera puca tacahehi eta pímitusiravacahi? —náichapa.

³ Tásicha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahini eta eyeherepiana nanaquiruhi ena iáchuca-naveanaini? ⁴ Ema Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucarihi eta apava-nairipi: “Ecapacayarehi mácani tíñemahi eta nacayemaquene mayehe ema máiya, ésupa esu maena”. ⁵⁻⁶ Étisera vahi epicauchahini eta júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étasera eta mavanairipi ema Viya, vaipa epicauchahini. ⁷ ¡Éti ecaijarehi apimirana! Tatupiruvahi eta máechajiruvahi ema Viya, téchajisiahehi éti eta te Sagrada Escritura*.

⁸⁻⁹ Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahini eta nayeherepiana táuchurechucha te napane-rueruana ena náchucanaveánaini” macahepa ema Viya.

¹⁰ Tásicha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara. ¹¹ Tájina máepe-rajina eta viáchanevana te vinicapuca eta vimacasipavahuiranumahini. Jácani tasiap-quenehi te vijaca, tájina tamaepe-rajicahavihini. Vahi étaparacaina. Étasera eta evainarajivana táuchureanapuca te ejaca, étapa eta evainarajipanere-ruanahi, jéhevare éta timaeperajicahehi —máichapa.

* **15:7** Májurehi ema víyarahaini profeta Isaías eta juca máechajiruvana ema Viya.

12 Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahi taicha eta juca píchiravacahi —víchapa.

13 Émasera máichahavipa:

—Ena nani nacutihi eta ejare, vaipa émaimahi máechahini ema Tata Nucayiquene. Ticavepuricasianayaresera éna. **14** Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímiturapiana. Ena púchuquiana, te tichurucacanapuca, tiáquipaicacanayarehi táicha vahi náimahahini eta nayanihayarehi —máichapa.

15 Tásicha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímitiara-chirahi eta táuchureanahi te vijaca —máichapa.

16 Ema Jesús máichahavivarepa:

—¿Énerichuvare éti mapanererurehehi? **17** ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásicha, te tiúchucapa, apanapa eta táuchusihahi. Vahi timaeperajicahavimahi. **18** Étasera jácani táuchurehi te vijaca tásiquenehí te amahe eta visamure. Eta tamaurivahi eta náechajisirana ena achaneana, étara timaeperajicavacahi éna. **19** Táicha jácani táchemahiqueneanahi panererrucana, eta tásiqueneanahi te nasamureana. Ema achane mapanerechahi maveha esu apana esena mayena ema apana achane. Esu esena supane-rechahi suveha ema apana achane suima esu apana esena. Ena amape-ruana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayuarecana, téchajihiana. **20** Tamutu eta juca panererrucana tamauriqueneana, te náichahi ena achaneana, éta timaeperajicahi éna. Étasera jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamaeperajicaimahi —máichahavipa.

Esu esena apavasana sucasiña ema Jesús

(Mr 7.24-30)

21 Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana. **22** Ánaqui, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Pítí yátupiquenevihi Cristo, ñivaneruvihi eñi Viya, vicuchapaquenevihi. Esu nuchicha ñávahácahi eñi éreana, tétavicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

23 Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiararecapahi te vquéne —vicahepa.

24 Tásicha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiri-cayare ena vijaneanana israelítana. Nacutihi éna eta uvesana máquenureana, taicha ticamununuanahi eta nujaneasiraya —máichahavipa.

25 Ésusera esu esena tépuyucapa te mamirahu. Suíchapa:

—¡Táatchicha, picatajicanupaini, pímicatacanu! ¡Picanarasinanuini esu nuchichasami! —suíchapa.

26 Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasanana émetavicahíni ena nujaneanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihi vahi pijaneananuinahini. Pájapanunusera, picatajicanuchuchaini. Víti apanava vácasíñavahi eta piyeha eta víttajivairaina —suíchapa.

²⁸ Ema Jesús majicapavarepa:

—Páurevi piti nuchicha, ichape eta picasiñavairahi eta nuyehe. Puiti títauchavayare eta piyasearapihi nuyehe. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuuanahi ema Jesús

²⁹ Tacahe, tiyanavarepa ema Jesús. Véhicavarepa víti apanava. Vichavavarepa te Galilea. Tásicha, vijuchechausichapaipahi eta cáquire, vicaijuheya eta te mávapahi apauehe anuquerehi, te távhahi eta cérrroana. Vinasipanapa eta jena sácheana eta ánaqui. ³⁰ Tacahe, nacahepaipavare ena camuri-queneana achaneana te viávhahi víti. Námaquenepanepahi ena nacajumaqueneana: ena masariana, énapa ena púchuquiana, énapa ena úpana, énapa ena túpupáiqueana. ³¹ Namutu ena nani nacajumaqueneana macanaracavaca-paipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tiúripaipa eta napaisira ena masariana. Tímairiricanapaipa ena púchuquiana. Eta náurisamurevapahi, nacunachapaipa ema Viya.

Ema Jesús máenica ena cuatro mílqueneana achaneana

(Mr 8.1-10)

³² Tásicha, ema Jesús táchuhavipa viti mayeheana apóstoleana. Máichahavipa:

—Nujapanuvaca ena nani achaneana natarihiqueneanahi ani, taicha mapanaripahi sache puiti eta nacahehi eta viyehe. Tájinahivare naviyahini nanica. Nujapanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

³³ Tásicha, víti vijicapapa:

—¿Távihapucaini vítusiavhini eta tinicacare eta te juca mávapahi vámahi? ¡Váhivare vítarahaimahi vénicavaca ena nani camuriqueneana achaneana! —víchapa.

³⁴ Tacahe, ema Jesús tiyaserecahavipa:

—¿Áyanachaha eta pan eta iámaqueneanapahi?

Víti vijicapapa:

—Jucarihi siéterine. Ánimurichicharinehivare eta jímachicha —vicahepa.

³⁵ Tásicha, macavanairipipa eta náejahapaimurihahíni namutu te apauehe.

³⁶ Mavehapa eta siétequene pan, étapa eta jímana. Mahasulupayachapa ema Viya. Tásicha, mayuetucavacapa, tíjaracahavipa víti. Tásicha, víti víjarcavacapa ena camuriqueneana achaneana. ³⁷ Tacahe, vimutu vinicahi, visatuhevacapa. Vicaemacharichahavare. Siétehi eta sáyeana táinicaruhi eta vémacharajiana. ³⁸ Eta nasimutuvahi ena achaneana, cuatro mílqueneana ena ajairana. Natarihihivare ena esenana énapa ena amaperuana. ³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásicha, éma tiávacuhavarepa te pacure. Viyanavarepa. Vicaijuhe eta te avasare Magdalena.

16

Ema Jesús mápechavare mayunacavaca eta namasuapajiraivahi ena fariséoana

(*Mr 8.11-13; Lc 12.54-56*)

¹ Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerecahini eta tiáramicareana, máimerecavahini te yátupihipuca vanairucahi me Viya. ² Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavayare eta tiúriyare eta sácheana. ³ Te yáticarahi, te ímaha eta timapi-curume, títsitsimehi, ímijachahi tiquivayare. Éti, ímijachavahí ímatiequeneha eta tapaisira eta anuma. ¡Tétavicavahisera eta emasuapajiraivahí! Taicha éti ímijachavahí religiosohe, ímijachavavare ímatiequeneha eta mavarahaque-neanahi ema Viya, vahisera ávarahahini ímatiequeneha eta máimeruhehi ema Viya, te juca sácheana nucachanerahehi. ⁴ ¡Eti achaneana váinarajiqueneana! Núti nímatihe. Vahi esuapanuimahi, te nímerecapucaini eta tiáramicare. Tásicha, vahira étina tatuparaca ímahahini eta tiáramicareana. Ímahayaresera eta tiáramicare tacutiyare eta máichavaquenevahí ema víyarahaini profetaini Jonás —máichavacapa.

Tásicha, majunijicavacapa, tiyanapa.

Ema Jesús máimicuticha eta levadura eta námiturapiana ena fariséoana

(*Mr 8.14-21*)

⁵ Tacahe, eta viánuesiravarepa eta cáquiure, vianerechapaipahi eta vémitisisirapa eta pan.

⁶ Ema Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

⁷ Vítisera viti apóstoleana, eta véñamavairahi, víchacacapa:

—Tímicajachahavihi eta vémitisisirahi eta pan. Eta tacahe, macahehi tayehe eta levadura —víchapa.

⁸ Éma tímaticahahavihi. Tásicha, máichahavipa:

—¿Tájaha tacayema ecahechajiriruvahí eta vahi iámapahini eta pan? ¿Váhipuca ácasíñavahí eta nuyehe? ⁹ ¿Vuíchahacaru ácaicutiaraini? ¿Vuíchahahipuca ímatinu? ¿Váhivare échaini eta nucaejasirahi eta cincoquene pan nanicaquenehi ena cinco miltqueneana achaneana étapa eta náemacharajiana?

¹⁰ ¿Váhivarepuca écha eta siétequene pan naniruhi ena cuatro miltqueneana achaneana étapa eta náemacharajiana? ¹¹ Nímijachapa ecaicutiarayarehi eta níchirahéhi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

¹² Vipaenumavahí véchahi eta máichirahavihi éma eta véchapiravainahini vahi vicucuti ena fariséoana énapa ena saducéoana eta apimirairanahi.

Ema Pedro máimereucha ema Jesús eta émairahi ema Cristo

(*Mr 8.27-30; Lc 9.18-21*)

¹³ Tacahe, te apanapa sache, viyanavarepa vipaica. Vicaijuhe eta te Cesarea máepiyaruhi ema rey Felipe. Te viánehipa, ema Jesús tiyaserecahavipa:

—¿Tájaha nacayema ena achaneana eta nuyehe nuti Manerejirunuhi ema Viya? ¿Nájahapuca náimijachanuhi éna? —máichahavipa.

¹⁴ Vijicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema víyarahaini profeta Jeremías; émapuca ema apana profetaini antívuini, téchepucahi —vicahepa.

¹⁵ Ema Jesús tiápechahavivare tiyaserecahavi:

—Étiyapa ¿nájaha ímijachanuhi nútí?

¹⁶ Ema Pedro majicapapa:

—Pítira yátupiquenevihi Cristo, machichaquenevihi ema yátupiquenehi Viya.

¹⁷ Ema Jesús majicapapa:

—Piti Pedro*, téavicavahi eta pétupisiravahi taicha manacasamureruvihí ema Tata Nucaiyaquene tiávihahi te anuma. Vahi étainahini eta máimiturapinahíni piyehe mácani achane. ¹⁸ Nútí apanavare nutupiruva numetacavi. Píti picaijarehi Pedro. Píti picutiyare eta mari, téavicavayare eta pitumevaya. Namutu ena picutiqueneana eta pisuapiroanuhi nútirahi yátupiquenehi Cristo, énara nuchaneranayare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji. ¹⁹ Píti picatuparalahayare eta llave tayehe eta anuma, apaesa nasiapa nácani pijacapaqueneanayare píti —máichapa.

²⁰ Tacahe, tituparacahavipa muraca ema Jesús nacuija vicumetaca eta émairahi ema Cristo.

Ema Jesús máimereucha eta máepenirayarehi

(Mr 8.31-9.1; Lc 9.22-27)

²¹ Tacahe, ema Jesús tépanavapa timetacahavihi eta táicharacavayare eta máepenirayare. Máichahavipa:

—Nuti nucatuparalahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahaná, énapa ena escribánoana. Éna, tímicpacanuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máichahavipa.

²² Tásiha, máiputsicapa mámahi ema Pedro ema Jesús. Ánaqui macajachapa, máijarasiravahi eta mapanereruhi:

—Nútí vahi návarahahini títitauchavahini nacapacavihini.

²³ Tacahe, ema Jesús máichapa ema Pedro:

—Piti téjecapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

²⁴ Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiri-cavaca eta náehisiranuhi. Nacaravahuyareva eta nímiturapiana. Náijaracavavare eta támicpacasiraina eta náehisiranuhi. ²⁵ Nácanisera téñamanahi eta náitaresira, tiávamirahuanaya eta náehisiranu, énjivayare ticamitiequenehanaya eta náitaresira. Énasera nácani yátupiquenehi tíjaracavana téhicanuana, tayanapane támicpacacaineputa eta náehisiranuhi, éna titujicavanayare tiúchucuhanayare eta náitaresiranaya. ²⁶ Énerichuvare nácani tacañamaruaruanahi eta nacaimahaquenéiraya te juca apaquehe, tájina náimaequenehaimahi, taicha eta tacaeñamarasiravacahi tahapapiricavacahi tayehe eta

* ^{16:17} Ema Jesús téchjicahi te máechajiriruva hebreo, máimijarechahi ema Pedro: “Simón, machicha ema Jonás”.

náuchucuirayarehini. Taicha vahi måratahaimahi mácani achane mavacha-chahini eta máuricacarevaya te apana vítaresira. ²⁷ Taicha nuti Manerejirunuhi ema Viya nuchavayarehi. Námmainapaipa eta majaraiva ema Tata, nucachanénapaipavare ena ángeleana. Te jena sácheyare, níjaracavacainapa eta náicuchianahi ena nuchanerana te tiúrihi eta nacaematanasiranuhi, te jácani náemataneanapachuhi. ²⁸ Nutupiruva numetacahe: Puítiripa étí, etiarihi enerejicavayare vahi épenavanémahi, ímahanumaya eta nucatupara-hairaya aquenucanuirayare nuti Manerejirunuhi ema Viya —macahepa.

17

Ema Jesús tihapamaichava eta máimahi (Mr 9.2-13; Lc 9.28-36)

¹ Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana. ² Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, téavicava eta tajarárasira tacuti eta sache. Eta mamuiriha, téavicava eta tajanunumésirahi, étapa eta tajapuvahi. ³ Tásicha, tiáramicareanavarepa tímerecavana ena apinana ajairana: ema víyarahaini Moisés émapa ema víyarahaini profetaini Elías. Téchajircavanaripahi mayehe ema Jesús. ⁴ Tásicha, ema Pedro tímisia-pavapa téchajicapa. Ánipa macahe:

—Tata Náquenu, téavicavapa eta viúricacareva eta viávihirahí eta áni. Tiúrihipucaini vépiyarecahini eta epenahuinapachuhini. Pipenahuinari-chuhini píti, mapenainarichuhivaréni ema Moisés, émapaini ema Elías —macahepa.

⁵ Tacahe, téchejicaichaha ema Pedro, tiáramicarepa eta úcaji táepacumu-rihahi éna. Téavicavahisera eta tajanunusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunaruquenehi. Téavicavahí eta núrisamurevahí máicha. Éma esuapayti, mapenainarichuhivarare —macahepa.

⁶ Eta nasamirahí ena vichamuriana, tipicanarinehi. Tépuyucanapa titsiucapairicanapa. ⁷ Tásicha, ema Jesús témeñahavapa eta nayehe. Máemama-sicavacapa. Máichavacapa:

—Échepuca, nuchichanaveana. Vahi ecupica —máichapa.

⁸ Tacahe, te téchepucanapa éna, nájinaripahi éna apinana náimahaque-neanahi. Macarinehi ema Jesús.

⁹ Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepu-capaini te máecari éma. ¹⁰ Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare titareca ema víyarahaini Elías, tínapucayarehi eta máimeresiravayare piyehé piti Cristo. ¿Énapuca téjecapavanahí ena escribánoana? —náichapa.

¹¹ Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu.

¹² Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacapahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacanuanayarehiva, éneyaréichuvare ticapacanuanayare —máichapa.

¹³ Tásiha, ena vichamuriana náechapa eta máechajisihairahi ema Jesús ema Juan Tícacahsircarahihi.

*Ema Jesús macanaraca ema amaperu mávaháruhi ema éreana
(Mr 9.14-29; Lc 9.37-43)*

¹⁴ Tacahe, te tichavanapa éna tayeha eta viávihahi víti énapa ena achaneana, témeñahavapa ema émana achane mayehe ema Jesús. Tépuyucapa te mami-rahu. Máichapa:

¹⁵ —Picatajicanu, tata, pímicatacanu. Picanarasinanuini ema maca nuchicha. Tétavicavahi eta macatajivairahi. Tacaecharipairica te tanahaca eta majuma. Tatiarihi te táquipaica te une, téhepuca yucu. ¹⁶ Námaripahinéni nayehe ena pímitureana, váhisera náratahahini nacanaracahini éna —máichapa.

¹⁷ Ema Jesús máichahavipa:

—¡Tétavicava emasuapajiraivavaca eti achaneana! ¡Cúverarecachasicáini eta nucamichirahenahini! Iáma ani ema amaperu —máichapa.

¹⁸ Tacahe, ema Jesús, muraca eta máevatasirahi ema éreana, máinajiacapa ema amaperu. Enevanepta tinaracavanehi éma.

¹⁹ Tásiha, te taequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? —víchapa.

²⁰ Ema Jesús tijicapahavipa:

—Eta tíchahi éti vuíchaha yátupinahini ácasiñavahini me Viya. Nutupiruva numetacahe: Te yátupiquenenahini ácasiñavahini mayehe éma, eratahaya-rehini. Váhinéni tágamesahini ichapenahini eta ecaсиñavairahi. Tayanapanepuca ánichichainaichu eta ecaсиñairavahi, tacutihipucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejeca, eratahayarehi. Te íchapuca: “Piyejecava eta te juca. Piyana ánaquipana”. Tásiha, tiyejecavahini éta. Jéhesare, tájina tacucajerarajihini eyehe. ²¹ Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna étapa eta viyujaraca —máichahavipa.

*Tiápechavavare ema Jesús máimereucha eta máepenirayarehi
(Mr 9.30-32; Lc 9.43-45)*

²² Tacahe, eta vipaisirapahi tayeha eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ánipa macahe:

—Nuti Manerejirunuhi ema Viya, járajapainapa eta sácheyare tíjarareca-nuyare mácani achane nayehe ena ticatianacanuanahi. Ticaratacanua-nayare éna. ²³ Ticapacanuanayareva. Néchepucayaresera te mapanaque-nenapa sache —máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayeha eta Templo

²⁴ Tacahe, te vítecápapa tayeha eta viávasa Capernaúm, natiarahihi ena ticobrarecarahiana eta impuesto tayeha eta Templo. Nárajapapa náechajipanahi ema Pedro. Nayaserecapa:

—¿Mavachachapuca ema eyehe máestro éti eta impuesto tayeha eta Templo? —náichapa.

²⁵ Ema Pedro majicapapa:

—Mavachacha —macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueana, énapuca ena machanerana? —máichapa.

²⁶ Ema Pedro majicapapa:

—Ena machanerana.

Tásicha, ema Jesús macahepa:

—Tiuri, viti machichahavihi ema Viya. Vahi tatuparacahini vivachachini víti eta juca impuesto. ²⁷ Vinaquicasera eta impuesto apaesa tacuija tacucayemacare nayehe ena achaneana. Piyanayare pénica eta jima te cáquiure. Te piáquijiecpa eta pénirave, eta tínapuca jima tacaratacaya eta pénirave, tatiarihiyare eta plata te tajaca. Pivehainapa eta reale, tásicha taratahayare tavachacha eta nuyehe parte núti, étapa eta piyehe píti —máichapa.

18

¿Nájahapuca ema apóstole ticapicahupana?

(Mr 9.33-37; Lc 9.46-48)

¹ Tacache, te jena sácheinahi, viyaserecpa ema Jesús:

—¿Nájahapuca ema ticapicahupanaya viyehe víti te táitecapapa eta sache aquenucaviraya? —vicanaquicasera eta impuesto apaeheda.

² Tacache, máichuhapa ema Jesús ema émana amaperuchicha, macatupihapa te vimirahu. ³ Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiyare ema maca amaperu, apaesa ítujicava esiapa ecachanenu tayeha eta néjasihayare. ⁴ Nácani navarahahi ticapicahupananayare te jena néjasihayare núti, tacamunu mánsuanayare. Vahi máitucaimahi tiácapauchava. ⁵ Tacutiquene nácani tijacapanayare ena amaperuana níchavenénahi núti, ena nani yátupihi náimereca eta náemunasiranuhi núti, taicha tímicutijiricavahi nútinhahini najacapa.

Ichape eta máicuñayare mácani tímiaquipaica te pecatu ena amaperuana

(Mr 9.42-48; Lc 17.1-2)

⁶ Tacutiquene mácani tiáquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini macucaicuñahini, taicha vahi macuaquipaicahini ema amaperu tayeha eta pecatu. ⁷ Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaya ena achaneana tayeha eta pecatu. Ichapesera eta náicuñayare nácani ticatapiravanahi eta náimiaquipaisirahi ena achaneana tayeha eta pecatu.

⁸ Eta tacahe, te táimipecaturachahepuca eta evahu, étapuca eta ívapeana, tiúripana eyuchatica, iáquijica; apaesa vahi tacuimiaquipaicahe tayeha eta pecatu. Tiúripana taejiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe. ⁹ Étaripavare eta iúquiha, te támiaquipaicahepuca tayeha eta pecatu, tavarairahi támahayare eta tamauriqueneana tájiparacana, tiúripana evecuhauquichava iáquijicaya. Taicha tiúripana eta ejacapacarehi éti eta esiapiraya te anuma tayanapane taejiacavapuca eta iúquiha. Páurehesamisera éti, te náepujuquichahepuca te yucu infierno, tamutuyare eta iáquehe.

Ema Jesús máimicutiarachinahi te témitiaca étana uvesa

(Lc 15.3-7)

¹⁰ Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Títupajijiacavanahi eta nacatiuchiravacahi

ena amaperuana, máicha ema Viya. ¹¹ Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táñehiquene eta náitaresira.

¹² Esamanuchaha. Nímicutichinaheyare puiti. Matiarihi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta táemitiaruhi. Eta maeñamiravahí, manaquicayarepa eta apamuriana noventa y nueve te majanearesihahi. ¹³ Te máichimavapa, tichavapa. Tétavicava eta máurisamurevapaipahi eta mámirapaipahi eta táejiaruvahi.

¹⁴ Ene macahe ema Tata Ecayaquene éti, ema tiávihahi te anuma. Vahi mávarahahini náemitiacahini ena nani amaperuana.

*Tatuparaca viperdonacha ena téjecapavana eta viyehe
(Lc 17.3)*

¹⁵ Te tatarihipuca eta maejecapiravahí ema piparape eta piyehé, tituparacavi piperdonachayare. Tásiha, piconsejachayare éma, píputsiacayare éma eta pimetasira eta maejecapiravahí. Te tisuapavihi éma, tájinapa íchiravaimahi. Tiúrinapa eta ítaresirana. ¹⁶ Téhesera te vahi macusuapavi, pitanucayare apinanaína ena piyeheanayare testigo apaesa tasuapacarepa eta piconsejarapiyare. ¹⁷ Te vuíchaha macusuapavi, pimetacapa namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticaréinapa éma eta mamasuapajiraivahí me Viya. Vaipa ecuimisiapava mayehe, taicha eta mamasuapajiraivahí. ¹⁸ Nutupiruva numetacahe: Te ecurujicacahi, te ímahahi eta mamasuapajiraivahí, emetacayare éma vahi táepahahini eta mapecatura. Tanasirichuhi. Émaripa ema Viya, máimraracahi eta evarairahi etupirica éma. Téhesera te máeneuchavuca, emetacayare éma eta táepahairaripa eta mapecatura. Ema Viya, tiúriripa eta máimaira.

¹⁹⁻²⁰ Énerichuvare te etiarihipuca éti te juca apaquehe apinahehi, mapanahéhipuca ecurujicacahi te njare nuti, nutiarihiyarechuhivare nuti te emuri. Tásiha, te étanaichuhi eta epanereruhi, ticuticacahi eta eyaseserepi te mayehe ema Tata, éma tíjaracaheyare —máichahavipa.

²¹ Tásiha, ema Pedro mapauchapa, mayaserecayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te maejecapava eta nuyehe? ¿Táuricapuca siéteheyare eta nuperdonachirayare? —macahepa.

²² Ema Jesús majicapapa:

—Vahi tácarichuimahi siétehénarichuyare eta piperdonachirayare. Tímianavayarechucha eta piperdonachiranayare. Vahi pitupachaimahi —máichapa.

Ema Jesús máimicutiarachina ema achane máuriraha vahi máitucaimahi maperdonacha ema maparape

²³ Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena manusurana. ²⁴ Tásiha, námapaipahi ema téavicavahí eta manteve. Tisintevapanahi éma. ²⁵ Tásiha, ema achane musu, tájina maviyahini mavachachihahini ema máquenuhi. Tacahé, ema rey macavanairipipa macaijararecasí, namutu esu mayena énapa ena machichanaveana, étapa eta macayehequeneanaini te mapena, apaesa mavachahini apaesachichainarinehini eta mantevehi. ²⁶ Tásiha, ema achane musu

tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa. ²⁷ Jéhesare, ema máquenu majapanupa. Mapardonachapa tamutu eta mantevenihi. Macaiticapa. ²⁸ Vuíchahasera tayerehini eta máuchusirahi, mácapajicapa ema apana achane ticantevehi eta mayehe. Macompañerooinihivare. Váhinéni camurinahini eta mantevehi. Macaratacenisera, macobrachapa. Masemaracapa macapitinucapa. “Pivachachanu puítirichu” máichapa. ²⁹ Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”. ³⁰ Váhiquenesera mapardonachahini. Máimicasiapapa te cárcel, mavairahi mavachachavaneyarehini eta mantevehi. ³¹ Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquenévahí ema nachamuri. ³²⁻³⁴ Tacahe, ema máquenuhi máimichuhapa ema tipresurecainihi. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavivihi. Piúriháinehi pájapanuhini píti apanavare ema pichamuvahí, táchutihini eta nuperdonachiravihi núti” máichapa ema rey. Tásicha, macavanairipipa náicuñaca, étapa mavachachayarehi tamutu eta mantevehi.

³⁵ Tacahe, ema Jesús te titapiricapa eta juca máimiturapiana, ánipa macahe:
—Ene máichaheyare ema Tata Nucaiyauquene éti apanavare, te vahi ecuituca eperdonacha nácani eparapenaveana náejecaparuvanahi eta eyehe —máichahavipa.

19

*Ema Jesús tímiturecahi máechajisihahi mácani achane tínajicahi esu mayena
(Mr 10.1-12; Lc 16.18)*

¹ Te tamutupa eta juca máimiturapiana ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache. ² Camuriana ena achaneana tiúrujicavanahi. Ánaqui macanaracapaipavare ema Jesús ena nacajumaqueneana.

³ Tásicha, títecapanapa ena apamuriana fariséoana. Napauchapa ema Jesús. Natanucahi eta tiviuchayarehi éma. Ánipa naicha:

—Vivaraha pimetacahavi ¿te táuricapuca máinajica ema achane esu mayena taicha jácani tájiparacana? —náichapa.

⁴ Ema Jesús majicapavacapa:

—Németeaca vahi ácaicutiarahi eta échajicuira eta Sagrada Escritura. Te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayare. ⁵ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutscavanayarehi eta napenana ena ticachichana. Énajivainapa titácticacanayare. Eta navehacacairahi, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

⁷ Tásicha, ánivare nacahe:

—¿Tájahasica tacayema eta mavanairipihi ema víyarahaini Moisés ticaepiya-yarehi eta ajureca suyehe esu esena eta máinajisirayarehi ema suima? —náichapa.

⁸ Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyarahaini Moisés másapahi tínajicacana táichavenehi eta tájinairahi eta náimitucacarevainahini, táetaviuchirahi eta namuracasmureva. Váhisera máuricahini ema Viya eta náinajicacahini. ⁹ Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásicha, mavehana esu apana esena, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarihichahahi ema suímaquenehi —máichavacapa.

¹⁰ Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tiúripanaichuhipuca vahi vicutanuca esu esena —víchapa.

¹¹ Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanya-yarehi náimatiéquenehayare máicha ema Viya. ¹² Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticavecuhianahi, navetijipa éna vaipa náesenicaimahi esu esena. Nararihivare ena apamuriana tinerejicavanahí vahi natanucahini esu nayenainahini, navarairahi tacuija jácani tahapapicahini eta nacaematanearaya ema Viya. Ticunachacarepanayare ena tiratahanayare eta juca náijarasirava yátupiquene nacaematanacaya ema Viya —máichahavipa.

Ema Jesús mayujaraucha ena amuyana

(Mr 10.13-16; Lc 18.15-17)

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tiámanapahi ena amuyana. ¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecuaciéchepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

¹⁵ Tásicha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

Ema achane rico téchajiricava mayehe ema Jesús

(Mr 10.17-31; Lc 18.18-30)

¹⁶ Matiarihi ema achane amaperu rico. Mapauchapa ema Jesús. Mayase-recapa:

—Tata maestro, piti piúriquene. ¿Tájahapucaini eta nícharacavahíni eta nítujisiravaina me Viya máicheckuaraquirénahini eta nítaresira? —máichapa.

¹⁷ Ema Jesús majicapapa:

—¿Tájaha tacayema pímijarechanu “Piti piúriquene”? Mararihi ema Viya. Jéhevare éma, téavicavahi eta máurivahi. Téhesera te pivarahapuca pécha te apava vítaresira, pisuapayare eta vanairipiana —máichapa.

¹⁸ Mayaserecavarepa ema achane:

—¿Tájahasica eta vanairipiana eti nusuapaqueneyea?

Majicapavare ema Jesús:

—Eta juca eta mavanairipiana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina.
19 Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

20 Tacahe, ema achane majicapapa:

—Tamutu eta juca nusuapahi nítouchahai. ¿Tájahaserapuca eta jácani néjequeruichahahi? —macahepa.

21 Ema Jesús majicapavare:

—Te pivaraha pítaucha tamutu, piyana píjararecaya tamutu eta pímaqueneana. Tásicha, píjaracavacapa ena páureana. Jéhevare éta, pijacapayare eta pímaqueneyare te anuma táitsivayare. Te tamutupa eta juca, pítecavanepa péhicanu —máichapa.

22 Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatиеqueneharinehi tamutu. Tiyanapa tipanererecapaipa.

23 Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujihí eta náijarasiravainahini eta náehisiranuinahini ena rícoana eta nasiapirainahini te anuma.

24 Esamanuchaha. Eta juca tímicutijiricavahi eta vipera camello, máitujihí tánucuhahini te támiguejehe eta parirapa. Ene nacahehi ena rícoana —macahepa.

25 Eta visamirahi viti, viáraminehi. Víchacacapa:

—¡Tétavicavahi eta tamáitujicacarevahi! ¡Nájina titújicavaimahi náuchuchuhini!

26 Ema Jesús tímararacahavipa. Tásicha, máichahavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya. Tamutu marataha —máichapa.

27 Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímaquenéya? —máichapa.

28 Ema Jesús majicapavarepa:

—Nutupiruva numetacahe: Járabajapayare eta sáchevayare, tacaitsvairayare tamutu arairuya. Tásicha, nuti Manerejirunuhi ema Tata néjacainapa te tajarahiquenehi trono. Tásicha, eti éhicanuanahi ejacainavarepa tayehé eta dócequene trono. Ecavanairipinapa nayehe ena dócemuriqueneana vijaneanana israelítana. **29** Tásicha, emutu eti enaquicanahi eta epenana, ejunjijahivare ena ticachichaheana*, ena eparapenaveana, ena echichanaveana, eta eyehe apaquehe, táichavenahí eta éhisiranuhi puiti, tiápajuvainapa camuripanayare ena ejaneananayare étapa eta ímahaqueneanaya. Énerichuvare táurivayare eta ítaresira máichecuaraquirenapa. **30** Maverahesera eti etiarihiqueneanahi puiti, váhirichuhi ecapicahuhini. Te jena sácheyare, ichapepanainapa eta ecapicahuiraya. Ena puiti ticapicahuanahi, te táitauchavapa te jena sácheyare, énapavainapa téquenehanayare.

20

Ema Jesús máimicutichahi ema achane rico tiuri eta mavachachira ena ticaemataneyechana

* **19:29** Te jácani apanana versióneana, tatarihi te juca lista eta táechajiriruva “ena nayenana”. Tájinaserá nalistanahini te libro antivupanahí. Eta tacahehi, vímatiequeneha vahi manacahini ema Mateo. Mácani apana achane mavejuchahipuca te Lucas 18.29.

1 Te jena sácheyare te níjaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaematanearahiana. Ema maca mayatiruhi tipaica matanuca ena achaneana ticaemataneanayarehi mayehe. Tírerecanayarehi eta uva. **2** Te titucavapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavane-cavacapa tiyanana tayehe eta náireresihayarehi. **3** Tásicha, macamunui-chahava ena apamuriana achane. Te las nuévepa sache, tiyanavarepa te plaza. Máimahinevare ena apamuriana ajairana máematanereanahi. **4** Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyananavarepa éna, tirerecanahi. **5** Te las dócepa sache, tiyanavarepa matanuca ena apamuriana. Títucavavare, máevatamurihavare tirerecanayare. Te las trespa sache, tiápechavavare tiyana titucavavare ena apamuriana, énerichuvare tirerecanayarehi. **6** Te las cíncopa sache, tiyanavare tiúchucahi tayehe eta plaza. Títucavavare ena apamuriana ajairana máematanereanahi. Tásicha, máichavacapa: “¿Tájaha tacayema tájina ématanenahini puiti jena sache?” **7** Éna najicapapa: “Nájina náechejiacahavihini”. Tásicha, ema máichavacapa: “Eyana éti apanava írereca ánaqui te nuyehe quinta úvaquiji”. Mametacavarepa eta táurivayarehi eta mavachachiraya. **8** Tacahe, te yátipa, mametacapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaematananeana. Nasapihapa téquenehanahi ticavachana ena náinapureanahi. **9** Tásicha, ena nasiapaqueneanahi te las cíncopa sache, mavachachavacapa ema achane eta étapecvacahi eta reale, tacutirichuhi eta navachahi ena ticaematananahi tamutu sache. Énapa ena nasiapaqueneanahi te las trespa sache, énerichuvare eta étapecvacahi eta navachahi. **10** Tacahe, te ticavachanapa ena náinapureanahi tisiapan, náimahapa éna tacutirichuhi eta navachanahi ena náequenereruqueneanahi. **11** Tásicha, tisemanapa mayehe ema náquenuhi. **12** Ánipa nacahe: “Ena nani náequenereruanahi títecapana, vicutivachavacaichuhi eta navachahi, étanainehinéni hora eta nacaematanerahi. Tacutirichuhisera eta vivachahi viti vínapureanahi. Váliquene táuricaimahi eta juca, taicha ichapemurihi eta vicamichirahi víti eta táijureva muracaquene eta sache. Táurica vicachuricavacayarehini éna eta navachahi” nacahepa. **13** Émasera ema náquenu majicapavacapa: “Váhira nucaetemahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahéhi étapecvacahi eta reale níjaracahe. Vahi ecusema. **14** Ésamiricavachucha. Evehachucha eta juca evachahi. **15** Núti néchinava taicha nuyeherichuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

16 Ema Jesús macahevarepa:

—Ene nacaheyare te jena sácheyare, nácani náequenereruanahi téhicanuana, éna nasapihayare tínapucana. Tásicha, nácani náinapureanahi, nasapihayare téquenehanayare* —macahepa.

*Ema Jesús tiápechavavare máechajisiha eta máepenirayare
(Mr 10.32-34; Lc 18.31-34)*

* **20:16** Te jácani apanana versióneana, tatarihi eta juca táchajiriruvana “porque muchos son llamados, pero pocos son escogidos”. Tájinaserá etá juca táchajiriruvanahí te libro antivupanahí. Eta tacahe, vímatiequeneha vahi manacahini ema Mateo. Mácani apana achane mavejuchahi etá juca te Mateo 22.14.

¹⁷ Tacahe, eta vipaisirapahi te achene te vicaijuhepa eta Jerusalén, típutsia-cahavipa ema Jesús viti dócequeneana apóstoleana. Máichahavipa:

¹⁸ —Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanainapa ena tuparairucana. ¹⁹ Tímicapacanuanayare taicha tíjararecanuanainapa nayehe ena suntaruana romanoana. Éna, nájina najapanuquenéna. Ticaecahinuanainapa. Téstacanuanayareva. Tétatacanuanayareva te crusu. Tásihasera, te mapanaquenenapa sache, néchepucainapa te nécari —máichahavipa.

*Esu naena ema Jacobo émapa ema Juan suyaseaca ema Jesús eta macajupa-havahini ena suchichanaveana
(Mr 10.35-45)*

²⁰ Tásicha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuyucapa ésu te mamirahu ema Jesús, suyaseacayarehi énainahini majupahanainahini ena suchichanaveanahi.

²¹ Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha páccahanéni ena nuchichanaveana tayehe eta péjashayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

²² Ema Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Erata-hayarepuca ecamicha eta íchavaquenévayare ecatajivairayare, ecutinuya-repuca eta nucamichirayare núti? —máichapa.

Éna najicapapa:

—Virataha vicamicha —nacahepa.

²³ Tásicha, máichapa:

—Yátupi ichape eta ecatajivairaya, vicuticacaya eta nacapasirahavyare. Étapasera eta éjasirayare eta te nuchacaya, vaipa nútina necha nucaejacahéhini. Ema Tata Nucaiyaquene, émahi tinerejicayarehi ena nujupahanayare —máichapa.

²⁴ Tacahe, eta visamirahi viti diésqueneana mayeheana apóstole, visemapa nayehe ena apinana. ²⁵ Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavagnaripira. Énaripa ena tuparairucana, tétavicavahi tisuapacareanahi eta nacavacurerahi. ²⁶ Váhisera ecucahehi éti nayehe ena echamuriana. Mácani tímerecavahi ticapicahupana, tacamuñuhi máitativacayare ena apamuriana. ²⁷ Te etiarihivarepuca eti evarahahi ínapuca, tacamuñuhi ímerekavaya navanaraheyarehi ena echamuriana. ²⁸ Ecudinuyare nuti Manerejirunuhi ema Viya. Vahi étaina tímitecanu nucaitaticashini. Nútiyarehi nítatihe. Énerichuvare níjaracavayarehi nímicapacava íchavenequeneanainahí éti camuri-queneanaya nucuchucureanaya —máichahavipa.

*Ema Jesús macaimairiricavaca ena apinana púchuquiana
(Mr 10.46-52; Lc 18.35-43)*

²⁹ Tacahe, te vijunijicavarepa eta avasare Jericó, camurianahivare ena achaneana ticavasanahí tayehe, téhicahavianahí. ³⁰ Natarihi ena apinana ajairana púchuquiana. Téjacanahí te achenechacaya. Te nasamapa ema Jesús eta mánucuirapahi, tipiararecanapa. Ánipa nacahe:

—¡Táattachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

³¹ Natiarihisera ena achaneana vahi náuricahini eta napiarasirahi ena púchuquiana. Navarahapa nacamatinaca. Énasera napiaracaichucha:

—¡Táattachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

³² Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahahipuca navarahahi.

³³ Éna najicapapa:

—Táattachicha, vivaraha pípuhauquichahavini apaesa vímairiricapaini —nacahepa.

³⁴ Tacahe, ema Jesús majapanuvacainehi. Máemamahauquichavacapa. Enevanerinehi tímairicana. Tásicha, téhicahavianapa.

21

*Títecapapa ema Jesús eta te Jerusalén
(Mr 11.1-11; Lc 19.28-40; Jn 12.12-19)*

¹ Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivo-quiji. Ánaqui ema Jesús mavanecapa ena apinana vichamuriana. ² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticitihahi eta esena burrico, étapa eta tachicha te tachacaya. Evejapuacayare iáminanuyare eta áni. ³ Te natiarihinapuca náeñama, emetacayare eta nucamunuirahi nútì. Vahi táyeréimahi vímichavavaneyare —máichavacapa.

⁴ Eta juca tamutuhi títauchavapahi eta májuchaquenehi ema mácani víyarahaini profeta. ⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha tétaficavapahi eta mamansuvapahi, étapa eta máurivahi. Mámapahi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta navanahi mayehe ema Jesús.

⁷ Námapaipahi eta burricoachicha étapa eta tachicha. Nanacamaequechapa eta náepacuhana. Tásicha, ticaperapa ema Jesús. ⁸ Camuriana ena achaneana tiácapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma. ⁹ Ena apamuriana tínapumirauchanapahi énapa ena téquenehanapahi tipiaracanapaipa:

—Yare, Tata. Píti yátupiquenevihi Cristo réyvihi viyehe viti israelítana. Ichape eta vicunachiravihi píti. ¡Vanairucaquenevihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰ Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricacanapaipa:

—¿Nájaha ema maca achane?

¹¹ Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Ema Jesús macuchuchujicavaca ena tíjararecanahi eta sárareana, cágureana te tajuhe eta Templo

(Mr 11.15-19; Lc 19.45-48; Jn 2.13-22)

12-13 Tacahe, te apanapa sache, tiyanapa tisiapa ema Jesús tayehe eta te Templo. Máimaharinehi ena achaneana tíjararecanahi eta sárareana, cágureana. Ena apamuriana ena tivacharecanahi. Natarihivare ena títsiri-perecarahiana eta naplataneana ena apavasanana. Máichavacapa:

—Ema Tata Nucaiquene, ani macahehi eta máechajiruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana, ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

Tásicha, macuchuchujicavacapa namutu. Máequhepuichinavacapa eta namesarana étapa eta nasiyana.

14 Eta mávihairahi te Templo ema Jesús, napauchapa ena púchuquiana énapa ena masariana. Tásicha, éma macanaracavacapaipahi. **15** Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvihi ema Viya” nacahepa. Énasera ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa. **16** Nárujiacapa. Navarahapa nacachepeica eta máichaqueneanahi. Tásicha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapaini? —náichapa.

Ema Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta téchajisihairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejerarerayarehi naicha eta najirairayare eta táurinaquene alabanza” —máichavacapa.

17 Te titapiricapa eta majicapiravacahi, majunijicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

*Ema Jesús májiquiha eta higo taicha mährquirehi
(Mr 11.12-14, 20-26)*

18 Te apanapa sache, te yácticarahichicha, tiyanavarepa ema Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma. **19** Maimahapa eta yucuqui ticaijare higo te achenechacaya. Tiyanapa mapauchahi. Tájinaserá táchinahini. Tapacajianachucha. Tásicha, máichapa ema Jesús eta higo:

—¡Pépiyainapa píti eta mährquireviyare! —máichapa.

Eta macaherahi, enevanepa tijiyujipa eta tapacajiana. **20** Eta vímairahi víti, viáraminehi ichape. Viyaserecapa ema Jesús:

—¿Tájaha táichararacavahi eta táijahúchiravahi tiájiqui eta higo? —vicahepa.

21 Ema Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejeca eta cerro te apachacaya.

22 Tamutu jácani eyaseserepiyare eta mayehe ema Viya te eyujarasirana, ecaijaracasiyare te yátupina eta ecasiñavairahi me Viya —máichahavipa.

*Nayaserecapa ema Jesús nájahahipuca tituparacahi éma
(Mr 11.27-33; Lc 20.1-8)*

23 Tacahe, visiapavarepa tayehe eta te Templo. Ema Jesús, tímiturecavarepa nayehe ena achaneana. Tacahe, napauchapa ena tuparairucanahi. Natarihihivare ena tinerejicavanahi ena aquenucarahaná. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavihi? ¿Nájaha tituparacavihi eta juca píchaqueneana? —náichapa.

²⁴ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. ²⁵ ¿Nájahapuca tivanecahi ema Juan eta máitesirahi máicachasirisirahi? ¿Émapuca ema Viya tivanecahi, émajivapuca eta máitesirahi? —máichavacapa.

²⁶ Váhisera náiteturuequenehahini eta najicapiRAYAREHI. Tiácpaemajiricacanapa. Ánipa nacahe:

—¿Tájahasica vicayemayare eta vijicapiRAYARE ema maca? Te vémunahacava vícha: “Mavaneruhi ema Viya”, éma macahénapapuca: “Tásicha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayacareripa titupisicahaviana eta te márijahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajíricacanapa.

²⁷ Tásicha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi.

²⁸ Nuvarahasera nímicutiarachinaheyare. Nararihi ena apinana ticaparapecacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa. ²⁹ Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi. ³⁰ Tásicha, ema naiya mavanecavarepa ema émana machicha, mayanahini macaematanehini éma apanavare. Tásicha, ema amaperu majicapapa: “Tiuri, nuyanayare” macahepa. Váhinéni mayanahini. ³¹ Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tínapuca, éma tisuapajirahihi.

Tásicha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapaná te anuma ena túhusianainihi énapa ena tisipecaturarahianainihi. Éti vahi esiapaimahi. ³² Taicha vahi esuapahini eta máimiturapiana ema Juan Tícachasiricarahini, váhivare ávarahahini étupiricavahini eta ítaresirana. Nararihisera ena tisipecaturarahiana, ichape eta nasuapirohi. Étisera, téavicava eta emasuapajiraiva, tayanapané ímahahi masuapacarevahí éma —máichavacapa.

Ema Jesús máimicutichina ena pártirárioana máurirahana (Mr 12.1-12; Lc 20.9-19)

³³ Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiaríhi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásicha, máijaracapa ena achaneana, pártirárioanayarehi. Tásicha, tiyanapa ema achane te apana avasare. ³⁴ Tacahe, te títecápapa eta caje tayairahi eta uva, máimivanerecapa ena manusurana nayaseapanavacayarehi ena pártirárioanahí eta tattucachaqueneyarehi éma. ³⁵ Énasera ena pártirárioanahí tisemauchavanarichucha. Nacaratacavacapa, náehapa

ena vanairucana. Nacapacapa ema émana. Ema apana nayucaracapa te márijahiana. ³⁶ Tásiha, ema achane máimivanerecavarepa ena apamuriana. Camuripananapa. Váhiquenesera náijaracahini, náehavacavarepa. Nacapacavacapa ena apamuriana.

³⁷ Tacahe, émajacaruvapa máevataca ema machicha. Máimijachaipahi émapapucaini napicauchahini. ³⁸ Te náimahapa ema machicha ema ticayeha eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharacahavimahi ema achanénavaji”. ³⁹ Tacahe, nacaratacapa ema machicha, nacuchucapa eta tayeha eta isaniti, nacapacapa.

⁴⁰ Puiti, nuyaserecaheyare: ¿Tájahapuca máicharacavayare ema ticayeha eta úvaquiji ena pártilarioanahi máurirahana? —macaheda ema Jesús.

⁴¹ Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártilarioanainihi. Máijaracainapa ena apamuriana pártilarioanayareva, nácani tipicaurahianahi, náijaracahini eta mayehe parte —náichapa.

⁴² Tásiha, ema Jesús máichavacapa:

—Jehe tiúrihi eta ejicapiiranuhi. Nuvarahasera epanerechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumeearayare eta peti, taicha vahi náimatihini. Émasera ema Viya macaitecapahi eta te táicuchihi eta tatuparahahi. Tacapicahuquenehi puiti. Táitusiava, téavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

⁴³ Puiti numetacahe: Táichavenehi eta emasuapajiraivahi, vaipa étiparacaimahi tayeha eta mavanairipi ema Viya. Ena tisuapajirahianahi, éna ticavacureanayare te jena sácheyare. Énainapa téchanayare eta vanairipiana.

⁴⁴ Puiti, núti nucutihi eta ichape mari náepuruquenehi. Eti épurunuuanahi, iáquipaicavayare évetutujicayare. Tichimaracahenapa eta muraca ecuñaraqui taicha eta emavarahairahi éhicanu —máichavacapa.

⁴⁵ Étasera eta nasamirahi ena tuparairucana énapa ena fariséoana, tisemarinehi taicha tímaticavanapa eta énairahi tayunacavaca eta máimicutichiravacahi ema Jesús. ⁴⁶ Navarshapa nacaratacayarehíni. Tipicacavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

22

Ema Jesús tímicutichava mácani rey te máichuhavacapa ena machimaranaya, máichayarehi eta ichape fiesta

¹ Ema Jesús máimitucavare ena achaneana eta apana máimicutichaquene. Ánipa macahe:

² —Ema Viya, macutihi mácani rey te máimiyenachayare ema machicha, máichayarehi eta ichape fiesta. ³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna. ⁴ Tásiha, ema rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macaheda.

⁵ Énasera ena máichuhauqueneanahi vahi nasuapahini. Nájina nayanahini. Ema émana tiyanapa te máesane. Ema apana máimahapana eta mayehe tienda. ⁶ Ena apamuriana nacaratacapa ena vanairucanainihi, náehavacapa, nacapacavacapa. ⁷ Tacahe, te máechapa ema rey, tisemapa. Mavanecapa ena masuntuana nacapapanavaca ena ticapahianahi. Náijuchavare eta tamutu eta napenanaini. ⁸ Tásicha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi. ⁹ Eyana te tamutu cálleana. Íchuhabacayare namutu nácani ecainunaqueneanayare” máichavacapa. ¹⁰ Tacahe, ena mavanaranahi tiyananapa, náchehupanevacapa. Nacurujcavacapa namutu nácani nacainunaqueneanapahi: nácani achaneana tiúriana énapa ena súnsusurujiana. Camurianahi. Tínicanarinehi eta te távihayarehi eta piesta.

¹¹ Tacahe, ema rey tisiapapa, máimahayarehi ena machimaranahi. Máimahapa ema émana achane ema matiarihiquenéhi vahi manacahini eta namuirihasa te ticaichuhasiana. ¹² Tacahe, máichapa: “Ajaira, ¿tájaha tacayema vahi pinacahini eta müiriare níjararuheanahi tayeheyarehi puiti juca piéstayarehi?” Émasera ema achane vahi majicapahini. ¹³ Tacahe, ema rey mavanecavacapa ena mavanarana: “Eveha ema maca. Ítijivaucha, ítiápechavare. Íyaracuhapana te timapicu tayehe eta máyauchiavayare macapitiquiahechiavayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimurianarichusera ena títaurahianayare —macahepa ema Jesús.

*Navaraha náemejecapavacha ema Jesús tayehe eta impuesto
(Mr 12.13-17; Lc 20.20-26)*

¹⁵ Tacahe, eta nasamirahi ena fariséoana, tisemanarinehi. Tiyananapa ticuturujicacanapa, navarahaipa náemejecapavachayarehi apaesa étainahipucaini taviuchahini ema Jesús. ¹⁶ Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihi eta pímitusiravacahi eta táurinaquene achene ticaijuhe me Viya. Váhivare pipicacaracavahini eta péchajishairahi eta náichavaquenévanahi nácani achaneana, tayanapanehi aquenucahi. ¹⁷ Vivarahahisera viyaserecavyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

¹⁸ Émasera ema Jesús máimatiacavacapa eta tamaurivapahi eta napannereruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu?

¹⁹ Nímahaseji, iáminanu étapena eta reale —máichavacapa.

²⁰ Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

²¹ Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayeherichuhi éma. Tásicha, íjaracavare ema Viya eta mayeherichuhivare éma —máichavacapa.

22 Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajijasiravahí. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare

(*Mr 12.18-27; Lc 20.27-40*)

23 Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahí ema Jesús. Natanucahi eta tátetseraruvayarehi náicha. Ánipa nacahe:

24 —Tata maestro, ema víyarahaini Moisés, manaqueahí eta máechajiriruvahí eta viyehe: “Te máepenaequenehahipuca ema achane esu mayena, tásiha nájinahipuca manaquequeneruvainahini machichainahini; te matiarihihipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivainahí ema maparapéni”. **25** Tacutiquene te juca vitaracu, natarihinihi ena siétequeneana ticaparapejiricacana. Tacahe, ema náechavimuri títauchavapa. Máepenaequenehapasera esu mayena. Nájinahí machichainahini. **26** Tacahe, ema maparape máitauchavare esu machinenaini. Énerichuwaresera máepenaequenehavare, nájinavare machichainahini. Ema émana maparape máitauchavare ésu. Énerichuvaré máepenaequenehavare. Namutupa ena siétequeneana navehahí ésu, tásihasera náepenaequenehapaipa, nájina émanainahini macachichahini eta suyehe.

27 Te táchiquenepa, tépenapa esu esenaini. **28** Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

29 Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta támíturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya! **30** Ánaqui te apana náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenacacairahi. **31** Éti váhivarepuca ácaicutiara eta yátupirahi eta vahi táchiquenepa etá náchanevana ena náepenaqueneana. Váhipuca ácaicutiara eta máechajiriruva ema Viya. Ani macahehi éma: **32** “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahí numetacahe: Ema Viya, éma téchahi eta náitaresirana ena téhicanahi, tayanapane tépenanaripa. Eta náchanevana, tímiyanavarichucha titareca te mamirahu. Éti, ichape eta éjecapiravahí —máichavacapa ema Jesús.

33 Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

Eta tisuapacarepanahi te mavanairipiana ema Viya

(*Mr 12.28-34*)

34 Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna. **35** Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

36 —Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

37-38 Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, tínapuca tayehe eta apamuri vanairipiana. ³⁹ Eta apana táehiruhi eta juca, ánivare tacahe: “Pémunacayare ema piparaepiyahi, tacutei eta pémunasiravahí pítí”. ⁴⁰ Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

*Yátupi ema Cristo mámariéquenénihi ema rey David, Víyahivare éma
(Mr 12.35-37; Lc 20.41-44)*

⁴¹ Tacahe, eta náurujasiraichaha ena fariséoana te machacaya ema Jesús,
⁴² máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenéhi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequeneyare ema víyaraháini rey David —nacahepa.

43 Majicapavarepa:

—Yátupihi ema Cristo achanequenéhi eta máimahi taicha mámariequeneyarehi ema víyaraháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴⁴ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena tictalianacavianahi” macahepa. ⁴⁵ Ema David, eta máimijarechirahi ema Cristo “Tata Náquenu”, ¿tájahapuca eta macayemaquenéhi? Núti németeaca Víyahivare ema Cristo. ¿Tájaha ichahi éti? —máichavacapa.

⁴⁶ Eta nasamirahi eta juca, nájina náijaracavahini najicapahini. Eta tacahe, nájinapa napatsicavahini nápechahini nayaserecahini.

23

Ema Jesús máimereuchavaca eta náejecipiravana ena fariséoana énapa ena escribánoana

(Mr 12.38-40; Lc 11.37-54; 20.45, 46)

¹ Tacahe, ema Jesús máichavacapa ena achaneana vítipa viti máimitureana. Ánipa máichahavi:

² —Ena escribánoana énapa ena fariséoana tímijachavana catuparahaneta navepaisirayarehi eta mavanairipiana ema Moisés. ³ Tacahe, éna esuapayare. Ítauchayare eta navanairipiana. Váhisera ecuehica eta nayeherepiana taicha ena apapipijichucha eta napaneruana. ⁴ Tacutiquene tipamicacheana ítauchaya eta camuriqueneana nayeherepiana. Éti, tájina eta ejapanucarehíni nayehe. Nájinapa tiratahaimahi títaucha. Apanasica éna, vahi náratahahini náitauchahini tamutu. ⁵ Tímijachavanahi tamutu náitaucha, navarairahi ticunachacareanayarehi nayehe ena achaneana. Tisiñavavai-canahi eta nápajusiravahí religíosoana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihira tísape-peacavanahi píncanillanahi. Ticamatsivacahi eta nacamuirihira. ⁶ Ena

nani, te ticaichuhasiana eta nanisiraya, éna tinerejisnavanahi eta tiúrinalpanána eta náejasihaya. Navarahahivare ichape eta napicauchiraya ena achaneana te náurujisirarevanahi. ⁷ Tétavicavahi eta navarairahi ticapi-cahuana. Navarahahivare ticacajamicasianayarehi te jácani nácapajisiha ena náimitureana téhepahi calle.

⁸ Étisera vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejiricacahi, ecuticacahi te mamirahu ema Viya. Nucarichu nútì yátupiquenénuhi eyehenuhi Maestro, nuti Cristo. ⁹ Váhivare “Tata Nucaiyaque” ecuquicha nácani achaneana te juca apaquehe. Taicha mararihi ema yátupiquene Ecaiyaque, ema tiávihahi te anuma. ¹⁰ Váhivare tísapacarémahi eta náimijarechahe, “Tata nuyehe jefe”, taicha nucarichuhi nútì yátupiquenénuhi jéfenuhi eyehe. ¹¹ Nuvarahasera ítátijiricacayare. Nácani titátiyahiana, éna ticunachacarepananayarehi eta eyehe. ¹² Énerichuvare nácani mánsuanahi, éna ticunachaca-repananayare me Viya. Nácanisera ticasíñavavaicanahí ticunachavanapuca, tímitsiriávanayare me Viya —macahepa.

Ema Jesús mayunacavaca eta náejecapiravanahi ena escribánoana énapa ena fariséoana

¹³ Tacahe, títecapanapa ena escribánoana énapa ena fariséoana. Tásiba, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahaná tisiapaná. ¡Étiripa vahi ítujicavaimahi esiapa!

¹⁴ Jucarihi eta apana tiviuchahehi. Tatuparacahi ejapanuyare ena tépenaimana te váhipuca narataha navachachahini eta nantéve. Étisera everejicavacahi tamutu eta nacayehequeneana. ¡Apimirairahehi! Épiyacavahi religiósohehi, íchahi iúpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

¹⁵ ¡Jucarihivare eta apana tiviuchahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta íturua ena téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

¹⁶ Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiana. Ejecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihahi eta te Templo, ticaviurevanainapa ícha éti. ¹⁷ ¡Tétavicavahi eta emaecharaireva eti púchuquiana! Eta Templo, étara tipicauchacarepanahi tayehe eta oro tiávihahi tayehe.

¹⁸ Iápechavavare eta ejecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahi. Téhesera najurachahi tayehe eta nanaquiruvahi te táinahu eta náijuchirarehi, étasera ticaviurevanaripa” íchahi éti. ¹⁹ ¡Tétavicavahi eta emaecharaireva eti púchuquiana! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipi-cauchahi eta enaquiruvanahi. ²⁰ Taicha nácani tijurachanahi tayehe eta

náijuchirarehi, vahi tácarichuhini napicauchayare éta, napicauchayarehiva tamutu eta námavhuanahia tiávihanahi te náijuchirarehi. ²¹ Tacutiquene nácani tijurachanahia tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe. ²² Énaripa ena tijurachanahia tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

²³⁻²⁴ ¡Jucarihivare eta apana tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiana tayehe eta titucacareana. Ímijachavahi yátupiquenehi eta religió-sohéirahi eta epamisiravahi eta ítauchira eta vanairipi eta ecamavahuira me Viya eta diésmuri tayehe eta sucurecana. Ecunachacarehi taicha éta. Váhisera epamicavahini eta táuriqueneana ticunachacarepanahí me Viya. Tatuparacahe emutu ájapanurahi; ecatiuchavacayarehi ena macatiuchavarahanahí; yátupina eta ítauchiraya tamutu eta íjarasiravahi; yátupina eta ecasiñavairaina me Viya. Tatuparacahehivare ecamavahu ena me Viya eti diésmuri. Éti éñamavahi eta ítauchirahi eta ánichichana, étasera eta tisuapacarepanaqueaneanahí táuriqueneana, tasapihahi vahi esuapahini*.

²⁵ ¡Tétavicavahi eta apimirairahehi! Éti ímijachavahi yátupiquenehi religió-sohehi, ecaeñamaracavahi eta ímyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaete-maraivana étapa ena íjarasiravahi icha tamutu eta ejamuraraivana. ²⁶ ¡Tétavicavahi eta epuchuquiva eti fariséoana! Tamapurujíhi eta religiósohéirahi. Tacamunuhi tativa esipaca ena esamureana, apaesa yátupinasarepa eti iúrivayare, tipachinainapa eti ítaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eti covacha. Tiúrinahí te tainahí, téhesera te amahe távihahi eti máeperejiqueneana. ²⁸ Tacahehi eti ítaresirahi éti. Ticutimahinehi iúrihi te namirahu ena achaneana. Étasera te esamureana tárujisiavahi eti evainarajivana, tacutiquene eti apimirairahehi.

²⁹ ¡Párehesamichapucaini eti escribánoana étipa eti fariséoana! ¡Ichape-muriquene eti eviurevanahi! Eti, ímijachavaipahi puiti ecunachacarehi eti evarairahi échapajirica eyeheheacahi eti náecariana ena profetanaini matapiravarequeneanahí, nacaparuuanahí ena iáchucanaveanaini éti. Épiyacavahi yátupiquenénahini eti iúrivahi. ³⁰ Tásiha, ánivare ecahe: “Te vitiarinhinaripahini víti eti acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa. ³¹⁻³² Étijivapa ímereuchavahi eti apimirairahehi, taicha puiti éti epanerechahi ecapacanuya, tacutihi eti napanerueruanahí ena iáchucanaveanaini. Tásiha, ecuticacayare eti naviurevahí ena iáchucanaveanaini.

³³ ¡Éti tachichanaveanatataji eti quichare, tétavicavahi eti evainarajivahi! ¡Váhiqene ticaiticahémahi eti ícuñaya te infierno! ³⁴ Nímicaecherachayare eti evainarajivahi. Nuvanecayare napauchahe ena nuchanerana. Éna, timetacaheanayare eti mapaneruerana ema Tata. Tímitucaheanayareva tamutu eti nímiturapiana. Nasapihayare vahi esuapaimahi éna. Éna, yátupihi náituca. Émepururecayaresera éti eti náitupajijiasiravahi éna. Esapihainapa, éti ecapacavacainapa éna; ena apamuriana émetatacayare te crusu. Tásiha,

* ²³⁻²⁴ Ani tacache eti mayeherepi ema Jesú te máechajiriruva: “Eti ecatijica eti chupi; ejiricasera eti camello”.

ena apamuriana éstacavacainapa te iúrujisirarevana. Éhicarairicavacainapa te jácani avasareana najunaiyayarepahi.

³⁵ Tásiha, eta ecapasiravacainapa ena nuvaneruanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihi eta máuriva. Émapa ema máequenereruhi Zacarías (machichainihi ema Berequías), ema nacaparuhi te tamirahu eta Templo. Camurianahisera ena apamuriana náumurivanainihi. ³⁶ Nutupiruva numetacahe puiti: Étinapa tamuriacayare tamutu eta náepeniranahi. Títecipainapa eta ícuñayare eti achaneana ítareruanahi puiti —macahepa ema Jesús.

Ema Jesús ticatisamurevahí táichavenehi eta namasuapajiraivahí ena achaneana ticavasanahí te Jerusalén

(Lc 13.34-35)

³⁷ Tacahe, ema Jesús tiápechavava máechajicavacapa ena achaneana. Ánipa macahe, taicha eta macatisamureravahí:

—¡Téavicavahí nucatisamureravahí ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujiacanuhini, tacutihini eta varayu te tacurujimuriha eta tachichanaveana eta te tapava. Váhisera ávarahahíni. ³⁸ Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa. ³⁹ Numetachevane puiti vaipa iápechavaimahi ímahanu, tiámainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravihi pítí vanairucaquenévihi me Viya” ecahénapa.

24

Ema Jesús máimereucharipa eta táquipaisiravaya eta Templo

(Mr 13.1-2; Lc 21.5-6)

¹ Tacalhe, ema Jesús tiúchucapa tayehe eta Templo, tiyanayarepaini. Vítisera viti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témplosami. ² Émasera ema Jesús tijicaphahavipa:

—Tamaruruijyare eta juca táurinava eta pétisami ímahaquenehi puiti. Nutupiruva numetacahe: Járabajayare eta sácheyare ticaquipaicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puiti —máichahavipa.

Tatiarihiyare eta ecutiarareanaya te tánehipaicha eta táichecuiraya
(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, viti máimitureana viyaserecapa:

—Vivaraha pimetacahavi. ¿Tájamuhupuca eta náimiaquipaisirayare eta Témplosami? ¿Jararihiyarepuca eta ecutiarareyare eta piápechiravayare píteca, étapa eta táitauchirayare eta táequenereruhi mapanereru ema Viya? —víchapa.

⁴ Tásiha, ema Jesús máichahavipa:

—Ecuneuchavaicha yátupina, machu navayuacalhe, taicha nárajapayare ena tépiyacavanayarepahi tímivasichavanayare nuyehe. ⁵ Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

⁶⁻⁷ Énerichuvare esamairircayare eta táehacacairayare eta ichapequeneana avasareana. Ticanarajiricacanainapa eta te avasareana

tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táchecuirayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiranaya eta apaquehe te jácani távihanapahi tátetupiaruyare. ⁸ Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásiba, eti nuchaneranahi, ticatianacaheanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva. ¹⁰ Tásiba, nararihinapa camurianaya ena tínajicavanayare eta náehisiranuhi. Tásiba, ticatianacaheanainapa éti yátupiquene eta éhisiranuya. Tíjararecaheanainapa éti. ¹¹ Natiarihinhinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiraivayarechucha, camurianayare ena navayuaruanayare. ¹² Énaripa ena arajuruana, tétavicavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahianáimahi. ¹³ Étisera nuchaneranahi, te ecamichahi tamutu, ímiyanovahivare eta éhisiranuhi te táitavapa tamutu, nucuchucuhahayare núti.

¹⁴ Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahí, étapa eta apamuriana námiturapiana. Te ítecapapa te tamutu eta avasareana, nápechavayare nuchava.

¹⁵ Numetacahevanevare eta apana. Járabajayare eta sache táñehiqueneyare. Tímerecavaya ema achane váinarajiquene, máechajisihaquenehi ema víyarahaini profeta Daniel. Mavanecayare ena machanerana náechipejisi-rayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamuñuhi ticaravuhanayare eta májurehi ema víyarahaini Daniel.) ¹⁶ Tásiba, te ímahapa eta juca, esamaiririccapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te cérrona, étaina eyumurusiavaina. ¹⁷ Nácani tiávihanahí te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náeñamaqueneanainihi. ¹⁸ Nácani tachimarruanayare te vámahi eta téchacarehi, táuricapa vaipa nacuchava tayehé eta avasare, tayanapane náeñamahi eta nayereruvana. ¹⁹ ¡Páureanasami nácani esenana tachimarruanayare, nácani ticajarianahipuca, nácani ese-nana ticachichanahí eta amuya tiájicachaha! ²⁰ Eta tacahe, eyaseacayare ema Viya tacuija táchicajahe*; váhivare tacuchimaracahe eta ichape tiquiva te achene te eyanapapuca ejuna. ²¹ Te jena sácheinayare, tétavicavayare eta nacatajivairayarehi ena achaneana. Tájina táchutimahi eta táñehivayare eta nacatajivairayare, te táepaniravahí eta náitaresirahí ena achaneana te juca apaquehe. Te taequenénapa eta tíñehi, tájinainapa táchutimahi. ²² Nájina tacaitiruimahi eta nacatajivairayarehi ichape. Macaichecavaneiresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejruana, majapanuqueneanahivare. Taicha te vahi macucaicheca ema Viya, máitamuriyahipucaini macapapajicavaca namutu ena achaneana ema maca achane.

* **24:20** Ema Jesús máechajisihahi eta ticasarahimuhu, tiquivamuhuhivare te jena mávasa Judea. Máechajisihahivare eta nayeherépi ena israelítana eta váhiquene náisapavahini tiyanana tipaicana te jácani sávarumuahuana.

23-24 Énerichuvare te tánehipaicha eta juca, natarihinapa ena tivayuarahiana tépiyacavanayare Cristo tímivasichavanainapa núti. Natarihivre ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarihipahi te juca vitaracu”. Ena apamuriana ánivare nacaheyá: “Náepiyahiraivahi éna. Ema Cristo mávihahi te viávasa víti”. Étisera vahi ecusuapavaca. Eta navarairahi tivayuacaheanaya eti machanerana ema Tata, náiteturuequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare. **25** Étisera vahi tivayuacaheanaimahi taicha numeta-cahevanehi puiti. **26** Te náichahepuca: “Ímaha máenahi ema Cristo ánaqui te mávapahi apaquehe”, vahi ecuyana. Étaripa te náichahepuca: “Mararihipa jácani tayumururevaquenehi cuarto. Vicarichu viti vímatihi eta mávihahi”, váhiquenevare ecusuapavaca. **27** Taicha te yátupinapa eta nítesirayare núti, nucutiyare eta tájahúchirava títecapa eta térameca. Namutuyare ena achaneana te juca apaquehe tinecapanuanayare. Tacahayare eta nuchavirayare nuti Manerejirunuhi ema Viya. **28** Vahi ecueñamava távihapuca nítecapihaya. Núti nítecapauchaheya te jácani iávihahi ét†.

*Eta machavirayare ema Manerejiruhi ema Viya
(Mr 13.24-27; Lc 21.25-33; 17.26-30, 34-36)*

29 Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaque-neanahi énerichuvare tiyamuricanainapa, tiyejejecavanainapa. **30** Tásicha, náimahainapa te anuma eta nícutiara núti Manerejirunuhi ema Viya. Tíyahainapa eta napisira namutu ena achaneana távacuanahí eta avasareana te apaquehe. Tásicha, tímahanuanainapa núti. Tiámanuinaipa eta úcaji eta núcupsirayare. Tétavicavayare eta nujaraivayarepahi, níñehinapaipa. **31** Nuvanecaya ema Arcángel, muracayare eta macachujairayapahi, apaesa ena ángelleana nacurujicainapa namutu ena nuchanerana nunerejiruanahí, tiásihanayare te tamutu eta juca apaquehe.

32 Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemu-huirayarépa. **33** Ene tacahehi, te ímahayarepa tacaecherapa eta júcana ecutiarareana, ímatiacainapa eta tánehirainapa eta nuchavira. **34** Numeta-cahevanecha: Vuíchaha titavanaimahi ena achaneana náitareruanaichaha te táitecapapa eta júcana ecutiarareanayare. **35** Títavainapa eta anuma étapa eta apaquehe. Tativayaresera títauchava tamutu eta numetaruheanahí.

36 Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángelleana vahi náechahini. Nútivaneréca-hipucáini néchahini. Macarichu ema Tata, ema téchahi. **37-38** Tacutiyare eta acane eta náijahúchiravahí tépenana ena achaneana machamurianaini ema Noé. Ena nani tinicairihianarinecha, náematanerinecha térama, tímarrere-canahí ena nachichanaveana. Vahi téñamavanaimahi eta náimairahi ema Noé eta masiapirohi tayehe eta ichapequene pacure. **39** Tájina vahi natseca-vahini eta táitecapauchirayarehi eta ichape une. Tacahe, eta támirisirapa eta ichapequene tiquiva, tacapapajicavacahi namutu éna. Ene nacaheyare

† **24:28** Te máechajiruvahí ema Jesús, áni macahehi: “Te jácani mávihahi ema máepenaquene, eta távihayare eta sipuquiana”. Eta juca mayehehi proverbio, tatarihi eta tacayemaquenehi tayumurevahí.

ena achaneana te jena sácheyare. Vahi natsecavahini tayehe eta nuchaviraya. ⁴⁰ Te jena sácheinayare, natarihiyare ena apinana ajairana ticaemata-neanahi te isaniti, ema émana tiáramiccareyare tiára. Ema apana manasinapa. ⁴¹ Tacutiquene, apinanahipuca ena esenana cáemataneanahi tiyuvarecana-hipuca. Énerichuvare esu ésuna tiáramiccareya tiára. Esu apana sunasinapa.

⁴² Eta tacahe, etsecavahí ecauneuchava étí machu vahi ecunecapauchava eta nítésirayarehi nuti Iáquenu. ⁴³ Nuvaraha ácaicutiaraquenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini. ⁴⁴ Eta tacahe, étí ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

*Nararihi ena mísúana tiúriana. Nararihivare ena mísúana máurirahana.
(Lc 12.41-48)*

⁴⁵ Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máijarasiraya eta tinicacareana ena apamuriana machamusuvanahi. ⁴⁶ Tétavicava eta máuricacarevaya ema maca ticatuparahahi, te tamutuhi máitauchahi jácani machimapirana ema máquenu. ⁴⁷ Németeaca, eta tamutuirahi tiuri eta machimapirahi, matuparcainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauraivahi. ⁴⁸ Téhesera váhipuca tiuri eta mapanereruana ema mácani empleado, máimijachaichucha tiyere-yarehi eta máitecapirayarehi ema máquenu. ⁴⁹ Tásicha, macaetemajircavacapapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana térrahiana, téñiricapa. ⁵⁰ Tásicha, vaipa manecapauchavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana. ⁵¹ Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahinepuca, macapitiquiahechavaineepuca éma. Tásicha, machu ácutihini ema maca empleado máurirahahi, machu ecaquipaicasismi eta te yucu infierno.

25

Ema Jesús máimicutichina ena diésqueneana amaperuana esenachichana

¹ Puiti nuvaraha nímicutichinaheyare nayehe ena tiúchucuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana. ²⁻⁴ Ena cíncioqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cíncioqueneanahivare máechemarai-rahana mapanererureana. Vahi námauchavapahina eta nahaceiteyarehi. Tásicha, tájinapa naviyahini. ⁵ Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa. ⁶ Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa. ⁷ Téchepucanapa namutu ena esenachichana. Náetupiricapa eta namicahuana. ⁸ Tásicha, ena cíncioanavare tiájicuvacaipahi eta namicahuana. Tiyaseserecanapa eta aceite. Ánipa

nacahe: "Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa" nacahepa. ⁹ Énasera ena cíncogueneana najicapapa: "Vahi víjaracahémahi machu véchuriaca víti apanava. Vahi várataimahi. Tiúripana eyana evachareca eta ehaceitena" nacahepa. ¹⁰ Tásicha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távhayarehi eta piesta. Náehicapa ena cíncoguana natseruvanahi te távhayarehi eta piesta. Tacahe, ticaeratapa eta tapaja. ¹¹ Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: "Tata, tata, pivejiequenehahavi. Vivaraha visiapa" nacahepa. ¹² Émasera ema arayenayare majicapapa: "Eti, ¿nájahahéhipuca? Vahi nímatihe. Németeaca vahi étina tavanaranaina eta petí" máichavacapa ema arayenayarehi.

¹³ Tacahe, ema Jesús máichahavipa:

—Éti, vahi ecucuti ena máechemarairahana. Ecuyiresera ena téchemarahiana. Ecuneuchavaicha éti, machu vahi ecunecapauchava eta jácani sácheyare eta nuchavirayare nútí Manerejirunuhi ema Viya.

Ema Jesús máimicutichinavaca ena achaneana ticaijaracasianahi eta maplatane ema achane rico

¹⁴ Puiti nuvaraha nímicutichinahe tayehe eta níjarasiraheya eti nuchanerana eta evacuteicana taicha eta táurirahi eta ecaematanasiranuhi. Matiarahi ema achane rico. Tiyanayarehi te apana avasare. Máichuhavacapa ena mapanana manusurana. Máijaracapa eta maplatane.

¹⁵ Ema achane máimativacahi eta náechemaraivahi ena manusurana. Ema émana máijaracapa cinco millone. Ema apana máijaracapa apina millone. Ema apana máijaracapa étana millone. Nacaejapacayare eta plata. Tásicha, ema rico tiyanapa te macaijuheyarehi te apana avasare. ¹⁶ Tacahe, ema tijacapahi eta cinco millone, macaematanacapa eta plata. Macaejapacapa eta plata. Diez millonepa maicha eta maplatane eta macaejapasirahi. ¹⁷ Ema apana, ema tijacapahi eta apina millone, énerichuvarepa macaejapacapa eta plata. Títucavavare éma eta cuatro millone eta plata. ¹⁸ Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹ Tiyere eta mapairirisirahi ema náejaharu. Téhesera te tichavapa, mayase-recavacapa eta plata máijararuanahi éma. ²⁰ Tacahe, tínapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: "Tata, píti píjaracanuhi cinco millone eta plata. Júcahisera cinco millonevare eta taejapasirahi". ²¹ Ema máejaharu majicapapa: "Tiuri, nuchicha. Tájina táichava. Tétavicava eta piúriva. Pítauchahi eta picaematanasiranuhi eta nuplatane. Puiti vahi támapurujimahi eta piúrivahi tayehe eta juca ánimurichichahi níjararuvih. Nutuparacavinapa eta camuriqüene. Puiti pisiapainapa eta nuyehe. Piúrisamurereacaváinapa". ²² Tásicha, títecavarepa ema apana ema tijacapahi eta apina millone eta plata. Máichavarepa: "Tata, júcahi eta apina millone eta plata píjararunuhi. Júcahivare eta apinavare millone eta taejapasirahi". ²³ Ema máejaharu majicapavarepa: "Tiuri, nuchicha. Tétavicava eta piúriva píti apana. Puiti, váhivare támapurujimahi eta piúrivahi tayehe eta juca ánimurichichahi níjararuvih. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa". ²⁴ Tásicha, títecavarepa ema tijacapahi eta étana millone. Máichapa ema

máejaharu: “Tata, núti nímativihi eta pimajapanuraivahi. Piverejicanuyarehi eta taejapasirayarehi eta piplatane. Pítahacanuyarehiva eta nématanevachahi.²⁵ Eta nupisirahi nácaetehahini eta piplatane, nécarapa. Puiti, júcahi nímichava tamutu eta piplatane”.²⁶ Ema máejaharu majicapapa: “Tétavicava eta pisunsuva, piti plújutataji. Te pímatinuhipuca eta numajapanuraivahi, nítaharahi eta apaematanevacha, téhevare pímijachahi nuverejicaviyare eta taejapasirayarehi eta níjararuvihi nuplatane;²⁷ váhiyapa pinacapaini te banco eta nuplatane. Puiti váequeneipahini puiti eta taejahacaripahini eta nuchaviraipahi”.²⁸ Tásiha, máichavacapa ena apamuriana manusurana natarihi-queneanahi: “Everejica ema mácatataji eta plata. Íjaraca ema ticayehehi eta diez millone.²⁹ Taicha, mácani máituruequenehahini eta macaematanearasirava, tatuparacahi eta nímicatasiraya. Ticayeheyare camuripana. Énasera nácani vahí náiturequenehahini eta nacaematanearasirava, ticaverejicasianayarehi eta nájaracasianahi.³⁰ Émechareca muraca ema maca musu máurirahatataji. Vahi ecujapanu, tayanapane máiyahainepuca, macapitiquiahechavaineppuca. Tásiha, iáquijica eta te cuarto tamapicujuhequenepanahi” macahepa ema achane rico.

Ena achaneana, te jena sácheyare ticayaseserehianainapa, étapa tiámavacaya etá náitátirahi ena apamuriana, ticaevatanainapa tayehe etá návhayare

31-33 Te nuchava nuti Manerejirunuhi ema Viya, néjacainapa eta te nuyehe trono tacapicahuene, Réynuinapa. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahí nuchaneranainahini nunacainapa te sapa.³⁴ Tásiha, nuti Rey ánipa níchayare ena nuchanerana tiávihanayarehi te nuvaure: “Yare, eti iúricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe.³⁵ Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare.³⁶ Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”.³⁷ Tásiha, ena níchuhaqueeanahi tijicapanuanainapa: “Tata, ¿tájamuhu vímahavihi pécuhapahi, tásiha vénicavipa? ¿Tájamuhuvare vímahavihi pimaunepahi, tásiha víti vésichavipa eta une?³⁸ ¿Tájamuhuvare vímahavihi te pipaisirana tájina pítecapihahini, tásiha, víti víjaracavipa eta pítecapihahí? Váhivare vímahavihini mamuriarevinahini, tásiha víti vimuriachavipa.³⁹ ¿Tájamuhuvarehipuca picajumahi, tásiha víti vítpuchapanavipa? ¿Tájamuhuvarehipuca picaeratahi, tásiha víti véjirapanavipa?” náchanupa.⁴⁰ Tásiha, nuti Rey nujicapainavarepa: “Nutupiruva numentacahe: Nútira íjaracanuhi tamutu eta ejapanuraivahi, ímicasiravacahi ena echamuriana nuchaneranahivare, ena nani namaesachaqueneanahi najacapahini ena apamuriana ena achaneana” níchavacapa.

41 Tásiha, ena tiávihanahi te sapa, níchavacainapa: “Étisera évuisiha te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema iáquenuhi ema Váinaraji énapa ena majupahana ángeleanainihi.⁴² Taicha te nécuhapahi, éti vahí íjaracanuhini eta nunica. Numaunepahi, váhivare ésicchanuhini une.⁴³ Étaripa te nupaisiranapahí, váhivare íjaracanuhini eta nítecapihahini. Néchurihavare eta numuiriha, váhivare íjaracanuhini numuirihinahini. Nucajumahivare, nucaeratavare, váhivare éjirapananuhini” níchava-

cainapa éna. ⁴⁴ Tacahe, éna náichanupa: “Tátachicha, ¿tájamuhu vímahavihi pécuhapahi, pimaunepahi, pipairiricaphi, mamuriarevihi, picajumapahi, picaeratahi, eta jácani vimáimicasirávihipuca?” ⁴⁵ Nuti Rey nujicapaina-varepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesainahini ena nani nuchanerana emaesachaquenea-nahi”. ⁴⁶ Emutu éti eyanayare tayehe eta ecaicuñaiyayare máitavacayare. Énaserá ena nunerejiruana, matapiravareanahi. Námavacainapa tayehe eta táurivayare eta náitaresira, máitavacacayareva.

26

*Napanerechaipahi ena tuparairucana eta nacaratasirayare ema Jesús
(Mr 14.1-2; Lc 22.1-2; Jn 11.45-53)*

- ¹ Te titapiricapa eta juca máimiturapianahi, máichahavipa viti máimitureana:
² —Écharichuhi éti eta apinarine sache eta Pascuáiraya. Tásiha, nútí Manerejirunuhi ema Viya, ticaratacanuanainapa témetatarecanuanainapa —máichahavipa.
³ Tiuri, ena tuparairucana énapa ena aquenucarohana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor. ⁴ Tacahe, náechajisihaipahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi.
⁵ Tipicacavanarichuchasera. Ánipa nacahehi eta náechajiriruvahi:
—Vuíchaha vicucarataca éma achichu juca piéstairaya. Taicha camuriana-yarehi ena achaneana, machu tájahapuca náicharacahavi taicha navaraha-yarehi nacatiucha éma. Vicuchapasera nayana —nacahepa.

*Esu esena tiámasichahi ema Jesús te táijiyequene perfume
(Mr 14.3-9; Jn 12.1-8)*

- ⁶ Tacahe, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticaijare Simón ema leprosoinihi. ⁷ Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta táijiyeva. ⁸ Eta náimairahi ena nuchamuriana máimitureana ema Jesús, váiparinehi náuricahini eta suémepruresirahi eta tasivachaquene perfume sujucusisirahi ema Jesús. Ánipa nacahehi:

—¿Tájaha tacayema suémeprureca eta juca tasivachaquenehi perfume?
⁹ Tiúripanahipucani víjararecahini eta juca táijiyeamaquenehi. Vivehahini eta camuriquene plata; tásiha, vímicatasihahini ena páureana —nacahepa.

- ¹⁰ Émasera ema Jesús máimatihi eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi. ¹¹ Ena páureanasami, tamutuchucha sácheana eta ecachaneravacayare éna. Ímicitacayarehi te jácani ecaimahaquenérana. Nútisera vahi nánasiquenémahi eta eyehe. ¹² Eta juca sujucusisiranuhi eta perfume, sucainapucahi ésu eta suíjiyechirahi eta náquehe tayeheyarehi eta nucaecarasirayare. ¹³ Nutupiruva numetacahe: Nácani ticametarairuanayare eta tiúrina echajiri-rucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasi ema Jesús
(Mr 14.10-11; Lc 22.3-6)*

¹⁴ Ema Júlasi, émarichu vichamurinihi éma vidocenénihi apóstole mayehe ema Jesús. Tiyanapa téchajiripanavahi nayehe ena tuparairucana. ¹⁵ Anipa máichavacahi:

—Te yátupihipuca evarahahi ecarataca ema Jesús, nútí nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale. ¹⁶ Jéhevarepasera ema Júlasi matanucaipa eta máicharacayarehi eta máijararesirayarehi ema Jesús.

*Ema Jesús máenimurihana ena máimitureana
(Mr 14.12-25; Lc 22.7-23; Jn 13.21-30)*

¹⁷ Tacahe, títecapapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pivarahahi vácajuhe eta vétupirisivahini eta vinisirayare eta uvesachicha eta viyeherepi? —nacahepa.

¹⁸ Éma tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivanecahavihi eta piyeho. Ani macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

¹⁹ Tacahe, tiyananapa ena máimitureana. Étapaichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

²⁰ Tacahe, te jena yátiquenehi ema Jesús, ténicahavipa viti dócequeneana máimitureana. ²¹ Te vinicaripahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

²² Tacahe, víti ichaperinehi eta máimipanereresirahavihi eta juca máichirahavihi. Vimutu viyaserecapa éma:

—¿Nútichupuca, Tata, jácani? —víchavacaphi víti éma.

²³ Tásicha, éma máichahavipa:

—Mácani néniruyare eta pan néchipaejiruhi te juca nuplatura, émara ema tíjararecanuyare. ²⁴ Tacahe, nútí Manerejirunuhi ema Viya, étapaichuhi eta nacapasiranuyarehi, táitauchiravayarehi eta nuyehe eta tääechajiriruvahi eta Sagrada Escritura. ¡Páuresamisera ema tíjararecanuyare! Tiúripaichuhi-pucani vahi macuchucayahini te sujuhe esu maena —máichahavipa.

²⁵ Tacahe, téchajicapa ema Júlasi:

—Maestro, ¿nútupuca jácani níjararecavyare?

Tásicha, ema Jesús majicapapa:

—Pítisami —máichapa.

Ema Jesús tímechahavi eta macaejasiraya eta matratune arairu mayehe ema Maiya

(1 Co 11.23-26)

²⁶ Tásicha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, tíjaracahavivacapa viti máimitureana. Tásicha, máichahavipa:

—Eta juca neche. Enica —macahepa.

²⁷ Tacahe, mavehavarepa eta vasu vérirare, mahasulupayachavarepa ema Viya. Tásicha, tíjaracahavivare. Máichahavipa:

—Era eta juca ámutu éti. ²⁸ Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuqueneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe. ²⁹ Nutupiruva numetacahe: Vaipa nápechavaimahi nérahivaréni eta juca tachi eta uva. Tiámainucava te táitauchavapa eta nusiapiraya eta nucavacuréraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

*Ema Jesús máimereucha ema Pedro tépiyacavayare vahi máimati ema Jesús
(Mr 14.26-31; Lc 22.31-34; Jn 13.36-38)*

³⁰ Tásicha, eta vítanesirapa, vijirapa eta jirasare eta vihasulupayachirahi ema Viya. Te vitapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticajare Olivoquiji. ³¹ Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásicha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirasamiyare. Tásicha, tijunaracanainapa eta uvesana macurujiruanainihi” macahepa. ³² Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³ Tásicha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴ Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táechajisirayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahéhi eta véchajiriruvahi.

*Ema Jesús tiyujaraca te Getsemani
(Mr 14.32-42; Lc 22.39-46)*

³⁶ Te vítecápapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare —macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa. ³⁸ Tásicha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

³⁹ Tásicha, tipapanapa ánaquipanachíchahi. Tiáquipaicavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaqueneyayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti —macahepa.

⁴⁰ Tásicha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásicha, máichapa:

—Váiparinehi ímicatacanuhini ejaneacavahini étanainahipucaini hora ácahehini. ⁴¹ Éjamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nuaiyaquene, vähini tacuitauchavaini eta níchavaqueneyvare. Tásihasera, níjaracava núti eta nítouchiraya eta pivarahaquenéni puiti. Nísapava nacapacanu —macahepa.

⁴³ Tásiha, tichavavare eta viyehe viti máimitureana. Tímahahavipa víti vímamurihaipa taicha taveharipa eta ichapu eta viúquihana. ⁴⁴ Tacache, mapahequenepa tichavapa tiyujarapana. Étarichuhi eta máechajiriruvanahi. ⁴⁵ Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesare, puiti títecápapa eta nutuparahahi nacaratásiranuyare ena tictianacanuanahí. ⁴⁶ Ávane ema tíjararecanuyare. Échepuca. Viyana viácapavaca —máichahavipa.

Nacaratácapa ema Jesús

(Mr 14.43-50; Lc 22.47-53; Jn 18.2-11)

⁴⁷ Téchajiricavaichaha ema Jesús, macahepainecha ema Júlasi, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquianapaipahi, étapa eta nayeheana espada. Éna, vanairucanahí nayehe ena aquenucarahana. ⁴⁸ Ema Júlasi, tatiarihihi eta máicutiarayarehi eta náimatinrayarehi ena suntaruana ema Jesús. Ani macahehi eta máechajiriruvahí ema Júlasi:

—Ecunenuyare. Ema nétserareruyare, éma ecaratacaya —macahepa.

⁴⁹ Tacache, ema Júlasi témeñahavapa mayehe ema Jesús. Máichapa:

—Yátihipa, tata Maestro —máichapa.

⁵⁰ Tásiha, mágétserarecpa. Ema Jesús majicapapa:

—Piti nímiturevihi, ¿tájaha tímitecavi? —máichapa.

Tásiha, ena suntaruana enevanepa nacaratácahi, napresuchapa. ⁵¹ Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás. ⁵² Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahí tayehe eta espada, énerichuvare nacaheyare, espada eta ticapacayare. ⁵³ Váhipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana. ⁵⁴ Váhisera nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaqueneyvarehi —tásiha, máichavacapa ena suntaruana—. ⁵⁵ ¿Tájaha tacayema ecasiña eta espada, ecaepuchiriquipaipa-hivare eta ecaratasiranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini. ⁵⁶ Títauchavahisera tamutu eta juca taicha tacahehi eta náechajiriruvahí ena profetanaini, tayehe eta Escritura taechajisihairanuhi —macahepa.

Tacache, viti máimitureana vimutu vijunaracapa, vinaquicapa ema Jesús.

Nacatupihapa ema Jesús te namirahu ena tuparairucana

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ena ticaratacanahi ema Jesús námapa te mamirahu ema Caifás, ema corregidorhi te jena áñohi. Natarihivare ena escribánoana énapa ena aquenucarahana. ⁵⁸ Ema Pedro, máehiequenehapahi, mayerehipahisera. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacapahi ena suntruana, mavarairahi máimahayarehi tájahapuca eta náicharacayarehi ema Jesús. ⁵⁹ Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuchayarehi eta máepenirayare. ⁶⁰ Váhisera náichimavahini, camurianahinéni ena tépiyaequenehanahí. Tisiapananechasera ena apinana tépiyaequenehanayarehi. ⁶¹ Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapicahuquenehi. Tásiha, máimichavayarehiji macaechepuca te mapanaquenenaji sache —nacahepa.

⁶² Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³ Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecavyare. Vahi nuvaraha pépiyahirahi. Némechavi máimahavihi ema Viya. Pátupiruva pimetacahavi te yátupihipuca pítiquenehi Cristo, Machichaquenevihi ema Viya —máichapa.

⁶⁴ Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numetacaheyare eta apana. Járabajapaya eta sácheyare ímahanuyare eta néjasirayare te mavaure ema Viya máitupajijiáruvaquenehi. Ímahanuyareva núti eta núcupsirayareva násihairayare te anuma, támiranuyarepahi eta úcaji —macahepa.

⁶⁵ Tacahe, ema corregidor eta masamirahi, tisemarinehi ichape. Tivetsayujiacavapa eta mamuiriha eta masemanevahi. Tásiha, macahepa:

—¡Téavicavaipa eta maviurevahi ema maca taicha macaecaahi ema Viya! ¡Puiti émaquenepa visama éma tépiyacavahi Machicha ema Viya! ¡Váipa táchamesa vitanucahini ena testigoanainahini! ¡Puiti esamaripa éti eta juca macayemaquenehi! ⁶⁶ ¿Tájaha vícharacayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

⁶⁷ Tacahe, náehavacapa ema Jesús. Nátutuquichapa. Náehamirahavare.

⁶⁸ Tásiha, náichapa:

—Vímahasejicacha, te yátupihipuca pítihí Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

Ema Pedro tépiyacavapa vahi máimati ema Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Tiuri, ema Pedro, matiarikhichahahi eta te canchón. Téjacaipahi tiásacavahi. Tacahe, sucahepaipahi esu mavanara ema corregidor. Suímahapa éma. Tásiha, suíchapa:

—Németeaca pítirichu ñímiture eñi Jesús eñi ticavasahi te Galilea —suíchapa.

⁷⁰ Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

⁷¹ Tásiha, mavarahapa tiúchucavaneyarehini. Suímahavare esu apana vanaraca. Suíchavacapa ena natiarihiquenaneahí:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíchavacapa.

⁷² Tiápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

⁷³ Te tiyererehachichavarepa, náimahavarepa ena apamuriana. Náichavarepa:

—Yátupiquene pítirichu machamuri ema maena Jesús, taicha eta péchajisira éta tímereuchavihi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucae yátupina. Váhiquenesera nímati ema achane échajisihaquenehi —macahepa.

Tásiha, enurujipa téchajicanecha eta varayu. ⁷⁵ Te masamapa eta varayu, enevanepa máechahi ema Pedro eta máichirahi ema Jesús: “Te tamirahuina-paichaha eta táechajisirayare eta varayu, píti mapahayare eta pépiyacavayare vahi pímatinu”. Tásiha, tiúchucavanepa ema Pedro. Tíyahavanepa taicha máimativanepa eta táchapevahí eta máejecapiravahí.

27

Námapa ema Jesús te mamirahu ema Pilato

(Mr 15.1; Lc 23.1-2; Jn 18.28-32)

¹ Te tijararahipa, tiúrujicavanapa namutuyaréni ena tuparairucana énapa ena aquenucarahana. Ticaechacasipa eta náimicapasirayarehi ema Jesús.

² Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohiquene.

Eta macapasiravahí ema Júlasi

³ Tacache, ema Júlasi eta máimairahi eta táchapevahí eta macatajivairahi ema Jesús étapa eta nacapasirayarehi, ichaperinehi ticatisamurevahí taicha eta máejecapiravarihi. Tiyanapa máimichavapanahí eta treinta reale eta plata mavachahi nayehe éna. ⁴ Tásiha, máichavacapa:

—Néjecapavahí ichape eta níjararesirahi ema maca achane matapirava-requene. Nuvaraha nímiclavaya eta nuvachainihi —máichavacapa éna.

Énasera najicapapa:

—Jéhepuca, vahi vecha víti. Péchaquenevaichuhi píti —náichapa.

⁵ Émasera ema Júlasi máquijimirauchavacapa eta te tajuhe eta Templo návihahi éna. Tásiha, tiúchucapa. Tiyanapa. Táichavenehí eta macatisamure-vairahi, tichumucavapá.

⁶ Ena tuparairucana navehana eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisi-rareva taicha mavachaequeneya eta máepenirayarehi ema maca achane —nacahepa.

⁷ Tásiha, eta plata máimichavaquenehi ema Júlasi, napanerechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típua recarahaní eta yupi. ⁸ Puiti éta ticaijarehi “Apaquehe máitinevacha ema Jesús”. ⁹⁻¹⁰ Tacachehi eta táitauchi-ravahí eta májurehi ema víyaraха profetaini Jeremías. Ani tacachehi: “Nave-hapa eta treinta reale eta plata. Ena tuparairucana navacharecapa eta

apaquehe nayehe ena típuarecarahiana. Tacahe eta juca mamasiranuhi ema Viya eta náichirayarehi eta juca” macahepa ema víyarahaini Jeremías.

*Ema Pilato mayaserecapa ema Jesús
(Mr 15.2-5; Lc 23.3-5; Jn 18.33-38)*

¹¹ Ema Jesús ticayaserehipa te mamirahu ema aquenuahi Pilato. Ánipa macahe eta mayaseresirahi:

—¿Jéhesareji réyvihi píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihi eta nurreyvahi —máichapa.

¹² Tásihasera, te nametauchaipa ena tuparairucana, vahi majicapavacahini ema Jesús. ¹³ Tacahe, ema Pilato máichapa:

—¿Vahi péchajiuchova eta juca nametauchiravihi? Camurihi eta pivierevana etá nayehe —máichapa.

¹⁴ Émasera ema Jesús váhiquene majicapahini. Tásicha, ema Pilato máramipa etá mamajicapirohi. Váipa máitucacarehini.

*Ema Pilato macavanairipipa eta náetatasiraya ema Jesús
(Mr 15.6-15; Lc 23.13-25; Jn 18.38-19.16)*

¹⁵ Tiuri puiti, tatiarihi eta mayeherepi ema Pilato, te Pásquamuahuana, macaiticayarehi ema émana preso, mácani nayasearuyarehi ena achaneana.

¹⁶ Tiuri, matiarihi ema achane ticaijare Barrabás, ichape eta maviurevahi.

¹⁷ Eta náurujisiravahi ena achaneana, mayaserecavacapa ema Pilato:

—¿Nájahapuca ema eyaseseruyare ema nuaitiruya? ¿Émapuca ema Barrabás, téhesera émapuca evaraha nucaitica ema Jesús, ema ticaijare Cristo —máichavacapa. ¹⁸ (Taicha máimatiacaripahi eta nametauchahi ema Jesús ena tuparairucana taicha nacapinaruhi éma.)

¹⁹ Eta máejasirahi ema Pilato tayehe eta mávacure, suímimetarecapa esu mayena: “Vahi picuimisiapava ñiyehe eñi ñira achane matapiravare taicha yati tametasiranuhi eta nuvapure eta ñíchararacavayare eñi” sucahepa.

²⁰ Énasera ena tuparairucana énapa ena aquenucarahaná náimitumurihapa ena achaneana nayaseserecahi ema Barrabás, émainahini máuchucuha. Tásicha, nayaseserecapa máepenahini ema Jesús. ²¹ Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaitica? —macahepa.

Éna najicapapa:

—¡Émaina máuchucuha ema Barrabás! —nacahepa.

²² Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

²³ Ema Pilato máichavacavarepa:

—¿Tájaha tacayemahi eyaseacahi eta németatasiraya ema maca? ¿Tájahasica etá maviurevahi? —máichavacapa.

Énasera tipiararemurihanavare muracapana:

—¡Pémetatareca te crusu! —nacahepa.

²⁴ Tacahe, máimahapa ema Pilato eta vahi máiturucahini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa etá une, ticasipavahupa te namirahu ena achaneana. Tásicha, máichavacapa:

—Nuvaraha nímerecava te emirahu vahi nútiparacaina eta máopeniraya ema maca achane matapiravarehi. Éti échinavayarehi —máichavacapa.

²⁵ Tásicha, najicapapa namutu ena achaneana:

—Vítinarine vicatapirova, énapa ena vichichanaveana. Vítinarine taeha eta máopeniraya ema maca achane —nacahepa.

²⁶ Tacahe, ema Pilato macavanairipipa nacaitica ema Barrabás. Tásicha, macavanairipipa náestaca ema Jesús; tásicha náetatacayarevare te crusu.

Nacavayuemarajipa ena suntaruana ema Jesús

(*Mr 15.16-20; Jn 19.1-3*)

²⁷ Tásicha, ena suntaruana námapa ema Jesús tayehe eta náestashayarehi te távirarehi eta guardia. Nachayacapa ena camuriqueneana suntaruana náumurivana. ²⁸ Navejamuhiacapa eta mamuiriha. Namuriachapa eta muíriare títsime. ²⁹ Náitsamemacapa eta itapepi eta majorapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayarehiji. Eta nacavayuemarajirahi, náepuyumiraucha-pajicacha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

³⁰ Tásicha, nátutuquichapa. Náetetuvauchapa eta matsucurupahi, náepuchi-sicapa tayehe. ³¹ Te tamutupa eta nacaerahijirisirahí, navejamuhiacavarepa eta mamuiriha títsime. Namuriachapa eta mamuirihaichu. Tásicha, námapa tayehe eta macaetataiyayarehi.

Náetatacapa ema Jesús te crusu

(*Mr 15.21-32; Lc 23.26-43; Jn 19.17-27*)

³² Eta napaisirapahi te calle, nácapajicapa ema achane ticaijare Simón ticavassahi te Cirene. Napamicapa éma manaracuha eta macurusura ema Jesús. ³³ Tacahe, nacaitecapapa tayehe eta masihi nacaetatairare ticaijare Gólgota. ³⁴ Ánaquipa náesichinehi ema Jesús eta vino tisucareama ticasiriquia ma eti ipuruji. Te masamaecapa ema Jesús, vaipa mávarahahini máerahini.

³⁵ Te náitauchapa eta náetasirahí ema Jesús, ena suntaruana nasuerte-hachapa eta mamuiriha eta náijarajirisiracacahi. Tacahehi eta táitauchi-ravahi eta májurehi ema víyarahaini profetaini David. Ánipa tacahe: “Tíjara-jiricacanapa eta numuirihaini. Nasuertehachapa eta náijarasiricacairahi”.

³⁶ Tásicha, najaneacapa ema Jesús ena suntaruana. ³⁷ Te tápusi eta macurusura, tatiarilihíhi eta ajureca táchajisihahi eta tiviuchahi. Ani tacahehi eta ajureca: “Ema Jesús, Rey nayehe ena israelítana”.

³⁸ Natiarihihivare ena apinana tiámerahiana. Ticaetatanahivare te machacaya, ema émana te mavaure, ema apana te masapa. ³⁹ Tásicha, ena tiánucumi-rauchanapahi, tépiupiusicavanapaipa eta nacaerahirapaipahi éma. ⁴⁰ Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, pirátahahivaréji pímichava picatupiha eta arairu Templo te mapanayarericheruhíji sache. Puiti vivaraha vímaha eta pítupajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítijivaina! —náichapa.

⁴¹ Énerichuvare ena tuparairucana nacaerahijiricavare, énapa ena escribánoana énapa ena fariséoana, énapa ena apamuriana aquenucarahaná. Náichajiricacapa:

42 —Ema mácacacha, macahehi eta máechajiruvahi eta marátahairahíji macatiuchavaca ena apamuriana achaneana. Tásicha, puiti vähivare maráta-hahini émajivainahíni macatiuchavahini eta te jara mávihahi. Te yátupinahíni Réyinaíni viyehe viti israelítana, macatiuchavaipahini, ¿masi? Máucupaicari-pahini te jara crusu, ¿masi? Visuapasarepaini eta vímairainahini. **43** Téhevare te yátupihipuca ticasíñavahi me Viya, vivaraha vímaha macuchucuha éma puítinaríchu, te yátupihipuca máemunacahi éma. Taicha macahehi eta máechaji-riruvahi eta machichairahi ema Viya —nacahepa.

44 Ena tiámerahiana ticaetatanahivare te machacaya, énerichuvare nacaeca-hivare éna apanavare.

Eta máepenirahi ema Jesús

(*Mr 15.33-41; Lc 23.44-49; Jn 19.28-30*)

45 Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. **46** Tásicha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiruva, ani tacahe: “¡Tata Nu-caiyaque! ¡Tata Nucaiyaque! ¡Vahi picujunijicanu!”

47 Tacahe, ena natarihiqueneanahí ena tisamanahi, ánvarepa nacahe:

—Esama ema maca achane mapiaracahi ema víyarahaini profeta Elías —nacahepa.

48 Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máiimicayacapa eta majaca ema Jesús, machuchujicayarehi. **49** Énasera ena apamuriana, ánvarepa nac-ahe:

—Ésamiricachucha. Vímahayare te títecipayarepuca macatiuchapana ema Elías —nacahepa.

50 Tásicha, tiápechavavarepa tipiaraca muraca ema Jesús. Tásicha, tépenapa.

51 Tásicha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare. **52** Étaripa eta ecar-iana téjiacavacapa. Téchepucanavarepa ena náepenaqueneana ena tisuapa-jirahianahi mayehe ema Viya. **53** Tásicha, te mapanaquenepa sache, téhevare te taequenepa eta maechepusirahi ema Jesús te máecari, éna apanavare tiúchucanapa tayehe eta náecariana. Tásicha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahí éna.

54 Tacahe, ena tijanearecanahí, émapa ema nacapitara, te náimahapa eta tayayacarevahi eta apaquehe, étapa eta apamuriana tiáramicareanahí, ichaperinehi eta napisirahi. Tásicha, nacahepa:

—Yátupiquenerichuyapa Machicha ema Viya ema maca —nacahepa.

55 Natiarihihivare ena camuriana esenana. Tímararacanahí te tiyerehi. Ena nani esenana, éna téhicanahí ema Jesús. Téchapajiricanapahi ema Jesús eta mapaisirapahi te másihapa te Galilea. **56** Nacarichusera ticajuanahí eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahí ema Juan émapa ema Jacobo, apóstoleanahí.

Nacucupaicapa te crusu ema Jesús, náecarayarepa

(*Mr 15.42-47; Lc 23.50-56; Jn 19.38-42*)

57 Matiarihivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús. **58** Te capererehipa, eta máimairahi

máepeniraipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecarairaya. ⁵⁹ Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana. ⁶⁰ Nanacapa tayehe eta máecari máemepiyareruhi máecariyahini ema José. Eta juca ecari, nasecajueruhi eta mari. Najihachapa tayehe eta tajitaca-requene márime. Te náitauchapa, tiyananapa. ⁶¹ Esu María Magdalena, ésupa esu apana María, téjacanahi éna, náimrararacaipahi eta ecari.

Ticavanahianapa ena suntaruana najaneaca eta ecari

⁶² Tásicha, te apanapa sache tiyananavarepa ena tuparairucana mayehe ema Pilato. ⁶³ Náechajicapa ema Pilato. Ánipa nacahe:

—Tímitecahavihi, tata, vimetapanavi eta máechajiriruvahi ema Jesús te achancerichaha eta máechepusirayarehiji te máecari te mapanaquenénapaji sache. ⁶⁴ Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepucaripa te máecari”. Tásicha, ena achaneana nasuapainapapuca, náimijachainapa yátupi. Tisuapacarepanainapapuca tayehe eta máichaqueaneanahi te achancerichaha —náichapa.

⁶⁵ Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneaca-quenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásicha, najaneacahi ena suntaruana.

28

Eta máechepusira ema Jesús te máecari

(Mr 16:1-8; Lc 24:1-12; Jn 20:1-10)

¹ Te apanapa sache te tijararahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari. ² Tíjahúchavapa tiyayacarehi eta apaquehe. É mahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecpa eta mari. ³ Tétavicava eta majaraivahi, tivayuhauquirahi. Eta mamuiriha, tétavicavavare eta tajapuva. ⁴ Eta náimairahi ena suntaruana, tiáquipapaicavanapa, tiyayacareanapa eta napisirahi. Tiánehini tépenaracana. ⁵ Tásicha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaeta-taquenénihi. ⁶ Máiinaipahi eta te tajuhe eta máecari. Téchepucaripahi taicha tacahéhi eta máechajiriruvahi. Yare, ímaha eta juca mávinénihi. ⁷ Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahheyarehi —máichavacapa.

⁸ Tacahe, ena esenana tiyananapa tichavanahi tijunaparacanapaipa eta nametasirayarehi ena nachamuriana. Tipicanapaipa, tásihasera tacacha-nepahi eta náurisamurevapahi ichape. ⁹ Eta najunapirapahi, tíjahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuyucanapa natsiucapevachapa. ¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi. ¹² Tacahe, ema corregidor ticurujircapa namutu ena apamuriana aquenucarahana, mavarairahi téchajircavana napane-rechayare eta náicharacavayarehi. Jéhesare, navachachavacapa eta camuriquene plata ena suntaruana. ¹³ Tásicha, náimitucavacapa, ánipa náicha:

—Te natarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahia etá vímasirahi víti” ecaheyare. ¹⁴ Émaripa ema aquenuca te máechapuca, vímaharinepa víti. Vitanucayare eta vivayuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacaheli eta nametarapi, te natarihi ena tiyasse-recana.

Ema Jesús mavanemurihapa ena máimitureana etá náimituresihaya te tamutu avasareana

(Mr 16.14-18; Lc 24.36-49; Jn 20.19-23)

¹⁶ Ene tacaheli eta viyanirahi viti óncequeneana apóstoleana tayehe eta Galilea te cerro taicha tacaheli eta mame tarapihi éma Jesús. ¹⁷ Tacahe, te vímahapa ema Jesús, vépuyumurihavanepa. Vimutu vitsiucapa. Natarihisera ena vuíchaha nasuapapajicahini. ¹⁸ Tásicha, ema Jesús témeñahavapa eta viyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apa quehe. ¹⁹ Eta tacaheli, eyanayare puiti epaicayare tamutu etá avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo. ²⁰ Ímitucayareva etá nasuapiraina éna apanavare tamutu etá nímiturapianahi etá eyehe. Núti, tayanapane nuyerehehi, nímicata-caheyaresera. Níjaracahénapaipa etá nítupajijiasirava. Tamutu sácheana nucachanehevacayarehi. Váhiqene nujuniji acahéimahi —máichahavipa.

Tamutupa etá juca nájuchaquenehi etá níma quenehi nuti Mateo.

Ema San Marcos májuequenehahi **eta máichararacavahi ema Jesucristo, ticaijare puiti eta EVANGELIO SEGÚN SAN MARCOS**

¹⁻³ Nuparapenaveana, puiti nuvaraha numetacahe eta máitaresirahi ema Jesucristo, Machicha ema Viya, te títecapauchahavipa te vitaracu. Ichaperinehi eta viúricacarevahi puiti taicha eta mametasirahavihi eta táurinaquenehi máechajiruvana ema Viya.

Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha te juca apaquehe. Éma, tímitecahi ticatiurahiyarehi. Énerichuvare matiarihiyareva ema apana achane máichuhaqueñeyarehi ema Viya. Macametarairuyarehi, máetupiricavacayare ena achaneana, náinajisirayarehi eta tamauri-queneana napanereruana apaesa táuri eta najacapirayare ema Machicha ema Viya.

Ema Juan Tícachasiricarahi tépanavapa ticametarairu eta máechajiruva ema Viya nayehe ena vámahicuruhana

(Mt 3.1-12; Lc 3.1-9, 15-17; Jn 1.19-28)

⁴ Tiuri, te taequenepa eta juca, camuriquenehi áñoana, tiúchucapa ema achane ticaijare Juan. Éma, máichuhaqueñehi ema Viya eta macametarairuirayare, máetupiricavacayare ena achaneana. Tacahe, masuapahi eta matuparahahi. Tiyanapa vámahicururopa. Vaipa avasarecuruhainaini. Ticametarairupaipa nayehe ena macutiqueneana vámahicuruhana. Ánipa maçahehi eta máimituresirahi:

—Ítsivacha eta epaneruana. Éneuchava mayehe ema Viya, apaesa maperdonachahe eta epecaturana. Te éneuchavapa, nuti níccachasicahénapa, apaesa etsecavaipa eta ejacapirayare ema Cristo —máichavacapa ema Juan.

⁵ Tacahe, nárajapapa napaucha ena achaneana ticavasana eta te ichape avasare Jerusalén étapa eta apamuriana avasareana te táunavahi eta provincia Judea. Eta nametauresiravaipa ena achaneana, navarairaipa náinajica eta napecaturana, ema Juan máicachasicavacapaipa tayehe eta cajacure Jordán.

⁶ Ema Juan, vanairucahi me Viya, profetahi éma. Eta macamuirihairahi eta náitsameru tajiyaha eta náitatiquene ticaijare camello. Eta máitijuhe, vácapi jayumepi. Eta manicasareanahi eta tsacara. Eta máitiverahi eta mápama.

⁷ Ániyare macahe eta macametarairuirahi:

—Ávanepaipahisera mácani yátupiquene Cristo. Éma, tiápajupanavahi nuyehe nuti eta mapicauchacarévahi. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. ⁸ Yátupi nuti níccachasicahéhi te une, te éneuchavapa mayehe ema Viya. Émainapa, tícachasicahénavarepa eti ecasiñavanahi mayehe éma, tíjaracahénasarepa ema Espíritu Santo —macahepa ema Juan.

Eta macaicachasirahi ema Jesús

(Mt 3.13-17; Lc 3.21-22)

⁹ Te jena sácheana eta mávhairarichaha ema Juan te cajacure Jordán, títecapapa ema Jesús. Másihapahi te avasare Nazaret te tinapaica eta Galilea. Tásiba, ema Juan máicachasicapa ema Jesús. ¹⁰ Te tamutupa, te tiúcupaicapa

eta te une ema Jesús, tíjahúchavapa máimaha téjiacahi eta anuma. Máimahavarepa ema Espíritu Santo ticutipahi eta paluma. Máucupauchapa ema Jesús, mávahácpa éma. ¹¹ Tacahe, nasamapa eta mahu ema Viya tásihaguenehi te anuma. Ani macahehi eta nasamirahi:

—Pítira nuchicha némunaruquene. Núrisamurecha piyehe —macahepa.

*Ema Váinarijí Satanás mavarahapa macaitsamarají ema Jesús
(Mt 4.1-11; Lc 4.1-13)*

¹² Tacahe, ema Espíritu Santo eta mávahásamurechirahi, enurujipa máimitucaipahi ema Jesús eta mayaniraya te mávapahi apauehe. ¹³ Eta mayerevhái ema Jesús cuarenta sácheana. Tásicha, ema Satanás macaitsamarajipa, mavaraha macaetema ema Jesús. Váhisera máratahahini. Tatiarihivare eta sárareana eta te mávihahi ema Jesús. Te tamutupa, ena ángeleana náechapajiricahi éma.

*Ema Jesús tépanavapa ticametarairu
(Mt 4.12-17; Lc 4.14-15)*

¹⁴ Tacahe, te jena sácheana, nacaratacapa ema Juan. Námapa te tiyerehi. Tacahe, tiyanapa tichavahi ema Jesús eta te provincia Galilea. Tépanavapa ticametarairu. Máichuhavacapa ena achaneana náehicayarhi ema Viya.

¹⁵ Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puiti tíchuhahénapa ema Viya. Tiánehipa eta sácheyare títecapauchahénapa eyehe ema ticatiuchaheyare. Aquenucayare mavaneruhi ema Viya, éma téchaheyare. Ichape eta iúricacarevaya te esuapa eta nímiturapiana —macahepa.

*Ema Jesús máichuhavaca ena cuátroqueneana ténicarahiana, máimitureanayarehi
(Mt 4.18-22; Lc 5.1-11)*

¹⁶ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema émana ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayutahe. ¹⁷ Tacahe, ema Jesús máichuhavacapa éna:

—Yare, éhicanu. Núti níjaracaheya eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichuhavacapa.

¹⁸ Enevanepta náinajicahi éna eta náenisirahi. Tiyananapa náehicapa ema Jesús.

¹⁹ Ánaquipanavarepa máimahavarepa ena apinana ticaparapecacanavare ema Jacobo émapa ema Juan. Téjacanahi te napacure. Matiarihihivare ema naiya Zebedeo. Náititijiricahi eta nayutaheana. ²⁰ Ema Jesús máichuhavarepa ena apinana. Tásicha, náehicavarepa. Najunijicapa ema naiya Zebedeo. Manasipa éma te pacure, macachanehi ena manusurana.

*Ema Jesús máimijunapa ema éreana tiávahácainihi ema achane
(Lc 4.31-37)*

²¹ Tacahe, títecapanapa tayehe eta avasare ticaijare Capernaum. Eta juca sache sávarumuuhuhi, tiyanapa ema Jesús eta te náurujisirareva ticaijarehi sinagoga. Máimitucavacapa ena tiúrujicavanahi. ²² Ichape náramihi ena achaneana eta máimiturapianahi táicha vahi nasamasarénahini. Tétavicavahi eta máitusirahi mayunapaicahi tamutu. Tétavicavahi eta tasuapacarevahi eta máimiturapiana.

²³ Te nataracu ena náurujiruvanahi, matiarihihi ema émana achane mávaháruhi ema éreana. Tipiararecapa, ánipa macahe:

²⁴ —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivara-hainapapuca pijararecahaviyare —macahepa ema achane.

²⁵ Tacahe, ema Jesús macajachapa ema éreana. Ánipa maicha:
—¡Pámatina! Piyana pijunijica ema maca achane —máichapa.

²⁶ Tacahe, ema achane tíjahúchavapa tiáquipaicava, tiyayacarepa. Tipiara-recapa muraca maicha ema éreana eta majunijisirayarehi ema achane.

²⁷ Tásicha, náraminehi ichape ena natarihiqueneanahi. Tiyaserejiricacanapa, ánipa nacahe:

—¿Tájahasica tacayema eta juca? Ema maca Jesús, tétavicava eta máitupajijiásiravahi, maratahahi máquijica ena éreanana. Tásicha, ichape eta napisirahi ema. Vahi nácapaemachahini. Tamutupa arairu eta máimiturapianahi ema maca —nacahepa.

²⁸ Tacahe, nasamairiricapa namutu ena achaneana eta juca máichaque-neanahi ema Jesús. Énaripa ena ticavasanahi te avasareana eta te táunavahi etá Galilea.

*Ema Jesús macanaraca esu máimase ema Pedro
(Mt 8.14-15; Lc 4.38-39)*

²⁹ Tacahe, te tiúchucanapa tayehe eta nárujisirareva, tiyanapa ema Jesús te napena ema Pedro ema Andrés. Náehicavarepa ena apinana ema Jacobo émapa ema Juan. ³⁰ Sutiarihihi esu máimase ema Pedro. Sunasiqueneipahi tívecahi, ticajumahi ésu eta muraca fiebre. Nametacapa ema Jesús eta sucajumairahi esu esena. ³¹ Tásicha, mapauchapa. Macaratavauchapa, macaeche-pucapa ésu. Táetaviacavaneinehi eta fiebre. Tacahe, suéchapajiricapa ema Jesús, énapa ena máimitureana.

*Camuriana ena macanararuapanapahi ema Jesús
(Mt 8.16-17; Lc 4.40-41)*

³² Te jena cáperehiquénehi, te téricapa eta sache, ena achaneana námavacapaipa eta mayehe ema Jesús namutu ena nacajumaqueneana énapa ena návaháruanahí ena éreanana. ³³ Jéhesaréinehi, namutu ena achaneana ticavasanahi tayehe eta avasare tiúrujicavanapa te tapaja eta peti. ³⁴ Camuriana ena macanararuana tayehe eta apanapane jumareana. Maveranavare ena váinarajiana máquijiruanapahi te náqueheana ena achaneana. Váhisera másapahini náechajicahini ena éreanana, taicha náimatihi éna eta émairahi ema Cristo.

*Tamutu avasareana te Galilea mapaica ema Jesús
(Lc 4.42-44)*

³⁵ Tacahe, te tijararahipa, téchepucavanepa ena Jesús. Tiyanapa eta te mayujarasirare. ³⁶ Te téjamicapa ema Pedro, májinaripe ema Jesús. Tásicha, tiyananapa nacapayacapa éma eta te mayujarasirare eta te mávapahi apaquehe. ³⁷ Te náitecapauchapa, náichapa:

—Namutu ena achaneana titanucavianahí —náichapa.

³⁸ Tásicha, máichavacapa ema Jesús:

—¡Páureanasami! Nuvarahapasera viyanayare tayehe eta apana avasareana apaesa nucametarairu taicha nutuparacasiswaichuhi níchuhavacaya namutu ena achaneana náehica ema Viya —máichapa.

³⁹ Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te nárujisirarevana. Énerichuvare nayanau-chapaipa ena achaneana návaháruanahí ena éreanana, máquijicavacapaipa ena éreanana.

*Ema Jesús macanaraca ema émana achane leproso
(Mt 8.1-4; Lc 5.12-16)*

40 Tacahe, te apanapa sache, títecápapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasiñavahi eta piyeho, picanaracanupaini —máichapa.

41 Tacahe, ema Jesús tijimuyainehi majapanuinehi. Manacapa eta mavahu. Máichapa:

—Nuvaraha nucanaracavi. Tájinapa píchiravaina puiti —máichapa.

42 Enevanepe tinaraca. Vaipa leprósoinahíni. **43** Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

44 —Pímaha, piyanayaresera pímerecava nayehe ena tuparairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasera picumetacavaca eta nútirahi nucanaracavi. Tásiha, piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

45 Tacahe, tiyanapa ema achane. Timetajiricapaipasera, mamecapa namutu ena achaneana eta máichavaquenavehi. Eta tacahe, ema Jesús vaipa máimerecavahini te avasareana taicha enevaneyarehi nárujiaca ena achaneana tímarihijiana. Tacarine tiyanahi tayehe eta nájinaricha achane-nahichaini. Énasera ena achaneana tiyananaichucha napauchahi. Tiásihana tayehe tamutu avasareana.

2

Ema Jesús macanaraca ema émana achane macajumaquene eta muracauquiha

(Mt 9.1-8; Lc 5.17-26)

1 Tacahe, te apanavarepa sache, tichavapa ema Jesús eta te Caper-naum. Eta nasamairirisirahi eta matiarihiraripa éma, títecapanapaipa ena achaneana, camuriqueneana. **2** Tiyututucavanapa eta te peti mávihahi éma. Tájinapa táviravainahini eta te tapajachacaya. Ema Jesús máimitu-cavacaipa eta nacaijuheraya me Viya. **3** Tacahe, títecapanavarepa ena apamuriana, námapahi te áchuji ema achane muracaha. Cuátroana ena tíamanapahi. **4** Váhisera náitecapauchahini eta te mávihahi ema Jesús, taicha eta nayututusiravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetataca, nacajuchuchucapa ema macajumaquene eta te áchuji te mamirahu ema Jesús. **5** Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

6 Tacahe, énerichuvare natarihihihivare téjacanahi ena escribánoana. Napanerequenehapa eta macayemaquenehi ema Jesús. Tásiha, tisemanarinehi. **7** Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana. **8** Enurujipa ema Jesús máimamaracavacahi eta nasamureana étapa eta napanereruanahi éna. Tacahe, máichavacapa:

—¿Tájaha tacayema téjecapava eta epanereruana? ⁹ Tájina taejeravaina eta níchirahi ema maca: “Nucaeپahainavipa eta pipecaturanahi”. Máejerarepánapuca níchahini: “Nucanaracavipa. Péchepuca, piveha eta pímacaraji, piyana pipaica”. ¹⁰⁻¹¹ Tiuri puiti, nuti Manerejirunuhi ema Viya, nímereuchavainapa eta nuratahairahi nucaeپaha eta pecatu te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

¹² Enevanerinehi téchepuca ema macajumaquenéni. Mavehapa eta mayereruva. Tipaicapa te namirahu ena achaneana. Tiyanapa tiúchucapa. Eta náimairahi, ichape eta náramirahi namutu ena natarihiqueneanahi. Tétavivainehi eta nacunachirahi ema Viya. Ánipa nacahe:

—¡Tétavicava táramicareva eta máichaqueneana ema Viya! ¡Asulupaya, Tata! ¡Vahi vímahasarénahini! —nacahepa.

*Ema Jesús máichuha ema achane ticaijare Mateo, mayeheyare apóstole
(Mt 9.9-13; Lc 5.27-32)*

¹³ Tiuri, te apanapa sache, tiyanavarepa ema Jesús te tachausi eta cáquiure. Náitecapauchavarepa namutu ena achaneana eta mayehe. Tásiba, máimitucavacapa.

¹⁴ Tacahe, te tiápechavapa tipaica ema Jesús, máimahapa ema Mateo, machicha ema Alfeo. (Ema Mateo ticaijarehivre Leví.) Téjacahi eta te macatuparahuayahi eta macobraresirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

¹⁵ Te jena sácheana, ema Mateo téniricapa eta te mapena. Mámappa ema Jesús énapa ena máimitureana. Camuriqueneana ena téhicanahi ema Jesús. Natarihivare maverana ena macutiqueneana ema Mateo ticobrarecarahiana tayehe eta impuesto. Maveranahivare ena apamuriana máemunacasareana ema Mateo. Tiúrisamureanahi eta nanisirahi. ¹⁶ Títicapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahi ema Jesús ena máichuhaqueneana ema Mateo, nacaeahipa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena náritátajiana ticobrarecarahiana eta impuesto? ¡Tétavicavahi eta nacapecaturaraivahi! —nacahepa.

¹⁷ Te masamapa ema Jesús eta náechajiriruvanahi, máichavacapa:

—Ena ticajumanahi, tétavicavahi eta nacamunuirahi ema médico. Énasera ena majumareanahi vahi nácamunuimahi ema médico. Puítisera, eta tímitecanuhi núti nutanucayare namutu ena tisipecaturana apaesa náeneuchavahini, náinajica eta napecaturana. Nácani matapiravareanahi vahi nasamavahini nácamununuhini —máichavacapa.

*Nayaserecapa ema Jesús tayehe eta ayuna
(Mt 9.14-17; Lc 5.33-39)*

¹⁸ Tacahe, te apahevarepa, ayunanahi ena máimitureana ema Juan. Ayunanahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihíni ena máimitureana ema Juan énapa ena fariséoana? —náichapa.

¹⁹ Majicapapa ema Jesús:

—Nímicutichinahe puiti. Vahi tauricaimahi ayúnanáinahíni nácani ticaichuhacasianahi tinicanaya nayehe ena araimana. Tiúrisamureanayarehi taicha matiarihihí ema arayena. Vahi tauricahini ayúnanáinahíni. Téhesera te tépenapuca éma, jéhesare ticatisamurevanayare. Tacutiquene, vuíchaha tauricaimahi ayunananainahini ena nímitureana. ²⁰ Járajapainapasera eta sácheyare, ticaverejicasianayare, taicha ticaratacanuanainapa ena ticapacanuanayare nútì. Jéhevarepa ayunananainapa.

²¹⁻²² Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepiana ena nuchanerana. Vaipa tacuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tamauriqueneanahi —máichavacapa ema Jesús.

Ena fariséona náimipicauchahi eta nayeherepiana tayehe eta sávarumuahuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Lc 6.1-5)

²³ Eta jena sávarumuuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanitiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquiapaipa, tépurajacachavanaughpaipahi. Tinicanapaipa. Tísapacareichucha éta, taicha técuhanapahi.

²⁴ Énasera ena fariséoana eta náimararasirapahi, tisemanapaipa. Ánipa naicha ema Jesús:

—Píma ena pímitureana. Ticaematananapaichucha eta navepiraquirapahi eta trigo puiti juca sache tétavicavahi eta tacapicahuquenehi. Vahi tísapacarémahi eta juca nacaematanerahi puiti —náichapa.

²⁵ Tacahe, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahí ema víyarahaini David eta mapaisirapahi técuhapaipa énerichuva ena téhicanapahi. ²⁶ Te émarichaha ema Abiatar náquenumurihi ena tiyujaracarahaní, ema David tisiapapa eta te mapena ema Viya. Tiyaseserecapa eta manicayarehi. Náijaracapa eta pan tacapicahuquenehi nanacarehi te mamirahu ema Viya. Nanicasarehi ena tiyujaracarahaní, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

²⁷ Tímiyanava eta mamestasirahi éna:

—Ema Viya máepiyacahi nativa ena achaneana. Te taequenepa, máimijarechinapa eta sache nanarasiraya ena achaneana, tiúrichayarehi éna. Vahi étainahini témpiyaca eta tihapapiricavacayare éna. ²⁸ Tiuri puiti, numetacahayare: Nútì Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

3

*Ema Jesús macanaraca ema achane tépenavahu
(Mt 12.9-14; Lc 6.6-11)*

¹ Tacahe, te apanavarepa sávarumuuhu, tiyanavare ema Jesús, tisiapahi eta te nárujisirareva. Matiarihihivare ema émana achane vaipa tayamuricahini eta mavahu, tépenavahuipa. ² Natiarihihivare ena fariséoana, ena ticanarajíricanahi ema Jesús. Náimraracapa éma te macanaracayarepuca ema achane

eta te jena sache tacapicahuquenehi. Natanunuircahi eta tiviuchayarehi ema Jesús. ³ Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

⁴ Tacahe, máichapa ena achaneana:

—Núti nuvaraha epanerechaya. Puiti juca sache sávarumuuhuhi, ¿tájahapuca táurica eta víchayare? ¿Tísapacarepuca vicha eta táuriqueneana? ¿Étapuca víchayare eta tamauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énasera tímatinamurianarinehi. ⁵ Tacahe, ticatisamurevarine ema Jesús eta muracairahi eta nasamureana. Tacahe, tisemamajuhepa eta máesenimurihairahi éna. Máichapa ema achane macajumaquene:

—Nímaha. Picajaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ⁶ Énasera ena fariséoana, tisemanarinehi eta náimairahi eta juca máichaquenehi ema Jesús. Tiyananapa tisamacacana nayehe ena políticoana, machanerana ema Herodes, taicha navaraha nacapacaya ema Jesús.

Títecapanapa ena camuriqueneana achaneana

⁷ Émasera ema Jesús tiyanapa térajicavapa eta te mávapahi apaquehe eta te tachausi eta cáquiure. Mámapa ena máimitureana. Náehicavare ena ichapemu-riqueneana achaneana ticavasanahi eta te provincia Galilea. ⁸ Jéhesare, te nasamairiricapa eta máichaqueneanahi ema Jesús, títecapanapa ena ichape-muriqueneana achaneana. Tiásihanahi eta te avasare Jerusalén, eta te provincia Judea, eta provincia Idumea, eta provincia Siria, étapa eta avasare-ana te apachara eta cajacure Jordán. ⁹ Tásiha, ema Jesús mavanecapa ena máimitureana natsesinhahini étasina pacure apaesa vahi nacutupiaraca ena ichapemuriqueneana achaneana.

¹⁰ Taicha camuriana ena macanararuanapahi. Namutu ena nacaju-maqueneana témeñahavanapahi tiyumususujicavanapahi eta náemeñahai-ravaya, taicha navarahahí náemamacayare. ¹¹ Jéhesare, ena éreanana tiávahá-canahi ena achaneana, te náimahapa ema Jesús, tíaquipaicavanapa te mami-rahu éma. Tipiararecanapa:

—¡Pítira Machicha ema Viya! —náichapa.

¹² Mavanecapasera máecatihavacapa nacuija nacumetaruina taicha vuíchaha mávarahahí náimatihíni ena achaneana eta émaquenérahi Machicha ema Viya.

Ema Jesús manerejica ena dócequeneana apóstoleana (Mt 10.1-4; Lc 6.12-16)

¹³ Tacahe, tiyanapa ema Jesús eta te mávapahi apaquehe máripahi. Mámamu-rihapa ena ánimuriana máimitureana. ¹⁴ Tacahe, ánaqui manerejicavacapa te nataracu ena dócequeneana mayeheanayarehi apóstoleana. Vaipa najuni-jiacaimahi éma, macachaneyarehi tamutu sácheana. Matuparacavacapa eta nacometarairuirayare. ¹⁵ Máijaracavacapa ena dóceana eta naratahai-rayarehi ticanararecana ena nacajumaqueneana, náimijunairayareva ena éreanana tiávahácanahi ena achaneana.

16-19 Eta juca náijareana ena manerejiruanahi*: Ema Pedro (éma ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlasi Iscariote (ema tíjararecahi ema Jesús).

Ena escribánoana téjecapavanahi eta náimijachirahi ema Jesús mávaháruhi ema Váinaraji Satanás

(Mt 12.22-32; Lc 11.14-23; 12.10)

20 Tacahe, tichavapa ema Jesús, énapa ena mayeheana apóstoleana te napena. Tiápechavanavarepa tiúrujicavana ena achaneana. Tásicha, vaipa náitujicavahini tinicana taicha téavicavahi eta nasimutuvahi ena achaneana. **21** Énasera ena maparapenaveana ema Jesús, te nasamairiricapa, tiyananapa náepanayarehini éma, taicha náimijachaipahi máurishi éma.

22 Énerichuvare natarihipa ena escribánoana, tiásihanahi te Jerusalén. Náepiyaequenehana ema Jesús, ánipa nacahepa:

—Ema maca Jesús, vémeteaca majupaha ema náquenumurihi ena éreanana, émaripa ema Satanás. Táitusiava máijaracahi eta máitupajijiasiravahi eta macuchusirahi ena éreanana —nacahepa.

23 Tacahe, ema Jesús máichuhavacapa ena ticaecahirahianahi. Eta máimitusiravacahi, máimicutichinapa. Ánipa máichavaca:

—Éti, téjecapavahi eta epanereruana ímijachanuhi majupahanuhi ema Satanás. Ímijachapuca ticticianacacanahi ena éreanana. Váhisera énená tacahe.

24 Tacutihi ena machanerana ema gobierno. Éna, vahi típutsimuriavannahi apinainahipucaini partido. Te típutsimuriavanapa, énajicacaini tiáquipaicacana. **25** Émaripa mácani achane te camurianahi ena machichanaveana, váiparinehivare típutsimuriavannahi, náehajiricacahini, énajicacahini náquipaicacahini. **26** Ene macahehi ema Váinaraji Satanás, váiparine másapahini típutsimuriavannahi ena machanerana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi.

27 Macutihi ema mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. Tacamuñuhi nacaratacanumayare, náitiacanumayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

28 Puiti nutupiruva numetacahe: Tiperdonachacareanayare ena achaneana eta napecaturana, tamutu jácani náechajisihaira eta táíñemahiqueneana. **29** Jararihisera eta epecatura vahi tiperdonachacaremahí. Eti ímijachahí ema Satanás ema tiávahácanuhi. Ichape eta ejecapiravahi, taicha ema tiávahácanuhi nuti, émaquenehi ema Espíritu Santo. Éti epanarararacaripa éma. Tásicha, máitavacaca eta etapiravanaya —máichavacapa ema Jesús.

30 Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

* **3:16-19** Ena nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Émasera ema Viáquenu Jesucristo máimamaracahi eta náchanevana, máimatuvacahi éna. Manacapa eta náchucarapianahi “Boanerges”. (Eta táechajiriruvahi eta juca, Tijuricati eta náechajisira, téyayarasianavare.) Matiarihivare ema apana achane ticaijarehivare Jacobo. Ema maiya ticaijarehi Alfeo. Matiarihivare ema apana ticaijarehivare Tadeo. Eta táipine eta máijare Lebeo, étapa Judas. Tacahe, mapana eta máijare. (Pitanuca te Lucas 6.16 étapa te Mateo 10.2.) Ema apana Simón, tímaticarehi ema, náumurivainihi ena revolucionárioana ticaijareanahi “cananística”. Navaraha náquijica ena extranjeroana romanoana.

*Suítecapauchapa esu maena ema Jesús énapa ena maparapenaveana
(Mt 12.46-50; Lc 8.19-21)*

³¹⁻³² Tacahe, te apanapa sache, tiúrujicavanavarepa ena camuriqueneana achaneana te tajuhe eta peti. Téjacanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásicha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

³³ Majicapapa éma:

—Yátupi némunacavacahi esu meme, énapa ena nuparapenaveana. Nararhisera ani te juca nuchacaya ena némunaruuanahivare, nuparapenaveanahí.

³⁴ Tacahe, máesenimuríhapa ena máimitureana ena téjacanahi te machacaya. Tásicha, macahepa:

—Ena nani ena némunaruuanahivare. ³⁵ Taicha namutu nácani ticaemata-neacanahi ema Tata, énali ena némunaruqueneanahí —máichavacapa.

4

Eta máimicutichinaquenehi evaraqui tacaevaquenehi te apanapanenéji máteji te apaquehe

(Mt 13.1-9; Lc 8.4-8)

¹ Tacahe, te apanapa sache, tiápechavavare tímitureca ema Jesús te tachausi eta cáquiure. Tásicha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tíavacuhapa tayehe eta pacure, tiápajuecavapa apaesahi. Téjacapa eta máimituresirahi. Ena achaneana nanasipa tayehe eta te tachausi. ² Camuri eta máimicutichaqueneanahí eta máimitusiravacahi. Ánipa macahe:

³ —Esamararacanuchaha. Matiarihihi ema émana achane. Tévacahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cágure, tanicapa. ⁵ Eta mayeherepi éma eta máevasira, máevajaja-paicapaica eta apaquehe. Tásicha, eta apamuri evaraqui témiricapa te váhirichu tamitutuhini eta máteji taicha máripahi eta apaquehe. Tímarucavanepanéni táicha. ⁶ Téhesera te tíjurepa eta sache, tacapajicapa; taicha vaipa táuparevacaquí. ⁷ Tacahe, eta apana evaraqui témiricapaipa te tapare eta itapequiji. Tiúrinahinéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini. ⁸ Tacahe, eta apamuri evaraqui témiricapaipa te tiúrina máteji. Tijurucarahihi eta táimarusira. Ichapemurihi eta tahi. Eta étana, ticahipa apaesasajiruichucha. Eta apana, ticahipa tativarerehapanapa. Eta apanavare, ticahivre tétopicavapanapa. ⁹ Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

*Ema Jesús máitametacavaca ena máimitureana eta juca máimiturapi
(Mt 13.10-23; Lc 8.9-15)*

¹⁰ Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayaserecapa tájahapuca tacayemahi eta máimic平iarachirava-caichucha eta máimitusiravacahi ena achaneana. ¹¹ Tacahe, majicapapa éma:

—Ema Tata tituparacanuhi nítametacaheyare éti eta juca mapanereruana taequeneruana tayehe eta macuchucuirraheyare eti achaneana. Mavarahahi ímatiequenehaya éti. ¹² Énasera ena apamuriana achaneana nímicutiarachinavacaichucha, apaesa vahi máejrarémahi eta nacaicutiarairaya

eta nasamaquenehi. Tavaraha napanerechinavaya. Eta nacaicutiarairaya, náitsivachahini eta náitaresira, apaesa naperdonachacarepaini – máichavacapa ema Jesús.

13 Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe: **14** Eta evaraqui eta máevaruhi ema achane tacutihi eta nímiturapiana. **15** Natarihi ena achaneana nacuti eta apaquehe muracapahi te achene, te táemirisihahi eta evaraqui. Ena nani nasamararacahi eta nímiturapiana. Émasera ema Satanás macamitisicavanepa eta nasamaquenehi. **16** Natarihivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehinéni nasuapa, tiúrisamureanainehi. **17** Váhisera náratahahini nacaravuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahini te tatiarihipa eta jácani nacatichaira ena achaneana táichavenehi eta náehisiranuhi. **18** Natarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. **19** Napaneréquenehahinéni, tahapapiricavacahisera eta jácani táicharacavayare eta náitaresira. Tavayuacavacavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemetavicahi eta navarairahi téhicanuana. Tamapurujihí eti najacapirahi eta nímiturapiana. **20** Natarihisera ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya –máichapa ema Jesús.

*Ema Jesús tímitureca eta apamuriana yátupiqueneana
(Lc 8.16-18)*

21 Tímiyanava eta máimituresirahi, ánipa macahe:

—Te viyustaca eta vimícahu, váiparinehi táuricaimahi vijihapaicahini, vinacahivarepucaíni te tápecu eta vétsatsame vímasirarehi. Tacamuñuhi vinacayarehi te anuquehe. **22** Jéhesare, tayanapanepuca nacayumuruqui, tamutuyarehisera ticaechera jácani tayumururevanahi. Tájina tépacuchaimahijácani najajairuvanahi. Tamutuyarehi téchacareya. **23** Te evarahapuca ecaicutiara, tavaraha eta epanerechinavaya.

24-25 Máichavarepa:

—Tacamuñuvar epanerecha yátupina eta esamaqueneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, ema Espíritu Santo tímitucaheyá tamutu eta tacayemaquenehi. Jéhevare, tímitucaheyare éma eta apamuriana yátupiqueanahi. Énasera nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

Ema Jesús máimicutiarachava eta táimarusira eta evaraquiana

26 Máichavacavarepa:

—Nuvaraha nímicutichinahe eta nímiturapiana nuti Manerejirunuhi ema Viya. Te yátupihi eta nasuapirohi eta nímiturapiana ena achaneana, náitsivachainapa arairuinapa eta napanereruana étapa eta nayeherepianaya eta náitaresira. Tacutihi eta máevaraqui mácani achane. Tévacahi te máesane. Tásicha, tinaracapa, macuchapayarepa eta tacahirayare eta máevaraqui. ²⁷ Tímarucapa eta evaraquiana. Tijurucavare. Ema achane, tájina macaicutiarahini eta táimarusirahi. Váhivare macaicutiarahini eta tajurusirahi. ²⁸ Taicha eta apauehe, éta ticaimarucahi. Tacuchucahi tativa eta tapacaji, táchicapa eta tanaqui. Te ticahipa, tiúchucapa eta tapiraqui. ²⁹ Te tiyahapa eta tahi, ticaechatijipa te tumare, taicha étainapa eta tacavehasiraya —macahepa ema Jesús.

*Ema Jesús máimicuticha eta taqui eta mostaza
(Mt 13.31-32; Lc 13.18-19)*

³⁰ Ánivare macahe:

—Puiti nuti Manerejirunuhi ema Viya, nímicutichinahe eta ichapemurivaya eti íjaracavanahi éhicanu. ³¹ Ecutiya eta ánichichaque taqui eta sucureca ticaijare mostaza. Éta juca, ániquititavacapana eta taqui te tamutu eta evaraquiana tatarihiqueneanahi tayehe eta juca apauehe. ³² Téhesera te ticaevapa, tijurucapa eta tiápajucavahi ichapepana tayehe eta apamuriana sucurecana. Tatarihi eta ichapetavavaca. Tásicha, tacapenajicapa eta cágureana —macahepa ema Jesús.

*Camuri eta máimicutichaqueneana
(Mt 13.34-35)*

³³ Ani tacuhe tamutu eta máimitusiravacahi ena achaneana. Camuriana eta máimicutichaqueneanahi. Tamutuhi ticaicutiaracarevaca nayehe ena tivarahanahi náiturrequeneha. ³⁴ Tájina étahena te tímitureca, vahi macunacahini eta máimicutichira. Téhesera te macarichupa ema Jesús énapa ena máimitureana, máimicaecherachapa tamutu eta máimicutichinaqueneanahi.

*Ema Jesús macaesamirica eta une eta táepacusirahi étapa eta técaticava
(Mt 8.23-27; Lc 8.22-25)*

³⁵⁻³⁶ Tacahe, te jena sache, eta máejasirahi ema Jesús te pacure, tímiturecahi. Te cáperrehichichapa, máichapa ema Jesús ena máimitureana:

—Viyanaya viánueca te apachara —máichavacapa.

Tacahe, ticametavanapa nayehe ena achaneana. Tásicha, námapa ema Jesús eta te pacure. Náehicapa ena apamuriana te pacure eta napaisirapahi. ³⁷ Te ítupierecanapa, tachimaracapa eta muraca técaticava. Tépacucapa ichape eta cáquiure. Tisiapapaipahi eta une tayehe eta pacure. Tiánehipaipahi tacaericavaca. ³⁸ Émasera ema Jesús, tímacapaichucha te tahivu eta pacure te machunusi. Tásicha, nacajamicapa éma. Ánipa náicha:

—¡Tata maestro! ¡Picatiuchahavi, vérícainapa! ¿Váhipuca péñamava eta viyehé? —náichapa.

³⁹ Tásicha, enurujipa téchepuca éma. Titupihapa. Mavanecapa eta técaticava étapa eta une. Ánipa macahe:

—¡Pámatina, pésamiricava! —máichapa.

Tacahe, tícercapa eta técaticava. Tésamiricavapa eta une. Tésamiriecavapa tamutu.

⁴⁰ Tacahe, máichavacapa ena máimitureana:

—¿Tájaha tacayema epica? ¿Váhipuca ecasiñavahini eta nutiarihirapahi eta eyehe? —máichavacapa.

⁴¹ Ena máimitureana, tétavicavainehi eta náramirahi. Tiyaserecacanapa, ánipa nacahe:

—¡Tétavicavapa eta mítupajijasiravahi ema maca vimaestro! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técaticava étapa eta une eta táepacusirahi! —nacahepa.

5

*Ema achane návaháruhi ena ichapemuriqueneana éreanana
(Mt 8.28-34; Lc 8.26-39)*

¹ Títecapanapa te apachara eta cáquiure eta te apauehe ticaijare Gadara.

² Ánaqui tatiarihi eta ecariana. Tacahe, te tiúcupaicapa ema Jesús eta te pacure, tiúchujicavanepa ema émana achane návaháruhi ena éreanana. ³ Éma másihapahí eta te ecari, taicha macapenajuechavacahi eta covachana. Nájina náratahahini náitiacahini éma. Étaripa eta ichapepi cadena, vahi táratahahini.

⁴ Taicha maejeharipa nacarataca. Náitijivauchahi te cadena. Nanacavare eta grillo te mapiqui. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini ema maca achane. ⁵ Eta máitaresirahi, eta mavidarehi tayeha eta ecari étapa eta mavidapahí te anuqueheana mari. Tamutu sácheana, yátiana, tipiararerecahi éma. Tijarachava te márijahiana. ⁶ Tacahe, tiyerehipaichaha máimahapa ema Jesús, tijunapapa mapauchapa. Máepuyumirauchapa.

⁷⁻⁸ Ema Jesús, eta máimairahi ema achane, máichapa:

—¡Pijunijica ema maca achane, piti éreana! —máichapa.

Tipiararecpa muraca eta majicapirohi ema achane. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu, vuíchaha picuvanecanu ánaqui te nucaicuñaiyayare! —macahepa.

⁹ Tacahe, ema Jesús mayaserecpa ema éreana. Ánipa maicha:

—¿Tájaha píjare piti?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehi, ichapemurihavihi víti. ¹⁰ ¡Pájapanuhavisera! Te piáquijicahaviyarepuca, ¡vahi picuevatacavahi viyanaya te tiyerehi! —nacahepa ena éreanana tiávahácanahi ema achane.

¹¹ Tiuri puiti, tatiarihihivare eta camuriqueneanahi cúchiana. Tinihicanahi ánaqui te táemiripaisine eta masihi. ¹² Tacahe, ena éreanana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacavahi eta te távihahi eta jena cúchiana. Písapahavi visiaphacavaca eta jénana —náichapa.

¹³ Tacahe, ema Jesús macuchuchujicavacapa eta te máquehe ema achane, másapapa nasiaphacavaca eta cúchiana. Tatiarihi cútimali apina mil eta cúchiana. Tacahe, te tasamapa eta cúchiana eta nasiaphasiravacahi ena éreanana, tijunaparacanapa témiririjicanapa te tachaui etá cáquiure. Tériri-jicanapa tamutu.

¹⁴ Natiarihihisera ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicaréinehi nayehe ena achaneana. Tiyananapa náimahapaná tájahapuca etá táichavaquenevahí etá cúchiana. ¹⁵ Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema

Jesús. Tájinariipahi máichiravainahini. Ticamuirihapahivare. Tásihasera, tipicanarinehi ena achaneana. ¹⁶ Tavetijipa te náitametacapa ena tímahanahi eta táichavaquenavehi eta cúcchiana te macuchuchujicavacapa ena éreanana ema Jesús. ¹⁷ Tacahe, nayaseacapa ema Jesús vahini macuitecapauchavacaini tayehe eta návasahi éna, machavavanehini te másinehi.

¹⁸ Tacahe, te tiávacuhayarepa ema Jesús, ema achane manararuhi tiyase-serecapa eta mavarairapa máehica ema Jesús. ¹⁹ Émasera, vahi másapahini. Ánipa maicha:

—Piyanachucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

²⁰ Tacahe, tiyanapa tichava ema achane. Timetajiricapaipasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

Ema Jesús macanaraca esu machicha ema Jairo, ésupa esu apava esena sucajumaquenehivare

(Mt 9.18-26; Lc 8.40-56)

²¹ Tiuri, tichavavarepa tiánueca ema Jesús te apachara. Te títecápapa, nárujiacavanepa ena ichapemuriqueneana achaneana te mávinehi te tachausi eta cáquiure. ²² Tacahe, títecápapa ema émana achane ticaijare Jairo. Ema maca achane, tétabicavahi eta mapicauchacarevahi. Tuparairucahi tayehe eta nárujisirareva. Te máitecapauchapa, tépuyucapa te mamirahu ema Jesús. ²³ Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti téñamajiri-cavaipa ésu. Picatajicanupaini, tata. Pinasinanu eta pivahuana suyehe apaesa sunaraca —máichapa.

²⁴ Tacahe, masuapapa ema Jesús. Tiyanapa máehicahi ema achane. Náehicavarepa ena camuriqueneana achaneana. Náevatajiricanechá éma.

²⁵ Tásiha, te nataracu sutarihipahivare esu esena sucajumaquenehi. Doce áñoripahi eta sucajumairahi táichirahi eta suítine. ²⁶ Ichaperipa eta sucatajivairahi taicha camurianaripa ena típuchanahi médicoana. Títaharipa eta suímaqueneanainihi. Tájinaserá vahi suáтивarehini. Suáviraparasia-vaichuhi suvayuhapaichucha eta sujuma. ²⁷ Ésu, sutanucapaipahi ema Jesús, susamairiricahi eta tiáramicareana máichaqueneanahi. Supauchapa suéhiquecuchapaipahi te maquecu. ²⁸ Taicha tacahehi eta supanereruhi: “Taratachuchaini némamajiacahini eta ñimuiriha, németeaca nunaracapapucaini”, sucahesamurepa. ²⁹ Tacahe, suémamajiacapa eta tacheyarapi eta mamuiriha. Jéhesaréinehi, enurujipa tícheca eta suítine. Tisamavapa ésu eta sunarasiraipahi tayehe eta sujumainihi.

³⁰ Émasera ema Jesús macaicutiaravanepa eta sutarihirahi esu tacanarraruhi eta maitupajijiasiravahi. Enurujipa téviurucavahi te namuri ena ichapemuriqueneana achaneana. Ánipa macahe:

—¿Nájaha témmamajiacanuanahi?

³¹ Tacahe, ena máimitureana náichapa:

—Tata, téñatuhejiricacanahi namutu eta achaneana taicha ichape eta nasimutuvahi. Piyaserecahavirichahava nájahapuca ena témmamajiacavianahi —náichapa.

³² Émasera ema Jesús máesenimurihana, matanucapa nájahapuca ena témmamajiacanahi. ³³ Tásiha, supauchapa esu esena. Tiyayacarepaipa taicha

tipicaripahi. Taichasuéchahi eta suíchaquenehi ésu. Suépuyumirauchavanepa te mamirahu. Sumetacapa tamutu. ³⁴ Tásicha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

³⁵ Téchajiricavaichahahi ema Jesús eta suyehe esu esena, títecapananecha ena tiásihanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

³⁶ Émasera ema Jesús vahi masuapahini eta nametasirahi. Mavarahaichucha tiyana. Tacahe, máichapa:

—Vahi picueñamava, piti Jairo. Pácasiñavachucha eta nuyehe —máichapa.

³⁷ Tacahe, ema Jesús vaipa másapahini náehica ena apamuriana achaneana. Nacarinepa ema Pedro, ema Jacobo, émapa ema Juan. ³⁸ Te títecapanapa te mapena ema Jairo, máimahapa ema Jesús ena achaneana vaipa náituca-carahahíni, tijajamurianaripahi eta náiyairahi. Tipiararecanaripahi muraca.

³⁹ Émasera ema Jesús eti masiapirohi, máichavacapa:

—¿Tájaha tacayema eta iúrujiricavahi eta ani, íyaharacavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

⁴⁰ Énasera ena achaneana nacaerahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávihahi esu amaperu, émapa ema suiya, ésupa esu suena, énapa ena mapanana máimitureana. ⁴¹ Tacahe, macaratavauchapa ésu. Máichapa:

—Nuchicha, néchajicavi. Péjamica, péchepuca —máichapa.

⁴²⁻⁴³ Enurujipa esu amaperu téjamicapa, téchepuca. Tipaicapa te namirahu. Ichaperinehi eta náramirahi ena tímahanahi. Tásicha, ema Jesús mavane-cavacapa náijaraca eta sunica esu amaperu. Matuparacavarepa muraca eta vahi nacuechajisiha eta náimahaquenehi. Esu amaperu, dóceripahi eta suhañora.

Tacahe, tiyanapa ema Jesús. Tichavapa te mapena.

6

Tichavapa ema Jesús te mávasa Nazaret

(Mt 13.53-58; Lc 4.16-30)

¹ Tacahe, te apanapa sache, tiyanavarepa tipaica. Tichavapa tayehe eta mávasa Nazaret, mámamurihapaipa ena máimitureana. ²⁻³ Tacahe, te jena sache sávarumuahuquene, tiyanapa tayehe eta náurujisirareva nayujarasirare ena achaneana. Tímiturecapa. Camuriana ena tisamararacanahi. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapihanahicacha ema máca? ¡Témunahiricavapa titupajijiacaipahíjcacha! ¿Távihasica macaravahuinehi eta máichirayare eta tiáramiccareana? Vivaraha vímaha víti apanava eta máichaqueneanahíji visamaiririruanahi. Taicha vímatihi ema maca. Carpintérochucha éma. Vímatihivare esu maena María. Vímatihivare ema maparape Jacobo*, émapa ema José, émapa ema Judas, émapa ema Simón. Vímatihivare ena esenana maparapenaveanahi, ticavasanahi ani —náichacacapa.

* **6:2-3** Ema maca achane, ticaijarehi Jacobo te náechajiriruva ena israelítana. Te véchajiriruva, ticaijarehi Santiago. Mapaenumavahi máehica ema Jesús te taequenepa eta máechepusirahi te máecari ema Viáquenu.

⁴ Ema Jesús máimatihi eta napanereruanahi. Tásicha, máichavacapa:

—Tatuparaca epicauchahaviya vimutu viti mavaneruana ema Viya. Étisera eti nujaneananahi ecavasanahi eta te juca viávasa, étipa eti nuparape-naveana, vahi epicauchanuhini —máichavacapa.

⁵⁻⁶ Éma, ichape eta máramirahi eta namasuapajiraivahi éna. Eta tacahe, tájina máimerecahichaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianainahíni ena macanararuana.

Ema Jesús mavanecavacapa ena dócequeneana apóstoleana napaicayare tamutu avasareana, ticametarairuanayare

(Mt 10.5-15; Lc 9.1-6)

Tacahe, ema Jesús tiyanapa mapaicahi eta avasareana máimitucavacapaipa ena achaneana.

⁷ Étana sache, macurujimurihana ena dócequeneana mayeheana apóstoleana. Tacahe, máijaracavacapa eta náitupajijiasiravayare naratahairayare náquijica ena éreanana. Tacahe, mavanecapa tiyanana eta te apanapaneana avasareana, apinanayarepahi eta napaisirayarepahi.

⁸ Matuparacapa, ánipa máichavaca:

—Tájina iámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata. ⁹ Étanarichuvare iámayare eta emuiriha. Tacarichu iámaya eta eyupairiqui. Ecaeparupevayaresera. ¹⁰ Te ítecapapa tayehe eta jácani peti ítecapihaya te jácani avasare, ánsi tayehe. Te iúchucayarepa eta te jena avasare, epaenumava ejunijica eta ítecapihahi. ¹¹ Te váhipuca nacujacapahe te jácani avasare, váhivare nacuvaraha nacusamahe, iúchucavaneyare. Étatapevachavanumayaresera eta máteji te ívapeana. Táicutiarayare eta máicuñasiravacayare ema Viya taicha eta namavarairahi najacapahehini. Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñai-rayare ena achaneana váinarajiqueneana ticavasanaini te Sodoma étapa eta Gomorra —máichavacapa ema Jesús.

¹² Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana.

¹³ Náimijunavacapaipa ena éreanana tiávahácanahi ena achaneana. Camuria-nahivare ena nacanararuana tayehe eta najumanaini, nacapajasisirapahi te nachuti eta aceite.

Ema Herodes masamairiricapa eta máichaqueneanahi ema Jesús

(Mt 14.1-2; Lc 9.7-9)

¹⁴ Tacahe, ema Herodes ema aquenuahi tayehe eta Galilea masamairiri-cavarepa eta máichaqueneanahi ema Jesús, taicha náechajisihahi namutu ena achaneana. Nararihi ena téjecapavanahi eta napanereruana, ánipa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhi ema Herodes? Tichavahichupuca titareca. Étapuca tacahehi puiti maratahahi maicha eta tiáramicareana —nacahepa.

¹⁵ Nararihisera ena apamuriana nacahepa:

—Émapuca ema víyarahaini profeta Elías, téchepucahi.

Ena apamuriana nacahepa:

—Émarichuhi profeta, macutiquenehi ena náinapureanáini antivuanaini. Váhisera téchepucaimahi éma —nacahepa.

¹⁶ Émasera ema Herodes, eta masamairirisirahi, macahepa:

—Németeacahi ema maca émaripa ema Juan, ema nímiyuchatipiquenurehi, téchepucahipuca te máecari —macahepa.

*Eta táichararacavahi eta máepenirahi ema Juan
(Mt 14.3-12)*

¹⁷⁻¹⁸ Eta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machine-nahi, mayenahi ema maparape Felipe. Máiminajicapa ema suima. Tacahe, ema Juan macajachavacapa éna eta naviracacairahi. Étapa tímicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi. ¹⁹ Esu Herodías, tétavicava eta sucatichirahi ema Juan. Suvarahahi sucapaca éma. ²⁰ Váhisera suratahahini, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Eta tacahehi, macatiuchahi éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhisera máiteturuequenehahini tájahapuca máichararacavayarehi. ²¹ Tacahe, eta te jena yati ticaijaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea. ²² Te tinicanapa téranapa, esu suchicha esu Herodías tisiapapa eta te návihahi ena achaneana. Esenachicharipa ésu. Tírimaicapa te namirahu. Ema Herodes máuricainehi ichape, énapa ena machimarana. ²³ Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearunuyare, tayanapano vacuticaca eta nímaqueneana —máichapa ésu.

²⁴ Tacahe, tiyanapa tiúchucapa esu amaperu. Suyaserepanapa esu suena, ánipa suícha:

—¿Tájahapuca eta tuyaseacaini eñi nína Herodes? —sucuhepa.

Tásiha, suíchapa esu suena:

—Piyaseacaya eta ñichuti eñi Juan, puítinarichu ñíjaracavi —suíchapa.

²⁵ Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suicha:

—Nuvaraha pijaracanu puítinarichu eta ñichuti eñi Juan eñi tícachasiricarahi. Pijaracanu te curuja —suíchapa.

²⁶ Tásiha, eta masamirahi eta juca tuyasearuhi ema rey Herodes, ichape-rinehi eta mapanereresirahi. Váhisera mávarahahini mavayuacahini ésu táchica nasamaripahi ena machimarana eta máijarasirayarehi eta tuyasearuyarehi ésu. ²⁷⁻²⁸ Tacahe, enurujipa mavaneca ema suntaru eta te cárcel. Mayuchatipiquenuhapana ema Juan. Tacahe, mámapaipahi eta machutini te curuja. Máijaracapa esu esena amaperu. Tásiha, suíjarapanapa esu suena.

²⁹ Te nasamairiricapa ena máimitureana ema Juan, tiyananapa náepanapa eta máquehéni, náecarapanapa.

*Ema Jesús máitaparahavacahi máenicavaca ena camuriqueneana achaneana
(Mt 14.13-21; Lc 9.10-17; Jn 6.1-14)*

³⁰ Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náichaqueneanapahi étapa eta najacapirahi ena achaneana eta náimiturapianahi. ³¹ Tacahe, máichavacapa ema Jesús:

—Tiuri. Tájina táchava. Puiti viyana vácarichu eta te mávapahi apaesa vinaraca ánipina —máichavacapa.

Taicha vahi téjiacavana ena achaneana. Tévachajiricacanahi tiyanana. Vahi náitujicavahini nanicanumahini ena apóstoleana émapa ema Jesús. ³² Tacahe, tiyananapa te pacure, tiávacuhanapa. Nacaijuhepa te mávapahi apaquehe. ³³ Énasera ena achaneana nanecapaichucha eta nayanirahi. Camurianahi ena tímationahi. Tacahe, tiyananapa tijunapanapaipa, nametapanayarehi ena apamuriana achaneana. Tásicha, tiúrjicavanapa ena tiásihana te tamutu avasareana. ³⁴ Te tiúcupaicapa ema Jesús, máimahapa ena camuriqueneana achaneana natarihiripahi. Tétavicavainehi eta majapanuiravacahi, taicha nacutihí eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi. ³⁵ Te cáperehipa, ena máimitureana napauchapa éma. Náichapa:

—Cáperéhipa juca sache. Tiyerehivacahi eta pétiana. ³⁶ Tacahe, táuricapa pimetacavaca ena achaneana nayanapa, navachareca eta nanica te jácani isanitiana, avasarechichananapuca te vichacayarahahanahi. Taicha ani, tájina naviyaimahi eta nanicahini —náichapa.

³⁷ Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamuñuhi vácayehehini eta camuri plata apaesa námutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

³⁸ Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cínochichaichu eta pan, apiquipa eta jima jitaruca —nacahepa.

³⁹ Tacahe, macavanairipipa náejahahacapaicahini namutu te muíjipahi, náijamuripaichuhi. ⁴⁰ Tacahe, téjahapaicanapa ena achaneana. Náijamuri-paichuhi eta náejasirahi. Cincuentanapahi, ciéntoanapahi. ⁴¹ Tacahe, ema Jesús mavehapa eta cíncocoquene pan étapa eta apiqui jima. Máesenicapa eta te anuma. Mahasulupayachapa ema Viya. Mayuvetutujicapa eta pan, tásicha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaraca. ⁴² Tacahe, námutu tinicana, tisatueanapa. ⁴³ Tásicha, nacaemacharichahavare eta doce saye ichapehiana tánícachavacaichahava eta náemacharajiana eta pan étapa eta jima. ⁴⁴ Camuriana ena máeniruanahi. Te nataracu, natarihihi ena cinco mílqueneana ajairana.

Ema Jesús mapaicaeca eta une (Mt 14.22-27; Jn 6.16-21)

⁴⁵ Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Betsaida. Émasera ema Jesús manasiyarehi máevatamurihanumayarehi ena achaneana.

Tásicha, tiyananapa ena máimitureana. ⁴⁶ Tacahe, te tamutupa eta macame-tavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

⁴⁷ Tacahe, te tiúyatipa jena yati, ema Jesús manasirichaha macarichuhi eta te anuquehe mari. Ena máimitureana itupierecanaipa tayehe eta cáquiure.

⁴⁸ Tásicha, tachimaracavacapa eta muraca técaticava, nácapaquihapsaipahi. Te tijararahipa, ema Jesús máimahapa eta nanausirapahi muraca. Tacahe,

tiyanapa macapayamuriha. Mapaicaecapaipa eta une. Máetavicavacapai-pasera. ⁴⁹ Éna máimitureana tipicanarinehi eta náimairahi eta mapaicaesi-rapahi eta une, náimijachaipahi cunare. ⁵⁰ Tipiararecanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumechava —máichavacapa.

⁵¹ Tacahe, mapauchapa éna. Tiávacuhapa nayehe. Tacahe, tíjahúchavapa tíchecapa eta técaticava. Náramirinehi ichape ena máimitureana. ⁵² Taicha vuíchaha nacaicutiarahini eta tacayemaquenéhi eta macaejapasirahi eta pan, eta táimereuchirahi éma eta vanairucárahi me Viya. Muracasamuremu-rianarichaha.

*Ema Jesús macanaraca ena nacajumaqueneana ticavasana te Genesaret
(Mt 14.34-36)*

⁵³ Tacahe, te apanapa sache, tiápechavanavarepa tiánuecana eta cáquiure. Títecapanapa eta te avasare ticaijare Genesaret. ⁵⁴ Te tiúcupaicanapa, náitiacapa eta napacure. Ena natarihiqueneanahi náimativanepa ema Jesús. ⁵⁵ Tásiha, tiyananapa tijunapaná timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ema Jesús. Námavacapaipahi eta te áchuji ena nacajumaqueneana. ⁵⁶ Énerichuvare, te jácani mayanihapahi te acheneana téhepuca cálleana, nanaquipaicapahi ena nacajumaqueneana. Tacahe, nayaseacapahi éma másapirainahíni náemamajiaceta tacheyarapi eta mamuiriha. Tacahe, nácani témamajiacanapahi, enevanepaipa tinaraca-napahi.

7

*Ema Jesús mame taca ena achaneana eta timaeperajicarahi
(Mt 15.1-20)*

¹ Tiuri, te apanapa sache, náitecapauchapa ena apamuriana fariséoana énaga ena escribánoana, tiásihanahi tayehe eta Jerusalén. Témeñahavanapa eta mayehe ema Jesús. ² Te nataracu ena máimitureana ema Jesús, nararihi éna vahi nacaspavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca. ³ Taicha namutu ena israelítana, napicauchahi eta nayeherepiana ena náchucanaveanaini, naveti-jipa ena fariséoana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánasihíni eta tachipejihini ánichichai-nahini, taicha tipicanahi tamaeperajicahini eta náchanevana. ⁴ Étaripa násiha-pahipuca te mercado, te plázapuca, te títecapanapa te napena, ticasipava-huanayarehi. Mavera eta apamuri nayeherepianahi tipicauchacareanahi nayehe, étaripa eta naspasiraparaca eta náereresiana, étapa eta jarra, étapa eta návacuruhiana étapa eta catre náimasirare.

⁵ Tacahe, nacajachapa ema Jesús ena fariséoana énaga ena escribánoana. Ánipa náicha:

—Pímaha. Ena pímitureana vahi náitauchahini eta viyeherepi. Namaeperajicapa eta náchanevana eta nanisirahi taicha vahi nacaspavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

⁶ Tacahe, majicapapa ema Jesús, ánipa maicha:

—¡Éti ecaijarehi apimirahe! Tatupiruvahi eta máechajiruvahi ema Viya, téchajisiahehi éti eta te Sagrada Escritura. Ánipa macahe: “Ena

nani achaneana, tétserajicanuanahi te najaca; váhisera táetupicavahini te nasamureana. ⁷ Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya. ⁸⁻⁹ Ichape eta éjecapiravahi éti, taicha tasapihapa epicauchahi eta eyeherepiana. Étasera eta mavanairipi ema Viya, vaipa epicauchahini. Tasapihapa épuruhi eta mavanairipiana taicha tivayuacahehi ichape eta ítauchirahi eta eyeherepiana. ¹⁰ Émarichuhi ema víyarahaini Moisés tiájuchahi eta mavanairipi ema Viya eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Mácani tiúmehahi ema maiya ésupa esu maena, vahi tijapanucarémahi nacapacayarehi”. ¹¹⁻¹² Étisera vahi epicaucha eta júcana vanairipiana mayehe ema Viya. Taicha te mararihipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicasiraya ema maiya ésupa esu maena”. ¹³ Ani tacahehi eta ecaepahaira eta tasuapacarevahí eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta éjecapiravanahi tavasiqueneanahi –máichavacapa ema Jesús.

¹⁴ Tacache, máichuhapa ena achaneana, nárujicava eta máimitusiravacayare. Tásicha, máichavacapa:

—Nuvaraha esamanu yátupina, apaesa ácaicutiara. ¹⁵⁻¹⁶ Tájina timaeperajicaina eta viáchanevana te vahi vicasispavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, étapa eta evainarajipanereruana; jéhevare éta timaeperajicahehi –máichavacapa.

¹⁷ Tacache, te tiyanaracanapa ena achaneana, macarinepa ema Jesús énapa ena máimitureana, nayaserecpa máitametacavacahini eta máimiturapi.

¹⁸ Tacache, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinicasareanahi, vahi timaeperajicahavimahi, taicha vahi tasiapa te visamure. ¹⁹ Tatupiruhi te vijuhe. Tásicha, te tiúchucapa eta, apanapa eta táuchusihahi –máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

²⁰ Macahevarepa:

—Étasera jácani panererucana tamauriqueneana, te náisapavapuca ena achaneana, étara timaeperajicavacahi éna. ²¹⁻²² Taicha te amahe eta nasamureana napanerechahi eta tamauriqueneanahi. Ema achane mapanerechahi maveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napanerechahi eta natuhusivaya. Nácani tipanerechanahi eta ticaparecana, tiámerecana, tivayuarecana, téchajihihana. Te nasamureana, najamuracha eta apayeheana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanereruana máecharaireana. ²³ Tamutu eta juca panererucana tamauriqueneana tiásihahi te nasamureana. Jéhesare, eta júcana eta timaeperajicahi eta náchanevana ena achaneana –máichavacapa ema Jesús.

*Esu ésva esena apavasana sucasiña ema Jesús
(Mt 15.21-28)*

²⁴ Tacahe, tiyanavarepa tipaica ema Jesús, énapa ena máimitureana. Nacaijuheyarehi eta avasareana táunavanahi eta provincia Siria. Tásiha, títecapanapa te jácani peti. Váhisera mávarahahini náechahini ena apamuriana achaneana eta matiarihirahi. Tásihasera náecharichucha éna. ²⁵ Tacahe, susamairiricapa esu ésuna esena. Ésu, apavasanahi, sirofeníciana. Eta suéchejiriruva eta griego. Esu suchicha mávaháruhi ema émana éreana. ²⁶ Títecavanepa esu, suépuymirauchapa te mamirahu ema Jesús. Tiyaseu-chavapa mayehe ema Jesús eta máimijunijicahini ema éreana suyehe esu suchicha. ²⁷ Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahíni néchapajiricahehini éti apavasanana, émetavicahini ena nujaneanana —máichapa.

²⁸ Esu esena sujicapapa:

—Énehineni tacahehi, tátachicha. Yátupihi vahi pijaneananuinahini. Pájapanunusera, picatajicanuchuchaini. Víti apanava vácasiñavahini eta piyeha eta vítátijivairaina —suíchapa.

²⁹ Tacahe, máichapa ésu:

—Tiuri eta péchajiriruva. Piyanapa pichava te pipena. Táichavene eta picasiñairanuhi, nímijunijicaripa ema éreana suyehe esu pichicha —máichapa.

³⁰ Tacahe, tichavapa ésu te supena. Suchimapapa tívecahi esu suchicha te sucamane. Jéhesaréinehi, májinaripa ema éreana, majunijiacaripa ésu.

Ema Jesús macanaraca ema túhuquiña upa

³¹ Tacahe, tiyananavarepa tipaicana najunijicapa eta provincia Siria. Nánucuhapa eta provincia ticajare Decápolis. Tacahe, títecapanapa eta te tachausi eta cáquiure Galilea, te tinapaica te táuchusine sache. ³² Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehi. ³³ Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutu-quivauchavapa. Tásiha, máemamacapa eta manene ema achane. ³⁴ Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta piquiñana!

³⁵ Enurujipa tisamarahipa ema achane. Tijimuyapa eta manene, tiúripa téchejica. ³⁶ Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énasera timetajiricanaichucha.

³⁷ Tétavicava eta náramirahi ena nametaruuanahi. Ánipa nacahe:

—Tétavicava táuricacareva tamutu eta máichaqueneanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

8

Ema Jesús tiápechava máenica ena achaneana (Mt 15.32-39)

¹ Tacahe, eta juca sácheinahi tiúrujicavanapa ena ichapemuriqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ema Jesús ena máimitureana. Máichapa:

² —Nujapanuvaca ena nani achaneana, taicha mapanaripahi sache puiti eta nacahehi eta viyeha. Tájinaipavare naviyahini nanica. Téchurihanaripa eta nanicaquene. ³ Te névatacavaca nayana te napenana, machu náquipaicava

te achene taicha vaipa túmevacaimahi eta náecuavahi. Taicha natarihi ena tiásihanahi te tiyerehiana. Vénicavacayare —máichapa.

⁴ Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénisihayarehi ena nani camuriqueneana achaneana? Eta te juca mávapahi vámahi, tájina vítusiáváimahi eta tinica-careana —nacahepa.

⁵ Tacahe, mayaserecapa éna. Ánipa máicha:

—¿Áyanachaha eta pan eta iámaqueneanapahi?

—Jucarihi siéterine —náichapa.

⁶ Tacahe, macavanairipipa eta náejahapaimurihahini namutu ena achaneana. Tacahe, mavehapa eta siétequene pan, mahasulupayachapa ema Viya te anuma. Tásicha, mayuvetucavacapa, máijaracapa ena máimitureana. Éna, náijaracavacapa ena achaneana. ⁷ Tatiarihihivare eta ánimurichicha eta jímachichana. Mahasulupayachavare ema Viya tayehe eta jima. Tacahe, mavanecavarepa eta náijarasiravacayare ena achaneana.

⁸ Tacahe, tinicanapa namutu, tisatuheanapa. Tacahe, nacurujicapa eta náemacharájiana. Siete sáyerichahahivare eta náemachana. ⁹ Eta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatamuríhasarepa ema Jesús ena achaneana nayanaya nachava te napenana. ¹⁰ Enurujipa tiávacuhanapa te pacure ema Jesús énapa ena máimitureana. Tiyananavarepa. Tiánuecana nacaijuhepa eta te avasare tcaijare Dalmanuta.

Ema Jesús macajachavaca eta namasuapajiraivahi ena fariséoana

(Mt 16.1-4; Lc 12.54-56)

¹¹ Tacahe, títecapanapa ena apamuriana fariséoana. Tépanavanapa nacanrajirica ema Jesús. Eta navarairahi náimiaquipaicayarehi, nayaseacapa máimerecahini eta tiáramicareana, máimerecahini te yátupihipuca vanairu-cahi me Viya. ¹² Tásicha éma, tichuruamichavarine muraca. Tacahe, máichavacapa:

—¿Tájaha tacayema eti achaneana eyaseacanu nímereca eta tiáramicareana? Núti nímatihe. Vahi esuapanuimahi te nímerecapucaini eta tiáramicare. Tásicha, váiparine étina tatuparaca ímahahini eta tiáramicareana —máichavacapa.

¹³ Tacahe, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiure.

Ema Jesús máimicuticha eta levadura eta apimirairanahi ena fariséoana

(Mt 16.5-12)

¹⁴ Tiuri puiti, náemitisicahi ena máimitureana eta nanirurucuha. Tatiarihi-hisera eta étanahi pan eta te pacure. ¹⁵ Eta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacutirichu eta tapareasirahi eta apimirairavacahi ena fariséoana étapa eta tacaeñamarasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

¹⁶ Tacahe, náichacacapa ena máimitureana. Ánipa nacahe:

—Tímicajachahavihi eta vémitisisirahi eta pan. Eta tacahe, macahehi tayehe eta levadura.

¹⁷ Éma máimatiacavacapa. Tásicha, máichavacapa:

—¿Tájaha tacayema ecahechajiruvahi eta émitisisirahi eta pan? ¿Vuíchahacaru ácaicutairahini? ¿Tájinacaruichaha epanereruina éti? ¿Muracachutiherichaha? ¹⁸ Tamapurujichuchapuca eta ímairahi eta

níchaqueneana. ¿Vuúchahacaru ácaicutiarahini? Tamapurujipuca eta esamirahi eta nímiturapiana. ¹⁹ ¿Váhivare échahini eta nucaejasirahi eta cíncouene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

²⁰ Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharajianahi evehaqueneanahi? —máichavacapa.

Najicapavare:

—Siete sáye —náichapa.

²¹ Tacahe, máichavacapa:

—¿Vuúchahacaruva ácaicutiara? —máichapa.

Ema Jesús macanaraca ema émana achane púchuqui eta te avasare Betsaida

²² Tiuri, títecapanapa eta te avasare Betsaida. Ánaqui, námapa ema achane púchuqui. Náechajiuchapa éma eta macanarasiraya ema Jesús. ²³ Tacahe, ema Jesús macaratavauchapa ema púchuqui, mámapa te tachachacu eta avasare. Tacahe, mayajihauquichapa eta mátureta eta te máuquihana. Tásicha, manacapa eta mavahuana eta te machuti. Tásicha, mayaserecapa:

—¿Pímaírircapa? —máichapa.

²⁴ Tacahe, téseninicapa ema púchuqui. Macahepa:

—Nímaírircapa apaesa. Eta nímaírahi ena achaneana, ticutimahichuchasera yucuquiana, tiyamuricanahisera —máichapa ema púchuqui.

²⁵ Tacahe, ema Jesús mápechavare manaca eta mavahuana eta te máuquihana ema púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha. ²⁶ Tacahe, ema Jesús máevatacapa ema púchuquiní, mayanapa te mapena. Máichapa:

—Piyanapa pitupiru te pipena. Váhisera picusiapa eta te jena avasare eta piyanihaya —máichapa.

Ema Pedro máimereucha ema Jesús émairahi ema Cristo

(Mt 16.13-20; Lc 9.18-21)

²⁷ Te táequenepa eta juca, tiyanavarepa tipaica ema Jesús, énapa ena máimitureana. Nacaijuhepa eta te avasarechichana tachacaya eta ichape avasare ticaijare Cesarea, máepiyaruhi ema rey Felipe. Eta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehe? ¿Nájahanuhipuca náimijachanuhi nútí? —máichavacapa.

²⁸ Tacahe, najicapapa:

—Ena apamuriana náimijachavihi téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antívuini, téchepucahi —náichapa ena máimitureana.

²⁹ Tacahe, tiápechavavare mayaserecavaca:

—Étiyapa, ¿nájaha ímijachanuhi nútí?

Majicapavanepa ema Pedro:

—Pítira yátupiquenévihi Cristo —macahepa.

³⁰ Tacahe, matuparacapa muraca éna, nacuija nacumetaca eta émairahi ema Cristo.

Ema Jesús tímereuchava eta máepenirayare

(Mt 16.21-28; Lc 9.22-27)

³¹ Tacahe, tépanavapa máimitucavacahi eta táichararacavayare eta máepenirayare. Ánipa maicha:

—Nuti Manerejirunuhi ema Viya, nutuparahaichuhi ichapemuri eta nucatajivairayare. Tépurunuanayare ena tuparairucana énapa ena aquenucarahana. Éna, tímicpacanuanayareva. Mapanayareichuhisera sache eta nucaheyare eta népenirayare. Tásiba, nuchavayarehi néchepuca —macahepa.

³² Máiimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi. ³³ Tacahe, téviurucavapa ema Jesús. Máesenicapa ena apamuriana máimitureana. Tásiba, macajachavarepa émapava ema Pedro. Máichapa:

—Píti, téjecapavahi eta pipanereruhi. ¡Pínajica eta juca tamauriquenehi! Pivarahapa pihapapica eta mapanereruhi ema Viya. Eta juca pipanereruhi tacutihu eta mapanerueruanahi ema Satanás, énapa ena machanerana —máichapa.

³⁴ Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana. ³⁵ Nácanisera téñamanahi eta náitaresira, tiávamirahuana eta náehisiranu, énajivayare ticamitiequenehavanaya eta náitaresira. Énasera nácani yátupi tíjaracavana téhicana eta náehisiranuhi, étapa eta námirahi eta tíurina échajirirucava, tayana-pane támicpacacavacapuca, éna titujicavanayare tiúchucuhayare eta náitaresiranaya. ³⁶ Énerichuvare nácani tacaeñamararuanahi eta nacaimahaquenéiraya te juca apaquehe, tíñehiyare eta náitaresira taicha eta tacaeñamarasiravacahi tahapapiricavacahi tayehe eta náuchucuirayarehini. Tiyananainapa eta te yucu nacaicuñaiyayare. ³⁷ Taicha vahi máratahaimahi mácani achane mavachachahini eta máurivaya te apana vítaresira. ³⁸ Énaripa nácani titsirihanapuca téhicanuana, náimitsirihapuca eta nímiturapiana te namirahuana ena achaneana mapicauruirahana pecatumareana, núti apanava nutsirihayareva nayehe ena nani. Nucaerajicainapa ena nani, nuti Manerejirunuhi ema Viya, te táitecapapa eta sácheyare nuchavirayare aquenucanuinapaipa. Te jena sácheyare, námainapaipa núti eta majaraiva ema Tata, nucachanénapaipa ena sántoqueneana ángeleana.

9

¹ Énerichuvare máichavacapa:

—Nutupiruva numetacahe: Puítiripa te etaracu éti etiarihi éti vahi épenavánemahi, ímahanunumaya eta táepaniraya eta nítupajijiasiravahi eta nucatuparahairahi aquenucanuya me Viya —máichavacapa.

*Ema Jesús tihapamaichava eta máimahi
(Mt 17.1-13; Lc 9.28-36)*

² Tiuri, sáisipa sache eta nanasirahi ánaqui. Tacahe, ema Jesús manaquicavacapa ena máimitureana. Nacarnehi máma ema Pedro, ema Jacobo, émapa ema Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi ema Jesús te namirahu éna. Tétavicavapa eta tajapuvahi tajarárasirahi tamutu eta máquehe. ³ Eta mamuiriha, táetaviucha eta tajanunumesirahi. Nájina tiratahaina tépachinacha tajanunumecahini náicha eta muíriare. ⁴ Tacahe, tiáramicareanavarepa tímerecavana ena apina ajairana: ema víyarahaini profeta Elías émapa ema

víyarahaini Moisés. Téchajircavanaripahi mayehe ema Jesús. ⁵ Tásicha, ema Pedro tímisiapavapa, téchajicapa ema Jesús. Ánipa macahe:

—Tata Náquenu, tétavicavapa táuricacareva eta viávihairahi eta ani. Tiúripahnahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

⁶ Váhinéni máimatiéquenehaini ema Pedro tájahahipuca eta mavarahaquenehi macayema. Namutu tíñacavana ichape ena mapanana máimitureana.

⁷ Tacahe, tiáramicarevarepa eta úcaji táepacúmurihahi éna. Nasamavarepa eta mahu ema Viya tayehe eta úcaji. Ánipa macahe:

—Ema maca, ema yátupiquenehi nuchicha némunaruquenehi. Éma esuapayare —macahepa.

⁸ Tíjhúchavavarepa, te náesenicavarepa, macarinehi ema Jesús. Nájinaripa ena apinana náimahaqueneanahi.

⁹ Tacahe, te tichavanapa tiúcupaicanavarepa, ema Jesús matuparacavaca ema. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te néchepuca te nécarí nútí —macahepa.

¹⁰ Tásicha, nasuapa eta matupararuhi. Napanerequenehahisera eta macayemaquenehi. Tiyaserejiricacanapa:

—¿Tájahapuca tacayemarihi eta máechepusirayare te máecari? —nacahepa.

¹¹ Te tichavanapa tayehe eta anuquehe mari, nayaserecapa éma, ánipa naicha:

—Ena escribánoana tímítucanahi eta machavirayare tiápechavaya titareca ema víyarahaini Elías, tínapucayarehi eta pímeresiravayarehi piti Cristo.

¿Énapuca téjecapavanahi ena escribánoana? —náichapa.

¹²⁻¹³ Majicapapa ema Jesús:

—Yátupi, ema víyarahaini Elías títecipayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacapahini ena tuparairucana éma. Nacatianacahisera nacapacahi éma, tacuti eta táchajisihaqueneanahi eta Sagrada Escritura eta máichavaqueneyavarehi éma. Ene nucaheyare nútí Manerejirunuhi ema Viya. Ticatianacanuanayarehivare, tépurunuuanayarehi. Ichape eta náemecatajichiranuyare eta náimicapasiranuya, tacutihi eta táchajisihaquenehi eta Sagrada Escritura eta nuyehe —máichapa ema Jesús.

Ema Jesús macanaraca ema amaperu mávaháruhi ema éreana

(Mt 17.14-21; Lc 9.37-43)

¹⁴ Tacahe, te tichavanapa éna te návhahi ena apamuriana máimitureana, natiarihih ena camuriqeneana achaneana te nachacaya. Natiarihihivare ena apamuriana escribánoana, nacanarajircavacahi ena máimitureana. ¹⁵ Eta náimairahi ema Jesús, náraminehi ena achaneana. Tijunaparacanapa namutu náechajipanaya. ¹⁶ Te títecapanapa te návhahi ena máimitureana, ema Jesús mayaseremurihapa éna. Ánipa maicha:

—¿Tájaha eta ecanarajircavacahi ena nani escribánoana? —máichapa.

¹⁷ Tacahe, tiúchujicávanepa ema émana achane. Majicapapa, ánipa maicha:

—Tata maestro, picatajicanu. Námapahi piyehe ema maca nuchichasami. Éma, vahi téchajica maicha ema éreana. ¹⁸ Mavarahapa jácani ema éreana, máijahúchava máquipaicaahi ema nuchicha. Tásicha, ema amaperu ticarisasajacapa, tinirataquiahechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhisera náratahahini —máichapa ema achane.

19 Tacahe, máichapa ema Jesús:

—¡Tétavicava emasuapajiraivavaca eti achaneana! ¡Cúverarecachasicaini eta nucamichirahénahini! Iáma ani ema amaperu —máichapa.

20 Tacahe, náepanapa ema amaperu. Te máimahapa ema éreana ema Jesús, enurujipa macaeñamacá ema amaperu. Tacahe, tiáquipaicavapa te apaquehe. Téchariripáicavapa ticarisasajacapa. **21** Tacahe, mayaserecapa ema Jesús ema maiya ema amaperu. Macahepa:

—¿Tiyereripahipuca eta juca máichavaquenenvahi? —macahepa.

Majicapapa ema achane:

22 —Te amuyarichaha. Máejeharipa máquipaica ema mara éreana te yugu téhevare une, taicha mavaraha macapaca éma nuchicha. Pítisera, te pirata-hapucaini, pájapanuhavini picatajicahavisamíni —macahepa ema achane.

23 Majicapapa ema Jesús:

—¿Tájaha picayemaquene eta píchanuhi eta te nuratahahipucaini nútí? ¡Pítinapucaini, te pirataha! ¡Pácasíñanu! ¡Tamutu titujicacare te ecasiña eti achaneana! —máichapa ema Jesús.

24 Enurujipa majicapa ema achane. Tijaranu eta majicapirohi, ánipa macahe:

—¡Nucasiñavi, tata! ¡Pímicatacanu eta néchuriasirahi eta nucasiñairavaina piyeho! —macahepa.

25 Tacahe, máimahapa ema Jesús ena achaneana tiúrujicavanaripa mayehe. Tásiha, macajachapa ema éreana, ánipa maicha:

—¡Piti váinaraji, piti péihuquiñarahi, úpahi pícha éma! Nútí nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

26 Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunijiacapa ema amaperu. Ema amaperu ticutipa máepenaquene. Tacahe, nacahepa ena achaneana:

—Tépenasamipa —nacahepa.

27 Tacahe, ema Jesús macaratavauchapa, macaechepucapa ema amaperu. Tacahe, titupihapa ema amaperu, tiúripa. Tájina máichava.

28 Tacahe, te táequenepa, náiputsiacapa ema Jesús ena máimitureana. Nayase-recapa:

—¿Tájaha tacayemahi eta vahi váratahahini vicuchucahini ema éreana mayehe ema amaperu? —náichapa.

29 Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahi tavaraha íchanumayare eta eyujarasiraina étapa eta íchiraya eta ayuna —máichapa.

*Tiápechavavare ema Jesús tímereuchava eta máepenirayarehi
(Mt 17.22-23; Lc 9.43-45)*

30 Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairiricahini ena achaneana eta nánucuirahi éna, machu nahapapiricacuaini eta máimitusiravacahi ena máimitureana. **31** Eta máimitusiravacahi, ánipa macahe:

—Nuti Manerejirunuhi ema Viya, járajapainapa eta sácheyare eta máijara-siránuya mácani achane nayehe ena ticatianacanuanahí. Ticaratacanuanayare, ticapacanuanayareva. Téhesera te mapanaquenénapa sache eta népeniraya, néchepucayare —macahepa.

32 Énasera ena máimitureana váhiquene nacaicutiarahini eta macayema-quenehi. Natsirihacapasera nayaserecahini.

*¿Nájahapuca ema apóstole ticapicahupana?
(Mt 18.1-5; Lc 9.46-48)*

³³ Tacahe, títecapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapaemaracacahi eta epaisirapahi te achene? —macahepa.

³⁴ Tásiha, vahi najicapahini, taicha vahi návarahahini náimereuchavahini eta najicapaemajircacairapahi eta nájahairayarepuca mácani ticapicahupanahi. ³⁵ Tásiha, téjacapa ema Jesús. Máichuhumuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahí ticapicahupananayare te etaracu, tavaraha náechapajircavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

³⁶ Tacahe, máichuhapa ema émana amaperuchicha. Majupacapa te nami-rahu éna. Tacahe, máichavacapa:

³⁷ —Nácani tijacapanayare ena amaperuana níchavenénahi núti, ena nani yátupi náimerecaya eta náemunasiranuhi núti taicha tímicutijircavahi nútinhahini najacapa. Taicha nácani tijacapanuanahi núti, énerichuyareva tacahehi eta najacapirahi ema Ticachichananu, ema tivanecanuhi —máichapa.

*Tímicatakahavianahi nácani vahi ticatianacahaviana
(Lc 9.49-50; Mt 10.42)*

³⁸ Tacahe, ema Juan mame tacapa, ánipa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi viúmurivainahini —máichapa ema Juan.

³⁹ Émasera ema Jesús máichapa:

—Vahi ecucavaca éma. Taicha te máichahipuca ema mácani eta tiáramicare, mámapicahi eta njare, vahi macaecahnuhini. ⁴⁰ Tímicatakahavianahi nácani vahi ticatianacahavianahi. ⁴¹ Jéhesare, nácani ticumpirachaheana eta une éti étaripa táichavenera eta étirahi nuchaneranairahehi nuti Cristo, vahi námapurujimahi. Yátupihi ticavachaequeneanayarehi éna —macahepa.

Ichape eta máicuñayare mácani tímiaquipaica te pecatu ena amaperuana

⁴² Tímiyanava eta máimituresirahi ema Jesús, ánipa macahe:

—Tacutequene mácani tímiaquipaicaya nácani ena téhicanuanahi mánsuqueneanahi. Tiúripanahipucaini tájiahúchavahini máopenahini mativainahini éma. Váhirichupucaini macucaicuñahini, taicha vahi macuimiaquipaicahini ena téhicanuanahi —macahepa.

*Ecunevaicha ichape, machu náepujuquichahé eta te yucu máemahacacaquene
(Mt 18.6-9; Lc 17.1-2)*

⁴³⁻⁴⁸ Énerichuvare máichavacapa:

—Jéhevare, te tavarahapuca táimipecaturachaheyare eta evahu, tapamisirahénapapuca íchayare eta tamauriqueneana, tiúripana eyuchatica, apaesa vahi tacuímáquipaicahe tayehe eta pecatu. Étaripa eta ívape, te tavarahapuca tamahe íchayare eta tamauriqueneana, tiúripana eyuchaticavare, apaesa vahi tacuímáquipaicahe tayehe eta pecatu. Étaripavare eta iúquiha, te támiaquipaicahepuca tayehe eta pecatu, tavarairahi támahayare eta tamauriqueneana tájiparacana, tiúripana evecuhauquichava. Taicha tiúripana eta ejacapacarehi éti eta esiapiraina eta te mávasa ema Viya, tayanapané taejiacavapuca eta iáquehe. Páurehesamisera éti, te náepujuquichahepuca eta te yucu infierno, tayanapanéni tamutuchahahini eta iáquehe. Taicha ánaqui

máemahacacaquenehi eta yucu. Máitavacaca eta ecatajivairanayare. ⁴⁹ Tacuti eta vépurarajica eta icheve eta viniru, ene nacaheyare ena tiyana te yucu, ticaepuraracasianayare tayehe eta yucu.

Vahi ecuisapa táepaha eta ecamunucarevahi

(Mt 5.13; Lc 14.34-35)

⁵⁰ Eta icheve, téavicavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehe ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tájina eta táichevevainahini. Tacuijavare tahapapicahe eta iúrivahi —máichapa ema Jesús.

10

Ema Jesús tímíturecahi, máechajisihahi mácani achane tínajicahi esu mayena

(Mt 19.1-12; Lc 16.18)

¹ Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiba tiánuecanapa eta te apachara eta cajacure Jordán. Ánaqui tiápechavanavare tiúrujmuriavana ena ichapemuriana achaneana te jácani máitecapihapahi ema Jesús. Tásiba, tímíturecavare éma, taicha tacahehi eta mayeherepihi. ² Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vivaraha pimetacahavi ¿te táuricapuca máinajica ema achane esu mayena?

³ Tásiba, ema Jesús mayaserecavarepa ema apana:

—¿Tájahasica eta tacayema eta mavanairipi ema víyarahaini Moisés? —máichapa.

⁴ Najicapapa éna:

—Ema víyarahaini Moisés másapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiba, eta máijarasirahi ésu eta juca ajureca, máinajica ésu. Tásiba, vaipa mayenainahini —nacahepa ena fariséoana.

⁵ Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayenana. Ema víyarahaini Moisés másapahi tínajicacana táichavenehi eta namuracasmurevanahi éna, vahi náimitucacarehini táicha. ⁶ Váhisera máuricahini ema Viya eta náinajicacahini. Taicha te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayarehi. ⁷⁻⁸ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa titáticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini. ⁹ Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

¹⁰ Te taequenepa, nacarichuipahivare ena tayehe eta peti náitecapihahi, ema máimitureana nayaserecapa ema Jesús tayehe eta juca máechajiriruvanahi.

¹¹ Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe.

12 Tacutiquene súcani esena, te suínajicapa ema suima, eta suviraya ema apana achane, ticapecaturaipavare ichape ésu —máichavacapa.

Ema Jesús mayujaraucha ena amuyana

(Mt 19.13-15; Lc 18.15-17)

13 Tacahe, ena achaneana námavacapaipahi ena amuyana eta mayehe ema Jesús. Navarahahi máemamahacavacayarehi éna, mayujarauchavacahivaréni. Énasera ena máimitureana vahi náisapahini. Nacaichepaicapa ena tiámanapahi ena amuyana. **14** Te máimahapa ema Jesús eta nacaichepaisirahi, tisemapa. Tásicha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi ecuaci-chepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. **15** Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranaimahi —macahepa.

16 Tacahe, majupacavacapa ena amuyana. Máemamasicavarepa, mayujarauchavacapa.

Ema achane rico téchajiricava mayehe ema Jesús

(Mt 19.16-30; Lc 18.18-30)

17 Tiuri, te apanapa sache, tiyananavarepa. Eta napaisirapahi, macahe-paipa ema émana achane. Tijunapaipahi. Matupiru máepuyumiraucha te mamirahu ema Jesús. Mayaserecapa, ánipa maicha:

—Tata maestro, piti piúriquene ¿Tájahapucaini eta nícharacavahini eta nítuji-siravaina me Viya máichecuaraquirénahini eta nítaresira? —máichapa.

18 Ema Jesús majicapapa:

—¿Tájaha tacayema pímijarechanu “Piti piúriquene”? Mararihi ema Viya. Jéhevare éma, téavicavahi eta máurivahi. **19** Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyáequeneruina. Váhivare picuvayuareca. Pipicauchayareva ena ticachichaviana” —máichapa.

20 Tacahe, majicapapa ema achane:

—Tata, tamutu eta juca vanairipiana nusuapahi nítouchahi eta námaperuvahi, puíticha juca ajairairanuipa —macahepa.

21 Tacahe, ema Jesús máimararacapa ema achane, máemunacainehi. Tásicha, máichapa:

—Jucarihichaha eta pítauchaqueneyare. Piyana, píjararecaya tamutu eta pímaqueneana. Tásicha, píjaracavacapa ena páureana. Jéhevare eta, pijaca-payare eta pímaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

22 Tásicha, témasamurerinehi ema achane taicha eta macayemaquenehi ema Jesús. Ichaperinehi eta mapanerereresirahi, taicha mavayuchahi eta macaimahaquenerah. Macatieuquenaharinehi tamutu. Tiyanachucha.

23 Tacahe, máesenicapa ema Jesús ena máimitureana natiarihiqueneanahi te machacaya. Tacahe, máichavacapa:

—Yátupiquenehi máitujana eta náijarasiravainahini eta náehisiranuinahini ena rícoana eta nasipirainahini te anuma —máichapa.

24 Ena máimitureana náramine eta nasamirahí eta máechajiriruvana. Tásicha, mápechavacapa máicha:

—Nuchichanaveana, esamanu. ¡Máitujiquenehi eta náijarasiravainahíni téhicanuana ena ticasíñanahi eta nacaimahaquenerahi! ²⁵ Eta juca tímicutijiri-cavahi eta viperá camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tásicha, náramine ena máimitureana, eta nasamirahi eta juca. Náichapa:

—¡Tétavicavahi eta tamaitujicacarevahi! ¡Nájina titújicavaimahi náuchucuhahini!

²⁷ Tacahe, máimaranaracavacapa ena máimitureana. Tásicha, máichavacapa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquénénahini ema Viya, tamutu marataha —máichapa.

²⁸ Tacahe, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

²⁹ Ema Jesús majicapavarepa:

—Nutupiruva numetacahe: Namutu nácani nanaquicahi eta napena, najunijicahivare ena ticachichana*, ena naparapenaveana, ena nachichanaveana; étapa eta nayehe apaquehe, te nanaquicahi táichavenehi eta náehisiranuhi, étapa eta námirayare eta tiúrina echajirirucava; ³⁰ tiápajucavainapa camuripanayare ena naparapenaveanayare ajairana, esenana, énapa ena náenanaveanayare, énapa ena nachichanaveanayare. Camuripanayareva eta náitsirjisiravayare. Ticatichacareanayaresera nayehe ena apamuriana achaneana. Énerichuvare níjaracavacaya eta nápechiravayare titarecana. Máihecuaraquirenapa eta náuricacarevanayare. ³¹ Maverahesera eti etiari-hiqueneanahi puiti, váhirichuhi ecapicahuhini. Te jena sácheyare, ichapepanainapa eta ecapicahuiraya. Éna puiti ticapicahuanaahi, te táitauchavapa te jena sácheyare, énapavainapa téquenehanayare —máichavacapa ema Jesús.

Ema Jesús tiápechavavare máechajisiha eta máepenirayarehi

(Mt 20.17-19; Lc 18.31-34)

³² Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa ema Jesús te namirahu ena máimitureana. Náramipaipahi éna. Natarihivare ena tipicanapaipahi. Tacahe, ema Jesús mañaji-chamuripa macaetavajimurihavarepa ena dóceana apóstoleana. Mametacavacapa eta jácani máichararacavayarehi éma. ³³ Máichapa:

—Ímaha puiti, viyanaínapaipa vicaijuheyare eta Jerusalén. Ánaqui nucaijararecasiyare nutí Manerejirunuhi ema Viya. Ticaratacanuanayare ena tuparairucana. Tímicapacanuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna. ³⁴ Ticaecahinuanayare. Tiátutuquichanuanayareva. Téstacanuanayareva. Tásicha, ticipacanuanainapa. Tásihasera, te mapanaquenénapa sache néchepucainapa te nécari —máichavacapa.

Ema Jacobo émapa ema Juan nayaseacapa ema Jesús eta macájupahávacahini éna

(Mt 20.20-28)

³⁵ Tacahe, te apanapa sache, témeñahavanapa ema Jesús ena apinana ticiparapecacana ema Jacobo émapa ema Juan. Náichapa:

* **10:29** Te jácani apanana versióneana, tatarihi te juca lista eta táchajiriruva: “ena nayenana”. Tájinaserá nalistanahini te libro antivupanahí. Eta tacahehi, vímatiequeneha vahi manacahini ema Marcos. Mácani apana achane mavejuchahipuca te Lucas 18.29.

—Tata maestro, vivaraha picatajicahavihini eta viyasearuviyare — nacahepa.

³⁶ —¿Tájaha ecamunu? —máichapa ema Jesús.

³⁷ Najicapapa éna:

—Te jena sácheyare te péjacapa te piávacureyare aquenucavirayare, vivaraha picaejacahavihivarení te pichacaya, pijupahahavinahini, véjacaini te pivaure, ema émana te sapa —náichapa.

³⁸ Tacahe, majicapapa ema Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuya-repuca eta nucamichirayare nútí? ¿Váhivarepuca epicayare ticapacaheana tacuti eta nacapasiránuyare nútí? —máichapa.

³⁹ Ena najicapapa:

—Viratahayare vicamicha. Váhivare vipicaimahi.

Tásicha, máichavacapa:

—Yátupi ichape eta ecatajivairaya, vicuticacaya eta nacapasirahaviyare.

⁴⁰ Étapasera eta nucaejasiraya ena nujupahanayare, vaipa nútimaхи necha. Ema Tata Nucaiyaquene, é mahi tinerejicayarehi éna nujupahanayare —máichapa.

⁴¹ Tacahe, te náechapa ena apamuriana apóstoleana, tisemamajuheanapa nayehe ena apinana. ⁴² Tásicha, máichuhumuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavananairipira. Énaripa ena tuparairucana, tétaovicavahi tisuapacareanahi eta nacavacurerahi. ⁴³ Váhisera ecuache éti nayehe ena echamuriana. Mácani tímerecavahi ticapicahupana, tacamuñuhi máitátivacayare ena apamuriana. ⁴⁴ Te etiarihivarepuca éti evarahahi ínapuca, tacamuñuhi ímerecavayare navanaraheyare ena echamuriana. ⁴⁵ Ecuitinuyare nuti Manerejirunuhi ema Viya. Vahi étaina tímitecanu nucaitaticasihini. Nútiyarehi nítatihe éti. Énerichuvare níjaracavayarehi nímicapacava íchaveneyarehi éti camurique-neanaya nucuchucureanayare —máichavacapa.

*Ema Jesús macaimairirica ema púchuqui ticaijare Bartimeo
(Mt 20.29-34; Lc 18.35-43)*

⁴⁶ Tiuri, títecapanapa eta te avasare Jericó. Te apanapa sache tiyananayarepa. Náehicapaipa ena camuriqueneana achaneana. Te achenechacaya, matiarihihi ema achane púchuqui. Ticaijare Bartimeo, machicha ema Timoteo. Téjacahi tiyaseserecahi limosna. ⁴⁷ Te masamapa eta mánucuirapahi ema Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni!

⁴⁸ Tacahe, nacavacapa camuriana ena natarihiqueneanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuini! —macahepa.

⁴⁹ Tacahe, tíchepaicapa titupihapa ema Jesús. Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumechava! Péchepuca, taicha tíchuhavipa ema Jesús —náichapa.

50 Eta mananesirahi ema púchuqui, macamiricapa eta máepacuha. Téchepucapa, tiyanapa mapauchahi ema Jesús. **51** Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehe?

Majicapapa éma:

—Tátachicha, nuvaraha picaimairiricanupaini —macahepa ema púchuqui.

52 Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macachanepaipa ema Jesús eta mapaisirapahi te achene.

11

*Títecápapa ema Jesús eta te Jerusalén
(Mt 21.1-11; Lc 19.28-40; Jn 12.12-19)*

1 Tacahe, te apanapa semana tiyananavarepa. Tétavajicanaya tayehe eta avasarechichana ticaijare Betfagé étapa eta Betania, te tachacaya eta cerro ticaijarehi Olivoquiji. Tiánehanapa eta te Jerusalén. Ánaqui, ema Jesús mavanecapa ena apinana máimitureana. **2** Ánipa máicha:

—Eyanayare eta te jena avasarechicha Betfagé. Te ítecapapa ánaqui, ímahayare ticaitihahi eta burrico. Eta jena sárare mávaequeháchaha. Nájinaichaha ticaperainahi. Evejapuacayare, iáminanuyare eta ani. **3** Te natarihinapuca náeñama, emetacayare eta nucamunuirahi nútì. Vahi tayeréimahi vímichavavaneyare —máichavacapa.

4 Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, naveja-puacapa. **5** Náichapasera ena ticayeheana:

—¿Tájaha tacayema iámayare eta viyehe burrico?

6 Tacahe, najicapapa éna, nametacapa eta máimiturapihi ema Jesús. Tásiba, náisapapa eta námirahi eta burrico. **7** Tacahe, te títecapanapa te mávihahi ema Jesús, náepacamaequechapa eta náepacuhana. Tásiba, ticaperapa ema Jesús.

8 Tacahe, tiúrujicavanapaipa ena achaneana. Camuriana éna tiácapanahi, náepacapaicapaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene. **9** Ena tínapumirauchanapaipahi énapa ena téquenehanapahi, namutu tipiaracanapaipa. Ánipa nacahe:

10 —¡Yare, Tata! ¡Píti yátupiquenévihi Cristo, réyvihi viyehe! ¡Asulupaya! ¡Vanairucaquenévihi píti me Viya! ¡Ichape eta vicunachiravi píti! ¡Asulupaya me Viya te anuma! ¡Viva ema Viáquenu! ¡Viva! —nacahepa.

11 Tacahehi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cárerehichicharipa.

*Ema Jesús májiquiha eta yucuqui ticaijare higo taicha máhirquirehi
(Mt 21.18-19)*

12 Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús. **13** Eta máimairahi tiyerehi eta étana yucuqui ticaijare higo. Ticainapucavahi ticápácaji. Tacahe, ema Jesús tiyanapa máimahapana te ticahihipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini. **14** Tacahe, máichapa ema Jesús eta higo:

—¡Piti pépiyainapa eta máhiriquireviyare! —macahepa.
Nasamararacahi ena máimitureana.

Ema Jesús macuchuchujicavaca ena tíjararecanahi eta sárareana, cágureana te tajuhe eta Templo

(Mt 21.12-17; Lc 19.45-48; Jn 2.13-22)

¹⁵ Tacahe, te títecapanapa te Jerusalén, tiyananavarepa eta te Templo. Máimaharinehi ema Jesús ena achaneana tíjararecanahi eta sárareana, cágureana. Ena apamuriana tivacharecanahi. Natarihivare ena títsiriperecarahiana eta taplataneana eta apanapane avasareana. Tásiha, macuchuchujicapa namutu. Máequehepuichinavacapaipa eta namesarana étapa eta nasiyana. ¹⁶ Nájinavare másapaquenénahini eta nánucuhahini eta canchón tayehe eta Templo, námapahini jácani eta náijarareruanahi. ¹⁷ Tásiha, máimitucavacapa ena natarihiqueneanahi. Ánipa máicha:

—Ema Tata Nucaiyaque, ani macahehi eta máechajiruvahi te Sagrada Escritura: “Eta nupena tacarichu táicuchihi eta nayujarasirareya ena achaneana tiásihana te tamutu avasareana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichapa.

¹⁸ Ena ticatianacanahi ema Jesús, te nasamairicapa eta juca máechajiruvanahi, tisemanapa. Tásiha, natanucapa eta jácani náicharasirayare eta náimicapasirayarehi éma. Taicha napicarinehi éma, taicha náimahahi tétagcavahi eta masuapacarevahí eta nayehe ena achaneana.

¹⁹ Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

Tiájiriquipa eta yucuqui higo

(Mt 21.20-22)

²⁰ Tacahe, te yáticarahipa, eta nachaviravarepa eta te Jerusalén, náetavicapaipahivare eta yucuqui higo. Náimahainehi tiájiriquipahi éta. ²¹ Tacahe, téchavapa ema Pedro eta máechajiruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajiriaruhi!

²² Majicapapa ema Jesús:

—Ácasiñava yátupina eta me Viya. ²³ Jéhesare, éti apana esamacareyareva, te yátupina eta écasiñavairaina eta me Viya. Tájina émaitucaimahi. Eratahayareva ecayejeca eta cerro te apachacaya, tájina iávamirahuimahi te esamureana.

²⁴ Tacahe, numetacahe eta juca: Te eyaseacapuca ema Viya eta jácani, ecasiñava mayehe. Vahi ecueñamava eta ejacapirayare. Tásiha, tíjaracahéna éma tamutu eta eyasearuanaya. ²⁵ Énerichuvare, eta eyujarasiraina, esperdonacha éti nácani náejecapavaquenehi eta eyehe. Esperdonachavaca apaesa maperdonachahevare eta éjecapiravana ema Tata Ecayaque, te anuma.

²⁶ Téhesera vahi esperdonachahi, váhivare tiperdonachahemahi eta éjecapiravana ema Tata Ecayaque, te anuma —macahepa ema Jesús.

Nayasereca ema Jesús nájahahipuca tituparacahi éma

(Mt 21.23-27; Lc 20.1-8)

²⁷ Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena ticatianacanahi éma. ²⁸ Nayaserecapa éma, ánipa naicha:

—Piti, vahi vitupararuvinahini víti eta píchirahi eta júcana. ¿Nájahasica tímitucavihi? ¿Nájaha tituparacavianahi eta juca píchaqueneanahi? —náichapa.

29 Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. **30** ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

31 Váhisera náiteturuequenehahini eta najicapiroayarehi. Tiácpaemajiricanapa, ánipa nacaehe:

—¿Tájahasica vicayemayare eta vijicapiroayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiba, ¿váhiyapa esuapahini éma?” **32** Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapiroayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya. **33** Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

12

Ema Jesús máimicutichina ena pártiráioana máurirahana

(Mt 21.33-46; Lc 20.9-19)

1 Tacahe, tépanavavarepa tímitureca eta juca máimicutichaquenehi. Ánipa macahe:

—Matiarihi ema achane. Camuri eta máevaru uva te máesane, manaruacahivare eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiba, máijaracapa ena achaneana, pártiráioanayarehi. Taicha tiyanayarehi ema achane te apana avasare. **2** Tacahe, te tiyahapa eta uva, máimivenererecapa ema manusura mayaseapanavacayarehi ena pártiráioanahí etatatucachaqueneyarehi éma. **3** Énasera ena pártiráioana tisemauchavaranrichucha. Nacaratacapa náehapa ema vanairucahi. Tichavapa éma, tájina náijaracahini. **4** Tacahe, tiápechavavare mavaneca ema apana manusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi. **5** Tacahe, ema achane mavanecavarepa ema apana manusura. Tásiba, ena pártiráioana nacapacapa éma. Vuíchasera masemahini ema achane. Ticayehehi paciencia. Máimivanerecapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

6 Tacahe, matiarihichahasera ema apana mavaneruyare. Émajacaruvapa máevataca ema machicha máemunaruquenehi. Máimijachaipahi émainahipucaini napicauchahini. **7** Énasera ena pártiráioana, te náimahapa ema machicha ema achane, ánipa nacaehe: “Émainapapuca ticayeheyare ema maca. Yare, vicapaca éma apanavare, apaesa tánasipa viyehe tamutu. Tájina máicharacahavimahi ema achanelenavaji” nacahepa. **8** Tacahe, nacaratacapa ema machicha. Nacapacapa éma, náquijicapavarepa eta máquehe te aneca tayehe eta úvaquiji.

9 Puiti, nuyaserecaheyare: ¿Tájahapuca máicharacavacayare ema achane ticayehe eta úvaquiji? Jéhesare, vaipa macayehehini paciencia. Títecavanénapa

macapapanavacayarepa ena pártilarioanahi máurirahanahi. Tásiha, máijara-cainavarepa eta úvaquiji ena apamuriana pártilarioanayareva.

¹⁰⁻¹¹ Nuvaraha epanerechapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihi. Émasera ema Viya macaitecapa eta te táicuchihi eta tatuparahahi. Tacapicahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya – máichavacapa ema Jesús.

¹² Tacahe, ena ticatianacanahi ema Jesús, eta nasamirahi, tisemanarinehi taicha tímaticavananapa eta énairahi tayunacavaca eta máimicutichiravacahi. Eta nasamirahi, tisemanarinehi. Navarahapa nacaratacayarehíni. Tipicacavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táicharacavaya eta nacaratasi-rayare éma.

Navaraha náemejecapavacha ema Jesús tayehe eta impuesto

(Mt 22.15-22; Lc 20.20-26)

¹³ Tacahe, ena ticatianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natarihi ena tinerejicavanahi ena fariséoana. Natarihivare ena políticoana. ¹⁴ Te náitecapauchapa, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Vahi pipicacaracavahini eta péchajisihairahi eta náichavaquenevahí nácani achaneana, tayanapanepuca aquenucahi. Taicha pivaraha náehicahini namutu eta táurinaquene achene ticaijuhe me Viya. Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahávihi ema Viya, ¿masi? —nacahepa.

¹⁵ Máimativanehisera ema Jesús eta apimirairavacahi éna, navarairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquipaicanu? Nímahaseji, iáminanu étapena eta reale —macahepa.

¹⁶ Éna náijaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

¹⁷ Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhí éma. Tásiha, íjaracavare ema Viya eta mayeherichuhivare éma — máichavacapa.

Te nasamapa ema Jesús eta majicapiravacahi, náramipa eta máitupajijiasi-ravahi.

Nayasereca ema Jesús náichararacavayarepuca ena náepenaqueneana eta náechepusirayare

(Mt 22.23-33; Lc 20.27-40)

¹⁸ Nacahepaipavare ena apamuriana achaneana. Saducéoanahi. Ena nani saducéoana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Ánipa nacahe:

19 —Tata maestro, ema víyarahaini Moisés manaquequicahi eta ajureca máechajiriruvahi eta viyehe: “Te máepenaequenehahipuca ema achane esu mayena, tásicha, nájinahipuca manaquequeneruvainahini machichainahini, te matiarihihipuca mácani maparapehi, mavehayare esu machine-naequenéni, apaesa émainapuca macachicha eta suyehe, máitsivainahini ema maparapeni”. **20** Tacutiquene te natarihihipuca ena siétequeneana ticaparapejiricacana, te títauchavapa ema náechavimuri. Máepenaequenehapasera esu mayena. Nájinahi machichainahini. **21** Tacahe, ema maparape máitauchavare esu machinena. Énerichuvaresera máepenaequenehavare, nájinavare machichainahini. Ema émana maparape máitauchavare ésu. Énerichuvare máepenaequenehavare. **22** Namutu ena siétequeneana navehahi ésu, tásihasera náepenaequenehapaichucha, nájinaquene émanainahini mácachichahini eta suyehe. Te táequenepa, tépenapa esu esenaini. **23** Tacahe puiti, te apanapapuca eta náitaresirayare ena nani, ¿nájahapuca ena siétequeneana éma yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

24 Tásicha, ema Jesús majicapavacapa:

—Éjecapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi marataha ema Viya. **25** Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini. **26** Éti, váhivarepuca ácaicutiara eta yátupirahi eta vahi táepenahini eta náchanevana ena náepenaequeneana. Váhipuca ácaicutiara eta máechajiriruvana ema Viya májuchaqueneanahi ema víyarahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Nútira yátupique-nenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya. **27** Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, tímiyanavanarichucha titareca te mamirahu éma. Éti, ichape eta éjecapiravahi —máichavacapa ema Jesús.

*Eta tisuapacarepanahi te mavanairipiana ema Viya
(Mt 22.34-40)*

28 Tacahe, matiarihihivare ema émana escribáno. Masamararacahi eta nacanarajirisiracacahi. Máimativanepa eta táurivahi eta majicapiroahí ema Jesús. Tásihasera, tíjaracavahi mayasereca ema Jesús, ánipa maicha:

—Tata, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

29 Majicapapa ema Jesús:

—Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esiñarajina. **30** Tásicha, yátupina eta émunasiranuina nuti Iáquenu, táunasiraina te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”. **31** Jararihivare eta apana táchiruhi eta juca, ánivare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tasuapacareva tamutu eta apamuriana vanairipi-ana —macahepa ema Jesús.

32 Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihi eta macarichuirahi ema Viáquenu, eta nájinairahi apanainahini Viáquenuinahini. ³³ Yátupihivare tavaraha eta vémunasiraina ema Viáquenu, étapa eta viúnasirayare te visamure, étapa eta vapanerechiraina eta máimiturapiana tamutu sácheana, étapa eta vicaemataneasiraina éma te tamutu eta vítupajijisiravana, étapa eta vémunasiraina ema viparaepiyahi. Jéhesare, eta táuriva eta vémunasirahi táetavicali etá táuriva eta víjaracasichira eta sárareana eta víjuchaqueneana eta me Viya. Táetavicalivare tayehe eta táuriva tamutu eta apamuriana viámavahuana eta me Viya —máichapa ema escribáno.

³⁴ Ema Jesús máimatiéquenehapa eta táuriva eta majicapira ema achane. Tásicha, máichapa:

—Píti piánehi eta píjarasiravaina eta péhisirayare ema Viya —máichapa. Tacahe, nájinapa nájjaracavahini nayaserecahini ema Jesús eta náemejecapavachirayarehi éma.

*Ema Cristo, yátupihi mámariéquenénihi ema rey David, Víyahivare éma
(Mt 22.41-46; Lc 20.41-44)*

³⁵ Tacahe, ema Jesús tímiyanava tímiturecahi, eta máejasirahi eta te Templo. Ánipa macahe:

—Ena escribánoana, ani tacahehi eta náimiturapiana: “Tiúchucayare ema Cristo, mámariequeneyare ema víyarahaini rey David” nacahehi. ³⁶ Yátupihi ema Cristo achanequenéhi eta máimahi taicha mámariéquenénihi ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: “Ema Viya máichapa ema Tata Náquenu Cristo: Yare péjaca te nuvaure, eta picuchapihayare eta nucaepuyusiraya te pimirahu ena tictorianacavianahi” macahepa. ³⁷ Ema David, eta máimijarechirahi ema Cristo, “Tata Náquenu”, ¿tájahapuca eta macayemaqueñehi? Núti németeaca Víyahivare ema Cristo. ¿Tájaha íchahi éti? —máichavacapa.

Ena camuriqueneana achaneana náuricahi eta nasamararaca eta máimiturapiana ema Jesús.

*Ema Jesús máimereuchavaca eta náejecapiravana ena escribánoana
(Mt 23.1-36; Lc 11.37-54; 20.45-47)*

³⁸ Tímiyanavahi eta máimituresirahi ema Jesús, ánipa macahe:

—Échapavayare éti, machu éhica eta nayeherepiana ema escribánoana taicha tétavicavahi eta apimiranairahi éna. Tétavicavahi eta náurisirahi éna tiúmajihána, navarairahi ticunachacareanayarehi nayehe ema achaneana eta nareligiósovanahi. Navarahavare ticapicahuanayarehi eta náechajisiraya ema achaneana te jácani nácapajisihapahi éna. ³⁹ Tacutiquene tinerejiurucavana eta táurinaqueneana téjasihacareana, te tiyanana te viúrujisirarevana. Étaripa te nanisirana, ticaejacavanavare te jácani tiávihanahi ema tiúrinisipana tinicacare. ⁴⁰ Tacutiquene naverejicavare eta nacayehaqueneana ema tépenaimana, nájina najapanuquenéna. Tásicha, tépiyacavanapa religíosoanahi, tiúpiemána eta nayujarasira, namavarairahi tácaecherahini eta náichiraqueneanahi eta tamauriqueneana. Énasera tiápajucavanahi eta náicuñayayare muraca —macahepa ema Jesús.

*Eta sunaquiruva esu máimaru tacachuricahi eta nanaquiruvana ena apamuriana achaneana
(Lc 21.1-4)*

⁴¹ Eta máejasihahi ema Jesús, mávihahi te tamirahu eta chapamana eta nanacacuirarehi eta plata námavahuana ema achaneana. Máimrararaca ema

camuriqueneana eta nanacacuira eta námavahuana. Natiarihihí ena rícoana, tinaquicavanapahi eta ichapemuripanavaca. ⁴² Tacahe, títecápapa esu esena suépenaimaqueña, páurehi ésu. Sunaquicahí eta apipechichahí eta suplatane, váhirichu tasivachahini. ⁴³ Tásiha, ema Jesús, eta máimairahí eta juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahí ema Viya. Jéhesare ésu, tímepanávahí eta sunaquiruva, sucachuricavacahi namutu ena apamuriana achaneana. Ichaperinehi eta sucunachacarevahí me Viya. ⁴⁴ Taicha namutu éna, tacarichu nanaquicahí eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunícavachayarehíni —máichapa.

13

Ema Jesús máimereucharipa eta táquipaisiravaya eta Templo (Mt 24.1-2; Lc 21.5-6)

¹ Tacahe, tiyanayarehini ema Jesús, énapa ena máimitureana. Eta náuchusiraya tayehé etá Templo, máichapa ema émana máimiture:

—¡Tata maestro! ¡Pímaha etá juca máriana! ¡Tétavicava etá táichapeva! ¡Tétavicava táurinava etá juca peti! —macahepa.

² Ema Jesús majicápapa:

—Tamapuruiyare etá juca táurinava etá pétisami ímahaquenehi puiti. Nutupiruva numetacahe: Járabajapare etá sácheyare ticaquipaicasiyare tamutu etá juca Témplosami. Téjanerepaicainapa tamutu etá juca táurinaqueneanahi ímahaqueneanahi puiti —máichapa.

Tatiarihiyare etá ecutiarareanaya te tánehipaicha etá táichecuiraya (Mt 24.3-28; Lc 21.7-24; 17.22-24)

³ Tacahe, tiyananapa etá te cerro ticaijare Olivoquiji, távihahí te apacharahí etá te tatavarapihi te tamirahuhi etá Templo. Te téjakanapa nacarichuhí etá te jena quinta, nayaserecapa etá macayemaquenehi. Matiarihi ema Pedro, émapa ema Jacobo, émapa ema Juan, émapa ema Andrés. Ánipa náicha:

⁴ —Vivaraha pimetacahavi. ¿Tájamuhupuca etá náimiaquipaisirayare etá Témplosami? ¿Jararihiyarepuca etá ecutiarareyare te tánehipaicha etá títachiravayare etá apana péchajisihaqueneana? —náichapa.

⁵ Tacahe, majicápapa ema Jesús:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayare nuyehe. ⁶ Nacaheyarepahi éna: “Nútiripa Cristo”. Nasapiha, navayuacayare ena camuriana achaneana.

⁷⁻⁸ Énerichuvare esamairiricayare etá táehacacairayare etá ichapequeneana avasareana. Ticanarajircacanainapa etá te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca etá esamairirisraya, taicha ene tacaheyare etá títapaniravayare etá ecutiarareanayare. Vuíchahasera étaimahi etá táichecuirayare. Énerichuvare tatiarihiyareva etá ichape tayamurisiranaya etá apaquehe te jácani távihanaya títupiaruanayare. Tatiarihiyareva etá ichape ecuhamuhuyareva te jácani avasareana. Ichape etá nacatajivairayare ena achaneana. Tamutu etá juca ecutiarareanayare etá títapaniravayare etá nátajivanayare ena achaneana.

9 Tásihasera eti nuchaneranahi, ecuneuchavayare, étumechavayare. Taicha natiarihiyare ena tictorianacaheanayare táichavenehi eta éhisiranuhi. Ticaratacaheanainapa, ecayaseserehinapa nayehe ena juéseana. Téstacaheanainapava eta te nárujisirarevana. Tásicha, etiarihiyare éti tiámaheanaya te namirahu ena aquenucana, téhevare te namirahu ena Presidenteana go-biernoanahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare. **10** Énerichuvare, éti nuchanerana ecametarairuyareva eta tiúrina echajirirucava nayehe ena achaneana tayehe tamutu avasareana te juca apaquehe. Te ítecapapa te tamutu, tépanavayarehi eta táchecuirayare. **11** Tacahe, te jácani nacaratacahe-papuca, námahe te namirahu ena aquenucana, vahi ecueñamava tayehe eta jácani échajichiravayare, ecatiuchiravaya. Échajisihaya eta échajirirucavana máijararuheyare ema Espíritu Santo te jena sache. Taicha máimahaheinepa. Tíjaracaheyare eta ítusirayare échajica. Vahi étijivaimahi eta échajisiraya.

12 Natarihiyareva nácani achaneana tíjararecanaya ena naparape-queneana, navarairahi náimicapaca táichavenénahi eta náehisiranuhi nútì. Natarihiyareva ena nácani náiyana, navarahayareva náijarareca ena nachichanaveana táchevenehi eta náehisiranuhi nútì. Natarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi nútì. **13** Namutuyaréni ena achaneana tictorianacaheanayare táichavenénahi eta éhisiranuhi. Téhesera ecamichahi tamutu, ímiyanavahi eta éhisiranuhi te tátavapa tamutu, nútì nucuchucuhahayare.

14 Numetacahevanevare eta apana. Járabajapayare eta sache táiñehique-neyare. Tímerecavayare ema achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamuñuhi ticaravahuyare eta májurehi ema víyarahaini profetaini Daniel.) Tásicha te ímahapa eta juca, esamairicapuca, tauricapa etátájipa ejunavane, eti etiarihiqueneanahi te Judea. Ecaijuheyare eta te cérrroana, étaina eyumu-rusiavaina. **15** Nácani tiávihanahi te nayehe canchón te nasamairiricapa eta juca téchacarehi, tauricapa najunavane. Vaipa tauricahini nasiapanumahi te napenana, navehahini jácani náeñamaqueneanainihi. **16** Nácani tachimarruanayare te vámahi eta téchacarehi, tauricapa vaipa nacuchava tayehe eta avasare, tayanapane náeñamahi eta nayereruvana. **17** ¡Páureanasami nácani esenana tachimarruanayare nácani ticajarianahipuca, nácani ese-nana ticachichanahi eta amuya tiájicachaha! **18** Eta tacahe, eyaseacayare ema Viya tacuija táchejicahe; váhivare tacuchimaracahe eta ichape tiquiva te achene te eyanapapuca ejuna*. **19** Te jena sácheinayare, téavicavayare eta nacatajivairayarehi ena achaneana. Tájina táchutimahi eta táiñehivayare eta nacatajivairayare, te taepeñiravahi eta máepiyasirahi ema Viya eta juca apaquehe. Te taequenenapa eta tñehiyare, tájinainapa táchutimahi. **20** Nájina tacaitiruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuque-neanahivare. Taicha te vahi macucaicheca ema Viya, máitamuriyahipucaini macapapajicavaca namutu ena achaneana ema maca achane.

21-22 Énerichuvare te tñehipaicha eta juca, natarihihina ena tivayu-rahiana tépiyacavanayare Cristo tímivasichavainapuca nútì. Natarihivare

* **13:18** Ema Jesús máechajisihahi eta ticasarahimuhu, tiquivamuhuhivare te jena mávasa Judea taicha ticajeraequenehi eta napaisirahi.

ena tímicutijiricavanayare profetana mavaneruinahini ema Viya. Áninapa nacaheyare: "Yare, éhicayare ema Cristo. Matiarihipahi te juca vitaracu". Ena apamuriana ánívare nacaheyá: "Náepiyahiraivahi éna. Ema Cristo mávihahi te viávasa víti". Étisera vahi ecusuapavaca. Eta navarairahi tivayuacaheanaya eti machanerana ema Tata, náiteturuequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare. ²³ Tásicha, ecuneuchavaya nayehe. Numetacahevanehi puiti apaesa écharipa —máichapa.

Eta machavirayare ema Manerejiruhi ema Viya

(Mt 24.29-35, 42-44; Lc 21.25-36)

²⁴ Máichavarepa ema Jesús:

—Te jena sácheinayare te táequenénapa eta jena nacatajivairayare ichape ena achaneana, eta sache témaheinapa, étaripa eta caje váipavare tijarahimahi. ²⁵ Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa. ²⁶ Nupaenumavainapa níteca nuchava núti Manerejirunuhi ema Viya. Namutu tímahanuanayare eta núcupsirayare. Tiámanuinapaipa eta úcaji. Tétavicavayare eta nujaraivayarepahi, níñehinapaipa. ²⁷ Tacáhe, nuvanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani návihahi.

²⁸ Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemu-huirayarepa. ²⁹ Ene tacáhehi, te ímahayarepa tacaecherapa eta júcana ecutiarareana, ímahayarepa eta tanehirainapa eta nuchavira. ³⁰ Numetacahevanecha: Vuíchaha titávanaimahi ena achaneana náitareruanaichaha te táitecapapa eta júcana ecutiarareanayare. ³¹ Títavainapa eta anuma étapa eta apaquehe. Tativayaresera títauchava tamutu eta numetaruheanahi.

³² Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucaini néchahini. Macarichu ema Tata, éma téchahi.

³³ Eta tacáhe, etsecavahi ecaunehivare éti, eyujarauchavayareva. Taicha vahi echo eta tájamuhuyarepuca eta nítesirayarepa. ³⁴⁻³⁶ Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, máijaracavaca namutu ena mamusurana eta náemataneana, matuparacavacapa eta najaneasirayarehi tamutu. Tacáhe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca timapicucuhipa, téhepuca enumuhu yati, téhepuca tijararahiyarepa, téhepuca yáticarahi. Ene ecaheyare éti. Ecauneya machu níjahúchava nítecapauchahe, machu nuchimaracahe ímacaruhí. Taicha vahi échaimahi tájamuhupuca nítecicapayare nuti Iáquenu. ³⁷ Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu —máichapa ema Jesús.

14

Napanerechaipahi ena tuparairucana eta nacaratasisirayare ema Jesús

(Mt 26.1-5; Lc 22.1-2; Jn 11.45-53)

¹ Tacáhe, apinarinecha sache eta piesta ticaijare Pascua, eta náepanavaira eta semana eta nanisirahi étachucha pan mayehere levadura. Tacáhe, ena tuparairucana énapa ena escribánoana navarahaipaicha náimicapaca ema

Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana. ² Ánipa nacahe:

—Vuíchaha vicucarataca éma achichu juca piéstairaya. Taicha camuriana-yarehi ena achaneana, machu tájahapuca náicharacahavi taicha navaraha-yarehi nacatiucha éma. Vicuchapa nayananuma —nacahepa.

*Esu esena tiámasichahi ema Jesús te táijiyeamaquene perfume
(Mt 26.6-13; Jn 12.1-8)*

³ Tacahe, ema Jesús tiyanapa tichava eta te avasarechicha Betania. Máichuhaquenehi eta mananisiraya mayehe ema achane ticaijare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticaijare nardo eta juca tíjiyeama amairiama. Táetaviuchahi eta tasivachavahi. Supauchapa ema Jesús. Suvechujihapa eta bótechicha, tásiha, suépusasicapa eta táijiyeamaquene perfume. ⁴ Natiarihisera ena váhiquene náuricahini eta suémepruresirahi eta tasivachaquene perfume, suámasichirahi ema Jesús. Ánipa nacahe:

—¿Tájaha tacayema suémeprureca eta juca tasivachaquenehi perfume? Tiúripanahini víjararecahini eta juca táijiyeamaquenehi. Vivehahini eta camuriquene plata, tásiha, vímicatasihahini ena páureana. ¡Máechemarairahahi esu suca esena! —nacahepa.

⁵ Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihi éti esu suca? Tétavicava eta táuriva eta suíchiranuhi. ⁷ Ena páureanasami, támputuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe. ⁸ Esu suca suíchahi eta suímirataharuvahi. Eta juca suépusahasiranuhi eta juca perfume. Sucainapucahi ésu eta suíjiyechirahi eta náquehe tayeheyarehi eta nucaecarasirayare. ⁹ Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasi ema Jesús
(Mt 26.14-16; Lc 22.3-6)*

¹⁰ Tacahe, tiyanapa ema Júlasi, émarichuhi nachamuri ena dócequeneana apóstoleana. Mapauchapa ena tuparairucana, téchajiripanava eta máijara-resirayare ema Jesús eta nayehe. ¹¹ Tacahe, tiúrisamureanarine ichape eta nasamirahi eta mavarairahi máijararecayare ema Jesús. Tásiha, nametacapa eta náijarasirayarehi eta plata. Tásiha, jéhevarepa ema Júlasi matanucaipa eta máicharacayarehi eta máimicaratirasirayarehi ema Jesús.

*Ema Jesús máenimurihapa ena máimitureana
(Mt 26.17-29; Lc 22.7-13; Jn 13.21-30)*

¹² Tacahe, títecacapa eta piesta Pascua, te tépanavahi eta semanahi nanicahi eta pan mayehere levadura. Étarichuhi eta sáche nacapashahi eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácajuhe eta vétupirisiava eta vinisirayare eta uvesachicha eta viyeherepi? —nacahepa.

¹³ Tacahe, mavanecapa ena apinana máimitureana. Máichavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma. ¹⁴ Eta te peti

masiapihayare, éti apana esiapayareva. Tásiha, emetacayare ema ticayehé eta petí, ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹⁵ Tásiha, éma tímechahénapa eta ichape cuarto te anuquehe piso. Táuriquenéipahi eta jácara téjasihacareana, tacaetupirihiquieripa. Tásiha, étupiricapa eta viniruyare eta ánaqui —máichapa ema Jesús.

¹⁶ Tacahe, tiyananapa nacaijuhe te Jerusalén ena apinana vanairucana. Jéhesareinehi náimahapa étapaichuhí eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

¹⁷ Tacahe, te yátipa títecápapa ema Jesús macachanepaipa ena apamuriana apóstoleana. ¹⁸ Eta náejasiraripahi tinicanaripa, máichamuripa éna ema Jesús:

—Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

¹⁹ Tacahe, ichaperinehi eta máimipanereresiravacahi éna etá juca máichiravacahi. Nayaserecapa ena émanapachu, ánipa náicha:

—¿Núticupuca jácani? —macahepa ema émana.

—¿Núticupuca? —macahevarepa ema apána.

²⁰ Tacahe, majicapapa ema Jesús:

—Ema émana te etaracu etí dócequeneana. Mácani néniruyare eta pan néchipaejiruhi te juca nucuruja, émara ema tíjararecanuyare. ²¹ Nuti Manerejirunuhi ema Viya, étapaichuhí eta nacapasiranuyarehi, títauchavayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripanaichuhini te vahi macuchucahini te sujuhe esu máena! —macahepa.

Ema Jesús máimereuchahi eta macaejasiraya eta arairu matratune ema Maiya

(Mt 26.26-29; Lc 22.14-20; 1 Co 11.23-26)

²² Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa máijaracavacapa ena máimitureana. Tacahe, máichavacapa:

—Eta juca néche. Enica —macahepa.

²³ Tacahe, mavehavarepa eta vasu náerirare, mahasulupayachavarepa ema Viya. Tásiha, máijaracavarepa ena máimitureana. ²⁴ Te náerapaipahi, máichavacapa:

—Eta juca eta nítine. Éta táepusairuvayare étarichuvare táicutiarayare eta nufirmachiraheyare eta arairu matratune ema Vicaiyaquene, nucaejasirayareva eta matratune apaesa ejacapacare mayehe, ichapemurivayarepahi éti. ²⁵ Jéhesaréinehisera, numetacahe: Vaipa nápechaváimahi nérahivaréni eta juca tachi eta uva, tiámainucava te títauchavapa eta nusiapiraya eta nucavacureiraya, nucajupahairaya ema Tata Nucaiyaquene. Te jena sache, níjara-caheya vérainapa eta aramaruama —máichapa.

Ema Jesús máimereucha ema Pedro tépiyacavayare vahi máimati ema Jesús

(Mt 26.30-35; Lc 22.31-34; Jn 13.36-38)

²⁶ Eta náitanesirapa, tijiranapa eta jirasare eta nahasulupayachirahi ema Viya. Te titapiricanapa, tiúchucanapa, nacaijuhepa eta te huerta Getsemani tíávihahi eta táemiripaisinehi eta cerro ticaijare Olivoquiji. ²⁷ Eta napaisirapahi, máichavacapa ema Jesús:

—Puiti juca yati ejunijicanuyare emutu éti, taicha epicayare eta náicharasiranuyarehi. Tásiha, títauchavayarehi eta máechajiriruvahi ema Tata etá

te Sagrada Escritura: “Nísapayare nacarataca ema Pastor, nacapasiraya-resami. Tásicha, tijunaracanainapa eta uvesana macurujiruanainihi” maccáhepa. ²⁸ Téhesera te néchepucapa te nécari, nínapucainapa nuyanainapa te Galilea. Ánaqui nucuchapiaheyare éti —máichapa ema Jesús.

²⁹ Émasera ema Pedro máichapa:

—Tayanapane, Tata, najunijicavipuca ena apamuriana, nútisera vahi nujunijicavimahi —máichapa.

³⁰ Ema Jesús máichavarepa:

—Nutupiruva numetacavi pítisami Pedro: Puiti juca yati, te apíhénapa eta táchajisirayare eta varayu, mapache eta pépiyasiravayare vahi pímatinu —máichapa.

³¹ Ema Pedro tijaranurusi eta majicapiroha. Ánipa macahe:

—Tayanapanepuca pímicapacanu, váhiquenesera népiyacavaimahi vahi nímativi, váhivare nínajiacavimahi —máichapa.

Étarichuhivare tacahehi eta náechajiriruvahi ena apamuriana máimitureana.

Ema Jesús tiyujaraca te Getsemaní

(Mt 26.36-46; Lc 22.39-46)

³² Tacahe, títecapanapa eta te quinta Getsemaní. Tacahe, máichamuripa ena máimitureana:

—Éjacaichaha eta ani te juca. Ecuchapanuchaha. Núti nuyujarapanayare —máichapa.

³³ Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaquené-vayarehi. ³⁴ Tacahe, máichavacapa éna:

—Tétavicava eta taeñamirava muraca eta nusamure. Tavaraha ticapacanu. Ánasichaha ani te juca. Váhisera ecuimaca. Ecuneuchanuhi —máichavacapa.

³⁵⁻³⁶ Tacahe, tipaipanapa ánaquipanachichahi éma. Tiáquipaicavapa eta te apaquehe. Eta mayujarasirahi, ánipa macahe:

—Tátachicha Nucaiyaque, píti pirataha tamutu. Picatajicanupaini. Váhini tacuitauchavaini eta níchavaquenevayare. Váhini picuisapaini eta nucata-jivairaya. Níjaracavasera núti eta nítauchiraya eta pivarahaquenehi píti —macahepa.

³⁷ Tásicha, téchepucapa. Tichavapa eta te návhahi ena máimitureana. Máimaharinehi éna, tímacanarichucha. Máichapa ema Pedro:

—Piti Simón, ¿pímacarichucha? ¿Tájaha tacayema pímacahi? Váiparinehi pímicatacanuhini pijaneacanuhini étanainahipucaini hora pácahehini.

³⁸ Éjamiuchava. Eyujarauchava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta iáchanevana taratahahí ticaratacava. Étasera eta éche máteji, vahi taratahaimahi ticaratacava —máichapa.

³⁹ Tacahe, tiápechavavarepa tiyana tiyujaraca. Eta mayujarasirahi, étarichuva eta máechajiriruvanahi. ⁴⁰ Tásicha, tichavavanepa eta te návhahi ena máimitureana. Máimahavarepa tímacanaripavare, taicha muracaripa eta náechapune. Tájinavare nacayemahini táichavenehi eta natsirirahi. Tac-ahé, tiyanavarepa tiyujarapana. ⁴¹ Te mapahequenepa eta mayujarasirahi, tichavapa. Máichavacapa:

—¿Iápechavaipava ímaca? ¿Vuíchahapuca enarahacaquenénahini? ¡Taratapa! Jéhesare, puiti títecápapa eta nutuparahahi nacaratásiranuyare ena tictiana-canuanahí. ⁴² Ávane ema tíjararecanuyare. Échepuca. Viyana viácapavaca —máichavacapa.

*Nacaratácapa ema Jesús
(Mt 26.47-56; Lc 22.47-53; Jn 18.2-11)*

⁴³ Téchajiricavaichaha ema Jesús, macahepainecha ema Júlasi. Mámamu-rihapaipahi ena camuriqueneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena tictianacanahí ema Jesús. ⁴⁴ Ema Júlasi, tatiarihihi eta máicutiarayarehi eta náimatirayarehi ena suntaruana ema Jesús. Ani tacahehi eta máechajiriruvahi ema Júlasi:

—Ecunenuyare. Ema nétsrereruyare, éma ecaratacaya. Machu ecaitica, muraca eta ecaratasiraina —máichavacapa.

⁴⁵ Te títecapanapa, mapauchapa ema Júlasi ema Jesús. Máichapa:

—Yátihipa, tata Maestro —máichapa.

⁴⁶ Tásicha, mágétserarecapa. Tacahe, ena suntaruana enevanepa nacaratácahi. ⁴⁷ Tacahe, ema émana apóstole, eta máimaira nacaratásirahí ema Jesús, mavehapa eta mayehe espada. Máquijica eta machaca ema manusura ema aquenuca Caifás. ⁴⁸ Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini nútí? ⁴⁹ Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini. Tacahehisera éta, títauchavayarehi tamutu eta téchajiriruvana etá Sagrada Escritura —máichavacapa.

⁵⁰ Tacahe, tijunaracanapa namutu ena apóstoleana nanaquicapa ema Jesús.

⁵¹ Matiarihivare ema émana amaperu achane. Téhicapahi. Ticaepacuhapahi eta te sávana. Tacahe, nacaratácaparepa éma apana. ⁵² Tijunahisera manaquicapa eta máepacuhainihi sávana. Tiyanapa mamuriarepaipa.

*Nacatupihapa ema Jesús te namirahu ena aquenucarahana
(Mt 26.57-68; Lc 22.54-55, 63-71; Jn 18.12-14, 19-24)*

⁵³⁻⁵⁵ Tacahe, nacaitecápapa ema Jesús te mapena ema corregidor. Ema Pedro, máehiequenehapahi éna, mayererehipahisera. Títujicavapa tisiapa eta te canchón tayehe eta mapena ema corregidor. Tásicha, téjacapa macachane-muripa ena suntaruana, tiásacavahi eta te yucu. Váhisera náimatihini éma. Tacahe, tiúrujicavanapa namutuyaréni ena apamuriana tuparairucana énapa ena aquenucarahana énapa ena escribánoana. Napanerechaipa, natanunuicaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapacayarehi éma. Váhisera náichimayahini eta maviurevainahini. ⁵⁶ Camurianahinéni ena tépiyaequenehanahí éma, váhisera táchuticacahini eta nacayemaqueñeanahí. ⁵⁷ Titupihanavarepa ena apamuriana tépiyahirahianayarehi. Ánipa macahe ema émana eta máepiyahiraivahi:

⁵⁸ —Nútí nusamahi ani macahehi ema maca: “Nútí nuvetataicayare eta juca Templo náepiyaruhi ena achaneana. Tásicha, te mapánaquenénapa sache, nímiclavayare nucatupiha eta apana Templo. Váipasera táchutimahi eta náepiyaruhi ena achaneana”. Eta juca nusamaquenehi eta máechajiriruvanahí ema Jesús —macahepa ema tépiyahirahí.

⁵⁹ Váhiquenesera táchuticacahini eta máechajiriruvanahí nayehe ena apamuriana.

60 Tacahe, ema corregidor téchepucapa eta mayaseresirayarehi ema Jesús. Ánipa maicha:

—¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

61 Émasera ema Jesús vahi majicapavacahini. Timatinaichucha. Tásicha, mápechavare mayasereca ema corregidor:

—Nuvaraha pimetacanu. ¿Píti pímijachavahíjicacha pítihi Cristo ema vicuchapaquenehi, Machicha ema Viya? —máichapa.

62 Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásicha, numetacaheyare eta apana. Járajapaya eta sácheyare ímahanuyare eta néjasirayare te mavaire ema Viya máitupajijihaquenehi. Ímahanuyareva nútia etá núcupsirayareva, násihayare te anuma, támiranuyarepahi eta úcaji —máichapa.

63-64 Tacahe, ema corregidor eta masamirahi, tisemarinehi ichape. Tivetsayujiacavapa eta mamuiriha eta masemanevahi. Tásicha, macahepa:

—¡Émaquenepa visama ema maca tépiyacavahi Machicha ema Viya! Tétavacavaipa eta maviureva taicha macaecáhihi ema Viya. Vaipa tágomesa vitanucahini ena testigoanayare. Puiti esamaripa éti etá juca macayemaquenehi. ¿Tájaha vícharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étaina táimicapaca! —nacahepa.

65 Tacahe, nátutuáca éma. Náepacauquichavarepa, tásicha, náehamirahavarepa te mamira. Tásicha, náichapa:

—Te yátupihipuca pítihi Cristo, pímatinuyare nájahanupuca nuti néhavihi. ¡Pimetacahavi! —náichapa.

Énapa ena suntaruana, te námapaipahi, náehavarepa. Ichape etá náichirahi.

*Ema Pedro tépiyacavapa vahi máimati ema Jesús
(Mt 26.69-75; Lc 22.56-62; Jn 18.15-18, 25-29)*

66 Tiuri, ema Pedro, matiarikhichahahi eta te canchón. Tacahe, sucahepaipahi esu mavanara ema corregidor. **67** Suímahapa ema Pedro, tiásacavahi. Suímararacapa eta mamira. Tásicha, suíchapa:

—Németeaca pítirichu ñichamuri eñi ñica Jesús, eñi nazareno —suíchapa.

68 Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu.

69 Suímahavarepa tiápechava esu esena. Sumetacavacapa ena natiarihique-neanahi, suíchapa:

—Éñi ñica eñi nachamuri ena téhicanahi eñi Jesús —suíchapa.

70 Tiápechavavarepa ema Pedro tépiyacava vahi máimatihini ema Jesús. Tacahe, te tiyererehachichavare, ena natiarihiquenehi náichapa ema Pedro:

—Yátupiquene pítirichu machamuri ema maena Jesús, taicha eta péchajisira, tímaticarehi eta piásihairahi te Galilea —náichapa.

71 Tacahe, majicapapa:

—Mácuñacanuine ema Viya, te vahi nucucae yátupina. Váhiquenesera nímati ema achane échajisihaquenehi —macahepa.

72 Enurujipa tiápechava téchajica eta varayu. Tíjahúchavapa téchava ema Pedro eta macayemaquenehi ema Jesús: “Te tamirahuinapaichaha eta apíhe- quenéna téchajica eta varayu, píti mapahenaripa eta pépiyacavayare vahi pímatinu”. Eta máechavairahi ema Pedro, tépanavapa tíyaha.

15

Námapa ema Jesús te mamirahu ema Pilato (Mt 27.1-2, 11-14; Lc 23.1-5; Jn 18.28-38)

1 Te tijarahipa, tiápechavanavarepa tiúrujicavana namutuyaréni ena aquenucarahana, taicha náichuhauqueneanahi ena tuparairucana, éna escribánoana. Tiyaserejiricacanapa tájahapuca eta náichararacayarehi ema Jesús. Tacahe, nacuchucapa ticaitihapaipa eta námirapahi te mamirahu ema Prefecto Poncio Pilato. Eta máimairahi ema Pilato ema Jesús, mavarahapa máimatiyarehi éma. **2** Tacahe, mayaserecapa:

—¿Yátupisareji réyvihí píti nayehe ena pijaneanana israelítana? —máichapa.

Ema Jesús majicapapa:

—Pétupicavahi eta juca piyaseresiranuhi. Yátupihi eta nurreyvahi —máichapa.

3 Tásicha, ena tuparairucana nametauchaipa ema Jesús, camuri eta maviurevahí náicha. **4** Tacahe, mápechavare mayasereca ema Pilato. Máichapa:

—¿Vahi péchajiuchava eta juca nametauchiravihi? Camuri eta pivierevahí náicha —máichapa.

5 Émasera ema Jesús váhiquene majicapahini. Tásicha, máramipa ema Pilato.

Ema Pilato macavanairipipa eta náetatasiraya ema Jesús (Mt 27.15-26; Lc 23.13-25; Jn 18.38-19.16)

6 Tiuri puiti, tatiarihi eta mayeherepihi ema Pilato te Páscuamuhuana. Macaiticayarehi ema émana preso mácani nayasearuyarehi ena achaneana.

7 Tacahe, natarihihi eta te cárcel ena ajairana ticaeratanahi. Ichape eta naviurevahí ena téhajiricacarabiana te revolución, nacapasirapahi ena achaneana. Te namuri, matarihihi ema achane ticaijare Barrabás. **8** Tásicha, ena achaneana nayaseacapa ema Pilato máichahini eta mayeherepi. Ánipa náicha:

—Vivaraha picha eta piyeherepi te Páscuamuhuana —náichapa.

9 Tacahe, mayaseremurihapa ema Pilato:

—¿Evarahapuca nucaitica ema eyehe Rey, iáquenumuri eti israelítana? —macahepa ema Pilato. **10** (Taicha ema Pilato máimatiacaripahi eta nametauchirahi ema Jesús ena tuparairucana taicha nacapinaruhi éma.)

11 Énasera ena tuparairucana náimitumuriharipa ena achaneana, eta nayaseasirayarehi émaina máuchucuha ema Barrabás.

12 Tacahe, ema Pilato mayaseremurihavare. Máichapa:

—¿Tájahasica nícharacayare ema Jesús ema íjarechaquenehi Rey iáquenumuri eti israelítana? —máichamuripa.

13 Éna, tipiaracanapa eta najicapirohi:

—¡Pémetatareca te crusu! —nacahepa.

14 Tásicha, mápechavarepa mayaseremuriha, ánipa máicha:

—¿Tájaha tacayemahi eyaseacahi eta németataresiraya ema maca? ¿Tájahasica eta maviurevahí? —máichapa.

Énasera tipiaracanavare muracapanapa:

—¡Pémetatareca te crusu! —nacahepa.

15 Ema Pilato mavarahahi tiúriyarehi nayehe ena achaneana. Tacahe, mavanecapa ena suntaruana, ánipa maicha:

—Ecaiticaya ema Barrabás. Émasera ema maca Jesús, iámayare, éstacayare. Étatacayareva te crusu —máichavacapa.

*Nacaecahijiricava ema Jesús ena suntaruana
(Mt 27.27-31; Jn 19.1-3)*

16 Tacahe, ena suntaruana námapa ema Jesús tayehe eta náestasihayarehi te távirarehi eta guardia. Náimichuhavarepa namutu ena apamuriana suntaruana náumurivana. **17** Te náitauchapa eta náestasirahi éma, namuriachapa eta muíriare mularume. Náitsamemacapa eta itapepi eta majarapiyarehi. Nanacapa te machuti. **18-19** Nacavayuemarajipa. Náepuyumirauchavarepa, ánipa náicha:

—Tata, ¡pítitataji nayehevihíji Rey ena israelítana! —nacahepa.

Náepuchisicapa eta te machuti tayehe eta curinaqui. Nátutuácavarepa.

20 Tacahe, te titavanapa eta nacaetemajirisirahi, navejamuhiacapa eta mularume. Nanacavarepa eta mamuirihaichu. Tásiha, námapa tayehe eta macaetataiyayarehi te crusu. Náetatacapa ema Jesús te crusu

(Mt 27.32-44; Lc 23.26-43; Jn 19.17-27)

21 Eta napaisirapahi te calle, nácapajicapa ema achane ticaijare Simón. Éma, másihapahi te máesane. Napamicapa éma manaracuha eta macurusura ema Jesús. (Ema maca Simón, máuchusinehi te jena avasare Cirene. Éma, máiyahi ema Alejandro émapa ema Rufo.)

22 Tacahe, nacaitecapapa tayehe eta masihi nacaetatairare ticaijare Gólgota. **23** Ánaquipa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini. **24** Tacahe, náetatacapa éma te crusu. Ena suntaruana, nasuertehachapa eta mamuirihaini eta náijarajirisi-racacayare.

25 Te náetatacapa éma, las nuéveripa eta yáticarahi. **26** Te tápusi eta macurusura, tatiarihihivre eta ajureca táchajisihahi eta tiviuchahi eta mápenir-rayarehi. Ani tacahehi eta ajureca: “Ema Rey nayehe ena israelítana”. **27** Natarihihivre ena apinana tiámerahiana. Ticaetatanahivare te machacaya, ema émana te mavaure, ema apana te sapa. **28** Tacahe, tamutu títauchavahí eta táchajiriruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

29 Tacahe, ena tiánucumirauchanapahi, tépiupiusicavanapaipa eta nacaechirapaipahi ema Jesús. Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, piratahahivaréji pímichava picatupiha eta arairu Templo te mapanayarerichuhíji sache. Puiti vivaraha vímaha eta pítupajijiasiravahi. **30** Piúcupaica te jara crusu. ¡Picatiuchava pítijivaina! —náichapa.

31 Énerichuvare ena tuparairucana nacaecahijiricavare, énapa ena escribánoana. Náichajiricácapa:

—Ema mácacacha, macahehi eta máechajiriruvahi eta maratahairahíji macatiuchavaca ena apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi. **32** Te yátupinahini Cristo, Reyinahini viyehe viti israelítana, macatiuchavaipahini, ¿masi? Mácupaipcaripahini te jara crusu, ¿masi? Visuapasarepahini eta vímairainahini —nacahepa.

Ena tiámerahiana ticaetatanahivare te machacaya, énerichuvare nacaechihivare éna apanavare.

*Eta máepenirahi ema Jesús**(Mt 27.45-56; Lc 23.44-49; Jn 19.28-30)*

³³ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. ³⁴ Tásicha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiruva, ani tacahe: “¡Tata Nucaiyaque! ¡Tata Nucaiyaque! ¡Vahi picujunijicanu!”

³⁵ Tacahe, ena natarihiqueneanahi ena tisamanahi, ánvarepa nacahe:

—Esama. Ema maca achane mapiaracahi ema víyarahaini profeta Elías —nacahepa.

³⁶ Ema apala tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máiimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías —máichapa.

³⁷ Tacahe, tíapechavavarepa tipiaraca muraca ema Jesús. Tépenapa.

³⁸ Tásicha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. ³⁹ Tásicha, ema nacipitara ena suntaruana romanoana, eta matupihairahi máimarasirahi te mamirahu ema Jesús, masamirahi eta mapiarasirahi, ánipa macahehi:

—Yátupiquenerichuyapa Machicha ema Viya ema maca —macahepa.

⁴⁰ Tacahe, natarihihivare ena esenana. Náimarasirahi, nayerereh看他. Te nataracu, sutarihihi esu María Magdalena, esu Salomé, ésupa esu apala María. (Esu suca María, máenahi ema Jacobochicha émapa ema José.) ⁴¹ Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natarihivare ena camuriana apamuriana esenana náitecapaquenehi te Jerusalén, téhicanapahi éma.

*Nacucupaicapa te crusu ema Jesús, náecarayarepa**(Mt 27.57-61; Lc 23.50-56; Jn 19.38-42)*

⁴²⁻⁴³ Matiarihihivare ema achane ticaijare José*. Ticavasahi te Arimatea te Judea. Éma, téavicavahi eta mapicauchacarevahi. Masuapahi ema Jesús eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana. Tacahe, te cáperohipa eta jena sáchequenehi, téumechavapa ema José tiyanapa eta me Pilato, mayaseapanahí eta máquehe ema Jesús, mavairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecahini te yátimuhu, váhivare táisapacarehíni máejamicahini te jena sávarumuhi. ⁴⁴ Máraminehi ema Pilato eta máijahúchiravahi tépenavane ema Jesús. Tásicha, máimichuhapa ema nacipitara. Te títecapapa ema nacipitara, mayaserecapa te yátupihipuca tépenaripa ema Jesús. ⁴⁵ Tásicha, eta mametasirahi ema nacipitara eta máepeniraipahi ema Jesús, másapapa ema Pilato eta máquehe ema Jesús. ⁴⁶ Tacahe, tiyanapa ema José. Mámaha eti tiúrina sávana mavachareruhi. Tásicha, macucupaicapa eta máquehe ema Jesús. Náyuruácapa tayehe eta sávana. Náiyaracuhapa tayehe eta máecari eta te mari nasecajueruhi. Tásicha, najihachapa te tapaja eta

* **15:42-43** Ema maca José, vahi émaina ema maparape ema Jacobo ema téchajisihaquenehi te versículo 40. Váhivare émaina ema José ema suima esu María, máenahi ema Viáquenu Jesucristo. Ema maca José, tatiarihi eta mávacure tayehe eta Cabildo te Jerusalén. Émasera vahi máimicasiapavahini nayehe ena tictianacanahi ema Jesús. (Pitanuca te libro Lucas 23.51.)

máecari eta ticheyarame mari tajitacarequene. ⁴⁷ Sutiarihihivare esu María Magdalena ésupa esu apaga María[†]. Náimaranacahi, náimatipa eta nanasihahi eta máquehe ema Jesús.

16

Eta máechepusira ema Jesús eta te máecari (Mt 28.1-10; Lc 24.1-12; Jn 20.1-10)

¹ Tacahe, te jena sache sávaruquenehi, téricaipa eta sache, tiyanapa esu María Magdalena, ésupa esu Salomé, ésupa esu apaga María. Tivacharecanapa eta tíjiyequene perfume nayariasihayare eta máquehe ema Jesús.

² Tásicha, te apanapa sache, lumíncuquenehi, nayatirupa tiyanana eta te máecari. Te tiúchucapa eta sache, títecapanapaipa éna eta te máecari. ³ Eta napaisirapahi, tiyaserejiricacanapaipa. Ánipa nacahe:

—¿Nájahapapucaini náequehepuichinahavini eta tajiba eta nécari eñi Viáquenu eta mari tajitacarequene? —nacahepa.

⁴ Te títecapanapa, náimahapa eta márime tájinariapahi te tapajacura eta máecari. ⁵ Tásicha, tisiapanapa. Ánaqui náimahapa ema émana amaperu achane, mávihahi te vaure. Eta mamuiriha, tétavicava eta tajapuva. Tiáramecanarinehi ena esenana. ⁶ Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataquenehi. Májinariapahi, taicha ticaechepecasiripa. Yare, ímaha. Júcahi eta mávinehi. ⁷ Tiuri puiti, eyana emetaca ema Pedro, tásicha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichuhipuca eta macayemaqueeanahí te achannerichaha —máichavacapa ema ángele.

⁸ Tacahe, tiúchucanapa eta te máecari. Tiyananapa tijunapanapaipa. Tiyaya-careanapaipa taicha eta náramirahi. Eta nayanirahi, nájina nametaruinhini taicha eta napisirahi.

Tímerecavapa ema Jesús suyehe esu María Magdalena (Jn 20.11-18)

⁹ Tiuri, eta máechepusirahi ema Jesús te máecari te jena lumíncuquenehi te yáticarahichicha, sutivapa máimeresiavahi suyehe esu María Magdalena. (Esu suca María, esu máepachiaruhi ena siétequeneana éreanana te suáquehe.)

¹⁰ Tacahe, tiyanapa ésu, sumetapana ena suchamurianahi. Éna, tétavicavahi eta napanereresirahi, týahanahí eta nacatisamurevairahi. ¹¹ Váhisera na-suapahini eta sumetarapihi esu María eta máechepusiraipa, machaviraipahi titareca, étapa eta máimeresiravahi eta suyehe.

Tímerecavapa ema Jesús nayehe ena apinana máimitureana (Lc 24.13-35)

¹² Te taequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamaichavahisera eta mamira. Vahi náimatívanehini éma. ¹³ Téhesera náimatipa éma, majunijiacavacapa. Tacahe, tichavava-neanapa nametapana ena apamuriana nachamuriana. Váhiqunevaresera nasuapahini ena apinana, eta nametasirahi.

Tímerecava ema Jesús nayehe ena mayeheana apóstoleana (Lc 24.36; Jn 20.19-21)

[†] **15:47** Esu suca María, esu taechajisihauquenehi te versículo 40. (Te pivaraha pecha pitanuca Juan 19.25.)

14 Tiuri, te táequenepa, tiúrujicavanahi eta nanisirahi ena óncequeneana apóstoleana. Tacahe, tíjahúchavapa tímerecava ema Jesús eta nayehe. Macajachamurivarepa eta namasuapirahi eta nametarapianahi ena tímahanahi éma eta máechepusiraipahi.

*Matuparaca ema Jesús ena apóstoleana
(Mt 28.16-20; Lc 24.37-49; Jn 20.22-23)*

15 Tacahe, máichavarepa:

—Eyana epaica te tamutu eta avasareana eta te juca apauehe. Ecamente tarairuyare eta tiúrina echajirirucava nayehe namutu ena achaneana.

16 Nucuchucuhavacayare namutu ena tisuapajirahianaya, ena ticaicachasianaya. Énasera éna vahi tisuapanaya, ticaicuñanayare taicha tanasirichuhi eta napecaturana.

17 Ena tisuapajirahiana náimerecayare eta juca tiáramicareana: Náimijunjicayare ena éreanana nayehe ena achaneana, taicha námapicayare eta níjare. Náitucayare téchajicana tayehe eta apanana échajirirucavana namaitucaqueneanainihi. **18** Te nacaratacahipuca eta quichareana, tájina táicharamaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásicha, tinaracanayare éna —macahepa.

*Eta mayapirahi ema Jesús te anuma
(Lc 24.50-53)*

19 Tacahe, te titavapa tamutu eta mame tarapianahi ema Viáquenu Jesús, tiyanapa tiyapa te anuma. Ema Viya macaejacapa ema Machicha te mavaure.

20 Tacahe, tiyananapa eta te tamutu avasareana ena máimitureana. Ticamentarairuanapaipa eta tiúrina echajirirucavana. Ichape eta máimicatasiravacapahi ema Viáquenu. Tétavicavahi tajacapacarevahi máicha, eta náimiturapianapahi. Taicha máijaracavacapahi eta náimeresirapahi eta tiáramicareana ticunachacareanahi.

Tamu tupa.

Ema San Lucas májuequenehahi eta máichararacavahi ema Jesucristo, ticaijare puiti eta **EVANGELIO SEGÚN SAN LUCAS**

¹⁻³ Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi nútì. Ichapemurianahi ena vichamuri-ana tiájuequenehanahi tayehe eta máicharacavahi ema Viáquenu Jesucristo. Tásicha puiti, nútì apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasesereru nayehe ena tineca-paequenehanahi, tímahanahi eta apaicape eta táepaniravahi eta máitaresirahi ema Viáquenu. ⁴ Nútì nuvaraha nímimatichavi apaesa yátupina pecha tamutu eta juca piárvahuanahi.

Ema ángele macametarapi eta máuchusirayare ema Juan Tícachasiricarahi

⁵ Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiarihihivare ema émana achane, ticai-jare Zacarías. Éma, náumurivanahi ena ticaijareana Abías. Eta náematanerepi éna, náechapajírica eta námavahuasana ena achaneana tayehe eta Templo. Esu mayena ema Zacarías ticaijaruhi Elisabet, mámariequenenihi ésu ema víyarahaini Aarón. ⁶ Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenénahini nayehe ena achaneana. ⁷ Nájinaserá nachichainahini, macheruhi esu Elisabet eta suítaresira. Váipavare ticachichanaimahi taicha ichavicanaripahi.

⁸⁻¹⁰ Te jena sache, náichuhapa ema Zacarías eta masiapiroayare tayehe eta Templo te Jerusalén, taicha áñopahi eta masiapiroayare. Tacahe, ticátuparácasispa éma. Émapa táetupiacahi eta máematanerepiyarehi máijuchayarehi eta incienso te tainahu eta mesa náijuchirarehi, taicha tacahehi eta nayehe-repini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna. ¹¹ Tiáramicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso. ¹² Tiáramecarine ema Zacarías eta máimairahi ema ángele. ¹³ Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyase-serepihi píti eta mayehe. Puiti esu piyena Elisabet ticachichayare. Juan eta máijareyare ema echichayare. ¹⁴ Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare. ¹⁵ Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muraca-queneana. Taicha éma, eta máuchusirayare, mávaháruyarepahi ema Espíritu Santo. ¹⁶ Éma pichichayare, éma téüpircayare eta táurivayare eta napane-reruana ena pijaneanana israelítana, tachavirayare eta nasuapiroayare ema Viya. ¹⁷ Ema maca pichichayare, éma tínapumirauchayarepahi ema Viáquenu. Macutiyare eta móitupajijiasiravaini ema víyarahaini profeta Elías. Ichapeyare eta móitusirayare eta macajimuyasirayare eta nasamureana ena

achaneana apaesa tachava eta nasuapiraina ema Viya, tacuti eta nasuapajiraivainihi ena náchucanaveanainihi. Énaripa ena váinarajipanereruana, tisuapajirahianayareva máicha. Mametacavacayare ena achaneana natsecaipa eta najacapirayare ema Viáquenu —máichapa ema ángele.

¹⁸ Tásicha, ema Zacarías majicapapa. Ánipa macahehi:

—Páurenusami, vaipa numaitacavaimahi nucachichahini, ésuripa esu nuyena. Ichavicahavipa víti. Váhicha nusuapapajica eta juca vicachichairayarepuca —máichapa.

¹⁹ Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasi-vaichuhi eta numetasiraviyare eta juca ecachichairayare. Piúriháine ichape-nahini eta piúrisamurevainahini. ²⁰ Puítisera úpaviyare. Eta ecutiarareyare piyehe taicha eta pimasuapiranuhi. Tiámáinucava te táitauchavapa eta juca numetaruvihi, péchajicainavarepa —máichapa ema ángele.

²¹ Tacache, ena achaneana nanasiqueneanahi te aneca nacuchaparairi-caipaicha ema Zacarías, náramipa eta mayerevaipahicha te tajuhe. ²² Jéhesareinehi, te tiúchucapa ema Zacarías, vaipa máechajicahini. Náimatiacapasera éna, eta máechajisirahi ema Viya te tajuhe. Tisuveverecapaipahi éma eta mavarairahi máimicutiarachavaca ena achaneana eta yátupirahi masama-quenehi. Úpapaipahi éma.

²³ Tacache, te títauchavapa tamutu eta jena sácheinahi eta matuparacasisvahi, tiyanapa ema Zacarías tayehe eta mapena. Nueve caje eta mayerevayarehi eta mamaechajisirayarehi. ²⁴ Tásicha, esu mayena Elisabet, ticajaripa ésu. Váipasera súchuchurecrahini te supena. Váhivare sumetajiricahini. Tiámáinucavapa te títauchavayarepa eta cincoquenehi caje eta sucajarirahi. ²⁵ Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjaracanuhi eñi nuchichayare. Váipasare nayunacaimahi ena achaneana eta numacheruvahi —sucuhepa.

Ema ángele macametarapi eta máuchusirayare ema Jesús

²⁶ Tacache, te sáisiquenepa caje, ema Viya mápechavare mavaneca ema ángele Gabriel tiúcupaica tayehe eta avasare Nazaret, tayehehi provincia eta Galilea.

²⁷ Máucupauchapa esu amaperu esena ticaijaro María. Ésu, tájina suímatiyahini ema ajaira. Matiarihipasera ema suímayarehi, ema ticaijare José. Téjacaripahi eta natratune. Ésu, mámariéquenéinihi ema víyarahaini rey David. ²⁸ Tacache, ema ángele máucupauchapa ésu tayehe eta suávhahi. Máichapa ésu:

—Pícharacava, María. Piti manerejiruvihi ema Viya. Tétavicavahi eta piúricarevayare taicha ichape eta majapanuiravihi éma Viya. Picachuricahi namutu ena apamuriana esenana —máichapa.

²⁹ Ésusera tiáramecainehi eta máechajisirahi ema ángele. Supanerequene-hainehi tájahahipuca tacayemahi eta máechajisirahi ema ángele. ³⁰ Émasera ema ángele máichavarepa:

—Vahi picupica, María. Piti manerejiruvihi ema Viya. ³¹ Numetapanavahi puiti eta picajarirayare. Ajairayare ema pichichayare. Jesús eta máijareyare.

³² Tétavicavaya eta napicauchirayare ena achaneana taicha Machichayarehi ema Viya. Ichapequeneyare eta aquenucairayare éma taicha ema Viya manacayareva eta mávacureyare aquenucayare. Macutiyarehi eta aquenucairahi ema máchuacaini David. ³³ Éma téchayarehi namutu ena pijaneananana israelítana. Máepenacacayare eta aquenucairayare —máichapa ema ángele.

³⁴ Tásicha, esu María, sujicapapa:

—¿Tájahasica táicharacavayare eta juca? Taicha nútí nájinaichaha nímainahini —suíchapa.

³⁵ Émasera ema ángele máichavarepa:

—Picachichayare taicha eta máitupajijiasiravahi ema Viya. Timicauchaviyare eta majaraiva, tásicha, tisiapahacavinapa ema Espíritu Santo. Eta tacahe, ema amuya pínaruyare, sántoyare éma, taicha machichayarehi ema Viya. Náimatiyare namutu eta machichairahi ema Viya. ³⁶ Picutiyare esu pijaneana Elisabet, énerichuvare ticajariplahí ésu. Tayanapanehi ichavachicharipahinéni ésu, macheruinihinéni. Sásisripasera caje eta sucajarirahi puiti. ³⁷ Taicha ema Viya, tájinaquene máemáituca éma —máichapa ema ángele.

³⁸ Tacahe, esu María sujicapapa:

—Nútí ñivanaranuichuhi eñi Viya. Nutiarihi puiti. Ñímahanuinepa eñi, eta ñícharacanuyare te ñivanairipiana —suíchapa ema ángele.

Tacahe, eta masamirahi ema ángele, tiyanapa tichavahi.

Esu María suéjirapanapa esu sujaneana Elisabet

³⁹ Tacahe, te jena sácheana titátajipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa ema Zacarías. ⁴⁰ Te títecapapa esu María tayehe eta napenahi, suéchajicapa esu Elisabet. ⁴¹ Te susamapa esu Elisabet eta suahu esu María suéchajisirahi, tiyamuricainehi eta amuya te sujuhe esu Elisabet, enevanepa mávahácahi ésu ema Espíritu Santo. ⁴² Tacahe, téchajicapa muraca esu Elisabet, suíchapa:

—Píti, téavicavahi eta piúricacarevahi ñicha eñi Viya. Picachuricahavihi vimutu viti esenana. Éñiripa eñi pichichayare, téavicavahivare eta ñicunachacarevaya. ⁴³ Nusapihasamipa nútí péjirapananuhi piti ñénaviyarehi eñi Náquenu. ⁴⁴ Te nusamapa eta piahü eta péchajisiranuhi, tiyamuricainehi te nujuhe eñi nuchicha, taicha eta tiúrisamuréinehi éñi. ⁴⁵ Téavicava eta piúricacarevaya píti taicha eta pisuapajiraivahi ñe Viya. Títauchavainapa tamutu eta ñimetarapihi eñi Viáquenu eta piyehe —sucuhepa esu Elisabet.

⁴⁶ Tacahe, esu María sujicapapa:

—Ichapemurihi te náchaneva eta nucunachirahi eñi Viáquenu. ⁴⁷ Taicha téavicavapa eta táurisamureva eta nusamure ñicha eñi Viya Ticatiurahiquene eta nuyehe. ⁴⁸ Taicha eñi, vahi ñépurunuhi páurenuhinéni nútisami. Téavicavahisera eta ñijapanuiranuhi nuti ñivanarahi. Nútipa ñinerejicanuhi, tásicha, ichapenapapuca eta nacapinarunuiraya namutu ena achaneana natiarihiquenehi puiti, énapa ena arajuruuanayare. “Téavicavapa eta súricacarevahi esu María” nacáhénapapuca. ⁴⁹ Téavicavapa eta ñítupajijiasiravahi eñi Viya, tíjaracanuhi eta núrivayarehi ñicha. Jéhevare eñi, Sántoquenehi eta ñijare. ⁵⁰ Eta tacaheyare eta ñijapanuirahaviyare puiti, énapa namutu ena arajuruuanayare, nácani tipicauchanayare eñi.

⁵¹ Eñi Viya, ñíjaracayare eñi nuchichaya eta ñítupajijiasiravaya ichape. Tásicha, ñicaerajicavacaya ena ticasíñavavairicana, énapa ena váinarajipanere-ruanahivare. ⁵² Nácani aquenucana nacatianacainapapuca, ñicapaquechavacayarehisera eñi. Nasapihapa ena páureanasamih, ñinerejiruanaya éna, ñijupahanayare. ⁵³ Yátupiya eta ñíjarasiravacayare eta táetaviuchiraya eta náuricacarevaya namutu ena ticasíñavanayare ñiyehe. Énasera ena tímijachavanahi tájinahini nácamunuhini, ñicaerajicavacaya namutu.

⁵⁴⁻⁵⁵ Eñi Viya acane tíjaracavahi ñiyehe eñi viáchucaíni Abraham énapa ena ñíamariéqueneana, eta ñíjarasiravacainapa eta táetaviuchiraya eta náuricacarevanaya. Vahi ñémitisicaimahi eñi Viya eta ñéchajiriruvahi ñíjararuvhah.

Puiti, eñi nuchichaya tiámayarepahi tamutu eta viúricacarevanaya viti israelítana. Máitavacacayarehi éta —sucuhepa esu María.

⁵⁶ Tásicha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷ Tacahe, títauchavapa eta sucajera esu Elisabet. Suínacapa ema suchicha. ⁵⁸ Tiyananapa ena sujaneanana énapa ena suchacayapenanahí, náejirapana ésu. Táicha eta nasamairirisirahi eta súrivahi maicha ema Viya eta majapanuirahí ésu. Tiúrisamureanarinehi namutu. ⁵⁹ Tacahe, te óchoquenepa sache eta máuchusirahi ema amuya, nayanauchapa ena najaneanana, namarca-chapanayarehi ema amuya; taicha tacahehi eta nayeherepihi. Tásicha, navarahapa nanacayarehi eta máijareyarehi Zacarías, mámapicayarehi eta máijare ema máiya. ⁶⁰ Ésusera esu maena ema amuya vahi suvarahahini. Suíchavacapa:

—Juan eta ñíjareyare.

⁶¹ Tásicha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

⁶² Tásicha, éna náimicutiarachinapa eta nayaseresirahi ema Zacarías tájahapuca eta máijareyarehi maicha éma. ⁶³ Tacahe, ema Zacarías tiyaseserecapa eta táblamechicha, májuchihayarehi eta máijareyarehi ema machicha. Eta ajureca, ani tacahehi: “Juan eta máijareyare”. Tésenijiricacanarinehi éna taicha eta máijareyarehi ema amuya. ⁶⁴ Tásicha, tíjhúchavapa tichavapa eta máechajisira ema Zacarías. Macunachapa ema Viya eta máurisamurevahi. ⁶⁵ Ichape eta tiáramicarehi nayehe ena natiarihiqueneanahí. Nasamairiricavanepa namutu ena távacuanahi eta avasarechichana tayeha eta provincia Judea. Náechajisihapa eta juca nasamaiririruhanahi. ⁶⁶ Namutupa napanerequenehahi. Nácani tisamairiricanapahi, tiyaserejiricacanaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásicha, ema amuya, téavicavahi eta majaneasirahi ema Viya eta majurisrapaipahi.

Eta majirarapi ema Zacarías

⁶⁷ Tacahe, eta jena sáchequenehi eta macamarcairahi ema amuya, étaripa eta nanasirahi eta máijareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

⁶⁸ —Téavicavapa eta macunachacareva ema Tata Vicaiyaquene, ema véhiruhi vimutu viti israelítana. Taicha tijapanuhavihi vimutu viti machaneranahi, ticuchucuhahaviyarehi. ⁶⁹ Tíjaracahaviyarehi puiti ema yátupique-neyare eta macatiuraivaya, ema manerejiruhi te namuri ena mámarieque-neanainihi ema David, ema mavanarainihivare ema Viya. ⁷⁰ Títauchavaipahi eta náechajiriruhanahi ena santo profetanaini acane, eta nametasivanahi me Viya. ⁷¹⁻⁷³ Taicha tacahehi eta matratunehi ema Viya mayehe ema viáchuaini Abraham. Ema Viya tíjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tíjaracavahi eta mamaemitisisiraya eta macatiuchirahaviyare nayehe ena

ticatianacahavianahi. ⁷⁴ Ema Cristo manerejiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapica-havihini eta vicaemataneasirayarehi éma. ⁷⁵ Eta mavarahaquenehi tiúriyare eta vítaresirayarehi tamutu sácheana, tájina víchiravaimahi te mamirahu éma.

⁷⁶ Pítiripa, piti nuchicha, píchuarecasivaichuhi mayeheviyare profeta ema Tata Vicaiyaquene taicha píti pínapumirauchayarepahi ema Viáquenu Cristo. ⁷⁷ Pétupiricayarehi eta nasamureana ena achaneana, yátupinapa machaneranayarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana. ⁷⁸⁻⁷⁹ Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimaticahavinapa eta majaraiva ema Tata Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticatisamureanahi, nácani tépenanayarehíni – macahepa ema Zacarías.

⁸⁰ Tacahe, ema amuya eta majurusirahi, tiámavapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruuhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

2

Eta máuchusira ema Jesús

(Mt 1.18-25)

¹⁻³ Tacahe, te jena áñoanahi cape juca viásinequenehi te émarichaha aquenu-cahi ema Emperador Augusto, matiarihihivare ema apana achane ticaijare Cirenio, majupahahi ema Augusto. Prefectohi éma, tayehe eta avasare-ana. Ticaijare Siria eta mávihahi*. Tacahe, te jena sácheana, ema Au-gusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Táinapuiruhi censo maicha ema Emperador Augusto.

⁴⁻⁵ Tacahe, tiyanapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aque-nucaini rey David. Étarichuvare mávasahi ema José, taicha ema José mámarie-quenehi ema David. Tiyananapa ticatupanayarehi.

⁶⁻⁷ Tacahe, títecapanapa te Belén. Tájinaipasera táviravainahini eta te pétiana eta náitecapihahini taicha camuriqueaneanahi ena achaneana náiteca-paqueneanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yati. Suínacapa ema amuya ema suárachichahi. Tacahe, suáyuruacapa eta te mámaratataji pañal. Sucaivecapa ema amuya alauchu.

Ena pástuleruana ticametacasianapa nayehe ena ángeleana

⁸ Te vámahi te tachacaya eta avasare Belén, natarihihi ena pástuleruana. Éna, najaneacahi eta nayeheana uvesana te jena yátiqunehi. ⁹ Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástuleruana eta majaraivahi éma. Tiáramecanarine éna. ¹⁰ Tásihasera, ema ángele máichavacapa:

* ^{2:1-3} Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

—Vahi ecupica. Yare, jucarihi eta tímitecanuhi nútí numetapanahayare. Tétávicava táurisamurécarevaya nayehe namutu ena achaneana. ¹¹ Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu. ¹² Eta tacahe, nímicucutiachinaheyare eta ímairaya: Echimapayare ema amuya ticayuruuhahi te mámaratataji pañal. Tívecahi eta te tajuhe eta peti tapena eta sárareana —máichavacapa ema ángele.

¹³ Tásicha, tíjahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

¹⁴ ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

¹⁵ Tacahe, tiyananapa ena ángeleana, tichavana te anuma. Tásicha, náichacacapa ena pástulérhana:

—Yare, viyana te Belén. Viyana vímahapana eta juca mametaruhavihi ema ángele mavaneruhi ema Viya Viáquenu —náichacacapa.

¹⁶ Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarihisaréipahi ema amuya. Tívecahi éma eta te tajuhe eta peti tapena eta sárareana. ¹⁷ Te náimahapa tamutu, tépanavanapa náemechapa. Amairipahipnaecha eta mametarapianahi ema ángele eta máuchusiraipahi ema amuya. ¹⁸ Tacahe, náraminehi namutu ena achaneana eta nametarapianahi ena pástulérhana. ¹⁹ Tásihasera, esu María supanerequenehainehi te susamure tamutu eta juca susamaqueneanahi. ²⁰ Tacahe, ena pástulérhana tichavanapa tayehe eta te najanearesihahi eta uvesana. Nacunachainehi ema Viya te anuma táchavene eta máechajiruvahi ema ángele, táchavenevare eta náimairahivare ema amuya alauchu. Étapaichuhi tacahehi eta macayemaquenehi ema ángele.

Námapa ema amuya Jesús te Jerusalén, náimerepana tayehe eta Templo

²¹ Te óchoquenepa sache eta máuchusirahi ema amuya, namarcachapa éma taicha tacahehi eta nayeherepi ena israelítana. Tacahe, nanacapa eta máijareyare Jesús. Eta máijare máimijarechaquenehi ema ángele te sucajariyarepa esu maena María.

²²⁻²⁴ Tacahe, te cuarentaquinepa sache eta suínasirahi esu María, tiyananapa te Jerusalén. Eta tímianavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihi eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímerecayare nuyehe; ijaracanuyare taicha nícuichichuhi ema”. Énerichuvare náitauchayarehi eta juca apapa vanairipi tayehe eta napachihairaina ena esenana eta te táchavenevare eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

²⁵ Tiuri, matiarihihi te Jerusalén ema émana achane ticaijare Simeón. Tétávicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavaipahicha ticaimairuvaipaicha éma eta máimatiraya ema Cristo, éma ticaurisamurerahi nayehe ena achaneana majaneanana israelítana. ²⁶ Taicha ema Espíritu Santo mametacaripahi ema Simeón

eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

²⁷ Tiuri, te jena sache, ema Espíritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahai. ²⁸ Tacahe, te máimahapa ema Simeón ema amuya, mavehapa, majupacapa. Tásicha, macunacharinehi ema Viya te anuma. Macahepa ema Simeón:

²⁹⁻³⁰ —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núrisamurepa eta nímairaipa ema Cristo. Étapaichuhí eta pimetarunuhi. Nímatipa ema Ticatiurahiqueneyarehi, ema pivaneruhi pitupararuhi. ³¹ Éma, tímaticareya picha nayehe ena achaneana ticavasanahi eta te tamutu avasareana. ³² Ticunachavanarinehi ena pinerejruana israelítana. Tíjarahinevare te nasamure eta nacunachirahi. Éma, timicauchavacaya ena apamuriana achaneana apavasanana apaesa námatiyare ema Viya —macahepa ema Simeón.

³³ Náraminehi ena ticachichana eta máechajiruvanahi ema Simeón mayehe ema amuya.

³⁴ Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Píma. Ema maca amuya, matuparacasivaichuhí me Viya eta máimiturresirayare eta máechajiruvana ema Viya. Natiarihiyaresera camuriana ena vijaneanana israelítana énajivayare tíchavanayare, taicha náepuruyare ema pichicha, nacatianacayareva. Tásicha, natarihiyaresera ena apamuriana vijaneanana tinaracanayare tiúricavanayare taicha eta nacasiñairaya éma. ³⁵ Étainapa tacaecheraiyaya eta napanereruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táiñehiqueneyare máichararacavayare ema pichicha. Tímicutijiricavayare tayuvaracahini eta pisamure eta tumare —máichapa ema Simeón.

³⁶ Tiuri, sutiarihihivre esu ésuna esena ichavicachicha. Ticametarairurahí ésu. Ticaijaruhi Ana. Ema suýaini ticaijaréni Fanuel. Ésu, mámariequenehi ema víyarahaini Aser. Eta suámaperuvahí ésu, siete año eta sucachanerahi ema suímaini. ³⁷ Tásicha, ochenta y cuatro áñoripahi eta suépenaimavahí. Sunasiquenehi sucapenahí ésu eta te Templo. Tamutuhi sácheana, yátiana, tiyujaracahi ésu. Suhayunachahivare. ³⁸ Tacahe, ema Simeón téchajiricavainirichaha, títecapanecha ema Ana. Eta suímairahi ema amuya Jesús, sucunacharinehivare ésu apanahivare, suhasulupayachapa ema Viya máichavene ema amuya. Tásicha, sucametarairupa mayehe ema amuya. Suéchajisihihi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhí éna. ⁴⁰ Tacahe, ema amuya Jesús tiúrijuruhi. Túmehi. Téchemarahihi, tamutu maecha, taicha mamunavahí me Viya.

Ema Jesús téchajiricava nayehe ena máestroana

⁴¹ Tiuri, tamutu áñoana te Páscuamuhuana, eta nayeherépi ena ticachichana ema amaperu Jesús, tiyananayarehi tayehe eta avasare Jerusalén. ⁴² Tacahe, ema Jesús, te macayeheda doce año, tatuparacaripahi ena ticachichana

náimerepanayarehi éma, námayarehi tayehe eta Jerusalén, náimimaticharyarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tímina-sichavapasera ema amaperu Jesús eta te Jerusalén. Eta napaisirapahi te achene, vahi náejiacavanehini ena ticachichana, ⁴⁴ taicha náimijachahi matiarihipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejiacahi éma. Te jena cápereniquenepa, natanucapa te namuri ena najaneanana nacachaneque-neanapahi. ⁴⁵ Májinaserá náichimavahini. Tacahe, tichavanavarepa te Jerusalén, natanupanayarehi éma. ⁴⁶ Tacahe, te jena mapanaquenepa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare éma apanavare. ⁴⁷ Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapi-ravacapahi éna, taicha eta máechemaraivahi. ⁴⁸ Tacahe, tiáramivanarinehi ichape ena ticachichana te náetupiacapa. Tásicha, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasi-ravahi pícha. Vitanujiriricavihi, nútí éñipa eñi piya —suíchapa esu maena.

⁴⁹ Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta ani? Níchayare eta máemataneana ema Tata —macahepa ema Jesús.

⁵⁰ Énasera vahi nacaicutiarahini eta macayemaqueneanahi ema nachicha Jesús. ⁵¹ Tacahe, tiyananapasera tichavana te návasahi Nazaret. Ema Jesús, tisuapajirahihi nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

⁵² Tacahe, ema Jesús tijurucapaipa, tijuruhacapaipavare eta máquehe, tacachanepahisera eta maitupajijiasiravahi. Maimicatacahi ema Viya. Tétavivahivare eta náemunasirahi éma, ena achaneana.

3

*Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana
(Mt 3:1-12; Mr 1:1-8; Jn 1:19-28)*

¹ Tacahe, eta máepeniraipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince áñoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásicha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisanías, prefectohivare tayehe eta departamento Abilina. ² Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheinahí, ema Juan machicha ema víyarahaini Zacarías, ajairaripa. Manasirichahahisera tayehe eta mávapahi majurusinehi. Tásicha, ticametacasipa ema Juan eta mayehe ema Viya eta macametarairuirayarepa eta máechajiriruvana.

³ Tacahe, tiyanapa tipaicahi ema Juan tayehe eta avasarechichana tiávihanahi te tachausi eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apesa maperdonachahe eta epecaturana. Te éneuchavapuca, nútí nícacasicahénapa —máichapa.

4-6 Ema maca Juan, émaripa ema máechajisihaquenehi ema Viya eta te Sagrada Escritura, taicha ánaquiaparipahi eta áñona acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha te juca apauehe. Eta tímitecahi ticatiurahiyarehi. Énerichuvare matiarihiyareva ema apana achane máichuhaqueñeyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tamauriqueneana, apesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivre eta nacasiñavavaisirahi, étapa eta navayuaraivahi. Nasapihahi tijapanurahianainapa éna. Tásicha, te máitecapapa ema ticatiurahiyarehi, éma máimimaticainapa namutu eta najacapacarevaya me Viya namutu ena ticasíñavana mayehe.

7 Tacahe, ena achaneana tiyananapaipa napauchapaipa ema Juan, navarahapa ticaicachasianayare eta mayehe. Tásicha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueñeyare ecuñaraqui. Evarahahipuca iúchucuhayare. **8** Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana. Váhivare ecucajamurava eta mámariéquenérahehi ema viáchucaíni Abraham. Taicha tayanapane mámarihepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mavarahapuca, vahi máejecarachaimahi máepiyaca achaneanaina eta juca mari, mavairainahi yátupina ena mámariéquenaina ema Abraham. **9** Ecauneuchava, taicha tiánehipa títecapauchaheyare eta ecuñaraqui nayehe ena achaneana máitucaranahanahi téneuchavana, váhivare náitsivachahini eta napanereruana. Tímicutijiricavaipa te máechucayarepa ema achane eta yucuqui máhireana; tásicha, máijuchainapa tamutu. Ene nacaheyare ena máeneuchavarahana —máichavacapa ema Juan.

10 Tásicha, ena achaneana nayaserecapa:

—¿Tájahasica eta vícharacavayare eta viúrivaina?

11 Ema Juan majicapapa:

—Ecajirahiyare. Mácani tatarihi apina eta macamisa, máijaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

12 Te jena sácheana, náitecapauchavare ema Juan ena tacobrarecarahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrivainaini víti apanavare? —náichapa.

13 Majicapapa ema Juan:

—Vaipa ecuapechava ecuvayuyujica eta ecobreresira, tátupiruva jácani tavanairipihi eta ley —máichapa.

14 Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaíni vícharacavayare eta viúrivaya? —nacahepa. Máichavacapa éma:

—Vaipa ecuverejica eta náimahaqueneana ena achaneana. Váipavare ecuipicarareca. Nacuijapa ecuepiyequeneha. Tarataripa tacurisamu-rechahe eta evachasana —máichavacapa.

¹⁵ Ena achaneana ticunevanariipaicha eta mayehe ema Juan, náimija-chaipahi émaripa ema Cristo nacuchapaquenehi, cáturahiyarehi. Váhisera námutuimahi. ¹⁶ Tásihasera ema Juan máichavacapa:

—Yátupi núti níccachasichehi te une. Ávanepaipahisera mácani yátupiquene Cristo. Éma, tiápajupanavahi nuyehe núti, eta mapicauchacarevahí. Váiparinehi nácutinasimahi eta máitupajijiasiravahí. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasicahayareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. ¹⁷ Puiti éma márajapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquiji, máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta tamuruira —máichavacapa ema Juan.

¹⁸ Tacahehi eta juca máechajisiravacahi ema Juan. Ichape eta maconseja-chiravacahi ena achaneana, máimitusiravacahi eta máechajiriruva ema Viya.

¹⁹ Émaripa ema Herodes Antipas ema aquenucahi, maconsejachahivare vahi macuimiyanaava macuveha esu Herodías, mayenahí ema maparape Felipe. Váhivare macuimiyanaava macuquicha eta apamuriana táïnemahiqueneana máichaqueña. ²⁰ Émasera ema Herodes vahi masuapahini. Masapiha-richucha tisemahi, máimicaratacapa ema Juan, macasiapayarehi te cárcel.

Eta macaicachasirahi ema Jesús

(Mt 3.13-17; Mr 1.9-11)

²¹ Tiuri, te tamirahupaichaha eta macaeratairaya ema Juan, tímiyanavai-chahahi máicachasicavacahi ena achaneana. Étana sache, máitecapauchapa ema Jesús, mavairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjahúchavapa téjiaca eta anuma. ²² Tiúcupaicapa ema Espíritu Santo, mavarimahipaipa eta paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

Ena achaneana máchucaequeanaini ema Jesús eta acane

(Mt 1.1-17)

²³ Tiuri, ema Jesús, macayeheripahi treinta año te tinacuchavapa tímitu-recahi nayehe ena achaneana. Éma, náimijachaquenehi machicha ema José. Ema máiyainihi ema José, ema Elí.

²⁴ Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.

Ema máiyainihivare ema Melqui, ema Jana.

Ema máiyainihivare ema Jana, ema José.

²⁵ Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

26 Ema máiyainihivare ema Nagai, ema Maat.
 Ema máiyainihivare ema Maat, ema Matatías.
 Ema máiyainihivare ema Matatías, ema Semei.
 Ema máiyainihivare ema Semei, ema José.
 Ema máiyainihivare ema José, ema Judá.
27 Ema máiyainihivare ema Judá, ema Joana.
 Ema máiyainihivare ema Joana, ema Resa.
 Ema máiyainihivare ema Resa, ema Zorobabel.
 Ema máiyainihivare ema Zorobabel, ema Salatiel.
 Ema máiyainihivare ema Salatiel, ema Neri.
28 Ema máiyainihivare ema Neri, ema Melqui.
 Ema máiyainihivare ema Melqui, ema Adi.
 Ema máiyainihivare ema Adi, ema Cosam.
 Ema máiyainihivare ema Cosam, ema Elmodam.
 Ema máiyainihivare ema Elmodam, ema Er.
29 Ema máiyainihivare ema Er, ema Josué.
 Ema máiyainihivare ema Josué, ema Eliezer.
 Ema máiyainihivare ema Eliezer, ema Jorim.
 Ema máiyainihivare ema Jorim, ema Matat.
30 Ema máiyainihivare ema Matat, ema Leví.
 Ema máiyainihivare ema Leví, ema Simeón.
 Ema máiyainihivare ema Simeón, ema Judá.
 Ema máiyainihivare ema Judá, ema José.
 Ema máiyainihivare ema José, ema Jonán.
 Ema máiyainihivare ema Jonán, ema Eliaquim.
31 Ema máiyainihivare ema Eliaquim, ema Melea.
 Ema máiyainihivare ema Melea, ema Mainán.
 Ema máiyainihivare ema Mainán, ema Matata.
 Ema máiyainihivare ema Matata, ema Natán.
32 Ema máiyainihivare ema Natán, ema David.
 Ema máiyainihivare ema David, ema Isaí.
 Ema máiyainihivare ema Isaí, ema Obed.
 Ema máiyainihivare ema Obed, ema Booz.
 Ema máiyainihivare ema Booz, ema Salmón.
 Ema máiyainihivare ema Salmón, ema Naasón.
33 Ema máiyainihivare ema Naasón, ema Aminadab.
 Ema máiyainihivare ema Aminadab, ema Aram.
 Ema máiyainihivare ema Aram, ema Esrom.
 Ema máiyainihivare ema Esrom, ema Fares.
 Ema máiyainihivare ema Fares, ema Judá.
34 Ema máiyainihivare ema Judá, ema Jacob.
 Ema máiyainihivare ema Jacob, ema Isaac.
 Ema máiyainihivare ema Isaac, ema Abraham.
 Ema máiyainihivare ema Abraham, ema Taré.
 Ema máiyainihivare ema Taré, ema Nacor.
35 Ema máiyainihivare ema Nacor, ema Serug.
 Ema máiyainihivare ema Serug, ema Ragau.
 Ema máiyainihivare ema Ragau, ema Peleg.
 Ema máiyainihivare ema Peleg, ema Heber.
 Ema máiyainihivare ema Heber, ema Sala.
36 Ema máiyainihivare ema Sala, ema Cainán.

Ema máiyainihivare ema Cainán, ema Arfaxad.
 Ema máiyainihivare ema Arfaxad, ema Sem.
 Ema máiyainihivare ema Sem, ema Noé.
 Ema máiyainihivare ema Noé, ema Lamec.
³⁷ Ema máiyainihivare ema Lamec, ema Matusalén.
 Ema máiyainihivare ema Matusalén, ema Enoc.
 Ema máiyainihivare ema Enoc, ema Jared.
 Ema máiyainihivare ema Jared, ema Mahalaleel.
 Ema máiyainihivare ema Mahalaleel, ema Cainán.
³⁸ Ema máiyainihivare ema Cainán, ema Enós.
 Ema máiyainihivare ema Enós, ema Set.
 Ema máiyainihivare ema Set, ema Adán.
 Ema Adán macaepiyaquenepa me Viya.

4

*Ema Váinaraji Satanás mavaraha macaitsamaraji ema Jesús
 (Mt 4.1-11; Mr 1.12-13)*

¹ Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majunijicayarehi eta cajacure Jordán. ² Cuarenta sache macahehi tayehe. Tájinavare manicahini eta jena sácheanahi. Técuhamasurepa. ³ Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Pécuropa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvali eta Sagrada Escritura, ani tacahehi: “Vahi táchacarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevare, éta ticaitarecarahiyare” —macahepa.

⁵ Tacahe, ema Váinaraji mámavarepa te táinahu eta anuquehe mari. Tíjahú-chavapa máimecha tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. ⁶ Tásiha, máichavarepa ema Váinaraji:

—Núti níjaracavyare tamutu eta juca avasareana. Ichape eta napicau-chiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca. ⁷ Pépuyucanumasera te numirahu pit-siucanu apesa níjaracavisarepa tamutu —máichapa.

⁸ Émasera ema Jesús majicapapa:

—Pévuvisihatataji piti Satanás te juca numirahu. Váhipuca pecha eta táechajiruvali eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemataneacayare” tacahepa. Váliquene taurica nucaemataneacavihini —máichapa ema Jesús.

⁹ Tacahe, vahi máevuisihahini ema Váinaraji. Mámavare te avasare Jerusalén. Máimiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare. ¹⁰ Pécharichuhi eta táechajiruva eta Sagrada Escritura, ani tacahe: “Ema Viya mavanecapa ena mayeheana

ángelleana téchapajiricavianayare, énevaneyarehi tijaneacaviana. **11** Tiámavianayare te navahuana, apaesa vahi picucayutetu eta máriana eta te pipaisiraná” tacahepa. Tásicha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

12 Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya taicha éma Piáquenu” —máichapa.

13 Tacahe, tiyanapa ema Váinaraji. Majunijicapa ema Jesús taicha tímaha-vaipahi vahi máiturucahini macaetema. Mavarahahisera tichavayarehi tiápechavayarehi macaetemapana.

Ema Jesús tépanavapa ticametarairu

(Mt 4.12-17; Mr 1.14-15)

14-15 Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairicavarepa ena apamuriana achaneana ticavasanahi te tachacaya eta avasareana.

Tichavapa ema Jesús te mávasa Nazaret

(Mt 13.53-58; Mr 6.1-6)

16 Tásicha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura. **17** Náichuhasurepa eta máechajicuresiraya. Náijaracapa eta libro májurehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiruvanahi: **18** “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nucanaracayare ena ticatisamurevanahi. Nucaititijicayareva ena máerataruanahi ema tivayuarahi Satanás. Nucaimairiricayareva ena púchuquiana. Nucuchucuhayareva ena ticatajivanahi, níjaracaya eta náuricacarevaya. **19** Numetacayareva járajapainapa eta sácheyare tamutuiraya máetupirica ema Viya, tamutuinapa tiúrisamurécarepa máicha” tacahehi eta Sagrada Escritura eta máechajicurehi.

20 Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tijanearecarahi eta libroana. Téjacavarepa ema Jesús. Náimraracaripa ena achaneana natiahi queñeanahi. **21** Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetac-ahé etá máemunasirahehi ema Viya —macahepa.

22 Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiruvanahi ema maca! Émachuchasera ema machicha ema Joséini ema carpintéroini. ¿Tájahasica etá juca? —nacahepa.

23 Émasera ema Jesús máichavacapa:

—Németeaca éti váhirichuhi esuapapajicanuhini. Tásicha, evaraharinepuca íchanuyare: “Te yátupina píturuequeneha, pípuchavaca ena ticajumanahi te juca. Vímahaséji piápechavavare picuchuca te juca piávasaichu tacuti etá

pímereruhi te avasare Capernaum” íchanuyare. ²⁴ Nutupiruvasera numetac-ahe: Tatuparaca eta epicauchirahaviya vimutu viti mavaneruana ema Viya. Étisera eti nujaneananahi ecavasanahi eta te juca viávasa, vahi epicaucha-nuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya. ²⁵ Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiarihichaha ema profetaini Elías, mapana año y medio vahi taquivahini, tásicha, ichapevare eta ecuha. Németeaca núti camurianahi nácani ena tépenaimana israelítana. ²⁶ Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahi máitecapihayare suyehe esu ésunahi esena apavasana tépenaimahi. Ésupa máimicataruhi táichavenehi eta susuapajiraivahi me Viya. ²⁷ Énaripa ena israelítana nacajumaqueneana eta lepra te jena sácheanahi te matiarihichaha ema profetaini Eliseo. Váhivare énainahini macanaracahini ena majaneanana. Masapihapa macanaracahi ema apavasanaquenehi ticaijare Naamán, ticavasahi te Siria. Ema Naamán, tinaracaripa eta ma-juma, táichavenehi eta masuapajiraivahi –máichavacapa ema Jesús.

²⁸ Tacahe, eta juca máichiravacahi ema Jesús, tisemanapa ena natarihi-queneanahi. ²⁹ Tásicha téchepumurihanapa éna. Nacuchucapa ema Jesús te tachachacu eta avasare, te tachaui eta táupenaquene, navarahapa nacami-ricayarehi éma. ³⁰ Émasera tichavapa mánucumurihanaipa éna. Tiyanapa, majunijicavacapa.

*Ema Jesús máimijuna ema éreana tiávhácainihi ema achane
(Mr 1.21-28)*

³¹ Tacahe, títecápapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujisirareva ena achaneana, tímitu-repanaya. ³² Ichape náramihi ena achaneana eta máimiturapianahi taicha téavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

³³ Étana sávaru, matiarihihi te namuri ema émana achane mávaháruhi ema éreana. Tipiararecahi, ánipa macahe:

³⁴ —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivara-hainapapuca picajanerepaicahaviyare –macahepa ema achane.

³⁵ Tacahe ema Jesús macajachapa ema éreana. Ánipa maicha:

—¡Pámatina! ¡Piyana pijunijica ema maca achane! —máichapa.

Tásicha, tíjahúchava tiáquipaicavapa te apaquehe ema achane. Tásicha majuni-jiacapa ema éreana. Tájinaserá máichavahini ema achane. ³⁶ Náraminehi ichape namutu ena achaneana eta náimairahi. Tiyaserejiricacanapa:

—¿Tájahasica tacayema eta juca? Ema maca Jesús, téavicava eta máitupajijiá-siravahi, maratahahi máquijica nácani éreana. Tásicha, ichape eta napisirahi éma. Vahi najicapaemachahini. Tamutupa arairu eta máimiturapianahi ema maca –nacahepa.

³⁷ Enevanevarepa naecha namutu ena achaneana eta juca máichaque-neanahi ema Jesús. Énaripa ena ticavasanahi te avasareana eta te provincia Galilea.

*Ema Jesús macanaraca esu máimase ema Pedro
(Mt 8.14-15; Mr 1.29-31)*

³⁸ Te tiúchucapa ema Jesús tayehe eta nárujisirareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre. ³⁹ Tásiha, ma-pauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajíricapa éma, énapa ena máimitureana.

Camuriana ena macanararuanapahi ema Jesús

(Mt 8.16-17; Mr 1.32-34)

⁴⁰ Te jena cáperehiquenehi, te téricapa eta sache, ena achaneana námava-capipa namutu ena nacajumaqueneana eta mayehe ema Jesús. Apana-paneneji eta najumanapahi éna. Manacapaipa eta mavahu te náinahuana, macanaracapaipahi. ⁴¹ Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusিrapahi. Ánipa nacahe:

—Pítira Machichaquenevi ema Viya.

Émasera ema Jesús vaipa másapahini náimiyanavahini napiaraca éma, taicha námatihi éna eta émairahi ema Cristo.

Tamutu avasareana te Galilea mapaica ema Jesús

(Mr 1.35-39)

⁴² Te apanapa sache, te tijararahipa, tiyanapa ema Jesús te mávapahi. Natanucapasera ena achaneana. Náetupiasirapa éma tayehe eta mávihahi. Navarahapa náiminachayarehini. Vaipa náisapahini mayanahini. ⁴³ Émasera ema Jesús máichavacapa:

—Nutuparacasivaichuhi eta nuyanirayare tayehe eta apapa avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

⁴⁴ Tacahe, tiyanapa tipaica ticametarairupaipa te nárujisirarevana tayehe eta avasareana te Galilea.

5

Tiáramicarepa eta náitusiravahi eta jima

(Mt 4.18-22; Mr 1.16-20)

¹ Te jena sácheinahí, ema Jesús mávinehi te tachausi eta cáquiure ticai-jare Galilea. Títecapanapa ena camuriqueneana achaneana. Váipanecha náratavahini, tipamihejíricacanapa eta navarairahi nasama eta macameta-rairuirahi ema Jesús eta máechajiriruvana ema Viya.

² Máimahapa ema Jesús eta apisi pacure te tachausi. Ena ticayeheana eta pacureana, tisipajíricanahi eta ichapequeneana nayutaheana. ³ Tacahe, ema Jesús tiávacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana. ⁴ Te titapíricapa eta máimitusিravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

⁵ Ema Pedro majicapapa:

—Maestro, tamutu yati vinajuiricahi, tájinaserá vítucavahini. Tavetijipa puiti eta tajarahiraripa. Nusuapavisera eta juca pivanesiranuhi, náquijiecaya eta nuyutahe —máichapa.

⁶ Jéhesaréinehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima. ⁷⁻¹⁰ Natarihihisera te apana pacure ena nachamuriana: ema

Jacobo émapa ema Juan. Tacahe, náevehauquichapa tímicatacanayarehi. Te títecapanapa, náinicachapa eta apisiquene pacure. Tiánehirichahavare vahi táratavayarehini taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiba, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Válchica nímiuriacava nutupihamirauchavi núti. Nucapecaturarahuquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tiáramecanarinehi éna, énapa ena apamuriana natarihiqueneanahí. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti níjaracaviya eta apana pématanerepiyare. Pitanucainapa ena achaneana nuchaneranaya —máichapa.

¹¹ Tacahe, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

Ema Jesús macanaraca ema émana achane leproso

(Mt 8.1-4; Mr 1.40-45)

¹² Tacahe, eta mánucuirapapaipahi ema Jesús etá avasarechicha, mácapajicapa ema émana achane macajumaquenehi eta lepra, tamutu eta máquehe. Eta náimairahi ema Jesús, máitecapauchapa. Tépuyucapa te mamirahu. Máichapa:

—Tata, nucasiñavahi eta piyehe, picanaracanupaini.

¹³ Majicapapa ema Jesús:

—Nuvaraha nucanaracavi. Tájinapa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi.

¹⁴ Matuparacapasera ema Jesús. Ánipa máicha:

—Pímaha, nacuija picumetaca eta nútirahi nucanaracavihi. Piyanavaresera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

¹⁵ Tásihasera, náechapa namutu ena achaneana te avasareana etá máitupajijiasiravahi ema Jesús. Nayanauchapaipa ena camuriqueneana achaneana, navarairahi nasamararacayarehi, macanarasiravacayarehiva tayehe etá najumana. ¹⁶ Émasera ema Jesús, majunijimurihachucha. Tiyanapa tayehe etá mávapahianahi apauehe. Ánaqui mayujarasihayarehi.

Ema Jesús macanaraca ema émana achane macajumaquene eta muracauqua

(Mt 9.1-8; Mr 2.1-12)

¹⁷ Étana sache ema Jesús tímiturecahi te tajuhe etá peti, camuriana ena achaneana. Natiarihihivare ena fariséoana tépiyacavana religíosoana, énapa ena escribánoana, tímatiana etá nayeherepiana ena israelítana. Éna, tiásihanahi te Jerusalén, ena apamuriana tiásihanahivare te avasarechichana tayehe etá Galilea, étapa te Judea. Ema Viya máimicatacahi ema Jesús etá macanarasiravacayarepahi ena nacajumaqueneana. ¹⁸ Títecapanavarepa ena apamuriana, námapahi te áchuji ema achane muracaha. Navarahainipa nacasiapa te tajuhe te mávihahi ema Jesús. ¹⁹ Étasera etá nayututusiravahi ena achaneana, vahi náitujicavahini nasiapahini. Tímipanerechavanapasera

náimiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchuchucapa ema macajumaquene. ²⁰ Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

²¹ Ena escribánoana énapa ena fariséoana, eta napanerequenehairahi eta macayemaquenehi ema Jesús, tisemanarinehi. Ánipa nacahe te nasamureana: “Ema maca tímijachavaipapu Viya eta macaepahairayaréji eta pecatuana. ¡Tétavicava eta matapirava! ¡Taicha macarichu ema Viya marataha macaepaha eta pecatuana!” tacahehi eta napanereruana.

²² Émasera ema Jesús máimatihi eta napanereruanahi. Máichavacapa:

—¿Tájaha tacayema téjepavahi eta epanereruana? ²³ Tájina táejeravaina eta níchirahi ema maca: “Nucaepahainavipa eta pipecaturanaini”. Máejera-repánapuca eta níchahini: “Péchepuca, piyana pipaica”. ²⁴ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi péchepuca. Piveha eta jara piyere ruva. Piyana te pipena —máichapa ema Jesús.

²⁵ Enevaneinehi téchepuruca ema macajumaquenéni. Mavehapa eta mayereruva. Tipaicapa te namirahu ena achaneana. Tiyanapa te mapena. Ichaperinehi eta macunachirapahi ema Viya. ²⁶ Ichaperinehivare eta náramirahi namutu ena natarihiqueneanahi. Tétavicavarinehi eta nacunachirahi ema Viya, napicaucharinehivare. Ánipa nacahe:

—Tétavicavava táramicareva eta juca vímahaquenehi puiti —nacahepa.

*Ema Jesús máichuha ema Mateo, mayeheyare apóstole
(Mt 9.9-13; Mr 2.13-17)*

²⁷ Te táequenepa eta júcana, ema Jesús tiúchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahuayahi eta macobraresirahi eta impuesto.

—Yare, péhicanu —máichapa ema Jesús.

²⁸ Enurujipa téchepucahi ema Mateo. Manaquicapa tamutu eta matuparahuinhi. Tiyanapa máehicahi ema Jesús.

²⁹ Tacahe, te jena sácheanahi, tépiyarecpa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobrarecarahiana impuesto, énapa ena apamuriana máemunacasareana ema Mateo. ³⁰ Natarihihivare ena máimitureana ema Jesús. Tásiba títecapanavarepa ena fariséoana énapa ena escribánoana. Eta tímianavacahi, ticaecahirecanayarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena nánitatajiana ticobra recarahiana eta impuesto? ¡Tétavicavahi eta nacapecaturaraivahi! —nacahepa.

³¹ Émasera ema Jesús, te masamairiricapa eta náechajiriruvanahi, máichavacapa:

—Ena majumareanahi vahi nácamunuimahi ema médico. ³² Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahí apaesa náitsivacha eta napanereruana, náeneuchavapa me Viya —máichapa ema Jesús.

*Nayaserecpa ema Jesús tayehe eta ayuna
(Mt 9.14-17; Mr 2.18-22)*

³³ Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásaha, ena pímitureana píti tinicanahi, téranahivare —náichapa.

³⁴ Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuhaqueneanahi tinicanayare nayehe ena araimana. Tiúrisamureanayarehi taicha matiarihihi ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayúnanainahíni ena nímitureana. ³⁵ Járajapainapasera eta sácheyare, ticaverejicasianayare, taicha ticaratacanuanainapa ena ticipacanuanayare núti. Jéhevarepa ayunanainapa. ³⁶⁻³⁸ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tacutecacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tamauriqueneanahi. ³⁹ Ticajerasera eta náinajisirahi ena achaneana eta nayeherepiana tamauriqueneana. Apaesachicharichu eta navarairahi naicha eta juca arairu nayeherepianayare. Namutuyaréni navaraha náimiyanova eta nayeherepiana tásahaqueneanahi eta napanereruana ena náchucanaveanaini —máichavacapa ema Jesús.

6

Ena fariséoana náimipicauchahi eta nayeherepiana tayehe eta sávarumuahuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Mr 2.23-28)

¹ Eta jena sache sávaruquenehi, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanitiana. Tacahe, eta napaisirapahi, ena máimitureana navechuquihaipapihi étajavapahi eta trigo. Navepiraquihaipa, tépurajacachavanapaipa. Tinicanapaipa. Tísapacareichucha eta nanisira, taicha técuhanahi. ² Tacahe, eta náimararasirapahi ena fariséoana, tisemanapaipa. Ánipa naicha:

—¿Tájaha tacayema vahi epicaucha éti eta juca sache tacapicahuquenehi? Écharichuhi éti vahi tísapacarémahi eta vicaematanerahí puiti. Eta juca evepiraquihaipahi eta trigo, ticaijare ecaematanehi —náichapa.

³ Tásaha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahí ema víyarahaini David eta mapaisirapahi técuhaipa, énerichuvare ena téhicanapahi. ⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te namirahu ema Viya. Nanicasarehi ena tiyujacarrahiana émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

Ema Jesús macanaraca ema achane tépenavahu

(Mt 12.9-14; Mr 3.1-6)

⁶ Tiuri, te apanapa sávaru, tiyanavarepa ema Jesús tayehe eta náurujisi rareva. Tímiturecavarepa. Tásaha, matiarihihi ema émana achane, ticaicumahi

eta mavahu váure. Vaipa tayamuricahini, tépenavahuhi. ⁷ Natiarihihivare ena escribánoana, énapa ena fariséoana. Náimaharipahi ema Jesús te macanaracayarehipuca ema macajumaquene eta jena sache tacapicahuquenehi. Natanunuircachi eta tiviuchayarehi éma. ⁸ Émasera ema Jesús máimatihi eta napanerueruana éna. Tacahe, máechajicapa ema achane ticaicumavahuhi. Máichapa:

—Yare, pitupihayare ani te namirahu ena achaneana —máichapa.

Tásicha, titupihapa ema achane te namirahu. ⁹ Tásicha, máichavacapa ema Jesús:

—Nuvaraha epanerechaya. Puiti juca sache sávarumuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahí, ¿masi? ¿Ímijachapuca tiúriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

¹⁰ Tacahe, ema Jesús máesenimurihapa ena achaneana. Tásicha, máichapa ema achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ¹¹ Tacahe, tisemanarinehi ena fariséoana eta náimairahi. Tásicha, tiyaserejircacanapa:

—¿Tájahapuca vícharacaini ema mácatataji eta táimicaviúchaini? —nacahepa.

Ema Jesús manerejica ena dócequeneana apóstoleanayarehi

(Mt 10.1-4; Mr 3.13-19)

¹² Te jena sácheinahí, tiyanapa ema Jesús tayehe eta tápusi eta márijuecu. Tamutu eta jena yati tiyujaracahi me Viya. ¹³ Te tijarahipa, máichuhavacapa namutu ena máimitureana. Manerejicapa ena dócequeneana mayeheanayarehi apóstole. ¹⁴⁻¹⁶ Ena nani ena manerejiruanahí: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apaña Jacobo; émapa ema apañavare Simón; émapa ema Judas; émapa ema Júlasi Iscariote (ema tíjararecahi ema Jesús).

Ema Jesús máimitucavaca ena camuriqueneana achaneana

(Mt 4.23-25)

¹⁷ Tacahe, tichavapa ema Jesús, énapa ena máimitureana. Te tachachacu eta mari tainunapahinepa, étapa nacainunainehi ena camuriqueneana achaneana. Ena nani tiásihanahí eta te avasare Jerusalén, eta te provincia Judea, étapa eta provincia Siria. Eta tímitecanahí éna, navarahahi nasama ema Jesús eta máimiturapiana, navarahavare macanaracavacahini tayehe eta najumana. ¹⁸ Ena ticatajivanahí návaháruanahí ena éreanana, macanaracavacapaserá ema Jesús. ¹⁹ Namutu ena achaneana navarahahi náemamahaca ema Jesús taicha náechahi tinaracanayarehi eta najumana eta náemamahasirayare taicha titupajijiacavahi éma.

Ema Jesús máimitucahi nayehe ena ticunachacareanahí me Viya

(Mt 5.1-12)

* **6:14-16** Ema apaña Jacobo machichahi ema Alfeo. Ema apaña Simón, tímaticarehi éma, náumu-rivainihi ena revolucionároana ticaijareanahí “cananístana”. Navaraha náquijica ena extranjeroana romanoana, énaripa nacapauquerecavacahi ena israelítana. Eta májuchirahi ema Lucas, ani macahehi: “...ema Judas mayehe ema Jacobo...”. Váipasera vecha te machichahipuca ema Jacobo, téhevare maparapehipuca. Véchahisera eta mapapirahi eta máijare ema Judas. Ticaijarehi Lebeo étapa eta Tadeo. (Te pivaraha pécha, pitanuca te Mateo 10.3 étapa te Marcos 3.16-19.)

20 Tacahe, máesenimurihana ema Jesús ena máimitureana. Máichavacapa:

—Éti ímatihi eta tacamunuqueneanahi eta iáchanevana, tétavicavahi eta iúricacarevayarehi taicha máejerare eta ejacapirayare eta máechajiruva ema Viya, machanerahérayarehi. **21** Eti ejamurachahi puiti eta ítaresirahi eta matapiravarecare te mamirahu ema Viya, tétavicavahi eta iúricacarevayarehi taicha tíjaracaheyare éma eta evarahaquenehi.

Eti íyauchavanahai puiti taicha eta epecaturana, tétavicavahi eta iúricacarevayarehi. Títecapainapa eta evapinavairaya, écavainapa, taicha eperdonachacareya me Viya.

22-23 Eti nuchaneranahi, járajapainapa eta sache ticatianacaheanainapa ena achaneana, navarahainapa tiáquijicaheana. Tipanararachaheanainapa. Nacatianapicainapa eta íjareana. Eta juca náichiraheyarehi, táchavenehi eta éhisiranuhi nuti Manerejirunuhi ema Viya. Váhisera ecuarami eta juca. Ene nacahehi eta nacatajivairahi ena profetanaini. Te ticatianacaheanahi, jecurisamurechavachucha, evapinavavare! ¡Tétavicava eta iúricacarevaya taicha ejacapainapa eta ícuchirichuhi te anuma!

Ema Jesús máimitucahi nayehe ena tavayuaruanahi eta tájiparacana

24 Tacahe, ema Jesús máechajicapa ena apamuriana achaneana, tímicutijiricavahi natarihihi te mamirahu, tiyerehianahisera éna. Ánipa máicha:

—Eti evapinavapa eta ecaimahaquenerahi, páurehesamiyare éti. Tíchechuhainapa eta evapinairavainihi.

25 Páurehesami eti esatuhehererecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

26 Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavaranahui ema Viya, tivayuarahianahisera.

Vémunacayare ena ticatianacahaviana

(Mt 5.38-48; 7.12)

27 Puítiripa eti esamanuanahi, numetacahe: Émunacayare ena ticatianacaheana. Ímereca eta iúriva nayehe ena ticatichaheanahi. **28** Eyaseaca ema Viya eta nayujarahuina nácani téchajicanahi eyehe. Eyujaraucha ena tiúmehaheanahi. **29** Te máehahepuca mácani achane te emira, vahi ecujicapa. Íjaracasera eta étachacaya eta emira. Te naverejicahepuca eta esacu, ísapayare. Te naverejicahevare eta ecámisa, énerichuvare ísapayare. **30** Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina. **31** Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

32 Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya. **33** Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tiúrianahi eyehe. Apanasica títsirijicavanahi ena máimatirahanahi ema Viya. Tituparacahe ecachuricavacayare eta iúriva. **34** Téhevare nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi ema Viya tíjaracana ena títsirijicavanahi te ticapurecana.

35 Étisera émunacayare ena ticatianacaheana. Íchayareva eta táuriqueneana nayehe namutu. Íjaracavare nácani ticapucaheana. Vahi ecucuchapa eta

náitsirijirápiyare. Mái maharíne ema Viya. Éma tíjaracaheyare eta táitsivayarehi eta iúrivanahi. Eta tacahéhi eta ímtereuchirava eta machichaheira ema Tata Vicaiyaquene. Taicha éma, téavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna. ³⁶ Ejapanurahiyareva, ecutiyare eta majapanuirahavihi ema Tata Vicaiyaquene.

Ema Jesús tímitucahavi eta vahi vicucune eta náejecapiravana ena apamuriana achaneana; výtinasera vicuneuchava
(Mt 7.1-5)

³⁷ Vahi ecunemahi eta náejecapiravana ena apamuriana achaneana, vähivare ecucaeahivaca, machu étina táimicuñacahe me Viya. Te máejecapavapuca mácani achane, vahi ecuvaraha macaicuñavane, apaesa vahi macuicuñacahe éti ema Viya. Eperdonacha ena téjecapavana eyehe apaesa maperdonachahe ema Viya. ³⁸ Ecajirahiya nayehe ena achaneana. Ema Viya títsirijicavayare eyehe. Tímepanávainapa eta máijararuheyare éma. Te iúrihi éti nayehe ena achaneana, ema Viya, téavicavayarehi eta máurivaya eta eyehe éti.

³⁹ Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucacanaimahi ena apinana púchuquiana, taicha tiáquipacavanayarehi te pusu. ⁴⁰ Émaripa mácani amaperu te escuelahipuca, váiparinehi macachuricaimahi mácani mayehe maestro. Tapaenumava te máitucapa, macutisarepa ema mayehe maestro.

⁴¹ Vahi taurica eta ecunerahi eta ánichichaqueneana náejecapiravana ena apamuriana achaneana. Tituparacahe ecuneuchava eta táchapeva eta éjecapirava étijiva. ⁴² Vahi tituparacahemahi étupirica eta jácani ánichichaquenehi máejecapiravahi ema eparaepiya. Tájina eviyahini eta econsejarapinahini. Ichapesera eta tatuparasirahehi étupirica eta éjecapiravanahi éti. Tapaenumava eta étupirisirapa eta íchavaquenévanahi, tauricapaini econsejacha ema eparaepiya tayeha eta máichavaquenévahí.

Ema Jesús máimicuticha nayehe ena achaneana eta tacahirahi eta yuquiana

(Mt 7.17-20; 12.34-35)

⁴³ Tacutiquene tímaticarehivare eta táhiana eta yucoquiana. Jararihi eta tinicacareana. Jararihivare eta vahi tánicacare. ⁴⁴ Énerichuvare eta yuquui tímaticarehi eta táurinisiva eta táhi. Étaripa eta sitavere, váiparinehi tiúchucaimahi eta táhihini narasahinahipucaini. Tásiha, eta ijicaqui váiparinehivare tacahimahi eta tahi cachicheruhinahini. ⁴⁵ Ene nácahe nácani tiúriana achaneana tatupiruvahi eta náechajirisirava taicha tiúrihi eta nasamure. Nácanisera achaneana váinaraipaneruruana, vahi tiúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

Ema Jesús máimicuticha ena tisuapajirahiana énapa ena masuapajirairahana
(Mt 7.24-27)

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

⁴⁷ Nácani tisuapanuanahi náitauchahivare eta nuvanairipianahi, téchemarahanahi táicha. Nuvaraha nímicutichinahe éna. ⁴⁸ Nacutiyarehi mácani tituca ticatupiareca peti, manacayarehi eta túmeana yucoqui emuruquiana. Tiúpenavacahi máicha eta masucuqueruana. Jéhesare te járajapapa eta muraca

técaticava, tiámaquiha eta tiquiva, tisiamapa eta une, váipasera tacaeyaya-cahini eta peti, taicha máetupiricahi eta máepiyasirahi. ⁴⁹ Nararihivare ena tépiyacavana tisuapanuana, váhisera náitauchahini eta nuvanairipiana. Éna nacutihí ema máitucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técaticava, tisiamavarepa eta une, tacajimuyapaicapa eta apaquehe. Tíjahúchavapa tiáquipaicava eta peti, témitiequenepa tamutu —máichavacapa ema Jesús.

7

*Ema Jesús macanaraca ema manusura ema capitán romano
(Mt 8:5-13)*

¹ Tiuri, te titapiricapa ema Jesús etá máimitusiravacahi ena achaneana, tichavapa eta te avasare Capernaúm. ² Matiarihihi ema achane apavasana. Comandante éma nayehe ena suntaruana romanoana. Capitán etá mávacure. Ticajumahí ema manusura. Tiánehiripahi tépena. Ichaperinehi etá máeñamiravahi taicha máemunaruquenehi ema manusurahi. ³ Tacahe, te masamai-riricapa ema capitán etá matiarihirahi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema manusura. ⁴⁻⁵ Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te viávasahi. Ichapemuri etá máimicasirahavihi. Máemepiyarecahivre etá ichape peti etá viúrujisirareva etá viyujarasi-rarehi. Tásicha puiti, tivanecahavihi víchuhapanávi picatajicahini picanara-sinapanahini ema manusura. Tatuparacahi pímicatacaini ema maena —náichapa.

⁶ Tacahe, ema Jesús tísapavapa tiyana, máehicavacapa éna. Étasera te tiánehianapa etá mapena, mavanecavacapa ema capitán ena máimatica-sareana, nametapana ema Jesús. Ánipa naicha:

—Tata Jesús, etá juca máechajiriruvahi ema capitán: “Tata, vahi picucaeñamacava etá pítesiraina etá nuyehe, taicha vahi táuricahini pisiapauchanusa-mihini te nupena. ⁷⁻⁸ Eta tacahe, vahi nupatsicavahini nútijacarúvainahini níchuhapanávi. Németeaca tarataharichu picavanairipi etá picanarasiraya ema numusura. Taicha núti nusuapahi te tivanecanuana ena anuquehe-pananahi etá nuyehe. Nútiripa nusuapacarehivre nayehe ena nusuntaranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipta tisuapanuvane” macahepa.

⁹ Te masamapa ema Jesús etá juca, ichaperinehi márami etá yátupirahi macasiñavairahi etá mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mácutini ema maca achane apavasana etá macasiñavairahi etá nuyehe —máichavacapa.

¹⁰ Tacahe, nacarinepa tichavanahí ena vanairucana. Te títecapanapa, náimaharinehi ema macajumaquenehini, tinaracaripa.

Ema Jesús macaecheputa ema amaperu máepenaquenehi, suchicha esu esena suépenaímaquene

¹¹ Te taequenepa etá juca, tiyanavarepa ema Jesús tayehe etá avasare ticaijare Naín. Náehicaphivare ena máimitureana, énapa ena camuri-queneana achaneana. ¹² Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camuriana-pahivare ena achaneana téhicanapahi. Éma máepenaquenehi, macarichuhi

suchichahi esu esena suépenaimaquenehi. ¹³ Eta máimairahi ema Viáquenu, majapanurinehi esu esena. Tásicha, máichapa:

—Vahi picuiyaha —macahepa.

¹⁴ Tásicha, mapauchapa ena tiámanapahi ema máepenaquene. Titupihanapa éna. Máemamahicapa eta macajone. Tásicha, macahepa:

—Nuchicha, nútí nuvanecavi, péchepuca —macahepa.

¹⁵ Enevanerinehi téchepucapa ema amaperu máepenaquenénihi. Téchajicapa ema amaperu. Tásicha, ema Jesús máijaracapa esu maena. ¹⁶ Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétavicava eta macunachacareva ema Viya. Jéhevare ema maca achane yátupiquene profeta, mavaneruhi ema Viya. Tétavicavapa táurisamurecareva eta máuchusirahi te vimuri —nacahepa.

Ena apamuriana ánívare nacahe:

—Ema Viya tiúcupauchahavihi tímicatapanahávihi viti machaneranahi —nacahepa.

¹⁷ Eta juca máichaquenehi ema Jesús, téchacarevanepa tamutu avasareana te návasanahi ena israelítana. Títecavarepa te tányerehiqueneana avasareana.

*Ema Juan Tícachasiricarahi mavanecavacapa ena máimitureana
(Mt 11.2-19)*

¹⁸ Énerichuvare ema Juan, te mávhahi te cárcel, masamairiricapa eta juca taicha nametacapa ena máimitureana. ¹⁹ Tacahe, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapaquenehi. ²⁰ Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanavyare te yátupihipuca pítiripahipuca Cristo ema vicuchapaquenehi. ¿Téheserapuca vímiyanavaya-repuca vicuchapa? —náichapa.

²¹ Eta náitecapauchirahi ema Jesús, éma ticanrarerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávhácanahi nácani achaneana. Macaimairiricavare ena mavera-queneana púchuquiana. ²² Tacahe, ema Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiana. Nímpaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepena-queneanaini. Énerichuvare níchuhahi ena páureana náeneuchava apaesa náuchucuha. Tásicha, eyana emetaca ema Juan tamutu eta níchaqueneanahi. ²³ Vaipa macueñamava ema Juan eta nuyehe. Tétavicavapa eta máuricacarevahí éma, te ticasíñavahi eta nuyehe —máichavacapa ema Jesús.

²⁴ Tacahe, tichavanapa ena vanairucanahi me Juan. Tásicha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacrahini éma, te eyanapa te mávapahi apaquehe te mávhahi, ¿tájaha eta epanereruana tayehe eta macametarairuirahi? Éti ímijachavaipapuca mamapachichijiru-vaichucha eta máechajisirahi tacutihi te vímararaca eta taflurena eta acutena te tacayamuririjicahi eta técaticava. ²⁵ Ímijachaipavarepuca tavayuaruhi ema tiúrinanácvayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare

tiyanaimahi te mávapahiana apaquehe. Manasiqueneyarehi te jácani tiúrina peti. ²⁶ Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. ²⁷ Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvane-cayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiravyare” tacahepa eta Sagrada Escritura. ²⁸ Núti nutupiruva numetacahe: Ema maca Juan, nájina mácuti nayehe ena achaneana. Tétavicava eta macunachacarevahi. Iápajupanavahisera eta ecunachacarevahi eti nuchaneranahi, apaesachicharipa eta ecaicutiarairahi eta mapanereruanahi ema Tata. ²⁹ Ena achaneana, énaripa ena tisipecaturarahianaini, náimatiacahi ema Juan eta mavanecasivahi me Viya. Nasuapahivare eta mametarairuana ema Juan. Eta tacahe, ticaicachasianapa mayehe. ³⁰ Énasera ena fariséoana énapa ena máestroana, éna másapavarahanahi nacaicachasihini mayehe ema Juan. Témepururecavanaripa eta náurivayarehini maicha ema Viya.

³¹⁻³² Etiarihihi eti achaneana puiti juca sácheana, eta emasuapajiraivahi, nímicutichinahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepuca: “Vépiyacapa eta piéstachicha”. Énasera ena apamuriana vahi náisapavahini. Tásicha, ema apana macahepuca: “Vépiyacapa eta ecari”. Váhivaresera náisapavahini. ³³ Ema Juan Tícachasircarahi, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararishera te emuri ena tépiyaequenehanahi éma. Náimijachahi mávaháruhi ema éreana. ³⁴ Núti Manerejirunuhi ema Viya, eta nítcapauchirahape, nucachaneheripa eti achaneana eta enisirahi. Etiarihihivaresera eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena cóbrarecarahianatataji énapa ena apamuriana nasípecaturarahi-queneanahi”. ³⁵ Éti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihipucaini échemarahihini, ímatinuhini eta nucavanahirahi eta me Tata*.

Ema Jesús ticaichuhacasihi te mapena ema fariseo ticaijarehivre Simón

³⁶ Matiarihihi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyanapa. Te tiúripa eta tinicacare, téjacapa te mesa. ³⁷ Susamairircapa esu ésuna esena tisipecaturarahinihi eta matiarihirahi ema Jesús te mapena ema fariseo. Tásicha, tiyanapa supauchahi ema Jesús. Suámapaipa eta bótechicha. Tínicapahi eta táijiyequene perfume tasivachaquenehi. ³⁸ Tépuyucapa te máivapeana ema Jesús. Tíyahacavapa, táetsipapapevachapa eta sutsera. Suájahapa te suchutimaca. Tásicha, suépusapevachavare eta suámaquenepahi perfume, sutsiucapevachavare. ³⁹ Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetainahini ema maca, máimatiacaripahini esu suca esena eta susípecaturaraivatatajihi. Vahi táuricahini suémamacahini” macahesamurepa. ⁴⁰ Émasera ema Jesús masamahi eta mapanereruhi ema fariseo. Máichapa:

* ^{7:35} Eta juca mayeherepi proverbio ema Jesús te máechajiruva, ani tacahe: “Eta téchemarahicaré, éta nacunachihayare namutu ena tachichanaveana”. Tatarihi eta tacayemaquenehi tayumurevahi.

—Simón, jucarihi nuvaraha numetacaviya.

Ema fariseo majicapapa:

—Nímahaseji, pimetacanu, maestro —máichapa.

41 Tacahe, ema Jesús máimicutarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana ticantevehi quiniento; ema apana ticantevehi cincuenta. **42** Tacahe, vahi náratahahini navachachahini eta nanteveana. Tásicha, maperdonachavaca ema rico ena apinana. Tiuri puiti, nuyaserecavyare. Ena nani apinana, ¿nájahapuca ema témunacapanahi ema rico? —máichapa.

43 Majicapapa ema Simón:

—Ticutimahi ema tisintevepanahi.

Tacahe, máichapa ema Jesús:

—Pímaipajira.

44 Tacahe, ema Jesús máimararacaripahi esu esena. Tásicha, máichapa:

—Pipanereaca esu suca esena. Puítihi, te nusiapapa te pipena, vahi pímisipacahini eta nívape. Ésusera esu suca esena tisipapevachanuhi te sutsera, tiájapevachanupa te suchutimaca. **45** Pítí vahi pitsiucanuhini eta pijacapiranuhi. Ésusera, ichapemurihi eta sutsiucepavachiranuhi. **46** Váhivare piámasichanuhini eta aceite eta pijacapiranuhi. Ésusera esu suca esena tisipapevachanuhi eta te táijiyequene perfume. **47** Yátupi tisipecaturainihi esu suca. Numetacavyaresera, nuperdonacharipahi ésu tamutu eta supecaturanaini. Eta tacahe, ichape eta suímeresirahi eta yátupirahi eta suémunasi-ranuhi. Nácanisera apaesarichuhi eta napecaturanaini, apaesarichuhivare eta náemunaraiva, taicha apaesarichuhivare eta najacapirahi eta nayehe perdón.

48 Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

49 Tacahe, ena natarihiqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatuana?” —nacahepa.

50 Émasera ema Jesús máichapa esu esena:

—Táuricapa piyana. Yátupi eta piúchucuhairaya táichavenehi eta picasiñai-ranuhi.

8

Natiarihihivare ena esenana titátianapahi ema Jesús te mapaisihapahi tayehe eta avasareana

1 Te taequenepa eta juca, tiyanavarepa ema Jesús, tipaicahi tayehe eta tasimutuqueneana avasarechichana. Ticametairupahi eta máechajiriruva ema Viya eta náuchucuirayare ena ticasíñavanahi mayehe, machaneranayarehi. Náehicaphivare ena dócequeneana apóstoleana. **2** Énerichuvare náehicaphi ena esenana máepachiaruanahi nayehe ena éreanana tiávaháca-nainihi. Sutiarihipahi emu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuhanahi tayehe eta apanapanenejiqueneanahi najumanainihi. **3** Sutiarihipahi emu Susana, ésupa emu Juana, mayena ema Chuza. (Ema Chuza, mayehehi empleado ema Herodes, téchahi tamutu eta máimahqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

Eta máimicutichaquenehi evaraqui tacaevaquenehi te apanapaneneji máteji te apaquehe

(Mt 13.1-9; Mr 4.1-3)

⁴ Te jena sácheinahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuri-queneana, máechajicavacapa; máimicutiarachinapa eta máimitusiravacahi. Ánipa máicha:

⁵ —Matiarihi ema émana achane. Tévapanahi te máesane. Tásihasera, eta mapaisirapahi témiricapaipapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui táemiriruanapahi. Táimahapa eta cágure, tanicapa. ⁶ Tásiha, eta apana evaraqui témiricapa te máripahi apauehe. Tímarucainipa, tásihasera tájijicapa eta sache taicha muracapahihi eta apauehe. ⁷ Eta apana evaraqui témiricapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa. ⁸ Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Táijaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya — macahepa.

Ema Jesús máitametacavaca ena máimitureana eta juca máimiturapihi

(Mt 13.10-23; Mr 4.10-20)

⁹ Tacache, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi. ¹⁰ Émasera máichavacapa:

—Ema Tata tituparacanu nítametacaheyare éti eta juca mapanereruana taequenereruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejeraré mahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapihana.

¹¹ Étara eta juca tacayemaquenehi: Eta evaraqui tímicutijiricavahi eta máechajiruva ema Viya eta nímiturapihanahi. ¹² Natarihi ena achaneana nasamaripahinéni eta nímiturapihanahi, émasera ema Váinaraji vahi másapahini tánasihini te nasamureana. Enevanehi macamitisicavaca eta nasamaquenehi, mamavarairahi nacasiñanuhini apaesa nucuchucuhavacayarehini. Éna, nacutihi eta máteji muracapahi te achene.

¹³ Natarihivare ena apamuriana achaneana, nacutihi eta máteji máripahi. Te nasamararaca eta nímiturapihana, nasuapa, tiúrisamureanarinehi. Váhisera naratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi. Tínajicavanávane taicha eta náimairavahi eta nacatajivairahi. ¹⁴ Natarihivare ena apamuriana achaneana nacuti eta máteji te távhahi eta itapequiji. Énerichuvare nasamararacahinéni eta nímiturapihana. Napaneréquenehahinéni, tahapapiricavacahisera eta jácani táicharacavayare eta náitaresira. Váhivare náinajicahíni eta tacaeñamarasiravaca eta tájiparacana, étapa eta navarairahi tirricochavana. Váhivare náinajicahini eta náichirahi eta tamauriqueneana. Tamutu eta juca táemetavicahi eta navarairahi téhicanuana. Tamapurujíhi eta najacapirahi eta nímiturapihana. Tájina vahi nacaemataneacahini ema Viya. ¹⁵ Natarihisera ena apamuriana achaneana nacutihi eta tiúrina máteji. Éna, nasamararacahi eta nímiturapihana, náunacahi yátupi te

nasamureana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Vahi nayacujimahi.

*Ema Jesús máimicutiarachava eta lámpara eta máimituresira
(Mr 4.21-25)*

¹⁶ Ánivare macahe:

—Súnsuanahi nácani tiyustacanahi eta lámpara namicahuyarehi, tásihasera, najihapaicapapucaini, nanacavarepuccaini te tápecu eta náetsatsame náimasirare. Vahi tamicauchaimahi. Tacamuñuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairicanayarepahi. ¹⁷ Tayanapanepuca ticayumuru-quianahi, tamutuyarehisera ticaechera jácani tayumururevanahi. Tájina tépacuchaimahi jácani najaairairuvanahi. Tamutuyarehi téchacareya.

¹⁸ Eta tacahe, ecaquiñaicha yátupina eta juca. Taicha mácani máitururue-quenehahi yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisi-cayarehi eta máitucaquenénihi.

*Suítcapauchapa esu maena ema Jesús énapa ena maparapenaveana
(Mt 12.46-50; Mr 3.31-35)*

¹⁹ Tacahe, esu maena ema Jesús énapa ena maparapenaveana títecapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana. ²⁰ Nametacapasera ena apamuri-anana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téchajicaviana —náichapa.

²¹ Émasera majicapavacapa:

—Yátupi némunacavacahi esu meme énapa ena nuparapenaveana. Narari-hisera ani te juca nuchacaya ena némunaruuanahivare, nuparapenaveanahí. Taicha tisuapajirahianahi éna tayehe eta máechajiruvana ema Viya, ticaemataneacanahivare éma —máichavacapa.

*Ema Jesús macaesamirica eta táepacusirahi eta une étapa eta técaticava
(Mt 8.23-27; Mr 4.35-41)*

²² Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi. ²³ Eta napaisirapahi, ema Jesús tívecapa tímacapaipahi. Tacahe, járajapainapa eta muraca técaticava. Tépacucapa muraca eta cáquire. Tasiapauchapaipa eta une te pacure. Tipicanapa ena máimitureana, taicha tímaticavananapa eta náecharisiravayarehi. ²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepta téchepucapa ema Jesús. Macamatinacapa eta técaticava étapa eta táepacusirahi eta une. Tésamiriecavapa tamutu. ²⁵ Tacahe, máichavacapa ena máimitureana:

—¿Tájaha tacayema vahi ácasiñavahini eta nutiarihirapahi eta eyehe? —máichavacapa.

Énasera tiáramecanapa. Tésenijiricacanapa, tásiha nacahepa:

—¡Téavicavapa eta máitupajijiasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técaticava étapa eta une —nacahepa.

*Ema achane návaháruanahi ena ichapemuriqueneana éreanana
(Mt 8.28-34; Mr 5.1-20)*

²⁶ Tacahe, títecapanapa te apachara tayehehi apaquehe eta provincia Gadara. Te apachara tacanaraipahi eta provincia Galilea. ²⁷⁻²⁹ Te tiúcupaicapa ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayehe eta juca avasare Gadara. Tájinapasera máimatiyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaripa eta návahá-sirahi. Nametapanéni ena achaneana nacarataca. Náitiaca te ichapepi carena étapa te enure, te náimahavarepa tacananesica naicha ena tiávahá-canahi. Émasera, tétavicavaipahi eta matumevahi. Mavechuquimurivare eta carena máitihanahi. Tijunavare, tiyanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máitare-sirahi.

Tacahe, te máimahapa eta matiarihirahi ema Jesús, mapauchapapa. Tépuyucapa te mamirahu. Ema Jesús mavanecavacapa ena éreanana náinajiacá ema achane. Ema achane tipiararecapa. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu vuíchaha picuvanecanu ánaqui te nucaicuñaiyayare! —máichapa.

³⁰ Tacahe, ema Jesús mayaserecapa:

—¿Tájaha píjare pítí?

Ema achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahá-canahi. ³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návihayare éna. ³² Tatiarihivare eta camuriqueneana cúchiana. Tinihicanahi te táemiripaisine eta masihi. Ena éreanana nayaseacapa ema Jesús másapahini nasiapahacavaca eta cúchiana. ³³ Tacahe, ema Jesús macuchuchujicavacapa te máquehe ema achane, másapahivare nasiapahacavaca eta cúchiana. Te tasamapa eta cúchiana eta nasiapahasiravacahi ena éreanana, tijunaparacanapa témirrijicanapa te tachausi eta cáquire. Téririjicanapa tamutu.

³⁴ Natiarihivare ena tijaneacanainihi eta cúchiana. Te náimahapa, tiáramecaninehi. Tiyananapa tijunapanapaipa timetajiricanapaipa nácani nácapajiruvanapahi, étapa te avasare namutuvare nametaca. ³⁵ Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahí eta cúchiana. Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinariipahi máichiravainahini. Ticamuirihaipahivare. Tásihasera, tipicanarinehi ena achaneana. ³⁶ Tavetijipa te náitametacapa ena tímahanahi eta macuchuchujisirahi ena éreanana te máquehe ema achane. ³⁷ Tacahe, te nasamairiricapa, namutu ena achaneana ticavasanahi te Gadara, vaipa napatsicavahini máitecapauchavacahini ema Jesús taicha náeñamaipahi táchahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa. ³⁸ Tacahe, ema achane mayaseacainipa ema Jesús másapahini máehica. Émasera máevata-caichucha machava te mapena. Ánipa maicha:

³⁹ —Piyanachucha pichava te pipena. Pimetajircaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

Ema Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Mr 5.21-43)

40 Te títecapavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamurenarinehi eta náimairahi éma. **41** Títecapavarepa ema émana achane ticaijare Jairo. Ema maca achane, tuparairucahi tayehe eta nárujisirareva tayehe eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha. **42** Taicha ésunarcavahi esu machichahi. Doce áñoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

43 Sutiarihipavare esu apana esena, sucajumaquenehivare. Doce áñoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucnaracahini ésu. **44** Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiriha. Enevanelinehi tinaraca ésu. Tíchecapa eta suítine.

45 Émasera ema Jesús masamarichucha eta suémamajiasirahi. Macahepa:
—¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututucavanahi te pichacaya. Váiparinehi tímaticarémahi nájahapuca nácani témamajiacavianahi —náichapa.

46 Émasera ema Jesús macahevarepa:

—Nacañárihi témamajiacanuanahi taicha nusamavahi núti et nucanarasirahi eta jumare táichavenehi eta nítupajijiasiravahi —macahepa.

47 Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuyucapa te máivapechacaya. Tiyayacareripa eta supisirahi. Sutupiruvapasera timetaurecavahi eta ésurahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta nujumahi. Nusamavaipasera eta nunarasirahi —suichapa.

48 Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pipena —máichapa.

49 Téchajiricavaichahahi ema Jesús eta suyehe esu esena, títecapanecha ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

50 Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehe. Tinarcayareichu esu pichicha —máichapa.

51 Tacahe, tiyanavanepa ema Jesús. Te títecapanapa, vaipa másapahini ema Jesús nasiapahini ena achaneana. Nacarichu tisiapanahi ema Pedro, ema

Jacobo, ema Juan, émapa ema suiya esu amaperu, ésupa esu suena. ⁵² Natiarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

⁵³ Técavanarichuchasera eta mayehe éma, taicha náimahahi eta suépeniraiipahi. ⁵⁴ Tacahe, ema Jesús macaratacapa eta suvahuana. Tásiba, máichapa:

—Nuchicha, nuvanecavi: Péjamica, péchepuca —máichapa.

⁵⁵ Tacahe, esu amaperu tichavapa titareca. Tásiba, téchepucavanepa. Ema Jesús mavanecavacapa ena ticachichana náijaraca eta sunica. ⁵⁶ Ichaperinehi eta náramirahi ena ticachichana. Émasera ema Jesús matuparacavacapa vahi nacuechajisiha eta náimahaquenehi.

9

Ema Jesús mavanecavacapa ena dócequeneana apóstoleana, napaicayare tamutu avasareana

(Mt 10.5-15; Mr 6.7-13)

¹ Ema Jesús macurujimurihana ena dócequeneana mayeheana apóstoleana. Tacahe, máijaracavacapa eta náitupajijiasiravanayare naratahairayare náquijica ena éreanana, naratahairayareva nacanaraca nácani nacaju-maqueneanahi. ² Tásiba, ticavanahianapa ticametarairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanararecanayarepahivare nácani nacajumaqueneanahi. ³ Eta mavanesirayacahi, máichavacapa:

—Tájina iámaimahi eta eyereruva. Váhivare ecucayupairiquipahi. Tacui-javare ecanirurucuhaina te alforja. Étaripa eta plata, tacuijavare iama. Étanainarichu eta emuiriha iámayare. ⁴ Enasinumayarepahisera te jácani peti nayehe ena tiúrihi eta najacapiraheya. Tiámainucava te táitecapa eta eyanirayareva. ⁵ Téhesera nacuijapuca nacuvaraha najacapahe tayehe te jácani avasare, váhivarepuca nacuvaraha nasama eta emetarairuya, iúchuca-vanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini —máichavacapa.

⁶ Tacahe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

Ema Herodes masamairiricavare tamutu eta juca máichaqueneanapahi ema Jesús

(Mt 14.1-12; Mr 6.14-29)

⁷ Tacahe, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucacarehini. Taicha masamairiricahi náimijachahiji émahí ema Juan téchepucahi te máecari. ⁸ Ena apamuriana náimijachahivare téchepuca ema antivuini profeta. Ena apamuriana náimijachahivare ema Elías. ⁹ Émasera ema Herodes macahepa:

—Nútjacaruvahisera nucavanairipi náechatinuca ema Juan, eta máopenirahi. Puiti, ¿nájahapuca ema maca nusamaiririruasaparacahi eta máichira eta tiáramicareana? Nuvarahasa nímatini ema mácará —macahepa.

Ema Jesús máitaparaha máenicavaca ena camuriqueneana achaneana

(Mt 14.13-21; Mr 6.30-44; Jn 6.1-14)

10 Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásicha, éma mámamurihavacapa te mávapahi, tinapaicahi eta avasare Betsaida. **11** Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

12 Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásicha, náichapa:

—Táuricapa pivanecavaca ena achaneana nayanapa natanuca eta nanisihá etapa eta náimasihaya te avasarechichana tachacayarahahanahi eta juca viávihahi, taicha ani, tajina náviyavaimahi eta te juca —náichapa.

13 Tásicha, ema Jesús majicapapa:

—Étina, íjaraca eta nanica.

Énasera náichavarepa:

—Tajina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehisera nárataimahi. Tayanapane tatiarihinapucaini eta vivacharesihahini eta tinicacare, váiparinehivaresera nárataimahi ena nani camuriqueneana achaneana —náichapa.

14 Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásicha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

15 Énepasera tacahehi naicha ena apóstoleana. Tásicha, ticaejarecanapa namutu. **16** Tacahe, ema Jesús mavehana eta cíncocoquene pan etapa eta apiqui jima. Máesenicapa te anuma. Mahasulupayachaipa ema Maiya eta máenisiravacayarehi ena camuriqueneana achaneana. Mayuvetuhecavacapa, máijaracapa ena apóstoleana. Náijaracapasera namutu ena achaneana.

17 Namutupa tinicana, tisatuhevacapa. Váhicaruvare náitahini eta tinicacare. Dócehi saye ichapehiana tínicaahi eta náemacharájiana.

*Ema Pedro máimereucha ema Jesús eta émairahi Cristo
(Mt 16.13-19; Mr 8.27-29)*

18 Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te titávanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? —macahepa.

19 Éna najicapapa, ánipa naicha:

—Ena apamuriana náimijachaviji téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antivuini, téchepucahi —náichapa.

20 Ema Jesús mápechavare mayaserecavaca éna:

—Étiyapa, ¿nájaha ímijachanuhi nútí?

Ema Pedro majicapapa:

—Pítira yátupiquenevi Cristo, piásihaquenehi me Viya —macahepa.

*Ema Jesús tímereuchava eta máepenirayarehi
(Mt 16.20-28; Mr 8.30-9.1)*

21 Tásicha, matuparacavacapasera ema Jesús nacuija nacumetaca eta émairahi ema Cristo. **22** Tásicha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tuparairucana énapa ena aquenucarahana énapa ena escribánoana. Éna, tímicapanuanayareva. Mapanaya-reichuhisera sache eta nucaheyare eta népenirayare. Tásicha, nuchavayarehi néchepuca —máichavacapa.

23 Tásicha, máimitucavacahi namutu ena achaneana, ánipa máichavaca:

—Nácani navaraha náehicanu, tacamuñu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Náijaracavavare eta táimicapasiraina eta náehisiránuhi. **24** Nácanisera téñamanahi eta náitaresira, tiávamirahuanaya eta náehisiránuya, énajivayare ticamitiequenehavanaya eta náitaresira. Énasera nácani yátupihi tíjaracavana téhicanuana, tayanapane táimicapanacavacapuca eta náehisiránuhi, éna titujicavanayare tiúchucuhanayare eta náitaresiranaya. **25** Énerichuvare nácani tacáeñamaruaruanahi eta nacaimahaquenéirayare te juca apaquehe, tájina náimaequenéhaimahi, taicha eta tacaenamarasiravacahi tahapapiricavacahi tayehé eta náuchucuirayare. **26** Énaripa nácani titsirihanapuca téhicanuana, náimitsirihapuca eta nímiturapiana, nútì apanava nutsirihayarevare nayehe ena nani. Nucaerajicainapa ena nani, nútì Manerejirunuhi ema Viya, te táitecapapa eta sácheyare nuchavirayare aquenucanuinapaipa. Te jena sácheyare, námainapaipa nútì eta nujaraiva, étaripa eta majaraiva ema Tata. Nucachanénapaipa ena sántoqueneana ángeleana. **27** Nutupiruva numetacahe: Puítiripa te etaracu éti, etiarihi éti vahi épenavanéimahi, ímahanumayare eta nucatuparahairahi aquenucanuya nuti Manerejirunuhi ema Viya —tacahepa eta máimituresirahi ema Jesús.

*Ema Jesús, tihapamaichava eta máimahi
(Mt 17.1-8; Mr 9.2-8)*

28 Tiuri, te taequenepa eta óchoquenehi sache, tiyanapa ema Jesús, tiápanahi te anuquehe mari. Tiyujaracayarehi. Mapananarichusera ena mámaquenéanahi: ema Pedro, ema Jacobo, émapa ema Juan. **29** Tacahe, eta mayujarasirahi ema Jesús énapa ena mámaquenéanahi, tíjahúchavapa títsivachavahi eta máimahi ema Jesús. Apaimahipa eta mamira étapa eta mamuiriha. Tétavicavapa eta tajapuvahi tajarárasirahi tamutu eta máquehe. **30** Tásicha, tiáramicareanavarepa tímerecavana ena apinana ajairana. Téchajiricavanaripa mayehé ema Jesús. Ema émana, émahi ema víyarahaini Moisés. Ema apana, ema víyarahaini profeta Elías. **31** Tétavicavaipahivare tajarárasirahi eta te natupihaiyahi. Náechajisihaipahi eta macatajivairayarehi máepenirayarehi ema Jesús tayehé eta avasare Jerusalén. **32** Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tijaracahi te nachacaya, témitiacarinehi eta náechapuneana. Náimaranacaripahi eta majaraivahi ema Jesús, énapa ena apinana ajairana tiúcupauchanahi. **33** Tacahe, te máimahapa ema Pedro eta nachavirayarepa ena nani apinana, témeñahavapa. Tásicha, macahepa:

—Tata Maestro, tétavicavapa táuricacareva eta viávihairahi eta ani. Tiúripahnahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

Váhinéni máimatiéquenehahini ema Pedro tájahahipuca eta mavarahquenehi macayema. **34** Tacahe, eta máechajirisiravaichahahi, tíjahúchavapa

tiúcupaicahi eta úcaji, tamuichavacapa ema Jesús énapa ena apinana ajairana.

35 Tásicha, nasamarinehi eta mahu ema Viya, tayehe eta úcaji. Ánipa macahe:

—Ema maca ema yátupiquenuehi nuchicha némunaruquenuehi. Éma esuapayare —macahepa.

36 Te tímatinapa eta mahu ema Viya nasamaquenuehi, náimahapa ema Jesús, macarineipahi. Nájinaripa ena tiúcupauchanahai.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenuehi.

Ema Jesús macanaraca ema amaperu mávaháruhi ema éreana

(Mt 17.14-21; Mr 9.14-29)

37 Te apanaqueñepa sache, tiúcupaicanavarepa tayehe eta anuquehe mari návinehi. Natarihipavare ena camuriqueneana achaneana. Te náimahapa ema Jesús, tiyananapa nácapahi. **38** Matiarihihi ema émana achane te namuri ena camuriqueneana achaneana. Tipiaracapa muraca éma, ánipa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu. **39** Mávaháruhi ema éreana. Macapiararecahi técharipaicavavare ticarisasajacavare. Ichapemuri eta macatajivaira máicha. Vahi mávaraha máinajiaca. **40** Néchajiacaripahinéni ena pímitureana. Váhisera náratahahini nacuchuca ema éreana tiávahácahi ema nuchichasami —máichapa ema achane.

41 Tásicha ema Jesús majicapapa:

—¡Tétavicava emasuapajiraivavaca eti achaneana! ¡Cúverarecaichapucaini eta nucamichirahenahini! Piama ani ema pichicha.

42 Témeñahavainipa ema amaperu, tápechavarepa tacañamacahi tiáquipaicavapa, téchariripaicavaipavare. Émasera ema Jesús, máquijicapa ema éreana, muracapavare eta macajachirahi. Tásicha, máijaracapa ema maiya, tinara-caipahi. **43** Náramirinehi ena achaneana taicha eta tamutuirahi marataha ema Viya, máitupajijiasiravahi.

Tiápechavavare ema Jesús tímereuchava mápenirayarehi

(Mt 17.22-23; Mr 9.30-32)

Nanasirichahahi napanerequenuehahi ena achaneana eta juca náimahaquenuehi. Ema Jesús mápechavare mametacavaca ena máimitureana. Ánipa macahehi:

44 —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sácheyare tíjararecanuyare mácani achane nayehe ena tictalianacanuanahi. Ticaratacanuanayareva —máichavacapa.

45 Énasera ena máimitureana váhiquene nácaicutiarahini eta macayemaquenuehahi. Taicha émarichuhi ema Viya tíjaracahi eta vuíchaha nácaicutiaraimahi. Váhivare napatsicavahini nayaserecahini tájahapuca tacayemahi eta máichiravacahi.

¿Nájahapuca ema apóstole ticapicahupana?

(Mt 18.1-5; Mr 9.33-37)

46 Te taequenepa eta juca, ena apóstoleana ticapinarujiricacanapa nájahahipuca ema ticapicahupanahi. **47** Émasera ema Jesús máimatiacavacapa eta náechajiriruvanahi. Máichuhapa ema émana amaperuchicha, macatupihapa te namirahu. **48** Tásicha, máichavacapa ena apóstoleana:

—Nácani tijacapanayare ena amaperuana níchavenéinahi nútì, ena nani yátupi náimerecayare eta náemunasiranuhi nútì taicha tímicutijiricavahi nútinahini najacapa. Taicha nácani tijacapanuanahi nútì, énerichuvare

tacahehi eta najacapirahi ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravacahivare, énaha ena ticapicahupananayare te etaracu –macahepa.

*Nácani vahi ticatianacahaviana, éna tímicatacakahaviana
(Mr 9.38-40)*

⁴⁹ Tacahe ema Juan mamecapa, máichapa:

—Tata Maestro, vímahahi ema émana achane máquijicavacahi ena éreanana te píjare ticutirinehi pítinahini píjaracahini eta maitupajijiasiravahi. Tásihasera, vicavacahi éma, taicha vahi viúmurivainahini –máichapa.

⁵⁰ Émasera ema Jesús máichapa:

—Vahi ecucavaca éma. Taicha nácani vahi ticatianacahavianahi, éna tímicatacakahaviana –macahepa.

Ema Jesús macajachavaca ema Jacobo émapa ema Juan

⁵¹ Te jena sácheinahí tiánenehipaipa títecapa eta mayanirayarehi ema Jesús te anuma. Tásicha, tíjaracavaichaha eta mayaniranumayare te Jerusalén.

⁵² Macavanairipipa tiyanana ena tínapumirauchanayarepahi. Titanucanayarehi eta máitecapihayare tayehe eta jácani avasare. ⁵³ Énasera ena samaritánoana vahi návarahahini najacapa taicha náimahahi éna eta matupiruirapahi te Jerusalén. ⁵⁴ Tacahe, ena apinana apóstoleana, ema Jacobo émapa ema Juan, tisemamajuheanapa eta namajacapirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tiásicha te anuma? Étaina táitapaimuriha ena náenatatajiana, tacuti eta máichaquenehi ema profetaini Elías –náichapa.

⁵⁵ Tacahe, ema Jesús máimaranaracapa éna. Tásicha, macajachavacapa, máichapa:

—¿Tájaha tacayema vahi tétopicava eta epanereruana? Ticutipa vahi mávaháruhénahi ema Espíritu Santo. ⁵⁶ Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuhavacayare éna –máichavacapa.

Tásicha, tiánucuhanapa te apachacaya te apanahivare avasare.

Vínjacayare tamutu, te vivaraha véhica ema Jesús

(Mt 8.19-22)

⁵⁷ Eta napaisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaqueneyare piámianu.

⁵⁸ Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cágureana tamacajipachuvare. Nútisera núti Manerejirunuhi ema Viya, tájina nushiapihahini –máichapa.

⁵⁹ Te apanavarepa sache, máichuhapa ema Jesús ema apana máimiture apóstoleyare. Tásicha, ema majicapapa:

—Tata, nuyaseacavi písapanuhipucaini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásicha, nucapayacavipa néhicaviya –macahepa.

⁶⁰ Ema Jesús majicapapa:

—Pésamirica náecaracacaichaha ena máecharaireana. Tájina táijaracavimahi eta juca tihapasamurerecavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana ema Viya –máichapa.

⁶¹ Matiarihivare ema apana énerichuvare macahehi:

—Tata náquenu, nútí nuvaraha néhicavi. Písapanusera nucametavapana-numaya te nupena —macahepa.

62 Ema Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairicahini eta mámaquene. Ene picahayare piti, vahi pichavaequene-havaimahi tayehe eta tájiparacana. Taicha vahi nuvaraha mácani tínajicavahi eta macametarairuira eta máechajiriruvana ema Viya —máichapa.

10

Ema Jesús mavanecavaca ena setentaqueneana, tímiturecanayare

1 Te taequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticameta-rairuanayarehi te avasareana mapaisineanapahi éma. Apinanavacapahi eta napaisirayare éna. **2** Máichapa eta matuparasiravacahi:

—Tétavicavapa eta vicamunuirava ena tímicatacavahianaya tayehe eta juca vématanerepihi. Eyaseacayaresera ema Tata Vicaiyaquene máijaracahavi ena náimicatacavahavi. Eta juca tímicutijiricavahi mácani achane eta macamu-nuiravahi ena tímicatacana eta máechatijisiraya eta maharusura.

3 Puiti, névatacaheyare eyana epaica. Nararihisera ena achaneana váinara-jiqueneanahi étupiaruanayare. Éna nacutihi eta sárare táiñehiqueneanahi. Étisera ecutiyarehi eta uvesachicha eta tamansuvahi. **4** Eta epaisirayare, tájina íámaimahi eta tarera, váhivare íámaimahi eta billetera. Váhivare íámaimahi eta eparupeva. Eyaiyauchavayarepahisera eta epaisirayarepahi te achene.

5 Te jácani peti ítecapihayarepahi, ani tacahayare eta échajisirayare ena achaneana: “Ema Viya, tiúrichaheyare éti te juca peti”. **6** Nararihiyare ena achaneana navarahaya eta náurivaya mayehe ema Viya. Eta échajisiravayare, tatupiruvaya me Viya máijaraca eta náurivaya. Téhesera vahi nacu-varaha najacapahe, vahi ecucaeñamacava nayehe, taicha énapa téchinavana.

7-8 Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuya-repahi. Váhivare ecupamirahapahi ímacacuhapahi eta pétiana. **9** Ecanaracayarepahi ena nacajumaqueneana natarihiqueneanahi. Tásicha, emetacava-capai pa námutu ena achaneana eta núcupoasiraripa nuti Cristo, nútirichuhi ema nacuchapaquenehi. Nucuchucuhavacayare namutu ena téneuchavana, ticasíñavanavare eta nuyehe nuti Mavanerunuhi ema Viya. **10** Téhesera nacuija nacujachapahe te jácani avasare ítecapihayarepahi, iúchucavanepa te calle. **11** Ánipa ácahe: “Vétatapevachavahi eta juca tavaparu tamaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavihini. Vivarahasera vimetacahe eta máucupaisiraripa ema Cristo, émarichuhi ema vicuchapaquenehi, ema Mavaneruhi ema Viya. Macuchucuhaheshini éti, te éneuchavahini, ácasíñavahini mayehe” íchavacayare éna. **12** Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinara-jiqueneana ticavasanaini te avasaréni Sodoma —máichavacapa ema Jesús.

Eta táicuñayare eta návasana ena achaneana masuapajirairahana (Mt 11.20-24)

13 Tacahe, ema Jesús máechajicahi ena apamuriana achaneana, tímicutijiri-cavahi natarihinahini te mamirahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tiáramicareana níchaqueneanahí te emirahu, vahisera ávarahahini éneuchavahini. Ena nani achaneana ticavasanahi te Siria, apavasanána-hinéni, tétavicavahinéni eta namaurivahi, németeacasera nútí téneuchavavanehini eta náimairahi eta níchaqueneanapahi. Enévanénahíni náimerecavahíni yátupi eta náeneuchiravainahíni. ¹⁴ Tásicha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

¹⁵ Étiripa eti ecavasanahi te avasare Capernaúm, tamapuriji eta nímitusirahehi étapa eta ímairahi eta tiáramicareana níchaqueneanapahi. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti —macahepa.

¹⁶ Tacahe, tiápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva nútí. Énasera nácani tépuruheanayarepahi, ticaecheranayareva eta náepuruiranuhi nútí. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

Tichavanapa ena setentaqueneana vanairucanahi

¹⁷ Tacahe, tichavanapa ena setentaqueneana. Tiúrisamurereacavanaipa eta náitecapirahi. Ánipa nacahe:

—Tata Viáquenu. Vítuchaipa eta pivanaipi. Viratahahivare viáquijicavaca ena éreanana taicha eta vipiarasirahi eta píjare —nacahepa.

¹⁸ Ema Jesús majicapavacapa:

—Tájinarinehi matumevaimahini ema Satanás eta viáquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahí ema Satanás, tacutihi eta térameca eta tájahúchiravahí eta macaquijirahi te anuma. ¹⁹ Tátaurevaquene nútí, ichape eta nujaneasirahehi. Tayanapanepuca iácatayaca eta quichare, alacránpuca, tájineresa tácharacahémahi. Eta juca ítupajijiasiravaya níjararuhehi, tacachuriaca eta maitupajijiasiravahí ema Váinaraji Satanás, énapa ena majupahanahi. ²⁰ Vahisera ecucasiñavavaica eta eratahairahi iáquijica ena éreanana. Iúrisamu-rereacavasera eta taejasiraipa te anuma eta elistana.

Ema Jesús tiúrisamurénehi mayehe ema Maiya

(Mt 11.25-27; 13.16-17)

²¹ Tacahe, enévanehinehi táitecapauchahi ema Jesús eti máurisamurevahí maicha ema Espíritu Santo. Tásicha, macahepa:

—Tata Nuaiyaquene, tétavicava eta nucunachiravi. Jéhevare píti táquenuvihí eta anuma étapa te juca apaquehe. Títauchavaipa eta pipanereruhi. Vahi písapahini náitucahíni eta júcana ena achaneana tímijachavanahí téchemarahiana. Énapasera píjaracahi ena nani téhicanuanahí, tájinahinéni náechemaraivainahíni. Puiti nasapiharipahi nacachuricahi ena titupajijiacavanahí. Tétavicavahí eta táurivahí eta pipanereruhi, piti Tata Nuaiyaquene.

²² Tacahe, ema Jesús máichavacapa ena achaneana:

—Ema Tata Nuaiyaquene, ema tíjaracanuhi eta nútiraya néchaya tamutu. Nájina náratahaimahi énajivainahíni náimatihini ema Tata. Nucarichu nuti néchinavahí ena nímimatiruanayare éma. Taicha nútí yátupihi eti nímatirahi

ema Tata Nuaiyaquene; tacutiquenehi eta yátupirahivare eta máimati-ranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétavicavahi eta iúricacareva éti taicha tíjaracahehi ema Viya eta juca ímairahi puiti eta níchaqueneanahi. ²⁴ Jéhesare, numetacahe: Acane ichape-muriana ena víyarahainani profetana énapa ena réyeainani, tétavicavahi eta navarairahi tímatinuana, navarairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

Ema Jesús máimicuticha, máechajisihahi ema achane máuriquenehi, samaritánohi. Tijapanurahi mayehe ema émana achane macajaraquenehi, tayanapano vahi émainahini majaneanainahini.

²⁵ Matiarihihi ema achane, maestro tayehe eta mavanairipiana ema víyarahaini Moisés. Tiyanapa matanucahi ema Jesús, téchajiricavayarehi eta mayehe. Mavarahahi macaicutiarayare. Máichapa:

—Tata maestro, ¿tájahapucaini nícharacavaini eta níturusirayare eta núchucuirayare te apana vítaresira? —macahepa.

²⁶ Ema Jesús majicapa:

—¿Tájahasica tacayemahi eta táechajiriruvahi eta Sagrada Escritura? ¿Tájaha tacayemahi eta pisamirahi eta péchajicuirahi? —macahepa.

²⁷ Tásicha, ema maestro majicapapa:

—Ani tacahehi eta néchejicuirahi: “Macarichu ema Viya pémunacayare te pisamure. Macarichuvare éma piáchanevaqueneya. Píjaracayare tamutu eta pitumeva eta picaemetaneasirayare. Éma pipanerechayare tamutu sácheana. Pémunacayareva ema piparaepiyahi táchuti eta pémunasiravahi píti”.

²⁸ Ema Jesús majicapapa:

—Tétupicava eta juca pijicapiranuhi. Te pítaucha eta juca, piúchucuhayare.

²⁹ Émasera ema maestro vahi mavarahahini apaquehereruinhini. Máichapa:

—¿Nájahasica ema nuparaepiyahi? —macahepa.

³⁰ Ema Jesús máichavarepa:

—Nímicutichinaviyare eta juca. Matiarihi ema émana achane. Tipaicahi te achene, másiha te Jerusalén. Tiyanayarehi te Jericó. Eta mapaisirapahi te achene, náuchujiuchapa ena tiámerahiana. Náepuchiricanumapa. Tiánehi nacapacayaráni. Námeyechapa eta mámaqueneanapahi étapa eta mamuiriha.

³¹ Tásicha, macahepaipa ema émana tiyujaracarahi. Máimahapa ema achane te apaquehe te achenechacaya. Váhisera májapanuhini máichejiuchahini. Máetávicaichucha. ³² Tásicha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare.

³³ Tacahe, macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurinehi.

³⁴ Tíchecanumapa éma, témeñiahavapa. Máipuchapa te aceite étapa eta alcohol eta majorana. Máepacuchavacapa te amaratataji. Tásicha, manaracuhapa manacaquechapa eta te maperapahi cavayu. Mámapa eta te máitecapihayarehi. Máipupuaracaipahi. ³⁵ Te apanapa sache, tiyanayarepa ema samaritano. Tivecuacavapa apipe eta maplatane. Mavachachapa ema ticapenahi eta peti. Tásicha, máichapa: “Picatajicanu. Péchapajirisínánu ema maca achane. Te tatarihinapuca eta macamunuirava, píjarasinánuya. Nímahavirine nu-vachachavi te nuchava” máichapa. ³⁶ Tiuri puiti, nuyaserecaviyare píti.

¿Nájahapuca ena nani mapanaqueneana ema témunacahi ema maparaepiya najararuquenehi ena tiámerahiana? —máichapa ema Jesús.

³⁷ Ema maestro majicapapa:

—Ema témunacahi ema maparaepiya, ema tijapanuhi —macahepa.

Ema Jesús máichapa:

—Pímhahipajira, ene picaheyare piti apanava. Pijapanurahiyare —máichapa.

Ema Jesús máejirapanavaca te napena esu Marta ésupa esu María

³⁸⁻³⁹ Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétavicavahisera eta táurivahi eta najacapirahi éna. Tacahe, esu María téjacapa te máivapechacaya ema Jesús. Susamararacaripa eta máimiturapiana éma. ⁴⁰ Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajuheripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanesinanu esu suca nuparape súimicatanuichu apaesaina tayehe eta ematanecana —suíchapa.

⁴¹ Tásiba, ema Jesús majicapapa:

—Páurevisami piti Marta, tétavicavapa tahapapirisiravi eta pématanerepiana. ⁴² Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

11

Ema Jesús tímitucahavi eta viyujarasiraya

(Mt 6.9-15; 7.7-11)

¹ Tacahe, te jácani apanapa sache, ema Jesús mávhahi eta te mayujarasirarehi. Te titayujarápa, témeñahavapa ema émana máimiture, máichapa:

—Tata Viáquenu, pímitucahavi eta viyujarasirayare víti apanavare, tacuti eta máimitusiravacahi ema Juan ena máimitureanahi —macahepa.

² Tásiba, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávhahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapirovihi ena ángeleana te anuma. ³ Pájapanuhavi píjaracahavi puiti juca sache eta vicamunuqueneana vinicaquenerepiana. ⁴ Pájapanuhavivare piperdonachahavi eta viviurevana piyehe. Víti apanava viperdonachavaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

⁵ Máichavare ema Jesús:

—Tiuri, nímicutichinaheya puiti. Matiarihi ema émana achane. Tacahe, máitecapauchahi ema apana achane máitunacasarehi te enumuhu yati. Viajéropahi éma. Émasera ema avasarecuruhahi, tájina maviya eta máenicahini. Tásiba, mayana mayehe ema apana máitunacasarehivre. Máichainapapuca: “Picatajicanu, nucapucavi mapanaina pan. ⁶ Taicha títecapauchanuhi ema nítunacasare viajéropahi. Tájinaseru nuviya nucumpirachahini”. ⁷ Tacahe, ema macaijuhequenehi váhipuca macujapanuhi,

macahénapapuca: "Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néchepuca njújaracavihini eta pivarahaquenehi" macahenapapuca. ⁸ Maitunacasarequenénihipuca éma, váhisera máipurajihini maecheputucahini máijaracahini eta mayasesereruhi. Téhesera te tímiyanavapuca mapiararaca ema ticamunuvhah, németeaca tipamicavayarehi téchepuca, máijaracayarehi eta macamunuquenepahi.

⁹⁻¹⁰ Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tijaracaheyareva. Vahi ecuyacuji eta eyaseasiraina. Téhevare tatiarihinapapuca eta jácani íchiraya ichapehi eta tacajeravaya, eyaseacayare máijaracahehini eta ítupajijiasiravaya. Éma, tijaracaheyare. Te jararihipuca eta táchjejimiráuchahe, éma macaevuisihainaheyare. ¹¹ Eta juca tímicutijiricavahí te natarihipuca ena echichanaveanahí étí, te tiyaseacaheanapuca eta pan nanicayare, váiparinehi táuricaimahi íjaracahini étí eta márijahi, tímicutijiricavaipa ecavijaruhini ena echichanaveana. Étaripa te tiyaseacaheanapuca eta jima, vahivare táuricaimahi íjaracahini eta quichare. ¹² Étaripa te tiyaseacaheanapuca eta varayuha, vahivare táuricaimahi íjaracahini eta sáse. ¹³ Étiarihi étí vahi ecajirahihini nayehe ena achaneana. Iúrihisera nayehe ena echichanaveana. Ítucahi íjaracavaca jácani nayasearuheanahí táuriquevaneana. Mavetiji ema Tata Ecaiyaquea tiávihahi te anuma. Éma, vahi ticavijaruheimahi eta te eyaseserepiana. Tijaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

Ena achaneana téjecapavanahí eta náimijachirahí ema Jesús mávaháruhi ema Váinajarí Satanás

(Mt 12.22-30; Mr 3.19-27)

¹⁴ Te apañequenepa sache, ema Jesús macanaracahi ema achane, úpainihi eta máitaresira taicha eta mávahásirahí ema éreana. Tacahe, eta máuchusirapa ema éreana te máquehe ema úpainihi, tiúripa téchajica. Ichaperinehi nárami ena achaneana. ¹⁵ Natarihihisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náquenu-murihi ena éreanana. Máijararuhi jácani eta máitupajijiasiravahí eta macuchusiravacahi éna —nacahepa.

¹⁶ Nararihihivare ena apamuriana achaneana vahivare nasuapapajicahini ema Jesús. Eta tacahe, navarahapa nacaicutiarayarehi, nayaseacapa macuchucahini eta tiáramicare, máimereuchayare eta émairahi Cristo mavaneruhi ema Viya. Váhisera nasuapayarehini. ¹⁷ Émasera máimatihi eta napanereruana etá namasuapirahi. Máichavacapa:

—Nímicutichinahe puiti ena machanerana ema gobierno. Éna, vahi típutsimurihacacanaimahi apinainahipucaini partido. Te típutsimuriacacanapa, énajicacaipapucaini tiáquipaicacana. Émaripa mácani achane te camurianahí ena machichanaveana, váiparinehivare típutsimuriavanaimahi náehajiricacahini, énajicacahini náquipaicacahini. ¹⁸ Ene macahehi ema Váinajarí Satanás, váiparinehi másapahini típutsimuriacacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táchavenehi eta nuratahairahi nucuchucavaca ena éreanana. ¹⁹ Tájina vahi étupicavahini étí eta juca epanereruana. Te émahipuca tímicutacanuhi ema Satanás, énerichuhivare étí máimicataruanahivare jácani éma, eta ecuchusiravaca ena

éreanana. Epanerechinávanuma. ²⁰ Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

²¹ Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. ²² Téhesera macahepaipa mácani achane túmepanahi mayehe, maverejicayare eta mataquiriquini macasiñaquenehi. Máitiacavane. Tásicha, émapa técha tamutu eta majanearuinihi ema achane. Ene nucahehi nútí, túmepananuhi mayehe ema maca Satanás.

²³ Te vahi ecuehicanu, ecucaematanacanu, éta tímereuchaheya machamuríhehi éti ema tictianacanuhi. Masapiha ímicatacahi éma eta macaetemajirisiranuhi.

*Ema Jesús máimicutichinahi ena masuapajirairahanahi mayehe
(Mt 12.43-45)*

²⁴ Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Ema éreana tiyanainapa matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava. Macahénnapapuca: “Nuyanayare nuchava, nusiapahacayareva ema návaháruinihi”. ²⁵ Te títecápapa ema éreana mayehe ema achane mávaháruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya. ²⁶ Tásicha, tiúrisamurepa ema éreana. Tásicha, tíchuarecapa ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

Viúriyare te visuapa eta máechajiruva ema Viya

²⁷ Mapaenumavahi titapirica ema Jesús eta juca máechajiruvanahi, tipi-aracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahí esu pena, táichavenehi eta suínasiravihi, suájisiravihi eta sucjurusiravihi! —sucuhepa.

²⁸ Ema Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiruvanahi ema Viya, yátupiyarehi eta nasuapiroayareva! —máichapa.

*Ema Jesús macajachavaca eta namasuapajiraivahi ena achaneana
(Mt 12.38-42; Mr 8.12)*

²⁹ Tacahe, titecaparacanapaichucha te machacaya ema Jesús ena camuri-queneana achaneana. Tásicha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacanuanahi nímechayarehi eta tiáramicare táicutiarahi eta mavanesiranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaini Jonás. ³⁰ Ema profetaini Jonás yátupihi ecutiararehi éma eta mavanesirahi ema Viya nayehe ena achaneana ticavasanahi te avasare Nínive. Ene nucahehi nuti Manerejirunuhi ema Viya, ecutiararenúhi puiti eyehe eti achaneana.

³¹ Tacutiquene, esu reina Seba eta acane, te susamairiricapa eta máitupajijia-siravahi yátupi ema Salomón. Ésu, tayerehiquenehineni eta suávasa, tiyanahisera sucapayaca ema Salomón taicha suvarahahi susamayarehi éma. Tac-ache, te táitecapapa eta sácheyare téchepucanaya namutu, suyaseacainapa ésu eta nacaicuñahini ena nani máetupicushianahi puiti. Sucáhénapapuca: “Táuricapa nacaicuñahini ena nani máetupicushiana, tájinapa náetseraruina nasamaripa ema Cristo, ema titupajijiápanavahi mayehe ema Salomón, tásihahu vuíchahacaruva nasuapa” sucahénapa jácani. ³² Tacutiquene ena achaneana ticavasanahi acane te Nínive. Tisipecaturarahiana éna. Natupiruvahisera nasuapa eta mame tarairu ema Jonás. Téneuchavavaneanahi. Tásihahu, nacahénapapuca te jena sácheyare: “Táuricapa nacaicuñaini ena nani maparajuruana ema Cristo, taviuchahi eta namasuapirohí éma. Taicha éma máuriquenepanahi mayehe ema Jonás” nacahénapa. Eta máimiturapiana ema Jesús, tamicahu eta vítaresira

(Mt 5.15; 6.22-23)

³³ Tímiyanava eta máechajirisirava ema Jesús, ánipa macahe:

—Súnsuanahi nácani tiyustacanahi eta lámpara namicahuyarehi, tásihasera nanacapapucaini te jácani tayumururevahí cuarto, naijihapaicapucaini te ca-june. Tacamuñuhí nanacayarehi te anuquehe. Jéhesare, tamicauchasarepa tamutu apaesa tímiriricanapaipa nácani tisiapanapahi. ³⁴ Ene ecahehi éti, eta esuapirohí eta nímiturapiana, tétavicavahi eta tamicauchiraya eta iáchanevana. Tímijunijicayare eta emaurivahí. Téhesera vahi esuapahini, tétavicavahi eta tamapicuvahí eta iáchanevana. Tanasipa tamutu eta tamau-rivahí. ³⁵ Eta tacahe, machu ecainajiruva tayehe eta juca esamaqueneanahi ímahaqueneanahivare, machu tayanariana te timapicu eta iáchanevana. ³⁶ Téhesera yátupina esuapa eta nímiturapiana, tétavicavaya eta tamicauchi-raheya tayehe eta ítaresiranahi. Tásihahu, vahi eyaseacanuimahi nímechahe eta tiáramicareana —macahepa.

Ema Jesús máimereuchavaca eta náejecapiravana ena fariséoana énapa ena escrivánoana

(Mt 23.1-36; Mr 12.38-40; Lc 20.45-47)

³⁷ Tacahe, te titapiricapa ema Jesús eta máechajisirahi, témeñahavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyanapa te mapena ema fariseo. Te tiúripa eta tinicacare, téjacapa ema Jesús te mesa. ³⁸ (Tiuri, ena fariséoana, jucarihi eta nayeherepi te tinicanayare, tayanapanehipuca tipachivahuanahi, ticasipavahunumanayarehisera. Eta juca nasipavaurusiravahi, namavarairahi náechipejicahini eta náchanevana.) Émasera Jesús, vahi masipavaurucavanumahini. Tacahe, máraminehi ichape ema maca fariséo eta mamaitauchirahi eta nayehere-pianahi éna. ³⁹ Émasera ema Viáquenu Jesús máichapa:

—Eti fariséoana, eta eyeherepiana, ecaeñamaracavahi esipacanuma eta enisirareana étapa eta érirareana, emavarairahi tátetseraruinahini tasiapahini eta pecatu te iáquehe. Étisera iápajupanavahi eta tachipejivahí eta iáchanevana táichavene eta evainarajivana, étapa eta tavayuasirahehi eta ejamurachirahi tamutu. ⁴⁰ ¡Tétavicavasamihi eta tamuracavahi eta esamureana! Ema Viya vahi tácarichu máimaha eta te iáquehe eta tiávihahi te ínahu. Énerichuvare máimahahi eta tiávihanahi te amahe esamureana. Éma yátupihi eta máimatirahehi. ⁴¹ Tatuparacahi ejapanurahiya nayehe ena ticamunuwanahí. Tátupiruva te esamureana te échajiricava apaesa tacuijasarepa tachipejivaina eta iáchanevana.

42 ¡Páurehesami eti fariséoana! ¡Tétavicavahi eta tamuracavaya eta ícuñayare! Éti ímijachavahi yátupiquenehi eta religíosohérahi eta epamisirava eta ecamavahuirahi me Viya eta diésmuri tayehe tamutu eta évaraqui. Ecunachacarehi taicha éta. Váhisera ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri iámavahuana. Énerichuvare tituparacahehi eta ejapanuraivaya, yátupinavare eta émunasiraina ema Viya.

43 ¡Jucarihivare eta apana tiviuchahehi eti fariséoana! ¡Tétavicava eta esiñavavaisirahi! Emetapa evaraha tipicauchaheana, ticaejacaheana te táurinaquene siya eta te iúrujisirarevana. Evarahavare tipicauchaheanayarehi eta náechajisiraheana te cálleana.

44 ¡Jucarihivare eta apana tiviuchahehi eti escribánoana, étipa eti fariséoana, táichavenehi eta apimirairahehi! Ímijachavahi epicauchacarehiji. Étisera eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimaticequenehahini eta náejecapiravahi táichavene etá evayuasirahi eta ecaetemairavacahi —máichavacapa ema Jesús.

45 Matiarihivare ema émana maestro eta mavanairipiana ema Moisés. Máichavarepa:

—Tata maestro Jesús, eta piyunasiravaca ena fariséoana, tétavicavapa tayunasirahavihi víti apanavare viti máestroana. ¿Pivarahapuca vicaviurehvarení víti? —máichapa.

46 Tacahe, ema Jesús majicapapa:

—¡Eti apanavare eti máestroana, tétavicavahivare eta eviurevahí! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

47-48 ¡Jucarihivare eta apana tiviuchahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyehehearasirahi eta náecariana ena profetanaini nacaparuhanahi ena iáchucanaveanaini. Puiti étarichuhi tacahehi eta epanerueruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapianahi táuriqueneanahi. **49** Ema Viya, acane tímatihehi eta ecutirayarehi eta napanereru ena iáchucanaveanaini ticapacanahi ena profetanaini. Eta tacahehi eta máechajiriruvanahi: “Nuvanecayare ena profetana; tásicha, nuvanecayareva ena apóstoleana. Váhiquenesera nasuapaimahi ena tisamanayarehi eta náimiturapianaya ena nuvanarana. Napanajircavacayarechucha ena nuvanaranahi. Natarihiyareva ena nacapacayarepahi” macahehi ema Viya. **50-51** Eta tacahe, numetacahe nútí: Eti nujaneanana israelítana etiariqueneanahi puiti, ecaicuñayare, taicha timuriacahehi eta naviurevahí ena iáchucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuhi. Máequeneruhi nacaparuhi ema maca Zacarías, ema nacaparuhi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena iáchucanaveanaini.

52 ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana titucacáreana, taicha vahi esuapaimahi, váhivare éhicaimahi. Éti tásihahi íchejimiráurucavacahi ena tivarahanahi tisuapanaya, náehicaya ema Viya —máichavacapa ema Jesús.

53-54 Tacahe, eta nasamirahi ema Jesús ena fariséoana énapa ena máestroana, tisemanarinehi eta mayehe. Tépanavanavarepa náitsamarareca eta nayaseresirapahi, navairahí nasama te máejecapavahipucaini eta macayemaquenéanapahi, navairahí eta tiviuchayarehi éma.

12

*Ema Jesús vahi mávaraha apimirahávina
(Mt 10.26-31)*

1 Tacahe, te jena sácheinahí, títecaparacanapaichucha ena camuriqueneana achaneana. Tiyututucavanapa. Énasera ena máimitureana ema Jesús návihahi te machacaya. Tásicha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna. **2-3** Ema Viya tímararacahehi tamutu eta íchaqueneanahí, tayanapanenénipuca eyumurucavaquenénapuca te timapicu. Tisamahevihivare tamutu eta échajiriruvanahi. Tímatihevihivare tamutu eta epanerreuana. Te jácani sácheyare ticaecherayare tamutu, tétavicavaya eta etsirihairaya taicha eta emaurivanahi —macahepa.

4 Étiripa eti némunacasareana, numetacahe: Vahi ecupica nácani nacapacapuca eta iáquehe, tacarichusera náituruquenehayare. **5** Numetacaheva, macarichu ema Viya epicayare, taicha macarichu éma téchahi eta ítaresirana. Jéhevare, éma maratahahi macamitiequeneha eta iáchanevana tayehe eta táñehiquene yugu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

6 Nímicutichinahe eta cágurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta tátaresiranahi.

7 Evetijipa éti, éñamacarepanahi me Viya. Éma téchahelivare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehe eta ítaresirana, taicha tétavicavahi eta emunavahi éti mayehe. Éma, máimatihi eta tatupa eta echutimacana. Vímereuchavayarehi eta véhisira ema Jesús

(Mt 10.32-33; 12.32; 10.19-20)

8 Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, núti apanavare nímereuchaya eta nuchanerairavacahi éna te namirahu ena ángeleana mayeheanahi ema Tata. **9** Nácanisera vahi návarahahini náimereuchavahini eta náehisiranuhi, núti apanava nímereuchaya eta vahi nuchanerainahini éna te namirahu ena ángeleana mayeheanahi ema Viya.

10 Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácanisera nacaecahipuca ema Espíritu Santo, vahi tiperdonachacareanaimahi éna.

11 Jararihiyare eta sácheinayare tiámaheanaya te namirahu ena nacapitarana eta te nárujisirarevana, énapapuca ena tuparairucana, énapapuca ena juéseana te jácani avasareana eta nayaseseresiraya. Váhisera ecueñamava tayehe eta jácani ecatiuchiravayare. **12** Ema Espíritu Santo tímítucaheyare eta táurivayare eta ecayemayare te jena sache ecayaseserehinapa —macahepa.

Vahi táurica tahapasamurechahavi eta vímahaqueneanayare

13 Matiarihi ema achane te namuri ena camuriqueneana achaneana. Máechajicapa ema Jesús. Máichapa:

—Tata maestro, pímicatacanu, pimetaca ema nuparape máijaracanu eta nuyehé parte eta nímaequeneruyare eta máimahaquenéni ema ticachichanuini—macahepa.

¹⁴ Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehé eta máimahaqueneanaini ema ticachichahéni—máichapa.

¹⁵ Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehé eta tímahacareana. Taicha eta tímahacareana te juca apauehe, vahi étaina ticitarecaheyare. Vahi táoñamacarehini.

¹⁶ Tacahe, máimicutiarachinavare:

—Matiarihi ema achane ricu. Ichape eta máesane. Tiúrina eta máevaru.

¹⁷ Tacahe, ema ricu mapanerechapa, ánipa tacahe eta mapanereru: “Ániquehepa eta juca névaru, tájinapa núnasiha. ¿Tájahapuca nícharacaya?

¹⁸ Tiúripanapuca nuvetataha eta núnavarahi nujanejuecha. Ichapepanainapa nicha eta tátsivaya. Tiúripanainapa, apaesa tárijica tamutu eta néchatijiru étapa eta apamuriana nucayehequeneana. ¹⁹ Tásicha, nucahénapa: Jéhevare puiti téavicavapa eta nûrvayare. Tájinapa níchiravaimahi. Ichapemurihi eta núnaru. Taratahaquene juca áñoanayare. Nucanaracavaya nútì. Tamutu sache tiúriya eta nunisira, néraya. Ichape eta nûrisamurevaya” macahepa ema ricu. ²⁰ Tásihasera ema Viya máichapa ema achane: “Tétavicava eta pisunsuva, piti achane. Puiti jena yati pépenaya. Tájina vahi pítapanaimahi eta juca piúnuhi”. ²¹ Ene nacahe ena achaneana ticurujiricana eta náimahaqueneana nayehechiravarichu. Vahi nápanerechahini naicha eta táuriqueneana tacunachacarehini me Viya taicha téavicavahi tahapasamurechirahi eta nacaimahaquenéraya.

Ema Jesús tímitucahavi eta majaneasirahavihi ema Viya

(Mt 6.25-34)

²²⁻²⁴ Te apahequenepa, ema Jesús máichavacapa ena máimitureana:

—Étisera, nuvaraha ácasiñava yátupina mayehe ema Viya. Vahi ecucaeñamaracavavaicha tayehé eta enicaquenerepi étapa eta emuiriharapi puiti juca ítaresiraichaha. Eta enicaquenerepi étapa eta emuiriharapi, tájina táoñamavacarevaina. Ímararacarichuhi eta cágureana. Vahi tacaeñamaracavahini tayehé eta tanicaquenerepi. Vahi taevacahini, váhivare taechatijiricahini, táunacahipucaini eta tanicaqueneyare. Émasera ema Viya máechapajiricahi máijarasirahi tamutu eta tanicaquenerepiana. Evetijipa éti, iápajupanavahi eta éñamacarévahí me Viya tayehé eta cágureana. ²⁵ Vahi táuricahini eta ecaeñamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca. ²⁶ Vahi étijivaimahi íturucava ecajurucavahini, váhivare táuricahini ecaeñamaracavahini tayehé eta júcana.

²⁷ Ímararacarichuhi eta tajurusirahi eta flúreana, vahi tacaeñamaracavahini tacaematanehini, tájururecahipucaini. Táitsivahisera, te tépunehapa, téavicavahi táurinavahi eta taflurené. Nájina nácuti eta nacamuirihairá etá taurinava, émaripa ema víyarahaini rey Salomón etá tajanunusira etá macamuirihairahinihi. ²⁸ Apanasica ema Viya máijaracahi etá táurinavahi, ániperichuhinéni etá taitaresirahi. Evetijipa éti etá máechapajirisrahehi, máijarasiraheyarehi etá emuiriharapi eti achaneana. ¿Tájaha tacayema vahi ácasiñavahíni etá mayehe? ²⁹ Eta tacahe, vahi ecucaeñamaracavaicha tayehé

eta enicaquenerepiana étaripa te échuririacapuca eta une érayare. ³⁰ Ena apamuriana achaneana te juca apauehe, ichapemurihi eta tacaeñamara-siravacahi eta júcana. Vahi nácasíñavahini mayehe ema Viya, nacuchapahipucaini eta máijararuyarehi éma. Étisera, ecasiñavayarehi eta matiarihirahi ema Ecaiyaque. Máimatihi éma tamutu eta ecamunuiravanahí. ³¹ Eta tacahe, tativayare íjaracava ecaemataneacaya ema Viya, ecasamureraya eta ítauchirayare tamutu eta mavarahaqueneanahí. Maimaharinepa éma. Tíjara-caheyare tamutu eta ecamunuqueneana.

Te vicajirica eta vímahaqueneana, vijacapayare eta táitsivayare ánaqui te anuma (Mt 6.19-21)

³² Vahi ecupica, eti nuchichanaveana. Tayanapane vahi camurihénahini, eti máichuhaqueñeanahí ema Ecaiyaqueñehi. Éma téchahéhi. Eta tacahé, téavicavahi eta mavapinairavahi eta majacapirahehi, machaneraheya.

³³ Tacahe, te ecaimahaquenepuca, íjararecayare eta ímahaqueneana. Íjaracayare nácani ticamunuvanahí. Tásiha, ema Viya máimahainepa, éma tíjara-caheyare eta táitsivayare ánaqui te anuma. Maitavacacainapa eta ecaimahaquenéraya. Tájinavarepa tévajaicavaimahi. Váhivare taeñamavacare ánaqui taicha nájinapa tiámeyechahemahi, váipavare cachusirimahi eta ímahaqueneanayare. ³⁴ Éti, te ecasamurepuca eta ímahaqueneanahí te juca apauehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

Yátupina eta vicuneuchiravaina

³⁵ Éti, yátupina eta ecuchapiranuya eta nuchaviraya. Etsecavaya tamutu sácheana. ³⁶ Ácutihi nácani achaneana músuana titsecavanahí te tapaja navejiequenéraya ema náquenu eta machaviraipahi másihairahi mayehe ema arayenahí. Te máehahamecapa eta tapaja, enevaneyarepa éna navejiequenayare. ³⁷⁻³⁸ Tayanapane enumuhupuca yati, tijararahipuca eta machavirayarehi ema náquenu. Téavicavasera eta náuricacarevahí ema músuana eta machimapirahi ema náquenu eta nacuchapirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvainapa máechapajiricavacayare. ³⁹ Nuvaraha ácaicutiaraquenéna. Machu ácutiriana mácani achane námyeruhi ema tiámerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini. ⁴⁰ Eta tacahe, eti écaunechavayare tamutu sácheana, taicha vahi échaimahi tájamuhuyarepuca eta nuchavirayare nuti Manerejirunuhi ema Viya, machu iárameca —macahepa.

Nararihi ena músuana tiúriana. Nararihivare ena músuana máurirahana (Mt 24.45-51)

⁴¹ Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarachaquenehavihi, ¿viyeheyarechuchapuca viti dócequeneana, téhesera vimutupuca viti véhicavianahí? —macahepa.

⁴² Tacahe, ema Viáquenu majicapapa:

—Nímicutichinahepa eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava matuparacahi ema empleado

eta máijarasiraya eta tinicacare ena apamuriana machamusuvanahí. **43** Tétavicava eta máuricacarevaya ema maca ticatuparahahi, te tamutuhi máitaucha jácani machimapirana ema máquenu. **44** Németeaca, eta tamutuirahí tiuri eta machimapirahí, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauraiva. **45** Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. Tásicha, macaetemajircavacapapuca ena machamusuvanahí, énapa ena vanaracanahí. Máichapapuca eta piesta, téniricapa térapa, ticavahapa. **46** Tásicha, vaipa manecapauchavahini te títecápapa ema máquenu. Tásicha, machimaracapa ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraivahi.

47 Tacutiquene mácani musu, te máechahi eta mavarahaqueneanahí ema máquenu, tásicha vahi máitauchahí eta mavanahianahí éma, muracayarehi eta macaicuñairayare. Ticaestayarehi éma. **48** Mácenisera musu, te vahi máechahi eta tacayemaqueneana, tásicha téjecapavapa, éma apaesayaréchu eta máicuñayare. Étipa eti ecaimitucasianahí eta yátupiqueneanahí, tatuparacahi ímitucavacayare ena apamuriana achaneana. Núti, ánaquiapipa eta nímitusiráhehi; tásicha puiti, étipa táehanacahi eta juca ímituresirayare.

*Ena achaneana nacatianacainapa ena téhicanaya ema Jesús
(Mt 10.34-36)*

49-50 Núti, eta nítesirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena tictorianacanuana. Éti apanava, tictorianacaheanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muiji. Eta juca, nuvara-haquinenehi táitauchavavanehini. **51** Éti ímijachaipapuca eta nítesirahi te juca apaquehe, tájina tacayemacarémahi, ímijachaipavarepuca tiúricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe. **52** Taicha puiti juca vicaijuheyare, te natarihinapapuca te étanahi peti mácani achane, esu mayena, esu machicha, ema machicha, ésupa esu chínенaca. Te mapananahipuca ena téhicanuanahí, tásicha apinanahipuca ena tictorianacanuanahí. Téhesera apinanahipuca ena téhicanuanahí, mapananahivarepuca ena tictorianacanuanahí. **53** Mácani achane, súcani esena, te natarihi ena nachichanaveana, nacatichayarehi ena ticachichanahí táichaveneyarehi eta náehisiranuhi éna. Mácani apana achane masuapajirahahí, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenanaveana.

*Ena achaneana timasuapanahí eta máimeruana ema Viya
(Mt 16.1-4; Mr 8.11-13; Mt 5.25-26)*

54 Tacahe, ema Jesús máechajicapa ena achaneana:
—Te ímaha timapicurume, émeteacaripa tiquivayare. Ene tacahehi. **55** Técaticavapuca te vana, émeteacaripa váipavare tiquivaimahi*. Énevare tacahehi. **56** ¡Eti masuapajirahana! ¡Yátupihinéni ímatiequenehahí te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

57 ¿Tájaha tacayema vahi ávarahahini éhica eta juca yátupiqueneana?
58-59 Járjapainapa eta sache ticaicuñanainapa namutu ena achaneana.

* **12:55** Te jena avasare Judea, te táerisine eta sache eta tásirareasa eta tiquiva. Étasera eta táuchusihá eta técaticava te vana, tájicahí tamutu, taicha tijuruhimuhuhivare.

Tacamunurichu etanucayare puiti ema Viya, ecasiñayare ecuchucuiyavaina. Eta juca tímicutijiricavahi mácani achane te ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahí, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapa eta yucu infierno, váhiqene iúchucaimahi éti —máichavacapa ema Jesús.

13

Tavaraha náneuchava ena achaneana

¹ Étarichu te jena sache, títecapanavarepa ena apamuriana achaneana. Nametacaipa ema Jesús eta táïñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléoanahi éna. Tépenanapa te tachacayanahi eta sárareana nacaparuuanahi námavahuásanahi. ¿Étapuca eta nasipecaturaivahipuca tímicapacavacahi? —nacahepa.

² Tacache, ema Jesús máichavacapa:

—Éti ímijachaipa táimicaparuhi eta nasipecaturaivanahi ena nani nayehe ena apamuriana najaneananahi te Galilea. ³ Nútisera numetacahe: Váhira étainahi táimicapacahini eta nasipecaturaivanahi. Vahi étaparacaina. Tacamunusera éneuchavavane éti, machu táijahúchava eta épenira, machu ácuti éna. ⁴ Némechahe ena nani diéciochoqueneana tacaparuuanahi eta táevajaisiravahi eta torre tayuchamarainihi te calle Siloé. Ímijachapapuca táimicpacavacahi eta táichapevahi eta naviureva, navetijipapuca nayehe ena apamuriana ticavasanahi te Jerusalén. ⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tíjahúchavaya eta épenira —macahepa.

Ema Jesús máimicuticha eta yucuqui máhiriquire

⁶ Eta máechajirisirahi ema Jesús, máimicutijirichinapa. Ánipa macahehi:

—Matiarahihi ema achane. Tatiarahihi eta masucure higo. Máhiriquirehisera. ⁷ Tacache, máichapa ema manusura: “Mapanapa año vahi ticahi eta juca nusucure. Péchupaicayare puiti taicha tiápítaváricaipa eta te juca isaniti” macahepa. ⁸ Émasera ema musu majicapapa: “Tiúripanapucaini, tata, vicuchapaichahaini étanainavaréni año. Nuvaraha némurinahechayare eta máteji apaesa tacahipapucaini. ⁹ Téhesera váhiqenénaichapuca tacucahi, néchupaicasarepa” macahepa ema musu.

Ema Jesús macanaraca esu esena tépiñumaiquehe

¹⁰ Te apanapa sávaru, ema Jesús tímiturecavarepa tayehé eta náurujisi rareva. ¹¹ Sutiarihihi esu esena mávaháruhi ema éreana, tépiñumaiquehehi eta suítaresira. Vahi táurihini sutupinahahini. Diéciocho áñoripa eta sucajumairahi. ¹² Te máimahapa ema Jesús, máichuhapa. Tacache, supauchapa. Máichapa ésu:

—Páurevi piti esena, picajumahi. Puítisera pinaracainapa —máichapa.

¹³ Tacache, ema Jesús manacapa eta mavahuana te suápusi. Enevanepta titupinahahi ésu, tinaracapa eta sujumainihi. Ichaperinehi eta sucunachirahi ema Viya. ¹⁴ Matiarahihibare ema táquenuruuhahi eta náurujisi rareva. Eta máimarahi eta juca, tisemarinehi taicha eta macanarasirahi ema

Jesús esu sucajumaquene te jena sache sávaru tacapicahuquenehi. Tásiha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipui-rayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

15 Tásiha, ema Viáquenu Jesús, majicapapa:

—¡Téavicavahi eta tamuracava eta esamureana! Te ticaitiquihi eta epera te jácani sache sávaru, evejapuacayarehi eta ésichirayare eta une, tayanapane tacapicahuquenehinéni eta sache. **16** Suvetijicha esu suca esena vicutiquenehi achane, mámariequenehi ema viáchucaini Abraham, ticatajicacarehi eta nucanarasirayarehi tayehé eta máitiarapi ema Satanás. Taicha dieciocho áñoripahi eta máecájumachirahi ésu. ¡Táuricahi nucanaracayarehi puiti juca sache tacapicahuquenehi! —máichapa ema Jesús.

17 Eta nasamirahi ema Jesús, namutu ena ticatianacanahi titsirihana-rinehi. Énasera ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

*Ema Jesús máimicuticha eta taqui eta mostaza
(Mt 13.31-32; Mr 4.30-32)*

18 Ánivare macahe ema Jesús:

—Puiti nuvaraha nímiturapiana nuti Manerejirunuhi ema Viya. **19** Tacutihi eta ánicichachaquene taqui eta mostaza. Te máevacapa ema achane te máesane, tiúnarahiyarehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

*Ema Jesús máimicutichavare eta lévadura
(Mt 13.33)*

20 Ánivare macahe ema Jesús:

—Nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

*Vicamesavayare visiapa te tapaja ánicurichu
(Mt 7.13-14, 21-23)*

22 Ema Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini. **23** Matiarihihi ema tiyaseserecahi éma, ánipa maicha:

—Tata Viáquenu, ¿váhipuca camurihavianainaya viti viúchucuhanaya? —máichapa.

Tásiha, éma majicapapa:

24 —Vahi táechacare te ánimuriheanayareichupuca eti esiapanaya eta mávasa ema Viya. Étisera tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera titujicavanaimahi. **25** Taicha járajapainapa eta sácheyare, nératacainapa eta tapaja. Tásiha, ítecapapapuca éti, éhahamecapa eta tapaja, epiaracanupa: “Tátachicha, pivejieuquenehahavi”. Tásiha, nujicaphénapa nútì: “¿Nájahahesica éti? Vahi nímatihe. Váhivare nuchanerahénahí éti”.

26 Tásiha, ejicapanuinapapuca: “Vítirichu picachanequeneanahi te mesa eta vinisirahi. Pímitucahavahivare te plaza te jena viávasa”. **27** Tásiha, nujicaphénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” níchahénapa. **28** Járajapainapa

eta sache ímahainapa te tajuhe eta mávasa ema Viya te návihahi ena viáchuca-naveanainihi: émaripa ema Abraham, ema Isaac, ema Jacobo, énapa namutu ena profetana. Étisera enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuréravaya étapa eta etsiriraya eta emasiapirahi. ²⁹ Nasapiha tisiapanaya ena camuriqueneana achaneana tiásihanayare te tamutu avasareana te juca apaquehe. Tétavicavainapa eta náurisamurevaya. ³⁰ Tásiba, te jena sácheyare, nácani téquenehanahi puiti, nasapihainapa tisiapanayare. Étisera eti ínapureanahi puiti, étinavarepa vahi ítujicavaimahi esiapa —máichapa ema Jesús.

Ema Jesús ticatisamureva náichavene ena achaneana ticavasanahi te Jerusalén
(Mt 23.37-39)

³¹ Tacahe, te jena sáche, títecapanapa ena fariséoana te mávihahi ema Jesús. Náichapa:

—Piyana. Pitátójiva piúchuca eta te juca. Taicha ema Herodes mavaraha ticapacaviyare —nacahepa.

³²⁻³³ Émasera ema Jesús majicapapa:

—Eyana emetaca ema mácará ticaetemarahiquene. Vahi típicarareca-nuumahi nútí eta juca mame tarapihi. Nunasiyarechaha puiti, nucanarare-canumayare ena nacajumaqueneana énapa ena návaháruanahi ena éreanana. Nútí jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanaini.

³⁴ Tétavicavahi eta táimicatisamurechiranu eta viávasa Jerusalén. Nama-puruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútipavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacurujimuriha eta tachichanaveana te tapava. Váhiqenesera návarahahíni. ³⁵ Náimahainapasera eta náichararacavayare. Ticaquipai-casiyare tamutu eta napenana. Táimijunavacainapa éna eta napisiraya. Numetacahevane puiti: Eta nínajiasiravacainapa, vaipa tímahanuanaimahi. Tiámainucavainapa te náitsivacha eta napanereruana, navarahainapa tijaca-panuana. Nacahénapa: “Ichape eta vicunachiravi píti vanairucaquenévihi me Viya” nacahénapa.

14

Ema Jesús macanaraca ema achane tiámaquiape

¹ Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasiyahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús. ² Tíjahúchavapa tímerecava te nataracu ema émana achane macajumaquene. Tiámaquiape-vacahi éma. ³ Ema Jesús, eta máimairahi ema macajumaquene, mayasereca-vacapa ena natiarihiqueneanahi:

—¿Táuricapuca vicanaracavaca ena nacajumaqueneana puiti juca sávaru-muhuirahi tacapicahuquenehi? —máichapa.

⁴ Énasera vahi najicapahini, timatinanarichucha. Tásiba, ema Jesús macara-tavauchapa ema macajumaquene. Eta macaratavauchirahi, enévanepa tinaraca. Tacahe, máevatacapa mayana te mapena. ⁵ Tásiba, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tiáquipaicavahi te pusu te jena sache tacapicahuquenehi. Eta máeñamirahi, tipatsicavayarehi macaechehpupana eta paure sárare, tayanapanehinéni eta sache tacapicahuquenehi —máichavacapa.

6 Énasera vahi napatsicavahini najicapahini. Timatinanarichucha.

Eta maconsejarapianahi ema Jesús

7 Eta máimarasiravacahi ema Jesús ena macumpirachaqueneanahi ema fariseo, énajivahi tinerejiuchavana eta náejasihayarehi tiúrinapanana. Tac-ahé, ema Jesús maconsejachavacapa, ánipa máichavacahi:

8 —Te natarihinapuca nacumpirachahe, vahi ecainapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapicahupanahi eyehe éti. **9** Taicha ema téniricahi, éma ticaejarecayarehi, tijuricati macaechepecavi te péjasihahi macaejasihayarehi mácani apuna. Titsirihacarepahi eta macaejacavihini te náequenemuri.

10 Te ecaichuhacasipuca, ecaejacavaya te náequenemuri, apaesa ema téchahi tíchuahénapa ticaejacaheyare te návihahi ena tipicauchacareanapanahi. Tásiba, ecunachacarénasarepa nayehe ena natarihiqueneana.

11 Taicha nácani ticasíñavavaicanahi tímijachavanahí ticapicahuana, ema Viya máimicatsiriacavacayarehi. Nácanisera mánsuanahi eta náitaresira, ichapeyare eta nacunachacarevayare me Viya.

12 Ema Jesús maconsejachavare ema fariseo, ema ticumpirarecahi:

—Píti apanavare, te péniricayare, vahi nacucarichu píchuhavaca ena pémunacasareeanahicha, ena piparapenaveanapuca énaripa ena rícoana, táichavenénahi eta pivarairainahí títsirijicavanaya eta piyehe. **13** Píchuhavacayareva ena páureana, nácani nacahemahianahi: túpúpavaquiana, masariana, púchuquiana. **14** Taicha ena nani, vahi títsirijicavanimahi eta piyehe. Táitsivasera tétávicavayare eta piúricacarevayare píti eta pijacapirayare eta pícuhihi te jena sácheyare picachanevacayare ena náuriqueneanahi macaechepureana ema Viya —macahepa.

Ema Jesús máimicutichinavare ema achane tíchuahavacahi ena achaneana, máeniruanayare

15 Tacahe, eta nasamirahi ema Jesús ena natarihiqueneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricacarevaya te visiapapuca eta mávasa ema Viya, vinicayare te mamesara —macahepa.

16 Tásiba, ema Jesús majicapapa, máichapa:

—Jéhesare, te esiapapapucaya! Nímicutichinahe puiti. Matiarihihi ema émana achane téniricahi eta ichapemuriquene tinicacare. Camuri-ana ena máichuhaqueneanahi. **17** Te máimahapa tiúripa eta tinicacare, mavanecapa ema manusura mametacavaca náitecapa ena nacaichuhacasique-neanahi taicha tiúriripahi eta tinicacare. **18** Namutusera natanucapa eta náetseraruyarehi. Ema apuna ánipa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apauehe”.

19 Ema apuna énerichuvare, ánivare macahe: “Picatajicanuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuiye nuvachareruanahi”. **20** Ema apuna ánivare macahe: “Nupaennumava nítauchavahi eta nuvehacacairahi. Eta tacahe, vahi nítujicavaimahi níteca”. **21** Te tichavapa ema musu vanairucahi, mametacapa ema máquenu eta namaitujisiravavacahi títecana ena máichuhaqueneanahi.

Tásiha, tisemapa ema máquenu. Máichavarepa ema musu: “Tiuri, piyana puítirichu te plaza étapa te cálleana. Píchuhavaca ena páureana, ena masariana, ena púchuquiana, nácani pétupiaruanayare nacahemahiqueneanahi”. ²² Tacahe, te tichavavarepa ema musu, mamecapa ema máquenu, máichapa: “Tata, nítoucheripa eta juca pivanairipihi. Jucarihichahasera eta juca téjasi-hacareana”. ²³ Tacahe, ema máquenu máichavarepa: “Piyanavare puítirichu te isanitiana. Píchuhavaca ena achaneana, nácanipa piácapajiruanayarepahi te achene. Picamesavaca náiteca, apaesa nayuriticava eta juca téjasi-hacareana mávacuanaichahahi. ²⁴ Nusemacarupa puiti. Nájinava néniruimahi ena náinapureanahi níchuhaqueneanahi” macahepa ema ténericahi —máichapa ema Jesús.

Vahi maejeraréna eta vélisiraya ema Cristo

²⁵ Te jena sácheana, camuriana ena achaneana téhicanahi ema Jesús. Tásihasera, éma maesemurihapa. Máichavacapa:

²⁶ —Te etiarihipuca éti evarahanayare éhicanu, tacamunu epamicavaya yátupina eta éhisiranuya. Nútinapa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítaresira. Téhesera apaesarichupuca eta émunasiranuyare, vahi táuricaimahi éhicanuhini. ²⁷ Ecatajivayare taicha eta éhisiranuyare. Te epicahipuca íjaracava muraca, táimicapacahepuca eta éhisiranuhi, tiúripanaichu vahi ecuehicanu. ²⁸ Tacutiquene te epanerecha-hipuca éti épiyarecayare eta anuquehe peti apinapuca piso, vahi táuricahini émunanasicavahini enahahajisiravainarichuini ecaematane, epanerechanumayarehi áyanayarehipuca egastaruya ítauchirainahi eta evarahaquenehi épiyaca. ²⁹ Vahi ácaemuñavaimahi épiyareca eta tiúrina peti, te vahi árata-haimahi ítaucha. ³⁰ Tásiha, nacahénapapuca ena ticaecahiheanayare: “Ímahapa, váhira máratahahini máitauchahini eta jena peti, táurinaqueneyarehíji. Tíjaracavasamipa. Ichape eta mamelaya” nacahenapapuca. ³¹ Émaripa mácani rey, te tisemahipuca, mavarairahi máichayare eta guerra, macanayarehi mácani apana rey camuripanahini ena machanerana, mapanerechanumayarehi te maratahayarepuca macanara taicha éma vahi camurianahnini ena machanerana. ³² Eta máimairahi vahi máratahayarehi, váhivare tíjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini. ³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi erata-hayare, vahi ecuacemuñava éhicanuhini.

³⁴ Eta icheve, téavicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi. ³⁵ Tájinapa tacamunucarevainahnini. Ticaquijiyarepa. Ene nacahehi ena tínajicavana eta náehisiranuhi. Nacutihi eta tajachira eta icheve. Te evarahapuca ecaicutiara, tavaraha eta epanerechinavaya —macahepa.

15

Ema Jesús máimicutichinahi te témitiaca étana uvesa (Mt 18.10-14)

¹ Tiuri, te jácani sácheana, títecaparacanavarepa ena achaneana te mávihahi ema Jesús. Camurianapahi éna. Natiahihipahi ena cóbrarécarahiana eta impuestoana. Namutu éna, ichape eta náepurucarevahi nayehe ena fariséoana.

Émasera ema Jesús, vahi máepuruvacahini. Tásicha, témeñahavanapa éna te machacaya, taicha navarahapa nasamararacayarehi éma. ² Natiarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaqueñehi ema maca! ¡Nanutuchucha majacapavaca ena nacahequenetátójiana ticajachahacareanahil! ¡Nasapihana macachanevacahi eta nanisirahi ena nánitatajiana! —nacahepa.

³ Tacahe, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

⁴ —Esamanuchaha. Nímicutichinaheya puiti. Matiarihi ema émana achane. Ticayehéhi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta maeñamiravahi, majunijicayarehi eta apamuri noventa y nueve uvesa te majaneasihahi. ⁵ Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa. ⁶ Te títecrapapa te mapena, máichuhapa ena machacayapenana májiriareana. Tacahe, máichapa éna: “Yare, éti apaña iúrisamurevare nuyehe nútì. Taicha níchimavaipahi eta uvesa táemitiaruhi” máichapa ena májiriareana.

⁷ Tiuri, nútì numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina náejecapiravainahini. Tétavicavainehisera eta máurisamurevahí ema Viya nayehe nácani achaneana tímatianahi eta nacapecaturairahi, tásicha téneuchavanapa, náinajicapa eta napecaturanaini —macahepa ema Jesús.

Ema Jesús máimicutichinahi eta táemitiaru étana reale

⁸ Tímiyanava eta máechajirisirava ema Jesús, ánipa macahe:

—Nímicutichinaheya eta apaña. Sutiarihi esu ésuna esena. Ticayehéhi eta dies reale eta tijapu plata. Te témitiyechapuca eta étape, tinanesiyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena. ⁹ Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apaña iúrisamurevare nuyehe nútì, taicha níchimavaipa eta reale nucamitiaruhi” suíchavacainapa esu esena ena suájiriareana. ¹⁰ Tiuri puiti, nútì numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecaturarahini, máinajisiraipahi eta mapecaturanaini —macahepa ema Jesús.

Ema Jesús máimicutichinahi ema émana achane amaperu tacamitiriaru eta matuhusiva

¹¹ Tímiyanava eta máechajirisirava ema Jesús, ánipa macahe:

—Matiarihihi ema émana achane. Apinanahí ena machichanaveana. Ajairana. ¹² Étana sache, máichapa ema maiya ema émana machicha amuya-pana: “Tata, picatajicanupa, píjaracanu puiti eta nuyeheyare tatucachaquenuyare eta picayehequeneana” máichapa. Tacahe, tísapavapa ema naiya. Máijaracavacapa eta máimahaqueneana ena apinana machichanaveana. ¹³ Tacahe, étarichuhi te jena sácheinahí, tétupiricavapa ema amaperu, tiyanavanepa. Mámapa tamutu eta mayehechiravaripahi máijararuhi ema maiya. Tiyanapa te apaña avasare tayerehiquene. Eta ánaqui, máitaiyahí tamutu eta máimahaqueneanaini. Tamutupa mamapachichijica. ¹⁴ Tacahe, eta jena sácheinahí, táchitacapauhapa eti ecuha eti avasare mávihahi ema amaperu.

Tacahe, namutu ena achaneana tayehe eta te avasare téchurihanapa eta tincacare. Tivayuchavapa eta ecuha. Ema amaperu titarahaipahi eta máimahauqueneanaini. Tásiha, tájinapa maviyahini eta manica. ¹⁵ Tásiha, ticaquenurecapa mayehe ema émana achane. Tacahe, ema máquenuhi mavanecapa ema amaperu eta majaneasinaya eta cúciana eta te máesane. ¹⁶ Ichapesera eta máecuavahi. Majamurachainehi manicahini eta taniru eta cúciana, taicha nájina náitátihi éma. ¹⁷ Tacahe, téquecavapa eta mapanerueruanahi. Tipanerequenehavapa émajiva. Ánipa tacahehi eta mapanereruhi: "Nanutu ena mavanarana ema tata, tiúrihi eta nanisira. Nútisera ani ticapacanuinapa eta nécuava. ¹⁸ Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapecaturaipa mayehe ema Viya étapa eta piyehe piti tata. ¹⁹ Tayanarinepuca taimicutijiricavaineepuca vahi pichichanuina. Picatajicanusera. Pijacapanu, nímiáquenuchavarine piyehe piti tata. Nácutirine ena pivanarana. Níchayare ema tata". Tacahepa eta mapanereruhi ema amaperu achane.

²⁰ Tásiha, tiyanapa tichava eta me maiya. Te tiánehipa títecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Mátserarecapa eta máurisamurevahi. ²¹ Émasera ema amaperu, téchajicapa. Ánipa maicha: "Tátachicha, nucapecaturapa mayehe ema Viya étapa eta piyehe piti tata. Tásihasera, tayanarinepuca taimicutijiricavaineepuca vahi pichichanuina" máichapa. ²² Émasera ema maiya, mavaraha máimerecaya eta yátupirahi eta majacapirahi ema machicha. Vahi máicuñacahini. Tásiha, mavanecapa ena mavanarana. Máichapa: "Etátájirica, iama eta muíriare tiúrinapana. Emuiriacha ema maca nuchicha. Iama eta tiúrinapana surtija; masurutijaina. Iámavare eta tiúrinapana eparupeva, máeparupevaina. ²³ Énerichuvare épana eta jena mamona tiújepana. Ecapaca, vinica. ¡Víchayare eta fiesta! Viúrisamurevaina eta máitecapirahi ema maca nuchicha. ²⁴ Taicha éma, tímicutijiricavahi eta máepenaquenénahini ema maca, puítisera tiúchujicapa tichavapa ani nuyehe. Máemitiaruhi te numirahu, puítisera nímahapa éma" macahepa ema maiya. Tacahe, ichape eta náurisamurevahi namutu. ²⁵ Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta fiesta te tajuhe. ²⁶ Tásiha, máichuhapa ema émana nacajurure. Mayaserrecapa: "¿Tájaha tacayema eta juca fiesta?" macahepa. ²⁷ Tacahe, máichapa ema macajurure: "Ema piparape títecaphi. Tásiha, ema piya máimicacapa eta étana mamona tiújepana. Ichape eta fiesta, taicha eta máurisamurevahi ema piya eta máitecapirahi ema piparape" máichapa ema macajurure. ²⁸ Tacahe, tisemarinehi ema maparape. Vaipa mávarahahini masiapahini. Tacahe, te máechapa ema naiya, tiúchucapa. Macamesapa macasiapa. ²⁹ Majicapapasera ema machicha, ánipa maicha: "Píamaha, tata. Ánaquiapapa eta nítatíravihi núti. Tájina nímatiyahini nácapaemachavihini te pivanairipiana. Tásihasera, tájina píjaracanuhini eta étanainahini chívachi-chainapucaini eta nunicahini nucapiestarahipucaini núti, nácachanehini ena nájiriareana némunacasareana. ³⁰ Tásiha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji titahacavahi eta píjararuinihi picayehequeneanainihi náichavenehi ena esenana túhusiana" máichapa ema machicha. ³¹ Tacahe, ema maiya máichapa: "Píamaha, nuchichachicha, píti ánaquiaparipa eta péjahasiranuhi. Tásiha, tamutu eta nucayehequeneanahi, piyeheanahivare píti. ³² Puítisera,

táuricaichucha vicha eta piesta eta viúrisamurevainahi, taicha tímicutijiri-cavahi eta máepenaquenénahini ema maca piparape, puítisera tiúchujicaipa, tichavapa éma. Ema máemitiaruhi te vimirahu, puítisera viápechavavarepa vímaha éma” máichapa.

Tacahehi eta máechajiruvanahi ema Jesús nayehe ena achaneana.

16

Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu

¹ Ema Jesús ánivare macahehi eta máimitusiravacahi ena máimitureana:

—Nímicutichinahe eta apana. Ema achane rico, matiarihihi ema mayehe capataz, téchahi tamutu eta máimahaqueneana ema máquenu. Tásicha, masamairiricapa ema máquenu eta mamapachichijisiraipahi eta máimahaqueneana. ² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi eta nímahauqueneana”. Émasera ema capataz tájina maviyahini macatiuchiavahini taicha yátupihi eta máejecapiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyeho”. ³ Tacahe, ema capataz ichaperinehi eta mapanereresirahi taicha eta máuchusiraya. Tásicha, macahepa te mapanereruana: “¿Tájahainapapuca nícharacavayare puiti? Ema náquenu ticuchucanuinapa tayehe eta juca nématanerepihi. Ichape eta nutsirihacarevayare taicha vahi núrihahini nucaematanehini eta isaniti, váhivare nuratahaimahi eta tamuracava eta emataneca. Titsirihacarehivare nuyaseserecahini eta nunicaquene. ⁴ Tiuri, áni nucaheyare. Némeñahavayare nayehe ena ticanteveanahi mayehe ema náquenu, tiámainucava te nítucavapapucaini eta nítatijiyavayare” macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?” ⁶ Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pifirmaruhi. Puítinarichu vítsivachaya eta apana vale. Vaipa pivachachaimahi tamutu. Cien latainarine eta pinteveyare” macahepa. ⁷ Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Sésicentohi tarera eta trigo eta nuntevehi mayehe”. Tacahe, ema capataz máichavarepa: “Júcahi eta piyehe vale pifirmaruhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana. ⁸ Tacahe, te máechapa ema máquenuini eta máichaqueneanahi ema mayheni capataz eta macatiuchiravahi, ánipa macahe: “Tétavicavapa eta máitusirahi masámápuha ema maena nuyeheni capataz” macahepa ema máquenuini. Ene nacahehi ena achaneana máimati-rrahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayuacavacahi eta tájiparacana.

⁹ Puiti numetacaheyare eti nímitureanahi: Eta ítaresirahi te juca apaquehe tamauriquenehi, te ecaimahaquenehipuca, ecajiyare te napauchahepuca ema ticamunuwanahi. Tacahe, te ítecapapa te móvasa ema Viya, tiúriyare eta ítecapiraya, ánaqui ejacapainapa eta táitsivayare.

¹⁰ Taicha nácani tiúrihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tiúrihi eta náechapajirisirahi jácani ánichichaquenehi, éneyareichuhivare vahi tiúrimahi eta náechapajirisirayare eta camuriquenehi.

¹¹ Taicha te vahi tiúrihi eta ítauchirahi eta ecatuparahaírahi échapajiricaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupiqueneana te anuma. ¹² Eta tacahe, ítaurahiyare tayehe jácani apayeheana apaesa máijaracahe ema Viya eta ícuchihi, taicha eta máimairahi éma eta ítauraivahi éti.

¹³ Éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivre. Tásicha, ema apava, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehini eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

*Ema Jesús maconsejachapa ena fariséoana
(Mt 19.1-12; Mr 10.1-12)*

¹⁴ Natiarihihivaresera ena fariséoana. Nasamararacahi eta juca máimiturapianahi ema Jesús. Tásicha, nacaecahirichuchasera eta nasamirahi éma. Taicha téavicavahi eta tavayuasiravacahi éna eta tímahacareana. ¹⁵ Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihí eta esamureana. Macatianacahi ichape éma eta apimirahérahi.

¹⁶ Numetacahevare eta apava: Ema víyarahaini Moisés, énapa ena víyarahaini profetana tínapucanahi eta náechajisihahi tayehe eta nítesirayarehi nuti Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apava, tituparacahe éhicanuyareva.

¹⁷ Numetacahe puiti: Váhiqene titavaimahi eta tasuapacarevahí eta máechajiriruvana ema Tata. Máichecuaraquie éta, tayanapanehipuca taitava eta anuma étapa eta juca apaquehe. ¹⁸ Éti, eta ímiturapi, ísapahi mácani achane máquijica esu mayena, tásicha, ísapahivare maveha esu apava esena. Nútisera numetacahe: Mácani achane, te máinajicapuca esu mayena, tásicha maveha esu apava esena, éma ticapecaturaipahi me Viya. Tacutiquene mácani apanavare achane mavehana esu esena máinajiruhi ema suima, énerichuvare ticapecaturahivare me Viya taicha ésu, matiarihichahi ema suímaquenehi —máichavacapa.

Eta macatajivairahi ema rico étapa eta máuricacarevahí ema paure ticaijare Lázaro

¹⁹ Tacahe, ema Jesús máimitucavacavare ena achaneana. Ánipa macahe:
—Nímicutichinahe eta apava. Matiarihihi ema émana achane. Mavayuchahi eta marricuva. Tétavicavahi táurinavahi eta macamuirihaira. Tijanunuuhacanecha. Tamutuhi sácheana máicha eta táurinaquene piesta.

²⁰ Tásicha, matiarihihivare ema apava achane paure ticaijare Lázaro. Ticajumahi. Amairihahi carachachaha eta majuma. Téjahapairicahi éma tamutu sácheana te mapajacura ema rico. ²¹ Ema maca paure tiyaseserecahi manicayare eta máemacharajiana ema rico. Tájinaserá náijaracaimahi. Tavetijipa, vahi túmenahini ema paure. Vaipa maratahahini macatiuchavahini eta tárverasirahi eta tamucuana eta macarachana. ²² Étana sache títecapapa eta máepenirahi ema paure. Nárajapapa ena ángeleana;

náepanapa eta máchaneva ema Lázaro, námapa tayehe eta paraíso mávihahi ema viáchucaíni Abraham. Tacahe, te táequenepa, tépenavarepa ema rico. Tiúrinavare eta náecarirahi. ²³ Eta máepenirahi éma, tiyanapa tayehe eta macatajivayayarehi. Tásicha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi. ²⁴ Tacahe, tipiaracapa ema rícoini: “Tata Abraham, pájapanunu. Picatajicanu, pivanesinanuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavicavahi eta numaunehahi eta te juca nucatajivayayhi tayehe eta juca návihahi táijurequene yucu” máichapa. ²⁵ Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavicavahi eta piúricacarevahi. Tájina pácamunuhini eta pítaresirahi. Ánipasera picatajivayayhi. Émasera ema maca Lázaro, ichapemurihi eta macatajivairahi te achanelrichaha. Puítisera vaipa macatajivahini. Puiti éma, majacaparipahi eta máuricacarevahi. ²⁶ Tacutiquene máitujihí eta mánucuirainahini eta ára piyehe. Pítiripa váhivare pítujicavaimahi pítcapauchahavi ani te juca viávihahi víti, taicha jucarihi eta tíchejimirauchahavihi eta viánucuirainahini tacutihí eta tiúchausi cajacure. Máitujihí eta mayanahini” macahepa ema Abraham. ²⁷ Tacahe, ema rícoini máichavarepa: “Tiuri, te váhipuca titujicacarehi, picatajicanusera. Pivanesinanuini mayana ema Lázaro te nupena. ²⁸ Mametapaninanuini ena cíncoueneana nuparapenaveana. Maconsejachapanavacaini eta náeneuchiravainaini éna, apaesa váhini nacuitecahini tayehe eta juca návihahi nútí nucatajivayayhi”. ²⁹ Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqui piávihahi píti”. ³⁰ Ema rícoini majicapavarepa: “Táitaurevaquene ene tacahehi, tata Abraham. Tiúripanahiserahipucaini mayanahini ema émana máepenaquenehi eta nayehe ena nuparapenaveana, mametapanavacahini. Németeaca téneuchavavaneanapaini”. ³¹ Ema Abraham máichavarepa: “Te váhipuca nacusuapahini eta Sagrada Escritura, tacaheyarehi eta namasuapirayare mácani máechepurehi máepenaquenehi” macahepa ema Abraham.

17

*Ichape eta máicuñayare mácani tímiaquipaica te pecatu ena amaperuana
(Mt 18.6-7; Mr 9.42)*

¹ Te táequenepa, ema Jesús mametamurihavarepa ena máimitureana. Ánipa macahe:

—Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuriana tayehe eta pecatuana. ² Mácani tímiaquipaicaya ema émana amaperu, tiúripanahipucaini máepenahini mativainahini éma. Váhirichupucaini macucaicuñahini; taicha vahi macuimiaquipaicahini ema amaperu tayehe eta pecatu. ³ Eta tacahe, échapavaya éti machu ímiaquipaica ena amaperuana.

*Tatuparaca viperdonacha ena téjecapavana viyehe
(Mt 18.21-22)*

Numetacahe eta apava: Te máejecapavapuca ema piparape eta piyehe, piconsejachaya. Téhesera máeneuchava eta piyehe, piperdonachaya éma.

4 Tayanapane siétehénapuca máejecapava te étana sache, máeneuchavasera eta piyehe, tituparacavi piperdonachayare –macahepa ema Jesús.

Tamutuyare virataha te yátupihi visuapa ema Viya

5 Tiuri, ena apóstoleana nayaserecapa ema Jesús:

–Tata Viáquenu, picatajicahavi. Pímitucahavi apaesa tajurucapaipaini eta vicasiñairavahi mayehe ema Viya. Vivaraha ichapenaini eta vicasiñairavaya eta mayehe –nacahepa.

6 Tacahe, ema Jesús majicapavacapa:

–Vahi tacamesa ichapenahini eta ecasiñairavahi mayehe ema Viya. Tayanapanepuca ánicichainarichu eta ecasiñairavahi, tacutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejeca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásicha, eta yucuqui tisuapaheyarehi. Tiyejecavainapa tayeha eta cáquiure.

Tatuparaca vítauchayare eta vicaemataneasirayare ema Viya

7 Étaripa ema mácani achane te ticamusurahi, te másihapaipapuca ema musu te vámahi eta majaneasirahi eta vaca, te tísahahipuca, te títecápapa te peti, ema máquenu váiparinehi matátáuchaimahi máepiyaca eta tinicayare eta máenisiraya ema musu. **8** Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásicha, máichainapuca: “Tiuri, nítanesipa. Pítipavapa pinica”. **9** Váiparinehivare mahasulupayachaimahi ema mamusura eta máitauchirahi eta mavananahianahi. **10** Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti músuhanahi vahi vicunachacarémahi. Tacarichuhi vicha eta vivanhianahi” ecahenapa –máichavacapa ema Jesús.

Ema Jesús macanaracahi ena diésqueneana leprosoana

11 Tímiyanavavare tipaica ema Jesús, macaijuhepa eta Jerusalén. Máetavicavacapaipa eta avasareana te provincia Galilea étape eta Samaria. **12** Te máitecapauchapa eta apana avasarechicha, tiúchujicanapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayerehichucha. **13** Tacahe, napiaracapa ema Jesús:

–Tata Jesús Nazareno, pájapanuhavi. Picatajicahavi, picanaracahavi eta vijuma –náichapa.

14 Tacahe, ema Jesús máesenicavacapa. Tásicha, máichavacapa:

–Eyana, ímercava te namirahu ena tuparairucana apaesa náimamaracahe. Énainapa nametajirica eta iúrivaipa, enarasiraipahi eta ejumanainihi –máichavacapa.

Nasuapavanehi éna. Tásicha, eta nayanirahi, tinaracanapaipa. **15** Tacahe, ema émana, eta máimairavahi eta manarasiraipahi, tichavapa te mávihahi ema Jesús. Tipiaracapaipa muraca eta macunachirahi ema Viya. **16** Matupirupa tépuyucahi te mamirahu ema Jesús. Tétipaicapa macaitecapa eta mamira te apaquehe, mamaverarasiravahi eta mahasulupayachirahi ema Jesús. Ema maca achane, indigenahi samaritano. **17** Tacahe, ema Jesús máichapa:

–Ticutimahi diésnahi ena nucanararuanahi. ¿Tájahapuca tacayemahi vahi nachovahini ena apamuriana nuévequeneana? **18** Macarichuhi tichava ema maca apavasaquenesamihi, macunachapaipa ema Viya.

19 Tacahe, ema Jesús máichapa ema achane:

–Péchepuca, piyana pichava. Pinaracaipasera táichavenehi eta picasiñiranuhi –macahepa.

*Eta ecutiarareanaya eta máitesiraya ema Cristo
(Mt 24.23-28, 36-41)*

20 Tiuri, ena fariséoana nayaserecavare ema Jesús tájamuhuyarepuca eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tacajerahini eta ímairaya. **21** Nájinavare timetajiricaimahi eta máitecapiraya taicha matiarihiripahi éma puiti ani. Nútiripa —máichavacapa.

22 Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairunuiraya. Tétavivayare etá evarairaya íjahúchavayare ímahanu nuti Manerejirunuhi ema Viya etá nuchaviraya. **23** Te navayuaracahepuca nacahenapuca: “Émaripa ema vímahaquenehi ánaqui”. Ena apamuriana nacahénavarepuca: “Émaripa ema maca vímahaquenehi puiti etá ani”. Váhisera ecusuapavaca éna. Váhivare ecuehicavaca. **24** Taicha te táitauchavapa etá nítecapiraya nútí, nucutiyare etá táijahúchirava títecápa etá térameca. Namutuyare ena achaneana te juca apaquehe tinecapanuanayare. Tacaheyare etá nuchavirayare nuti Manerejirunuhi ema Viya. Ticaecherayaresera, tájina vahi máchasimahi. **25** Tativayaresera nucatajivanumayare ichape. Tépurunuuanayare ena achaneana natarihiqueneanahi puiti. **26-27** Tacutiyare etá acane ena achaneana machamurianaini ema Noé. Ena nani tinicairihianarinecha, náematanerinecha, téraná, tímarrerecanahí ena nachichanaveana. Vahi téñamavannaimahi etá náimairahi ema Noé etá masiapirohi tayehe etá ichape pacure. Tájina vahi natsecavahini etá tátiecapauchirayarehi etá ichape une. Tacahe, etá támirisirapa etá ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi titsecavanaimahi tayehe etá nuchaviraya. **28** Tacutiquene ene nacahehivare acane ena achaneana ena machamuriana ema Lot. Tinicairihianahivare éna, térraracavanahivare. Étanecha napanerechahi náijarareca etá náevavareruana. Ena apamuriana natanujiricarinecha etá nacamunuqueneanahi. Tépiyare-recanarichucha pétiana. Vahi naéñamavahini tayehe jácani ecuñaraquiya. **29** Téhesera te majunijicapa ema víyarahaini Lot etá avasare Sodoma, tíjahúchavapa tiquivapa etá yucu ticasiriqui azufre tiásihahi te anuma. Tacapapajicavacapa. **30** Ene tacaheyare etá nusacherayare nuti Manerejirunuhi ema Viya etá nuchaviraya.

31 Te jena sácheyare, nácani tachimarraruanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napaiririruanahi te vámahi, váhivare tichavaequenehavanaimahi náepanahini etá náeñamaqueneanahi. **32** Écharichuhi etá acane etá suíchararacavahi esu mayenaini ema Lot. Ésu, tétavicavahi etá suéñamaequenehairahi etá suímaqueneana sujuniruanahi. Táichavenehi etá suvarairahi tichava, ésujivapa ticamitiequenehava*. **33** Nácani téñamanahi etá náitaresira, tahapapiricarinecha etá tájiparacana te juca apaquehe, éna témitiequenehanaya etá náitaresira. Énasera nácani tahapapiriruanahi etá náehisiranuhi, tayanapanepuca táimicpacavaca, éna titujicavanayare tiúchucuhanayare etá náitaresiranaya.

* **17:32** Ema Viya mavanecahi ena apinana ángeleana, nametapana ema Lot etá máicuñasirayarehi etá avasare Sodoma. Ésusera esu mayena ema Lot, ticametacasihineni etá sujunairayare sucachaneyarehi ema suima, sucatiequeneharichucha etá suímaqueneanainihi. Étapa tiviuchahi sunasipa te achene, tépiyavapa icheve máripuhi.

³⁴ Numetacahevanecha: Te jena yátiyare, te apinanahipuca nácani natiari-hiqueneanahi te tajuhe peti, émanayare ema níchuhaqueneyare, ema apana manasiyare. ³⁵ Tacutiquene, apinanahipuca ena esenana tiyuvarecana-hipuca. Énerichuvare ésuna esu níchuhaqueneyare. Esu apana sunasiyare. ³⁶ Te apinanahipuca ena ajairana te vámahi, éneyareichuvare émana ema níchuhaqueneyare. Ema apana manasiyareva —máichapa ema Jesús.

³⁷ Eta nasamirahi ena máimitureana, nayaserecapa:

—Tata Viáquenu, ¿távihapuca táitauchiavayare eta juca pimetarapianahi? —nacahepa.

Majicapapa éma:

—Vahi ecueñamava eta távihapuca nítecapihayare. Núti nítecapauchaheya te jácani iávihahi éti[†] —máichavacapa.

18

Ema Jesús máimicutichinavare ema juez ésupa esu tépenaima

¹ Ema Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapané vuíchaha najacapavanehini eta nayasearuuanahi. ² Eta máimicutichinahi, ánipa máichavacahi:

—Matiarihi ema achane. Juézhi tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana. ³ Sutiari-hivare tayehe eta avasare esu ésuna esena suépenaimaquenehi. Suchavauru-ricahi ema juez taicha eta sumetauchirahi ema sucatianaruhi. ⁴ Émasera ema juez vahi masuapahini eta sumetauresirahi ésu. Váhisera sucainajiruvahini. Tásiba, mapanerequenehapa macahepa: “Núti néchinava. Nájina nárataha napamicanhini. Váhivare tipamicanuimahi ema Viya. ⁵ Ésusera esu suca esena, nuyacujipa eta suchavauruirisiranuhi. Nícharinepuca eta suvaraha-quenehi, apaesa vaipa sucuápechava suíteca” macahepa ema juez.

⁶ Puiti, nuvaraha ecaicutiaraquenehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma. ⁷⁻⁸ Ene macahehi ema Viya. Vahi móyererejimahi eta macatiuchirahеванея eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natiarihiyareichaha nuchimapaqueñanaya ena vahi ticainajiruvanahi eta nayujarasira, nacutihi esu suépenaimaquene eta sumacainajiruvairahi —máichavacapa ema Jesús.

Ema Jesús tímítucahavi vahi vicasiñavavaicaimahi, váhivare vépururahimahi

⁹ Ema Jesús apanavare eta máimicutichinahi eta máimituresirahi, nayehé ena tímijachavanahi tiúriana, tájina náichiravainahi; náepuruvacahisera ena apamuriana achaneana. Tacahe, máichavacapa:

¹⁰ —Nímicutichinahe eta apana: Natarihi ena apinana ajairana te Templo. Téneuchavanahí. Ema émana achane, fariséohi éma. Ema apana, tisipecatura-rahí éma. ¹¹ Ema fariseo, eta macasiñavavaisirahi, témeñahavapa tayehe eta cuarto tacapicaluquenehi te Templo. Ánipa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tiámerahianahi, tisipecaturanahi, esenamareana-hivare. Váhivare nácutihini ema mácatataji te juca nuchacaya. ¹² Píti pímatinuhi

[†] **17:37** Te máechajiruvahí ema Jesús, ani macahehi: “Te jácani mávihahi ema máepenaquene, éta távihayare eta sipuquiana”. Eta juca mayehehi proverbio, tatarihi eta tacayemaquenehi tayumurevahí.

eta apiheirahi áyunanu te semanana. Níjaracavivare eta plata nugareruasa. Te nugarachahipuca eta dies peso, étanahi peso eta níjaracaviparaca. Téhesera cien pésohipuca eta nugareruhi, dies pésohivare eta níjaracavi. Vahi nuyavanahini eta námavhahuásana eta piyehe” macahepa.

¹³ Émasera ema apuna achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Ánipa macahehi: “Tata Dios, nucatisamureva ichape eta nupecaturairahi piyehe. Pájapanunusera piperdonachanu eta nupecaturana” macahepa ena achane.

¹⁴ Tiuri, nutupiru numetacahe: Ema maca achane, eta machaviraipahi te mapena, tijacapacarénehi me Viya taicha yátupihi eta máeneuchiravahi. Émasera ema fariseo vahi majacapacarehini. Taicha nácani ticasiñavavai-canahi, tímijachavanahi ticunachacarehi, éna tépurucareanayarehi me Viya. Nácanisera ena tiyaseacanahi ema Viya eta májapanuiravacaina, yátupihi tijacapacareanayarehi mayehe –macahepa ema Jesús.

Ema Jesús mayujaraucha ena amuyana

(Mt 19.13-15; Mr 10.13-16)

¹⁵ Tacahe, ena achaneana námavhacaipa ena amuyana eta mayehe ema Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana. ¹⁶ Émasera ema Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecuaci-chepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. ¹⁷ Nutupiruva numetacahe: Nácani vahi nácutihí ena amuyana eta nasuapajiraiva, vahi nuchaneranaimahi éna —macahepa ema Jesús.

Ema achane rico téchajiricava mayehe ema Jesús

(Mt 19.16-30; Mr 10.17-31)

¹⁸ Matiarihi ema achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, piti piúriquene. ¿Tájahapucaini eta nícharacavaini eta nítuji-siravaina me Viya máichecuaraquirénahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímjarechanu “Piti piúriquene”? Mararihi ema Viya. Jéhevare éma, téavicavahi eta máurivahi. ²⁰ Téhesera te pivarahapuca pecha eta apuna vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

²¹ Tacahe, ema achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásiha, ema Jesús máichavarepa:

—Jucarihichahasera eta pítauchaqueneyare. Píjararecaya tamutu eta pímaqueneana. Tásiha, píjaracavacaya ena páureana. Jéhevare éta, pijacapayare eta pímaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

23 Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatieuqueneharinehi tamutu. Tiyanapa tipanererecapaipa. **24** Eta máimairahi ema Jesús eta mapanereresirahi, máichavarepa:

—Yátupiquenehi máitijihi eta náijarasiravainahini eta náehisiranuinahini ena rícoana eta nasiapirainahini te anuma. **25** Esamanuchaha. Eta juca tímicutijiricavahi eta viperá camello, máitijihi tánucuhahini te támicejehe eta parirapa. Ene nacahehi ena rícoana —macahepa.

26 Tacahe, ena tisamararacanahi, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina titújicavaimahi náuchuchuhin!

27 Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhache —macahepa.

28 Émaripa ema Pedro máichavarepa:

—Vítisera, Tata, vinaquicahi tamutu eta vicayehequeneana, vivarairahi véhicavíhi.

29 Ema Jesús majicapavarepa:

—Nutupiru numetacahe: Namutu nácani nanaquicahi eta napena, najunijicahivare ena ticachichana, ena naparapenaveana, nayenanapuca, nachichanaveanapuca, táichaveneyarehi eta náehisiranuyare; **30** jararihiyare eta táitsivayare te juca apaquehe eta náimahaqueneyare. Nararihiyarevare ena achaneana téchapajiricanayareva. Tásicha, tavetijinapa te náitecapapa te apana náitaresiraya, máichecuaraquirenapa eta náuricacarevaya —macahepa ema Jesús.

Ema Jesús tiápechavavare máechajisiha eta máepenirayare

(Mt 20.17-19; Mr 10.32-34)

31 Ema Jesús máiputsiamurihapa mámamurihapa ena dócequeneana máimitureana. Tásicha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchia-vayare tamutu eta nájucunachaqueneanahí ena profetanaini eta nícharara-cavayarehi núti Manerejirunuhi ema Viya. **32** Ánaqui nucaijararecasiyare núti nayehe ena apavasaqueneana romanoana. Énainapa ticaecahijiricanuanayare, ticaetemajiricanuanaya, tiátutuquichanuanayareva. **33** Téstaca-nuanayareva. Tásicha, ticapacanuanainapa. Tásihasera te mapanaquenénapa sache, néchepucainapa te nécari —máichavacapa.

34 Énasera ena máimitureana vahi nacaicutiarahini eta juca mametasiravacahi. Váhivare náimatiuequenehahini tájahapuca eta máechajisihihi taicha vahi náemeteacahini énemahinahíni náichahini ema Jesús.

Ema Jesús macaimairirica ema achane púchuqui ticavasa te Jericó

(Mt 20.29-34; Mr 10.46-52)

35 Tacahe, te tiánehipa títecapa ema Jesús tayehe eta avasare Jericó. Matiarihi ema achane púchuqui, téjacahi te achenechacaya tasiaparacuhi eta avasare. Tiyaseserecahi eta limosna. **36** Te masamavacapa ena camuri-queneana achaneana tiánucuhanaipa, macayasesererupa ema púchuqui tájahahipuca eta téchacarehi. **37** Nametacapasera eta émairahi tiánucuhayarehi ema Jesús Nazareno. **38** Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo! ¡Picatajica-nupaini! ¡Pájapanunu! —macahepa.

³⁹ Ena achaneana tínapumiráuchanapahi ema Jesús navarahapa nacamatinacayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunuini! —macahepa.

⁴⁰ Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

⁴¹ —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairiricanupaini —macahepa.

⁴² Ema Jesús máichapa:

—Tiuri, nuchicha. Táichavenehi eta picasiñairanuhi, pinaracapa puiti —máichapa.

⁴³ Jéhesareinehi, tíjahúchavapa timairirica ema púchuqui. Tásicha, tiyanapa máehica ema Jesús tiúrisamurepaipa. Macunachapaipavare ema Viya. Énapa ena achaneana tímararacanahi eta manarasirahi, ichaperinehi eta nacunachirahi ema Viya.

19

Ema Zaqueo mavarahahi máimati ema Jesús

¹⁻² Tacahe, eta máitecapiraipa ema Jesús te tajuhe eta avasare Jericó, matiarihi ema achane rico, ticaijare Zaqueo. Nacapitarahi ena cóbrarecarahiana eta impuesto. ³ Te masamairiricapa eta émairahi ema Jesús títecapapahi, mavarahapa máimatiyarehi. Étasera eta máichipichuvahi éma, vahi máratahahini máimahahini ema Jesús te namuri ena camuriqueneana achaneana. ⁴ Tásicha, tijunapapa eta te mayanihayarepahi ema Jesús. Tiápanapa te yucuqui, máimararacasaréipahi ema mavarahaquenehi máimati. ⁵ Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásicha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena —máichapa.

⁶ Tacahe, ema Zaqueo titátajipa tiúcupaicapa. Tiúrisamuréinehi eta majacapirahi ema Jesús. ⁷ Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahitátáji —nacahepa.

⁸ Te téjacanapa te tajuhe, témeñahavapa ema Zaqueo te mamirahu ema Jesús. Tásicha, macahepa:

—Píma, Tata Náquenu. Núti néneuchavapa me Viya. Puiti níjaracayare ena páureana ticutimuriacaca eta nímahaqueneana. Nímichavayareva te natarihipuca ena nucaetemaqueneanahi, cuátrohénapasera eta táitsivayare eta nímichavaqueneya —máichapa.

⁹⁻¹⁰ Tásicha, ema Jesús majicapa:

—Nímahapa puiti eta yátupirahi eta péneuchiravahi eta pipecaturana, taicha pivarahahi pímidchavayare eta plata picaetemareruanahi. Tásicha puiti, pijacapacarepa me Viya. Vaipa pémitiequenéimahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchane-ravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya —macahepa ema Jesús.

Ema Jesús máimicutichinava ema príncipe eta máijarasirahi ena machanerana eta maplatane, apaesa nacajurucayarehi

11 Tacahe, ena achaneana, eta náimairahi eta mánehiraripa eta Jerusalén, náimijachaipahi étapa tímiyanayare éma, eta máimeresiravayare eta marreyvayarehi. Tacahe, ema Jesús máimaticaripa eta napanerueruanahi. Tásicha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi. **12** Máichavacapa:

—Matiarihihi ema achane. Ichape eta mapicacarevahi. Tiyanayarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta móvasa. Eta machavirayarepa, téjacayarepa éma. **13** Te tiyanayarépa éma, máichuhunumapa ena diésqueneana machanerana. Máijaracavacapa étapevaca eta maplatane tasivachaquenehi. Tásicha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”. **14** Tacahe, tiyanapa ema reyarehi tayehe eta macaijuheyarehi. Te máequenepasera, tisemamurianapa ena majaneanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayaseserecayare vahi nacuijaraca eta móvacuréna. **15** Ticamesavauchuchasera majacapaichucha eta móvacurehi. Te tichavapa te móvasa, téjacapa émapa reyhi. Tásicha, máichuhuvacapa ena machanerana máijararuhanahi eta maplatane. Mayaserecapa te tímecevapahipuca eta tachichanahí. **16** Tiyanapa ema émana tímerecavapa. Máichapa: “Tata náquenu, eta piplatane píjararunuhi tímecevapahipuca eta tachichanahí. Diésripa eta tajurusirahi”. **17** Ema rey majicapapa: “Tiuri, nuchicha. Tájina táichava. Tétavicava eta piúriva. Puiti vahi támapurujimahi eta piúrivahi tayehe eta juca ánichichaquenehi níjararuvihí. Puiti níjaracaviyare pituparahaya nujupahaviya. Pítí táquenuya eta diésquene avasareana”. **18** Tímerecavavarepa ema apana mamusura. Máichapa: “Tata náquenu, eta píjararunuhi piplatane, tímecevapahipuca cinco eta tajurusirahi”. **19** Majicapavarepa: “Tiuri, nuchicha. Tájina táichava. Tétavicava eta piúriva. Puiti nunacaviyare aquenucaviya tayehe eta cincoqueneana avasareana”. **20** Tímerecavavare ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo. **21** Taicha nupicahi nácaetehahini, machu pícuñacanu. Pétaiviuchahi pítí eta pivainarajiva, taicha pítí pivehahi eta nématanevachayaréni”. **22** Tacahe, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiraivahi. Piplujuvahi eta táchavihi. **23** Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapaini te banco eta nuplatane. Étainahini tajurusihahini apaesainahini nímaequenéhahini puiti”. **24** Tásicha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”. **25** Éna nacahevarepa: “Tata viáquenu, tímecevapahinéni diéspepahi eta tajurusirahi”. **26** Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácanisera tájinaquenehi nacajururénahini, nuverejicayare eta náijaracasinihi. **27** Énasera ena ticatianacanuanahi éna vahi najacapanuhini eta nurreyvahi, iáminanuyare ani te numirahu. Ecapapajicavaca éna”.

28 Tacahe, te tamutupa eta juca máimituresirahi, ema Jesús tímiyanavarepa tipaica. Macaijuhepa eta te Jerusalén. Tínapucapa ena máimitureana.

*Títecapapa ema Jesús eta te Jerusalén
(Mt 21.1-11; Mr 11.1-11; Jn 12.12-19)*

²⁹ Te apanapa semana, tiyananavarepa. Te tiánehipa eta avasarechichana Betfagé étapa eta Betania, tacanaraipahivare eta masihi ticaijare Olivoquiji, tíchecanumanapa. Mavanecapa ema Jesús ena apinana máimitureana.

³⁰ Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaithahi. Eta jena sárare mávuéquehchéhaha, nájinaichaha ticaperainah. Evejapuacayare, iáminanuyare eta ani. ³¹ Te natarihinapuca náeñama, emetacayare eta nucamunuirahi nút —máichapa.

³² Tacahe, tiyananapa ena vanairucanahi. Jéhesaréinehi étapaichuhi eta mametarapihi éma. ³³ Te navejapuacaripa eta burrico, ena ticayeheana nayaserecápa:

—¿Táviha iámihayare eta viyehe burrico?

³⁴ Éna najicapapa:

—Ema maena Viáquenu macamunuhi —nacahepa.

³⁵ Tacahe, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiba, ticaperapa ema Jesús. ³⁶ Te náimahapa ena achaneana tiúchujicapaipahi ema Jesús, náimativanepa. Tiyananapa nácapahi éma. Tépacapairicanapaipa te mamirahu eta náepacuhana te mayanihayarepahi. ³⁷ Eta napaisirahi, témiricanapaipa te tachausi eta cerro ticaijare Olivoquiji. Namutu ena máimitureana téhicanahi ema Jesús tipiaracanapaipa eta náurisamurevahí taicha eta náimahaque-neanahi tiáramicareana máichaqueneanahi éma. Ichape eta nacunachirahi ema Viya. ³⁸ Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihi me Viya! ¡Asulupaya! ¡Puiti, te anuma vicuticacahi eta viúrisamurevahí víti te eta juca apaquehe! Tétávicava eta vicunachira ema Viya eta macatajisirahavihi —nacahepa.

³⁹ Tacahe, eta nasamirapahi ena fariséoana natarihiqueneanahi eta napiarasirapahi ena achaneana, náechajicapa ema Jesús:

—Tata maestro, picamatinacavacaichu ena nani pímitureana —náichapa.

⁴⁰ Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana —macahepa.

⁴¹ Tacahe, títecapanapa te tápusi eta cerro Olivoquiji. Ticaecherapa eta Jerusalén. Eta máimairahi ema Jesús eta avasare, týahapa táicha. ⁴² Macahepa eta máiyairahi:

—Páurevisami piti návasasami Jerusalén. Te nácautiaraini apaesachi-chainaini ena pichichanaveanahi eta nuvarairahi nucuchucuhavaca nút. Puiti juca sache nutiarihiraripa ani piyehe, náurihainehi nácamapuravahini eta náuricacarevahini. ⁴³ Taicha járajapayare eta sácheyare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchia-vaimahi. ⁴⁴ Témestapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta piviurevaya, eta juca pimajacapiranuhi eta néjirairavahi nuti mavanerunuhi ema Viya —macahepa.

Ema Jesús macuchuchujicavaca ena tíjararecanahi eta sárareana, cágureana te tajuhe eta Templo

(Mt 21.12-17; Mr 11.15-19; Jn 2.13-22)

⁴⁵⁻⁴⁶ Tacahe, te apanapa sache, tiyanapa ema Jesús. Tisiapahi te Templo. Máimaharinehi ena achaneana tíjararecanahi eta sárareana, cágureana. Tásiba, tisemapa. Eta macuchuchujisiravacahi, máichavacapa:

—Ema Tata Nuaiyaquene, ani macahehi eta máechajiruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

⁴⁷ Eta manasiquenerahi ema Jesús, tamutuhi sácheana tímitureca tayehe eta Templo. Énasera ena tuparairucana énapa ena escribánoana, napane-rechaipahi eta navarairahi nacapaca ema Jesús. ⁴⁸ Váhisera napatsicavahini taicha natarihi ena camuriqueneana achaneana tisamararacanahi eta máimiturapiana éma. Váhivare náisapaimahi náichahini ena ticatianacanahi.

20

Nayasereca ema Jesús te vanairucahipuca me Viya (Mt 21.23-27; Mr 11.27-33)

¹ Étana sache tímiturecaicha ema Jesús tayehe eta Templo eta máechajiruvaha ema Viya. Títecaparacanapa ena tuparairucana, énapa ena aquenucarahana, énapa ena escribánoana. ² Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi pitcha eta juca píchaqueneana? —náichapa.

³ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera.

⁴ ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

⁵ Váhisera náituruequenehahini eta najicapirayarehi. Tiácapaemajiricanapa. Ánipa nacahe eta náechajiruvanahi:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, éma macahénapapuca: “Tásicha, ¿váhiyapa esuapahini éma?” ⁶ Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márijahiana, taicha náechahi éna émairahi ema Viya tivanecahi ema Juan —náechajiricacapa.

⁷ Tacache, ánipa nacahehi eta najicapirahi ema Jesús:

—Vahi vecha víti —nacahepa.

⁸ Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhi —máichapa.

Ema Jesús máimicutichina ena pártilárioana máurirahana (Mt 21.33-44; Mr 12.1-11)

⁹ Tacache, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, tipairicayarehi te apana avasare. Tacache, matuparacavacapa ena tírehanyakarehi te áñoana eta mayehe uva. Partidoyarepa eta majunijisirayarehi.

¹⁰ Tacache, te títecapapa eta caje tayairahi eta uva, máimivanerecapa ema manusura mayaseapanavacayarehi ena pártilárioanahi eta tatucaque-neyarehi éma. Énasera ena pártilárioanahi, tájina náijaracahini. Tisemau-chavanarichucha, náehapa ema vanairucainihi. ¹¹ Tásicha, ema ticayehe máevatacavarepa ema apanavare manusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina

náijaracahini. ¹² Tásicha, ema ticayehe vahi macainajiruvahini. Máevatacavarepa ema apanavare manusura. Énerichuvare náehavarepa ema vanairucainihi. Najarachapa, náquijicapa.

¹³ Tacahe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaina ema nuchicha némunaruquenehi. Tatarihi te émainapapuca napicaucha te náimahapa”. ¹⁴ Tacahe, te náimahapa ema machicha, navetijichucha eta nasemirahi. Tímítujiricanaripa. Ánipa nacahe: “Émainapapuca ticayeheyare ema maca. Yare, vicapaca, apaesa tásasipa tamutu vítinapa vicayehe”. ¹⁵ Tacahe, nacaratacapa éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayeheshini paciencia. ¹⁶ Títecavánénapa macapapanavacayarepa ena pártirárioanahí máurirahanahí. Tásicha, máijaracainavarepa eta úvaquiji ena apamuriana pártirárioanayareva —macahepa ema Jesús.

Tacahe, ena tisamararacanahí, ánipa nacahehi:

—Viti vicatajicacare, vahi vácutihini ena nani máurirahana —nacahepa.

¹⁷ Ema Jesús máesenimurihavacapa. Tásicha, máichavacapa:

—Jéhepuca, németeacasera vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapapa eta táicuchihi eta tatuparahahi. Tacapicahuquenehi puiti” tacahehi eta Sagrada Escritura. ¹⁸ Puiti, núti nucutihi eta ichape mari náepuruquenehi. Eti epurunuuanahí, iáquipaivayare évetutujicayare. Tichimaracaheyare eta muraca ecuñaraqui taicha eta emavarahairahí éhicanu —máichavacapa.

¹⁹ Ena tuparairucana navarahapa náijahúchayarehini nacarataca ema Jesús, taicha tímaticavananapa éna eta énairahi tayunacavaca eta máechajiruvana ema Jesús. Váhisera napatsicavahini taicha návamirahuhi ena camuriqueneana achaneana.

Navarahahi náemejecapavacha ema Jesús tayehe eta impuesto

(Mt 21.45-46; 22.15-22; Mr 12.12-17)

²⁰ Tacahe, náimivanerecapa ena apamuriana ajairana tépiyacavanaya-rephai tiúriana te mamirahu, navarairahi natanucayare eta tímicaviuchayarehi. Énayarepa timetauchanavarehi mayehe ema aquenucahi prefecto Poncio Pilato. ²¹ Tacahe, nayaserecapa éma, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahí. Nájinavare pinerejiruinahini ena achaneana, taicha pivarrahahí náehicahini namutu eta táurinaquene achene ticaijuhe me Viya. ²² Vivarahahisera viyase-recaviyare: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

²³ Ema Jesús máimatiacavacapa eta tamaurivapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu? ²⁴ Nímahaseji, iáminanu étapena eta reale.

Éna náijaracapa. Tásicha, ema máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

²⁵ Tacahe, éma máichavacapa:

—Tiuri. Táuricahi íjaraca ema Presidente Emperador eta juca mayeherichuhi éma. Tásicha, íjaracavare ema Viya eta mayeherichuhivare éma — máichavacapa.

²⁶ Váhiquenesera náratahahini náimiaquipaicahini eta nayaseresirahi te namirahu ena achaneana. Táitsivahi ichape eta náramirahi eta táurivahi eta majicapiravacahi. Timatinanapa tésamiricavanapa.

Nayasereca ema Jesús náicharacavayarepuca ena náepenaqueneana eta náechepusirayare

(Mt 22.23-33; Mr 12.18-27)

²⁷ Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta táetseraruvayahi. Tacahe, nayase-recapa ema Jesús:

²⁸ —Tata maestro, ema víyarahaini Moisés manaqueicahi eta ajureca máechajiriruvahi eta viyehe: “Te máepenaequenehahipuca ema achane esu mayena, tásicha, nájinahipuca manaquequieruvainahini machichainahini; te matiarihihipuca mácani maparapehi, mavehayare esu machine-naequene, apaesa émainapuca macachicha eta suyehe, máitsivainahi ema maparapeni”. ²⁹ Tacutiquene te natarihihipuca ena siétequeneana ticapara-rapejircacana, te títauchavapa ema náechavimuri, máepenaequenehapasera esu mayena. Nájinahi machichainahini. ³⁰ Tacahe, ema maparape máitauchavare esu machinena. Énerichuvaresera máepenaequenehavare, nájinavare machichainahini. ³¹ Ema émana maparape máitauchavare ésu. Énerichuvare máepenaequenehavare. Namutu ena siétequeneana navehahi ésu, tásihasera náepenaequenehapahi, nájina émanainahini mácachichahini eta suyehe. ³² Te taequenepa, tépenapa esu esenaini. ³³ Tacahe puiti, te jéhesarepuca tichavanayare titarecana te taequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasivaichuhi títauchavanayare suyehe esu esena. ³⁵ Ánaquisera te apana náitaresira, nácani ticatuparahanayare eta nasiapirayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi ema ajaira. ³⁶ Taicha vaipa tiápechavaimahi tépenana. Nacutinapa ena ángeleana eta namaepenacacairahi. Yátupinapa machichanaveanainapa ema Viya, taicha éma ticaeche-pucavacahi.

³⁷ Émaripa ema víyarahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ema Moisés eta yucuqui timurujihi, eta macametacasiyahí mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo. ³⁸ Taicha ema Viya, ema téchahi eta náitaresirana ena téhicanahi, tayanapane tépenanripa. Namutu ena, tímiyanavarichucha titareca eta náchanevana te mamirahu éma —macahepa ema Jesús.

³⁹ Tacahe, ena escribánoana, ena natarihiqueneanahi náichapa ema Jesús:

—Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

*Ema Cristo, yátupiquenehi Viya. Mámariéquenenihisera ema rey David
(Mt 22.41-46; Mr 12.35-37)*

41 Ema Jesús máichavacavarepa:

—Éti ecahehi eta échajiriruvahi: “Tiúchucayare ema Cristo, mamariequeneyare ema víyarahaini rey David” ecahehi. **42** Yátupihi ema Cristo achanequenehi eta máimahi taicha mamariequenenihi ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: **43** “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena tictatianacavianahi” macahepa. **44** Ema David, eta máimijarechirahi ema Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ema Cristo yátupiquenehi Viya éma. ¿Tájaha íchahi éti? —máichavacapa.

*Ema Jesús máimereuchavaca eta náejecapiravana ena escribánoana
(Mt 23.1-36; Mr 12.38-40; Lc 11.37-54)*

45 Namutu ena achaneana nasamararacahi ema Jesús eta máechajisiravacahi ena máimitureana. **46** Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapicahuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurinaqueneana téjasihacareana te tiyanana te viúrujisirarevana. Étaripa te nanisirana, ticaejacavanavare te jácani távihahi eta tiúrinisipana tinicacare. **47** Tacutiquene naverejicavare eta nacayehequeneana ena tépenaimana, nájina najapanuquenéna. Tásiba, tépiyacavanapa religíosoanahi, tiúpiemana eta nayujarasira, namavarairahi tácaecherahini eta náichira eta tamauri-queneana. Énasera tiápajucavanahia et nacaicuñairaya muraca.

21

*Eta sunaquiruva esu máimaru tacachuricahi eta nanaquiruvana ena rícoana
(Mr 12.41-44)*

1 Ema Jesús máimararacahi ena rícoana eta nanaquisirava eta plata tayeha eta chapama nanaquisirareva eta námvahuana mayehe ema Viya. **2** Énerichuvare máimahavare tinaquicava esu ésuna esena suépenaimaquiné. Páurequenehi ésu. Sunaquicahisera eta apiéchichahi eta suplatane. **3** Tacahé, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímeprávahí eta sunaquiruva, sucachuricavacahi namutu ena apamuriana achaneana. **4** Taicha namutu éna tacarichu nanaquicahí eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavachayarehini —macahepa.

*Ema Jesús máimereucharipa eta táquipaisiravaya eta Templo
(Mt 24.1-2; Mr 13.1-2)*

5 Natarihihi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta taejeravahi te nacaematanénapa. Tacahé, ema Jesús máichavacapa:

6 —Járajapayare eta sáchevayare ticaquipaicasinapa tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneana puiti —macahepa.

*Tatiarihiyare eta ecutiarareanaya te tánehipaicha eta táichecuiraya
(Mt 24.3-8; Mr 13.3-8)*

7 Tacache, nayaserecapa ema Jesús. Náichapa:

—Tata Maestro, ¿tájamuhuyarehipuca eta náimiaquipaisirayare eta Témplosami? ¿Jararihiyarepuca eta ecutiarareyare eta apapa péchajisihaqueneana? —náichapa.

8 Ema Jesús máichavacapa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayarepahi nuyehe. “Nútiripa Cristo” nacahénapa. Ena apamuriana nacahénapa: “Táitecapaquenepa puiti eta sache”. Váhisera ecusuapavaca, váhivare ecuehicavaca. **9** Étaripa te esamairiricapuca eta guerra, revoluciónpuca, váhivare ecuarameca. Taicha eta tainapuaraquianayarehi eta júcana ecutiarareanayare, vuíchahasera étai mahi eta táichecuiraya.

10 Ánivare macahe:

—Téhacacayareva eta ichapequeneana avasareana. Ticanarajiricacanainapa eta apamuriana. **11** Tatiarihiyareva eta ichapeyare tayamurisirana eta apa quehe. Te avasareana tatiarihiyare eta ecuhamuhuyareva, jumaremuhuyareva. Te anuma tímerecavainavarepa eta ichape ecutiarareya, tiámayare eta ecuñaraquiyare.

*Ena achaneana napanajiricainapa ena téhicanahi ema Viáquenu
(Mt 24.9-28; Mr 13.9-23)*

12 Tativanumayaresera tipanajiricaheanayare éti, táichavenénahi eta éhisiranuhi nútì. Ticaratacaheanayare, tiámaheanayare te náurujsirarevana, ecayaserehinapa nayehe ena juéseana. Ecaevatainapa te cárcel. Tásicha, etiarihiyare eti tiámaheanaya te namirahu ena aquenucana, téhevare te namirahu ena Presidenteana gabinete, ecaviurevayare táichavenehi eta éhisiranuhi. **13-14** Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya.

15 Nímahahéinepa nútì, níjaracaheyare eta ítusirayare ecatiuchava. Nájina ácutimahi eta ítupajijiasiravaya. Ichape ecachuriacayare ena iánaranaya.

16 Etiarihiyare éti énajacaruvainapa ena ticachichaheana tíjararecaheanaya énaripa nácani eparapeanapuca, énajacaruvayareva tíjararecaheana, énayarepaichupuca ena ejaneanana, ítunacasareana. Enerejicavainapa eti nacaparuhanaya. **17** Namutu ena acha neana ticatianacaheanayare táichavenénahi eta éhisiranuhi. **18** Tayanapanesera nacapacahepuca, nímahahéinepasera nútì. Váhi émitiequenémahi. Étaripa eta echutimacana, tájinavare témitiequenémahi.

19 Téhesera ecamichahi tamutu, ímiyanavahi eta éhisiranuhi, nútì níjaracaheyare eta ítaresiraya.

20 Te ímahapa ena suntaruana nachayacapa eta Jerusalén, étanaqueneharehi ejercito eta náichapemurivaya, étainapa ícutiaraya eta táitavirayare eta avasare. **21** Tásicha, te ímahapa eta juca, táuricapa etátajinapa ejuna, eti etiarihiqueneanahi te Judea. Ecaijuheyare eta te cérrona, étaina eyumurusiavaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa tavarahahini nachavahini tayehe eta avasare. **22** Taicha táitecapauchainapa eta tasacherryarehi eta tacaicuñairaya, titauchavainapa eta tametarapi eta Sagrada

Escritura. ²³ ¡Páureanasami nácani esenana tachimaruayanayare, nácani ticajarianahipuca, nácani esenana ticachichanahi eta amuya tiájicachaha! Támairijicainapa eta nacatajivairayare namutu ena achaneana tiávihanahi te Jerusalén taicha eta náicuñayare. ²⁴ Natarihi ena tépenanaya te guerra, ena apamuriana nacaratatajicainapa prisionéroanainapa. Námvacainapa te apanaqueuneana avasareana. Ema Viya másapainapa tisiapano te Jerusalén ena apavasaqueneana. Énapo téchanayare eta Jerusalén. Tiámainucava te máicutichapa ema Viya, macuchucavacainavarepa.

*Eta máitesiraya ema Manerejiruhi ema Viya
(Mt 24.29-35, 42-44; Mr 13.24-37)*

²⁵ Tacahe, tímercavananinapa eta ecutiarareyare te sache, te caje, étapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta ichapequene une. ²⁶ Ena achaneana tiáquipaicavanainapa eta napisiraya, taicha eta náimairayare eta ecutiarareanayare, váhisera náimatiéquene-haimahi tájahapuca eta náichararacavayarehi. Énerichuvare tiyejecavacainapa eta tiávihanahi te anuquehe anuma. ²⁷ Nupaenumava nítecainapa nuchava núti Manerejirunuhi ema Viya. Namutu tímahanuanayare eta núcupsirayare. Tiámanuinapaipa eta úcaji. Níñehinapaipa eta táetavi-chirayare eta nujaraivayarepahi. ²⁸ Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiroya nucatiuchiráheyare.

²⁹ Máiicutirachinavare eta máimituresirahi. Ánipa macahe:

—Ecauneyare eta jácani yucuqui. ³⁰ Te ímahapa títsivachavavacapa eta tapacajiana, tiánehiripa eta únemuhuyareipa. ³¹ Ene tacahehi, te ímahayarepa, ímatiacainapa eta tánehiraripa eta nítesirayare. ³² Numetacahevanecha: Vuíchaha titavanaimahi ena achaneana náitareruanaichaha te táitecapapa eta juca ecutiarareanaya. ³³ Titavayarepa eta anuma étapa eta apaquehe. Tativayaresera títauchava tamutu eta numetaruhehi.

³⁴ Échapavaicha, machu tachimaracahe eta jena sache, vahi ecucuti ena tavayuaruana eta téracare, machu muracachutihéna táicha. Vahi ecueñamava eta ítaresira, machu tahapapicahe eta éhisiranuhi. ³⁵ Eta táitecapauchirayare eta sache nuchavirayare tímicutijircavahi eta tájahúchirava eta táratasirava eta trampa. Ene nacaheyare ena achaneana te tamutu avasareana eta namanecapauchiravaya. ³⁶ Eta tacahe, etsecavaicha yátupina. Eyuja-rauchavahi tamutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuichiravaina eta ítecapauchiranuya te numirahu nuti Manerejirunuhi ema Viya —macahepa ema Jesús.

³⁷ Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te taequenehi eta cerro Olivoquiji. ³⁸ Ena achaneana, tamutu yáticarahiana, tiyanana te Templo, titsecavananipa eta nasamararasirayare éma.

22

*Napanerechapa eta nacaratásiraya ema Jesús
(Mt 26.1-5, 14-16; Mr 14.1-2, 10-11; Jn 11.45-53)*

¹ Tamirahupaipaicha eta piesta ticaijare Pascua, eta náepanavaira eta semana eta nanisirahi étachucha pan mayehere levadura. ² Tacahe, ena tuparairucana énapo ena escribánoana, navarahaichaha náimicapaca ema

Jesús. Tásiha, natanucahi eta náicharacayare eta nacaratasirayare. Návamirahuhisera ena achaneana.

³ Tacahe, ema Satanás mávahácpa ema émana máimiture ticaijare Júlasi. Émarichuhi nachamurihi ena dócequeneana apóstoleana. ⁴ Tacahe, ema maca Júlasi tiyanapa matanupanavacahi ena tuparairucana, énapa ena nacápitárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús etá nayehe. ⁵ Tiúrisamureanarinehi eta mametasiravacahi éma. Nametacapa eta náijarasirayarehi eta plata. ⁶ Tacahe, éma majacapavacapa eta naplatane. Tásiha, máichavacapa:

—Tiuri, nútí népanaheyare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

Ema Jesús mavanecahi ena apinana máimitureana, natsecayare eta naniruyare tayehe eta Pascua

(Mt 26.17-25; Mr 14.12-21; Jn 13.21-30)

⁷ Títecapapa eta sache táepaniravahí eta semana tapiestara eta nanisiraya eta pan mayehere levadura. Étarichuvare eta jena sache ticaijare Pascua, nacapasiraya eta uvesa ticaijare cordero pascual, nanisirayare te jena yati.

⁸ Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

⁹ Éna nayaserecapa:

—¿Táviha pivaraha vétupirisihaya?

¹⁰ Ema Jesús majicapavarepa:

—Eyanayare tayehe eta avasare. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma te peti masiapihayare. Éti apana esiapayareva. ¹¹ Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹² Éma, tímechahénapa eta ichape cuarto te anuquehe piso. Táuriquenéipahi eta jácara téjasihacareana. Tásiha, étupiricapa eta viniruyare —máichavacapa ema Jesús.

¹³ Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

Ema Jesús máenimurihana ena máimitureana

(Mt 26.26-29; Mr 14.22-25; 1 Co 11.23-26)

¹⁴ Tacahe, te hórappa eta nanisirayarehi, téjacanapa te mesa ema Jesús énapa ena apóstoleana. ¹⁵ Eta máenisiravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati páscuairahi, mapurare vuíchaha táitecapahini eta népenirayare. ¹⁶ Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁷ Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecajijiricaca. ¹⁸ Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁹ Tacahe, mavehavarepa eta pan, masulupayachavarepa ema Viya. Mayuvetuhecapa, máijaracavacapa ena máimitureana. Tásicha, máichavacapa:

—Eta juca neche. Enica. Étivenehi níjararecavahi eta népenirayare. Eta juca apajarahiyare te apauehe, te étipava énicaca, éta témechaheyare nuyehe — máichavacapa.

²⁰ Énerichuvare, te titanesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejacapacareya mayehe.

²¹ Puítisera, ani te etaracu, mararihi ema tíjararecanuyare. ²² Yátupiquenehi eta nacapasiranuyarehi, taicha tacahehi eta mapanereruhi ema Tata eta nuyehe nuti Manerejirunuhi éma. Páuresamisera ema tíjararecanuya — macahepa.

²³ Tacahe, ena máimitureana tiyaserejiricacanapa:

—¿Nájahapuca mácani te vitaracu ema tíjararecaya ema Viáquenu? — nacahepa.

Ema Jesús máimitucavaca eta nacapicahuirayare ena téchapajiricanahi ena nachamuriana

²⁴ Te táequenepa, tiácapaemajiricanapa ena máimitureana tayehe eta nájaharepuca ema ichapequenepanaya aquenuca te nataracu te náejasiraya te návacureanayare. ²⁵ Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapicahuanayarehi.

²⁶ Étisera vahi tauricaimahi ene ácahehini. Téhesera evarahahipuca ecapicahu, vahi ecasiñavaimahi. Ecuyare ema amaperu eta mamansuvahi. Tacutiquene nácani tivanecanahi, tatuparacavacahi téñamavanayare eta náechapajirisiravacayare ena nachamuriana. ²⁷ Eta nayeherepi ena achaneana, ichape eta napicauchirahi ema ténicahi eta tinicacare. Énasera ena vanairucana téchapajiricanahi eta mesa, vahi nacapicahuhini. Puítisera, nímitucaheyare eta juca arairu nuvanairipi. Puiti ímahanuipa eta nítatirahehi. Nuvaraha ecutinuya. Ítaticacayare éti.

²⁸ Éti, ímararacanuhi eta náichiranuhi ena tictorianacanuanahi. Váhisera ejunijicanuhini. ²⁹ Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata. ³⁰ Éjacainapa tayehe eta ecatuparahairaya. Étinapa evanerecaya nayehem ena dócemuriqueneana ena vijaneanana israelítana. Ecachanenuinavarepa te mesa eta enisiraya ánaqui te nucatuparahairayare —máichapa.

*Ema Jesús máimereucha ema Pedro eta máepiyasiraya vahi máimati ema Jesús
(Mt 26.31-35; Mr 14.27-31; Jn 13.36-38)*

³¹ Ema Viáquenu máichapa ema Pedro:

—Nuchicha Simón, péchapavayare. Ema Satanás, ichape eta mavarairahi ticaicutiaraheyare tiáquipaicaheyare emutu éti. ³² Nútisera nuyaseuchachahehi me Tata, pítiripa, apaesa vahi tacuemitiaca eta péhisiranuhi. Piáquipaicavasa-miyaresera. Tichavayaresera eta picasiñairanuya, tásicha pétumechavacaina-varepa ena apamuriana pichamuriana —máichapa.

³³ Ema Pedro majicapapa, máichapa:

—Tata Náquenu, tájina vahi nujunijicaví mahi. Níjaracava néhicavi tayehe eta cárcel. Te nacapacavipuca, núti apanavare níjaracavavare nacapacanu apaesa nácachanevi —macahepa.

34 Ema Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táchajisiraya eta varayu, piti mapahayare pépiyacavayare vahi pímatinu, eta picatiuchiravayare pítijiva —máichapa.

Puiti etserereacavainapa

35 Tacahe, ema Jesús mayaserecavacavarepa ena máimitureana. Máichavacapa:

—Te nuvanecahénapa epaica, nutuparacahehi vahi ecuama eta tarera, eta billetera, eta eparuapevana, ¿yátupihi, masi, vahi ecamunuuvapahini?

Ena najicapapa:

—Tájina vácamuuiupahini.

36 Tásicha, máichavacavarepa:

—Puítisera mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi máijarareca eta masacu, mavacharesihaya eta mayeheyare espada. **37** Tacahe numetacahévanécha. Ena achaneana nacatianacahaviya muraca. Títauchavainapa eta táchajiriruvanahi eta Sagrada Escritura eta níchararacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehe —macahepa.

38 Tacahe, ena máimitureana náichapa:

—Tata Viáquenu, jucarihi apinahi eta espada.

Éma majicapavacapa:

—Tiuri, tarataquene.

Ema Jesús tiyujaraca te Getsemaní

(Mt 26.36-46; Mr 14.32-42)

39 Tacahe, tiúchucapa ema Jesús, énapa ena máimitureana, tiyananapa tayehe eta huerta Getsemaní tiávihahi te táemiripaisinehi eta cerro ticaijarehi Olivo-quiji, eta mayujarasirarehi éma. **40** Te títecapanapa tayehe eta Getsemaní, máichavacapa:

—Eyujarauchava. Eyaseaca ema Viya eta étumevaina apaesa vahi macuiturucahe ema Satanás —máichapa.

41 Térajipanavapa apaesa ema Jesús eta nayehe. Cincuenta metro eta mayerehinévacahi. Tépuyucapa. **42** Eta mayujarauchiravahi, ánipa macahe:

—Tátachicha Nuaiyaquene, picatajicanupaini. Nuyaseacavi vahi tacuitau-chavaini eta níchavaqueneyavare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti eta nuyehe —macahepa.

43 Tacahe, tiáramicarepa máucupaucha ema émana ángele tiásihahi te anuma. Máieturnechapanayarehi. **44** Ichape eta maeñamiravahi eta mayujarasirahi. Témiricapa eta máepatsure tacasiriquiamapahi eta máitine. Cuájuuamapaipa eta táemirisirahi te apaquehe.

45 Te titápiricapa eta mayujarasirahi, téchepucapa. Tiyanapa te návihahi ena máimitureana. Máiimahainehi éna, tímacanaripahi táchavenehi eta nacatisamu-revairahi. **46** Tásicha, máichavacapa:

—¿Tájaha tacayema ímacaichucha éti? Échepuca. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás —máichavacapa.

Nacaratacapa ema Jesús

(Mt 26.47-56; Mr 14.43-50; Jn 18.2-11)

⁴⁷ Tacahe, téchejiricavainirichaha ema Jesús, títecapananecha ena camuri-queneana suntaruana. Máinapumirauchavacapaipahi ema Júlasi. Témeñahavapa eta mayehe ema Jesús. Máetserarecapa. ⁴⁸ Tásicha, ema Jesús máichapa: —Júlasi, ¿tájaha tacayema pétserarecanu eta píjararesiranuhi nuti Manerejirunuhi ema Viya? —máichapa.

⁴⁹ Tacahe, ena máimitureana natarihiqueneanahí, eta náimairahi ena camuriqueneana suntaruana, nayaserecapa ema Jesús. Ánipa nacahe:

—Tata Viáquenu, ¿viciatiuchava te espada?

⁵⁰ Tásicha, ema émana mavehapa eta mayehe espada. Mayuchatipaisinapa eta machaca tinapa te vaure ema manusura ema aquenuca Caifás. ⁵¹ Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásicha, ema Jesús mavehapa eta machacaini ema achane, máimichavapa máipistaca, tinaracavanepa. ⁵² Tásicha, máichavacapa ema Jesús ena tuparai-rucana natarihiqueneanapahi eta nacaratasirahi éma, énapa ena aquenucarohana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaeupuchiriquipahivare eta etanu-siranupahi, tímicutijiricavapa námerahihini nútì? ⁵³ Étayapasica cape juca tamutuhi sácheana nucachanehehi tayehe eta Templo. Váhivare epatsica-vahini ecaratacanuhini. Étisera iúricapuca eta tamapicuvahi eta yátimuhuhi eta íchirahi eta tamauriqueneanahí taicha mávaháruhehi ema Satanás. Másapaquenéhevarepa ema Tata eta ecaratasiranuyarehi —máichavacapa.

Ema Pedro tépiyacavapa vahi máimati ema Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tacahe, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehavacapaipa. ⁵⁵ Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa ema Pedro te namuri. ⁵⁶ Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararacaripahi. Tásicha, suíchapa:

—Eñi ñica achane éñirichu ñichamuri eñi Jesús.

⁵⁷ Émasera ema Pedro tépiyacavapa vahi máimati. Máichapa:

—Pímaha, esena, vahi nímati nútì ema píchaquenehi.

⁵⁸ Te tiyererehachichavare, máimamarácaripavare ema apaña. Máichapa:

—Piti pítirichu machamurivi ema maca.

Ema Pedro majicapavarepa:

—Vahi, tata. Vahi machamurinuina —máichapa.

⁵⁹ Te hórapapuca eta táetavisiravahi, máimahavarepa ema apaña, máimatipa eta máechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira —máichapa.

⁶⁰ Ema Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajiricavainirichaha ema Pedro, énevanepa téchajicanecheta varayu. ⁶¹ Ema Viáquenu máesenicapa ema Pedro. Enévanerinehi téchava ema Pedro eta mametarapiánahí ema Viáquenu eta máichirahi: “Te tamirahuina-richaha eta táechajisirayare eta varayu, píti mapaheyare pépiyacavayare vahi pímatinu”. ⁶² Tásicha, tiúchucavanepa ema Pedro. Tíyahapa taicha máimati-vanepa eta táchapevahi eta máejecapiravahi.

*Nacaecahijiricapa ema Jesús
(Mt 26.67-68; Mr 14.65)*

⁶³ Ena suntaruana tijaneacanahi ema Jesús, nacaecahijiricapa éma. Náehararacapa. ⁶⁴ Náitiuquichavare. Náehamirahavare. Tásicha, náichapa:
—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

⁶⁵ Ichapemurivare eta napanararachirahi éma.

*Nacatupihapa ema Jesús te namirahu ena aquenucana
(Mt 26.59-66; Mr 14.55-64; Jn 18.19-24)*

⁶⁶ Te tijarahipa, ticurujicacanapa ena tuparairucana, énapa ena aquenucarohana, énapa ena escribánoana. Námapa ema Jesús, nacatupihapa te namirahu. Nayaserecapa:

⁶⁷ —Viyaserecavyare. ¿Pítisaréji Cristo, ema vicuchapaquenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi. ⁶⁸ Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaiticanuimahi. ⁶⁹ Étainapasera nucaijuheyare te anuma nuti Manerejirunuhi ema Viya eta néjasirainapa te mavaure ema Tata, máitupajijihaquenehi éma —máichapa éma Jesús.

⁷⁰ Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

⁷¹ Tacahe, éna nacahepa:

—Vaipa tácamesa vicayasesereruhini ena testigoana. Émaquenepa visamahi puiti eta juca máechajiriruvahi, étapa ticaviureya —nacahepa.

23

*Námapa ema Jesús te mamirahu ema Pilato
(Mt 27.1-2, 11-14; Mr 15.1-5; Jn 18.28-38)*

¹ Tacahe, téchepumurihanapa namutu. Námapa ema Jesús te mamirahu ema Pilato. ² Te nacaitecapa, náepiyaequenehapa éma. Ánipa nacahe:

—Viámapahi ema maca achane ani te pimirahu. Mavarahahi mahapapisinahaviyare ena vichaneranahi. Énerichuvare macahehi váhiji táurica vivachachahini eta impuesto mayehe ema viyehe Presidente Emperador. Énerichuvare, macahehivare eta émairahíji Cristo, ema réy-yarehíji —náichapa.

³ Tásicha, ema Pilato mayaserecapa ema Jesús:

—¿Yátupisareji réyvili píti nayehe ena pijaneanana israelítana? —máichapa.
Ema Jesús majicapapa:

—Pitupiruvahi eta juca piyaseresiranuhi. Yátupihi eta nurreyvahi —máichapa ema Jesús.

⁴ Tacahe, ema Pilato máichavacapa ena tuparairucana énapa ena achaneana natarihiqueneanahi:

—Tájina maviurevaina eta nímairahi ema maca achane —máichavacapa.

⁵ Énasera nayurucapa muraca ema Pilato. Ánipa naicha:

—Ema maca, ichape eta mahapapisirahi eta napanereruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Ema Jesús námavare te mamirahu ema Herodes

⁶ Eta masamiravacahi ema Pilato, macayaseserupa te étahipuca te Galilea macavasahi ema Jesús. ⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarihihi tayehe eta Jerusalén eta jena sácheana pásquairahi. ⁸ Tacahe, tiúrisamuréinehi ema Herodes eta máimairahi ema Jesús. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesús. Mavarahainehi tíjahúchava máimahahini eta jácani tiáramicare. ⁹ Ichapemurihi eta mayaseseresirahi. Émasera ema Jesús, tájina vahi majicapahini. ¹⁰ Natiarihipahivare ena tuparairucana. Tétavicavahi eta nasemanevahi eta náepiyaequenehairapahi. ¹¹ Tásicha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehana eta mamuiri haini manaquiriaruvaipahi, táepahamequeneripahi eta tajanunumesirainihi. Mamuriachapa ema Jesús. Táicutiarahi eta nacaecahirahi éma. Tásicha, macavanairipivarepa ema Herodes náimichava te mamirahu ema Pilato. ¹² Ema Herodes émapa ema Pilato ticatianacacanainihi eta náitaresirahi. Étasera te jena sáchequenehi tichavapa eta náemunasiracacahi.

Ema Pilato macavanairipipa eta náetatasiraya ema Jesús

(Mt 27.15-26; Mr 15.6-15; Jn 18.39-19.16)

¹³ Tacahe, ema Pilato eta máimairahi náimichavirahi eta mayehe, macurujimurihapa ena tuparairucanahi énapa ena achaneana. ¹⁴ Tacahe, máichavacapa:

—Eta iámirapahi ema maca achane te numirahu, ímijachahi mahapicavaca ena achaneana. Nútisera nímahahi tájina maviurevainahi eta nuyaseseresirahi te emirahu eta ímijachaquenehi eta máejecapiravanahi. ¹⁵ Émaripa ema Herodes máimichavavare eta ani nuyehe taicha tájinavare máimahahini eta máejecapiravainahini. Étainahipucaini taviuchahini táimicpacahini. ¹⁶ Tiúriserapuca nímivanereca macaemecharahi, tásicha, nucaiticapa —máichavacapa.

¹⁷ Eta mayeherepi ema Pilato te Pásquamuhaná te áñoana macaiticayarehi ema émana preso te jena sáchequenehi. ¹⁸ Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

¹⁹ Ema Barrabás te cárcel mávihahi. Táimicuñaruhi eta máichirahi eta revolución étapa eta macapahivahi. ²⁰ Émasera ema Pilato mavarahaichucha macaiticayarehi ema Jesús. Mayaseremurihavarepa. ²¹ Énasera muracapanaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

²² Mapahequenepa eta mayaseresiravacahi éma:

—¿Tájasicá eta maviurevahí ema maca? Núti tájina nímhaha maviurevainahi táimicpacahini. Tiúriserapuca nímivanereca macaemecharahi, tásicha, nucaiticapa —máichavacapa.

²³ Énasera tímitujircacanapa eta napiarasiraina nayaseasiraina eta macaetatairaya te crusu. ²⁴ Jéhesaréinehi, ema Pilato masuapavacapa eta nayasearapihi ena tuparairucana. ²⁵ Émapa tiúchucuhahí ema Barrabás ema nayasesereruhi, táimicuñaruhi eta máichirahi eta revolución étapa eta macapahivahi. Macavanairipipa táitauchava eta navarahaqueñehi éna, eta nacapasiraya ema Jesús te crusu.

*Náetatacapa ema Jesús te crusu
(Mt 27.32-44; Mr 15.21-32; Jn 19.17-27)*

26 Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticajare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapaipahi te máequene ema Jesús.

27 Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahí, náimarara-sirahi eta máejapanuravapahi éma. **28** Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana. **29** Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacpasiraya. Tásicha ecahénapa: “Tétavicavapa náuriva ena esenana macheruana. Nájina náimipanererecahini”. **30** Tásicha, ena achaneana, eta napisirayare, tijunanainapa te cérroana, tásicha, nacahénapa: “Tiúripapanucaini viyumurucavahini eta te juca cerro.” Ena apamuriana nacahenavarepapuca: “Étapucaini te juca simena viyumurusiavahini”. **31** Apanasica nútì ichapemuri eta nucatajivairahi, tájinahinéni taviuchanuhini. Navetiji-yarecha éta nátajivayare ena echichanaveana* —máichavacapa.

32 Énerichuvare natarihipahivare ena apinana tiámerahiana macutique-neanayarehi ema Jesús eta macaetatairayare. **33** Tacahe, nacaitecapapa tayehe eta masihi nacaetatairare ticajarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa. **34** Te náetatacapa ema Jesús, macahepa eta máechajiruvahí:

—Tata, piperdonachavaca ena nani, taicha vahi nácaicutiarahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajirisiracacahi. **35** Natarihihi ena achaneana tímararacanahi tamutu. Énaripa ena tuparairucana natarihihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiruvahí eta maratahairahíji macuchucuhavaca ena apamuriana achaneana. Tásicha puiti, vivaraha vímaha máimereuchava eta máitupajijiasiravahíji, te yátupihipuca Cristo éma, Manerejiruhíji ema Viya —nacahepa.

36 Énerichuvare ena suntaruana nacaecahijiricahivare éma. Navarahapa náeschayarehi eta tasisiru vino. **37** Náichapa éma:

—Te yátupinapuca piti reyvihi nayehe ena israelita, pítijivaina picuchucuhava —náichapa.

38 Tatiarihihivare eta ajureca nanacaguenehi te tachutisi eta macurusura. Eta juca ajureca tacajuquenehi te náechajiruvahí te griego, te latín, téhapa hebreo. Ani tacahehi eta taechajiruvahí: “Ema maca ema Rey nayehe ena israelítana”.

39 Ema émana tiámerahi macaetataquenehi te machacaya, énerichuvare éma macaecaahihi. Ani macahehi:

—Te yátupinapuca pítiquenehi Cristo, picuchucuhava pítijivaina. Tásicha, picuchucuhavivare víti apuna —máichapa.

40 Émasera ema apuna macaetataquenehi macahepa:

* **23:31** Eta juca mayeherepi proverbio ema Jesús te máechajiruvahí, ani tacahe: “Te náichahi eta juca eta náimairahi eta yucuqui vérepacavacaichahahi, téavicavahí eta navairahi náquipaica te tájiquipa”. Tatiarihi eta tacayemaquenehi tayumurevahí.

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi. ⁴¹ Víti, vivachachahi eta juca vitapiravahi taicha ichapequenehi eta véjecapiravanahi. Émasera ema maca Jesús, ticatajivahi tájinahinéni taviuchahini.

⁴² Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús majicapapa:

—Numetacavivane, puiti píti nucachaneviyare te paraíso —máichapa.

Eta máepenirahi ema Jesús

(Mt 27.45-56; Mr 15.33-41; Jn 19.28-30)

⁴⁴⁻⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tíjahúchavapa tétsayumeca eta tayehe cortina eta Templo. Ticutimecaca eta taetsayumesirahi. ⁴⁶ Ema Jesús tipiaracapa:

—Tata, pijacapinanu eta náchaneva —macahepa.

Te titapiricapa, tépenapa.

⁴⁷ Tacahe, ema nacapitara ena suntaruana romanoana, tipicarinehi eta máimairahi eta júca. Étapa macaicutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

⁴⁸ Namutu ena achaneana natarihiqueneanahi, eta náimairahi eta júcana, ichaperinehi eta napisirahi. Téhatupachávanapáipa eta nacatisamuré-vairahi. ⁴⁹ Énasera ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehihisera eta náimararasirahi.

Nacucupaicapa te crusu ema Jesús, náecarapa

(Mt 27.57-61; Mr 15.42-47; Jn 19.38-42)

⁵⁰⁻⁵¹ Matiarihihivre ema achane ticaijare José. Ticavasahi te Arimatea te Judea. Tipicaurahihi éma. Tétavicavahivre eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana, váhisera mapauchavacahini ena machamurianahi tayehe eta juca náichaqueneanahi tamauriqueneanahi. ⁵² Te cáperehichichapa, eta máimairahi máepeniraipahi ema Jesús, tiyanapa mayehe ema Pilato, mayaseapanahi eta máquehe ema Jesús, mavarairahi máecarayare. ⁵³ Te tichavapa, macucupaicapa eta máquehe tayehe eta crusu. Máyuruacapa eta te sávana tijapu. Náiyaracuhapa tayehe eta máecari eta te mari nasecajueruhi. Nájinaichaha nacaecarasihini tayehe. ⁵⁴ Titatajianapa taicha cáperehichi-chaipahi. Taicha vahi táisapacarehini náecararecahini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi. ⁵⁶ Te náimatipa, tichavanapa te napena. Natsecapa eta perfume mayajihayarehi. Tinaracanapasera te jena sáchequenehi, napicauchahabi eta tapicauchacarevahi.

24

Eta máechepusirahi ema Jesús te máecari

(Mt 28.1-10; Mr 16.1-8; Jn 20.1-10)

¹ Te apanapa sache, te tijararahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi,

nacachanevacapaipa ena apamuriana esenana. ² Te títecapanapa tayeheta etaechari, náimaharinehi eta ticheyaramemari tajihainihi etaechari, téquehepuichavaipa. ³ Tisiapanapa éna, náejiacainehi eta máquehe ema Viáquenu Jesús. Májinari pahi. ⁴ Tiáramecanarinehi eta náejiasirahi. Váipa náimati que-nehahini tájahahipuca eta máichararacavahi. Tásicha, tiáramicarepa náimahahi ena apinana ajairana titupihanahi te nachacaya. Tijanunucavacahi eta námuirihana. ⁵ Eta náramesirahi éna, tétipaimurihanapa. Énasera ena ajairana náimahaqueneanahi náichapa:

⁶⁻⁷ —Éti ímijachaipapuca manasihi tépenahi ema Jesucristo, Manerejiruhi ema Viya. Májinari pahitichavaripahi titareca. Échavarichuhipuca eta macaye-maqueneanahi te achanerichaha te manasiquenerichaha te Galilea. Mac-ahehi eta máechajiriruvahie etanacarataserayarehi ena tictianacanahi éma, náetatasirayarehiva te crusu. Téchepucayarehisera te mapanaquenénapa sache —nacahepa ena ajairana.

⁸ Tacalé éna, enurujirinehi náechavane eta máechajiriruvanahi ema Jesús. ⁹⁻¹⁰ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarihipahi esu María Magdalena, esu Juana, ésupa esu apanavare María, máenahi ema Jacobo. ¹¹ Énasera ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

¹² Tiyavanepasera ema Pedro tayeheta etaechari. Tijunapapaipahi. Te títecapanapa, máimahapa tacarinehi eta sávana. Mapanerequenehainehi eta juca táichararacavahi. Tacalé, tichavavarepa.

*Tímerecavapa ema Jesús nayehe ena apinana máimitureana te táchahu ticaijuhe eta avasarechicha Emaús
(Mr 16.12-13)*

¹³ Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilómetro eta tayerehivahi. ¹⁴ Eta napaisirapahi nacasamurepaipahi eta nasamairiruhi. Téchajiricavanapaipa. ¹⁵ Eta náechajisihapahietajuca táichararacavanahi, tiáramicarepa macapayamu-rihapahie ema Jesús, macachanevacapaipa. ¹⁶ Énasera vahi náimatihini, taicha éma vahi másapahini náimati. ¹⁷ Tacalé, ema Jesús mayaserecavacapa:

—¿Tájahasica eta juca échajisihapahietepaisirapahi? ¿Tájaha eta tímipanererecahepahie? —máichavacapa.

¹⁸ Ema émana ticaijarehi Cleofas majicapapa:

—Namu ena achaneana náechahi eta juca táichararacavahi te Jerusalén puiti juca sácheinahie. ¿Picrichuhipuca píti vahi péchahini eta juca, eta piávihirahie te Jerusalén?

¹⁹ Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahietmáichavaquenévahie ema Jesús Nazareno, ema profeta máuriqenehini nayehe ena achaneana. Tamutuinihi tiuri eta máimiturapiana, tétevícavahivare eta máitupajijasiravahi taicha ema Viya, éma tíjaracahi tamutu. ²⁰ Énasera ena tuparairucana te viávasa, éna tíjararecanahi nayehe ena apavasanana taicha navarahahi náimicapaca. Tásicha, náetatacapa te crusu. ²¹ Víti ichapemuri eta vicasiñavairainihi eta mayehe. Vicuchapavainihi eta macatiúchirahavyarehi vimutu viti israelítana. Tamapurujipasera puiti, taicha tépenapa éma. Puiti mapanaripa

sache eta táetávisiravahi eta juca. ²² Icháquenesera te yáticarahichichapa, ticaramecahavianapa ena esenana vichamurianahi eta nayatiruirahi tiyanana tayehe eta máecari. ²³ Vaipa nachimapahini eta máquehe. Májinaipahi. Te tichavanapa, timetacahavianaipa eta náimairahi ena apinana ángeleana. Nametacavacapaji eta machaviraipahi titareca ema Jesús.

²⁴ Tásicha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaqueneanapahi ena esenana –náichapa.

²⁵⁻²⁶ Ema Jesús máichavacapa:

–Tétavicavapa tájinaira ácaicutiaraquenéna eti páureana. Váhivarepuca ácaicutiarahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásicha tichavayarehi titareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma –máichavacapa.

²⁷ Tásicha, mametacavacapasera tamutu eta táchajiriruvanahi eta Sagrada Escritura, eta táchajisihairahi éma. Tépanavapa tayehe eta májureanahi ema víyarahaini Moisés; étapa eta apamuriana nájureanahi ena profetanaini.

²⁸ Títecapananecha tayehe eta avasarechicha nacaijuhequenepahi. Mavarahapa ema Jesús majunijicavacayarehini. ²⁹ Énasera nacumpirachapa máehicavacahini te napena. Náichapa:

–Pácaherine eta ani viyehe, taicha yátinapa eta jena –náichapa.

Tásicha, ema Jesús manasipa tisiapapa eta nayehe. ³⁰ Te tiúripa eta tincacare, mavehapa eta pan, mahasulupayachapa ema Viya, mayuvetucapa, máijaracavacapa éna. ³¹ Enévanerinehi náimativanepa éma. Émasera tíjahú-chavapa témitiacahi te namirahu. ³² Tésenijiricacanapa éna. Tásicha, nacahepa:

–¿Tájaha tacayema eta vahi vímativanehini ichaquene te achene te ticapayacahavipa éma? Étapa eta vicachanerapahi, váhivare vímatiacavanehini, véjapusamurechapaipahinéni eta visamiravahi eta máimitusirahipahi tayehe eta Sagrada Escritura –nacahepa.

³³ Tacahe, enévanepa téquequecavanahí tichavana te Jerusalén. Te títecapanapa, tisiapanapa tayehe eta návhahi ena óncequeneana apóstoleana énapa ena apamuriana nachamuriana. ³⁴ Ánaqui ticametacasianaripavare éna. Nacahevarepa ena apóstoleana:

–Yátupi eta máechepusiraipa ema Viáquenu. Máimaharipa ema Pedro –nacahepa.

³⁵ Ena apinana najicapavarepa:

–Énerichuvare víti vímahaipavare éma, te achene eta vipaisirapahi. Váhisera vímativanehini. Tapaenumava te mayuvetucapa eta pan, vímatipa éma –náichapa.

Tiápechavare tímerecava ema Jesús nayehe ena máimitureana

(Mt 28.16-20; Mr 16.14-18; Jn 20.19-23)

³⁶ Tacahe, téchajiricavanarichaha éna, tíjahúchavavarepa tímerecava ema Jesús te namuri. Máechejicavacapa, ánipa macahe:

–Íchararacava, nuchichanaveana.

³⁷ Énasera tipicanarichucha, náimijachaichucha cunarehi éma. ³⁸ Émasera ema Jesús máichavacapa:

–Vahi ecupicanu. Étumecha eta esamureana. ³⁹ Ímaha eta juca nuvahuana étapa eta nívapeana. Émamahacanu apaesa écha eta nútiquenérahi. Eta cunare, tájina táchena, tájinavare táperaina. Vahi táchutihini eta nucaqueherahi nuti –máichavacapa.

40 Tacahe, eta máichiravacahi, ticajaruvauchavaipa eta mavahuana, étapa eta máivapeana. **41** Vuíchahasera nasuapahini éna, tiúrisamureanaripahinéni eta náimairahi, tacachanehisera eta napisirahi. Eta tacahe, máichavarepa:
—¿Jararihi nunica?

42 Éna náijaracapa eta nájimaru jima, étasipa vasu eta mápama. **43** Majacapa-vacapa éma, tinicapa te namirahu éna. **44** Tásiba, máechajiricavacapa:

—Eta juca níchavaquenovahí, étara eta numetaruhehi cape juca nucachane-jiricahéichahahi. Eta tacaheyarehi eta táitauchiravayarehi eta májuchaquenahahí ema víyarahaini Moisés nútí taechajisihaquenehi. Étapa eta nájuchaquenahivare ena profetanaini, étapa eta Salmo.

45 Máemechavacaipahi eta taechajiriruvana eta Sagrada Escritura. **46** Tásiba, máichavarepa:

—Étara eta juca tacajuqueneahí eta népenirayarehi nuti Cristo. Néchepucayarehisera tayehe eta nécari te mapanaquenepa sache. **47** Étayaréichuhivare iámapicayare eta níjare eta ímituresiraya ena achaneana ticavasanahí te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apresa macaepaha ema Viya eta napecaturana. **48** Éti, nutupararuheya eta ímituresiraya eta júcana. **49** Enasiyarechahasera ani te juca Jerusalén. Tiámainucava te máitecapauchahevacapa ema Espíritu Santo nuvaneruyare, máijararunuyarehi ema Tata. Éma, tíjaracaheyare eta ítupajijiasiravanayare —máichapa.

*Eta mayapirahi ema Jesús te anuma
(Mr 16.19-20)*

50 Te titapiricapa eta máimitusiravacahi, mámamurihapa te tachachacu eta avasare Jerusalén, te tachacayahí eta avasarechicha Betania. Macanuquechapa eta mavahuana, mayujarauchavacapa éna. **51** Te titapiricapa eta mayujarauchiravacahi, timutserahavapaipa ticanuquechavapaipa eta mayapirahi te anuma. **52** Eta náimairahi éna eta macanuquechiravapaipahi, tépuyumurihanapa eta nanecapararesirahi eta mayanirahi. Tásiba, tichavanapa tayehe eta Jerusalén. Tiúrisamureanapaipa. **53** Tájina vahi náejiacavahini tayehe eta Templo. Tiyujarauchavanaparacahi eta nacunachirahi ema Viya.

Tamutupa eta juca numetasiravihi puiti.

Ema Apóstole Juan májuequenehahi eta máichararacavahi ema Jesucristo, ticaijare puiti eta EVANGELIO SEGÚN SAN JUAN

¹ Eta acane, te táepaniravahi tamutu, matiarihiquenéipahi ema Jesucristo, ema Tímimatiarahi me Viya*. Éma, macachanehi ema Maiya eta maitaresirahi, Víyahivare éma apanavare. ² Ena apinana, nacuticacahi eta napanneruana. ³ Eta táepaniravahi eta acane, émarihi ema Cristo ticaemata-neacahi tamutu eta tatiarihiqueneanahi puiti, máitauchirahi eta mapanneruanahini ema Maiya. Tájina máejequeruinahini, nájinavare apanainahini náepiyacahini eta tatiarihiqueneana. ⁴ Émarichuhivare ticaitarecahavihi viti achaneana. Émarichuvare tinacapa te viáchanevana eta tamicahu eta vítaresirahi. ⁵ Éma tímiyanava tímicauchahavi taicha mavaraha máimijunijis-nahaviyare eta tamapicu te viáchanevana. Nararihisera ena vahi náuricahini eta mamicauchinavaca. Navaraha nacaemaha eta mamicauchiravacahi.

⁶ Tacahe, te máimahapa tiuri, ema Jesucristo tiúcupaicapa te juca apaquehe. Tiáchanechavapa. Yátupiquenehi achane, macaechehi eta veche viti achaneana. Ticasiriquihavihi te jena áñoanahi majurusirahi. Matiarihivare ema apuna achane ticaijarehi Juan Tícachasiricarahi. Tacahe, ema Viya, te máimahapa tiuri, ticavanahipa ema Juan. ⁷ Máinapumirauchayarehi eta macametarairuyare eta máimeresiravaya ema Cristo, ema namicahuyare nácani ticasíñavanayare mayehe. Ehanechavapa. Yátupiquenehi achane, macaechehi eta veche viti achaneana. Ticama Juan mametacayarehi ena achaneana natsecava eta najacapiraya ema Cristo. ⁸ Ema Juan, vahi émainahini timícauchamurimahi ena achaneana. Émahisera ticametarairurahiyarehi eta máucupaisirapa ema tiámahavihi eta yátupiqueneana mapanerueruanahini ema Viya. ⁹ Ema maca máechajisihaquene ema Juan, éma yátupiquenehi eta mamicauchirahaviyarehi vimutu viti achaneana, taicha tímieche viti achaneana. Ticatucahavi eta mapaneruerana ema Viya.

¹⁰⁻¹¹ Ema Jesucristo, émahi acane tépiyacahi tamutu eta apaquehe, énapa ena viáchucanaveanaini. Puíticha éma téchahavi vimutu. Téhesera te tiúcupaicapa éma, namaimatiquenehi ena achaneana Viáquenuirahi éma, váhivare navarahahini najacapahini éma. ¹² Natiarihisera ena tinerejicavanahiji tijacapanahi, téhicanahi éma. Ena nani, ichaperinehi eta macunachiravacahi táichavene eta nacasiñairavahi mayehe. Éna, yátupiqueneripa machichanaveanahini ema Viya. ¹³ Eta macachichairahavihi ema Viya víti, émahi ema Viya tinerejicahavi táichavene eta vicasíñairavahi mayehe. Vahi étaparacainahipucaini eta náehisrainahipucaini ena ticachichahaviana. Váhivare étaparacaina-hipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apuna achane.

¹⁴⁻¹⁷ Viti véhicanahi ema Jesús eta matiarihirahi te juca apaquehe, yátupi eta vímatirahi éma. Vímahahi te viúquihana. Vímativarepa eta másihairahi te

* ^{1:1} Ema Apóstole Juan, te májuchapa eta juca libro, manacahi amairiha te letra griega λογος (eta táchajicuirava: “logos”). Eta tacayemaquene te véchajirirupa: “Tímimatiarahi me Viya”. Étarichueche viti achaneana. Ticavare tacahe eta táchajisihaquene eta apamuriana libroana te castellanorupi, ani tacahehi: “la Palabra” étapa “el Verbo”.

anuma, eta émairahi ema macarichuquenehi Machicha ema Viya. Yátupi-hivare eta víyairahi éma, macutihí ema Maiya. Éma, tímimatiarahi me Viya, taicha éma máimerecahi eta máetaviuchirahi eta máemunasirahavihi, máimechirahavihivare eta yátupiqueneana mapanereruana ema Maiya. Ema víyarahaini Moisés ticatuparalahi me Viya eta máimitusirahavihi viti achaneana eta vanairipiana. Émasera ema Jesucristo ticatuparalahi me Maiya eta máimitusirahavihi eta máemunasirahavihi, etapa eta máechajiri-ruvana yátupiqueneana ema Viya. Ema Cristo, téavicavahi eta máuriva eta viyehe vimutu. Eta majaneasirahavipahi, tíjaracahavihí eta vitumevahi te tamutu sácheana. Émaripa ema Juan, ani macahehi eta máechajisihairahi ema Jesús: “Émara ema maca ema néchajisihaquenehi eta eyehe cape juca. Yátupi núti nínapucahi eta núchusirahi, émasera matiarihiqueneipahi eta acane, májinanuichahahi núti. Eta tacahe, tipicauchacarepanahi eta nuyehe” mac-ahepa.

18 Yátupiquene nájina náimatihini eta máimahi ema Viya. Émasera ema macarichuquene Machicha, tímimaticahavihí eta máuriva ema Maiya taicha étaquenehi másicha te masamure ema Maiya.

Ema Juan Tícachasiricarahi timetacavacahi ena achaneana tayehe eta máimeresiravayarehi ema Jesucristo

(Mt 3.11-12; Mr 1.7-8; Lc 3.15-17)

19 Tacahe, te jena sácheana, ena tuparairucanahi ticavasanahi te Jerusalén navanecapa ena náevanachana[†], nayanaucha ema Juan Tícachasiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinaripa ema Cristo vicuchapa-quenehi? —nacahepa.

20 Matupiruvapa eta majicapiravacahi. Ánipa macahe:

—Núti mavanerunuhi ema Viya. Váhisera nútina ema ecuchapaquenehi ema ticaijke Cristo —macahepa.

21 Tacahe, nápechavarepa nayasereca:

—¿Nájahavisica píti? ¿Pítipuca picaijare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásicha, nápechavarepa nayasereca:

—¿Nájahavisica píti? ¿Pítipapuca ema apaña profeta vicuchapaquenehi? —náichapa.

Émasera majicapavarepa:

—Vahi nútina.

22 Tacahe, náichavarepa:

—¿Nájahaviquesica píti? Pimetacahavichucha te nájahavipuca píti. Vi-varaha véchayare, apesa vimetacavaca ena tivanecahavianahi —náichapa.

23 Tacahe, ema Juan majicapavarepa:

—Nútichucha máechajisihaquenehi te ajureca ema víyarahaini profeta Isaías. Núti nucametarairuhi nayehé ena achaneana vámahicurúhana. Níchuhabvacahi éna apesa natsecava eta jácani máitecapiraya ema Viáquenu —macahepa.

24 Natiarihihivare ena navaneruanahi ena fariséoana. **25** Nayaserecaparepa éna apanava:

[†] **1:19** Ena nani vanairucana, nararihihi ena tiyujararahiana te Templo, énapa ena téchapajirahiana eta tayereruvana eta Templo te Jerusalén.

—¿Tájahasica tacayemahi eta pícachasirisirahi ena vijaneanana, te váhipuca pítinahíni ema Cristo, váhivare pítinahíni ema profeta Elías, váhivare pítinahíni ema apaña profeta vicuchapaquenehi? Ena vijaneanana vahi táchamunuhini nacaicachasihini. Énasera ena apavasanana, jéhesare tacamunu eta nácaicasivaca —nacahepa.

²⁶ Tacahe, éma majicapavacapa:

—Tiuri, núti yátupi nícacasicavacahi te une ena achaneana, apaesa natsecava eta jácani máitecapiraya ema vicuchapaquenehi. Matiarihipasera puiti te vitaracu. Étisera vahi ímatihini éma. ²⁷ Tímerecavavanénapa. Ticunachacarepanayaresera eta nuyehe. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami —máichavacapa éna ema Juan.

²⁸ Eta mávihahi ema Juan máicachasirisinehi ticaijare Betábara, te apachara eta cajacure ticaijare Jordán, tinapaicahi te táuchusine eta sache. Eta nayeserinepanahi ena vanairucanahi.

Ema Juan máimicaeheracha ema Jesús eta émairahi ema Cordero, vanairucahi me Viya

²⁹ Te apanapa sache, máimahapa ema Juan eta mapauchirapaipahi ema Jesús. Tacahe, máichavacapa ena achaneana:

—Ímaha, márajapa ema Cordero, matapiravarequene éma, vanairucahi me Viya. Éma, táimicaparuyare eta macaepahairayare eta vipecaturana viti achaneana te juca apaquehe. ³⁰ Émara ema maca ema néchajisihaquenehi eta eyehe cape juca. Núti nínapucahi mayehe éma, émasera matiarihique-néipahi eta acane, májinanuichahahi núti. Eta tacahe, tipicauchacarepanahi eta nuyehe. ³¹ Nútiripa néchajisihahi éma, vuíchahasera nímatihini. Numetacahehisera eti nujaneanana israelítana eta ecaicachasiraina apaesa etsecavahi eta ejacapiraina éma te jácani máimerecavapa. ³² Tacahe, cape sache, títecapauchanupa ema Jesús, mavarairahi nícacasicayare éma. Tásicha, te viúcupaicapa te une, nímahapa ema Espíritu Santo eta máucupaisirahi te anuma, ticutiparne eta paloma. Masiapahacapa ema Jesús. ³³ Tacahe, te nímahapa, nupauenavapa nímati éma eta émairahi ema vicuchapaquenehi Cristo, taicha ema Viya tímítukanupa eta máicutiarayare. Ani macahehi: “Te píma ema Espíritu Santo máucupaucha te mápusi mácani achane, pímatiya eta émairahi ema Nuchicha nuvaneruhi. Éma, tíjaracahevacyare ema Espíritu Santo, tisiapahacahevacinapa éti achaneana. Nuchaneraheinapa éti” máchanupa ema Viya. ³⁴ Tásicha puiti, nímatipa éma. Táitusiava numetacahe puiti eta émairahi ema Cristo, Machicha ema Viya —máichavacapa ema Juan.

Ena náinapiruana máichuhaqueaneana ema Jesús ena máimitureanaya

³⁵ Tacahe, te apanavarepa sache, ema Juan matiarihihí tayehe eta móvirreasahi, vítipa viti apinahavi máimitureanahi. ³⁶ Tásicha, máimahapa ema Jesús tiánucuhapaipahi. Tacahe, ema Juan máichahavipa:

—Ímaha. Ema maena Jesús, émahi ema Cordero matapiravarequene, vanairucahi me Viya —macahepa.

³⁷ Tacahe, eta vímairahi viti apinahavi máimitureana ema Juan, viyanapa véhicahi ema Jesús. ³⁸ Tásicha, ema Jesús téseniequenehavapa. Máimahapa eta véhisirapahi. Tiyaserecahavipa:

—¿Tájaha ecamunu nuyehe? —máichahavipa.

Víti vijicapapa:

—Tata maestro, ¿távihapuca eta pítecapi?

39 Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaiapahi eta jena sache eta viávihairahi eta mayehe, taicha las cuátroripahi sache te vítecapapa ánaqui.

40-41 Andrés máijare éma nuchamuri téhicapahi ema Jesús. Tacahe, eta máurisamurevahí ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

42 Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús máesenicapa ema Simón. Tásicha, máichapa:

—Piti Simón, machichavihi ema Jonás. Nútisera nítsivachaya eta píjare. Núti njarechaviya Pedro, táichavenehi eta pétaviuchirayare eta pitumeva —máichapa ema Jesús.

Ema Jesús máichuhapa ema Felipe émapa ema Natanael

43 Te apanapa sache, ema Jesús mavarahapa tiyanayarehi te tinapaica eta Galilea. Tásicha, macainunapa ema Felipe. Tásicha, máichapa:

—Yare, péhicanu.

44 Eta mávasahi ema Felipe eta te avasare ticaijare Betsaida, étarichuvare mávasahi ema Andrés émapa ema Pedro. **45** Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisihaquenehi te libro májuchaquenehi ema víyarahaini Moisés, émarichuvare éma táechajisihaquenehi eta libro nájureanahi ena profetanaini. Ema ticaijarehi Jesús, machicha ema José. Ticavasahi te Nazaret —macahepa.

46 Tásicha, ema Natanael majicapapa:

—Váiparinehi étainahini máuchusinehini ema achane tiuri tayehe eta avasare Nazaret —macahepa.

Tásicha, ema Felipe máichavarepa:

—Viyana, apaesa pímati —máichapa.

47 Tacahe, te náitecapauchapa, ema Jesús máimraracaripa ema Natanael. Tásicha, macahepa:

—Nímativi eta pipanereru. Píti yátupiquenevi israelita. Tétavicavahi táurivahi eta pítaresírahi. Vahi pítuca pivayuareca —máichapa. **48** Tásicha, ema Natanael majicapapa:

—¿Táviha pímatinenuhi?

Ema Jesús máichapa:

—Núti nímativipahi te vuíchaha máetupiacavihini ema Felipe eta máichuiraviyarehi, te piáviharipa te tápecu eta yucuqui higo.

49 Tacahe, ema Natanael masuapavanepa ema Jesús. Máichapa:

—Tata Maestro, pítiripa piti yátupiquene Machicha ema Viya. Píti yátupiquenévivare Reyvihi viyehe viti israelítana. Núti njaráracavapa néhicaviya —máichapa.

50 Ema Jesús majicapapa:

—Étachucha eta juca níchiravihi eta nímiravihi te tápecu eta yucuqui, pipatsicavapa píjaracava péhicanuya. Vahi tácarichu eta juca. Pímahayareva eta apana tiáramicareanapana tayehe eta juca.

51 Tásicha, ema Jesús máichahavipa vimutu:

—Éti ímahayare eta anuma téjiacayare, énapa ena ángeleana tiúcupauchanuanayare núti Manerejirunuhi ema Viya —máichahavipa.

2

Natiarihi ena araimanayarehi eta te avasare Caná

¹ Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea. ² Tásicha, esu maena ema Jesús, ánaqui suávinezhi taicha sucaichuhasiquenehi ésu. Énerichuvare ticaichuhasi-hivare ema Jesús, vítipa viti máimitureana.

³ Tacache, ema arayenahi tacaimamarapa téchuriacapa eta máeresahi vino. Esu maena ema Jesús suíchapa ema suchicha:

—Téchuriacanapa eta náeresahi.

⁴ Tásicha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava —máichapa.

⁵ Tásicha, suíchavacapa ena tésiricanahi:

—Tiuri, ñímaháinepa éñi. Esuapayare éti eta ñivanairipiana —suíchapa.

⁶ Tacache, tatiarihihi eta sáisihi ichapehiana tinajana, márihiana. Nayupisareana ena israelítana tayehe eta nayeherepiana. Eta táichapehivavacahi eta tinajana, cíncohi lata eta tacavacu. ⁷ Tacache, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacache, náinicacajicavacapa éna eta tinajana.

⁸ Tásicha, ema Jesús mavanecavacapa:

—Tiuri puiti, eveha ániamaína, eyana íjaraca ema téchapajirica eta juca piesta —máichavacapa.

Tacache, tiyananapa éna, náijarapanahi. ⁹ Mavehapa masamaecapa eta une, vínoripahi éta. Váhisera máechahini éma távihahipuca tásihahi éta. Nacarichu ena tésiricanahi néechahi eta únerahi.

¹⁰ Tacache, ema téchapajiricahi eta piesta máichuhapa ema arayenahi. Máichapa:

—Nanutu ena achaneana te térrana, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu táuriamahini. Pítisera, apuna eta pipanereruhi. Tiúrihi eta vino piújararuuhavihi tativa. Puítisera eta juca vino, téavicavahi eta táuriamavahi. Tacachuricarinehi tamutu —máichapa.

¹¹ Eta juca tainapuiruhi tiáramicare máimerecahi ema Jesús, tayehe eta avasare Caná. Ichaperinehi eta viáramirahi viti vinecapanahi eta juca máimeresirahi eta máitupajijiasiravahi. Tacache, ichaperinehi eta visuapirahi viti máimitureanahi.

¹² Te taequenepa eta juca, viyanavarepa te apuna avasare ticaijare Capernaum. Vimutupaipa, esu maena, ena maparapenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

Ema Jesús macuchuchujicavacapa ena tíjararecanahi eta sárareana, cágureana te tajuhe eta Templo

(Mt 21.12-13; Mr 11.15-18; Lc 19.45-46)

¹³ Tacache, eta jena sácheanahi, tiánehiripa eta Pascua, vipestarahi viti israelítana. Ema Jesús tiyanapa tayehe eta avasare Jerusalén, vítipa viti máimitureana. ¹⁴ Te vítecapapa, viyanapa visiapahi tayehe eta Templo. Máimahinehi ema Jesús ena títsiriperecarahiana eta plata, énapa ena tíjararecanahi eta vuíyeana, eta uvesana, étapa eta palómana. ¹⁵ Eta máimairahi éna, máepeiyacapa eta machicute. Máquijimuríhapa eta naplataneana te apaquehe. Máequhehepuichavacapa eta namesarana. Macuchuchujicavacapa namutu,

épata eta sárareana náijarareruanahi. ¹⁶ Tásicha, máichavacapa ena tíjararecanahi eta paloma:

—¡Ecuchuca eta júcana eta te juca mapenahi ema Tata! ¡Vahi étaina ícuchina éti íjararecaneta tájiparacana! —máichavacapa.

¹⁷ Tacahe, viti máimitureana, eta vímairahi eta juca, enevanerine véchava eta táchajiriruva eta Salmo tayeha eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

¹⁸ Jéhesare, enurujipa títecapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachava-hipuca vanairucavi me Viya. ¡Pímechahavi eta tiáramicare te yátupihipuca pivanahi eta juca! —náichapa.

¹⁹ Ema Jesús majicapavacapa:

—Te iáquipaicayarepuca éti eta juca templo, nútisera nucaechepeca te mapanaquenéna sache —máichapa.

²⁰ Ena tuparairucana najicapavarepa:

—Cuarenta y seis año eta tayerevahí eta náepiyaresirahí eta Templo. ¡Tétavicavahi eta pisíñavavaisirahí picaemuñavayarehi picaechepecayare te mapanaquenéna sache! —nacahepa.

²¹ Eta máichiravacahi ema Jesús, máechajisihahi éma eta táchepusirayare eta máquehe. ²² Eta tacahe, te tiyerehi, te táchakenepa eta máechepusirapa ema Jesús te máecari, véchavahi viti máimitureana eta juca mametarapihi tayeha eta máechepusirayarehi. Eta tacahe, visuaparinehi eta táchajisihairahí eta Sagrada Escritura eta mayehe.

Ema Jesús máimati eta napanereruana ena achaneana

²³ Eta manasiraichahahi ema Jesús te Jerusalén, te Páschuamu, camurihi eta tiáramicareana máichaqueneanahi. Camurianahivare ena achaneana tímahanahi. Tásicha, nasuapahi eta émairahi ema Cristo nacuchapaquenehi.

²⁴ Émasera vahi macasiñavahini eta nayehe taicha máimativacahi éna, vuíchaha yátupinahini eta náehisirahí éna. ²⁵ Taicha éma, tétavicavahi eta maitupajijiasiravahi, máimatirahí tamutu eta napanereruana ena achaneana te amahe eta nasamureana.

3

Ema Nicodemo máejirapana ema Jesús

¹ Matiarihi ema achane téhicarairicahi ena fariséoana. Ticaijare Nicodemo. Ema maca achane, tétavicavahi eta macunachacarevahí taicha máestrohi éma. ² Tacahe, eta jena yáiquenehi, ema Nicodemo tiyanapa mapapiuchapapahi ema Jesús. Tacahe, eta náechajirisiravahi, macahepa ema Nicodemo:

—Tata maestro, véchahi eta vanairucavihi me Viya eta juca pítésirahí pímitusirahipanahi. Taicha nájina apanaina achane tituruequenehaimahi eta juca tiáramicareana píchaqueneanahi píti —macahepa.

³ Ema Jesús majicapapa:

—Puiti numetacavi eta juca yátupiqueneana: Nácani navarahaya titujicavanaugh tisiapanava tayeha eta mávasa ema Viya, tacamuñuhi náitsivachayare eta náitaresira. Te vahi yátupina eta náijarasiravaina eta máitsivachiravaca ema Espíritu Santo, vahi titujicavanaimahi tisiapanava eta te mávasa ema Viya. Tímicutijiricavayarehi tiápechavanayarehi tiúchucana —máichapa.

⁴ Tacahe, ema Nicodemo vahi mácaicutiarahini eta máichirahí ema Jesús. Váhisera macuchapaimahi eta máitametasirahí ema Jesús. Ánipa macahe:

—Váiparinehi vichavaimahi eta amúyahavinahíni viti ichasiana, vichavahivarepucaini visiapahini te sujuhe esu ticachichahavi —macahepa.

5-6 Majicapavare ema Jesús:

—Pisamanuchaha. Te tiúchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tiápechavanayare tépanava eta náitaresiranayare, taicha machicharipahi. Nutupiruva numetacavi: Nacarichu ena machichanaveana ema Espíritu Santo tisiapana eta mávasa ema Viya. Te tacuija eta machichairahéna éti, tájina vahi ítujicavaimahi esiapa. **7** Vahi picuarami eta juca níchiravihi: Táitaurevaquene ticachichaheyarehi ema Espíritu Santo.

8 Eta juca tímicutijircavahi eta técaticava, tacarichu visama eta tacaemaira. Váhisera tácaeherahini. Ene nacahehi ena mávaháruanaipa ema Espíritu Santo. Nanasirichu eta náimahi. Ticaitsivaipasera eta náitaresira —máichapa ema Jesús.

9 Tásicha, ema Nicodemo mápechavarepa mayasereca:

—¿Tájahasica tacayema eta juca?

10 Ema Jesús máichavarepa:

—Tétavicavahi eta picunachacareva píti, taicha tiúrihi eta pímitusirvacahi ena vijaneanana. Tasapihasera vahi pímatiequenehahini eta júcana.

11 Pisamanuchaha. Yátupiquene eta numétasirávihi. Tatupiruvahi eta néchajisihahi eta táichararacavanahi te anuma taicha nímhahipa. Étisera vahi esuapanuimahi eta numetasirahehi eta nímhahqueneanahi. **12** Te cape juca sácheana, nímicutichinahehi eta táichararacavanahi te juca apauehe tayehe eta táichararacavanahi te anuma. Étisera vahi esuapanuhini. Tavetijipa eta emasuapiranuya te nutupiruvahi numetacahe eta táichararacavanahi te anuma. **13** Nuti Manerejirunuhi ema Viya, nucavasahi núti te anuma. Tásicha, núcupaicahi eta numetasiraheya. Nájina apanainahini mácani mameta-causehini eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

14 Acane, eta napaisira ena viáchucanaveanaini eta te mávaphi apauehe, táchucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta támahi eta quichare. Manacahi te anuquehe eta te yucuqui. Tásicha, ena achaneana táchureana eta quichare, te náesenica eta quichare máepiyaru ema Moisés, tinaracanapahi, vahi náepenapahíni. **15** Ene nucaheyare núti apana, tinacanuanayareva te anuquehe. Eta níchararacavayare apaesa nucuchucuhapahi namutu ena nácani ticasíñanuanayarepahi. Tásicha, máichecuaraquirenapa eta náitaresirayare. Tájina ticamitiequenehavacaimahi.

Ema Viya, tétavicavahi eta máemunasirahavihi

16 Taicha ema Viya, tétavicavahi eta máemunasirahavi viti achaneana te juca apauehe. Eta máemunasirahavi, máijaracahi ema macarichuquenehi Machicha eta máucupaisirahi eta ani viyehe. Mavarahapa tíjaracahaviya máichecuaraquirénapa eta vítaresiraya vimutu viti vicasíñanahí éma. Tájina ticamitiequenehahavimahi. **17** Taicha ema Viya, vahi táchahéni eta mapanereruhi eta máucupaisirahi ema Machicha máicuñacahavihini viti achaneana. Étasera eta tímitecahi éma, ticuchucuhahaviyare vimutu.

18-19 Taicha nácani ticasíñanayare ema Machicha ema Viya, vahi ticaicuñanaimahi. Nácanisera vahi nácasíñahini éma támicoñacavacayarehi etanaviurevanahi éna. Taicha vahi náuricahini eta tamicauchiravacahi etamajaraiva ema Cristo táucupairuhi te juca apauehe. Étachucha náurica etá

timapicu taicha vahi návarahahini tácaecherahini eta náichirahi eta tamauriqueneana. ²⁰ Taicha nácani tíchanahi eta tamauriqueneana, nacaticha eta majaraiva ema Viya. Váiparinehi napauchaimahi, namavarairahi tacaecherahini eta náichirahi eta tamauriqueneana. ²¹ Énasera ena tisuapanahí yátupi eta máechajiriruva ema Viya, náuricayarehi napaucha eta majaraiva. Jéhesare ticaecheranasarepa eta machaneranaripahi ema Viya.

Ema Juan Tícachasiricarahi tiápechavavare máechajisihahi ema Jesús

²² Te taequenepa eta juca, tiyanavarepa ema Jesús, tayehe eta avasarechichana te táunava eta provincia Judea. Véhicahi viti máimitureana. Vinasipa jácani sácheana eta ánaqui. Viti máimitureana vícachasiricaripa ena achaneana tivarahanahi náehicaya ema Jesús. ²³ Tásicha, ema Juan tícachasiricahivare te jena Enón tachacayahi eta Salim, taicha ánaqui tatiarihihi eta une. Ena achaneana napauchahi éma. Jéhesare máicachasicavacapaipahi ena tivarahanahi náinajicayare eta napecaturana. ²⁴ (Eta juca máichahi ema Juan tamirahupaichaha eta jena sache eta náeratasirayarehi éma.)

²⁵ Tacahe, te jena sácheana, ena religíosoana tiyananapa náimiyusemacavaca ena máimitureana ema Juan, nametacahi eta vicachurisiravacahi viti máimitureana ema Jesús taicha tiápajumuriavanapanahí ena vícachasiruanahi. ²⁶ Tacahe, eta nasemirahi ena máimitureana ema Juan, tiyananapa nametapanahí éma. Náichapa éma:

—Tata maestro, pímahaini ema maena péchajiriruhi cape te tachausi eta juca cajacure Jordán. Ema Jesús pímijarecha Cristo, tícachasiricahi puiti éma. Jéhesare, namutuyarehini náehica éma —náichapa.

²⁷ Tásicha, ema Juan majicapavacapa:

—Vahi ecueñamava. Ema Viya, éma téchahi eta máijarasirahi eta máitucaquenehi nácani manerejiruana. Németeaca tíjaracahi ema Viya eta máitupajijiasirava ema maca Jesús. ²⁸ Éti échavahi eta numetasirahehi eta vahi nútinhahini ema Cristo. Yátupisera nucavanahini eta nínapumirauchirayarepahi éma, numetacavaca ena achaneana natsecavahi. ²⁹ Núti nímicutijirisinahe: Te natarihi ena araimanahí, namutu ena nacaichuhasiqueneana tiúrisamureanahí eta náimairahi ena araimana. Nacunachahi ema arayena. Ene nucatherihi núti eta núrisamurevahí eta nímairahi puiti eta nacunachirahi ema Jesús. ³⁰ Éma, te jácani mapaisihayarepahi, tiápajucavayarepaipa eta macunachacarevaya. Éma, mapaenumavapa tépanava eta macaemata-neasira ema Viya. Núti núrisamurehí tayehe éta. Núti, tiánehipa eta nítouchirainapa eta nématañe. Tásicha, váhirichu nucunachacare núti —macahepa ema Juan.

Ema Jesús másihaqueñehi te anuma

³¹ Ema Jesús, máimatirinehi tamutu eta táichararacavanahí te anuma taicha másihaqueñehi éma te anuma. Víti achaneana viávihahi vicavasanahí te juca apaquehe, vímatihi étachucha eta táichararacavanahí te juca apaquehe. Émasera ema Jesús, eta másihairahi te anuma, tímatihi tamutu, tiápajupanavahi eta máitupajijiasiravahi. Ticachuricahavihi. ³² Éma, tímitecahi eta mametasirahavi tamutu eta máimahaqueneanahí étapa eta masamaqueneana te anuma. Nájinayarénisera nasuapahini eta macayemaqueneanahí. ³³ Vítisera viti visuapanahí eta mametarapiana, vímatihi eta yátupihi eta máechajiruvana ema Viya mámaqueneanahí ema maca Jesús. ³⁴ Taicha éma, vanairucahi me Viya, máechajisihayarehi eta máechajiruvana ema Viya. Énerichuvare tétavicavahi eta máimicasirasahi ema Espíritu Santo taicha

mávahácahi éma. ³⁵ Ema Vicaiyaquene máemunacahi ema Machicha. Eta tacahe, matuparacahi eta émairayarehi téchayare tamutu. ³⁶ Eta tacahe, nácani ticasíñanayare ema Machicha, máichecuaraqureyare eta náitaresiraya. Namutusera ena macasiñaranahanahi ema Machicha ema Viya, vahi titareca-naimahi, taicha tanasihi eta naviurevana táichavenehi eta napecaturanahi. Ticaicuñanayarehi máitavacac ayare.

4

Ema Jesús tiánucuha eta provincia Samaria. Ánaqui máechajicahi esu ésuna esena.

¹⁻³ Tacahe, camurianahi ena tivarahanañi tíjaracavanaya náehicaya ema Viáquenu. Tásiha, viti máimitureana vícachasicavacahi éna. Émasera ema Jesús vahi máicachasiricahini. Camuripanana ena vícachasiruana nayehe ena máicachasiruana ema Juan. Tacahe, ena fariséoana nasamairiricapa. Náramipa. Navanecapa ena tiyaserecanaya. Tacahe, te tisamauchavapa ema Jesús eta napanereuchirahi, majunijicapa eta Judea. Tiyanapa tichavahi tayehe eta Galilea, vítipa víti.

⁴ Eta vipaisirapahi te achene, viánucuhapaipa eta te provincia Samaria. ⁵⁻⁶ Te la dócepa te sache eta vítecapirahi te távhahi eta nória máepiyaruhi ema víyarahaini Jacob. Máijaracasicharipahi ema machicha José eta juca mayeheni apaquehe. Eta nória, tachacayahi eta avasarechicha ticaijare Sicar. Tacahe, eta mavitairapai pahí ema Jesús, tíchecanumapa te tachausi eta nória. ⁷⁻⁸ Eta víchesirahi, viyanapa viti máimitureana vivacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

⁹ Tásiha, esu esena sujicapapa:

—Pítí israelítavihi. ¿Tájaha tacayema piyaseacanu eta une, nuti samaritánahuhi, vahi pijaneananuinahini? —suíchapa. (Ani tacahehi eta suéchajirisirahi, taicha ena israelítana énapa ena samaritánoana vahi náurianacahini.) ¹⁰ Tásiha, ema Jesús majicapapa:

—Te pímatihini eta mavarahaqueneanahi tíjaracavi ema Viya, téhevare pímatinuhivaréni núti tuyaseacavihi eta une, németeaca piyaseacanuipahíni eta une ticaitarecarahi. Tásiha, núti níjaracavihíni —máichapa.

¹¹ Tásiha, esu esena suíchapa:

—Tata, tiúpenahi eta juca nória. Pítí, tájina enurena piviyahini eta une. ¿Távihasica tásihayare eta une ticaitarecarahi eta pivarahaquenehi píjaracanu?

¹² Eñi viáchucaquenéni Jacob, vímaequenéhahi eta juca nória ñépiyaruhí. Nérirarenihi eñi énapa ena ñichichanaveana. Énerichuhi táerihahi eta ñyeheana sárareana. ¿Piti pímjachavapuca picuchucayahini eta tiúriamapana une? —suíchapa.

¹³ Ema Jesús majicapavarepa:

—Namutu nácani térrana eta juca une tiápechavanayarehi timauneanaya.

¹⁴ Nácanisera téranayare eta une níjararuyarehi núti, vaipa tiápechavanaimahi timauneana. Taicha tacajurucayarehi eta náuricacareva. Tiúrinainavarepa eta náitaresira. Ticaitarevacayare máepenacacayare —máichapa.

¹⁵ Tacahe, esu esena, eta susamirahi eta máechajiriruvanahi, suíchapa:

—Tata, píjaracanupaini eta une ticaitarecarahi, apaesa vaipa nucuapechavaini numaune. Váipavare nucuitecahini eta te juca nória népanahini une —suíchapa.

¹⁶ Ema Jesús majicapavarepa:

—Piyana, píchuapaná ema pima. Piáma eta ani.

17 Ésusera sujicapapa:

—Nájina nímaina.

Tásicha, ema Jesús máichapa:

—Pitupiruva eta juca pimetasiranuhi eta nájinairahi pímainahini. ¹⁸ Cíncoana-paipahi ena pímanaveanainihi. Tásicha puiti, ema picachanequenehi váhivare pímainahini. Pitupiruvahi eta péchajiriruvahi —máichapa.

¹⁹ Tacáhe, tiáramecarinehi esu esena eta susamirahi éma eta máichirahi. Tásicha, suíchapa:

—Tátachicha, németeacavihi eta pítiquenéravihi profeta. Nuvaraha pimeta-canuya puiti, ¿távihapuca eta yátupiquene viyujarasirareyarehi? ²⁰ Taicha ena viáchucanaveanaini samaritánoanaini eta nayujarasiraréni eta te juca tainahu eta cerro. Puíticha tanasirichuhi eta viyujarasirarehi. Étisera eti israelítana, eta emetarapi eta viyujarasirareyare ñe Viya téhenapa te Jerusalén —suíchapa.

21 Emá Jesús mametacapa:

—Nutupiruva numetacavi, nuchicha, ánipa táenasihayare puiti váipa tacamesaimahi íteca eyujaraca me Tata te juca tainahu eta cerro étaripa eyana-hipucaini te Jerusalén. Tamutuinapa eta táurivayare eta eyujarasihayare.

²² Éti samaritánoana, apaesachicharichu eta ímatirahi ema Tata eyujaraurehi. Vítisera vímatihi ema viyujaraurehi, taicha viti israelítana víti vicatuparalahi viámayare eta máechajiriruvana ema Tata eta macuchucuirayare namutu ena achaneana ticasíñavanahi mayehe. ²³⁻²⁴ Numetacaviya eta apava: Ema Tata, tiávihahi te anuma, jéhevare éma, yátupiquenehi Viya. Vahi mátejinahini eta maeche macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiriruana. Vahi tágomesaimahi ticasíñarajiana. Eta juca tacaheyarehi eta mavarahauqueneanahi ema Tata eta eyujarasirayarehi –máichapa.

25 Tásiha, esu esena suíchapa ema Jesús:

—Téchacarehi eta ñítecapirayare té juca apaquehe eñi Cristo, ñivaneruya eñi Viya. Téchacarehivre eta ñimetasirahaviyare tamutu eta yátupiqueneanahi. ¿Píti, péchapuca tájamuhuyarepuca eta ñítecapihayare?

26 Ema Jesús majicapapa:

—Nútira nuti mavanerunuhi ema Viya. Nútira ecuchapaquenenuhi —máichapa.

²⁷ Tásiha, vítecapanecha viti máimitureana. Tacahé, viáraminehi eta máechajirisiravahi eta suyehe esu esena indigenahi. Vivarahahí viyasereca esu esena tájahapuca suvaraha eta mayehe. Vivarahahivare viyasereca ema Jesús tájaha

tacayema eta máechajisirahi esu esena. Váhisera vipatsicava viyaserecahini.
²⁸ Tásiha, esu esena sunaquicapa eta suyupi. Tijunapapa tiyana te avasare, sumetapanavacapa ena achaneana. Te títecapanapa, suíchayacapa:

29 — Yare, ímahaya eñi achane profeta. Ñímatihu tamutu eta níchaqueneanahi néjecapiravanahí. Tamutuhi ñicuchuchujisinánuhi. Núti németeaca éñiripa eñi Ñivaneruhi eñi Viya, éñiripavare eñi vicuchapaquenehi ticaijare Cristo — suíchapa.

³⁰ Ena achaneana sumetaruuanahi tiyananapa náehica esu eta te mávihahi ema Jesús, náimahapanayarehi. ³¹ Eta nayerevapaichaha ena achaneana suíchuhaqueneanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

32 Tásiha, éma tijicaphahavipa:

—Núti, jucarihi eta tinicacare tanicasarehi eta náchaneva emáimatiéquenérushi éti —máichahavipa.

³³ Tásicha, véjecapavasamurepa víti. Víchacacapa:

—¿Náenicaipapuca jácani?

³⁴ Ema Jesús máimathihi eta vianerueruanahi. Máichahavipa:

—Eta ticaitarecanuhi nútì, eta nítouchirahi eta mavanairipiana ema Nucayiquene, taicha nuvaraha nítouchaya tamutu eta nucaematanerasira éma.

³⁵ Eta viyeherepi te véchajiruva: “Puiti vítapa eta vévasirapa eta trigo, cuátroyer caje eta vicuchapira eta vicurujisiraya” vicahehi. Puítisera nūmetacahe nútì: Vaipa táyeremahi eta vicurujisirainapa. ¡Ésenica puiti te achene! Nárajapa ena achaneana ena névaraquieranahi. ³⁶ Ema Tata tíjaracaheya eta ícuchiyare te ímicatacanuyare eta vicurujisira ena nani achaneana apesa náuchucuhayare, máichecuaraqureyare eta náitaresira. Tásicha, tétavicavaya eta viúrisamureva vimutu: éti, nútipa. ³⁷ Ena achaneana, ticatisamurevanahi eta náechajirisira: “Vítira vévacahi eta vésane; apanapasera ema ticurujica” nacahehi. ³⁸ Vítisera te juca vivapinavayare. Núti níchuhahéhi eta ecurujisiraya eta névaruhi. Énerichuvare nararihihi ena tínapucanahi viyehe eta nacaematanerasira eti juca. Puiti vivapinavaya eta vícuchiyare taicha vicuticacahi eta vicaematanerasira ema Viya —máichahavipa ema Jesús.

³⁹ Ena ticavasanahi te jena avasare, camuriqueneanahi ena tisuapanahi eta émaírahi Mavaneruhi ema Viya táichavenehi eta suíchirahi eta macuchuchujisinaquenehi tamutu eta suíchaqueneanahi. ⁴⁰ Tásicha, tiyananapa tiácapahaviana. Te títecapanapa, émaquenepa nasamahi. Tásicha, náechajicapa mánasipanahini nayehe. Masuapahisera ema Jesús. Apina sache eta mayerevahí, vítipa. ⁴¹ Tacahe, eta manasipanairahi tayehe eta avasare, namutupa nasamahi eta máimiturapiana. Tacahe, camurianainehi ena tisuapanahi, téhicanahivare éma. ⁴² Tásicha, náichavarepa esu esena:

—Puiti émaquenepa visamahi. Vaipa tácharichuhini visuapahini eta pimetrapihi. Véchapa viti apanava eta émaquenérahi ema Cristo, ema vicuchapquenehi, ema ticuchucuhahaviyare vimutu viti achaneana —náichapa.

Ema Jesús macanaraca ema machicha ema aquenuca majupahahi ema rey

⁴³ Te taequenepa eta apinaquenehi sache, tiyanavarepa ema Jesús; macaijuhe eta te provincia Galilea. Véhicapaichuhivare víti apanava.

⁴⁴ Eta mayanirayarehi eta Galilea, vahí mácasíñavahichaini eta masuapacarevainahini nayehe ena achaneana. Émarichuhí, ani macahehi eta máechajiriruvahí: “Mácani profeta, vahí tivapinavanahi eta najacapirahí ena achaneana te mávasa”. ⁴⁵ Téhesera te máitecapauchapaipa ema Jesús eta avasarechichana tinapaicanahi te Galilea, namutu najacapahí. Taicha náimatipa éma taicha náimahapa eta tiáramicareana máichaqueneana te mávihaipa te Jerusalén te jena piéstairahi eta Pascua.

⁴⁶ Tásicha, tiápechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticaijare Capernaúm, matiarihihi ema majupaha ema rey. Macajumaquenehi ema machicha.

⁴⁷ Te masamairiricapa ema achane eta máitecapiraipahi ema Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tiánehiripa tépenayarehini. ⁴⁸ Émasera ema Jesús máimatipa eta masamure ema achane, tásicha, máichapa:

—Éti vahí esuapanuimahi, te vahí nímechahehi eta tiáramicareana —máichapa.

49 Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami —máichapa.

50 Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahí te mapena. **51** Te tiánehipaipahi títecapa te mapena, nácapapa ena macajurureana. Náichapa:

—Tata, ema pichicha tinaracaipahi.

52 Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

53 Tásicha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirohi éma, énapa éna machichanaveanahi te peti, eta émairahi ema Cristo, Mavaneruhi ema Viya.

54 Eta juca eta tápinanehi eta tiáramicarehi máichaquenehi te Galilea, te taequenepa eta machavirahi eta te Judea.

5

Ema Jesús macanaraca ema achane macajumaquene eta muracaquiha, ema tiávihahi te tachacaya eta noque ticaijare Betesa

1 Te taequenepa eta juca, tatiarihihi eta apána piesta eta viúrujisirávana te Jerusalén. Tiyanavarepa ema Jesús. **2** Te jena viávasa, tatiarihihi eta ichape tapaja náimisiapirare eta uvesana nacaparusana. Tatiarihihivare eta ichape noque vímjarechahi Betesa. Ticayehehi cinco eta culerureana.

3-4 Eta návihahi ena nacajumaqueneana púchuquiana, masariana, énapa ena muracauihana. Namutu éna, ticuchapanahi eta macayamurisira eta une ema ángele. Tásicha, namutu tiyanana téchipapaicavana te une, taicha tímijachavana mácani tínapuca téchipaicava, tacanaracayarehi eta jácani majuma.

5 Tacahe, matiarihi ema achane macajumaquene. Tréintayochó áñoripahi eta macatajivairahi. **6** Tacahe, te tisiapapaipahi ema Jesús, máimahapa ema achane macajumaquene tívecahi. Máimativare eta tayerevaipahi eta macajumairahi. Mayaserecaba:

—¿Pivaraha pinaraca, nuchicha? —máichapa.

7 Tásicha, ema achane majicapapa:

—Nuvaraha, tata. Nájinaserá ticasianpanuimahi tayehe eta noque, te tiyamurieca eta une. Ticachuricanuanaparaca ena apamuriana nucutiqueneana nacajumaqueneana —máichapa.

8 Tacahe, ema Jesús máichapa:

—Péchepuca, piveha eta pímacaraji. Piyana pipaica —máichapa.

9 Tásicha, eta máichirahi ema Jesús, enevanerinehi tinaraca ema achane. Mavehapa eta máimacaraji. Tiyanapa tipaica. **10** Eta sache manarasirahi ema achane, sávarumuuhuhi. Ticapicahuhi eta jena sache nayehe ena israelítana. Tacahepa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini eta pímacaraji puiti juca —náichapa.

11 Ema achane majicapavacapa:

—Vahi nútina tásicha. Ema maca achane ticanaracanuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

¹² Tásicha, éna nayaserecapa:

—¿Nájahasica ema tivanecavihi pipaica eta piámirapahi eta pímacaraji? —náichapa.

¹³ Émasera ema achane vaipa máimatihini eta máijare ema ticanaracahi. Váipavare náetupiacacarehini ema Jesús te namuri ena camuriqueneana achaneana taicha tiyanaripahi. ¹⁴ Téhesera te táequenepa, tiyanapa ema achane eta te Templo. Ánaqui títecavarepa ema Jesús. Te máimahapa ema Jesús ema achane macanararuhi, máichapa:

—Pímaha, vaipa picuapechava picuapecatura, machu tachavauchavi eta pijuma, máchuvaré pávetiji —máichapa ema Jesús.

¹⁵ Tacahe, eta máimatirapa, ema achane tiyanapa mametapanavaca ena tuparairucana eta émairahi ema Jesús ema ticanaracahi. ¹⁶⁻¹⁸ Eta tacahe, ena tuparairucana tisemanapa. Ichaperinehi eta nacatianasirahi ema Jesús táichavenehi eta macanarasirahi te jena sache sávarumuhuhi tacapicahuquenehi. Tásicha, títecapanapa, éna ticaratacanayarehini ema Jesús. Émasera máimatihini eta napanereruana. Tacahe, máichavacapa:

—Ema Tata tamutuchucha sache ticaematané. Ene nucaheyarehi nuti apana. Nítouchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasemirahi. Navarahapa nacapacavaneyarehi éma. Eta tiviuchahi eta macanararesirahi te sávarumuhuana, náimijachirahi máepuruhi eta nayeherepi. Tavetijipaicha eta máimicaecherachiravahi Machichairahi ema Viya, Víyairahi ema apana.

Ema Jesús macatuparahaquenehi me Maiya

¹⁹ Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu eta máematanerepihi ema Ticachichanu. Étayareichuhi níchayarehi nútì. ²⁰ Taicha yátupihi eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tiáramicareana. Tiápajucavayare eta táramicarevayare, apaesa iáramirineyare, epicayareva.

²¹ Ema Tata marataha macaecheputa ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náitaresiraya. ²² Nucatuparahahivare mayehe ema Tata eta nímiraya eta nacaicuñairayare namutu ena náejecapavaqueneanahi. Vaipa émainahi tícuñareca éma. ²³ Taicha mavarahahi epicauchanu nuti Machicha, táchutirichu eta epicauchirahi ema Tata. Nácanisera vahi tipicauchuanuahí nútì, vahivare napicauchaimahi ema Tata.

²⁴ Yátupiquenevare numetacahe eta juca apana. Nácani ticaquínnayare tisuapanayare eta néchajiriruvana, nasuapavare eta nucavanahirahi mayehe ema Tata, éna titarecanayare, vaipa ticaicuñanaimahi. Taicha éna, tiúchucuhunaripa tayehé eta náicuñayaréni te yucu. Náicuchihi eta náitaresiraya. ²⁵ Tacutiquene nutupiruva numetacahe nuti Machicha ema Viya. Táitecapaquenepa puiti juca sácheana, tisamanuanayare ena achaneana, tayanapane tépenahi eta náchanevana. Te nasuapajirahipuca, nucaitarecavacayare eta náchanevana. ²⁶ Taicha ema Tata namutuhi marataha macaitareca.

Ene tacahe eta máijarasiranuhi nútí Machicha eta namutuyareva nurataha nucaitarecavaca. ²⁷ Énerichuvare tituparacanuhi eta nícuñasiravacaya-rehivare taicha yátupiquenenuhi manerejirunuhi. ²⁸ Vahi ecuarami eta juca numetasirahehi. Járajapa eta sácheyare eta nasamirayare namutu ena náepenaqueneana eta nahu nútí. ²⁹ Téchepucanainapa namutu te náecariana. Nácani tíchanahi eta táuriqueneana, titarecanainapa. Énasera ena tíchanahi eta tamauriqueneana, ticaicuñanainapa.

Ema Jesús máimereca eta macavanahirahí me Viya

³⁰ Nútí vahi nútijiricaváimahi nícuñareca. Nucuchapayarehi eta mavanairipi ema Tata, ema tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavaranahauquenehi ema Tata. ³¹ Te nácarichu nútí nútijiruvainachuchaini eta nímere-ruanahi, vahi táchamesahini esuapanuhini. ³² Váhisera nucarichuimahi, taicha matiarihihi ema apana titametasinanuhi, émaripa ema Juan Tícachasiricarahi. Nímatihi nútí eta matupiruvahí eta máichaqueñeanahí eta tímerechanuhi. ³³ Éti ecavanairipipa nayasereca ema Juan te nájahanuhipuca nútí. Matupiruvahisera éma eta majicapiravacahi eta nútiqueneipahi éma ecuchapaquenehi. ³⁴ Váhisera étaparacaimahi eta juca eta matiarihirahí ema tímereuchanuhi. Eta ticamunucarepanahí eta esuapiranuina apaesa iúchucuhaiya éti nicha nútí. ³⁵ Ema Juan tímicutijiricavahí timícauchahahí tayehe eta mametarapihi eta eyehe, te jena sácheinahí esamararasirahí éma. Iúrisamureinehi ichape, taicha eta tamicauchirahí eta máechajiruva. ³⁶ Váhisera mácarichu eta máimicaecherachiranuhi ema Juan. Jararihi eta apana táimicaecherachiranuhi, tiápajupanavahí eta táramicareva. Taicha nútí nicha eta nématanerepiana máijararunuhi ema Tata. ³⁷ Émaripa ema Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, timetacahehi eta nítecapiraya. ³⁸ Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiruvana te esamureana. ³⁹ Éti, tamapuruji eta ecaravahuirahí eta Sagrada Escritura. Ímijacharipapuca eta ticitarecaheyarehi. Váhisera ímatiequenehahini, váhivare ácaicutiarahini eta nútirahí taechajisihahí nútí nucaitarecayarehi. ⁴⁰ Tacutiquene vahi ávarahahini epauchanuhini éti, níjaracahehini eta ítaresiraya máitavacacainahini.

⁴¹ Nútí vahi nácamesa nacunachanuhini ena achaneana. ⁴² Títcapa, nímatihevacahi emutu éti eta emaemunasirahí ema Viya. ⁴³ Nútí nuvanecasivarichuhi me Tata eta nítésirahí. Étisera vahi esuapanuhini, váhivare ejacapanuhini. Téhesera te máitecahini mácani apana achane, tímijachavapuca Cristo ema ecuchapaquenehi, masapihapucaini ema tisuapacarehini eta eyehe. ⁴⁴ Éti, vahi esuapanuhini taicha eta evarairahí ecunachacareva ena achaneana. Esapihachucha éti vahi ávarahahini ecunachacare me Viya. ⁴⁵ Váhisera nútinayare numetauchahe eta me Tata. Máimahaherinepa ema Moisés. Éma timetauchaheyare. Éti ímijachavahí ticuchucuhahayare etá evarairahí ítaucha eta mavanairipiana éma. Tamapurujihisamisera. ⁴⁶ Te yátupinahini esuapahini eta mametarapiana ema Moiséini, esuapanuhiva-repucaíni nútí taechajisihaqueñehi eta májureanahí ema Moiséini. ⁴⁷ Váhisera esuapahini eta májuchaqueneanahí éma. Tavetijipa etá emasuapiranuhi etá juca numetarapiana eyehe –macahepa ema Jesús.

6

*Ema Jesús máitaparahahi máenicavaca ena camuriqueneana achaneana
(Mt 14.13-21; Mr 6.30-44; Lc 9.10-17)*

¹⁻⁴ Te taequenepa, te jena sácheana tiánehipa eta Pascua, vipestarasahi viti israelítana. Émasera ema Jesús, tiyanavarepa tiámahavivare eta viánuecahi eta cáquiure Galilea (ticaijarehivre Tiberias). Camurianasera ena achaneana tipaicanapahi téhicanapahi éma, taicha eta náimairahi eta tiáramicareana máichaqueñeanahí eta macanarasiravacahi ena nacajumaqueneana. Te vítecapapa te apachara, viyanapa te jácani anuquerehi mávapahi. Tacahe, véjacapa vinaracayarehi. ⁵ Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

⁶ Eta juca mayaseresirahi étachuchanéni eta mavarairahi éma macaicuttiarayarehi te tájahapuca macayemayarehi ema Felipe. Taicha ema Jesús máechahi eta máichaqueñeyarehi. ⁷ Tásiha ema Felipe majicapapa:

—Tacamuñuhi vácayehehini eta camuri plata apaesa namutupaini vítaphahini vénicahini apaesainahini návaminahini. ¡Vahi taratahahini eta dies mil páneana! —macahepa.

⁸ Tásiha, téchajicapa ema nuchamuri Andrés, maparapehi ema Pedro. Máichapa:

⁹ —Mararihi ani ema émana amaperu tiámapahi eta cíncochichapahí eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

¹⁰ Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíchahi eta apaquehe, muíjipahihivare. Cinco mil eta náichapemurivahi ena ajairana. Váhi náimitupachahini ena esenana énapa ena amaperuana. ¹¹ Tacahe, ema Jesús mavehapa eta páneana. Te tamutupa eta mahasulupayachirahi ema Viya, tíjaracahavipa. Véniricapa víti, víjaracavacapaipa eta pan étape eta jima. Tisimurivacapaipahi eta víjaraca. ¹² Tinicanapa namutu. Tisatuheanapa, nacaemacharichahavare. Tásiha, ema Jesús máichahavirepa:

—Ecurujica eta náemacharajianahi, machu támapuruji —macahepa.

¹³ Tásiha, víti vicurujicapa eta pan náemacharajianahi. Táinicachaichahavare eta dócehiquene ichapehiana saye. ¹⁴ Tacahe, eta náimairahi ena achaneana eta juca máichaqueñeanahí ema Jesús, ichaperinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

¹⁵ Eta tacahe, navarahapa námayarehini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

*Ema Jesús mapaicaeca eta une
(Mt 14.22-27; Mr 6.45-52)*

¹⁶ Tacahe, te jena cáperehichichapa, viyanapa viti máimitureana tayehé eta cáquiure. ¹⁷ Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Ema Jesús májinahi macachanehavipahini. ¹⁸ Eta vipaisirahipahi, tachimaracapa eta muraca técaticava. Tépacucapa muraca eta cáquiure.

19 Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímairahi. **20** Émasera máichahavipa:

—Vahi ecupicanu. Nútichucha.

21 Tacahe, vímatipa éma. Viúrisamuréinehi eta vijacapirahi eta mávacuirapa eta te vipacure. Tásicha, vítecapanecha eta te vicaijuheyarehi.

Ena achaneana natanujiricaipahi ema Jesús

22 Te apanapa sache, ena achaneana manaquiruanahi ema Jesús, natanujiricaipahi éma. Náimatiacapa eta vicarichuirahi viánueca viti máimitureana. Tájinahivare apanainahini pacure. **23** Tásicha, tacahepainecha eta apala pacureana, nayehehi ena tiásahanahi te avasare Tiberias. Títecapanapa te tachacaya eta nanisinehi eta pan ena camuriqueneana achaneana. **24** Tacahe, ena achaneana eta namaimairahi ema Jesús vítipa viti máimitureana, tiávacuhanapa te pacureana. Tiyananapa ticapayacahavianayarehi te Capernaum, natanusirapahi ema Jesús.

Ema Jesús ticaitarecarahi

25 Te títecapanapa ena achaneana te apachara, náetupiacapa ema Jesús. Tásicha, nayaserecapa:

—Tata maestro, ¿tájamuhu pítecaphi eta ani? —náichapa.

26 Ema Jesús majicapavacapa:

—Nutupiruva numetacahe: Eti etanucanupahi táichavenehi eta nénisirahehi nésatuhechirahéhi. Váhisera ácaicutiarahini eta nímechirahéhi eta tiáramicareana. **27** Eti tamapurujipa eta ecañamarasiravahi etanuca eta enicaquenerepi taicha titavayarehi. Tatuparacahisera etanucayare eta tincacare ticaitarecaheyarehi, máitavacacahi éta. Étara eta juca níjararuheyarehi nuti Manerejirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

28 Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaemataneasirahi éma? —nacahepa.

29 Ema Jesús majicapavacapa:

—Eta mavarahaqueneanahi ema Viya íchaqueneyare, esuapanuyare nuti mavanerunuhi —macahepa.

30 Tásicha, ena nayaserecavarepa:

—¿Tájahasica eta tiáramicare pímechahaviyare apaesa visuapavipa? Vívaraha vímaha. **31** Eta acane ema víyarahaini Moisés tíjaracavacahi ena viáchucaequeñeanaini tinicanahi eta ticajire maná, ánaqui te apaquehe mávapahi. Taicha tacahehi eta táechajiruvahi eta Sagrada Escritura ani tacahéhi: “Máenicavacahi eta tinicacare tiásicha te anuma”. Piti, ¿pímijachavapa pirataha picachurica ema víyarahaini Moisés? —nacahepa.

32 Ema Jesús majicapavacapa:

—Nutupiruvavare numetacahe. Éti, ichape eta ejecapirava. Ema víyarahaini Moisés, vahi émainahini macucupaicahini eta maná. Ema Tata, émahi ticucupacahi eta maná. **33** Jararihi eta apala numetarapi eyehe: Puiti ema Tata mavaraha máijaracaheya eta yátupiquenehi tinicacarehi. Étaripa tinicacarehi tiásihahi te anuma ticaitarecavacayarehi namutu nácani tijacapanaya. Étara eta tímitecanuhi —macahepa.

34 Tásicha, najicapapa éna:

—Tata maestro, piyaseasinahavi ema Viya máijaracahavipaini máejehainahini eta tinicacare péchajisihaquenehi —náichapa.

35 Tásiha, éma máichavarepa:

—Nútira eta yátupiquene tinicacare nucaitarecaheyarehi. Eta tacahe, nácani tisuapanuanayare, vaipa tiápechavanaimahi técuhana. Váipavare timaune-naimahi. **36** Étasera eta níchaquene, ímahanuipaneni éti, váhisera esuapanuhini. **37** Nuvaraha ácaicutiaraquenéna yátupina. Namutu nácani tipauchanu-nayare, núti vahi névatajicavacáimahi taicha tásihaquenéichuhi me Tata etá máijarasiranuhi éna. **38** Taicha núti, eta núcupoaisirahi te anuma, tímitecanuhi nítouchayarehi eta mavanairipiana ema Tata. Vahi nútijiriruvainahini etá nítosirahi níchayarehi eta nuvarahaquenenahini núti. **39-40** Eta mavaraha-quenehi ema Tata etá mavanesiranuhi, nucaitarecayarehi nácani máijara-runuanayarehi éma. Nácani tésericanuanayare nuti Machicha, tisuapanuanayarevare, máichecuaraqureyare etá náitaresiraya te nucaechepecapá éna te náecariana te jena sache táitecapapa etá népaníravacayare. Váhiqene nucamitiacaimahi ema émanaimahi —máichavacapa.

41 Tásiha, nararihi ena ticaecahirahiana etá máichiravacahi ema Jesús etá émairahi etá yátupiquene tinicacare, máucupairuhi te anuma, ticaitarecarahiyare. **42** Ánipa náichacacahi:

—Tépiyahirahipa ema maca. Víti, vímatihi ema maiya, ticaijare José. Éneri-chuvare vímatihivare esu máena. ¿Tájaha tacayema etá macahechajiriruvahí etá másihairahi te anuma? —nacahepa.

43 Ema Jesús máichavacapa:

—Ámatina. ¿Tájaha tacayema épururahi? **44** Nacarichu témunahiricavanaya tipauchanuana nácani máichuhauqueneanahí ema Tata. Eta tacahe, ena máichuhauqueneanayarehi éma, nucaechepecavacayare núti te táitecapapa etá sache népaníravacayare núti. **45** Taicha tacahehi etá májurehi ema profeta víyarahaini Isaías, ani tacahehi: “Náimitucasivayareichuhi me Viya namutu ena achaneana”. Tacahe, namutu ena máimitureana ema Tata, énara tipauchanuanayare puiti. **46** Tayanapane váhihinéni náimahaimahi etá mamira ema Tata. Nucarichu núti nímahapa éma taicha étaquenehi etá násinehi etá mayehe. **47** Nutupiruvahí numetacahe: Nácani tisuapanua-nayare, níjaracayare etá náitaresirayare máitavacacayare. **48** Núti, yátupi-quenehi etá nucaitaresiravacahi ena ticasíñavanahí etá nuyehe tacuti etá tinicacare tacaitarecahi etá viáqueheana. **49** Éti, ena iáchucanaveanaini tini-canahi etá maná te mávapahi apaquehe. Váhisera náitarecahini. Namutuhi tépenaracánahi. **50-51** Nácanisera tinicanahí etá néche, vahi tépenanaimahi. Taicha núti núcupoaicaripa te anuma. Eta neche, yátupiquenehi tinicacarehi ticaitarecarahi. Nácani tinicanayare etá neche, máichecuaraqureyare etá náitaresiraya. Núti níjaracayare etá neche taicha nuvaraha tacaitarecava-cahini namutu ena achaneana —máichavacapa.

52 Tásiha, ena natarihiqueneana tiácapaemajircácanapa. Ena apamuri-aná, ánipa nacahe:

—¿Tájahapuca macayemahi etá máijarasirahavi etá maeche viniruyarehi?

Ena apamuriana, ánipa nacahe:

—Vaipa tétupicava etá juca mapanereruhi. Mavaraha vinicayarecacha etá máechenaváji —nacahepa.

53 Émasera ema Jesús máichavarepa:

—Nutupiruva numetacahe: Te épuruhipuca enica etá neche, nuti Manere-jirunuhi ema Viya, te épuruhipuca éra etá nítine, vahi ítarecaimahi.

54 Taicha nácani tinicanayare etá neche, téranayareva etá nítine, éna máichecuaraqureyare etá náitaresira. Tásiha, núti nucaechepecavacayare te

náecariana te jena sache népaníravacayare. ⁵⁵ Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi. ⁵⁶ Esamanuchaha. Nácani tinicanayare eta neche, téranayareva eta nítine, éna tiávahácanuanayarehi núti. Tásiba, núti návahácavacayareva éna. ⁵⁷ Taicha ene nucahehi núti, tiávahácanuhi ema Tata. Tásiba, núti návahácahivare éma. Máitavacacahi eta máitaresira. Éma ticaitarecanuhi. Tivanecanuhivare nucaitarecaheyarehi. Tásiba, nácani tinicanayare eta neche, máitavacacayare eta náitaresira nícha. ⁵⁸ Núti núcupaicahi te anuma eta níjarasiraheyarehi eta juca yátupiquenehi tinicacare. Vahi táchutihí etá maná nanicaquenehi ena iáchucanaveanaini éti. Tépenaracanarichuchaséra. Énaserá ena tinicanayare eta neche, máichecuaraqureyare eta náitaresiraya –máichavacapa.

⁵⁹ Tamutu eta juca máimiturapiana ema Jesús te mávihaipahi te nárujisi-rareva ticaijare sínagoga tayehe eta jena avasare Capernaum.

Tacarichu eta máimiturapiana ema Jesús ticaitarerahi te visuapa

⁶⁰ Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

⁶¹ Émasera ema Jesús máimatihi eta napanereruanahi eta namavarairaripa náimyanavahini náehicahini. Tacahe, máichavacapa:

—Páurehehi éti eta evaraha ínajica eta éhisiranu taicha eta emacaicutiarairahi eta nímiturapianahi. ⁶² Németeaca ímryanavaichucha eta emasuapajiraivahi, tayanapanepuca ímahanupuca eta nárairaya nuchavirayarehi te anuma, te návinehi acne, taicha núti Manerejirunuhi ema Viya. ⁶³ Ácaicutiara eta nucayemaquenehi. Vahi étaparacaini eta néchaquene. Eta juca nímiturapiana, te esuapapa, étara ticaitarecaheya taicha yátupiquenerihi. ⁶⁴ ¡Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichirvacahi taicha máimatipahi eta napanereruana ena tijunijiacanayarehi, émapa ema tíjararecayarehi. ⁶⁵ Tacahe, máichavacapa:

—Puiti, evaraha ínajicanu. Eta tacahehi eta níchirahéhi: “Nacarichu témunahiricavanaya tipauchanuana nácani máichuhaquequeneanahi ema Tata” —máichavacapa.

⁶⁶ Eta nasamirahi eta nacayemaqueneanahi, tínajicavanapa ena camuri-queneanainihi. Vaipa náimyanavahini náehicahini ema Jesús. ⁶⁷ Tacahe, tiyaserecahavipa viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare?

⁶⁸ Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiriruvana. Tétavicavahi eta tacaitarecaraiyahi. ⁶⁹ Víti vitupiruvahi eta visuapi-ravihi. Véchahivare eta yátupiquenéravihi Cristo, Machichaquenévihi ema yátupiquenehi Viya —máichapa.

⁷⁰ Ema Jesús majicapapa:

—Dócehehinéni eti nunerejiruanahi. Mararihisera ema émana te etaracu, ema mávaháruhi ema Váinajarji —máichahavipa.

⁷¹ Ema Jesús, máechajisihahi ema Júlasi. Taicha ema Jesús máimatihi eta émairayarehi tíjarareca, tayanapane éma vidocenénihi viti apóstoleana.

7

Ena maparapenaveana ema Jesús váhivare nasuapa

¹ Tacahe, ema Jesús tímiyanapaipahi tipaicapaipahi eta avasareana te tinapaica eta Galilea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napane-rechaipahi nacapacayarehi éma. ² Tacahe, te jena sácheanahi, tiánehipa eta vipestara viti israelítana eta vicapenahuiyavacahi eta viyusujiana. Étahi eta vítecapihavacahi te Jerusalén, vihasulupayacha me Viya eta macajuru-sinahavihi eta visucureana te vésaneana. ³ Tiuri puiti, natarihihi ena maparapenaveana ema Jesús. Tacahe, náichapa éma:

—Te pímijachava pítira máestrovi, vahi pánasi eta te ani. Piyana te Judea, apaesa ena pímitureana tiávihanahi ánaqui náimaha eta píchaqueneanayare. ⁴ Taicha te pivarahahipuca náimativi ena achaneana, tacamuñuhi pímerecava yátupina te namirahu namutu. Vahi picuyumuruca eta pítucaqueneana —náichapa.

⁵ Taicha ena maparapenaveana váhiquenevare nasuapahini éma. ⁶ Tacahe, ema Jesús máichavacapa:

—Vuíchaha táitecapauchanuhini eta nuyanirayare te Jerusalén. Étisera tamutuchucha tiuri eta eyaniraina. ⁷ Nútisera ticatichuanahí ena achaneana táichavenehi eta nímercavacahi eta náichaqueneana tamauri-queneana. Étisera vahi ticatichaheanaimahi taicha tájina taviuchahehini. ⁸ Te evarahapuca, eyana éti te fiesta. Nútisera vuíchaha nuyanaimahi taicha vuíchaha táitecapauchanuhini eta nuyanirayare —máichavacapa.

⁹ Máevatacahi ema Jesús ena maparapenaveana, émasera ticaequene-havapa. Manasipanaichaha te Galilea.

Ema Jesús tiyanarichuchanéni tayehe eta fiesta

¹⁰ Te tiyananapa te fiesta ena maparapenaveana ema Jesús, énerichu-varéni éma tiyanavarepa. Váhisera máimerecavahichaini. ¹¹ Énasera ena tuparairucana natanucaipa éma, te jena piéstauquenehi. Tásicha, nacahepa:

—¿Macáñárihipucacacha ema mácani achane? —nacahepa.

¹² Énerichuvare ena achaneana natarihiqueneanahí te fiesta, náechaji-sihahi éma. Ánipa nacahehi: “Vahi tiuri ema maena achane. Macaetemavaca ena achaneana”. Ena apamuriana ánivare nacahe: “Tíurihi ema maca. Vémeteaca téavicava eta máurivahi”.

¹³ Váhisera nacuchujipicahini eta nacayemaqueneanahí taicha tipicacara-cavanarichucha nayehe ena tuparairucana.

¹⁴ Te enumuhuquenepa eti fiesta, mapaenumavapa tímerecava ema Jesús. Tiyanapa tisiapahi tayehe eti Templo. Tinahacavapa tímitecahi. ¹⁵ Ichape eti náramirahi ena tuparairucana, eti náimairahi eti máitusirahi yátupi. Tásicha, ánipa nacahehi:

—Ema maca vahi vímiturenahini. ¿Táviha maviyahi eti máitucaquenehi ema maca? Vahi mávamirahuini eti máimitusiravacahi ena achaneana —nacahepa.

¹⁶ Émasera ema Jesús máimatihí eti napanereruanahi. Tacahe, máichavacapa:

—Vahi nútijiriruvaina nuvehahini te nuchuti eti juca nímiturapianahi. Ema Tata tivanecanuhi, émahí tituparacanuhi eti nímitusiraya eti máimitu-rapiana. ¹⁷ Te etiarihinapuca eti evarahahi ítaucha eti mavanairipiana ema Viya, ímatiacavaneyare eti juca nímiturapianahi étairahi tiásihahi eti me Viya. Vahi nútijiricávainahini eti nímitusirahi. ¹⁸ Mácáni achane émajiricavahi téchajisihava, mavarairahi ticunachacareyarehi. Nútisera, eti nuvarairahi

ecunachayare ema Tata tivanecanuhi, vahi népiyahirahimahi. Nutupiruvahi néchajisihá eta yátupiqueneana tisuapacareana.

¹⁹ Échavarichu éti eta máijarasirahehi ema víyarahaini Moisés eta mavanairipiana éhiruyarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanuya? —máichavacapa ena tuparairucana.

²⁰ Ena achaneana najicapapa:

—¡Péjecapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

²¹ Ema Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapicahuquenehi sávarumuquenehi, éta tiviuchanuhi ichape eta eyehe. ²² Étiyapa epamicavahi eta emarcachiraya mácani amuya ajaira te óchopa eta masacherahi, tayapané sávarumuhuhipuca. Taicha ichape evaraha ítauchayare eta mayeherepini ema víyarahaini Moisés. (Váhisera émainahini máinapucahini manacuchahini eta juca eyeherepi. Ema viáchucai Abraham énapa ena machichanaveana tínapucanahi nanacucha eta viyeherepiyarehi.) ²³ Te tiúrihi ímaha eta emarcachirahi mácani amuya alauchu te sávarumuhuana, ítauchirapaipahi eta mavanairipi ema Moisés, tatuparacahe vahi ecusemahini eta nuyehe táichavenehi eta nucanarasirahi ema maca achane te sávarumuhu. ²⁴ Vahi ecuémunanásicava eta epanereruana. Epanerechinava tayehe eta tauriqueneana. Ácaicutiara eta taurivahi eta vicanarasirahi ena achaneana, tayanapane eta sávarumuhuhipuca —máichavacapa.

Ema Jesús máechajisihapa eta másinehi

²⁵ Tacahe, natarihi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujiruasa ena tuparairucana, ema navaraquaquenehi nacapaca táichavenehi eta máimijachirava ema Cristo mavaneruhi ema Viya. ²⁶ Ímahasera éma, vahi mapicacaracavahini eta macametarai-ruirahi te juca Templo. Nájinavare ena tuparairucana náijaracavahini nacaratakahini. Nájinavare nacamatinacahini. ¿Nasuaparipapuca puiti éna, eta émairahi ema Cristo? ²⁷ Vémeteacasera vuíchaha émaina ema Cristo, taicha vímatihi ema maca, étapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusihayare —nacahepa.

²⁸ Émasera ema Jesús máimatihí eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatinuhi, étapa eta núchusinehi! ¡Váhisera ímati eta tímitecanuhi! ¡Váhivare ímati ema Eternoquenehi, ema tivanecanuhi! Núti, vahi nútijiriruvainahini eta nítresirahi. ²⁹ Nútisera nímatihi éma taicha étaquenehi násinehi eta mayehe eta nítecapauchirahehi —máichavacapa.

³⁰ Eta nasamirahi éna tuparairucana, tiápajupanavahi eta nasemanevahi. Navarahapa nacaratacayarehini, náeratacayarepaini, vuíchahasera másapahini ema Viya eta nacaratasira éma. ³¹ Natarihisera camuriana ena tisuapanahi. Tásiha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tiáramicareana máichaqueñeanahi ema maca! —nacahepa.

Ena tuparairucana náevatacapa ena suntaruana nacaratapanayarehi ema Jesús

³² Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana.

Náevatacapa ena suntaruana nacaratapanayarehi ema Jesús te Templo te mávihahi.³³ Tacahe, ema Jesús máichavacapa ena suntaruana:

—Vuíchaha tituparacahe eta ecaratacanuhini. Yátupisera ánipirine eta nuchaheyare eta eyehe. Tásicha, nuchavainapa mayehe ema tivanecanuhi.³⁴ Éti, etanucanuinapa, váhisera íchimavanuimahi. Taicha vahi ítujicavaimahi ecapayacanu te návhayare núti —máichavacapa.

³⁵ Tacahe, ena tictorianacanahi tiyaserejiricacanapa. Ánipa nacahe:

—¿Távihapapuca macaijuhénapa eta vaipa viratahaimahi vicapayacaimahi víti? ¿Mavarahapuca tiyanayare te tayerahiquene avasare, macapayacaya ena vijaneanana israelítana tiávihanahi te tayerahiquene? ¿Mavarahapuca máimitucayare ena apavasanana?³⁶ ¿Tájahapucáji tacayemahi eta juca maechajiriruvahí eta vaipa viratahaimahi vicapayaca te jácani macaijuheyare? —nacahepa.

Tétavicavayare eta viúricacarevana maicha ema Jesús, tacutiya eta ichape cajure táuchurehi eta máriana. Ticaitarecahaviya éma.

³⁷ Te jena téqueneha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa macahe:

—Te natarihihnapuca nácani timauneanahí, náitecapauchanu. Núti níjarcayare eta náerayare nácani tisuapanuanayare —macahepa.

³⁸ Taicha ani tacahehi eta Sagrada Escritura: “Ema Mavaneruhi ema Viya, tétavicavaya eta viúricacarevana máicha, tacutiya eta ichape cajacure táuchurehi eta te máriana. Ticaitarecahaviya éma” tacahepa.³⁹ Eta juca macayemaqueneanahí ema Jesús, máimicaecherachahi eta masiapahasiravacayarehi ema Espíritu Santo te nasamureana nácani tisuapanayarehi éma. Vuíchahasera táitauchavahini, taicha vuíchaha machavahini mápanahini te mávasa te anuma ema Jesús.

Apanapanepa eta napanereruanahi ena achaneana mayehe ema Jesús

⁴⁰⁻⁴³ Tacahe, ena achaneana apanapanepa eta napanereruanahí ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapauquenehi máiteruyarehi.

Ena apamuriana, ánivare nacahe:

—Émaripa ema maca ema Cristo.

Énasera ena apamuriana, téjecapavanarichucha. Ánipa nacahe:

—Galileo ema maca Jesús. Váiparnehiséra étainahi máuchusihá ema Cristo tayehe eta avasare Galilea. Taicha eta Sagrada Escritura táechajisihá ema Cristo émayarehi mámariequeneyarehi ema víyarahaini Rey David. Téhesera te avasare Belén eta máuchusihayare, étaichuhi te mávasahi ema víyarahaini Rey David —nacahepa.

⁴⁴ Natiarihihivare ena apamuriana navarahaichucha náemeratacayarehi, váhisera napatsicavahini nacaratacahini.

Ena tuparairucana vahi náurica eta nasuapirohi ema Jesús ena achaneana

⁴⁵ Tacahe, ena suntaruana vanairucanahi tichavanapa nayehe ena tivane- canahi tuparairucanahi. Vahi náijaracavahini nacaratacahini éma. Tacahe, náichapa ena tuparairucana:

—¿Tájaha tacayema vahi iámapahini éma?

⁴⁶ Ena suntaruana najicapapa:

—Víti vahi vipatsicavahini vicaratacahini éma, taicha tétavicava eta máitupajijasirava ema maca. Émahipuca ema Cristo vicuchapaquenehi. Nájina mácuti eta máechajisira ema maca achane —nacahepa.

⁴⁷ Tacahe, ena fariséoana náichapa:

—¡Éti apanavare ísapavaipahi tivayuaracahe ema mácaro! ⁴⁸ Nájina émanaina ema tuparairuca viyehe viti nasuapahini ema máenatataji. Váhivare émanaripa vichamuri fariséo, vahi masuapahini. ⁴⁹ Énasera ena nani achane-tatajiana máimatirahanahi eta viyehe ley, náehicávanetatajipa. Táurica nacaicuñahini táicha —nacahepa.

⁵⁰ Matiarihihivare ema Nicodemo, ema tipaipiuchahi ema Jesús te jena yátiquenehi. Fariséohivare éma. Máichavacapa:

⁵¹ —Váiparinehi vétavicaimahi eta viyehe ley vítijiricavahini vicapacahini ema achane. Tacamuñuhi véchanumayarehi eta maviurevahí —macahepa.

⁵² Éna najicapapa:

—Vémeteaca píti apanavare pijaneanahipuca éma, pítirichupuca galiléovihi. Vivancaví péchajicuha eta Sagrada Escritura apaesa pecha vahi étaimahi te Galilea máuchusihayare ema profeta Cristo vicuchapaquene —nacahepa.

⁵³ Tacahe, te titapiricanapa eta náechajisihairahi ema Jesús, téjanerecanapa. Tiyanaracanapa te napenana.

8

Esu esena ticayepehi

¹ Ema Jesús májinarihpahi. Tiyanaripa te tachachacu eta avasare, te cerro ticijarehi Olivoquiji. Tatarihihi eta avasarechicha ticijarehi Betania, eta máitecapihahi éma. ² Te apanavarepa sache, te tijararahichichapa, tiyanavarepa éma tayehe eta Templo. Téjacapa éma, tímiturecapa. Namutu ena achaneana tiyananahi napaucha, nasamararacayarehi éma. ³ Tacahe, sutarihihi esu esena ticayepehipuca, esu suvehahi ema apana achane. Ena escribánoana énapa ena fariséona, eta náimereuchirahi ésu, námapa te mamirahu ema Jesús te namurihi ena achaneana. ⁴ Tacahe, náichapa ema Jesús:

—Tata maestro, esu suca esena nachimaracahi ticayepehi, suvehahi ema apana achane. ⁵ Eta viyehe ley máijararuahivi ema víyarahaini Moisés, tímitucavahivi vicapacayarehi eta vitupisisirayare te márijahiana nácani ticapecaturanahi. ¿Tájahapuca picayema piti? —nacahepa.

⁶ Éna nayaseserecahi ema Jesús, taicha natanucahi eta tiviuchayarehi éma. Émasera ema Jesús tétipaicapa tiájupairicapa te apaquehe te mavauqui.

⁷ Énasera tímiyanavanarichucha nayaserecahi. Tacahe, máesenimurihapa. Máichavacapa:

—Te etiarihipuca éti mapecaturareanahi, enerejicava ínapuca eyuca esu suca esena —máichavacapa.

⁸ Tacahe, tétipaicavarepa tiájupairicavarepa éma. ⁹ Eta nasamirahi eta juca, téchavanarichuhinéni eta napecaturana. Titsirihacavanapa. Tásiha, timutse-rahavanapa tiúchuchujicana. Nativapa tiúchucanahi ena ichavicapanana.

¹⁰ Te máesenicavarepa ema Jesús, nájinarihpahi éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájinapa apanainahini ena navaraha ticapacaviana?

¹¹ Tásiha, ésu suíchapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu —máichapa.

Ema Jesús, ema namicahu ena achaneana

¹² Te táequenepa eta juca, tépanavavarepa tímitureca ema Jesús. Máichavacapa ena achaneana:

—Nútira numicauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, étapa timícauchavacahi. Tásiba, nacatichainapa eta timapicu, vaipa na-pauchaimahi —máichavacapa.

¹³ Tásiba, ena fariséoana natarihipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

¹⁴ Ema Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihi nutuparahaichuhi eta nímeresiravayare. Nímatihivare eta nucaijuheyare. Étisera vahi ímatihini távihapuca eta násinehi, váhivare ímati eta nucaijuheyare. ¹⁵ Éti étachucha éhicahi eta nayeherepiana nanacueneana ena iáchucanaveanaini. Étasera tíchahehi eta épuruiranuhi. Nútisera vahi népuruhéimahi éti. ¹⁶ Jéhevareséra, te jácani sácheyare, népuruhepapuca táichavenehi eta emasuapirahi, tatupiruvayarehi eta népuruiraheya taicha vahi nácarichuimahi népuruhe núti. Matiarihi ema Tata tivanecanuhi. Ema apana máimahahi eta emasuapajiraivahi. Tépuruheyarehivare éma. ¹⁷ Te eyeherepi éti, te natarihipuca apinana ena titametacarahan, te ticutacanahi eta náechajiriruva, tisuapacareanayarehi éna. ¹⁸ Ene nucahehi núti. Yátupihi eta numetarapiana. Émapa ema Ticachichanuhi, éma titametacahehi eta yátupirahi eta numetarapiana —máichavacapa.

¹⁹ Énasera nayaserecavarepa:

—¿Távihasica mávhahi ema ticachichavihi?

Ema Jesús majicapavarepa:

—Éti vahi ímatinu. Váhivare ímatimahi ema Ticachichanu. Te ímatinuhini, ímatipahivareini ema Ticachichanu —máichavacapa.

²⁰ Eta juca eta máechajiriruvanahi ema Jesús eta máimituresirahi tayehe eta Templo. Eta máejasinehi te tachacaya eta nanasirareana eta námvahuana. Nájinaserá napatsicavahini nacaratacrahini taicha vuíchaha másapavacaimahi ema Viya eta nacaratasirainahini éma.

Ema Jesús tímereuchavapa eta émairahi Cristo

²¹ Ema Jesús tiápechavavare mametacavaca:

—Puiti tiánehipa eta nuyanirayare. Éti etanucanuinapa. Váhisera íchimavnuimahi. Émepenainapa eta epecaturana. Tímicuñacaheyare te infierno taicha vahi ecamapuravahini eta nutiarihirahi, esuapanuhini. Taicha vahi ítujicavaimahi ítecapa te návhaya núti —macahepa.

²² Tásiba, ena tictorianacanahi náichacacapa:

—Mavarahainapuca ticapacavayare. Táitusiava macahehi eta máechajiri-ruvahi eta váhiji viratahaimahi véhica éma. ¿Távihapuca eta macaijuheya? —nacahepa.

²³ Ema Jesús máichavarepa:

—Éti tayehehi eta apaquehe. Nútisera tayehenuhi te anuquehe. Eta iávasahi éti te apaquehe iávihahi. Núti návasaichuhi te anuquehe. ²⁴ Eta tacahe, numetacahenumahi eta tanasinapa eta epecaturana te épenapa. Taicha te

vahi esuapanuhini eta nútiquenérahi ema ecuchapaquenehi, tanasiyare eta epecaturana te épena —máichavacapa.

²⁵ Tacahe, nayaserecapa éna:

—Piti pímijachava mavaneruhi ema Viya. ¿Nájahavisica pítinavaji?

Ema máichavarepa:

—¿Áyahepapuca numetacahe? ²⁶ ¡Tétavicavahi eta tamuracavahi eta esamureana! Tavaraha muraca eta nucajachirahey. Vuúchahasera nicha. Émasera ema tivanecanuhi, tatupiruvahi eta máechajiriruvana. Eta tacahe, eta néchajiriruvana núti eyehe eti achaneana, étarichuhi eta nusamaque-neanahi mayehe —macahepa.

²⁷ Énasera váhiquene nácaicutiarahini eta mamasiravacahi eta mayehe ema Maiya. ²⁸ Tásicha, máichavarepa:

—Jéhevaresera te ecatupihanupa te anuquehe, tapaenumavainapa ímatinuyare eta nútiquenerahi ema Cristo ecuchapaquenehi. Ecaicutiarayareva yátupihi nímitucae eta máimiturapiana ema Tata. Vahi étaina nuviyahini te nuchuti nútijiriruvainahini. ²⁹ Puíticha, ema Tata ticachanenuhi, vahi majunijiacañuhini, váhivare nácarichuhini taicha nítachaipahisera núti eta mavarahaqueneanahi éma —máichavacapa éna.

³⁰ Eta nasamirahi ena achaneana eta mame tarapianahi, ichaperinehi eta nasuapirahi ema Jesús ena camuriqueneana achaneana.

Tímaticareana ena mavanarana ema Viya énapa ena tavanarana eta pecatu

³¹ Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratacava eta esuapirahi eta nímiturapiana, éti yátupiquenehe nímiturehehi. ³² Tásicha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

³³ Nararihihisera ena ticanarajiricanahi éma. Náichapa:

—Viti mámariequenehávini ema viáchucaini Abraham. Tájina vímatiyahini eta vítaresirahi nacavanarahavihini. ¿Tájaha tacayema eta picache hi vaipa vanaracahavimahi? —nacahepa.

³⁴ Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuanahu éna. Nacutihu ena vanaracana taicha tétavicava eta tavayuasiravacahi. ³⁵⁻³⁶ Ímijachavaipahi machichahehi ema Viya. Váhisera tacahehini, taicha tavayuaruhehi eta pecatu. Nútisera nuti Machicha ema Viya nuratahahi nucuchucuhahe. Vaipa vanaracahémahi. Vaipa tivayuacahémahi eta pecatu. Jéhesare, yátupina eta machichaheraya, máichecuaraqureyare éta. ³⁷ Néchahivare núti eta mámariequenehérahi ema viáchucaini Abraham. Epanerechaichuchasera ecapacanu, taicha ecatichahi eta nímiturapihanahi. ³⁸ Núti néchajisihahi eta máimechaquenéuanahi ema Tata. Étisera étachucha íchahi eta mavanairipianarichuhi ema ticachichahe —macahepa.

³⁹ Éna najicapapa:

—Viti machichaequeneánaichaha ema viáchucaini Abraham —nacahepa.

Ema Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macaematanerasirahi ema Viya. ⁴⁰ Esapihahi éti, epanerechaichucha ecapacanu. Ema Abraham, vahi tácahehini eta mapanereruhi éma. Núti numetacahehi eta yátupiqueneana mapanereruana ema Viya. Váhisera esuapanuimahisami. ⁴¹ Éti ícharichucha eta máichaqueneasahi ema ticachichahe —máichavacapa.

Ena najicapavarepa:

—Víti vahi apáchichahávina. Émanaichu ema ticachichahavi, ema Viya —nacahepa.

42 Ema Jesús majicapavarepa:

—Te yátupinahini machichahenahini ema Viya, etupiruvaipahini émunacanu. Taicha núti étaquenehi násicha me Viya. Vahi nútijiriruvainahini eta nítresirahi puiti. Nuvanecasivahi mayehe. **43** ¿Tájaha tacayema vahi árataha ecaicutiara eta nímiturapiana? Étaserapuca eta emavarairahi esama. **44** Nútisera nímicaecherachinaheyare ema ticachichahe. Émara ema Váinaraji. Ema téchahehi, taicha evarahahi íchayare eta máichaqueneana éma. Taicha éma, ticapahi eta máitaresirahi te tépanavainapa. Váhiqene mávarahahini máehicahini eta yátupiqueneana. Étachucha máurica tivayuarereca. Tépiyahirahipaipa. Máurihayapara eta máimahi. Éma, náiyahi ena tépiyahirahiana. **45** Eta echichairahi ema maca tépiyahirahi, váhiqenehíni esuapa eta juca nímiturapiana yátupiqueneana. **46** Éti, ímijachanupuca jararihi eta néjecapiravahi. Nutupiruvahinenisera eta numetasirahehi eta yátupiqueneana. ¿Tájaha tacayema vahi esuapanu? **47** Taicha nácani mayeheanahi ema Viya, náuricayarehi nasamararaca eta máechajiruvana ema Viya. Étisera vahi machichahénahini ema Viya. Eta tacahe, vahi iúricahini esamararacahini eta máechajiruvana numetaruheanahi —máich avacapa.

Te májinaichahahi ema Abraham, manasiqueneripahi ema Cristo

48 Tacahe, ena tictorianacanahi náichavarepa:

—Piti achane picachequenetatajichucha. Yátupiquenehi mávaháruvihi ema Váinaraji. Táitusiava, máurishivihi máicha —nacahepa.

49 Ema Jesús majicapavarepa:

—Vahi máurishinuinhini. Eta juca nucaematanerasirahi ema Tata, nucunachayare éma. Étisera épuruñichucha. **50** Núti vahi nucunachavaimahi. Matiarihisera ema ticunachanuhi. Éma téchahavihi, te núticipuca nécupicavahi eyehe, téhesera étihipuca. **51** Nutupiruva numetacahe: Nácani tisuapanayare eta numetarapiana, máepenacacanayare éna —máichavacapa.

52 Najicapavarepa ena tictorianacanahi:

—Jéhevare puiti, vímatiacavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picachechajiruvavare eta nácani tisuapanayare eta pimetarapiana máepenacacanayarehi. **53** Pivarahapapuca picachuricayare ema viáchuaini Abraham, apanasica ema tépenahi, énapa ena profetanaini. ¿Nájahavisica pití pivayuyuacavapa? —nacahepa.

54 Ema Jesús majicapavarepa:

—Tájina nucunachacarémahi, te nútijiricavaríchuchapuca nucunachavahi. Mararihisera ema Tata ticunachanuhi, ema ímijachaquenehi ema ecasiña éti. **55** Éti ímijachavahi ímati éma. Váhinéni ímatihini. Jéhevare núti nímatihí éma. Téhesera numetacahehini eta numaimatirahi, népiyahirahiripapucaini nácutiherípahíni éti. Étasera yátupiquenehi eta nímatirahi éma, nusuapahivare eta mavanairipiana. **56** Ema víyarahaini Abraham ema iáchucaini, tétabicavahi eta máurisamurevahi eta máimatiranuhi núti —máichavacapa.

57 Tacahe, ena tictorianacanahi náichapa:

—¡Vuíchaha pácyehé cincuenta áñoina! ¡Picaemuñavapa pímati ema víyarahaini Abraham!

58 Ema Jesús majicapavare:

—Nutupiruva numetacahe: Májinaichahahi ema Abraham, nunasiquene-ripahi núti —máichavacapa.

⁵⁹ Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchucapasera éma eta te Templo. Tiyanapa tiyumu-rucavapa.

9

Ema Jesús macanaraca ema achane máimiuchurehi eta mapuchuquiva

¹ Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahí. ² Eta véhisirapahi ema Jesús viti máimitureana, viyaserecapa éma:

—Tata maestro, ¿tájahapuca tiviuchahí ema maca eta mapuchuquivahí te tiúchucaínapa? ¿Énapuca tiviuchanahí ena ticachichana, téhesera mapecaturai-chuhipuca éma? —vicahepa.

³ Tacahe, tijicapahavipa:

—Váhinéni étina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Viya, mavaraírahi nímerecayarehi puiti eta máitupajijiasiravahí ema Tata. ⁴ Núti apanava nucamapurayare eta sache níchirayare eta máematanerepiana ema Tata eta mavanesiranuhi taicha járajapavare eta yati nájina ticaematanena.

⁵ Ticamapuravacarerichaha eta nutiarihirahí te juca apaquehe nuti namicahuhi ena achaneana —macahepa.

⁶ Tásiha, tiátutuicapa te apaquehe ema Jesús. Máepiyacapa eta tiúrajichicha te matutute. Mayajihauquichapa ema púchuqui. ⁷ Tásiha, máichapa:

—Piyana picasipauquipana tayehe eta noque ticaijare Siloé —máichapa. (Te véchajiruva, eta Siloé ticaijare Vanairuca.)

Tacahe, ema púchuqui tiyanapa ticasipauquipanahí. Tíjahúchava tímairirica. Tichavapa te mapena. ⁸ Náraminehi ichape ena machacayapenananahí énapa ena tímationahí eta mapuchuquivainihi. Tásiha, nacahepa:

—Vímatihi ema émana limosneroí púchuquihi. Émasera ema maca achane tímairiricahi. ¿Apanapuca éma? —nacahepa.

⁹ Najicapapa ena tímationahí yátupi:

—Émara ema maca.

Ema apana, macahevare:

—Vahi émaina. Mavasichucha.

Émasera ema achane púchuquiníhi máichavacapa:

—Nútira núti púchuquinuinihi —macahepa.

¹⁰ Tásiha, nayaserecapa ema achane:

—¿Tájaha pícharacavahí eta pímaririsirahí? —náichapa.

¹¹ Éma majicapapa:

—Ema maena achane ticaijare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahí, nímiriricarínehi —máichavacapa.

¹² Éna náichapa:

—¿Táviha ema mácará achane?

Éma majicapapa:

—Jéhepuca, vahi nécha.

Ena tuparairucana navaraha náechea eta manarasirahí ema púchuquiníhi

¹³⁻¹⁴ Tacahe, nasamairiricapa ena fariséoana eta manarasirahí ema púchuquiníhi. Tásiha, nacavanairipipá náepana ema púchuquiníhi, taicha

natanucahi éna eta tiviuchayarehi ema Jesús. Ichaperinehi eta nacatianasirahi éma táichavenehi eta máipuresirahi te jena sache sávarumuhuquenehi. ¹⁵ Te títecápapa ema púchuquinihi, nacatupihapa éma te namirahu. Nayaserecapa tájahahipuca táicharacavahi eta máimairirisiraipahi. Éma, máichavacapa:

—Ema achane típuchanuhi tiyajihauquichanuhi eta mâtuture. Tásicha, nucasipauquipa. Nímairiricapa —macahepa.

¹⁶ Nararihi ena nacahepa:

—¡Ema mácará achane vahi machaneraina ema Viya, taicha vahi mapicauchahini eta sávarumuhuana tacapicahuquene!

Ena apamuriana, ánívare nacahe:

—Váiparinehisera máituruequenehaimahi maicha eta tiáramicareana te yátupinahini macapecaturarahihíni —nacahepa.

Tacahe, apanapanenejiana eta napaneruana.

¹⁷ Tásicha, nápechavare nayasereca ema achane:

—¿Tájaha picayema píti mayehe ema achane ticaimairiricavihi?

Éma, máichavacapa:

—Núti németeaca émahi ema profeta.

¹⁸ Énasera ena tuparairucana váhiquene nasuapahini eta émairahi ema púchuquini. Tásicha, náimichuhapa ena ticachichanahi. ¹⁹ Nayaserecapa:

—Vivaraha viyaserecahe: ¿Yátupihi eta máimiuchurehi eta mapuchuquiva ema pichicha? ¿Tájaha táichararacavahi eta máimairirisirahi puiti?

²⁰ Ena ticachichanahi najicapapa:

—Yátupi ema maca ema vichicha. Máimiuchurehivare eta mapuchuquivainihi. ²¹ Váhisera véchahini tájahapuca táicharacavahi eta máimairirisirahi. Váhivare vecha nájahapuca ticaimairiricahi. Émaina eyasereca. Ajairaripa éma. Émapa téchinavahi eta mametasiraheyare —náichapa.

²² Tacahehi eta najicapirahi taicha tipicanahi éna nacaicuñahini, nacaquijihivaréni te nárujisirarevana taicha ena ticatianacanahi ema Jesús nacuchacapa eta vantu, nacavanaripirapa nacuija nasuapa ema Jesús émairahi ema Cristo. ²³ Eta tacahehi eta náichirahi: “Émaina eyasereca. Émapa téchinavahi”.

²⁴ Tacahe, ena tuparairucana nápechavare náicha ema achane púchuquini. Ánipa nacahepa:

—Pátupiruva pimetacahavi te máijarepuca ema Viya eta pinarasirahi. Vítisera vímatihi ema maena achane tisipecaturarahi —nacahepa.

²⁵ Éma majicapavarepa:

—Jéhepuca, vahi necha núti te tisipecaturarahihipuca éma. Tacarichu néchahi eta nupuchuquivainihi nuti, puítisera nímairiricaripa máicha —macahepa.

²⁶ Nápechavare nayasereca éna:

—¿Tájaha máicharacavahi eta macaimairirisiravihi?

²⁷ Majicapavarepa éma:

—Cápachi numetacaheripa. Vuíchahacaru esuapanu. ¿Evarahahipucaserá éhicayare éma étí apanavare? —máichavacapa.

²⁸ Tacahe, nacajachapa éma:

—¡Pítisera péhicaipahi éma! Vítisera véhicahi ema víyarahaini Moisés. ²⁹ Taicha véchahi eta máechajisihahi ema Viya ema Moisés. Émasera ema máenatataji, vahi vecha távihapuca másiha —nacahepa.

³⁰ Ema achane majicapavarepa:

—¡Tájina échaquenéna éti páureanasami! Vahi ímatiequeneha távihapuca másihahi ema ticaimairiricanuhi. ³¹ Váhipuca echa váiparinehi tisamacaremahi mayehe ema Viya mácani achane ticapecaturarahi. Nacarichu tisuapacareanahi nácani títauchanahi eta mavanairipianahi ema Viya. ³² Váhivare visamairirica nácani nacaimairiricahini ema mácani máimiuchurehi eta napachuquiva. ³³ Núti németeaca te tacuijahini eta vanairucairahi me Viya ema maena achane, váhiva macuratahahini maicha eta tiáramicareana máichaqueneanahi —máichavacapa.

³⁴ Tacahe, tisemanapa éna eta máichiravacahi. Nacahepa:

—¡Píti pétaviurequenehi eta picapecaturaivahi! ¡Éta tiviuchavihi! ¡Puiti pisapihapa pivarahaya pímitucahavi víti! —náichapa.

Tásicha, nacuchucapa éma.

Ena tépiyacavanahi púchuquiana taicha eta namasuapajiraivahi

³⁵ Ema Jesús masamairiricapa eta náqujisirahi ema máipuchaquenehi. Tásicha, te macainunavarepa, máichapa:

—¿Pisuapapuca píti ema Machicha ema Viya?

³⁶ Ema achane majicapapa:

—Pimetacanupaini, tata. ¿Nájahapuca ema Machicha ema Viya, apaesa nusuapahini? —macahepa.

³⁷ Ema Jesús majicapapa:

—Nútiripara nuti pímhahuquenehi, nuti péchajirunuhi.

³⁸ Tacahe, ema achane tépuyucapa te mamirahu ema Jesús. Tásicha, máichapa:

—Nusuapavi, Tata —macahepa.

³⁹ Ema Jesús máichavarepa:

—Núti tímitecanuhi te juca apaquehe, nímimatichayare ena máimatirahanahi eta yátupiqueneana máechajiruvanahi ema Viya, apaesa námatiequeneha. Eta juca tímicutijiricavahi nucaimairiricayarehi nácani púchuquianahi tayehe eta máechajiruvanahi ema Viya. Nácanisera tímijachavanahi téchemarahiana, nímahaya te najacapapuca eta nímiturapi, tísapavanayarepuca eta nucaimairirisiravacayare. Téhesera vahi nacuisapava, tiápajupanavainapa eta napachuquivayare. Étapa naviurevayarehi —macahepa.

⁴⁰ Tacahe, ena fariséoana natarihiqueneanahi te machacaya, eta nasamirahi, nayaserecapa:

—Píti pímjachahaviripapuca púchuquihavihi. ¡Váhira púchuquihavinahini! —nacahepa.

⁴¹ Ema Jesús majicapavacapa:

—¡Éti épiyacavahi púchuquihe! Taicha vahi evaraha esuapanuhini. Tásicha, tanasipa eta eviurevahi táichavenehi eta epecaturana. Te yátupinahipucaini esuapanuhini, tacuijahini taviuchahehini —máichavacapa.

10

Ema Jesús tímicaecherachava eta majaneasirayare ena téhicanahi éma

¹⁻² Tacahe, ema Jesús máechajisihahi eta tajaneacasiva eta uvesa, máimicu-tichirahi eta macatiuchirahi ena téhicanahi éma. Ánipa macahe:

—Nutupiruva numetacahe: Mácani tijanearecahi eta uvesa, tétabicavahi eta máechapajirisirayarehi. Te yátiana, máimisiapayarehi te tapena, tásicha, máeratacapa eta tapajacura eta majaneasirahi, apaesa tájina tacuquichiravaina. Taicha nararihi ena tiámerahiana, ticaetemarahianavare. Navarahahi ticayumuruquianayarehi eta nasiapirayarehi te tapena eta uvesa,

námechayarehi. ³ Émasera ema pástulero, te yáticarahi mavejiéquenehahi eta tapaja, máichuhahi eta táijareana eta uvesana. Eta máichuirahi, tiúchuchujica-napaipa táchicapaipa, taicha táimatiyahuchahai ema pástulero. ⁴ Éma, máinapumi-rauchapaipa eta mayeheana uvesa. Táehimurihapaipa tamutu eta uvesana, taicha táimatihi eta mahu. ⁵ Váiparinehiséra táchicaimahi mácani apanaquene achane. Tavarahayarehi tijunaracana taicha vahi táimatiyahuchahini ema apanaquene —máichapa ema Jesús.

⁶ Ema Jesús máimicutichinahi eta juca. Váhisera nácaicutiarahini éna eta máimitusiravacahi.

Ema Jesús ema yátupiquenehi tijaneacahavihi taicha máuriquenehi éma

⁷ Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahi eta tapena eta uvesa te tanarasirarehi éta. ⁸ Tínapumirauchuanuahí ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarahiana. Váhisera táchicaimahi eta uvesana taicha vahi táimatiyahuchahini éna. ⁹ Núti nujaneacavacahi ena nuchanerana, nucutihi eta tapena eta uvesa. Nácani ticasíñavana eta nuyehe, nucatiuchayarehi núti. Tájina náichavaimahi, tájinavare náechuriacaimahi. Néchavacahi núti.

¹⁰ Ema tiámerahí, tímitecahi éma tiámerecayare, ticaparecayare. Macaejane-repaicayareva. Nútisera tímitecanuhi níjaracayare eta náitaresiraya. Máitava-cacayare eta náuricacarevayare nícha. ¹¹ Énerichuvare núti yátupiquenehi eta nujaneasiravacahi ena nuchanerana, tacutihi eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi. ¹² Mácanisera tuparairucachucha, vahi macatiuchaimahi eta uvesa. Te máimahapa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticamapuravainapa tacapacayare eta uvesa. Eta tacaitiruana, téjanerepaciapa. ¹³ Ema maca achane tijunaya taicha vahi téñamavaimahi tayehé eta uvesa. Éma tímijachavahi majaneacavaca, étachuchasera macunehi eta mavacha.

¹⁴⁻¹⁵ Núti yátupiquenénu pastulérunu taicha tiúrihi eta nujaneasiravaca ena nuchanerana. Tímatinuhivare ema Tata, tacutihi eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímijararecavahi eta nítaresira náichavenehi éna. ¹⁶ Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanya-reva namutu. Étanayaréichupa eta náumuriva. Nucarinena núti néchavaca.

¹⁷ Ema Tata, yátupihi eta máemunasiranu taicha nímijararecahi eta nítaresira náichavenehi ena nuchanerana. Nuchavayaresera nítareca. ¹⁸ Nájinanéni napamicanuhini eta nísapiravaya ticapacanuana. Níjararuvhí núti eta nacapasiranuya. Taicha nutuparahaichuhí me Tata núti néchinavayarehi. Níjararuveyare. Tásiba, nuchavayareva nítareca —máichavacapa.

¹⁹ Eta nasamirahi ena achaneana eta juca máechajiruvanahí ema Jesús, típutsimuriavavacavarepa. ²⁰ Natarihihi ena ticatianacanahi. Nacahepa:

—¿Tájaha tacayema esuapa ema mara? Máurishi éma, mávahárupuca ema Váinaraji —nacahepa.

²¹ Énasera ena apamuriana, ánivare nacahe:

—Te yátupinahini mávaháruinhí ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

Ena tuparairucana vahi návarahahini najacapa ema Jesús

²² Te jena sácheinahí diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo. ²³ Ema Jesús matiarihihi te tajuhe eta te Templo te tayehe eta alar máepiyaruhi ema Reyni Salomón. ²⁴ Te náimahapa ena tictianacana, nachayacapa ema Jesús. Tásicha, náichapa:

—¿Tájaha tacayema pímpañererechahavihi? Pátupiruvapa pimetacahavi te yátupivihipuca pítiquenehi Cristo —náichapa.

²⁵ Ema Jesús majicapavacapa:

—Cápachi numetacaheripahi. Vuíchahacaru esuapanu. Eta juca níchaque-neanahí ímahaqueneanahí tásichaqueneanahí me Tata, étaripara tímereuchanuhi. ²⁶ Étisera váhiquene esuapanu. Taicha vahi étinahíni nuyehennehahini uvesa. ²⁷ Eta nuyehheana uvesa tímatahuchuanuanahí éta. Núti apanavare nímativacahivare. Eta tacahe, téhicanuanahí. ²⁸ Níjaracavacaya-resera núti eta náitaresirayare máichecuaraquireyare. Váhiquene náimahahini eta náicuñayaréni. Nájinavare tiverejicanuanaimahi ena nujanearuanahí. ²⁹ Taicha máijararunuanahí ema Tata. Éma, nájina ticachuriacainahini. Nájinavare tiratahaimahi tiverejicaimahi ena majanearuanahí. ³⁰ Taicha núti émapa ema Tata vicuticacahi eta vítpajijiasiravavacahi —máichavacapa.

³¹ Tacahe, ena tictianacana natanucapa eta márijahiana. Navarahapa natupisicayarehini ema Jesús. ³² Máichavacapasera éna:

—Ichapemurihi eta níchirahi eta táuriqueneana ímahaqueneanahí, máijarruanahí ema Tata. ¿Étaserapuca tiviuchanuhi eta evarairahi etupisicanu te márijahi?

³³ Tacahe, najicapavarepa:

—Vahi étaparacaina eta píchirapuca jácani táuriqueneanahí. Eta tiviuchavíhi pímjachiravahi machichavi ema Viya. Pítirichuhi vicutiquenehi achane. ¡Pítisera pímjachavaipahi Víyavi! —nacahepa.

³⁴ Ema Jesús majicapavarepa:

—Eta ajureca te Salmo, vahi ímatiequenehahini eta taechajisiahherahi eta macayemaquenehi ema Viya: “Víyarehi nícha eti nunerejiruheanahí”. ³⁵ Véchahi eta tacayemaquenehi eta ajureca, vahi tépiyahirahimahi. Taicha tamutu eta taechajiriruvana eta Sagrada Escritura taechajisihairahí eta juca máechajiriruvanahí ema Viya. Nácani nacatuparahahí me Viya, éma tímijarechavacahi “Víyanahí”. ³⁶ Nútipa puiti, nuvetijipa nímjarechacare “Viya” taicha émarichu ema Viya tinerejicanuhi, tivanecanuhi eta núcupaisiraya te juca apaquehe. ³⁷⁻³⁸ Núti nítaucharahi eta mavanairipiana ema Tata tivanecanuhi. Tásicha, tatuparacahé esuapanuvaneyarehi. Tayanapane vahi tisuapacarehi eta nímiturapiana eta eyehe, étapaseraini esuapahini eta tiáramicareana níchaqueneanahí. Étara tímereuchanuhi eta mávahásiranuhi ema Tata, návahásirahivare núti apanava éma —máichavacapa.

³⁹ Tacahe, tiápechavanavarepa navaraha nacaratacayarehini ema Jesús, napresuchayarehini. Émasera tiúchucavanepa.

⁴⁰ Tásicha, tiyanavarepa ema Jesús te tinapaica te apachara eta cajacure Jordán. Manasipanapa eta te avasarechicha Betábara te máicachasirisinehini ema Juan. ⁴¹ Camuriana ena achaneana tiyanaracanahí eta mayehe. Tásicha, nacahepa éna:

—Ema víyarahaini Juan, tayanapanehi tájina máimerecahini eta tiáramicareana, yátupihisera eta profetairahi éma, taicha tamutupa eta mametarapiana mayehe ema maca Jesús, vímaharipa puiti eta yátupiqueneanahí —nacahepa.

42 Tacahe, ánaqui camurianahi ena achaneana tisuapanahi ema Jesús, téhicanahivare.

11

Eta máepenira ema Lázaro

1 Matiarihi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návasahivare ena maparapenaveana, esu María ésupa esu Marta. Te jena sácheana, ticajumahi muraca ema achane. **2** (Esu suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchutimaca.) **3** Tacahe, ena náni apinana esenana ticaparapecacana náimivanerecapa, nametapanayarehi ema Jesús eta macajumairahi muraca ema Lázaro. **4** Te máechapa ema Jesús, macahepa:

—Eta juca jumare, vahi titaimahi ema Lázaro. Matuparahaichusera me Viya, mavarairahi nímereca eta máitupajijiasirava éma, nímeresirayareva eta nítupajijiasiravahi nuti Machicha, apaesa nacunachahavi ena achaneana —macahepa.

5 Jéhesare, ema Jesús yátupihi eta máemunasirahi ema Lázaro, énapa ena esenana maparapenaveana. **6** Váhisera mayanavanehini máimahapanahíni ema máemunacasare. Manasirichaha apinahi sache. **7** Tásicha, te apanapa sache, ema Jesús máichahavipa viti máimitureana:

—Viyana vichava te Judea.

8 Viti vijicapapa:

—Tata maestro, cáperichaha ena ticticianacavianahi navarahahi ticapacaviana. Tásicha, puiti pivarahaichaha piyanayare ánaqui nayehe —víchapa.

9 Ema Jesús máechajisihahi eta mavanecasivahi. Máichahavipa:

—Vahi taeñamavácarehini. Yátupi eta sache ticayeho doce hora. Te vipaica te sáchemuhu, vahi vicáyutetuímahi taicha vímairiricahi tayehe eta tijarahi.

10 Nácanisera tipaicanahi te yátimuhu, ticayuteterejianayarehi taicha vahi náimairiricahini. Ema Tata tijaneacanuhi núti taicha nítauchahi tamutu eta mavarahaqueneana. Vahi másapahini jácani náichanuhini; tapaenumava máimaha tiuri —macahepa.

11 Tacahe, te taequenepa, macahevarepa:

—Ema vémunacasare Lázaro máenahi tímacahi. Nuyanayaresera nucajamipanayare.

12 Viti víchapa:

—Tata, te tímacahipuca éma, étapa táicutiarahi eta mativarareraya —víchapa ema.

13-14 Viti vímijachaichucha yátupihi tímaca. Tásicha, ema Jesús matupirupa timetacahavahihi:

—Tépenaipa ema Lázaro. **15** Núrisamuresera eta májinanuirahi eta ánaqui. Tiúripanaya eta eyehe taicha ímahaya eta níchaqueneyare apaesa esuapanu. Puiti viyanaya vímahapanayare —macahepa.

16 Tacahe, ema vichamuri Tomás máichahavipa viti machamuriana:

—Viyana viti apanavare. Te nacapacapuca éma, nacapacahavirineva viti apanava —máichahavipa ema Tomás. (Tatiarihivare eta máchucarapi Chame.)

Ema Jesús, ema téchahi eta macaechepusirayare ena náepenaqueneana, máimichavayare macaitareca

17-18 Tiuri, viyanapa vicaijuhe eta avasarechicha Betania. (Eta Betania tachacayahi eta Jerusalén, apina kilómetro y medio eta tayerehivahi.) Tásicha, te viánehipaipa, timetacahavianapa cuátroripa sache eta náecarairahi

ema Lázaroini. ¹⁹ Camurianahichahasera ena achaneana te napena ena maparapenaveana, esu Marta ésupa esu María. Nacamitisiripanahi apaesa vahi nacuiyaharacavaicha ena apinana. ²⁰ Tacahe, te suéchapa esu Marta eta máitecapirayarehi ema Jesús, tiyanapa suácapahi. Ésusera esu María sunasirichuhi te tajuhe eta peti. ²¹ Te suéchajicapa esu Marta ema Jesús, sumetacapa eta máepenirahi ema suparapeini. Tásicha, suíchapa:

—Tátachicha, te pitarihinahini eta ani, vahi ñicuepenahini eñi nuparapeini. ²² Váhisera néñamava. Nucasiñavihi eta piyehe. Pímahainepea píti eta pícharacaya eta piyaseasirayare eñi Viya —suíchapa.

²³ Ema Jesús majicapapa:

—Tiuri eta péñamirahi ema piparape. Váhisera picupica. Tichavayare titareca te pimirahu —máichapa.

²⁴ Esu Marta suíchavarepa:

—Yátupi, Tata, néchahi eta ñichavirayare titareca te táitecapapa eta sácheyare náechepusiraya ena náepenaqueneana —sucalhepa.

²⁵ Ema Jesús máichavarepa:

—Jéhevare núti, nucaitarerahi nácani nucaeche pureanaya. Táitusiava numetacavi: Nácani tisuapanuanayare, tayanapanepuca náepena, nucaitarecayaresera núti. ²⁶ Ene ecaheyare éti éhicanuanahi, tayanapanepuca épenayare, nútisera nucaitarecaheyare. Tásicha, tájinapa tímiapechaimahi épenahini. ¿Pisuapanupuca eta níchiravíhi? —máichapa.

²⁷ Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa piti vicuchapaquenévihi píteruyarehi te juca apaquehe —suíchapa.

Ema Jesús tíyaha te tachacaya eta máecari ema Lázaro

²⁸ Te titapiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajaicapa, ani tacahehi eta suíchirahi:

—Eñi Maestro ñirarihi eta ani. Ñicavanairipi piyanayaréji —suíchapa.

²⁹ Te susamapa esu María eta matiarihirahi ema Jesús, téchepurucavanepa. Tiyanavarepa suácapahi. ³⁰ Taicha ema Jesús vuíchaha máitecapahini te napena. Manasirichuhi eta te suácapinehi esu Marta. ³¹ Eta náimairahi ena suchimarana eta suéchepusirahi súchusirahi esu María, tiyananapa náehiequenéhahi. Náimijachahi éna tiyanayarehi ésu te máecari ema suparapeini, tíyahanayarehi.

³² Tacahe, te suítecapauchapa ema Jesús, esu María sutupirupa tépuyucahi te máivapechacaya. Tásicha, suíchapa:

—Tátachicha, te pitarihinahini eta ani vahi ñicuepenahini eñi nuparapeini —suíchapa.

³³⁻³⁵ Tásicha, tíyahapa esu María, énapa ena téhicanapahi ésu. Eta máimairahi ema Jesús eta náiyairahi, ticatisamurevavarepa éma apanavare. Tíyahavarepa. Tásicha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, pímaha.

³⁶ Tacahe, ena natarihiqueneana eta náimairahi eta máiyairahi ema Jesús, téchajicacanapa:

—Piáha. Tíyahavaréra éma apanava. Tétavicavahipucáji eta máemunasirahi —nacahepa.

³⁷ Ena apamuriana, ánívare nacahe:

—Ema maca ticaimairiricahi ema púchuqui. ¿Tájahapuca vahi macanara-cahini ema Lázaroinisami, apaesa vahi macuepenahini? —nacahepa.

Eta máechepusira ema Lázaro te máecari

³⁸ Tacahe, ichape eta macatisamurevairahi ema Jesús. Mapauchapa eta ecari nasecajueruhi te mari. Tatarihivare eta márime tajihajacahi eta tapajacura eta ecari. ³⁹ Tacahe, ema Jesús mavanecavacapa:

—Ecaerajica eta jara tachujiji eta máecari.

Ésusera esu Marta suíchapa:

—Tata, németeaca tijecheripa jácani taicha cuátrorípahi sache eta ñépenirahi —sucuhepa.

⁴⁰ Ema Jesús máichavarepa:

—Cápachi numetacavipa, te pisuapanu yátupina, pímahayare eta macunacha-carevahí ema Viya taicha nímerecaya eta tamutuirahí marataha —máichapa.

⁴¹ Tacahe, nacaerajicapa eta márime. Tásiha, ema Jesús maeßenicapa te anuma, tiyujaracanumapa:

—Tata, nuhasulupayachavi eta pisamiranuhi. ⁴² Váhiqene péñauchanu eta jácani nuyasearuviana. Puiti nuyaseacavi eta pítupajijiásirava, apaesa náimaha ena nani achaneana natarihiqüeneanahí, apaesa nacunachavi. Náechavare eta pítirahí pivanecanu —macahepa éma.

⁴³ Te titapiricapa eta mayujarasirahi, máimaranaracapa eta ecari. Tipiaracapa muraca, ánipa macahe:

—Lázaro, péchepuca eta te jara piávhahi. Yare, piúchuca —máichapa.

⁴⁴ Tacahe, ema máepenaquenénihi tiúchucapa. Mámapaichuhí eta máyuru-hanahí étapa eta máepacamirahí. Tásiha, ema Jesús mavanecavacapa naveru-ruaca eta máyuruhanahí, apaesa tiyanayarepa te peti.

Ena tuparairucana napanerechapa nacaratacayarehi ema Jesús

(Mt 26.1-5; Mr 14.1-2; Lc 22.1-2)

⁴⁵ Tacahe, ena suchimaranahí esu María, eta náimairahi eta juca máichaqueñehí ema Jesús, camurianarinehi ena tisuapanahí éma.

⁴⁶ Natarihisera ena apamuriana tiyananapa nayehe ena fariséoana tictorianacahahi ema Jesús. Eta namaurisirahi eta juca, tiyanana nametapanavaca ena tuparairucana. ⁴⁷ Tacahe, ena tuparairucana náimichuhapa namutu ena juéseana, tucurujicacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétevicauhí eta máitupajijiásiravahí máichahí eta tiáramicareana. ⁴⁸ Vahi táuricahini vísapahini máimiyanañavahína máitarecahini, machu námuturiana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatarihiyare eta tíñepiyare. Tisemanaina-papuca. Nárajapainapapuca eta ani. Náquipaisinahavinapapuca eta viávasa. Nasapihainapapuca tiverejicahavianayare eta viávacureanahí —nacahepa.

⁴⁹ Matarihihi ema achane ticaijarehi Caifás. É mahi ema ichapequenéhi tiyujaracarahi te jena áñohi. Tacahe, máichavacapa éna:

—Éti vahi ímatiequeneha eta víchararacavayare. ⁵⁰ Németeaca núti tiúripana máepena ema émanaina achane mavachareca eta nátaresiraina namutu ena apamuriana achaneana —máichavacapa.

⁵¹ Eta juca máechajiriruvahí ema Caifás, váhinéni étainahini táichahini eta máechemaraivahíni éma. Étahi eta émairahi ema ichapequenéhi tiyujaracarahi te jena áñohi. Manacasamureruichuhí ema Viya eta máechajisiyahí eta máepenirayare ema Jesús náichavene ena israelítana. ⁵² Étasera juca máepenirayarehi ema Jesús, mavacharecainapa eta naviurevahí namutu

nácani machaneranayarehi ema Viya te apanapanenequeneana avasareana. Vahi táchacarichuhini eta naviurevana ena israelítana. Taicha te taequenénapa, mavarahahi macurujimurihayarehi, étamurianayarehi namutu éna.

⁵³ Tacahe, tacutipa eta napanereruhi ena tuparairucana eta nacapasi-rayare ema Jesús. ⁵⁴ Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticaijare Efraín. Manasipanapa ánaqui, vítipa viti máimitureana.

⁵⁵ Tacahe, semanayare eta Pascua, vipestara viti israelítana. Namutu ena achaneana tiávihana te apanana avasareana tiyanaracanapa tayehé eta Jerusalén. Tisipahacavanayarehi taicha náimijachahi ani tacahehi tacuija nacuquichiravaina eta náimeresiravayare me Viya. ⁵⁶ Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? —nacahepa.

⁵⁷ Énaripa ena tuparairucana tivanerecanapa ena ticuneanayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacayarepa.

12

Esu María susipapevacha ema Jesús te perfumeama (Mt 26.6-13; Mr 14.3-9)

¹ Séisirinehi sache eta piéstayarehi eta Pascua. Tichavavarepa ema Jesús tayehé eta avasarechicha Betania, mávasahi ema Lázaro, ema macaeche-purehi te máecari. Tacahe, ena máemunacasareana tiúrisamureanarinehi eta náimairahi eta máitecapirahi ema Jesús eta nayehe. ² Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi. ³ Tacahe, esu María suámapaipa eta táijiyequene perfumeama te bótechicha. (Te navírate etá juca perfumeama te nasucure ticaijare nardo.) Tétavicavahi eta tasivachavahi. Ticutiamacacahí te botella eta tasiamavahi. Tacahe, suépusapevachapa ema Jesús, suájapevachapa te suchutimaca. Enevanerine tainicajuecha etá peti etá táijiyevali. ⁴ Matiarihihi ema vichamuri Júlasi. Ema maca émarichu tíjararecayarehi ema Jesús. Témechajicavapa éma:

⁵ —¿Tájaha tacayema váhivaréyapa tacaijararecasihini etá juca tasivach-quenehi perfumeama? Vivehahini etá camuriquene plata, tásiha, vímicata-sihahini ena páureana —macahepa.

⁶ Ema maca Júlasi, vahi étainahini etá majapanuirainahini ena páureana. Étachuchanéni mavarairahi mayumuruca etá plata, taicha ema tiámerahihi. Títecápa émarichuhivare tiúnarecarahi etá plata. ⁷ Tacahe, ema Jesús máichapa:

—Pésamirica esu suca esena. Suíchachaha ésu etá suvarahaquene taicha nícumunuichuhi etá juca tayeheyarehi etá nécari. ⁸ Ena páureana, tamutuchucha sácheana etá ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi etá eyehe —macahepa.

Ema Lázaro, navarahavare nacapaca

⁹ Tacahe, camuriana ena tisamairiricanahi eta matiarihirahi ema Jesús te Betania. Tiyananapa náimahapanayarehi. Énerichuvare náimahapanaya-rehiva ema Lázaro, ema máechepurehi te máecari. ¹⁰ Tacahe, ena tuparai-rucana napanerechavarepa nacapacayarehi ema Lázaro. ¹¹ Taicha émavenehi tíchahi eta nasuapiraipahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

*Títecapapa ema Jesús te Jerusalén
(Mt 21.1-11; Mr 11.1-11; Lc 19.28-40)*

¹² Te apanapa sache, ena nani achaneana táimiyanaqueñeanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare. ¹³ Tiúrisamureanarinehi. Eta náurisamurevahi, nave-hapa eta tajuru eta cáchipaca. Tiyananapa nácapahi éma. Eta napiarasirapahi, ánipa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihi me Viya! ¡Ichape eta vicunachiravi piti! ¡Viva ema Viáquenu! ¡Viva! —nacahepa.

¹⁴ Ema Jesús ticaperapahi eta burricu eta masiapiroahí, taicha ene tacahehi eta táchajiriruvahi eta Sagrada Escritura: ¹⁵ “Eti ecavasanahi te Jerusalén, vaipa ecupica, taicha márajapa ema eyeheyare Rey. Tímaticareyarehi éma, ticaperayare eta burricuchicha. Mámapahi eta iúritaresirayare” tacahehi eta Sagrada Escritura.

¹⁶ Eta juca ajureca eta vimacaicutiaraquenehi viti máimitureana. Tapaenu-mava te máechepecupa ema Jesús, vicaicutiarahi eta tacayemahi eta Sagrada Escritura, táchajisihairahi éma, étapa eta tamutu eta apamuriana máichara-racavanahi.

¹⁷ Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te máecari, náechajisihaipahi éna eta náimaha-quenehi. ¹⁸ Eta tacahe, camuriqueneanahi ena achaneana tiyananahi nácapahi éma, taicha navarahahí náimati ema tíchahi eta tiáramicare. ¹⁹ Tásicha, eta náimairahi ena fariséoana eta camurianairahi ena tiápanahí, náichacacapa:

—¡Váhichara víturucaimahi taicha téavicavahi eta nasimutuvahi ena téhicanahi éma!

Ena apavasaqueneana navarahavare náimati ema Jesús

²⁰ Natiarihvare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi.

²¹ Tiyananapa napauchahi ema vichamuri Felipe. Ánipa tacahe eta nayase-sirahi:

—Tata, víti apanava vivaraha vímati ema Jesús —nacahepa.

²² Tacahe, ema Felipe tiyanapa mametacahi ema Andrés. Tásicha, ena apinana tiyananapa nametapanahí ema Jesús. ²³ Tásicha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe.

²⁴ Nutupiruva numetacahe: Te vahi vicuevaca eta evaraqui te apauehe, vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, téavicavaya eta táchajpasiraya. ²⁵ Nácani téñamavanahí eta náitaresira, tiávamirahuana eta náehisiranu, énajivayare ticamitiequenehavanayare eta náitaresira. Nácani tíjaracavanayare eta náehisiranuyare, tájinavare vahi náeñamavahini eta náitaresira te juca apauehe, tiúchucuhanayare éna. Máihecuaraqureyare eta náitaresirayare. ²⁶ Énerichuvare nácani

tivarahanayare ticaemataneacanuana, tacamunu tímerecavanayare yátupi eta náehisiranuhi. Tásicha, núti nucaejacavacayare éna te néjasihayare núti. Ena nani, tétavicavayare eta macunachirayare ema Tata.

Ema Jesús tímereuchava eta máepeniraya

²⁷ Ema Jesús táimipanererecahi eta máepenirayare. Ánipa macahehi eta máechajiruvahi:

—Tiánnehinapa eta népeniraya. ¡Ichape eta nupisirahi! ¿Tiúripuca tuyaseaca ema Tata macatiuchanuini apaesa vahi nucucatajivaini? ¡Váhiqene tuyaseacaimahi, taicha núti tímitecanuhi te juca apaquehe eta népeninavacaya ena achaneana!

²⁸ Tacahe, macahevarepa:

—Tata, pímereca eta pítupajijiásirava apaesa nacunachavi ena achaneana —macahepa.

Tásicha, tíjahúchavapa nasamahi eta mahu ema Viya te anuma. Ánipa macahe:

—Nímerecaripa eta nítupajijiásiravahi. Jéhesare, nápechavayareva nímerecayare —macahepa.

²⁹ Tacahe, ena achaneana natiajiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásicha, ena apamuriana, ángelepuca éma téchajicahi nacahevare.

³⁰ Ema Jesús máichavacapa:

—Vahi nútivenéna eta juca esamaquenehi. Ema Tata tímisamahehi, mavarairahi esuapayare. ³¹ Achichu juca sácheinayare, ticapacanuanainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasíñavanahi nuyehe. Téquecavanainapa eta nuyehe ena machaneranainihi ema Váinaraji. ³² Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énajivainapa tipauchuanuanaya téhicanuanainapa —máichavacapa.

³³ Eta juca máichiravacahi ema Jesús, mavarahahi nacaicutiarayarehi eta táichararacavayarehi eta máepenira. ³⁴ Tacahe, ena achaneana tisamararacanahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímjichaipahi pítiripa ema Cristo, piti Manerejiruvihi ema Viya. Víti visamahi eta Sagrada Escritura te náechajicuha máichecuaraqureyarehi eta máitaresiraya ema Cristo. Vahi vicaicutiarahini —náichapa.

³⁵ Ema Jesús máichavacapa:

—Ecemapurava esamararacanu mapurare nutiarihichaha eta eyehe. Numicauchahechaha taicha ániperine eta juca ímairanuyare apaesa vahi ecucayutete tayehe eta timapicu. Taicha nácani tájinahi náechaquenénahi, ticayutetuanayare. ³⁶ Esuapanu eta juca numicauchaherichaha apaesa ímiturecaya éti apanava, iámayare eta juca tajarahiquene —máichapa.

Te titapiricapa ema Jesús eta máichiravacahi, tiyanapa majunijimurihapa. Vaipa máimerecavahini eta nayehe.

Tétavicava eta namuracasamurevanahi ena ticavasanahi te Jerusalén

³⁷ Ichapemurihi eta náimairahi ena ticavasanahi te Jerusalén eta tiáramicareana máichaqueneanahi ema Jesús, váhiqenesera nasuapahini éna.

³⁸⁻³⁹ Étahisera tacahehi titauchavayarehi eta májuchaqueneanahi te ajureca ema profetaini Isaías tayehe eta tamuracavahi eta namasuapirayare. Ani

tacahehi eta táechajiruvahi: “Tata Viáquenu, nájina ticaicutiaranaina eta péchajiruvanahí vímiturapianahí víti. Píti pímerecaripahi eta pítupajijiasi-ravahi, váhiquenesera nasuapavihini”.

Énerichuvare ani tacahehi eta májuchaqueneanahí ema Isaías: ⁴⁰ “Ema Viya, eta máimairahi eta namuracasamurevanahí, másapahi tiápajucava eta namasuapajirairavahí, tímicutijiricavahí púchuquiana éna. Váhiquene tétpurisamurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májuchaquenehi ema víyarahaini Isaías. ⁴¹ (Ema profetaini Isaías, tiáramecahi eta máimairahi te mavapure eta táetavisiraya eta majaraiva ema Cristo, étapa eta masantuvali eta te máejasihahi.)

⁴² Nararihihisera ena aquenucarahaná tinerejicavanaripahi ena tisuapanahí. Váhisera návarahahini náimerecavahini eta náehisirahi, napisirahi nacaquijihini eta te návacureana. ⁴³ Taicha étachucha náuricahi eta nacunachacarevahí nayehe ena nachamuriana, ena fariséona. Tasapihaichucha náepuruhi eta nacunachacarevayarehini me Viya.

Tímicuñarahi te vahi visuapa eta máechajiruvana ema Jesús

⁴⁴ Ema Jesús tijaranupa eta máechajisiravacahi ena achaneana. Máichavacapa:

—Nácani navarahahí tisuapanuana, tímaticareanaripa eta nasuapirohivare ema Tata, ema tivanecanuhi. ⁴⁵ Tacutiquene nácani tímaticareanaripa eta námiturapianahí, náimatipahivare eta mapanereruana ema Tata. ⁴⁶ Taicha nútí yátupiquenénuhi eta numicauchiravacahi ena téhicanuanahí te juca apaquehe. Váipasera tavehaimahi eta timapicu. ⁴⁷⁻⁴⁸ Tacutiquene nútí, vahi étainera támitecanuhini te juca apaquehe eta nícuñacahehini eti achaneana. Eta támitecanuhí, nucuchucuhaheyarehi. Nácanisera nasamairiricaripahinénipuca eta néchajiruvana, váhisera nasuapanuhini, nasapiha tépurunuana, muracayarehi eta náicuñayare. Eta náepuruirahi eta néchajiruvana, étaripa tiviuchavacainapa te jena sácheyare nacayaseserehipa te mamirahu ema Viya. ⁴⁹ Taicha vahi nútijiruvainahini eta nímituresirahi. Ema Tata tivanecanuhi, éma tijaranacanuhi eta nímiturapianayarehi. ⁵⁰ Eta tacahe, numetacahehi puiti tamutu eta numetacasivanahí. Vahi nuhapapicaimahi, taicha nímatihi tacaitarecayarehi nácani tisuapanahí eta máimiturapianahí ema Tata — macahepa.

13

Ema Jesús, masipapevachavacapa ena máimitureana

¹ Tiuri, te jena sácheinahí tamirahupaipahi eta Pascua, ema Jesús máecharipa táitecapauchayarepa eta majunijisirayarehi eta juca apaquehe. Tiyanayarepa mayehe ema Maiya. Tétavicavahí eta máemunasirahavihi viti máimitureana. ²⁻⁴ Jéhesare ema Júlasi, máimipanerecharipa ema Váinaraji eta máijararesirayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta másinehi. Émarichuhi ema Maiya tijaranacahí eta tamutuirayarehi máiteturuequeneha. Tacahe, te jena yati, eta máenisirahavihi viti máimitureana, téchepucapa ema Jesús. Tivejamuhiacavapa eta mamuiriha. Tiáyuruñequchavapa te mayehe paño.

⁵ Tásicha, majucuhapa eta une te bañadora. Tépanavapa tisipapevachahavíhi eta vívapeana viti máimitureana. Mavehavarepa eta paño, tiájapevachahavípa.

⁶ Tásicha, te macapayacapa ema Pedro, éma vahi másapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini nútí —macahepa.

⁷ Tásicha, ema Jesús majicapapa:

—Páuresamivihi pítí. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

⁸ Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

⁹ Tacache, ema Pedro máichapa:

—Tata, vahi tácharichuimahi pisipaca eta nívapeana. Énerichuvare eta nüvahuana étapa juca nuchuti.

¹⁰ Tásicha, máichavarepa ema Jesús:

—Nácani nacaviravahi vahi táchamesaimahi tiápechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

¹¹ Ema Jesús máichahavihi eta juca vahi vámutuhini vipachihahini taicha máimatihi ema tíjararecayarehi.

¹² Te titavapa eta masipapevachirahavihi, ticamuirihavarepa eta mamuirihia. Tásicha, téjacapa te mesa. Máichahavipa:

—¿Ímatiequenehapuca éti eta juca níchirahéhi? ¹³ Eti ímijarechanu “Tata Maestro”. Étupicahisera, taicha yátupiquenénuhi eta numaestruvahi. ¹⁴ Eta níchirahéhi nútí emaestro nusipapevachirahéhi, ene ecaheyare éti eta ítare-siraya. Esipapevachacacayare eta ívapeana. ¹⁵ Éhicayare eta juca níchaquenehi. Étayareichu eta nímitusirahehi. ¹⁶ Nutupiruva numetacahe: Ema musu vahi macachuricaimahi ema máquenu. Émaripa ema vanairucahi vähivare macachuricaimahi ema tivanecahi. ¹⁷ Te yátupina ecaravahuinapa eta juca nímiturapiana, tájina íchiravaimahi. Ecunachacareyareva eta ítauchiraya tamutu.

¹⁸ Néchahinéni nútí vahi ámutuhini esuapanu. Nímatihehivare eti yátupiqueneana nunerejiruanahi. Títauchavayarehisera eta táchajiriruvahi eta Sagrada Escritura, ani tacahéhi: “Ema néniruasahi, masapihahi tictadianacanuhi”. ¹⁹ Puiti nucaínapucava numetacahe apaesa te táchavapá eta juca numetarapi, ímatinuínapa nuti yátupiquenénuhi Cristo. ²⁰ Nutupiruva numetacahe: Nácani tijacapaheanayare éti nuvaneruana, ticaecheranahi eta najacapiranuhi nútí apana. Énerichuvare, najacapahivare ema Tata Nucaíya quene.

Ema Jesús máechajishiha eta máijararesirayare ema Júlasi

(Mt 26.20-25; Mr 14.17-21; Lc 22.21-23)

²¹ Te titapiricapa eta máichirahavihi ema Jesús, téñamavaipa te masamure eta máijararesirayarehi ema émana vichamurihi. Tacache, matupiruvapa máichahavihi:

—Nutupiruva numetacahe: Mararihi ani te etaracu ema tíjararecanuyare —macahepa.

²² Tacache, viáramecarinehi eta máichirahavihi. Véseniuiquijiricacapa. Vahi vímatihini nájahahipuca ema máichaquenehi. ²³ Nutiarihisera nuti nachamuri máemunarupananuhi ema Jesús. Nucachacayahi éma eta véjasirahi te mesa.

²⁴ Tacache, ema Pedro tiúmatsiuquichanupa nuyaserecahini nájahahipuca ema máichaquenehi ema Jesús. ²⁵ Tásicha, nútí nujajaicapa ema Jesús:

—Tata, ¿nájahasica ema píchahi?

²⁶ Tásicha, tijicapanupa:

—Nuyuvetumecaya eta pan, néchipaejicaya. Ema níjararuyare, émara ema tíjararecanuyare —macahepa.

Tacahe, máechipaejicapa eta pan, máijaracapa ema Júlasi. ²⁷ Jéhesaréinehi, ema Váinaraji enevanepa mávahácahi éma. Tásicha, ema Jesús máichavanepa:

—Júlasi, eta juca pipanereruhi, táitauchavavanepa puítinaichu —máichapa.

²⁸ Váhisera vácaicutiarahini eta juca máichirahi ema Jesús ema Júlasi.

²⁹ Vímijachahichucha eta mavacharesirayarehivare eta tinicacare tayehereyare eta piesta, mácajihivarepuccaini ena páureana, taicha émahi técha eta tarera máunasirarehi eta plata eta matesorerovalhi. ³⁰ Te titanesipa ema Júlasi eta manisirahi eta pan, tiyanapa tiúchucahi. Tijunijicahavipa te jena yátiquenehi.

Ema Jesús macavanairipipa eta vémunasiracacayare

³¹ Eta máuchusiraipa ema Júlasi eta viyehe, ema Jesús máichahavipa:

—Títecapapa puiti eta táitauchiravayare ímahainapa éti eta máitupajijiasirava ema Viya étapa eta nítupajijiasiravayare núti Manerejirunuhi éma. Éti ecunachahavinapa. ³² Nímerocainapa eta máitupajijiasiravahi ema Tata, ema apava máimerecayareva eta nítupajijiasiravahi nuti Machicha. Puiti juca sácheinayare títauchavainapa. ³³ Nuchichanaveana, ánipirine eta juca ecachaneranuyare. Tásicha, nuyanainapa. Éti, etanucanuinapa; vuíchahasera ítujicavaimahi ecipayacanu. Étarichuhi eta numetarapihi nayehe ena ticatianacanuana eta níchiravacahi vahi titujicavanaimahi ticipayacanuana. ³⁴ Puiti nunaquicayare eta juca arairu nuvanairipi eta eyehe. Émunacacayarehi ena echamuriana. Ecuitinuyarehi eta némunasiráhehi núti. Ene ecaheyare éti apanavare. ³⁵ Te yátupina émunacaca, eta tímaticaheanayare ena achaneana étirahi eti nímitureanahi —máichahavipa.

Ema Jesús máimereucha ema Pedro eta máepiyasiravaya vahi máimati ema Jesús

(Mt 26.31-35; Mr 14.27-31; Lc 22.31-34)

³⁶ Tásicha, ema Pedro mayaserecapa:

—Tata Maestro, ¿távihainapa picaijuheya?

Ema Jesús majicapavarepa:

—Eta nucaijuheya puiti, éti vuíchaha ítujicavaimahi éhicanu. Ecapayacanuyaresera. Váhivare ánasimahi éti. Vuíchahasera tíjhúchavaimahi —máichapa.

³⁷ Ema Pedro majicapavarepa:

—¿Tájaha tacuichavaini vahi nucuratahahini néhicavi, Tata? Núti níjaracava népena píchavenénahi píti —máichapa.

³⁸ Tacahe, ema Jesús máichapa:

—Píti, pímijachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táchajisiraya eta varayu te tijararahi, píti mapahayare pépiyacavayare vahi pímatinu, eta picatiuchiravarehi píti —máichapa.

14

Ema Jesús, jéhevare éma téhicacare eta vítecapiraya me Viya

¹ Vahi ecueñamava éti. Ácasiñava eta me Viya; ácasiñavavare eta nuyehe.

² Taicha ánaqui te mávasa ema Tata, camuri eta tiáviravacare iávihayare éti, taicha ícuchihi éti. Tacahe, tatuparacahi nuyanayare nétupiricayare

eta iávihayare. ³ Te táuripa eta iávihayare, nútijapainavarepa nuchavainapa népanahénapa apaesa ácachanenu éti tayehe eta návihayare núti. ⁴ Eti ímatiripa eta nucaijuheya. Ímatipahivare eta achene nuyanihayare.

⁵ Tásicha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

⁶ Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarrerahi, nájina apanaina ácasíñaimahi eta ítecapirayare me Tata. ⁷ Eta ímatiranuipa núti, ímatiripahivare ema Tata, taicha ímahanuripa puiti eta juca nucachanérahehi —macahepa.

⁸ Ema Felipe máichapa:

—Tata, pímechahavipaini ema Viya apaesa viúrisamurepaini eta vímatirahnini.

⁹ Ema Jesús majicapavarepa:

—Ánaquiaripa eta picachaneranuhi, piti Felipe, vuíchahacaruvare pímatinu. Eti ímahanuripahi, ímatinuipavare yátupihi. Tímicutijiricavaipahi émainahini ímararacahini ema Tata. ¿Tájaha tacayema pivarahaichahavare nímechavi ema Tata? ¹⁰ ¿Váhipuca pisuapanuhi eta mávahásiranuhi ema Tata, tásicha, étapa eta návahásirahivare núti apanava? Eta juca nucayemaqueaneanahí, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahí. ¹¹ Esuapanu eta návahásirahí núti ema Tata, étapa eta mávahásiranuhivare éma. Te vuíchahapuca esuapanuhini eta numetarapi, étavanerécainaséra esuapa eta tiáramicareanahí níchaqueneanahí. ¹² Nutupiruva numetacahe: Nuyanainapa eta me Tata. Eta tacahe, éti yátupi eta esuapiranuhi, nítsivahé éti. Níjaracahe eta eratahairaya ecuchuca eta tiáramicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tiápajupanavayare eta tacunachacareva tayehe eta tiáramicareana íchaqueneanayare. ¹³⁻¹⁴ Núti níjaracaheyareva tamutu jácani eyasearunuanayare te níjare, taicha nuvaraha ichape eta ecunachirayare ema Tata.

Ema Jesús macametarapi eta mácupaisiraya ema Espíritu Santo

¹⁵ Eta esuapiranuhi tímereuchaheya eta yátupirahi eta émunasiranuhi.

¹⁶ Tásicha, núti nuyaseacainapa ema Tata máevataca ema Espíritu Santo. Éma, tímicatacaheyare, ticurisamurechaheyareva. Yátupiquenevare eta mávahásiraheyare eta ítaresirayare. Vahi tínajiacahémahi. ¹⁷ Éma, tímítucaheyare, máitametacayare tamutu eta yátupiqueneanahí tásichaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacapahini éma. Eta namaratahairahi náimaha éma, náimijachahi vahi máimaticarehíni éma. Étisera ímatiyare éma, taicha máitavacacayare eta mávahásiraheyare. ¹⁸ Núti, váhivare nujunijiacadahémahi. Nuchavayare eyehe, ecachanenuyareva. ¹⁹ Puiti juca sácheanayare, ena achaneana vaipa tímahanuanaimahi. Étisera ímahanuparacaya, taicha nuchavayarehi nítareca. Éti apanavare ítarecayareva nícha núti. ²⁰ Te nuchavapa nítareca, échavainapa éti eta mávahásiranuhi ema Tata, échavainavarepa eta návahásirahevare núti, éti apana iávahácanuhivare. ²¹ Nácani náimatiyare eta nuvanairipiana, náitauchayareva, éta tímicaecherachayare eta yátupihi eta náemunasiranuhi. Tásicha, ichapeyare eta namunavayare me Tata táichavenénahi eta

náemunasiranuhi. Núti apanavare ichapeyareva eta némunasiravacayare. Tásicha, nímerecavayareva nayehe —macahepa.

22 Ema Tadeo máichapa:

—¿Táicharacavayare, Tata, eta vicarichuirayare pímerecava eta viyehe; tásicha, ena apamuriana achaneana, vaipa tímahavianaimahi? —macahepa.

23 Tacahe, ema Jesús majicapapa:

—Nácani témunacanuanayare, nasuapayare eta nuvanairipianahi. Tásicha, ema Tata, tétevavayarehi eta máemunasiravacaya. Tásicha, vítijapainapa viávahácavacayare éna. **24** Nácanisera vahi témunacanuanaaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásichaquenenahini te nuchuti. Tásichaquenehi me Tata, ema tivanecanuhi.

25 Nucamapurava numetacahe puiti taicha ániperine eta juca nucaheyare eta eyehe. **26** Émasera ema Espíritu Santo mavaneruyare ema Tata níchavenénahi núti, ema tímicatacaheyare, ticurisamurechaheyareva. Énerichu tímítucaheyare, témechaheyare tamutu eta juca numetarapiana eyehe.

27 Puiti nucametavaya eta eyehe. Nuvarahasera tacuijahini íchiravai-nahini, ecanarasiraina eta epanereruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica. **28** Puiti numetacaheripa eta nuyanirayare; tásicha, étapa eta nuchavirayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe ema Tata, nápechavaya nucachane éma tayehe eta máetaviuchirahi eta majaraivahi étapa eta máitupajijiasirava. **29** Nucametarapivane eta juca, apaesa te ímaha táitauchavapa, esuapainapa yátupi.

30 Ánipirine puiti eta juca néchajirisiravahi eta eyehe taicha ávanepaipa títecapa ema Váinaraji eta mavarairahi tiáquipaicanuyare. Éma, yátupihi táquenuhi eta juca apaquehe. Váhiquenesera titahacanuimahi núti. **31** Nuvarahasera náimatiya ena achaneana eta némunasirahi yátupi ema Tata; tásicha, nítouchaparacahi tamutu eta mavanairipiana. Échepuca. Viyana viyejecava eta te juca —máichahavipa.

15

Eta táenaqui eta uva étapa eta tasimutuquene eta tatavavajiana

1 Núti nucutihi eta sucureca uva. Étiripa éti ecuti eta tatavana. Ema ticachichanu tímicutijiricavahi ema tijaneacahi eta sucureca. **2** Éma máechuca eta máhiriquerehi tatava. Máepachiacavare eta apana tatava eta ticahirisi apaesa tacahipana. **3** Eti epachihavacaipahi taicha eta nímiturapiana emetasivanahi. **4** Eta tacahe, ímyanavayare eta iúrujiasiranuyare taicha eta návahásirahehi núti, apaesa ácuti eta tatava ticahiriqui. Taicha te viyuvetuca eta tatava eta uva, vaipa ticahimahi. Ene ecahehi éti, te vahi ecuimyanava iúrujiacanu, tájina vaipa ecaemataneacanuimahi.

5 Nápechava nímicutichinahe puiti. Núti nucutihi eta táenaquihi. Éti tímicutijiricavahi nutavahehi. Te ímyanava iúrujiacanu, ichapemuriyarehi eta ecaematanearisanuya. Téhesera ácarichu éti, tájina eratahaquenémahi ícha. **6** Nácani tijunijiacaicanuanayare, ticutianayare te ticaechu eta tatava. Tiájiquiyarehi. Tásicha, nacurujicainapa, náijuchainapa te yucu.

7 Ímyanava yátupina eta iúrujiasiranu. Yátupinavare eta ítauchiraina eta nímiturapiana. Tásicha, te eyaseacanupuca jácani evarahaqueneanahi, núti

níjaracaheya. ⁸ Nuvaraha ímerecavaya eta táurivayare eta ecaemataneasiranu, apaesa tétavicavainapa eta macunachacarevaya ema Tata. Tásicha, ecaeheraipahi eta yátupirahi nímiturehe. ⁹ Ímiyanava eta iávahásiranu taicha tétavicavahi eta némunasirahehi tacuti eta máemunasiranuhi ema Tata. ¹⁰ Eta ímiyanirava ítauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítouchirahi núti eta mavanairipiana ema Tata, nímatipaipa eta máemunasiranuhi éma. ¹¹ Eta juca nímicutiarachirahi, nuvarahahi iápajuca eta iúrisamurevahi tásichaquenehi eta iávahásiranuhi núti. Ecutinuya eta núrisamurevahi. ¹² Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi núti. ¹³ Ena achaneana, te navarahahi náimerecaya eta náemunasirahí nácani náemunaruhanahi, natanucayarehi nájajaracasicha. Nácani tíjararecavanapuca eta náepenirahi énavenehi ena náemunacasareana, éna yátupihi náimereca eta náemunasirahí. Ene nucahehi núti, níjararecavayare eta nápeniraya íchavene eti némunacasareanahi. ¹⁴ Jéhevare, éti yátupiquenehi némunacasareanahi, eta ítauchirahi eta nuvanairipianahi. ¹⁵ Vahi vánaracahéna nuyehe, taicha ena vanaracanahi vahi náimatimahi eta mapanereruanahi ema náquenu. Étisera némunacasareanahi. Eta tacahe, numetacahe tamutu eta mapanereruanahí ema Tata. ¹⁶ Vahi étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epaisiraya eta ecametarairuirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimiyanava eta náehisiranuhi. Tásicha, ema Tata tíjaracaheyare tamutu eta eyasearuanayare te níjare. ¹⁷ Nuvaraha ítaucha eta juca nuvanairipiana. Yátupina émunacaca.

Ena achaneana ticatianacaheanayare tacutiyare eta nacatianasiranuhi núti

¹⁸ Puiti numetacahevare, te nacatianacahe ena achaneana, échavayare éti vahi étinahini nacatianaca. Núti nacatianacahi. ¹⁹ Taicha, te étainaichahini iávacuhahini eta tayeherepiana eta apaquehe, ena achaneana témunacaheanaripahini, tacutihini eta náemunajirisiracacahi éna. Étasera eta nunerejisirahehi te nataracu ena achaneana, étapa tiviuchahehi eta nacatianasirahehi taicha ínjajicaipa eta máeperajiquene tayehe eta apaquehe. ²⁰ Échavavare eta juca numetaruhehi: “Vahi másapihaimahi ticaemunacasi ema musu mayehe ema máquenuhi”. Núti ticatianacanuanahi; ene ecaheyarehi éti, eta nacatianasiraheyareva. Vahi nasuapahini eta nímiturapiana. Váhivare nasuapaimahi eta ímiturapiana éti apanava. ²¹ Eta éhisiranuhi núti, étaripa tiviuchaheyare tamutu eta juca nacatianasiraheinapa táchavenehi vahi náimatihini ema Tata tivanecanuhi.

²² Tacuijarichuhipucaini naviurevainahini éna, te vahi nucuitecahini eta nímitusiravacahíni. Tépurunuuanahiséra, náepuruuhivare eta nímiturapiana; tásicha, tétavicavahi eta naviurevanahi. ²³ Taicha nácani ticatichanuanahi núti, nacatianacahivare ema Tata. ²⁴ Énerichuvare tacuijahini taviuchavacahini te vahi nucuimerecahini eta tiáramicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étasera náimaharipahi, váhiquenesera nasuapahini. Nasapiha ticatianacanuanarichucha, nacatianacahivare ema Tata. ²⁵ Étasera tacaheyarehi eta táitauchiravayarehi eta táchajiriruvana eta Sagrada Escritura te Salmo, ani tacahehi: “Tájina taviuchanuhini eta nacatianasiranuhi”.

²⁶ Étisera, mararihiyare ema tímicatacaheyare, ticurisamurechaheyareva. Te nítecapauchayarepa ema Tata, nuyaseacaya mavaneca ema Espíritu

Santo. Éma, te máitecapapa, tímereuchaheyare eta yátupiqueneana. Tímerechanuyareva nútí eta eyehe. ²⁷ Éti apanavare ímereuchanuyareva taicha tiyereripahi eta ecachaneranuhi, tépanavapa te nunérejicahénapa.

16

¹ Núti numetacahe eta juca apaesa vahi ecuarami eta nacatianasirahe, vahivare ecuinajicava eta éhisiranuhi. ² Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tiúriyarehi eta náichirayare te mamirahu ema Viya. ³ Éna, náichayare eta juca táichavene eta namáimatirahi ema Tata, vahivare náimatinuhini nútí. ⁴ Numetacahe eta juca apaesa te táitecapapa eta íchavaqueneyava, vaipa ecuarameca. Échainapa eta numetasirahehi.

Ema Espíritu Santo tímicatacavahihi

⁵ Puiti tiánehinapa eta nuyaniraya nuchava eta me Tata. Eta nucacha-neirahehi, tictorianacanuanahi nútí ena achaneana. Puítisera eta májiniranuyare, tictorianacaheanainapa éti. Eta juca tacahehi, nupaenumava numetacahehi puiti. Étisera németeaca vuíchaha ecaicutiara eta numetarapi, taicha vahivare eyaserecanuhini eta nítametasirayare, étahinéni eta nucajuheyare. ⁶ Esapiha éti ecatisamurevahí taicha eta juca numetasirahehi eta nuyaniraya. ⁷ Tayanapane vahi eyaserecanuhini, nutupiruvasera numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títecaimahi ema nuvaneruya. Éma tiúrichaheyare, tímicatacavahihi, ticurisamurechaheyareva. ⁸ Énerichuvare ena achaneana te juca apaquehe, manacasamurechaya eta nacatuparahairahi náichayarehi eta táuriqeneana, náehicanuvare nútí. Manacasamurechavacayareva éna eta náimatiraina eta nasiceturaraivahi. Taicha te vahi nacuvaraha náinajica eta tamauriquevaneana, téhevare vahi nacuvaraha náehicanu nútí, ticaicuñanainapa te yucu. ⁹⁻¹⁰ Ema Espíritu Santo manacasamurechavacayare ena achaneana eta najacapacarevaya me Tata nácani ticasíñavanapuca eta nuyehe, taicha nuyanaya eta me Tata, néchajichavacayare éna. (Vaipa ímahanuimahi éti.) Nácanisera vahi nasuapanuhini nútí, tanasiquenehi eta napecaturanahi. ¹¹ Manacasamurechavacayareva ema Espíritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

¹² Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti. ¹³ Téhesera máitecapapa ema Espíritu Santo, éma tiámayarepahi eta yátupiqueneana numaimitureheanarichaha, émainapa tímítucaheyare. Taicha mamecasivahi eta máechajisiraheyare, énerichuvare timetacaheyareva eta íchavaquenévanayare. ¹⁴ Ichapenapa eta nucunachacarevayare máicha. Émainapa timetacaheyare eta nuvanairipianayarehi eyehe. ¹⁵ Taicha ema Tata tituparacanuhi eta nútirayarehi nécha tamutu. Eta tacape, eta juca mameparapianayare ema Espíritu Santo tásihqueneanayare nuyehe.

Vahi tánasimahi ecatisamurevaya. Tichavayare eta iúrisamurevaya

¹⁶ Ánipiyareichusera eta emaimairanuyare. Téhesera taequenénapa, iápechavainavarepa ímahanuyare. Taicha nuyanayarepa te mávihahi ema Tata.

¹⁷⁻¹⁸ Tacahe ena apamuriana nuchamuriana tiyaserecanuanapa:
—¿Tájahapuca tacayema eta juca mameparapihi, eta macahehi ánipirine eta vimaimairayare, tásihá, te taequenénapa viápechavainavarepa vímaha?

¿Tichavavanepuca eta mayanirayare eta me Maiya? ¿Váhipuca máñasimahi eta machaviraya? Váipavare vácaicutiara eta ánpirine eta macaheyare eta viyehe –nacahepa.

¹⁹ Ema Jesús macaicutiaravacahi eta navarairahi nayasereca. Máichavacapa:

—Núti numetacahehi eta ánpirine eta emaimairanuyare. Tásicha, te táequenénapa eta emaimairanuyare, iápechavainavarepa ímahanuya. Eta juca emacaicutiaraquenehi. ²⁰ Tásicha puiti, nutupiruva numetacahe eta íyahainasamipa éti, ejapanuvairayareva. Énasera ena apamuriana achaneana, tiúrisamureanainapa éna. Tásihasera te táequenénapa, vaipa íyahaimahi. Tétavicavasera eta iúrisamurevainapa eta táitsivaya. ²¹ Eta juca tímicutijiricavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahi, suémítisicainapa eta sucatiruhavainihi. Tiúrisamuréinapa eta suímairahi eta suchicha, tajurusirayarehi te juca apaquehe. ²² Ene ecaheya éti, ecatisamurehi puiti, ánpirichusera. Téhesera te viápechava vímahacacaya, tétavicava eta iúrisamurevaya. Nájinainavarepa tihapapicahémahi eta iúrisamureva.

²³ Te jena sácheyare, vahi nútimali eyaserecanu. Émasera ema Tata eyase-recayarehi. Éma, tíjaracaheyarehi tamutu jácani eyasearuanayare te njare.

²⁴ Puíticha tájinaichaha eyasearapinahini me Tata te njare. Ticamunucarehi eyaseacayare. Éma tíjaracahénapa. Étainapa ticurisamurerecaheyare ichape.

Numetacahe eta nucapaquechiravacayare ena nánaranayare

²⁵ Núti nímicutichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanerueruanahi ema Tata. ²⁶ Te jena sache, eyaseacainapa ema Tata te njare. Váipayare tacamunuimahi nuyaseuchahé et mayehe. ²⁷ Taicha émaripa ema Tata témunacahehi éti, táichavénehi eta émunasiranuhivare núti. Éti esuaparipa eta yátupirahi eta mavanesiranuhi ema Tata. Tíjaracahénavanepa eta eyasearuanayare. ²⁸ Núti, eta násihahi mayehe eta nítésirahi te juca apaquehe. Puítisera nujunijicainavarepa eta apaquehe, nuchavainavarepa mayehe ema Tata –máichahavipa.

²⁹ Tacahe, viti máimitureana víchapa:

—Jéhevare puiti pitupiruvapa eta péchajishahi. Vaipa pímicutiara-chinahávhíni. ³⁰ Vímativarepa eta yátupirahi pímatiequeneha tamutu. Jéhesare, pímatiequeneha tamutu eta vipaneruerana, étaripa eta juca vivarairahi viyaserecavyare. Visuaparipa puiti eta yátupiquenéravihi Machichavi ema Viya –víchapa.

³¹ Tacahe, ema Jesús máichahavipa:

—Jéhepuca eta esuapiranu puiti. ³² Puítisera juca yati, títecapainapa eta éjanerepáisirayare éti. Ejunijicanuinapa, nucarichuinapa núti. Matiarihi-yaresera ema Tata. Éma, ticachanenuyare. ³³ Numetacahevare tamutu eta juca apaesa vahi ecuarameca. Ácasíñava yátupina nuyehe apaesa tacuija ecuichiravaina, tayanapane ecatajivayare muraca te juca apaquehe. Ácasíñavahisera eta nuyehe, taicha núti máijararunuhi ema Tata eta nucapaquemurihairayare namutu ena nánaranahi –máichahavipa.

¹ Te titapiricapa ema Jesús eta máechajisirahavihi viti máimitureana, tépanavapa tiyujaracahi. Máesenicapa te anuma. Ánipa macahe:

—Tata Nucaiyaque, títecapauchanupa puiti eta táitauchiravayare eta pipaneruruana. Nuvarahasera nucunachacaréni eta piyehe, tacutini eta nucunachiravihi píti. ² Yátupihi eta píjarasiranuhi eta aquenucairanuyare, te namirahu namutu ena achaneana. Nucaitaresirayarehivare namutu ena píchuhaqueneanahi píjararunuuanahi. ³ Níjaracayare eta náitaresirayare máichecuaraqureyare ena píjararunuuanayare apaesa náimativi, piti Tata yátupiquenévihi Viya, nútipa núti Jesucristo, núti pivanerunuhi te juca apaquehe. ⁴ Núti nímerecahi ne achaneana eta picunachacarevahi. Nítuchaipahi tamutu eta pivanairipianahi pivarahaquenehi níchayarehi. ⁵ Puítisera nuchavainavarepa eta piyehe. Píjaracanuyare eta nuchavirayare te pijaraivahi. Néjacainavarepa te pivaure tayehe eta návinehi acane te tépanavainapa eta apaquehe.

⁶ Nítamuturucaripahi eta nímitusiravacahi ena píchuhaqueneanahi píjararunuuanahi píti. Nímimatichavacahivare eta piúrivali píti. Yátupihisera eta pichichanaveanahi éna, taicha nasuapahi eta nímiturapiana píjararunuuanahi nútia. ⁷ Náecharipahi tamutu eta juca nímiturapiana tásichaqueneanahi piyehe. ⁸ Náecharipahivare eta yátupiquenérahi eta pivanesiranuhi. Eta tacahe, natupiruvahi najacapa eta nímitusiravacahi eta péchajiriruvana.

⁹ Eta tacahe, puiti nuyaseacavi, Tata, eta pijaneasiravacaina ena píjararunuuanahi téhicanuanahi, taicha pichaneranahi éna. Vahi énaina nuyaseuchavaca ena masuapajirairahanahi te juca apaquehe. ¹⁰ Núti néchahi eta piyeheravacahi éna. Eta tacahe, néñamavahi eta nayehe, nuyeheanaipahi éna. Yátupihi eta náimatiranuhi eta pivanerunuhi, tásicha ticunachanuanahi ichape.

¹¹ Puiti núti nujunijicavacainapa ena píjararunuana. Énasera nanasiyarrechaha te juca apaquehe. Nútisera nútijapainapa eta piyehe. Tata Nucaiyaque, piti yátupiquenévihi eta pisantuvahi. Nuyaseacavi pijaneasina-nuvacachucha éna, apaesa náimiyanavahi eta náurujiasiracacaina, návahásiracayare nácutihini eta viávahásiracacahi víti. ¹² Núti nímimatichavivi píti eta nayehe, étapa eta píjare, apaesa yátupina eta náehisiravina. Ichapemurihi eta nujaneasiravacahi éna eta nucachaneravacaichaha. Eta tacahehi, vahi náinajicavahini eta náehisirahavihi. Émanarichu ema téjecapavahi, ema tijararecanuyare. Étasera tacaheyarehi eta táitauchiravayarehi eta Sagrada Escritura.

¹³ Puiti nútijapainapa, Tata, tayehe eta jara piávhahi. Eta nucachaneravacaichaha éna, numetacavacahi eta pipaneruruana, taicha nuvaraha vácoticacahini eta viúrisamurevaina. ¹⁴ Taicha ena achaneana te juca apaquehe, ichapemurihi eta nacatianasiravacahi táchavenéhi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticutinuanaripahi núti eta numaehisirahi eta tayeheana eta te juca apaquehe. ¹⁵ Vahi nuyaseacavi eta piviravacainahini te juca apaquehe. Nuyaseacavi núti eta picatiuchiravacainahini mayehe ema Váinaraji. ¹⁶ Taicha yátupihi éna vaipa tayeheanainahini eta juca apaquehe, ticutinuanaripa núti vahi tayehenuinahini eta juca apaquehe. ¹⁷ Píjaracavacahini eta náurivainahini eta piyehe, náitusirainahini cápachi eta péchajiriruvana yátupiqueneana. ¹⁸ Píti pivanecanuhi nímiturecayarehi eta péchajiriruvana nayehe ena achaneana te juca apaquehe. Tásicha, núti nuvanecavacayareva ena nímitureana, náimituca ena apamuriana achaneana. ¹⁹ Puiti, eta

néminasiravacahi éna, níjararecava nútì, nítouchayare eta pivarahaquenehi. Nuvaraha ene nácahehini éna, yátupinahini náijaracavahini eta nacaemataneasiravyarehi. Yátupinahivaréni nasuapa eta péchajiriruvana yátupiqueneana.

²⁰ Váhivaresera nacarichuhi éna nuyaseuchavacahi eta piyeho. Énerichu nuyaseuchavaca ena tisuapanayare eta táunavayare eta áñona, ena tijacapanayare eta péchajiriruvana. ²¹ Nuyaseacavivare vähini tacuitavahini eta náurujiasiracacayare éna. Píjaracahivaréni, Tata, te nasamureana eta návahásirahavinahini tacutihini eta viávahásiracacahí víti. Náurujiasirahavinavare víti, apaesa ena achaneana te juca apaquehe náimathini yátupina eta pivanesiranuhi.

²² Núti níjaracavacaipahi éna eta náitupajijiasiravacayarehi tamutuira-yarehi narataha. Vicutihi víti eta tamutuira virataha. Návahácacahini éna, vácutihini víti eta viávahásiracacahí. ²³ Píti piávahácanuhi nútì. Tásicha, nútì návahácavacahi éna apaesa yátupinahini éna étanainarichuyare eta napanereruana, apaesa ena apamuriana achaneana te juca apaquehe étainahini náimatiarainahini eta pivanesiranuhi, étape etá pémunasiravacahi ena nímitureana tacutihi etá pémunasirauhi nútì.

²⁴ Tata Nucaiyaquene, píti píjaracanuhi ena nani píchuhaqueneanahi. Nuyaseacavi puiti eta nucachaneravacainahini tayehe eta návhayare nútì. Náimahahini eta nujaraiva píjararunuhi taicha eta pémunasirauhi te tépanavainapa eta tacaepiyairahi eta apaquehe. ²⁵ Tata Nucaiyaquene, píti yátupiquenévihi eta pisantuvali. Ena achaneana te juca apaquehe vahi náimativihi. Nútisera nímativihi. ²⁶ Ena nani píjararunuuanahi nímmatichaviripahi. Tétavicavahi etá pémunasirauhi. Tásicha, nuvaraha yátupina nasamava etá tétaviuchirahi etá pémunasiravacahi taicha éna tiávahácanuanahi nútì.

18

*Títecapanapa ena ticaratacanaya ema Jesús
(Mt 26.47-56; Mr 14.43-50; Lc 22.47-53)*

¹ Te titapiricapa ema Jesús eta mayujarasirahi, tiyanapa tiámamurihahavipa te apachara eta tatavarapi ticaijare Cedrón. Ánaqui tatiarihi eta huerta ticaijare Getsemaní. Visiapapa tayehe. ² Tacache, ema Júlasi máimatihi eta juca viávirarehi taicha ichapemurihi eta vicachanerahi ema Jesús tayehe eta huerta. ³ Tacache, te jena yátiquenehi, títecapapa ema Júlasi. Mámamurihapaipahi ena oficialeana énapa ena camuriqueneanahi suntaruana romanoana, vanairucanahi éna nayehe ena tuparairucana, taicha napamicavacahi ena fariséoana. Ticamicahuanapaipahi. Ticaepuchiriquianapaipa, étape etá nayehe espada. ⁴ Émasera ema Jesús máecharipa etá nacaratasirayarehi. Tacache, mácapavacapa éna. Máichavacapa:

—¿Nájaha etánuca?

⁵ Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ema Júlasi mapauchapa, máetserarecpa. Tásicha, titupihachaha te machacaya. ⁶ Eta majicapirohi ema Jesús, máichirahi: “Nútira etánurepahi”, tiáquipamuriavanapa ena suntaruana te apaquehe. ⁷ Tásicha, mayaserecavarepa ema Jesús:

—¿Nájaha ema etánucapahi?

—Ema Jesús Nazareno —najicapavarepa.

⁸ Éma, máichavarepa:

—Cápachi numetacaheripahi nútihira etánurepahi. Te nútichucha etánuca-nupahi, ísapayare nayana ena nani —máichavacapa.

⁹ Étapaichuhi eta máechajiruvahi ema Jesús te tiyujaracaipa nájina émanainahini náemitiacahini te namuri ena máijararuuanahi ema Maiya. ¹⁰ Tacache, ema Pedro, tatiarihihi eta mayehe espada te mañahe. Mavehapa, máechuchacachapa eta machaca te vaure ema achane ticaijare Malco, mavanarahi ema aquenuca Caifás. ¹¹ Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitauchiravaya eta mavarahaquenehi ema Tata, taicha nutuparahaichuhi mayehe eta juca nucatajivairaya —macahepa.

Nacaratacapa ema Jesús, námapa te mamirahu ema corregidor

(Mt 26.57-58; Mr 14.53-54; Lc 22.54)

¹² Tacache, ena suntaruana émapa ema comandante nacaratacapa ema Jesús, náitijivauchapa. ¹³ Tiyananapa námapa te mapena ema Anás. Étarichu mapena ema Caifás, taicha ema maca Anás máimachucahi ema Caifás, émapasera tuparairucahi te jena áñohi máitsivaequenehi ema máimachuca. ¹⁴ Ema maca Caifás, émarichuvare ticaechajiruvahi eta máepenirainahini ema émana achane tivachachayarehi eta náitaresirana namutu ena achaneana.

Ema Pedro tépiyacavapa vahi máimati ema Jesús

(Mt 26.69-70; Mr 14.66-68; Lc 22.55-57)

¹⁵ Ema Pedro, nútipa nuti Juan viyanapa véhiequenehapaipa ema Jesús. Nusiapapa núti te tajuhe eta canchón mapenahi ema aquenuca Anás, taicha náimaticasarenuehi ena mavanarana. ¹⁶ Émasera ema Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ema Pedro. ¹⁷ Tásiha, esu suyaserecapa ema Pedro, ánipa suicha:

—¿Pítirichu jácani apanava ñímiture eñi ñica Jesús?

Ema Pedro majicapapa:

—Vahi nútina.

¹⁸ Tásiha, eta jena yátiquenehi táetaviuchahi eta tacasaraivahi. Ena mavanarana ema Anás, énapa ena suntaruana ticamururecanapa eta yucu, násasia-vayarehi. Eta náurujiasiraipahi eta yucu, titupihaipavare ema Pedro te nachacaya, másasiavahivare.

Ticayaseserehipa ema Jesús te mamirahu ema Anás

(Mt 26.59-66; Mr 14.55-64; Lc 22.66-71)

¹⁹ Tacache, ema Anás mayaserecapa ema Jesús áyananapuca ena téhicanahi éma, tájahahivarepuca eta máimiturapihi eta nayehe. ²⁰ Ema Jesús majicapapa, ánipa macahe:

—Núti vahi nuyumurucavahini eta nímituresirahi. Nímerecavahi te namuri namutu ena achaneana te viúrujisirarevana, étapa te Templo. Éta nímitur-resirareanahi. ²¹ ¿Tájaha tacayema piyaserecanu núti? Piyaserecapaini ena tisamararacanuanahi. Énaina nametacavi eta nímiturapianahi núti —macahepa.

²² Matiarihihi ema émana suntaru te machacaya. Eta masamirahi eta máechajiruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirohi ema aquenuca macapicahu-quenehi? —máichapa.

²³ Tacache, ema Jesús majicapapa:

—Váhira táíñemahihini eta nujicapirohi ema aquenuca eta taviuchanuhini. ¿Tájaha tacayema péhanu? —macahepa.

²⁴Tacahe, ema Anás máevatacapa mayehe ema Caifás, émarichuhi corregidor. Ticaitihapaipahi eta námirapahi éma.

*Ema Pedro tiápechavavare tépiyacava vahi máimati ema Jesús
(Mt 26.71-75; Mr 14.69-72; Lc 22.58-62)*

²⁵Tacahe, ema Pedro manasirichuhi titupihahi te tachacaya eta yucu, tiásacavahi éma. Nayaserecavarepa nápechahi:

—¿Pítirihu jácani máimiture ema maca achane? —náichapa.

Ema Pedro majicapapa:

—Vahi nútina —macahepa.

²⁶Tásiha, matiarihihivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicaratasinehi ema maca —máichapa.

²⁷Émasera ema Pedro macahevarepa:

—Váhiquene nímati éma —macahepa.

Tásiha, enurujipa téchajicanecha eta varayu.

*Ema Jesús námapa te mamirahu ema Pilato
(Mt 27.1-2, 11-14; Mr 15.1-5; Lc 23.1-5)*

²⁸Te jena yáticarahi, te tijararahipa, nacuchucapa ema Jesús te mapena ema Caifás. Námapa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasipa te aneca, namavarairahi náechipejicavahini eta nanisirayarehi eta cordero pascual te jena sache. ²⁹Tacahe, ema Pilato tiúchucapa, máechajimurihapa éna. Máichavacapa:

—¿Tájaha eta maviurevahí ema maca achane iámaquenepahi eta ani nuyehe? —macahepa ema Pilato.

³⁰Éna najicapapa:

—Jucarihi eta maviurevahí. Eta tacahe, viámapahi eta piyehe.

³¹Tásiha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyhererepichuhi eti israelítana —máichapa.

Éna najicapapa:

—Étasera víti, vaipa ísapahavihini vítaucha eta viyeherepi vímicapaca mácani taciuvirevahí, vitupisica te márijahi. Émasera ema maca vivaraha máepena. Vivaraha pémetatacaini te crusu —nacahepa.

³²Tacahehi eta táitauchiravapaipa tamutu eta máechajiriruvanapahi ema Jesús eta mápenirayarehi te crusu.

³³Tisiapavarepa ema Pilato te tajuhe. Máichuhapa ema Jesús. Tacahe, mayaserecaba:

—¿Yátupisareji réyvihi píti nayehe ena pijaneanana israelítana? —macahepa.

³⁴Ema Jesús máichapa:

—¿Pitupiruvahipuca eta juca píchiranuhi, pivarairahi pecha te yátupihipuca eta surreyvahí? ¿Pitanucahipucasera eta nuviurevayare, picutihipuca eta napanereruhi ena nujaneanana israelítana? —máichapa ema Jesús.

³⁵Ema Pilato majicapavarepa:

—Vahi nímati eta epanereruana eti israelítana. Énarichuhi ena pijaneanana ena tuparairucana, éna tiámavianapahí eta ani nuyehe. ¿Tájaha eta piviurevahí eta nayehe? —máichapa.

³⁶ Tásicha, ema Jesús majicapavarepa:

—Jéhesare, jararihi eta návacurehi; vahisera étina te juca apaquehe. Te étainahini te juca apaquehe eta návacurehi, téhacacauchanuanaripahini ena nímitureanahi, vahivare nacucaratacanuhini ena tictianacanuanahí. Taicha yátupiquenehi eta návacurehi, vahi étina te juca apaquehe —macahepa.

³⁷ Tacahe, ema Pilato mápechavarepa mayasereca:

—Tacahe, ¿yátupihi eta pirreyvahí? —máichapa.

Ema Jesús majicapapa:

—Yátupi réynuhi núti. Eta núcupaisirahi, núchucahi te juca apaquehe, nímiturecayarehi eta yátupiqueneana. Nácani tisuapajirahianayare, nasamararcayare eta yátupiqueneana —macahepa.

³⁸ Tacahe, ema Pilato macahevarepa:

—¿Píti pímjachava pímati eta yátupiqueneana? Núti, németeaca nájina narataha náimatinahí eta yátupiqueneana —macahepa.

Ema Pilato macavanairipipa náetataca ema Jesús te crusu

(Mt 27.15-31; Mr 15.6-20; Lc 23.13-25)

³⁹ Te tamutupa eta mayaseresirahi, tiúchucavarepa ema Pilato. Máechajimurihana ena tictianacanahí ema Jesús:

—Tájina maviurevaina ema maca achane eta nímairahi núti. Étisera jucarihi eta eyeherepi te Páschuamuhuana eta nucaitisirayare ema émana presu. ¿Evarahapuca nucaitica ema eyehe Rey, iáquenumuri eti israelítana? —máichavacapa éna.

⁴⁰ Énasera tipiararecanapa eta najicapirohi:

—¡Vahi vivaraha picaitica ema maca! ¡Émaina picaitica ema Barrabás! —nacahepa.

Ema Barrabás táemerataruhi eta máetaviuchirahi eta mámeraivahi.

19

¹ Tacahe, ema Pilato macavanairipipa náestaca ema Jesús. ² Tásicha, ena suntaruana navehana eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuriachavarepa eta muíriare mularume. ³ Tásicha, nachayacapa éma, nacavayuemarajipa nacaecahijiricapa. Ánipa nacahe:

—Tata, ¡pítitataji nayehevihi Rey ena israelítana! —nacahepa.

Náehamirahavare te mamira.

⁴ Ema Pilato tiápechavarepa tiúchucahi. Tásicha, máichavacapa ena achaneana:

—Nímereca te emirahu ema maca achane. Nuvarahasera ácaicutiaraini eta tamajinairahi maviurevainahini eta nímairahi núti —máichavacapa.

⁵ Tacahe, nacuchucapa ema Jesús, mámapaipa eta itapepi te machuti, majarapihi náepiyaruhi éna, étapa eta namuriaruhi mularume. Tásicha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

⁶ Te náimahapa ena tuparairucana énapa ena nasuntaruan, tipiaracanapa:

—¡Pémetatareca te crusu! ¡Pémetatareca te crusu! —nacahepa.

Ema Pilato máichavacavare:

—Núti tájina maviurevainahini eta nímairahi. Étina écha eti iámairaya éma. Étina émetatareca te crusu —máichavacapa.

7 Éna najicapavarepa:

—Ichape eta maviurevahi ema maca eta viyehe, taicha tímijachavahi Machicha ema Viya. Vivaraha máepena, taicha váhiqene vísapahini eta juca —nacahepa.

8 Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi. **9** Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasicá eta piásinehi? —macahepa.

Émasera ema Jesús, tájina vahi majicapahini.

10 Tásicha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchuhavi, énerichuvare nuratahavare nucavanairipi náetatacavi te crusu —macahepa.

11 Ema Jesús mapaenumavapa majicapa:

—Váhiqene piratahaimahi pítijiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena tíjararecanuanahi eta piyehe. Píti váhipanaichuhinéni eta pipecaturahi eta píchiranuhi —macahepa.

12 Tacahe, ema Pilato mavarahainipa macuchucuhayarehini ema Jesús. Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianaruhi ema Emperador taicha tímijachavahi rey! —nacahepa.

13-14 Tacahe, te masamapa ema Pilato eta náechajiriruvahi éna, tiyanapa te anuquehe, téjacula tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, viérnesi taequenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásicha, máichavacapa ena achaneana:

—¡Mácaripa ema eyehe Rey! —macahepa.

15 Énasera tipiaracanavarepa:

—¡Pémetatarecavane! ¡Máepenavanepa! ¡Váhiqene vivaraha ema maca! —nacahepa.

Tásicha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

16 Tacahe, ema Pilato másapapa. Máijaracavacapa ena masunturura etá náetatasirayare ema Jesús. Jéhesaréinehi námapa éma.

Náetatacampa te crusu ema Jesús

(Mt 27.32-44; Mr 15.21-32; Lc 23.26-43)

17 Tacahe, náijaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota).

18-19 Tásicha, ema Pilato máepiyacapa eta ajureca eta taechajiriruvahi, ánipa tacahéhi: “Ema Jesús Nazareno, Rey nayehe ena israelítana”. Te tápusi eta macurusura nanacapa eta juca ajureca. Natarihivare ena apinana ticaetatana-hivare te machacaya. Émasera ema Jesús, te enumuhu mávihahi. **20** Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta taechajiriruvanahi. **21** Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca.

Éna navarahahi áni tacaheyarehi eta ajureca: “Ema maca tímijachavahi Rey nayehe ena israelítana”. ²² Émasera ema Pilato máichavacapa:

—Eta ajureca nunacaquenehi, nájina tihapapicaimahi —macahepa.

²³ Te náitauchapa ena suntaruana eta náetatasirahi ema Jesús, nasuerte-hachapa eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta it-sameruca. ²⁴ Vaipa návarahahini navetsayucahini. Tásiha, nasuertehachavarepa, náimairayarehi nájahayarehipuca mácani tivecuhayarehi.

Tacahehi eta táitauchiravahi eta Sagrada Escritura eta táchajiriruvahi: “Ticajijiricacanapa eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

²⁵ Te tápecu eta macurusura ema Jesús, sutiarihihi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena. ²⁶ Tacahe, te máimahapa esu maena eta sutiarihirahi te machacaya, nútipa nuti máimiturehi máemunaruquenehi, ánipa máicha ésu:

—Mémechicha, márahi ema nítsivayare ema pichichayare. Éma titátiviyare.

²⁷ Tásiha, énerichuvare tituparacanuvarepa núti:

—Némunacasare, nutuparacavi esu meme. Esu pénayare. Pímainanu —máichanupa.

Jéhesaresera, núti Juan ichaperinehi eta nujacapirahi esu maena. Námapa te nupena.

Eta máepenirahi ema Jesús

(Mt 27.45-56; Mr 15.33-41; Lc 23.44-49)

²⁸ Tacahe, eta máimairahi ema Jesús eta táitauchiravaripa tamutu eta táchajiriruvanahi eta Sagrada Escritura, ánivare macahehi:

—Tétavicava eta numauneva —macahepa.

²⁹ Tatiarihihi eta tisisica vino te tinaja. Náechipajicapa eta machuchujiruyarehi. Náimicapayacapa tayehe eta majaca te tiúqui curina. ³⁰ Tacahe, machuchujicapa ema Jesús eta tisisica vino. Tásiha, macahepa:

—Jéhevare puiti, títauchavapa tamutu —macahepa.

Tásiha, téyusicapa. Tépenapa.

Ema émana suntaru mayuvaracapa te machene ema Jesús tayehe eta lanza

³¹ Tacahe, ena tuparairucana vahi návarahahini nánasihini ena ticaeta-tanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahí macavanairipihini eta nacavetupaiquechavacayarehi apaesa náepenavanehini. Navarahahí náecarávane, taicha tétavicavahi eta tacapicahirahi nayehe éna eta jena sácheana páscuairahi. ³² Jéhesaréinehi, tiyananapa ena suntaruana, nacavetupaiquechavacapa ena apinana tiámerahiana nacaetataquenehi te crusu te machacaya ema Jesús. ³³ Tásiha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

³⁴ Táitsivahisera ema émana suntaru mayuvaracapa te machene tayehe eta lanza. Enevanepta tiúchucuahi eta iti étapa eta une. ³⁵ Núti Juan nájuequenehahi tamutu eta juca, nímhahuqueneanahi. Nuvaraha nítametacahe tamutu. Yátupi-hivare eta numetasirahehi, taicha nuvaraha esuapahini éti apanavare.

³⁶ Títauchavahi eta juca táchajiriruvahi eta Sagrada Escritura: “Tájina vahi nacavetucaimahi eta máperana”. ³⁷ Jararihivare eta apana Escritura, ánivare tacahe: “Náimahayare ema najarachaquenehi”.

Nacucupaicapa te crusu ema Jesús, náecaráyarepa

(Mt 27.57-61; Mr 15.42-47; Lc 23.50-56)

³⁸ Te tamutupa eta juca, matiarihihi ema achane José, ticavasahi te Arimatea. Émarichuhi tisuapajirahihí mayehe ema Jesús. Váhisera máimerecavahini, mapisiravacahí ena machamuriana aquenucarahaná. Tiyanapa éma mayaseapanahí ema Pilato eta máquehe ema Jesús. Tacahesera ema Pilato másapapa. Tiyanapa ema José, macucupaipanapa eta máquehe ema Jesús. ³⁹ Émapa ema Nicodemo macachanehi, ema téjirapanahí ema Jesús te jena yátimuahuquénehi. Mámapahi éma eta treinta kilo eta perfume mayajihayarehi. ⁴⁰ Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta táijiyequene perfume. Tacahehi eta viyeherepi te vécarayare ena náepenaqueneana. ⁴¹⁻⁴² Tacahe, te tachacaya eta máepeninehi ema Jesús, tatiarihihi eta huerta te távihahi eta mari natsecajueruhi ecariyare tacutihí eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi taísapacarehini náecarahini te yati, váhivare taísapacarehini te apanapa sache taicha sávarumuahuipahi.

20

*Eta máecheprusira ema Jesús te máecari
(Mt 28.1-10; Mr 16.1-8; Lc 24.1-12)*

¹ Tacahe, te jena sache lumincuquenehi, te tijararahichichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinariipahi eta márime tajihainihi eta tapajacurahi eta ecari. ² Te suímahapa, tichavavanepa tijunapapaipahi. Suíchuhapanayarehi ema Pedro nútipa nuti Juan. Timetakahavipa ésu:

—Námechapa jácani eta ñáquehéní eñi Viáquenu. Vaipa vecha távihahipuca nanasihahi —sucalhepa.

³⁻⁴ Tacahe, núti émapa ema Pedro viúchucapa viyanapa vijunapapaipahi. Nucachuricapa ema Pedro. Nítécapavanepa núti tayehe eta máecari ema Viáquenu. ⁵ Nétipaicapa. Nujiñañajuechapa. Tacarinehi nímaha eta máyuruhanainihi. Váhisera nusiapahini. ⁶⁻⁷ Te títecápapa ema Pedro, tisiapapa éma tayehe eta ecari. Máimahapa eta máyuruhanainihi. Tanasirinecha enurujuhehi, étapa eta mamuhisiequene ema Jesús. ⁸ Tacahe, nusiapavarepa núti tayehe eta ecari. Nímahapa eta táichararacavahi. Tásicha, ichaperinehi eta nusuapirahi. ⁹ Vipaenumavapa vicaicutiarahi eta táchajiriruvahi eta Sagrada Escritura, eta máecheprusirayarehi ema Viáquenu te máecari. ¹⁰ Te tamutupa eta vímairahi, vichavapa te vipena.

*Ema Jesús tímerecavapa suyehe esu María Magdalena
(Mr 16.9-11)*

¹¹ Esu María Magdalena, énerichuvare tiápechavaripa tichava eta te máecari. Sunasipa, týyahaipa. Tásicha, tétipaicapa sujiñañacahi te tajuhe.

¹² Tiáramicarepa suímhaha ena apinana ángeleana, tijapumuirihavacahi. Téjacanahi éna te tajuhe eta máecarini. Ema émana te tanapainihi eta machuti, ema apana te máivape. ¹³ Tásicha, ena ángeleana nayaserecapa ésu:

—¿Tájaha ticaiyacavi, nuchicha? —náichapa.

—Ticaiyacanuhi eta námechirahi eta ñaquehe eñi Viáquenu. Vahi nécha távihahipuca nanasihahi —sucalhepa.

¹⁴ Te titapiricapa eta suíchiravacahi, téviurucavapa, suímaharinehi ema Jesús. ¹⁵ Tásicha, éma apanava mayaserecapa:

—¿Tájaha ticaiyacavihi, nuchicha? ¿Nájaha pitanucahi? —máichapa.

Ésusera suímijachaichucha ema tijanearecarahi eta huerta. Tásiha, suíchapa:
—Tata, te píthipuca piámahi eta ñáquehe eñi Viáquenu, picatajicanu pimeta-
canu távihapuca pinasihahi. Nuvaraha námayare núti —suíchapa.

¹⁶ —¡María! —máichapa.

Suésenicaínehi ésu. Supaenumavapa suímatihi éma. Tásiha, suíchapa:
—¡Pítiquenehi, Tata Náquenu!

¹⁷ Tásiha, ema Jesús máichapa:

—Vahi picuemamahacanu, taicha vuíchaha nápanahini te mávihahi ema
Tata. Piyana pimetacavaca ena apamuriana nímitureana eta nápanirayare
mayehe ema Tata, Ecaiyaqueñehivare éti apanava —máichapa.

¹⁸ Tacahe, esu María Magdalena tiyanapa sumetapanavacahi ena
suchamuriana eta suímaírahi ema Jesús, étapa eta mame tarapianahi.

*Tímercava ema Jesús nayehe ena máimitureana
(Mt 28.16-20; Mr 16.14-18; Lc 24.36-49)*

¹⁹ Étarichu te jena sáchequenehi lumincuquene, yátiripahi, viúrujicavahi viti
máimitureana ema Jesús te tajuhe eta peti. Vérataequenerecavahi taicha eta
vipisirahi ena tuparairucana. Tiáramicarepa titupihahi ema Jesús te vimuri.
Téchajicahavipa:

—¿Ícharacava, nuchichanaveana? —máichahavipa.

²⁰ Tásiha, tímechahavipa eta majarana te mavahuana étapa te machene.
Tacahe, víti ichaperinehi eta viúrisamurevahí eta vímairahi éma. ²¹ Tásiha,
máichahavipa:

—Vahi ecueñamava. Núti, mavanerunuhi ema Tata núcupaicayare te juca
apaquehe, nímitucaheyarehi éti. Puiti nuvanecaheyare núti ímitucavaca-
yarehi ena achaneana, apaesa náehicanuhini éna apanava —macahepa.

²² Tásiha, tiáchajuacahavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya,
mávahásiraheya. ²³ Éma, tímitucaheya eta ítamesiravacaya ena achaneana
eta naperdonachacarevahí me Viya ena téneuchavanahí. Te vahi nacu-
varaha téneuchavana, tanasiyare eta naviurevana taicha eta napecaturana —
macahepa.

Ema Tomás vahi masuapa eta máechepusiraipahi ema Jesús

²⁴ Te jena sache eta máimeresiravahí ema Jesús eta viyehé, májinahi ema
vichamuri Tomás. ²⁵ Tásihasera, ena apamuriana vichamuriana nametacapa
éma eta vímairaipahi ema Jesús. Émasera macahepa:

—Vahi nusuapa. Téhesera te nímhaha eta majara te mavahu taicha eta clavo,
nímisiapavare eta nuvauqui tayehe eta majara te machene, tapaenumava
nusuapayare eta máechepusiraipahi —macahepa.

²⁶ Te óchopa sache eta táetavisiravahí, viúrujicavaipavare te viúrujisirareva.
Matiarihipahi ema Tomás te vimuri. Tásiha, tiáramicarevarepa tímercavahi
ema Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

²⁷ Tásiha, máichuhapa ema Tomás:

—Yare, nuchicha —máichapa —. Pímaha eta nujarana te nuvahuana.
Pímisiapa eta pivauqui eta te juca nuchene, apaesa pisuapanu.

²⁸ Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —
máichapa.

²⁹ Ema Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani tisuapajirahianahi vahi tacamesahini náimahanuhini —macahepa.

Nuvaraha esuapa eta juca libro nájurehi

³⁰ Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro. ³¹ Nuvarahasera ácaicutiara eta nájureanahi apaesa esuapahini ema Jesús eta émairaquénehi Cristo, Machichaquenehi ema Viya. Taicha te esuapapuca éma, máitavacacayare eta ítaresirayare.

21

Tiápechavavare tímerecava ema Jesús nayehe ena siétequeneana máimitureana

¹⁻⁴ Tiuri, te taequenepa eta juca, viyanapa víti te Galilea, vicchapayarehi ema Jesús. Ánaqui matiarihihi ema Pedro, ema Tomás, ema Natanael, ema nuparape Jacobo, nútipa nuti Juan. Natiarihivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, viávacuhapa tayehe eta pacure. Vénicaipahi te jena yátiquenehi. Tájinaserá vítucavahini. Te tijarárahichichayaréipa, vímahapa ema Jesús. Titupihaipahi te tachausi. Váhisera vímativanehini. ⁵ Tásiha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

⁶ Tásiha, éma tivanecahavipa viáquijieca eta viyehe tarrafa te apachacaya eta pacure tinapaicahi te vaure.

—Eta ítusiyavare eta jima —máichahavipa.

Visuapahisera víti. Tásiha, te vichuruecapa eta viyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha.

⁷ Tásiha, nuti níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhiacavahi éma eta mamuiriha. Tépuhecavapa, mavarairahi macapayacavaneyarehi ema Viáquenu. ⁸ Víti apamuriana vipauchapa eta tachausi. Vichuruecapaipahi eta viyehe tarrafa; tínicapaipahi eta camuriquene jima. Cien métrorichuhiserapuca eta viyerehirahi eta tachausi. ⁹ Te viúcupaicapa te tachausi, vímaharinehi tatiarihihi eta yucu, étapa eta jima jituruca, étapa eta pan. ¹⁰ Tásiha, ema Jesús máichahavipa:

—Iáma eta íturevahí jima —máichahavipa.

¹¹ Ema Pedro machurupaicapa eta tarrafa. Vímaharinehi eta ichapemuriquene jima. Ciento cincuenta y tres eta tasimurivahi. Váhisera táetsayucahini eta viyehe tarrafa. ¹² Tásiha, tíchuhahavipa ema Jesús:

—Yare, enica —macahepa.

Tásiha, viyanapa víti, vinicayarehi. Váhisera vipatsicavahini viyaserecahini te nájahahipuca éma taicha tétavicavahi eta viáramesirahi. Vímatiacahisera eta émairahi ema Viáquenu. ¹³ Tásiha, ema Jesús témeñahavapa. Mavehapa eta pan. Tíjaracahavipa. Étapa eta jima táimaquiquenepa, tíjaracahavivarepa.

¹⁴ Eta juca eta mapaquequenepa eta máimeresiravahi ema Jesús eta viyehe eta máechepusirahi te máecari.

Ema Jesús mavaraha macaicutiara te yátupipuca máemunaca ema Pedro

¹⁵ Te vítanesipa eta vinisirahi, ema Jesús mayaserecapa ema Pedro. Ánipa máicha:

—Piti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Ema Jesús máichavarepa:

—Tiuri, te yátupihipuca pémunacanu, nuvaraha pijaneasinanuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

¹⁶ Te tábiquenevarepa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahí —macahepa.

¹⁷ Te tábiquenevarepa, mapaquequene mayasereca:

—Pedro, ¿yátupi eta pémunasiranu? —máichapa.

Émasera ema Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásicha, máichavarepa ema Jesús:

—Tiuri, te yátupihipuca pémunacanu, pijaneasinanuvacayare ena téhicanuanahí. ¹⁸ Nutupiruva numetacavi: Eta piámaperuvahi, píti péchinavahi eta pítaresirahi. Picamuirihahi, piyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítaresirayare. Apanananinapa ena timuriachavianayare, taicha titijivauchavia-nayare, tásicha tiámvianainapa te jácani pimavarahaquenénihi picaijuhe —máichapa.

¹⁹ Eta juca máichirahi ema Jesús, mavairahi máiminecapaequenehayarehi eta máichararacavayarehi eta máepenirayare ema Pedro. Tétavicavainapa eta macunachacareva ema Viya maicha ema Pedro, taicha vahi téquecavaimahi eta máimairahi eta macatajivairaya. Tásicha, máichavare ema Jesús:

—Piti Pedro, tacuija tahapapiricahini eta pítachira tamutu eta nutuparasiravianahí —máichapa.

Eta táichecuine eta májurehi ema Juan, máemunaruquenéhi ema Jesús

²⁰ Tásicha, téseeniequenehavapa ema Pedro, tímahanupa eta néhiequenehai-rapahi nuti máemunaranuhi ema Jesús. (Nútirichu nútì nuyaserecabi te mesa te nájahahipuca ema tíjararecayarehi.) ²¹ Eta máimairanuhi ema Pedro, mayaserecapa ema Jesús tájahapuca eta níchararacavayarehi nútì apana. Ánipa macahe ema Pedro:

—Tata, ¿tájahapuca máicharacavayare ema apanava ema maca?

²² Ema Jesús majicapapa:

—Nútì nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítisamisa, pítachira tamutu eta nutuparasiraviana. Tacuija tahapapiricahini eta péhisiranuhi.

²³ Tacahe, ena nuchamuriana, ichaperinehi eta napanerequenehairahi eta numaepenirayarehi. Váhisera mametacahini eta numaepenirayarehi. Tacarichu macahehi: “Te nuvarahapuca núti maitareca máimahayare eta nápechiravayare nuchavirayare, vahi tacuimipanererecavi” macahepa.

²⁴ Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímaqueneanahi.

²⁵ Jucarihichaha eta apamuriana máichaqueneanahi ema Jesús. Váipasera támutuhini nájuequenéhahini, taicha téavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tiájuequenerahiana.

Tamutupa eta juca nájurehi.

Ema San Lucas májuequenehahi eta náichararacavahi ena Apóstoleana eta náehisirahi ema Jesucristo, ticaijare LOS HECHOS

¹ Piti Teófilo, títecapáuchaviripa eta táinapure nájure tayehe eta máichavaquenévahí ema Jesucristo te títecapapa te juca apaquehe. Nájuchahí tamutu eta máichaqueneanahí, étapa eta máimiturapihanahí. ² Nararihihi ena manerejruana apóstoleana. Émaripa ema Espíritu Santo máimicatacahi eta matúparasíravacahi éna. Nájuchavarepa eta mayapirahi te anuma. Puiti nímiamarecavare eta piyehe eta juca nájure, apaesa pímati tamutu eta téchacareana tayehe eta máichavaquenévahí ema Jesús. ³ Te taequenepa eta máepenirahi, téchepucapa te máecari, tiápechavavare titareca. Tásicha, cuarentaquenehi sache eta macáchanéravacaríchaha ena máimitureana. Máimerecahi ichape eta machavirahi titareca. Máimitucavacahi éna, eta táchararacavayare eta náehisirayare ema Viya ena achaneana te tamutu avasareana.

Ema Jesucristo mameetaca eta máucupaisirayare ema Espíritu Santo

⁴ Te jena sache, macáchanevacaríchaha ena apóstoleana, mameetacavacapa. Ánipa maicha:

—Vahi ecújúnijica eta juca viávasa Jerusalén. Ecuchapayare eta táchacareyare etá máijararuvhahí ema Vicaiyaquene. Étaripa eta juca numetara pianahí. ⁵ Échavarichu ema Juan, máicachasicavacahi te une ena achaneana. Étisera, puiti juca sácheinayare, tiúcupaicayare ema Espíritu Santo. Ema tícachasicahayare, tiávahácahénapa —macahepa ema Jesús.

Eta mayapira ema Jesús te anuma

⁶ Tacahe, nayaserecapa ena tiúrujiácanahí ema Jesús. Ánipa naicha:

—Tata Viáquenu, ¿puítinaríchu píjaracahavi viti israelítana etá vítináini vigóvernachacáca te juca viávasa? —nacahepa.

⁷ Ema Jesús majicapapa, ánipa maicha:

—Vuíchaha táchacare. Vahi tatuparaca étinahíni echa tájahapuca sácheinayare, tájahapuca cájeyayare titáuchavaya. Taicha tayumururevahí eta juca maicha ema Tata Vicaiyaquene. Macarichu éma máituruéqueneha etá juca. ⁸ Jucaríhisera etá ítuqueneyare. Ema Tata tíjaracaheyare ema Espíritu Santo, tiávahácaheyare tímicatacaheyare. Tacahe, échajisianuínapa nútì. Tamutuyare avasareana etá epaisiha, te Jerusalén, te Judea, te Samaria, étapa te jácani tayerhiqueneana avasareana tayehe te juca apaquehe —máichapa ema Jesús.

⁹ Tacahe, te titavapa etá máechajirísiravahí, tiyanapa tiyapa te anuma. Tacahe, ena máimitureana náimararaequenehaipa etá mayanirahi. Táepacuchirahí etá úcaji. Vaipa macaecherahini te anuquehe. ¹⁰ Eta mayanirahi ema Jesús te anuma, náimararacáichaha ena máimitureana. Tacahe, tiáramicareanapa tímerecavana ena apinana ángeleana. Tijapumuiriavaca. ¹¹ Tacahe, náichapa ena ángeleana:

—¿Tájaha íchahí ímararacahi etá anuma, eti máimitureana ema Jesús? Puiti enecapararecahi ema Jesús etá majunijisiraheripa, mayanirapa te anuma. Vimetacahe: Te jácani sácheinayare, ema Jesús tichavayare te juca apaquehe. Tiúcupaicayare tacutiyareichu etá mayanirahi —náichavacapa ena ángeleana.

Nanerejicapa ema Matías, máitsivayarehi ema Júlasi

¹² Tiuri, eta návihairahi te anuquehe masihi ticaijare Olivoquiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare. ¹³ Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natarihihi ema Pedro, ema Jacobo, ema Juan, ema Andrés, ema Felipe, ema Tomás, ema Bartolomé*, ema Mateo, ema apuna Jacobo, ema Simón, émapa ema Judas. ¹⁴ Natarihivare ena maparapenaveana ema Jesús, ésupa esu maena María, énapa ena apamuriana esenana. Tamutu sácheana, ena nani tiúrujicavanahi eta nayujarasirahi.

¹⁵ Tacahe, te jena sácheana, ena nárujiruvananahi náetavicahi ciento veinte eta nasimutuva ena máimitureana ema Jesús. Tacahe, téchepucapa ema Pedro te namuri, titupihapa. Máichapa:

¹⁶ —Nuparapenaveana, ema víyarahaini David macaimitucusiquenehi mayehe ema Espíritu Santo, ánaquiríchaha eta áñoana eta matiarihiraya ema Júlasi, ema tínumpumiráuchaya ena suntaruana nacaratacaya ema Jesús. Títouchavapa eta mametarapihi ema Espíritu Santo. ¹⁷ Taicha ema Júlasi, émainichuhi vichamurini tayehe eta juca vématanerepihi—macahepa ema Pedro. ¹⁸ (Émasera ema Júlasi ticapacavahi tichumucavapa. Tiáquipaicavahiséra eta máquehe. Tiúchumuriapa eta maturupiana. Te táequenepa, navehapa eta mavachainihi eta máijararesirahi ema Jesús. Navacharecpa eta apaquehe. ¹⁹ Te náechapa ena ticavasana te Jerusalén, nanacapa eta táijarehi Acéldama. Eta ticaijarehi puiti “Apaquehe máitinevacha ema Jesús”.)

²⁰ Tímiyanava eta máechajisirahi ema Pedro, ánipa maicha:

—Ema víyarahaini David májucunachahi eta mametarapiana ema Espíritu Santo eta te Salmo. Áni macahehi: “Machu nacuija nacusiapa eta mapena majunijiruipa nácani macutipaneruana eta mavainarajiva”. Ánivarepa macahe: “Tatuparacahi masiapaya ema apuna achane máitsivaya te mávacurénihi” macahepaji ema Espíritu Santo.

²¹⁻²² Tacahe, tituparacahavi vinerejicayare ema apuna, máitsivaina ema Júlasi, apesa vahi macuejiacava te vimuri viti dócequeneana. Máimicatacahavi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca áñoana te matiarihichaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahi najunjicahavihini. Natarihiquenehi te tiyapapa ema Jesús te anuma—macahepa ema Pedro.

²³ Tacahe, ticanerejianapa ena apinana: ema ticaijare Matías, émapa ema apuna ticaijare José Barsabás (énerichuvare náimijarechahi Justo).

²⁴⁻²⁵ Tacahe, tiyujaracanapa, ánipa nacahe:

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitiaruhi apóstoleni Júlasi, táimicuñaruhi eta mapecatura—nacahepa.

²⁶ Tacahe, nasuertehachapa ena apinana. Tatocachapa ema Matías. Tásicha, natuparacapa eta mávacureyare nachamurirayarehi ena apamuriana apóstoleana.

* ^{1:13} Ema Bartolomé ticaijarehivare Natanael. Ema apuna Jacobo, machichahi ema Alfeo (víapaserá véchapríca eta máitaresira ema Alfeo). Ema Simón, nachamurinihi ena revolucionario ticaijareana “cananística”. Ena nani cananística nacanarajiricahi ena apavasanana romanoana, navarairahi náquijica, nacuchucayare te návasa Judea. Ema maca Judas, matiarihi ema maparape ticaijarehivare Jacobo, váhisera nachamurinahini ena apóstoleana. Ema maca Judas, mapanahi eta máijare: eta Tadeo étapa eta Labeo, étapa eta Judas. (Te pivaraha pecha, pitanuca te libro Marcos 3.18 étapa te Mateo 10.3.)

2

Eta máucupaisirahi ema Espíritu Santo

¹ Tiuri, títecapapa eta sache napiestara ena israelítana ticaijarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús. ² Tacahe, tiáramicarepa eta ticaema te anuquehe tiásicha te anuma ticutipahi eta muraca técaticava. Ticaemapa muraca te táinahu eta peti návihahi éna. ³ Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena náuruju-ruvanahi. ⁴ Tacahe, ena mávahácavacaripa ema Espíritu Santo. Tiáramicareanapa apáechajiríruvavacapa taicha eta mávahásiravacáipahi ema Espíritu Santo. ⁵ Te jena sache, natiarihivre ena camuriqueneana israelítana te Jerusalén tiásihana te tamútuyaréini avasareana. Tipicaurahianahi tayehetayahe religión. ⁶ Te nasamapa eta tacaemairahi te anuquehe, tichurujicacanapa ena achaneana. Náraminehi ichape táichavenehi eta nasamirahi ena apáechajiríruvavacarípahi.

⁷ Ichaperinehi nárami. Tacahe, náichacacapa:

—¿Tájaha tacayema eta juca? Ena nani, vahira vichamurianaina tayehetayahe avasare viávihahi. Ticavasana te Galilea ena nani. ⁸ Tásihasera, náitucahivare eta vechajiriruvapachu vímiuchurehi víti. ¿Tájahapapuca tacayema eta juca? ⁹ Camuriana eta vechajiriruvana taicha viti viásihahajíruanahi te apanapanejiana avasareana. Nararihi ena tiásihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto. ¹⁰ Nararihivre ena tiásihana te Cirene te Libia. Nararihivre ena tiásihana te Roma, ena yátupiqueneana israelítana énapa ena tépiyacavanaripa israelítana. ¹¹ Nararihivre ena tiásihana te Creta étapa te Arabia. Vimutusera visama eta vechajiriruvapachu. ¿Tájahapapuca tacayema? Ena nani téchajicanahi timetacahavianahi eta tauricacarequeneana tásihaquequeneanayare me Viya. Vicaicutiarahi tamutu taicha téchajicanahi te vechajiriruvapachu — nacahepa.

¹² Namutu napanerequenehahi. Vaipa náimatihini tájahapuca tacayema. Tiyaserejiricacanavarepa:

—¿Tájahapuca tacayema eta juca? —nacahepa.

¹³ Natiarihisera ena apamuriana nacaecahirichucha, ánipa nacahe:

—Nacavahaqueneana ena nani —nacahepa.

Ema Pedro máechajicapa ena achaneana

¹⁴ Tacahe, titupihapa ema Pedro te namirahu ena achaneana. Natiarihihivre ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutiaraquenéna eta juca nucayemayare. ¹⁵ Eti ímijachahi vicavahaqueneana. Vahi vicavahaquenéna. Tapaenumava las nuéverava yáticarahi. Écharichuhi éti vahi vítuca vera viti israelítana te yáticarahi.

¹⁶ Eta juca ímahaquenehi iáramiquenehi puiti, eta tacaheyarehi taicha mametarapihi ema Viya mayehe ema víyarahaini profeta Joel. Tásiha, ema Joel májucunachapa eta mametarapihi ema Viya, ánipa tacahe: ¹⁷ “Jararihiya eta sácheinaya níjaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacometarai-ruinapa eta néchajiriruva. Ena amaperuana, níjaracayare eta náechirayare etatáicharacavayare. Ena ichavicachichana ticametacasianayare te navapure.

¹⁸ Taicha nuvanecayare ema Espíritu Santo, níjaracayare mávahácavaca

namutu ena nuchanerana. Tasiha, nacametarairuinapa eta néchajiriruva tásihaguenehi nuyehe. ¹⁹ Te juca anuma nímerecayare eta tiáramicareana. Te juca apauehe nucuchucayare eta ecutiarareanaya, apaesa ímatinu nuti nucarichu nurataha nicha tamutu. Nucamiricaya eta ecuñaraqui. Tépusaivayare eta náitine ena achaneana váinarajiqueneanahi. Nucamiricayare te avasareana eta yucu étapa eta ichape quijare. ²⁰ Eta sache, nucaemahayare eta tajaraiva. Énerichuvare nítsivachayare eta táimahi eta caje. Ítimeyare nícha. Tásih, titcapainapa eta nusacherayare nuchaviraya nuti Iáquenu. Te jena sácheyare, ichape eta napisirainapa ena achaneana taicha nícuñacavacainapa namutu ena ticapecaturarahianaichaha. ²¹ Étisera eti ecasiñanuhi échajicanuhi eta te níjare nuti Iáquenu, nucuchuhahayare” macahepa ema Viya.

²² Tiuri puiti, nuparapenaveana nujaneanana, esamavare eta juca apana numetaruheyare. Ímatihi ema Jesús Nazareno. Ema maca ajaira, mavaneruhi ema Viya. Écharichuhi éti eta tiáramicareanahi máichaqueneanahi ema Jesús. Ema Viya máijaracahi eta máitupajijiásiravayare, mavairahí máimerecayarehi te emirahu eta émairahí mavaneru ema Viya. ²³ Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacahe, másapahi eta íjararesirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi. ²⁴ Émasera ema Viya macaechepecahi ema Machicha. Macaitarecahi tayehé eta máepenirahi, taicha vahi mávarahahini mánasihini máepenahini. ²⁵ Ema víyarahaini rey David timetacahavihi eta te Salmo eta máechajiriruva ema Jesús. Ánipa macahe: “Tata, piti pímararacanuhi eta picáchanérano. Piti pijaneacanuhi te nuchacaya. Pétumechanuhi tamutu sácheana. ²⁶⁻²⁷ Tacahe, núrisamure ichape. Nuvarahavare nujirauchavyare néchajisihavyare. Núti, te népenapa, tájina néñamavaimahi, taicha nucasiñavahi piyehe eta pímichavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi. ²⁸ Piti píjaracanuhi eta picaechepusiranuyarehi te nécari, nápechiravayarehi nítareca. Tásih, nuvapinavayare eta nutiarihirayare te pimirahu” tacahepa eta Salmo.

²⁹ Nuparapenaveana, véchahi vimutu eta máepenirahi macaecarasirahi ema viáchucaíni David, taicha vímaharichaha puiti eta máecari. ³⁰ Ema víyarahaini David, yátupiquenehi profeta. Macuchapahi eta táitauchiravayare eta mamecasivahi me Viya, eta matiarihirayarehi ema émana mámariéqueneyarehi ema ticaijareyarehi Cristo ema téjacayarehi te trono. Máitsivayarehi ema máchucaíni. ³¹ Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; vahivare témitiequenehaimahi eta máquehe. ³² Puíticha, ema Viya macaechepecahi ema maca Jesús. Tásih, viti véchajisihahi eta juca taicha vímahaquenehi eta mápechiravahí titareca. ³³ Tacahe, ema Maiya macayapapa te anuma ema Machicha, macaejacaripa te mavaure. Tacahe, máijaracaripa ema Espíritu Santo ema máitsivayarehi taicha ema matuparahríchuhí. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puiti, esamaquenehi eta máucupaisirahi ema Espíritu Santo.

³⁴⁻³⁵ Vahi ecuimijachahini émainahini ema David mápanahini te anuma. Émahisera téchajisihahi eta matiarihirayarehi ema apana tiápanayarehi te anuma. Ánipa macahehi: “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena

ticatianacavianahi, máichapaji ema Viya". Étara eta juca macayemaquenehi ema víyarahaini David.

³⁶ Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiruvahi.

³⁷ Tacahe, eta nasamirahi eta juca ena achaneana, ichaperinehi eta náeñamiravahi te nasamureana. Tásicha, nayaserecpa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

³⁸ Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásicha, ema Viya macaepahainapa eta epecaturana. Tíjaracahénavarepa ema Espíritu Santo. ³⁹ Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejiruanahi máichuhauqueneanahi ema Viya, tayanapané ticavasanahi te tiyerehiqueneana avasareana —macahepa ema Pedro.

⁴⁰ Tacahehi eta juca máechajiruvanahi ema Pedro. Ichape eta maconsejachirvacahi, ánivarepa máichahi:

—Ácijuhe ema Jesús. Ínajica eta eváinara jivana. Érajicava nayehe ena tíchana eta tamauriqueneana —macahepa.

⁴¹ Tacahe, natarihi ena tisuapanahi eta máechajiruvahí. Enevanepa ticaicachasiana éna. Mapanaqueneana mil ena tisuapajirahianahivare.

Eta náitaresirahi ena náinapureana téhicanahi ema Cristo

⁴² Ena achaneana, eta nasamararasirahi eta náimiturapiana ena apóstoleana, ichaperinehi nasuapa. Tásicha, tiúririnehi eta náitaresirana. Náemunacaine ena nachamuriana. Tamutu sácheana ticurujicacanahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu. ⁴³ Ichape eta náramirahi ema achaneana, taicha náimaharipa eta tiáramiccareana náichauqueneana ena apóstoleana, máimicatasiravacahi ema Viya. ⁴⁴ Namutu ena tisuapajirahiana tiúrujicavanaparácahi ticajicacanahi eta náimahaqueneana. ⁴⁵ Te náimaha ema mácani nachamuri ticamunuvhái, náijarareca eta náimahaqueneana. Tásicha, náijaracapa eta plata ema ticamunuvhái, náimicatasihayare. ⁴⁶ Tamutu sácheana tiúrujicavanahi eta te Templo. Tásicha, te napenana tíchuhacacanahi ténicacanahi. Ticachanecacanahivare eta nanisirahi eta pan táicutiarahi eta máepenirahi ema Viáquenu. Náurisamurevahí, táurivaipahi te nasamureana. ⁴⁷ Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásicha, tamutu sácheana ema Viya máichuhavacahi ena apamuriana tisuapanavare.

3

Eta manarasirahi ema achane masarini

¹ Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las trésquenepa sache, hora eta nayujarasira ena israelítana. ² Matiarihi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticaijare Tiúrinapana, mayaseseresihayarehi eta limosna nayehe nácani achaneana tisiapanapahi. ³ Tacahe, ema

masari, te máimahavacapa tisiapanayarehi ema Pedro ema Juan, mayaseacavaca eta limosna. ⁴ Tacahe éna, náesenicapa ema masari. Tasiha, máichapa ema Pedro:

—Pímararacahavi.

⁵ Tacahe, máimararacaripahi. Máimijachaipa náijaracayarehi eta plata.

⁶ Tásiha, ema Pedro máichapa:

—Tájina nuviya eta plata níjaracavihini. Jucarihisera eta juca nucatajicavyare. Nucanaracavyare. Táichavene eta máitupajijiásirava ema Jesucristo ema Nazareno, nuanecavi: Péchepuca, pipaica —máichapa.

⁷ Tacahe, ema Pedro machuruvauchavanepa te mavahu vaure, macaeche-pucapa. Énevanerínehi túmevaca eta mapaiqueana eta mayucarana. ⁸ Tacahe, ema masarini tíjahúchavapa titupiha, tipaicapa. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi. ⁹ Namutu ena achaneana náimararacahi eta mapaisiraipahi, macunacharinehi ema Viya. ¹⁰ Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticajare Tiúrinapana taicha eta mamasarivahi. Puítisera tipaicapa, téterecavarepa. ¿Tájahapuca máicharacavahi eta manarasirahi? —nacahepa.

Ticametarairu ema Pedro te Templo

¹¹ Tacahe, ema masarini vaipa máinajiacavacahini ema Pedro ema Juan. Tacahe, náuruijacapa namutu ena achaneana te návhahi ena apóstoleana te tajuhe eta Templo, te tayehe eta alar máepiyaruhi ema reyni Salomón.

¹² Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Iáramihi éti eta juca víchirahi víti. Ímijachapa vítijivahi vicanaraca ema maca achane masarini. Ímijachapapuca viti vítupajijiacavahi táichavene eta víjarasiravahi mayehe ema Viya. Eta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno, ¹³ taicha ema Viya* tíjaracahi eta tamutuirayare marataha ema Machicha Jesús. Émara ema maca Jesús ema épuru-quenehi éti, íjarareruhi mayehe ema aquenuca apavasajuecu Pilato. ¹⁴ Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihi yátupiquenéhi santo. Masapihapa eyaseserecahi máuchucuha ema ticapahi. ¹⁵ Tásiha, émapa ímicapacahi ema Ticaitarecahavihi. Émasera ema Viya macaechepecuahi te máecari. Véchajisihahi víti éma taicha vímahaquenehi eta mápechiravahi titareca. ¹⁶ Puiti, ímararacahi eta manarasirahi ema maca masarini. Eta juca eta tímicaecherachahi eta machavirahi titareca ema Jesús. Taicha émahí ema tíjaracahavihi eta vítupajijiasiravahi eta vicanarasirahi ema maca achane, táichavenehi eta vicasiñairahi éma.

¹⁷ Tiuri puiti, nuparapenaveana, éti ímicapacahi ema Jesús taicha vahi ímatihini eta émairahi ema Cristo ema vicuchapauquenehi. Énaripa ena tuparairucana eyehe, váhivare náimatihini éma. ¹⁸ Étasera tacaheyarehi eta juca

* ^{3:13} Ema Pedro téchajicahi te náechajiruva ena israelítana, máimijarechirahi ema Viya: “ema nacasiñaquehehi ena viáchucanaveanaini ema Abraham, ema Isaac, ema Jacob, énapa ena apamurianaini viáchucanaveanaini”.

taicha máechajiriruvaichuhi ema Viya nametacasivahi ena profetana eta macatajivairayarehi ema Cristo.

¹⁹ Tásiha puiti, éneuchavainapa ecájuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti. ²⁰ Ene ecahehi etsecava ejacapayare ema Jesucristo te machavapa. Éma, iáquenuyare taicha manerejiruhi ema Viya te tépanavainapa tamutu. ²¹ Ema maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana. ²² Ema émana víyarahaini profeta ema Moisés, mametacahi ena viáchucanaveanaini, ani macahehi: “Ema Viya Dios tivanecanuhi nútí numetacaheyare eta máechajiriruva. Títotecayare ema apanayare profeta mavaneruyareva ema Viya, tacutiyare eta mavanesiranuhi nútí. Éma, tiúchucayare te namuri ena viámariequeneana. Tatuparaca nasuapayare tamutu eta mavanairipianayare. ²³ Taicha ema Viya máimicpacayare namutu ena masuápajiráirahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

²⁴ Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana. ²⁵ Ánaquiaparichaha, te vuíchaha máuchucuhini ema víyarahaini Moisés, ema Viya mametacaipa ema viáchucaini Abraham, ánipa macahe: “Nunerejicayare ema émana piámariéquene tiúchucayare. Éma, tíjaracaya eta táurivaya eta náitaresiraya namutu ena achaneana apánapanenéjiqueneána te juca apaquehe” macahepa ema Viya. Tiápechava mametacaipa étarichuhi máechajiruvana mayehe ema machichaini Isaac, énapa ena mámarinaveánaini. Puiti títauchavaripa eta juca máechajiriruvaichuhi ema Viya. Tásiha puiti, éti tituparacahehi ínapucayare ejacapa eta máijararuheya ema Cristo, taicha étirichuhi israelítahehi. Ímatihivare eta apamuriana máechajiruvana ema Viya, nájuchaqueneana ena víyarahanaíni profetana. ²⁶ Tásiha, eta macaechepusirahi ema Viya ema Machicha Jesús, tivanecahavipa vimetacáhe éti. Te ecasiñavapuca eta mayehe, máqujisinaheyare eta evainarajivana. Tíjaracahenapa eta iúricacarevayare –macahepa ema Pedro.

4

Ema Pedro émapa ema Juan námaqueneanahi te namirahu ena tuparairucana

¹ Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímiturecarahiana ticaijareana saducéoana. Námapahivare ema náquenuruha ena tasuntarurana eta Templo.

² Tisemanapa taicha vahi náuricahini eta nasamairirisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquenerahi eta máecheprusirahi ema Jesús te máecari, mápechiravahi titareca. ³ Tacahe, nacaratacavacapa, náimisiapavacapa te cárcel. Váipasera nacayaseserehilihini, taicha cáperehichícharínehi. Tiámainucavapa te apanapa sache, nacuchucavacaya ticayaseserehianayarehi. ⁴ Camurianasera ena tisuapanahi táichavenehi eta nasamararasirahi eta náechajiruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana. ⁵⁻⁶ Te apanaqueñepa sache, ema corregidor Caifás ticurujicapa ena apamuriana aquenucarahanaya tayehe eta ichapequene cabildo te

Jerusalén. Natiarihihivare ena escribánoana. Matiarihihivare ema Anás ema pasado corregidorhi, énapa ena machichanaveana: ema ticaijarehivre Juan émapa Alejandro. Natiarihihivare ena apamuriana machichanaveana.

⁷ Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahehini eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajijiásiravahí? —nacahepa.

⁸ Tacahe, ema Espíritu Santo máimicatacahi ema Pedro eta majicapirahi ena tiyaserecanahi, ánipa macahe:

—Tátanaveana juéseana, tátanaveana víyacárana te juca viávasa. ⁹ Evaraha echa etá juca táuriqueneana táicharacavahi eta vicanarasirahi ema maca achane macajumaquenenihí. ¹⁰ Vimetacaheyare puiti. Vivaraha vémechaheyare, etí énapa namutu ena achaneana te juca viávasa Israel. Ema maca achane, ímahaquenehi eta manarasirahi. Vivaraha vímimatichahe eta máitupajijiásirava ema Jesucristo ema Nazareno tacanaracahi eta vipiarasirahi te máijare. Éma, émetatáruhi te crusu, ecaparuhi. Émasera ema Viya macaechepecuahi te máecari. ¹¹ Éti, épuruhi ema Jesús, ema manerejiruquenehi ema Viya. Puiti, ecutipa ena máitucarahana tépiyarecana petí, te náepurupuca etá tatumequene esuiqui tásuquirayarehini eta petí. ¹² Macarichu ema Jesucristo eta marataha eta macatiuchirahaviya macuchucuirahaviyarehi. Taicha ema Viya manerejiruhichuhi ema Jesús eta macuchucuirahaviyare. Nájina apanaina manerejiruinahi te vimuri viti achaneana etá te juca apaquehe —macahepa ema Pedro.

¹³ Tacahe, ena tuparairucana náraminehi etá náitusirahi téchajicana ema Pedro ema Juan. Náichacacapa:

—¡Tájina vahi napicacaracavahini etá viyehe! Ena nani tájina náituquenéna etá letra. Máitureréanahi. Tájina náimatiyahini etá viyehe escuela. ¿Máijaracavacahipuca ema Jesús etá náitupajijiásiravahí te macachanevacaichaha ema? —náichacacapa.

¹⁴ Tájina naviyahini nacayema taicha matiarihi ema achane masarini, titupihahi te namirahu. Taicha náimahahi etá yátupirahi etá manarasirahi.

¹⁵ Tacahe, navanecapa etá nacuchusiraya ena apóstoleana etá te náuruji-siavahí. Nanasipa ena aquenucana téchajiricavanaripa. ¹⁶ Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi etá náichirahi ema nani etá tiáramicare. Tásiha, vahi visuapacaremahi te vépiyaequenehavacapuca. ¹⁷ Váhisera távaraha vísapa náimiyanava náimitureca nayehe ena achaneana. Vípicararecavacaya apaesa vahi nacuimiyana náechajisiha etá maechepeusirahipuca ema mácanínavaí Jesú —nacahepa.

¹⁸ Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímiyanava échajisiha etá juca, váhivare ecuimitureca nayehe ema achaneana etá maechepeusirahipuca ema Jesús —náichapa.

¹⁹ Najicapapasera ema Pedro ema Juan, ánipa naicha:

—Esamahavichaha. Ema Viya timetakahavi etá véchajisiháirayare. Étisera ecatichapa véchajisiha éma. Émaquenehisera tisuapacarepanahi eyehe éti. Epanerecha yátupina. ²⁰ Víti, vahi vimatinaimahi etá véchajisiháiraya tamutu etá juca vímahaqueneanahi visamaqueneanahivare mayehe ema Jesucristo —nacahepa.

²¹ Tacahe, ena tuparairucana eta nasamirahi eta namasuapirohi, tisem-anapa. Tacahe, náipicararecapa. Tájinapasera náicharacahini. Nacaiticapa taicha tájina naviurevainahini jácani táimicuñacahini. Taicha namutuhi ena achaneana nacunachahi ema Viya táichavenehi eta náimahaquenehi. ²² Cuarenta áñoripa eta mahañora ema maca achane masarini. Tétavicavahi eta tiáramicarevahi eta manarasirahi maicha ema Vi ya.

Ena téhicana ema Jesús tiyaseserecana eta natumesamurevaina

²³ Eta náuchucuiraripa ema Pedro émapa ema Juan, tiyananapa eta te návhahí ena nachamuriana. Nametacapa tamutu eta nacatianasirahi ena tuparairucana. ²⁴ Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichape-quene une mar. Pétpiricahi tamutu eta juca vímahaqueneanahi puiti. ²⁵ Píti pimetacahi ema víyarahaini David pivanarainihi eta májucunachiraya eta te Salmo. Ani tacahehi eta májurehi: “Tatiarihiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna. ²⁶ Ena réyeana te juca apaquehe titsecavanayare eta nacanarairayare. Énaripa ena aquenucarahaná nacapanereruya nacanaraya ema Viya, nacanara-yareva ema Cristo manerejiruhi éma” tacahehi eta májurehi ema David.

²⁷ Étaripa te juca viávasa, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sántoquene pichicha Jesús, ema pinere-jiruquenehi. ²⁸ Títauchavahi naicha eta juca pipanereruana étairayarehi tacaheyarehi eta péchajiriruvana. ²⁹ Pítisera, Tata Viáquenu, pímararacahavahi puiti eta náichirahavíhi viti pivanaranahi. Píjaracahavisera vitumesamu-revaina eta véchajisihairaya eta péchajiriruva. ³⁰ Píjaracahaví etá vítupajijiásiravaina viratahairaina vicanaraca ena nacajumaqueneana, vímeresiraina etá tiáramicareana táichavenehi eta vicasiñairahi ema sántoquenehi pichicha Jesús —nacahepa.

³¹ Te titapiricanapa eta nayujarasirahi, tíjahúchavapa tiyayacare eta apaquehe návhahí éna. Tacahehi eta mávahásiravácahivare namutu ema Espíritu Santo. Váipasare napicacaracavahini eta náechajisirahi eta máechajiruva ema Viya.

Ticajicacanahi tamutu eta náimahaqueneana

³² Namutu ena nasimutuvaqueneana tisuapajirahianahi, ticuticacahi eta napanereruana eta nacajicacairahi. Namutu nácani téchanahi eta náimahaqueneana nacayehequeneanahi, vahi nayavanihacacahini. Tatupiruvahi te nasamureana eta nacajirahi. ³³ Tacahe, tímiyanavanahí ena apóstoleana etá náechajisihairahi eta máechepusirahi ema Viáquenu Jesucristo. Tisuapacarrepacha etá náimiturapianahi. Máiamicatacavacahivare ema Viya ena téhicanapahi ema Jesús. Namutu éna, tipicauchacareanahivare ne achaneana. ³⁴ Nájina émanáinahíni te nataracu máemepaurechavahíni. Taicha ena ticayehheana apaquehe, pétipuca, náijararecapaipa. ³⁵ Tásiha, náijaracavare etá plata ena apóstoleana. Tásiha, ena apóstoleana náijaracavacavare nácani páurepananahi.

³⁶ Matiarihivare ema achane ticaijare José. (Éma máuchurehi etá te tiúrupuhi te mar ticaijare Chipre.) Ema maca José náumurivaichaha ena levítana. Ena apóstoleana nanacapa etá máijarehi Bernabé (te véchajiriruva ticaijare

Ticaurisamurerah). ³⁷ Ema maca máijararecapa eta mapenapahini. Tásiha, máijaracapa eta plata ena apóstoleana.

5

Eta mapecaturahi ema Ananías ésupa esu mayena Safira

¹ Matiarihihivare ema achane ticaijarehi Ananías ésupa esu mayena ticaijaro Safira. Énerichuvare náijararecapa éna eta nayehe apaquehe napenapahini. ² Ema maca achane macaerajicapa ticutimurihacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimurihacaca eta plata.

Tacahe, te títecapapa ema achane nayehe ena apóstoleana, máichapa:
—Níjararecahi eta nuyehe apaquehe. Júcahi tamutu eta plata tavachahi —macahepa.

³ Tásiha, ema Pedro máichapa:
—Pítí, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espíritu Santo eta piyumurusirahi ticutimurihacaca eta tavachahi eta piyehe apaquehe. ⁴ Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquicava, pépiyahirahipaipa pímjachahi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máimararacahi eta juca pépiyahiraivahi. Vahi vítinahini pivayuaracahini —máichapa ema Pedro.

⁵ Te masamapa ema Ananías eta juca, tiáquipaicavapa, matupiru tépena. Te nasamairircapa ena achaneana, namuturinehi tipicana ichape. ⁶ Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

⁷ Te taequenepa eta mapanaquene hora, títecapapa esu Safira, mayena ema Ananías. Vuíchaha suéchahini eta máicharacavahi ema suima eta máepeniraihapi. ⁸ Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:
—Eta tavachahi tamutu —suíchapa.
⁹ Tacahe, ema Pedro máichapa:
—¿Tájaha tacayema ecuticacahi eta juca épiyahiraivahi evayuarasirahi ema Espíritu Santo? Ávane tichavana ena técarapananahi ema pímaini. Tásiha, puiti pítipavayare tiámvianayare —máichapa.

¹⁰ Tacahe, eta máichirahi ema Pedro, enevanepa tiáquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenapavare. Navehavarepa esu, námaparepa náecarapanapa te machacaya ema suímaini. ¹¹ Te nasamairircapa namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

Máijaracahi ema Viya ena apóstoleana eta náimeresiraya eta tiáramicareana

¹² Tacahe, ena apóstoleana, ichape eta máijarasiravacahi ema Viya eta náimeresirayare eta tiáramicareana te namirahu ena apamuriana achaneana. Ticurujicacánahivare tamutu sácheana ena tisuapajirahiana te náurujisirareva te tajuhe eta Templo, te tayehé eta alar máepiyaruhi ema reyni Salomón. ¹³ Namutu ena apamuriana achaneana

máehicarahanaríchaha ema Jesucristo, vahi napatsicavahini nacanara taicha namutu napicauchahi. ¹⁴ Camurianapaipasera ena ajairana énapa ena esenana ena téhicanapaipahi ema Jesús. ¹⁵ Camurianaipa ena nacanararuapanapáipahi ena apóstoleana. Tacahe, námavacapahi ena apamuriana nacajumaqueneana, nanaquicapaipa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana. ¹⁶ Énerichuvare, títecapanapa te Jerusalén ena achaneana tiásihana te avasareana nachacayarahana. Námapahi ena nacajumaqueneana énapa ena návaháruana ena éreanana. Namutu ena nani tinaracanapahi tayehe eta náichavaquenévanahi.

Naémératacapa ema Pedro émapa ema Juan

¹⁷ Váipasera máuricahini eta juca ema corregidor, énapa ena machamuriana. (Saduceoanahi éna.) Tisemanarinehi táichavenehi eta náehisirahi ena camuri-queneana achaneana eta náimiturapihi ena apóstoleana. ¹⁸ Tacahe, nacavairipipa nacaratatajica ena apóstoleana. Náimisiapapa te cárcel, ticaeratanapa. ¹⁹ Émasera ema Viya majaneacavacahi éna. Te jena yati, mavanecapa ema mayehe ángele. Mavejiapaná etá cárcel návhahí éna. Mavanecapa náuchuca, ánipa maicha:

²⁰ —Eyana ímerecava te jena Templo. Emetaca ena achaneana etá mavarairahi ema Viya máitsivachaya arairuya etá náitaresirayare ena téhicanaya ema Jesucristo —máichavacapa ema ángele.

²¹ Náuchusihapa ena apóstoleana te cárcel, timapicuhichaha te tiyananapa tayehe etá te Templo. Tinahacavanavarepa tímiturecana.

Tacahe, te jena yáticarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tiúrujicavanapa namutu, nacavanairipipa náepana ena apóstoleana etá te cárcel. ²² Te títecapanapa te cárcel ena suntaruaná, navejiacapa etá tapaja. Nájinarihpahisera. Tacahe, tichavanapa nayehe ena náquenuruuhana. Nametacapa etá nájinarihpahi ena apóstoleana. ²³ Tacahe, náichapa:

—Te vítecapauchapa etá cárcel, vímahapa tanasihi ticaeratahi etá tapaja. Natiarihivare ena séntinélana tijaneacanahi etá tapaja. Tacahe, te vivejiacapa etá tapaja, nájina émanainahini vichimapahini te tajuhe —nacahepa ena vanairucana.

²⁴ Te máechapa ema corregidor, énapa ena machamuriana tuparairucana, émapa ema náquenumuri ena tasuntarurana etá Templo, náramirinehi ichape. Tacahe, náichacacapa:

—¿Tájaha tacayema etá juca? Vaipa vímatiequeneha. ¿Tájahapuca vícharacavaya? —náichacacapa.

²⁵ Téchajiricavanarichaha éna, títecapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui te Templo tímiturecanahi nayehe ena achaneana —máichapa.

²⁶ Tacahe, ema náquenuruha ena suntaruaná, émajacaruvapa tiyana. Mámamurihapaipahi ena suntaruaná, náepanayarehi ena apóstoleana. Jéhesare, námamurihapa, tájinaserá náicharacapahini etá námirapahi taicha napicahi ena apamuriana achaneana natupisicavacahini te márijahiana.

²⁷ Te nacaitecapapa, nacatupihapa te namuri ena tuparairucana. Tásiha, ema corregidor ánipa maicha:

²⁸ —Víti vivanecahehi muraca eta vaipa ecuapechava ecuimitureca eta máechepusirahipuca ema Jesús, tasiha, éti ímiyanavarichucha ímitureca. Namutupa ena achaneana tayehe eta juca viávasa Jerusalén náitucapa eta ímiturapiana éti. Visapihapa evaraha vítiyare táecatiha eta máepenirahi ema achane Jesús. ¿Tájaha tacayema vahi esuapahavihini? —macahepa.

²⁹ Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti. ³⁰ Víti, véhicahi ema Viya, émarichuhi nacasiñaquenehi ena viáchuca naveanaini. Émahi ema ticaechepecuahi ema Jesús, ema ímicaparuhi eta émetatasirahi te crusu. ³¹ Tásiha puiti, ema Viya máunacahi te anuquehe anuma. Macaejacahi te mavaure tayehe eta trono. Máijaracaripa eta matuparahayarehi Aquenucayarehi Ticatiurahiyareva. Taicha mavarahahi ema Viya vimutuyare viti israelítana véneuchavaya mayehe, apaesa éma tiperdonachahaviyare tamutu eta vipecaturana. ³² Víti véchajisihahi eta juca taicha vímahaquenehi eta mápechiravahi titareca. Víti véchajisihahi maicha ema Espíritu Santo máijararuhavihi ema Viya viyehe viti visuapaná éma —náichapa ena apóstoleana.

³³ Te nasamapa eta juca ena aquenucana, tisemanapa. Navarahapa nacapacavacayarehini. ³⁴ Matiarihihisera te nataracu ema achane ticaijare Gamaliel. Ema tuparairucahi doctrinero fariseo. Ema maca achane ticapicahuhi nayehe namutu ena achaneana. Tacahe, titupihapa te nimirahu. Macavanairipipa náuchucachaha ánipina ena apóstoleana. ³⁵ Tacahe, máichavacapa ena machamuriana aquenucarahaná:

—Tátanaveana, nujaneanana israelítana. Échapava eta evarahaquenehi íchaya nayehe ena nani achaneana. ³⁶ Échapuca éti cape juca táitaresirahi, téchepucahi ema émana achane ticaijare Teudas. Éma macahehi eta máitupajijiásiravahi. Tásiha, camuriana ena achaneana téhicanahi. Cuátrocientoanahi ena ajairana ena machaneranahi. Tásihasera, nacapacahi ena mánarana. Tásiha, namutu ena téhicanainihi téjanerepaicanahi. Títavapa tamutu. ³⁷ Tásiha, te taequenevarepa, te jena sache eta nacatupairahi ena achaneana, téchepucavarepa ema apana ema ticaijare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicaná ena téhicanainihi. ³⁸ Tiuri puiti, esamanu eta juca numetaruheya. Ésamiricachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, titavayarehi. ³⁹ Téheserapuca mayehehi ema Viya, vahi eratahaimahi ecamitiaca. Échapavachucha. Machu ecucaemuñava ecanara ema Viya —máichavacapa.

⁴⁰ Tacahe, tésamiricavanapa namutu. Náimisiapavarepa ena apóstoleana. Náestacavacapa. Tásiha, navanecavarepa eta vaipa nacuapechava nacuechajisiha eta máechepusirahi ema Jesús. Tásiha, nacaiticavacapa. ⁴¹ Tacahe, tiúchucanapa ena apóstoleana te náurujisiavahi ena tuparairucana. Tiúrisumoreanapáichucha eta nacaestairahi. Ánipa nacahe:

—Ema Viya máimraracahi eta vicamichirahi tamutu eta náimicatsiriasirahavihi táichavene eta véhisirahi ema Jesús —nacahepa.

⁴² Váhiquene nacatsimayahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étapa te pétiana.

6

Ticatuparacasiana ena siéteana ajairana

¹ Te jena sácheana, eta nasimutuvaipa ena téhicanahi ema Jesús tisiapanapaipa ticajanemurianapaichucha. Natarihivare ena israelítana, apáechajiríruvanarípa éna. Natarihihi ena páurepanana te nataracu énapa ena máimaruana. Ena nani najacapahi eta nayehe ración tamutu sácheana. Étana sache, ena nani apáechajiríruvanarípa vaipa náurisamurehini taicha vaipa nácuticacahini náechapajirícahini ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneananarichuhi máimaruana —nacahepa.

² Tacahe, ena dócequeneana apóstoleana nacurujicapa namutu ena téhicanahi ema Jesús. Tásicha, náichapa:

—Vahi táuricahini víchepaicahini eta vicametarairuira eta máechajiriruva ema Viya. Ticaichepairicahavipa eta víjarasirahi eta tinicacare ena vichamuriana. ³ Tiuri puiti, nuparapenaveana, tacamuñu vinacayare siéteanaina ena ajairana te emuri éti, nácani ímatiqueneana tiúriana achane, téchemarahiana náimatiéqueneha tamutu, mávaháruuanahivare ema Espíritu Santo. Énaina vituparaca naicha eta juca. ⁴ Taicha víti vímiyanavayare viyujaraca vímiturecayare eta máechajiriruva ema Viya —náichapa ena apóstoleana.

⁵ Tacahe, namutu navaraha eta náechajiriruvahi. Tacahe, ticanerejianapa ena ticatuparanahanayare. Navehapa ema Esteban, achane tiuri, tisuapajirahiquene mayehehi ema Viya, mávaháruuhivare ema Espíritu Santo. Navehavarepa ema Felipe, ema Prócoro, ema Nicanor, ema Timón, ema Parmenas, émapa ema Nicolás*. ⁶ Tacahe, náichuhapa te namirahu ena apóstoleana. Tásicha, nanacapa eta navahuana te nachutiana, nayujarauchapa, náijarasihapa eta náematanerepiyarehi.

⁷ Tiuri, eta nasamirahi eta máechajiriruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujaracarahiana israelítana náunacaipa te nasamureana eta náehisiraipa ema Jesucristo.

Eta nacaratasisirahi ema Esteban

⁸ Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana.

⁹ Tatiarihivare te Jerusalén eta apana nárujisirareva. Tiúrujicavanahi ena israelítana prisionéroanaini náuchucureanapasera. Éna tiásghanahi te apanana avasareana, te Cirene, te Alejandría, te Cilicia, etapa te Asia. Nácapaemajiricapa ema Esteban te yátupihipuca ema Jesús émaquenehi Cristo. Vahi nasuapahini taicha téavicavahi eta namasuapajiraivahi. ¹⁰ Ema Espíritu Santo máijaracahi ichape ema Esteban eta máitusiraya téchajica. Eta tacahe, vahi náratahahini nacachuriaca éma. Tisemanapa eta máitahasiravacahi.

¹¹ Tacahe, náimitucapa ena apinana ajairana navachachaqueneanahi eta náepiyequenahiraya ema Esteban. Ánipa naicha eta náimitusirahi:

—Visamahi ema maca macaecaahi ema víyarahaini Moisés, macaecahevare ema Viya —náichapa.

¹² Tacahehi, eta nacaechepusirahi eta semanere nayehe ena achaneana, énapa ena aquenucarohana, énapa ena escribánoana. Náimiyusemacavacapa.

* ^{6:5} Ema maca Nicolás, ticavasainihi eta te avasare Antioquía eta máuchusinehi. Éma, apavasanahi, máehicahinihivare eta nayeherepiana ena israelítana. Tásicha puiti, máehicaipa ema Jesucristo.

Tásicha, nacaratacapa ema Esteban. Námapa ticayaserehiya te namirahu ena tuparairucana. ¹³ Tásicha, náichuhavare ena apamuriana tépiyaequenehanaya. Ánipa nacahehi eta náepiyahiraivahi:

—Ema maca achane vahi máituca timatina macaecaahi eta viyehe Santo Templo. Máepuruvare eta viyeherepiana. ¹⁴ Énerichuvare macahehi ema Jesús Nazareno máquipaicayareji eta Templo, máitsivachayarehiji eta viyeherepiana máijararuhavihi ema víyarahaini Moisés —náichapa ena tépiyahirahianahi.

¹⁵ Tacache, namutu ena natarihiqueneanahi náejaruanahi náimaranaracaripa ema Esteban. Eta mamira macavasirahi ema ángele.

7

Eta maconsejarapi ema Esteban

¹ Tacache, ema corregidor mayaserecapa ema Esteban, ánipa maicha:

—¿Yátupihi ene picaheli eta juca nametarapianahi ena nani? —máichapa.

² Tacache, majicapapa ema Esteban, ánipa maicha:

—Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávihaichaha te tinapaica te apauehe ticaijare Mesopotamia, ticaijarevare Caldea. Vuíchaha mayanahini macavasahini te Harán. ³ Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apauehe. Núti níjaracaviya eta arairu piávasaya” máichapa ema Viya. ⁴ Tacache, ema Abraham masuapapa; tiúchucapa eta te tinapaica te Caldea. Tiyanapa eta te avassare Harán. Te taequenepa eta máepenirahi ema máiyaini, mavanecapa ema Viya ema Abraham máiteca eta te juca apauehe viávihahi puiti víti. (Te jena áñoana ticaijarehi Canaán.) ⁵ Tájinaserá máijaracahini mayehenahini apauehe, ánicuchicháinahipucáini. Mametacahisera eta máijarasirayarehi eta mayeheyarehi apauehe. Taicha eta apauehe máijaracayarehi nayeheyarehi ena machichanavequeneana te maépenapa ema Abraham. Nájinarichahasera machichanaveanainahini te jena áñoanahi. ⁶ Énerichuvare mametacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivanayaresera naicha ena napasureanaya. Nacajireyare. Cuatrociento áñoyare eta náichirayare. ⁷ Nútisera, níjaracayare eta náicuñayare ena achaneana te jena avasare nácani ticajireanayare ena pichichanavequeneanayare. Tásicha, te taequenenapa, nucuchucuhavacainapa. Tásicha, títecanainapa ani te juca najirauchihanuyare” máichapa ema Viya.

⁸ Ema Viya mafirmachapa eta matratune eta máitauchirayarehi eta juca máechajiruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu ena machichanaveana ajairana, énapa ena mámariequeneana ajairana. Eta tacaheli, te óchoquenepa sache eta máuchusirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuhivare máichavacapahi ena dócequeneana machichanaveana, ena víyanaveanaini víti. ⁹ Ema José, nacapinaruhi ena maparapenaveana taicha máemunacapanahí ema naiya. Eta tacache, náijararecapa ena maparape-naveana nayehe ena apavasanana. Tásicha, éna náequecapa náijararecapa

mayehe ema ticavasa te apaza avasare Egipto. Émasera ema Viya majaneacahi ema amaperu José. ¹⁰ Macatiuchahivare tayehe eta macatajivairana. Máijaracahivare eta máitucaqueneyare. Ema rey aquenucahi tayehe eta Egipto máemunacahi ema José. Mámaticahai eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aquenucahi máicha, nayehe namutu ena ticavasana te Egipto.

¹¹ Tásiha, te jena áñoanahi, táitecapauchapa eta ecuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene. ¹² Émasera ema Jacob te masamairiricapa eta tatiarihirahi eta tinicacare te Egipto máunaruhi ema rey, máevatacapa ena machichanaveana eta navacharepana eta tinicacare. Te téchuriacanavare eta tinicacare, mápechavarepa máevataca ena machichanaveana. ¹³ Te apihequenepa eta nachavirahi, ema José tímimatichavapa nayehe ena mapapenaveana. Tacahe, ema rey mapaenumavapa máimati énairahi maparape-naveana ema José. ¹⁴ Tacahe, ema José máimichuhapa ema maiya Jacob énapa ena natarihiquenueanahi te mapena. Setenta y cincoqueneana eta nasimutuva éna. ¹⁵ Tacahehi eta mayanirahi ema Jacob macavasairahi tayehe eta te Egipto. Étapa máepenihahi. Te táequenepa, étarichuvare náepenihahi ena machichanaveanaini viáchucanaveánaini. ¹⁶ Váhisera nacaecarasihini eta náperanaini te Egipto. Nacayejecapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ema Abraham*.

¹⁷ Tiuri, tiánehipa eta máitauchirayarehi eta máechajiruvahí ema Viya matratunehi mayehe ema Abraham, ánaquiaparíchaha eta áñoana eta máijarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquipa náejapasihahi te Egipto. ¹⁸ Tayerevahí eta año, titupihapa ema apaza rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihi máemataneanainihi ema José. ¹⁹ Masapihapa macatianacavacahi ena viáchucanaveanaini taicha eta náejapasirahi éna. Macaetemajircavacapa. Macavanairipipa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca. ²⁰ Tacahe, te jena sácheinahí, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajurusirahi ena ticachichana te napena. ²¹ Te náimahapa téchemarahipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távhahi te cajacure. Ésusera esu machicha ema rey suíchimavapa, suvehapa. Ésupa ticajurucahi suchichayarehi. ²² Tacahe, ema amaperu Moisés ticaimitucasipa tamutu eta náitupajijiásiravanahi ena ticavasanahi te Egipto. Tacahe, ichape eta máitupajijiásiravahí eta máechajisirapahí étapa eta máematanerepianahi. ²³ Te ticayehépa cuarenta año ema Moisés, mavarahapa tiyana máejirapanavaca ena majaneanana israelítana. ²⁴ Te

* ^{7:16} Ánaquiaparipa tatiarihi eta avasareni Siquem, návasa ena mámariequeneana ema achane ticai-jare Hamor. Te tachacaya eta jena avasareni, tatiarihihi eta mari enurujuhe. Tacahe, ánaquiaparipa ema Abraham mavacharecpa eta apaquehe táimivehapa eta mari enurujuhe, mavarairahi sucae-carasiyayarehi esu mayena Sara, énapa namutu ena machichanaveana. Émaripa étarichuyareva macaecarasiyahi. Ena machichanaveana ichapemurihi áñoana eta náechapajirisirahi eta ecari, taicha étarichuyarehi nacaecarasiyayarehi éna, énapa ena apamuriana mámariequeneana ema Abraham.

títecapapa ema Moisés, máimahapa ema émana achane ticavasa te Egipto téhararecahi, máehahi ema majaneana ema Moisés. Tacahe, macatiuchapa ema majaneana. Émapa títsirijiequenehahi. Macapacapa ema ticavasa te Egipto.²⁵ Eta mapanereruhi ema Moisés, mavarahahi nacaicutiarayare ena majaneanana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna.²⁶ Tacahe, te apanaqueunepa sache, ema Moisés máimahapa téhacacanahi ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecacahi” máichapa.²⁷ Tacahe, ema túmepanahi mayehe ema apava, máevatajicapa ema Moisés, máichapa: “¿Tájaha tacayema pímisiapava píti eta viyehe? ¿Nájahapuca tivanecavihi juéseviyarehi eta viyehe, viáquenumuriviyarepuca viti?²⁸ ¿Pivarahapapuca picapacanuyareva núti, tacutiyarepuca eta picapasirahi cape ema egipcio?” máichapa.²⁹ Te masamapa ema Moisés eta náechirahi ena achaneana émairahi ticapaca, tiyanapa tijunahi eta te apaquehe ticaijare Madián. Ánaquipa eta máerajisiavahi maitatijiavahi. Mavehapa esu mayena, ticaparapepa. Apinana ena machichanaveanahí ajairana suyehe esu mayena.

³⁰ Te cuarenta áñopa eta mávihirahi ánaqui, te étana sache, tipairiricahi te mávapahiana apaquehe tachacaya eta cerro ticaijare Sinaí, majanearesirahi eta uvesana. Tacahe, tiúcupaicapa ema Viya eta te távihahi eta chéyaraji yucuqui. Timurujirinehi eta yucuqui maicha ema Viya. Váhisera tájuchahini táitahini eta tapacajiana.³¹ Eta máimararasirahi eta juca ema Moisés, máramirinehi. Tiyanapa mapaucha, máimatiyarehi. Te macachacayapa, masamapa eta mahu ema Viya. Ánipa máichahi:³² “Nútichucha Viya nacasiñaquenehí ena piáchucanaveanaini. Nútirichu macasiñaquenéni ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimararacahini.³³ Tásiha, ema Viya máichavarepa: “Pivejuchupevachava eta péparuveva taicha santo eta juca apaquehe piávihahi piácatayapairuhi.”³⁴⁻³⁵ Pisamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávianahi te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaicahi numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivaiyahi. Étasera te tínapucainapa vahi náesachahini éma.³⁶ Tásiha, émarichuhi ema maca Moisés macuchucuhavacapa namutu ena majaneanana tiásihanahi te Egipto. Eta macuchucuiravacahi, máimerecahi eta tiáramicareana te jena avasare Egipto, étapa eta te mar ticaijare Títsiama Une, étapa te mávapahiana vámahi. Cuarenta año macahehi ema Moisés eta máichirahi eta juca.³⁷ Émarichuva ema Moisés ticaechajiruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Títecayare ema apanayare profeta mavaneruyare ema Viya, tacutiyare eta mavañesiranuhi núti. Éma, tiúchucayare te namuri ena viámariequeneanayarehi. Tatuparaca nasuapayare tamutu eta mavanairipianayare” macahehi ema Moisés.³⁸ Émarichuvare ema Moisés, ema máichuhauquenehí ema ángele tiápanaya eta te jena cerro Sinaí, nacuchapirahi ena achaneana machamuriana te vámahi. Tasiha, máechajicahi ema Viya ema Moisés. Te titapiricapa ema

Viya, ema Moisés tiúcupaicapa, mamevacavacapa ena achaneana tamutu eta mamecasivanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehe viti israelítana výchicanaya. ³⁹ Eta mávihirahí ema Moisés te cerro, vaipa náimahahini ena viáchucanaveanaini. Tásicha, vaipa návarahahíni náehicahíni éma. Navarahapa tichavanayarehi te Egipto. ⁴⁰ Tacáhénapa, te náichapa ema Aarón: “Vivaraha pépiyasinahavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinénihi te Egipto” náichapa. ⁴¹ Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; náijaracasichahi eta nasiñaraji eta námapahuhi, náimicutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyaruhi. ⁴² Émasera ema Viya, eta máimairahi eta juca, vaipa máuricahini. Tásicha, vaipa majaneacavacahini éna. Váhisera máicuñacavanehini. Másapapa ticasíñarajiana, téneuchavanapa te tamirahu eta nasiñarajiana. Tásicha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitisicanuhi nútì, eti israelítana. Vaipa nútinhini ácasiña eta jena cuarentaquenehi año te mávapahi vámahi. ⁴³ Étapa ecasiñahi épuyumirauchahí eta esiñarajiana ticaijare Moloc. Énerichuvare ecasiñahi eta jarairiqui ticaijare Renfán. Eta ecaparuhi, vahi nútinhini íjaraca. Étapa íjaracahi eta esiñarajiana. Éti, éperajiricapa eta esiñarajiana te tayeheana trono tapenahuana épiyaruhanahi. Eta tacahe, nucajanerepaicaheya te apachacaya apaquehe ticaijare Babilonia” máichapa ema Viya.

⁴⁴ Te jena mávapahi vámahi ema Moisés mavanecapa ena viáchucanaveanaini náepiyaca eta mapenayarehi máucupaisirareyarehi ema Viya. Mavecunaruhi eta tiáviha te anuma máimechaquenehi ema Viya. Étarichu náunasisare eti ajureca tiáma eta mavanairipiana ema Viya. ⁴⁵ Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamurihapa ema Josué. Ena achaneana námapahi éna eta mapena máucupaisirare ema Viya. Nacaijuhepa eta apaquehe natuparahahi. Natiarisihera ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicatacavacahi. Tacahe, tayerevahí eti áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eti tatiarihirichaha. Émapavavare máechapajirica. ⁴⁶ Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amairihayarepa mari. ⁴⁷ Váhisera títauchahini eti mapanereruhi ema David, taicha ema Viya vahi másapahini. Émapa títauchahí ema machicha ticaijare Salomón. Émapa tépiyacahi eti Templo.

⁴⁸ Tiuri puiti, numetacahevare, ema Viya ticavasahi te anuquehequene anuma. Vahi títecaimahi macapena te témploana vépiyaruanasami viti páureanasami achaneana. Taicha ema Viya máichapa eti máechajiriruva: ⁴⁹ “Te anuma táchicahehi eti nuyehe trono néjasihahi. Ánaqui tásicha eti nuvanairipiana tayehe te juca apaquehe. Nútì vahi nácamunu eti peti te juca apaquehe. Nútì vahi nácamunu eti nunarasirarena. ⁵⁰ ¿Váhipuca échava eti nútirahí náepiyaca tamutu eti juca ímahaqueneanahi te juca apaquehe?” macahepa ema Viya eti máechajiriruvahi.

⁵¹ Puítiripa eti esamararacanuanahí, ¿táchicahehi eti namura-

casamurevanaini ena iáchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasuapirahi ema Espíritu Santo. Éti, eta epanereruana tacuti eta napanereruana ena iáchucanaveanaini eta navainarajivana. ⁵² Éna, náemecatajivachahi namutu ena profetanaini. Nacapacavacahi nácani téchajishi-hanahi eta máitesirayarehi ema Cristo. Tásicha puiti, eta máitesiraipa ani, épururipa éma, masapihapa íjararecahi ímicapacahi éma taicha tétavicavahi eta máurivahi. ⁵³ Étaripa eta mavanairipiana ema Viya, ángeleana ena tíjarapananahi ema Moisés. Échajicuhaipahinéni éti, esamaripahinéni; váhiqueneséra esuapahini —máichapa ema Esteban eta maconsejachiravacahi.

Eta máepenira ema Esteban

⁵⁴ Te nasamapa ema Esteban eta máichirahi, tisemanarinehi. Tinicavanarinehi eta nasemaneva. ⁵⁵ Émasera ema Esteban vahi mapicaracava-cahini éna taicha mávaháruhi ema Espíritu Santo. Máesenicapa te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya. ⁵⁶ Tacahe, ema Esteban máichavacapa ena achaneana natarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

⁵⁷ Énasera eta nasemanevahi, tichujiquiñahavanapa. Tijajamurihanapa náetereuchapa namutu. ⁵⁸ Nacaratacapa, námapa te tachachacu eta avasare. Ánaqui eta natupisisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehehi comisario ticai-jarehi Saulo. ⁵⁹ Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

⁶⁰ Eta máquipaisiravahi, tépuyucapa tipiaracapa muraca. Ánipa macahe:

—Tata, piperdonachavaca ena nani eta juca náichiranuhi napecaturahi —macahepa.

Te titapiricapa eta mayujarasirahi, tépenapa.

8

Ema Saulo mapanerecha mapanajiricavaca eta macatichiravacahi ena téhicanahi ema Jesús

(Hch 22.6-16; 26.12-18)

¹⁻² Ema maca Saulo, eta mapanereruhi tacutihi eta napanereruana ena ticapacanahi ema Esteban. Tiúrisamurepa éma. Natarihivaresera ena apamuriana ajairana tiúripanereruanahi. Navehapa eta máquehe ema Esteban, náecarapanapa. Tíyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi ema Jesús tayehé etá avasare Jerusalén. Téjanerecanapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énasera ena apóstoleana nanasirichuhi te Jerusalén.

³ Tacahe, ema Saulo, ema náinapuaraquipahi ena tipanajiricanahi ena téhicanahi ema Jesús. Tisiapanapaipa te napenana. Nacaratacavacapaipa ena nachimapaqueanapahí ajairana, esenana. Nachururupaicavacapaipa etá námirapahi te cárcel.

Ema Felipe ticametarairu te avasare Samaria

⁴ Te jácani avasareana náitecapihapahi ena najunaqueneanahi, tímiyanavanarichucha ticametarairuana eta máimiturapiana ema Jesucristo. ⁵ Ema maca Felipe majunaquenehivare. Títecapapa eta te avasare ticaijare Samaria. Tacahe, ticametarairupa nayehe ena achaneana eta náehisiraya ema Jesús, émairahi Cristo ema nacuchapaquenehi. Tiúrujicavanapa ena achaneana. ⁶ Namutu nasamararacahi eta macametarairuirahi ema Felipe. ⁷ Taicha náimahapa eta macanarasiravacahi ena nacajumaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiárecanapáipa eta náuchusirapahi. ⁸ Eta tacahe, ichaperinehi eta náurisamurevahi ena achaneana tayehe eta jena avasare.

⁹ Te jena avasare Samaria, matiarahihi ema émana achane ticaijare Simón. Iápemarehi éma. Ánaquiasiparipa eta macaetemajirisiravacahi ena achaneana. Títupajijiácavahi tépiyacava éma. ¹⁰ Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiruvahi:

—Ema maca achane titupajijiácavahi ichape maicha ema Viya —nacahepa.

¹¹ Ánaquiasiparipa eta mavayuarasiravacahi éna, tayehe eta mahiápemarevahi. Eta tacahe, napicauchahi éma. ¹² Téhesera nasamapa ema Felipe, na-suapapa eta nasamirahi eta máechajiriruva ema Viya. Náehicapa eta mametarairuhi mayehe ema Jesús eta émairahi Cristo, ema nacuchapaquenehi. Tacahe, camuriana ena ajairana énapa ena esenana ena ticaicchasianahi taicha eta nasuapirahi ema Jesús. ¹³ Émaripa ema iápemaréni Simón, masuapavare éma. Ticaicchasisvarepa. Máehicapa macachanepaipa ema Felipe. Ichape máramipahi eta ichapequeneana tiáramicareana máichaqueneánapahi ema Felipe.

¹⁴ Tiuri, te Jerusalén, nasamairircapa ena apóstoleana eta náehisiraipahi ema Jesús ena achaneana ticavasanahi te avasare Samaria. Tásicha, ticaevatavaneanapa ema Pedro ema Juan. ¹⁵⁻¹⁶ Tiuri, ena téhicanariпа ema Jesús, vuíchaha máucupauchahini ema Espíritu Santo, mávahácavacahíni éna. Tacarichuichaha eta nacaicchasirahi eta navarairahi náehica ema Viáquenu Jesús. Tásicha, te títecapanapa ema Pedro ema Juan, tiyujaracanapa nayaseacapa ema Viya máijarasiraina ema Espíritu Santo eta mávahásiravacaina ena téhicanipahi. ¹⁷ Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espíritu Santo mávahácavacaripa eta náemamachutíchiravacahi éna. ¹⁸ Tacahe, ema Simón eta manecapirahi eta mávahásiravacahi ema Espíritu Santo te náemamachutíchiravacahi éna, mavarahapa éma mavachachavaca ena apóstoleana. ¹⁹ Ánipa máichavaca:

—Íjaracanu núti apana eta nítusiraina eta ítucaquenehi, apaesa te nunaca eta nuvahuana te nápusiana ena nácani achaneana, máucupaicapaini ema Espíritu Santo, mávahácaini éna —máichavacapa.

²⁰ Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta máijararuuhaviana ema Viya. ²¹ Vahi pítiparacaina píti, taicha eta pipanereruana vahi tátupiruvahini mayehe ema Viya. ²² Pínajica eta pivainarajivana. Piyaseaca ema Viya, tijuricati tiperdonachavi eta tamaurivahi eta pipanereruhi píti. ²³ Taicha nímatiacavíhi eta pétáviuchirahi eta picapinaruraivahi. Eta juca picuhehi taicha vahi tñajiacavimahi eta pivainarajiva —máichapa ema Pedro.

24 Tacahe, tipicapa ema Simón. Ánipa maicha:

—Ímicatacanu éti, eyujarauchanu me Viya apaesa vahi tacuitauchava eta juca ecayemaqueneanahi —máichapa.

25 Tacahe, ema Pedro ema Juan tinahacavanapa tímiturecana eta máimiturapiana ema Viáquenu Jesucristo. Te tamutupa eta náimitsuresirahi, tiyananapa tichavanayarepa te Jerusalén. Tétavajicanapa te avasarechichana tayehe eta Samaria. Ticametarairuanapa nayehe ena achaneana.

Ema Felipe máimituca ema achane ticavasa te Etiopía

26 Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétuplepicava, piyana te tinapaica te vana. Pivenacuhayare eta achene tiásaha te Jerusalén, tiyana te avasare Gaza. Pétavicayare eta mávapahiana vámahi —máichapa.

27 Tacahe, tétuplepicavapa ema Felipe, tiyanapa. Te achene ticainunacanapa ema achane ticavasa te avasare ticaijare Etiopía. Ema maca achane*, sujupaha esu Candace, reina tayehe eta apaquehe ticaijare Etiopía. Ema maca achane ema tijaneaca eta suímahaqueneana esu reina. Éma, másinehi te Jerusalén, máejirapanahi ema Viya. **28** Ema maca achane machavaquenepaipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaías. **29** Tacahe, ema Espíritu Santo mamecapa ema Felipe, ánipa maicha:

—Pémeñahava te tachacaya eta jena carro —máichapa ema Espíritu Santo.

30 Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa:

—¿Picaicutiara eta jara péchajicurepahi?

31 Ema achane majicapapa:

—Váiparinehi nucaicutiaraimahi taicha nájina nametacanupahini eta tacayemapahi. Te pítucapuca píti pimetacanu, picatajicanu. Yare, piávacuha péjaca te juca nuchacaya —máichapa ema achane.

32 Tiuri, eta máechajicurepahi ema achane, ani tacahehi: “Eta uvesa, te nacarataca nacapacayarepuca, vahi ticatiuchavaimahi. Te nachucamecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi. **33** Tétavicavahi eta nacatsirirairahi éma, tayanapane tájinanéni maviurevainahini. Nájinavare nacatiuchahini. Ena mámarieque- neanaini, nájina náechajisihahini éna”.

34 Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táchajisihahí eta juca libro májurehi ema profeta? ¿Ema táchajisihahí ema maca profeta, vahi apanapuca? —macahepa.

35 Tacahe, ema Felipe tépanavapa mamecapa ema táchajisihahí eta libro. Mamecapa eta émairahi táchajisihahí ema Jesús, ema Cristo ema nacuchapaquenehi. **36** Tacahe, te máechapa ema achane, mapanerequenehahí eta napaisirapahi. Tacahe, te nacapayacapa eta úncure, macahepa ema achane:

—Te juca jararihi une. Nuvaraha pícacásicanu —macahepa.

37 Tacahe, ema Felipe majicapapa:

* **8:27** Eunucohi ema maca achane.

—Tiuri, te yátupihipuca eta pisuapiroha te pisamure eta picasiñairaya ema Jesús, nícacasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

³⁸ Tacahe, macavanairipipa nacaicheca eta carro. Tiúcupaicanapa éna, tiyananapa te únecure. Tacahe, ema Felipe máicachasicapa ema achane.

³⁹ Te tichavanapa tayehe eta únecure, tíjhúchavapa témitiaca ema Felipe, taicha ema Espíritu Santo manaracuhapa. Váipa macaecherahihini. Váipavare máimahahini ema achane. Tímiyanavapasera tipaica ema achane. Tiúrisumrepaipahi. ⁴⁰ Eta máucupaisinehi ema Felipe eta te avasare ticaijare Azoto. Tacahe, tétavajicapaipa eta te avasareana. Ticametarairupaipahi eta máitecapirapahi eta te apana avasare ticaijare Cesarea.

9

Ema Saulo masuapa eta máchuirahi ema Jesucristo (Hch 22.6-16; 26.12-18)

¹ Tímiyanavarichucha ema Saulo eta mapánajirisiraváahi ena téhicanahi ema Jesús, mavarairahi máimicpacavacaya. Tiyanapa tiyasesereca eta órdene mayehe ema corregidor tayehe eta Jerusalén. ² Máichapa ema Saulo:

—Nuvaraha nuyanaya te jena avasare Damasco. Nuvarahavare píjaracanu eta órdene, eta nucaratasisiravacaina ena téhicanahicacha ema Jesús, namutu nácani nétupiaruanayarepahi ajairana, esenanapuca. Nutanucavacayare te nárujisirarevana ena vijaneanana. Présolanayarepahi eta námirayare eta te juca Jerusalén —máichapa.

³ Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Viya tíasiha te anuma. Tamicauchapa éma. ⁴ Tásicha, tiáquipaicavapa eta mapisirahi. Tásicha, masamapa eta mahu ema Jesús. Máichapa:

—Saulo, Saulo, ¿tájaha tacayema picatianacanu pipánajiricanu? —máichapa.

⁵ Majicapapa ema Saulo, mayaserecapa:

—¿Nájahavi piti Tata?

Majicapapa:

—Nuti Jesús. Núti picatianaruhi, eta pipanajirisiravaca ena téhicanuanahi. Pésamiricavachucha, taicha pítijivaichucha píchavahi. Vahi piúrimahi te pímiyanava picatianacanu. Péhicanusera píti —máichapa ema Jesús.

⁶ Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyeho, Tata? —máichapa.

Tacahe, ema Jesús máichapa:

—Péchepuca. Piyana pítécapa te jena avasare. Ánaqui mararihi ema timetacaviyare eta pítauchaqueneyare nuyehe —máichapa ema Jesús.

⁷ Ena apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini.

⁸ Tacahe, ema Saulo téchepucapa eta te máquipaisinevahí. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco. ⁹ Mapana sache eta mapuchuquivahí. Váhivare tinica. Tájinavare máerahini.

10 Tiuri, eta te jena avasare Damasco, matiarihihi ema apava téhicahivare ema Jesús, ema ticaijare Ananías. Émarichuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiarihi, Tata —macahepa.

11 Tacahe, ema Viáquenu Jesús máichapa:

—Piyana pitupiruya te jena calle ticaijare Titupina. Te jena mapena ema Judas, picayaseseruyare ema achane ticaijare Saulo, ema tiásihahi te avasare Tarso. Puiti máenahi tiyujaracahi. **12** Núti néchajicahi éma. Numetacahi éma eta pítacapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

13 Te masamapa ema Ananías, macahepa:

—Tata, namutu timetacanuana eta máichararacavanahi ema achane eta mavainarajivahi nayehe ena téhicaviana ticavasana te Jerusalén. **14** Éma, tímitecahi puiti eta ani, mámapahi eta órdene náijararuhi ena tuparairucana eta te Jerusalén eta máepanirahaviya mapresuchirahaviya vimutu viti véhicanahi —macahepa ema Ananías.

15 Émasera ema Jesús máichapa:

—Piyanachucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macametarairu eta njare nayehe ena achaneana te apanana avasareana étapa eta nayehe ena vijaneanana israelítana. Nuvanecayareva máechajisiha eta njare nayehe ena ichapequeneana aquenucana réyeana. **16** Núti nímechayare eta macatajivairayare ichape táichavenenahi eta máehisiranuyare —máichapa ema Jesús.

17 Tacahe, masuapahi ema Ananías. Tiyanapa tayehe eta peti mávihahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyehe te achene te pítacainapa. Éma, tivanecanuhi níteca eta piyehe. Mavarahahi tichavayare eta pímauririsira. Mavarahavare tiávahácaviya ema Espíritu Santo —máichapa.

18 Tacahe, enevanepa témitiaca eta tépacuchainihi eta máuquiha, téjami-hauquicha. Tichavapa eta máimairirisira. Tásiha, ema Saulo téchepucapa, matupirupa ticaicachasi. **19** Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianarípahi téhicanahi ema Jesús tayehe eta avasare Damasco.

Tépanavapa ticametarairu ema Saulo

20 Tacahe, tépanavapa ticametarairu ema Saulo te náurujisirareva ena israelítana. Máechajisihapa ema Jesús émairahi Machicha ema Viya. **21** Namutu ena tisamararacanahi, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajirícavacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

22 Émasera ema Saulo tiápajucavapanapa eta máitusira ticametarairu. Máimerecahi eta yátupiquenerahi ema Jesús émairahi ema Cristo, ema nacuchapaquenuehi. Te tamutu eta náurujisirarevana ena israelítana eta te Damasco, macapaquechamuripa nácani tictorianacanahi eta véhiruhi.

Ema Saulo nacaratacaya repaini ena israelítana. Émasera tiyanapa tijuna.

²³ Tayerevahi eta áñoana,* ena israelítana napanerechapa nacapacaya ema Saulo. ²⁴ Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna. ²⁵ Énasera ena machamuriana náitucahi eta nayumurusirahi náiyaracuhapa eta te ichape saye. Náitiacapa te tiupi enure. Tacahe, nacajuchuchucapa eta te apachacaya eta yúchama. Tacahehi eta máitujisiravahi tijuna.

Ema Saulo títecaparipa te Jerusalén

²⁶ Te títecapapa ema Saulo te Jerusalén, mavarahapa masiapamuriha ena náinapureanahi téhicanahi ema Jesús. Énasera napicarichucha éma, taicha vuíchaha nasuapahini eta máehisiraipa ema Jesús. ²⁷ Matiarihisera ema achane Bernabé. Émapa tiámahi ema Saulo tímimaticahí nayehe ena apóstoleana. Mametamuriha eta máichararacavahi ema Saulo eta máimairahi ema Viáquenu Jesús eta te achene, étapa eta máechajisirahi, máichuirahivare ema Saulo. Mametacavare eta yátupirahi máituca ticame-tarairu ema Saulo mayehe ema Jesús eta te avasare Damasco. ²⁸ Tacahe, ema Saulo manasipa te Jerusalén. Masiapamuriha éna, énapa macacha-nejircavacahi. Vahi mapícaracavahíni eta macametarairuirahi mayehe ema Viáquenu Jesús. ²⁹ Máechajiricavacapahi ena israelítana[†] te jácani mácapajisihavacapahi. Macanaraemachavacahi éna. Vahi náuricahini eta máimiturapianahi. Tisemanapa mayehe. Tásicha, navarahapa nacapacaya éma. ³⁰ Nasamairiricapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, étapa nachavinehi. Tiánucuhapa éma, tiyanapa macarichupa.

³¹ Tacahe, tiúricavanapa ena náumurivana ena téhicanahi ema Jesús tiávhana te apanana avasareana tayehe te Judea, te Galilea, étapa te Samaria. Tásicha, tétumechacacanahi eta náimiyaniravaya napicauchiraya ema Viáquenu. Máimicatamurihahivare ema Espíritu Santo. Eta tacahe, camurianapaipavare ena téhicanahi.

Eta manarasirahi ema achane ticaijare Eneas

³² Tiuri, ema Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticaijare Lida. ³³ Matiarihi ema émana achane ticaijarehi Eneas. Macajumaquenehi éma. Ocho áñoripahi eta macajumairahi. Vaipa táurihini tiyamuriaca, vähivare máechepucuhini te macamane. Tacahe, máitecapauchapa ema Pedro. ³⁴ Máichapa:

—Pésenicanu, Eneas. Ema Viáquenu Jesucristo ticanaracaviya. Puiti tájinapa eta pijumaini. ¡Péchepuca! —máichapa.

Tacahe, ema Eneas enevanepa téchepuca. Tájinapa máichiravainahini. ³⁵ Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticaijare Sarón. Eta náimairahi, náinajicapa eta nayeherepianaini. Tásicha, náehicapa ema Viáquenu Jesús.

Eta suápechirava titareca esu Tabita

* **9:23** Te pivaraha pecha, pitanuca te libro Gálatas 1.18. † **9:29** Ena nani, yátupiqueneanahi israelítanahí, náuchureanahisera te jácaniana apanana avasareana. Táitusiava, apaechajiruvanaripa eta ticaijare griego. Puiti tichavanaripa eta te Jerusalén, návasahi ena ticachichanaini.

³⁶ Te jena sácheinahí, sutiaríhi esu esena ticaijaro Tabita, eta suátserepihi Dorcas. Ésu, ticavasahi eta te avasare ticaijare Jope. Ésurichuhivare téhicahi ema Jesús. Eta suítaresirahi esu suca esena, sucajivaca ena páureana eta suímaqueneana. Tímicatarahi nayehe nácani ticaijuheanapahi. ³⁷ Te jena sácheinahí, esu Dorcas ticaajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anukehe téqueneha piso.

³⁸ Eta juca avasare Jope tachacayaichuhi eta apána avasare Lida, eta mávihahi ema Pedro. Náecharipahi eta matiarihirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha viámavi puítirichu ánaqui te Jope. Pímahapanaini esu vémunaruquenehi vichamuri Tabita. Tépenaipahi —náichapa.

³⁹ Tacahe, tiyanapa ema Pedro, máehicavacapa éna. Te títecapanapa, náimisiapapa eta te tajuhe suávihahi esu Dorcas. Namutu ena esenana máimaruhanahí, te náimahapa ema Pedro, náurujiacapa. Tíyahanapa, náimechapa ema Pedro eta namuirihana supariruanahí ésu te achancerichaha. ⁴⁰ Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimaranaracaripa esu esena suépenaque. Tásiba, máichapa:

—Tabita, péchepuca.

Tacahe, ésu téjamihauquichapa. Suímahapa ema Pedro. Téjahapaicapa.

⁴¹ Tacahe, macaratacapa eta suvahu, macaechepecapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa titareca. ⁴² Tacahe, náechapa namutu ena ticavasanahí eta te avasare Jope. Camurianarine ena tisuapanahí ema Viáquenu Jesús. ⁴³ Ema Pedro manasipanapa jena sácheinahí tayehe eta avasare te mapena ema machamurihivare ticaijare Simón, náimijarechavare Suélareru.

10

Ema Viya mavaneca ema Pedro máimitupanayare ema Cornelio

¹ Te jena avasare ticaijare Cesarea matiarihi ema émana achane romano ticaijare Cornelio. Militar ema achane. Eta mávacure ema capitán, comandante te étana compañía tayehe eta batallón ticaijare Italiano. ² Ema maca achane mapicauchahi ema Viya. Tamutuhi sácheinahí tiyujarauchavahi. Máimitucavacahivare namutu ena machichanaveana énapa ena tiávihanahí te mapena. Énerichuvare máimicatacavacahi ena israelítana páurequeneana, máijaracahi eta camuri plata. ³ Te jena sache, las trésquenepa cáperehi, ema Cornelio tiyujaracahi. Tíjahúchavapa máimaha máucupauchahi ema émana ángele mavaneruhi ema Viya. Máechajicapa ema ángele, máichapa:

—¿Pícharacava? Cornelio —máichapa.

⁴ Tásiba, ema Cornelio tipicarinehi eta máimaranasirahi ema ángele. Majicapa:

—¿Tájaha pivaraha eta nuyehe, tata?

Tásiba, máichapa ema ángele:

—Tímitecanuhi numetacavi. Eta piyehéana oración piyujarauchiravana etapa eta pímitasiravacahi ena ticamunuvana páureana, táitecapauchahi tamutu ema Viya. ⁵ Pímivanereca puiti náepana ema achane ticaijare Simón, eta máchucarapihivare Pedro. Ema tiávihanahí puiti te jena avasare ticaijare

Jope. ⁶⁻⁷ Eta peti máitecapihahi mapena ema apanavare Simón ema náimijare-chaqueneva Suélareru. Éta táviha eta peti mapenahí te tachausi eta mar. Ema maca Pedro ema timetacaviyare eta pítauchaqueneánayare —máichapa ema ángel.

Te tamutupa eta máechajisirahi ema ángel, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, titaura-hivare mayehe ema máquenuhi. ⁸ Tacahe, mametacavacapa eta mametarapi ema ángel. Tacahe, máevatacapa tayehe eta avasare Jope.

⁹ Te apanapa sache, tiánehianapáipa ena vanairucana tayehe eta avasare. Te jena las dócequenepa sache, ema Pedro tiápanapa eta te téqueneha piso. Tiyujaracayarehi. ¹⁰ Técuháipaicha éma, taicha tájinarichaha manicahini. Vuíchaha náimaquerecahini eta tinicacare. Tacahe, eta mayujarasirahi máimahapa téjiacahi eta anuma. ¹¹ Máimahavare eta tiúcupaicapahi eta te mávihahi éma, tacutiyaréni eta ichape sávana. Ticaitiapusivacapahi te es-quinana. ¹² Camuri eta sárateana, quichareana, cágureana, támiqueneanapahi eta sávana, tamutu eta apánapanenéjiqueneána sárateana. ¹³ Tásiba, masamapa ema téchajicahi te anuquehe. Máichapa:

—Péchepuca, Pedro. Picapaca étanaina sárare. Pinica.

¹⁴ Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárateana vicajachaqueneana, vinicahini. Tájina nímatiya nunicahini eta juca —macahepa.

¹⁵ Tiápechavavare máechajica ema Viya, máichapa:

—Vahi picuimijarecha ticajachacareana eta níjararuvianahi tinicacareana —máichapa ema Viya.

¹⁶ Mapahe eta máechajisirahi ema Viya ema Pedro. Tacahe, tichavapa eta sávana tiápana te anuma. ¹⁷ Ema Pedro manasirichaha macájarasamúrehí eta mapanerechirahi tájahapuca tacayemahi eta máimahaquenehi. Títeca-pananecha te tapaja ena vanairucana mayehe ema Cornelio. Nacayaseser-erupaipa eta mapena ema Simón Suélareru. ¹⁸ Eta náitecapirahi, nacaya-seserupa te étahipuca mávihahi ema Simón Pedro. ¹⁹ Émasera ema Pedro manasirichaha tipanererecarichaha taicha eta máimahaquenehi. Tásiba, ema Espíritu Santo máichapa:

—Nararihi te juca ena mapanana ajairana titanucavianapahi. ²⁰ Piyana pímahavaca éna. Vahi picueñamava eta péhisiravacayare, taicha nútì nuvane-cavacahi éna —máichapa ema Espíritu Santo.

²¹ Tacahe, masuapapa ema Pedro. Tiúchucapa tiyanapa nayehe ena titanu-canapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

²² Tásiba, najicapapa éna:

—Tivanecahavihi ema capitán Cornelio. Ema achane tipicaurahi mayehe ema Viya. Títaurahivare nayehe ena achaneana. Namutu ena israelítana napicaucha náemunacavare éma. Puiti víti, vítecapauchavipa, taicha cape juca, ema ángel mavaneruhi ema Viya mametapanahí ema Cornelio máimichuhavi píteca te mapena, apaesa masama eta pimetarapianaya —nacahepa éna.

²³ Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náehicapa ema Pedro ena apamuriana machamuriana ticavasanahi te Jope.

²⁴ Te apanaqueunepa sache, napaenumavapa títecapana te avasare Cesarea. Ema Cornelio macuchapaipahi te mapena. Tiúrujicavanaripa ena majaneanana énapa ena máemunacasáreana máichuhaqueneánahi. ²⁵ Te títecapapa ema Pedro te mapena ema Cornelio, mácapapa máepuyumi-rauchapa matsiucayarepa. ²⁶ Émasera ema Pedro máichapa:

—Péchepucachucha pitupiha. Vahi táuricahini pitsiucanu, taicha nútirichuhi picutiquenehi achane —máichapa.

²⁷ Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi. ²⁸ Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapamurihae eti apavasanana. Émasera ema Viya tivanecanuhi eta vahi nucupica eti nusiapamurihiraheyare. Nájinavare nunerejiruimahi nácani ticajachacareana. ²⁹ Eta tacahehi, nítecavanepa. Tájina nácyemahini. Tiuri puiti, nuvaraha néchaya. ¿Tájahapuca eta tímichuhanuhi? —macahepa.

³⁰ Tacahe, ema Cornelio majicapapa:

—Cuátropa sache eta táetavisiravahi eta juca nímahaquenehi. Te jena cápereli sache hora las tres, nuti nunasiquenehi te juca nupena. Ayunanuhi nuyujaracahivare. Tíjahúchavapa tímerecava ema ángele. Tijanunuca eta mamuiriha. ³¹ Máichanupa: “Cornelio, ema Viya masamahi eta piyheana oración piyujarasirana. Táitecapáuchahívare eta pímicatasiravacahi ena ticamunuvana páureana. ³² Pímvianerecaya puiti náepana ema achane ticaijare Simón, eta máchucarapi naicha Pedro. Ema tiávihahi puiti te jena avasare ticaijare Jope. Eta peti máitecapihahi ema apanavare Simón ema náimijarechaqueneva Suélareru. Eta távihahi eti peti mapenahi te tachusi eti jena mar. Te máitecapapa ema Pedro, éma tímítucaviyare” máichanupa ema ángele. ³³ Tacahe, enevanepa nímichuhavihi. Tájinaserá táchiravainahini eti pítésirahi. Tímararacahávihi ema Viya eta juca viúrujisiravahi puiti. Vivaraha visamaviya tamutu eti pimetacasivanahi mayehe ema Viya —máichapa ema Cornelio.

Ticametarairupa ema Pedro te mapena ema Cornelio

³⁴ Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya. ³⁵ Namutuchucha majacapavaca nácani tipicauchanahi éma, tíchanahivare eti táuriqueneana. ³⁶ Taicha cape juca ema Viya macaitecapahi eti máechajiriruva viyehe viti israelítana. Tivanecahavihi vimetacavacayare eti najacapacarevahí me Viya nácani ticasíñavanahi mayehe ema Jesucristo, maperdonachiraripa ema Viya eti napecaturana. Émara Viáquenu vituparaha téchapajiricahaviya vimutu viti achaneana: viti israelítana, étipa eti apavasanana. ³⁷⁻³⁸ Écharichupuca éti eti táichararacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo máijararuhi ema Viya. Mavaşácapa éma, máijaracaripa eti máitupajijiásiravaya. Tacahe, tépanavapa ticametarairu nayehe ena achaneana ticavasana te Galilea. Te jácani mapaisihapahi, máichapahi eti táuriqueneana. Macanaracavacapahi ena nacatajivaqueuneana mavaşáruanahi ema Váinaraji. Maratahahi éma máichahi eti juca, taicha ema Viya máimicatacapahi. ³⁹ Tiuri, viti véchajisihá eti juca, taicha vímahaqueunehi tamutu eti máichaqueuneanapahi ema Jesús tayehe eti mapaisineanapahi avasareana te Judea, étapa te Jerusalén. Énasera

ena tuparairucana nacatichahi éma; náemetatarecapa te crusu eta náimicapasirahi. ⁴⁰ Émasera ema Viya macaechepecuahi te máecari te mapanaguenepe sache. Tásicha, máimerecavare te vimuri eta machavirahi titareca. ⁴¹ Vaipa námutuhini ena achaneana náimahahini. Vítinecha vímahaparacahi viti manerejiruanahi ema Viya. Vinecapaequenehahi tamutu eta vicachanerahí ema Jesús te vinisirana. Tásicha puiti, vimetacahiva ena achaneana eta vímahaqueneanahi. ⁴² Taicha tivanecahavipa vicametarairuya. Vimeta-cayare eta émairahi ema Jesús viyeheyarehi Juez viti achaneana énapa ena náepenaqueneana. Taicha ema Viya ema tituparacahi eta mávacureyare juésyarehi. ⁴³ Étaripa eta acane namutu ena profetanaini náechajisihahi ema Cristo. Ánipa nacahehi: “Namutu ena tisuapanaya ticasianaya ema Cristo, maperdonachavacayare ema Viya tamutu eta napecaturana táchavene eta nacasiñairaya ema Cristo”.

Eta mávahásiravacahi ema Espíritu Santo ena apavasanana

⁴⁴ Tímiyanavarichaha eta máechajisirahi ema Pedro, tiúcupaicapa ema Espíritu Santo. Mávahácpa namutu ena tisamararacanahi eta mametarairuhi ema Pedro. ⁴⁵⁻⁴⁶ Tíjahúchavapa ena mávaháruanahi apáechajiríuvanapa. Nacunacharipa ema Viya. Nasamapa ena machamurianapahi ema Pedro tiásihanahi te Jope. Náraminehi éna eta mávahásiravacahi ema Espíritu Santo ena apavasananahi, taicha ena israelítana náimijachahi nacarichu ena mávaháruanahi ema Espíritu Santo. ⁴⁷ Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espíritu Santo vicutiripa víti eta mávahásirahavihi —máichapa.

⁴⁸ Tacahe, macavanairipipa nacaicachasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Tacahe, manasipanapa te jena sácheana eta nayehe.

11

Eta mameparapiana ema Pedro nayehe ena machamuriana te Jerusalén

¹ Tacahe, téchacarevanepa te Jerusalén eta nasuapirohi ena apavasanana eta máechajiriruva ema Viya. Tásicha, napanerequenehapa ena apamuriana apóstoleana énapa ena náumurivana. ² Tásicha, te títecapapa ema Pedro te Jerusalén, nacajachapa ena apamuriana máinajicarahanaichaha eta nayeherrepiana ena israelítana. ³ Ánipa naicha:

—¿Tájaha tacayema péjirapanavacahi ena apavasanana? ¡Písapavavare pinica te namesara! —náichapa.

⁴ Tacahe, ema Pedro majicapapa mamecapapa eta máichararacavahi eta mapaisirahi. Ánipa maicha:

⁵ —Esamanuchaha. Te návihaipa te avasare Jope, nuyujaracaipahi. Nímahapa téjiacahi eta anuma. Nímahavare eta tiúcupaicapahi tiásicha te anuma tacutiyareni eta ichape sávana. Ticaitiapusivacapahi te esquinana. Títecapapa te návihahi nútì. ⁶ Nímahapa eta apánapanenéjiqueneána sárareana támque-neanapahi eta sávana. Tátirihi eta táñehiqueneana sárareana, quichareana, cágureana. ⁷ Tacahe, nusamapa eta mahu ema Viya, máichanupa: “Péchepuca, Pedro. Picapaca étanaina sárare. Pinica”. ⁸ Nútisera nujicapapa: “Vahi, Tata. Tituparacahavi viti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”. ⁹ Tacahe, tiápechannuvare téchajicanu ema Viya, máichanupa: “Vahi picuimijarecha ticajachacareana eta níjararuvianahi tinicacareana” máichanupa. ¹⁰ Mapahe eta juca

máechajisiranuhi ema Viya. Te tamutupa, tichavapa tiyapa te anuma tamutu. **11** Étarichu jena hora, títecapanapa ena mapanana ajairana titanucanuanapahi eta te peti nítecapihahi núti. Mavaneruanahi ema émana achane ticavasahi te Cesarea. **12** Tacahe, ema Espíritu Santo tivanecanupa néhicavaca éna, taicha tájina taeñamavacarehini. Énerichuvare téhicanuanapa ena nani sáisiqueneana vichamuriana. Vimutuhi visiapa eta mapena ema achane. **13** Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticaijare Simón, eta máchucarapi naicha Pedro. **14** Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele. **15** Tacahe, népanavapa nímitucavaca ena náurujiruvanahi. Te néchajicaipa, tijahúchavapa tiúcupaica ema Espíritu Santo nayehe éna. Mávahácavacapa tacutihi eta mávahásirahavihi víti te tépanavainapa. **16** Tacahe, enevanepa néchavahi eta mame taruhavihi ema Viáquenu Jesús. Áni macahehi: “Échavarichu ema Juan máicachasicahi te une ena achaneana. Étisera tiúcupauchaheyare ema Espíritu Santo. Éma, tícachasicahayare tiávhácahénapa” tacahehi eta máechajiruvahí. **17** Tiuri, ema Viya máijaracavacahi ena apavasanana ema Espíritu Santo táchavenehi eta náehisirahí ema Viáquenu Jesucristo, tacutihi eta máijarasirahavihi víti. Tásicha, váiparinehi nácapaemachaimahi núti eta mavarahaquenehi ema Viya –máichavacapa ema Pedro.

18 Tacahe, ena ticajachanahi ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta náeneuchiravaina. Nácutihavihini víti eta visiapirorayare te anuma, máichecuarquirénapa eta vítaresiraya maicha ema Viya –nacahepa.

Náehicavare ema Jesús ena achaneana ticavasana te avasare Antioquía

19 Te jena sácheana, te nacapacapa ema Esteban, napanajicavare ena apamuriana téhicanahí ema Jesús. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticaijare Chipre, ena apamuriana te avasare Antioquía. Te jácani náitecapihapahi, ticametarairuanapahi mayehe ema Jesucristo nayehe ena najaneanana israelítana. Vuíchaha nametacahini ena apavasanana. **20** Tásicha, títecapanapa ena apamuriana* eta te avasare Antioquía. Énasera ticametarairuanapa nayehe ena apavasanana. Nametacavacapa, ánipa naicha:

—Te esuapa éhica ema Viáquenu Jesucristo, éma ticuchucuhaheyare eta ícuñayaréni taicha eta epecaturana –náichapa.

21 Ichape eta tasuapacarevahí eta nametarairuana taicha ema Viya máimicatacavacahi. Eta tacahehi, nasuapahi ena camuriqueneana achaneana. Náinajicapaipa eta nayeherepiní tamauriqueneana, náehicapa ema Jesús.

22 Te nasamairiricapa ena nachamuriana ticavasananahi te Jerusalén eta juca téchacareanahi te avasare Antioquía, ticaevatapa ema Bernabé, mayana macaicutiarapana te yátupihipuca. **23** Tacahe, te títecapanapa éma te Antioquía, máimahapa eta máimicatasiravacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahí

* **11:20** Ena nani téhicanahí ema Jesús, yátupihi israelítanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahi eta tiúrupuhi ticaijare Chipre.

ema Viáquenu. Vahi nacucainajiruva te tatiarihinapuca jácani náichavaquenavaya. ²⁴ Taicha ema Bernabé, tétavicavahi eta máuriva. Mávaháruhivare ema Espíritu Santo. Tisuapajirahi éma. Tacahe, camurianahi ena tisuapanahí téhicanahi ema Viáquenu maicha ema Bernabé.

²⁵ Te táequenepa eta juca, ema Bernabé tiyanapa te avasare Tarso. Matanupanapa ema Saulo. ²⁶ Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachaneravacahi ena nachamurianahi. Camuriana ena náimitureanahi. Te jena avasare Antioquía, táepaninevahí eta nacaijarerahi cristianoana namutu ena téhicanahi ema Jesús.

²⁷ Te jena sácheana, matiarihi te Jerusalén ena profetana máijararuuanahi ema Viya eta máechajiriruvana. Tacahe, tiyananapa nacaijuhe te Antioquía.

²⁸ Te títecapanapa, ema émana ticaijare Agabo titupihapa te namuri ena machamuriana. Macaimitucusiquenehi éma mayehe ema Espíritu Santo. Mametacavacapa eta tatiarihiyare eta ecuha te tamutu avasareana. (Eta juca táichavaquenevahi eta ecuha te avasareana te jena áñoanahi matupihairahi ema aquenucaini Emperador Claudio.) ²⁹ Tacahe, ena téhicanahi ema Jesús ticavasana te Antioquía napanerechainapa náimiamarecaya eta nanaquiruana, náimicasiraya ena nachamuriana ticamunuwanahi, énaripa ena ticavasanahi te Judea. ³⁰ Tacahe, tinaquiquicavanapaipa eta naratahaqueneya nanaquica. Tacahe, náimiamarecasa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tíjaracanayarehi ena ticamunuwanahi.

12

Nacapacapa ema Jacobo. Náeratacapa ema Pedro.

¹ Te jena sácheana, matiarihi ema rey ticaijare Herodes Agripa. Ema macavanairipipa nacaratacavaca ena tachutirihanapahi ena téhicanapahi ema Jesús, náemecharecavacapa. ² Énerichuvare, máimicacavare ema apóstole Jacobo maparapeni ema Juan. Nayuchatipiquenuhapa eta nacapsirahi. ³ Tacahe, ema rey, eta máimairahi náurisirahi ena tictianacanahi ema Jesús, máimicaeratacavare ema Pedro. Te jena semanahi, napiestarahi ena israelítana eta nanisiraya eta pan mayehere levadura. ⁴ Eta nacaeratasirahi ema Pedro, náimisiapapa te cárcel. Navanecapa ena dies y seis suntaruana tijaneacanaya te machacaya. Cuátmurianahi ena patrullanahi. Ema Herodes Agripa, mapanerechahi macapacayareva ema Pedro te namirahu ena achaneana te táequeneraya eta napiestara. ⁵ Tacahe, ema Pedro, muracahi eta najaneasirahi te cárcel. Énasera ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina ema Pedro.

Ema Viya macuchucuha ema Pedro tayehe eta cárcel

⁶ Tacahe, ema Herodes Agripa máijarechapa eta sache eta máemepaniraya te cárcel ema Pedro eta nacapsiraya te namirahu ena achaneana. Te jena yati tamirahupa jena sache, ema Pedro tímacahi te nachacaya ena apinana suntaruana. Ticaitiahi te apipi cadenana. Ena apinanavare suntaruana najaneacahivare eta tapaja. ⁷ Tíjahúchavapa tímerecava ema ángele mavaneruhi ema Viya. Tijarahijuheinehi eta cárcel. Tacahe, ema ángele macayamuricapa ema Pedro. Macajamicapa. Ánipa maicha:

—Pedro, péjamica. Péchepuca —máichapa ema ángele.

Tíjahúchavapa téjapumuriha eta cadenana máithahanahi te mavahu ema Pedro. ⁸ Máichavare ema ángele:

—Picapitijuechava eta pítijuhe. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:
—Pinaca eta pépacuhasa. Yare, péhicanu —máichapa.

⁹ Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure. ¹⁰ Tacahe, náetavicapa ena tínapucana sentinélana, náetavicavare ena apamuriana. Títecapanapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majunijicapa ema ángele. ¹¹ Tacahe, ema Pedro mapaenumavapa macaicutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

¹² Tipanererecapaipa eta mapaisirapahi. Matupirupa te supena esu María, maena ema Juan ticaijarehi puiti Marcos. Éta, nárujisihavahi nayujara-sihahi ena camuriqueneana machamurianahi. ¹³ Títecrapa ema Pedro te tapajacura eta nayehe canchón. Máehahamecaha eta tapaja. Tacahe, esu esena amaperu ticaijaro Rode, tiyanapa suímahapana nájahapuca ema téhahamecaha eta tapaja. ¹⁴ Suímatiahuchavanepa ema Pedro, váhisera suvéjiáequnehahini eta súrisamurevahi. Tiyanapa tijunapa te tajuhe, sumetapanavacapa eta matiarihirahi ema Pedro te aneca te tapaja. ¹⁵ Énasera vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énasera náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

¹⁶ Émasera ema Pedro tímiyanavarichucha máehahamecaha eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna. ¹⁷ Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapana ema Santiago* énapa ena apamuriana vichamuriana —máichapa.

Tacahe, tiúchucapa tiyanapa te apuna avasare.

¹⁸ Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro. ¹⁹ Tacahe, ema Herodes Agripa máimivanerecapa natanuca ema Pedro. Májinaserá náetupiacahini. Eta namaetupiasirahi, ticayaserehianapa ena suntaruana tijaneacanahi. Nájinaserá émanainahini nanecapahini eta máuchusirahi ema Pedro. Tacahe, macavanairipipa ema Herodes nacapacavaca ena suntaruana. Te tamutupa eta juca, tiyanapa ema Herodes te apuna avasare Cesarea; étapa mávhahí.

Eta máepenirahi ema Herodes Agripa

²⁰ Te taequenepa, ema Herodes Agripa tisemapa nayehe ena achaneana ticavassana te Tiro étapa te Sidón. Énasera náimivanerecapa mayehe ema Herodes. Tiyaseserecanapa eta náurivaina mayehe éma. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe, nacasiñapa ema Blasto, ema majupaha ema rey, máechajiuchavacaya eta náurivaina. ²¹ Tacahe, ema Herodes máijarechapa eta sache, máimichuhairaya

* ^{12:17} Ema maca achane, maparapehi ema Jesucristo. Te náechajiruva ena israelítana, ticaijare Jacobo. Te véchajiruva ticaijarehi Santiago. Émarichuhi ema tiájucharahi eta carta ticaijarehi Santiago.

ena achaneana eta jena sáchequenehi. Ticamuirihapa ema rey eta mamuiriha tiúrina. Téjacapa ema Herodes te máejasirare. Téchajicapa. ²² Tacahe, ena achaneana eta nasamirahi éma, tipiaracanapa. Nacahepa:

—¡Ema maca téchajicahi váhiya achanena! ¡Viya ema maca! —nacahepa eta nacunachirahi éma.

²³ Tacahe, tijahúchavapa ema émana ángele mavaneruhi ema Viya máijaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

²⁴ Tacahe, tavetijipaipaicha camurianapaipa ena achaneana tisuapanapa eta máechajiruvana ema Viya.

²⁵ Te titavanapa eta natuparahahi ema Bernabé ema Saulo, tichavana-varepa te avasare Antioquía. Námapa ema Marcos.

13

Ema Bernabé émapa ema Saulo tépanavanapa tipaicana ticametarairuanya

¹ Ena téhicana ema Jesús ticavasanahi te avasare Antioquía, natarihi te namuri ena ticametarairurahiana eta máechajiriruva ema Viya. Tímiturahianahi éna. Natarihichaha ema Bernabé émapa ema Saulo. Natarihivare ema Simón (ema náimijarechavare Negro), émapa ema Manaén (ema machajuruhi ema Herodes Antipas, machicha ema Aluresini). ² Étana sache, ticurujicanapa eta nayujarasirahi me Viáquenu. Náichahivare eta ayuna. Tacahe, máechajicavacapa ema Espíritu Santo. Máichapa:

—Ema maca Bernabé émapa ema Saulo, natuparahaichuhi ticametarairuanaya taicha nunerejiruanahi éna. Évatasinanuya puiti ena nani apinana —máichapa.

³ Tacahe, titsecavanapa ena apinana eta napaisiraya. Te tamutupa, tiápechavanapa nahayunacha namutu. Eta nayujarauchirahi, nanacapa eta navahuana te nápusiana ena tipaicanayare. Nayaseacapa ema Viya eta táurivainapahi eta napaisiraya. Tacahe, ticametavanapa. Tiyananapa.

Ema Bernabé émapa ema Saulo tépanavanapa ticametarairuana te tiúrupuhi Chipre

⁴⁻⁵ Tacahe, ena nani ema Bernabé ema Saulo, mavaneruanahi ema Espíritu Santo, tiyananapa te puerto ticaijare Seleucia. Máehicaphahivare ema Juan Marcos. Tímicatarecapahi nayehe. Tacahe, tiánuecanainapa nacaijuheya eta tiúrupuhi ticaijare Chipre. Te títecapanapa te puerto ticaijare Salamina, tiyananapa eta te náurujisirárevana ena israelítana (taicha tamutu avasareana tatiarihipahi eta nayehe sinagoga). Ticametarairuanapa eta máechajiriruva ema Viya. ⁶ Tamutu napaica eta táichapevahi eta tiúrupuhi. Títecapanapa te avasare ticaijare Pafos. Ánaqui matiarihihi ema émana israelíta ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya. ⁷ Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásiba, máimivanerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya. ⁸ Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya. ⁹ Tacahe, ema Saulo (éma ticaijarehi puiti

Pablo), mávaháruquenehi ema Espíritu Santo, máimararacapa ema iápemare.
10 Tacahe, máichapa:

—¡Tivayuarahitataji matsiriaraíraha! ¡Piti machicha ema Váinaraji! ¡Piti picanianaca tamutu eta táuriqueneana! Píti píchejimiráuchavacahi ena tivarahaná téhicana ema Viáquenu. ¡Pínajica eta juca pivainarajivahi! **11** Puiti ema Viya tícuñacaviyare. Púchuquiviyare máicha. Tiyereyare eta vahi pímahaimahi eta tajaraiva eta sache —máichapa ema Pablo.

Jéhesaréinehi, tíjahúchavapa témaha eta máimairirisira, púchuquipa ema iápemare. Tacahe, matanucapa ena tichurucanaya te mavahu. **12** Te máimahapa ema Prefecto eta juca, tipicarinehi. Tásicha, masuapapa eta masamirahi eta náimiturapiana ena apóstoleana mayehe ema Viáquenu Jesús.

Ema Pablo énapa ema Bernabé tiyananapa tayehe eta avasare ticaijarevare Antioquía Ichipichu

13 Tacahe, ema Pablo énapa ena macompañeroana tiávacuhanapa. Najunjicapa eta Pafos. Tiyananapa tayehe eta avasare Perge táunavahi eta provincia Panfilia. Te títecapanapa te Perge, eta jena sácheinahi, ema Juan Marcos majunjicavacapa éna. Tichavapa te Jerusalén. **14** Éna, tiánucuhanapa nacaijuhepa eta avasare Antioquía Ichipichu te tinapaica eta Pisidia. Te títecapanapa, te apanapa sache sávaru, tisiapanapa eta te náurujisirareva ena israelítana eta nayujarauchirahi. Téjacanapa. **15** Tacahe, tisiapanavarepa ena tuparairucana tayehe eta náurujisirareva. Náechajicuhapa ánipi eta Sagrada Escritura májurehi ema Moisés étapa eta nájurehi ena profetana. Te tamutupa eta náechajicuirahi, nayaserecapa ena araitecapianahi. Náichapa:

—Viparapenaveana, te tatiarihipuca eta échajisihayare consejo viyehe víti, táuricapa econsejachahavipa —náichapa.

16 Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayeherepi). Ánipa macahe:

—Esamanuchaha, nuparapenaveana israelítana. Étipa eti epicaurahianahi mayehe ema Viya. **17** Ema Viya vicasiñaquenehi viti israelítana manerejicavacahi ena viáchucanaveánaini. Te návihaichaha te apanaqueñe avasare ticaijare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihi, máimerecapahi eta máitupajijiasiravahi máimicatasiravacapahi éna. **18** Tásihasera, cuarenta año eta macamichirahi ema Viya eta náejecapirávana tayehe eta návihirahi te mávapahi vámahi. **19** Te taequenepa, macamitiequenehavare eta siétequene avasareana ena apánapanéjiqueneána ticavasanainihi te Canaán. Tásicha, máijaracapa ena viáchucanaveánaini eta jena apaquehe natuparahaquenehi maicha ema Viya. **20** Tacahe, 450 año eta majaneasiravacahi, mavanecapa ena juéseanaya téchapajirícanayarehi. Tacahe, tiámainucavapa te tijurucapa ema profeta ticaijare Samuel, máequeneréruhi nayehehi juez. **21** Tacahe, éna nayasecapa ema Viya ema nayeheyarehi rey. Tásicha, máijarashapa ema Viya ema nayeheyarehi rey ticaijare Saúl, machicha ema Cis, mámariéquenéni ema viáchucaequenéni Benjamín. Cuarenta año eta macatuparahairahi. **22** Te taequenepa, ema Viya máitsivachapa ema Saúl. Ticaijarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isaí, núcrica eta máurivahi. Taicha máitauchayare tamutu eta nuvanairipianaya” macahepa ema Viya. **23** Tiuri, eta máechajiriruvahi ema Viya, matiarihiyare ema émana mámariequeneyare ema maca Davíd

tiúchucayarehi ema Ticatiurahiyare viyehe viti israelítana. Puiti vimetac-ahe eta máimeresiravaipa ema Jesús ema Ticatiurahiquene viyehe. ²⁴ Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavanecapahi eta náeneuchiravaina náinajisiraina eta napecaturana, étapa eta nacaicachasiraina. Títecapapa eta sache máitauchiraipa ema Juan tamutu eta mavanahianahi me Viya. Ticametarairurichaha ema, máichavacapa ena achaneana: ²⁵ “Ímijachaipapuca nútihi ema Cristo, ema vicuchapaquenehi. Váhira nútina. Títecapainapasera éma, téhicanupahi te néquene. Malayarinehi núti nácutinasihini eta máitupajijiasiravahi éma. Váiparinehi nácaemuñavaimahi macamusuranuhini nuti páuresami” máichavacapa ema Juan.

²⁶ Esamanuchaha, emutu eti nujaneanana, eti nucutiqueneanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetac-heyare yátupina eta iúchucuirayare éti apanava, te ecasiñava me Jesús.

²⁷⁻²⁹ Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájuchaquenehi ena profetanaini. Váhisera nácaicutiarahini. Eta tacahéhi, vahi náimatihi ema Jesús eta émairahi Cristo. Váhivare najacapahini. Éma, tájinahinéni matapiravainahini taviuchahini eta táimicapacahini. Énasera nayaseacapa ema Pilato eta máimicapasiraya. Tacahépa masuapapa éma eta nayasearapihi. Tásicha, te títauchavapa eta nacapasirahi, ena máimitureana nacucupaicapa te macurusura, náecarapa. Tacahéhi eta táitauchiravahi tamutu eta nametarapiana ena profetanaini eta máicharacavayarehi ema Cristo eta máepenirahi, taicha tacajuquenehi éta te Sagrada Escritura. ³⁰ Émasera ema Viya macaecheputaqui te máecari. ³¹ Tacahé, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ena nani tímahanahi, énara ena téchajisihanahi puiti eta máechepusirahi.

³²⁻³³ Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahisera puiti eta máechajiriruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenehi Cristo manerejiruhi ema Viya! Máimerecapa ema Viya ema Jesús eta émairahi yátupiquenehi Cristo, taicha macaecheputaqui te máecari. Étara tímitecahavi vimetapanaha eta juca táuriquene téchacareana. Étara tacayemaquenehi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímimatichaviyare nayehe ena achaneana eta nuchichairavihi eta nucaecheputaravihi te pécarí” máichapa. ³⁴ Eta máechepusirahi ema Jesús te máecari, vaipa tiápechavaimahi tépena. Taicha máechajicahi ema Viya ena israelítana, ánipa máichahi: “Níjaracaheyare ema máuriquene Iáquenuyare. Éma ticatiuchaheyare tamutu sácheana. Máihecuarraigreyare eta ítaresiraya máicha, eta ecachanerayare éma. Taicha níjararuvhahi eta juca néchajiriruvahi mayehe ema David” máichapa ema Viya. ³⁵ Énerichuvare, acane ema Cristo macahehi eta máechajiriruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenehi” máichapa. ³⁶ Tiuri, ema David, yátupihi eta máechapajirisiravacahi ena machanerana. Te títecapapa eta matuparahahi mayehe ema Viya, tépenapa ema David. Tacahé, náecarapanapa éma. Tépachacavahi eta máeche te máecari. ³⁷ Émasera ema Jesús vahi táepachaicavahini

eta máeche te máecari taicha macaechepucahi ema Viya. ³⁸ Nuparape-naveana, nuvaraha numetacahe puiti apaesa ímatiéqueneha. Ema Viya mavaraha tiperdonachahe eta epecaturana te ácasíña ema machicha Jesús. ³⁹ Viti israelítana, ichape eta véjecapiravahi me Viya taicha vimaitauchirahi eta viyeherepiana máijararuuhavihi ema Moisés. Téhesera véhica puiti ema Jesucristo, viperdonachacareya víti mayehe ema Viya. ⁴⁰ Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi: ⁴¹ “Ímahayare, eti épurunuuanahi nútì. Nútì níchayare eta tiáramicare te emirahu te juca sácheana. Te nímimetacahepa eta juca, váhiquene esuapahini éti. Tásiha, tapaenumavainapa te ímahapa eta níchaqueneya, iáraminapa. Nímatihesera eta emásuapajiráivanahi. Épenainapa táicha” máichapa ema Viya.

⁴²⁻⁴³ Te tamutupa eta máechajisirahi ema Pablo, nayaseacapa ena achaneana, ánipa naicha:

—Picatajicahavi. Piápechahavini pímitucahavi eta juca te apanainavare sávaru —náichapa.

Te tiúchucanapa eta te náurujisirareva, tiyananapa ena apinana apóstoleana eta te náitecapihahi. Náehicapa ena camuriana israelítana, énapa ena apavasanana tépiyacavanaripa israelítana taicha napicauchaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

⁴⁴ Te apanavarepa sávaru, namutuyareni ena achaneana ticavasanahi te avasare tiúrujicavana nasamararacayarehi eta máechajiriruva ema Viya mametarapiyarehi ema Pablo. ⁴⁵ Énasera ena israelítana masuapajira-irahanahi, te náimahapa eta natarihirahi ena apavasanana, tisemanapa eta mametasiravacahi ema Pablo eta najacapacarevahi me Viya éna apanava. Eta tacape, nácapaemachapa ema Pablo, nacajachapa. ⁴⁶ Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechaji-rijuva ema Viya. Étisera vahi iúricahini eta esamirahi, váhivare ésachahini ésenica eta mávasa ema Viya. Tacape, énainarinepuca vímitucavacaya ena apavasanana. ⁴⁷ Taicha víti vivanecasivahi me Viya. Vítouchayare eta juca mavanairipi, ani macahehi: “Nutuparacavyare píti pipaicayare tamutu avasareana te juca apaquehe. Picametarairuyare eta néchajiri-ruvana nayehe ena achaneana eta nucuchucuiraya nácani tisuapanuanaya” —macahepa ema Pablo.

⁴⁸ Te nasamapa eta juca ena apavasanana, tiúrisamureanapa. Tásiha, nacahepa:

—Tétavicavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitare-siraya máichecuaraquireya te taequenenapa eta náepeniraya. ⁴⁹ Tacape, ena tisuapanaripa nacametarairuvare eta máechajiriruva ema Viya nayehe ena achaneana ticavasanahi te tachacayarahana eta avasare Antioquía Ichipichu. ⁵⁰ Nararihihisera ena ticatianacanahi ema Pablo émapa ema Bernabé. Israelítanahi éna. Tacape, náimitucapa ena tuparairucana te avasare, énapa ena ésenana ticapicahucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareinehi, ticuticacanapa eta nacatichiravacahi, nacuchucavacapa ena apinana. ⁵¹ Tacape, eti nayanirayarepa

ena apóstoleana, náetatapevachavaca eta náeparupevana te namirahu ena tictorianacanahi. Táicutiarahi eta namáimitucacárevahi éna, tájinavarepa tímiapechaimahi náimitucavacahini. Tacahe, tiyananapa nacaijuhepa eta te avasare Iconio. ⁵² Énasera ena apamuriana téhicanaripa tímiyanavanapa eta nasuapirahi ema Viya. Tiúrisamureanahivare éna taicha eta mávahásirahi ema Espíritu Santo.

14

Ema Pablo émapa ema Bernabé títecapanapa eta te Iconio

¹ Tacahe, títecapanapa ema Pablo émapa ema Bernabé eta te avasare ticaijare Iconio. Tiyananavare natupiru eta te nárujisirareva ena israelítana. Ticámetaráiruanavarepa. Tacahe, camurianavare ena achaneana tisua-panahi eta nametarairuhi: ena israelítana énapa ena apavasanana. ² Váhisera téjiacavana ena apamuriana israelítana masuapajirairahanahi. Nayuruvacapa ena apamuriana achaneana apavasanahi. Navarahapa náimiuy-semacavaca. Navarahahivare ticuticacanayare nacatichavaca ena téhicanaripa ema Viya. ³ Eta tacahe, nanasipanapa ena apóstoleana. Vahi nayanavanehini. Tiyerehi eta náimituresirahi, taicha navarahahi náetume-chavacaya eta nacasiñairahi ema Viya. Tacahe, ema Viya máimicatacavahi. Máijaracahi eta náichiraya eta tiáramicareana. Eta juca, máicutiarahi eta mavanesiravacahi eta nacometarairuirayarehi eta majacapiravacahi nácani achaneana ticasíñavana mayehe. ⁴ Tásiba, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana. ⁵ Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana. ⁶⁻⁷ Énasera, ema Pablo émapa ema Bernabé, te nasamairiricapa, tijunanapa nacaijuhepa eta te provincia ticaijare Licaonia. Ánaqui ticametaráiruanapa tayehe eta avasare Listra, tásiba, tiyananavarepa te avasare Derbe, étapa te avasareana tachacayarahahanahi.

Ema Pablo macanaracahi ema masari ticavasahi te avasare Listra

⁸ Te jena avasare ticaijare Listra, matiarihihi ema émana achane masarihi eta máitaresirahi. Vahi táurihini tipaica, taicha máimiuchurehi eta mamasarivahi. ⁹ Macaheripa ticasamarahihi éma eta mame tarairuhi ema Pablo. Tacahe, ema Pablo máesenicapa, máimatiacapa eta macasiñavairahi ema masari mayehe ema Viya macanarasirayarehi. ¹⁰ Tacahe, ema Pablo mapiaracapa: —Péchepuca píti. Pétumecha eta jara piápeana. Pitipiha —máichapa.

Eta masamairahi eta juca ema masarini, enevanepa téchepuruca. Titupi-hapa. Tipaicapa. ¹¹ Eta náimairahi ena achaneana eta macanarasirahi ema Pablo ema masarini, náraminehi ichape. Tipiaracanapa te náechajiriruvaichu, ánipa nacahehi:

—Víyana ena nani. Achanemahianahiséra eta náimahi eta náucupauchi-ráhávihi. ¹² Ema maca ticaijare Bernabé, émara Viya Júpiter. Ema maca apana ticaijare Pablo, émara Viya Mercurio taicha ema ticametaráirurahi —nacahepa.

¹³ Tiúri, tatiarihi eta peti te tasiaparacu eta avasare, mayujarasirarehi ema achane tavanarahi eta nasiñaraji ticaijare Júpiter. Tatiarihivare eta apina turu mamansurehi. Tacahe, ema maca achane máepanapa eta turu. Mayehe-heacapa eta flure taicha mavaraha macapacayarehi eta turu. Máijaracachayarehi ema Pablo émapa ema Bernabé. Énerichuvare ena achaneana

navarahahi náejirayarehi ena nani apinana apóstoleana taicha náimijachaipa énaripa ena nasiñarajianahi. ¹⁴ Étasera te nasamairircapa ena apóstoleana eta náichirayarehi, ichape eta náeñamirava. Tiúchucanapa, nasiapamurihana ena achaneana. Tipiaracanapa, ánipa nacahe:

¹⁵ —¡Tátanaveana, mémenaveana! ¡Váhirine táurihini eta juca íchirayare! Vítirichu ecutiqueneana achaneana. Tímitecahavihi vimetapanaha ínajica eta juca eyeherepianahi. Taicha vahi tiuri, tamapurijihi eta eyeheheasiraparacahi eta esiñarajiana. Ínajicaya eta juca. Éhicayaresera ema Viya, ema yátupiquenehi tisamahavi. Éma tépiyacahi eta anuma, eta apaquehe, eta ichapequene mar. Tétupiricahi tamutu eta vímahaqueneanahi puiti.

¹⁶ Ánaquiaparipa eta macamichirahi ema Viya eta náichirahi eta navarahaqueaneana ena achaneana. ¹⁷ Máimerecahinénisera eta émairahi tépiyaca eta juca táuriqueneana. Tíjaracahavihi eta tiquiva. Tiúrinachayare eta sucurecana vinicaqueneana máicha. Máijarasirahavihi tamutu eta vicamunuqueneana. Ticurisamurechahavivare. Eta tacache, ímatiquenéha yátupina eta émairahi Viya esiñarajiya —náichapa ena apóstoleana.

¹⁸ Eta tacaheli, nametacaripahinéni eta tamaurivahi eta juca navarahaqueenehi naicha. Énasera ticamesavanarichucha eta navarairahi ticaparecana eta túruana. Váhiqueséra náisapahíni ena apóstoleana náichahini eta juca.

Natupisicapa te márijahiana ema Pablo

¹⁹ Tayerevahí eta sácheana, títecapanapa ena israelítana tiásihanahi te Antioquía Ichipichu étapa te Iconio. Éna tictorianacanahi ena apóstoleana. Nayuru-cavacapa ena achaneana, náimiyusemacavacapa. Eta nachimapirahi ema Pablo te calle, natupisisihapa te márijahiana. Náquipaicapa. Eta náimairahi máquipaisiravahí, náimijachaipapuca tépenahi. Nachururupaicapa náquijicayarehi te tachachacu eta avasare. ²⁰ Tacache, tiyananapa ena machamuriana ema Pablo, náimahapanayarehi. Te náitecapauchapa, nárujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

²¹ Te títecapanapa tayehe eta avasare Derbe, nanasipanapa tayehe. Ticametarairuanahi eta máechajiriruva ema Viya. Camuriana ena tisupanahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, étapa te Antioquía Ichipichu. ²² Eta te juca avasareana, náimitucavarepa ena téhicanaripa ema Jesús. Náetumechavacapa eta táurivaina eta náehisiraya ema Viya. Náichavarepa:

—Vahi ecuarameca eta nacatianasiráhe ena achaneana táichavene eta éhisira ema Viáquenu. Ecamichachucha tamutu. Échava eta esiapiraya eta mávasa ema Viya —náichapa.

²³ Énerichuvare, natanucapa ena nayeheanapachu pastor nácani náijamuripachu. Téchanayarehi eta nayujarasirana. Tacache, natuparacapa eta návacureanaya. Te tamutupa eta natuparasiravacahi, tiyujaracanapa nahayunachavarepa, nayaseacapa ema Viya eta majaneasiraina táurivaina eta náehisiraya namutu ena ticasíñanariпа ema Viya.

Ema Pablo, ema Bernabé tichavanavare tayehe eta avasare Antioquía

²⁴ Tacache, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare

Perge táunavahi eta provincia Pamfilia. ²⁵ Ticametarairuanapa eta máechajirruva ema Viya nayehe ena achaneana ticavasana tayehe eta avasare. Te tamutupa eta nacometarairuirahi, tiyananavarepa nacaijuhepa eta Atalia. ²⁶ Étapa návacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi. ²⁷ Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Étapa eta majacapiravacahi ema Viya ena apavasanana eta nasuapiravacahi nacasiñairahi éma. ²⁸ Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

15

Ticurujicacanapa te Jerusalén. Ticaechacasinapa eta panererucanahi.

¹ Te jena sácheana, títecapaná te Antioquía ena apamuriana israelítana, tiásihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu ítauchayare eta mavanairipihí ema Moisés eta vicamarcairaya* —nacahepa.

²⁻³ Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiba, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyaranahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, étapa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tamauriquneana, taicha eta náehisiraipa ema Jesús. Tacahe, ena nachamuriana, eta nasamairirisirahi eta juca, tiúrisamureanarinehi éna.

⁴ Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyaranahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacaphi ema Viya eta napaisirapahi éna.

⁵ Natarihivare ena religiosoana téhicanarípahi ema Jesús. Titupihanapa éna. Téchajicanapa, ánipa nacahe:

—Táitaurevaquene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

⁶ Tacahe, te apanapa sache, tiúrujicavanapa ena apóstoleana énapa ena náiyaranhana. Navarahapa náetupirica eta juca. ⁷ Nacaematanecacaripa eta juca náechajisihahi. Tacahe, titupihapa ema Pedro. Máichavacapa:

* ^{15:1} Eta mavanairipini ema víyarahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tiásihanahi te Judea, navarahapa nacamesaequeneha nacamarcavaya ena ajairana ichanaruuanaripa, apavasanananahivare.

—Nuparapenaveana, écharichuhi éti ánaquiaparipa eta manerejisiranuhi ema Viya eta nucametarairuya eta nayehe ena apavasanana eta náuchucuirayarehi táichavenénahi eta nasuapirayare ena apana. ⁸ Ema Viya máimatihi eta nasamureana ena apavasanana eta nasuapirahi. Tásiha, máimerecahi eta majacapiravacahi eta mávahásiravacahi ema Espíritu Santo tacutihi eta mávahásirahavihi viti. ⁹ Ema Viya, nájina manerejiruina eta máemunasiyahavi. Témunacahavihi vimutu: viti israelítana, énapa ena apavasanana. Eta tacahehi, masípasinavacarípa eta nasamureana éna táichavénehi eta nasuapirahi. ¹⁰ Étisera evarahapa épuruyare eta máichaqueneanahi ema Viya. Ticajeraequenepa eta véhisirainahini eta nayeherepiana ena viáchucanaveanaini. Énaripa vahi náitauchapahini tamutu eta nayeherepianapahi. Vítiripa vähivare váratahahini vítauchahini. Tacahe, váipa táuricahini vécatihavacahini ena vichamuriana apavasanana náichahini eta juca. ¹¹ Vécharipahisera yátupi eta viúchucuiraya táichavénehi eta macatajisirahavihi ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, vähivare étaparacaina eta tájinairahini namarcainahini —máichapa ema Pedro.

¹² Tacahe, timatinanapa namutu. Nasamararacaripa ema Bernabé, émapa ema Pablo. Nametamurihana eta máimechirahi ema Viya eta mavanesirvacahi éna, taicha máijaracavacahi eta náichirahi eta tiáramicareana te nimirahu ena apavasanana. ¹³ Te titapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha. ¹⁴ Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranayarehi. ¹⁵ Eta juca eta náechajisihaquenehi namutu ena víyarahaini profetana. Émaripa ema víyarahaini profeta Amos májuchahi eta juca máechajiriruvana ema Viya, ani macahehi: ¹⁶ “Te taequenénapa eta juca, nápechavaya núcupaicayare te juca apaquehe. Nétupiripanaya eta nupena táquipairuvahi. Tásiha, tiápechavanayare tiyujarauchuanayare ena achaneana, tacutiyare eta náejirairanuhi ena machaneranaini ema rey David. Tisuapanuanayareva. ¹⁷ Énerichuvare titanucuanayare namutu ena apavasanana. Nuchaneranayareva éna, taicha námayare eta níjare”. ¹⁸ Étara eta juca macayemaquenehi ema Viya. Ánaquiaparipa eta mavarairahi vicaicutiaraya eta juca.

¹⁹ Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi nútì: Tiúripana vésamiricavacachuca ena vichamuriana apavasanana náequeruvanaripa mayehe ema Viya. ²⁰ Taratarichu vicajurevaca tametaca eta vaipa nacuapechava nacunica eta taeche eta sárare náijaracasiruana eta nasiñarajiana. Vähivare nacuveha súcani apana esena. Énaripa ena esenana, vähivare nacuveha ema apana achane. Vähivare nacunica eta taeche eta sárare namaechatinure. Étaripa eta táitine, vähivare nacunica. ²¹ Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquíaparipa te avasareana eta náechajicuiraparacahi ena vijaneanana israelítana eta mavanairipiana ema Moiséini te náurujisiravana. Puíticha nararihichaha ena náimicapicauchrichucha —macahepa ema Santiago.

²² Tacahe, ena apóstoleana, énapa ena náiyarahana, énapa ena náumurivana, tiúrihi nasama eta mapanereruhi ema Santiago. Tacahe, ticavanahianapa ena apinana téchemarahiana ticapicahuanahi, ema Judas Barsabás émapa

ema Silas. Éna téhicanayarehi ema Pablo émapa ema Bernabé eta nachaviraya te Antioquía. ²³ Tiuri, eta juca táchajiriruvahi eta carta. Ani tacahehi:

“Vímiamareca eta juca váchajiriruva viti apóstoleana, énapa ena víyarahana, énapa ena vichamuriana te juca Jerusalén. Vivaraha tativayare váchajicahe eti viparapenaveanahi te mavahuana ema Viáquenu: eti apavasanana tiávianahi te Antioquía, étipa eti tiávianahi te táunavanahia eti Siria étapa eta Cilicia. ²⁴ Visamairiricahi eta nayanirahi ena tiásihanahi ani te juca. Tiávajiriricaheanapa. Navarahahi nahapapicayare eta epanereruana. Ticamesaheanahi ítauchayare eta mavanairipiana ema Moisés eta ecamarcairaya. Váhisera vanairucanaina eta viyehe eta náimitusirahehi eta juca. ²⁵⁻²⁷ Vévatacahi ema Judas émapa ema Silas, vanairucanahi viyehe. Éna, timetacaheanayare tamutu eta juca téchacareanahi viyehe. Ena nani téhicanapahi ema Bernabé ema Pablo, ena viparapenaveana vémunaruqueneana. Ema maca Bernabé émapa ema Pablo, tíjaracavanahi éna náepenacaya ema Viáquenu Jesucristo taicha eta nacemetarairuirahi. ²⁸ Áni te juca víti, vicuticacahi eta vapanerueruanahi, máimitusirahavihi ema Espíritu Santo. Vahi vávara-hahini tacajeraequenehini eta éhisirayare ema Viáquenu. ²⁹ Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare námaechatinure.
4. Váhivare ecuveha esu apana esena. Énerichuvare eti esenana, vahi ecuveha ema apana achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímicatacaheyare tijaneacaheyareva tamutu sácheana. Tamutupa eta juca váchajiriruvanahi eta eyehe”.

³⁰ Tacahe, tiyananapa ena tiámana eta carta, nacaijuhepa eta Antioquía. Te títecapanapa ánaqui, nacurujicapa ena nacaijuhequeneanahi nachamuriana. Náijaracapa eta námaquenepahi carta. ³¹ Te najacapapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahi eta nasamirahi.

³²⁻³³ Nanasipanapa jena cájeanahi ema Judas émapa ema Silas. Éna, énerichuvare eta titucanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimituresirahi, tichavanayarepa nayehe ena tivanecanahi. Tacahe, ena nachamurianahi náechejiemachavacapa. Nayaseacapa ema Viya táurivainapahi eta napaisiraina. ³⁴ Émasera ema Silas mavarahapa manasiyare. ³⁵ Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa ena tímiturecana nayehe ena nachamuriana. Ticametarairuanavare nayehe ena apamuriana achaneana. Natarihivare ena apamuriana tímicatacanahi.

Tiápechavánava tijyanana ena apóstoleana te avasareana

³⁶ Te taequenepa eta juca semananahi, ema Pablo máichapa ema Bernabé: –Viyanavare viápechavavipaica tayehe eta avasareana, véjiravacapahi ena vichamuriana te vipaisineanapahi cape juca te tínapucainapa viyanahi. Vímaha tájahapuca náicharacavahi –máichapa.

³⁷ Tacahe, ema Bernabé tísapavahi tiyana. Mavarahapasera mama ema Marcos. ³⁸ Émasera ema Pablo vahi mávarahahini mayanahini ema Marcos. Taicha te tínapucainapa tipaicana manaquimurihahi ema Marcos te avasare Perge tayehe eta Panfilia. Vahi máimicatacrahíni tayehe eta náemataneanapahi. ³⁹ Nacaematacneacaripa eta mamavarairahi mayanahini ema Marcos. Tacahe, tñajicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tiúrupuhi Chipre. ⁴⁰ Tacahe, ema Pablo mapanerechapa mámayare ema Silas. Te tétupiricavanapa, nayujarauchanumapa ena nachamuriana. Nayaseacapa ema Viya eta máimicatasirianapahi eta napaisiraya. Ticametavanapa tiyananapa. ⁴¹ Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejiravacapaipa ena nachamuriana natarihiqueneanapahi. Náetumesá-murechávacapáipahi.

16

Ema Timoteo máehicavacapa ema Pablo, ema Silas

¹ Tacahe, ema Pablo émapa ema Silas náejiravacapaipa ena nachamuriana ticavasanahi te Derbe. Tásiba, tiánucuhanavarepa te Listra. Ánaqui te Listra matiarihihi ema Timoteo, suchicha esu ésuna esena israelita, téhicahivare ema Jesús. Émasera ema maiya, apavasanahi griego éma. Ema maca Timoteo émarichuvare téhicahi ema Jesús. ² Énerichuvare, nacunachahi eta máurivahi ena machamuriana ticavasanahi te Listra énapa ena ticavasanahi te Iconio. ³ Tacahe, ema Pablo mavarahapa mámayare ema Timoteo eta napaisiraya. Tacahe, mavanecapa macamarca* apaesa tacuija nacucayema ena israelítana ticavasanahi tayehe eta napaisihayare. Taicha náimatihi éma eta machichairahi ema apavasanahi. ⁴ Tacahe, tiyananapa. Náejiravacapaipa ena nachamuriana te tamutu avasareana. Nametacapahi éna eta táechajiriruvapahi eta carta náimiamareruhivare ena apóstoleana énapa ena náiyarahana tiávihanahi te Jerusalén. ⁵ Ena nachamuriana, eta nasamirapahi eta mametarairu ema Pablo, tétumechacacanapaipa eta nasuapajiraivapahi. Tamutu sácheana ticajanemuriánapáchucha ena téhicanapahi.

Ema Viya máechajicahi ema Pablo mayana eta te Macedonia

⁶ Tiuri, ema Espíritu Santo mamecajahi vahi nacuyana eta te tinapaicahi eta avasareana te Asia. Tásiba, náetavicapa eta avasarechichana táunavanahi eta Frigia (ticaijarehivare Galacia). ⁷⁻⁸ Nacaijuheyarehi eta provincia ticaijare Bitinia. Téhesera te tiánehianapa, ema Espíritu Santo mavanecavarepa vahi nacuyana tayehe. Tacahe, náetaviequenehapa. Tiánucuhanapa tayehe eta táunavahi eta Mísia. Náitecapirapa te puerto ticaijare Troas. ⁹ Te jena yati, máimahapa ema Pablo te mavapure ema émana achane ticavasahi te tinapaica te Macedonia. Titupihahiji éma. Máichapaji eta máechajisirahi:

—Picatajicahavi, piánueca te juca viávihahi Macedonia. Pímicatapanahavi —máichapaji.

¹⁰ Eta máimairahi ema Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha vémeteacahi eta mavarairahi ema Viya eta viyaniraya eta ánaqui, vicametarairuirayare.

Títecapanapa te avasare ticaijare Filipos

* **16:3** Eta juca nayeherepi eta nacamarcairahi ena israelítana, te tiúchuca ema amuya ajairachicha, te óchopa sache eta máuchusirahi, namarcachayarepa. Émaripa ema Timoteo ichanaruipahinéni. Émasera ema Pablo macavanairipipa macamarcahivaréni éma apanavare, apaesa tacuija nayunacahi ena israelítana.

¹¹ Tacahe, viávacuhapa eta te puerto Troas. Viyanapa tayehe eta tiúrupuhi ticaijare Samotracia. Te apanapa sache, vítecápapa te Neápolis. ¹² Viúcupaicapa viyanapa te avasare Filipos. Eta juca avasare nayehe colonia ena romanoana. Eta ichapepanahivare tayehe eta avasarechichana tinapaicahi eta te tacunahu táuchusine eta sache eta Macedonia. Vinasipanapa tayehe te jena sácheana.

¹³ Te jena sache sávaru, viyanapa eta te nayujarasirarehi te tachachacu eta avasare te tachaui eti cajacure. Véjacapa tayehe. Vicametarairupa nayehe ena esenana náurujiruvanahi tayehe. ¹⁴ Sutarihi esu ésuna esena ticaijaruhi Lidia. Ésu, tiásihai eta avasare eta suchusinehi. Esu suca tíjararecarahi eta yérerucava sédana mularumeana. Ésurichu, tipicaurahi me Viya. Susamararacaripa eta mame tarairuhi ema Pablo. Ema Viya mavejiasinaipa eta susamure sujacapirayarepahi eta mame tarairu ema Pablo. ¹⁵ Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi nútì eñi Viáquenu Jesùs, íteca-pau chanupaini te nupena —sucuhepa.

Tásicha, ticamesahavipa tiámahavi te supena. Tacahe, vísapavapa véhica.

¹⁶ Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijarauquihi ésu máicha. Esu suca amaperu vanaracahi. Ichapemurihi eta plata suvachanahi, suíjaracapahisera ena suáquenuana. ¹⁷ Te tímahahavivare viánucuha, téhica-vivare esu suca amaperu. Tipiaracapahi te vécuene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisihavare eta eyehe eta achene ticaijuhe ñe Viya nayanihayare ena náuchucureanayare —sucuhepa.

¹⁸ Ichapemuri eta sácheana eta suéhicarairisrahavihi. Mapuñacapa ema Pablo. Téquerucavapa. Tásicha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepe tiúchuca ema éreana. Majuniji acapa ésu.

¹⁹ Te náechapa ena suáquenuanahi, tisemanapa taicha tájinapa suviyahini eta suplatanechihavacahini. Tacahe, nacaratacapa ema Pablo émapa ema Silas. Námapa te plaza te namirahu ena tuparairucanahi. ²⁰⁻²¹ Tacahe, nametau-chavacapa nayehe ena tuparairucanahi. Ánipa nacahe:

—Ena nani ajairana israelítanacacha. Nacaechepuca eta tamauri-queneana. Navarahapa tímajicahaviana eta viyeherepiana. Navarahavare véhica eta vimaimatiqueneruhi viti romanoana. Váhivare tásapacarehini vítauchahini eta nayeherepianahi énatatajiana —náichapa.

²² Tacahe, ena achaneana tisemanapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhiacavaca, náestacavacapa te yucuquipiana. ²³ Te tamutupa eta náestasiravacahi, námapa te cárcel. Navanecapa ema nacapitara ena carceleroana máechapajirica muraca eta tapaja. ²⁴ Te masamapa ema nacapitara eta navanairipihi, máimisiapavacapa tayehe eta téqueneha cuarto. Máeratapai quechavacapa te cepo. Manacapa cantavu eta tapaja.

²⁵ Tacahe, eta jena enumuhuquenepa yati, eta nacaeratairahi ema Pablo émapa ema Silas, tijiranaichucha tiyujaracanahivare me Viya. Ena apamuriana présoanahi nasamararacaripa eta jirasare. ²⁶ Tíjahúchavapa tiyamurica muraca eta apaquehe. Tiyamuricapa eta yúchamana. Tíjahúchavapa téjiacavaca eta tapajacurana eta cárcel. Téjapucapa eta cadenana

náitihanahi ena présuana. ²⁷ Téjamiuchavapa ema nacapitara ena carceleroana. Máimaharine eta tapajana téjiacavacaripahi. Máimijachapa nájinaripahi ena présoanahi. Tásicha, mavehapa eta mayehe espada. Mavarahapa ticapacavayarehini táichavenehi eta mapisirahi. ²⁸ Émasera ema Pablo mapiaracapa:

—Vahi picucapacava. Vitiarihirichuhi vimutu. Nájina émanaina téjiacavaina —máichapa.

²⁹ Tacahe, ema nacapitara tiyaseserecapa eta namicahuyare. Tisiapapa máimamurihayarehi éna. Tiyayacarepainecha eta mapisirapahi. Tépuyucapa te namirahu ema Pablo émapa ema Silas. ³⁰ Máichuhavacapa éna, mámapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare núti apaña?

³¹ Éna najicappa:

—Pácasiña pisuapa ema Viáquenu Jesucristo. Tásicha, éma ticuchucuhaviyare píti, énapa ena pichichanaveana —náichapa.

³² Tacahe, náimitucapa éma eta máechajiruva ema Viya, énapa namutu ena tiávihanahi te mapena. ³³ Étarichu jena yati ema nacapitara masipasinavacapa eta najarana ema Pablo émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mapena. ³⁴ Te taequenepa eta juca, mámamurihavarepa te mapena. Mánicavacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiroaipa.

³⁵ Te las nuévepa sache, ena juéseanahi navanecapa ena nasuntarurana nacuchupanavacayarehi ena náerataruanahi. ³⁶ Tacahe, ema nacapitara ena cárceleroana máichapa ema Pablo:

—Jucarihi eta órdene nayehe ena juéseana eta nacaitisiraheya. Tiúripa eyana iúchuca. Vaipa taeñamavacare —máichapa.

³⁷ Émasera ema Pablo máechajicavacapa ena suntaruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichahavihini ena juéseana ticaratacavahianapa téstacahavianapa te nimirahu ena achaneana. Vahi nayaserecahavinumahini te tatarihipuca eta viviurevahi. Tásicha puiti, navarahapa nayumurucayare eta nacuchusirahaviyare. ¡Vahi ene tacahe! Emetaca énaina náiteca nacuchupanahavi —máichapa ema Pablo.

³⁸ Tacahe, tichavanapa ena vanairucana. Nametacapa ena juéseana eta máechajiruva ema Pablo. Ichaperine tipicana ena juéseana eta nasamirahi tavanaranairahi eta Roma. ³⁹ Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahéhi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaíni eta te juca avasare viávihahi, apaesa náesamiricahepa ena iánaranahi —náichapa.

⁴⁰ Tacahe, te tiúchucanapa te cárcel ema Pablo émapa ema Silas, tiyananapa tichavana te supena esu Lidia, viávihahi víti. Vicurujicapa ena vichamuriana. Tásicha, náetumechavacapa, náimitusiranumapa eta náimianavachucha eta nasuapajiraivaina mayehe ema Viya. Tásicha, tiyananapa.

17

Nacaechepuca eta semanere ena israelítana te avasare Tesalónica

¹ Eta nayanirahi ema Pablo émapa ema Silas, tiánucuhanapa tayehe eta avasareana Anfípolis étapa te Apolonia. Títecapanapa tayehe eta apanavare

avasare Tesalónica. Tatiarihihi ánaqui eta náurujisirareva ena israelítana. ² Eta mayeherepihi ema Pablo, matupiru te náurujisirareva. Mapana sávaru eta macametarairuirahi nayehe ena achaneana. ³ Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehi viti israelítana. Tímitucahavihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahé: Nímatipa ema Jesús Nazareno, ema nacaparuhi. Téchepucaipahi éma. Eta juca tímicaecherachahi émahi ema Cristo —máichapa.

⁴ Tacahe, tinerejicavanahi ena achaneana. Natarihi ena tisuapanahi, náurujiacahi ema Pablo émapa ema Silas. Camurianavare ena griégoana apavasanana tipicauchanahi ema Viya, téhicanahivare. Énerichuvare ena esenana nayenana ena táiyarahana eta avasare tinerejicavanahivare ena téhicanahi. ⁵ Énasera ena apamuriana israelítana masuapajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujicapa ena ajairana váinajaripaneruana, máematanereanahi te cálleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa. ⁶ Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupaicavacapaipahi eta námirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneanana. ⁷ Éna majacapaqueneanahi ema Jasón te mapena. Namutu ena nani nacaecahihi ema aquenuca viyehi Emperador romano, náepuruvare eta mavanairipiana. Náimijachahiji mararihi ema apuna rey ticaijarehipuca Jesús —nacahepa.

⁸ Te nasamapa eta juca, ena tuparairucana énapa ena apamuriana achaneana, napanerequeneháinehi. ⁹ Tájinaserá apanainahini náicharacahini, nayaseacapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

Ema Pablo, ema Silas títecapanapa te avasare Berea

¹⁰ Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títecapanapa ánaqui, tiyananavare tayehe eta náurujisirareva ena israelítana. ¹¹ Ena nani israelítana ticavasanahi te Berea, tiúripanereruanapana nayehe ena ticavasanahi te Tesalónica. Navapina éna, nasamararaca eta mametarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihipuca eta mametarapihi ema Pablo. ¹² Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natarihivare ena esenana ticapicahuqueneanahi, énapa ena ajairana. ¹³ Nasamairiricavarepasera ena israelítana ticavasanahi te Tesalónica eta macametarairuripahiva ema Pablo eta te Berea. Enevanepta tiyanana nacapayaca. Te títecapanapa, náimiyusemacavarepa ena achaneana. ¹⁴ Énasera ena machamuri-

ana ema Pablo enevanepa náevataca éma te tachausi eta mar. Nanasipasera te Berea ema Silas, ema Timoteo. ¹⁵ Ena tiámanahi ema Pablo, te títecapanapa te puerto, tiávacuhanapa tiyananapa tayehe eta avasare Atenas. Te títecapanapa, étapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacapayaca éma eta te mávihahi.

Tímiturecasa ema Pablo te avasare Atenas

¹⁶ Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayeheheracahi eta camuriquene nasiñarajiana. ¹⁷ Tacahe, tamutu sávaruana, tiyana eta te náurujisirareva ena israelítana. Máechajisihahi eta tiúrina échájirirucava nayehe éna, énapa ena apavasanana griego tipicauchanahi ema Viya. Tamutuvare sache máechajisihahi éma te plaza nayehe ena achaneana natarihi-queneanahi. ¹⁸ Natarihihi ena ajairana ena téhicanahi eta máimiturapi ema ticaijare Epicuro, énapa ena apamuriana ticaravahuanahivare eta náimiturapi ema estoicoana. Te jena sácheana, téchajiricavanapa mayehe ema Pablo. Váhisera nácaicutiarapahini eta macayemapahi. Nacahepa:

—¿Tájahasamipucara tacayemahicácha eta mapanereruhi ema maca?

Ena apamuriana ánívare nacahe:

—Ema maca ticametarairurahi tayehe jácani apanavare masiñarajianrichu —nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús étapa eta máechepusirahi, mápechiravahi titareca. ¹⁹ Tacahe, tiyananapa tayehe eta cabildo náurujisirareva ticaijarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe. ²⁰ Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

²¹ Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisiha tamutu sácheana eta náimahaqueneana nasamaqueneanapahi arairuqueneana.

²² Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religiosohe. ²³ Taicha te nítecapapa nútì eta ani eyehe, nupaicahi tamutu eta eyujarasirareana. Nímahapa eta eyehe altar tatiarihihi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquénehi éti, émara ema Viya néchajisihaquenehi nútì.

²⁴ Émara tépiyacahi eta apaquehe, étapa eta vímahaqueneanahi táchapahanahi eta juca apaquehe. Émara téchahi ticavanairipihi te anaquehe étapa te juca apaquehe. Ema Viya vahi tácarichuimahi máucupaisihaya eta te vépiyaruuanahi templo, taicha vahi mácamunu eta mapenainaichuhini eta te juca apaquehe. ²⁵ Váhivare mácamunu víjaracasichahini eta viámavahu viti achaneana. Vítira vicamunuvahi eta mayehe. Éma, téchapajiricahavihi vimutu. Tíjaracahavihi eta táurivahi eta vítaresira.

²⁶ Acane te tépanavainapa tamutu, ema Viya máepiyacapa ema máinapuiru achane ticaijare Adán. Vimutu viti achaneana, mámariequenehavi ema Adán. Apánapanenéjihavihiséra maicha ema Viya. Tamutu eta apaquehe viávapaicahi máicha. Máimicutiarachapahisera eta táenasihayarepahi eta

viávasanapachuyarehi. Énerichuvare, máimicutiarachahivare eta táchecuirayare eta vítaresirana. ²⁷ Vitiarihisera viti achaneana vémitisicaipa ema Viya. Émasera mavarahahi vitanucayare. Váhinéni mágerehíhávihini. Titsecavahi éma te vichacaya. Mácani mavaraha matanuca, máichimavávane-yarehi. ²⁸ Taicha vítarecahi máicha, tímpaicaahavihi, achanehavihi máicha. Émaripa éma ichapequene escribáno te emuri éti macahehi eta máechajiriruvahi: "Viti achaneana cáitarecahavihi ema Viya". ²⁹ Vítí vímatihi eta máchanechirahavihi ema Viya, macaitaresirahavihi. Viyamuricahi vipaicahi máicha. Tacalhe, véjecapiravahi viti te vímijachapuca virataha viáchanecha eta visiñaraji. Vímivasichahineni eta jácani, váhisera tasamarahihini, váhivare tapaicahini, váhivare tayamuricahipucaini. Tayanapanepuca táurina te vépiyaca eta óropuca, plátapuca, chínnapuca. Váhivare váratahaimahi nacasiñacarehini vícha. ³⁰ Te vicasiñarajihipuca eta vépiyaruana, vimáimatirarichaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu viti achaneana vínjica eta juca, tátupiruvapa eta véneuchiravaina eta mayehe. ³¹ Taicha tatarihiyarehi eta jena sácheyare máicuñacayare namutu ena tíchanahi eta juca. Tamutuinapa máetupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecahi eta manerejisirahi ema Jesús juéseyarehi, taicha macaechepucahi te máecari te taequenepa eta máepenirahi –macahepa ema Pablo.

³² Te nasamapa eta máechajisihairahi eta máechepusirahi te máecari ema Jesús, natarihi ena nacaerahíchucha. Énasera ena apamuriana napanerequenehapa. Tacalhe, náichapa:

—Téhenarinevare apahena péchajisihavare eta juca, apaesa visamavi —náichapa.

³³ Tacalhe, tiúchucapa ema Pablo eta te náurujsirareva. Tiyanapa. ³⁴ Natiarihisera ena apamuriana nasuapahi náehicapa eta mame tarapi ema Pablo. Matiarihihi ema Dionisio táiyaraha eta nayehe cabildo, ésupa esu ésuna esena ticaijaro Dámaris. Natiarihivare ena apamurianahi.

18

Ema Pablo tiyanapa te avasare Corinto

¹ Te taequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto. ² Ánaqui macainunapa ema émana israelíta ticaijarehi Aquila, ésupa esu mayena ticaijaro Priscila. Ema maca Aquila máuchusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipihi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacalhe, tiyanapa ema Aquila tayehe eta avasare Corinto, étapa macainunainehi ema Pablo. ³ Énapa mávayechavacahi ema Pablo. Ena nani ticuticacanahi eta náematanerepiana tálabareroana. Tímicatacacanapa eta nacaematanerahi.

⁴ Tiuri, tamutu sávaruana ema Pablo tiyanahi tayehe eta náurujsirareva. Maconsejachavacahi ena achaneana. Macajimuyacahi eta nasamureana ena israelítana énapa ena apavasanana.

⁵ Tacahe, napaenumavapa nacapayaca ema Silas émapa ema Timoteo, tiásihanahi te Macedonia. Eta natarihirahi éna, tépanavapa ema Pablo ticame-tarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émairahi Cristo ema nacuchapa-quenehi. ⁶ Natarihisera ena apamuriana masuapajirairahanahi. Nacatianaca ema Pablo, napanararachavare. Tásiha, tétatajicavapa ema Pablo eta máepacuhasa, táicutiarahi eta namaimitucacarevahi ena nani. Majunijicayarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta ecuñaraqui te apana vítaresira taicha eta emajacapirahi eta máechajiriruva ema Viya. Vaipa necha núti. Puiti juca nuyaninapa, nímiturecaya nayehe ena apavasanana —máichavacapa.

⁷ Tacahe, tiúchucapa tayehe eta nárujisirarevahi. Tiyanapa te mapena ema apana machamurihi ticaijare Justo. Ánaquipa eta máimituresihahi. Ema maca Justo, vahi israelítaina, mapicauchahisera ema Viya. Eta mapenahi te tachacaya eta nárujisirareva ena israelítana. ⁸ Matiarihi ema apana achane ticaijare Crispo, tuparairucahi tayehe eta nárujisirarevahi. Masuapahi éma, ésupa esu mayena, ena machichanaveana, énapa ena apamuriana tiávihanahi te mapena. Camurianavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi. ⁹ Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare, ¹⁰ taicha camuriana ena nuchaneranaya. Núti nutiarihiya te pichacaya. Tájina náicharacavimahi ena piánaranana —macahepa ema Jesús.

¹¹ Tacahe, ema Pablo manasipa. Étana año y medio macahehi tayehe eta avasare Corinto. Tímiturecahi nayehe ena achaneana eta máechajiriruva ema Viya.

¹² Étasera jena sácheana matupihairahi ema Prefecto ticaijare Galión. Aque-nucuahi éma tayehe eta avasare Corinto tayehehi capital eta departamento Acaya. Tiuri, ticurujicacanapa ena nacanarayarepa ema Pablo. Nacaratacapa námapa te mamirahu ema aquenuca, nametauchayarehi. ¹³ Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

¹⁴ Téchajiuchavayarepainti ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehihipuca eta máejecapiravahi ema maca, ticaparecahipuca, núti apana nímisiapavahini juésenuinahini eta eyehe eta nusamirahénahini. ¹⁵ Étasera echájirirucavánachucha te máijare ema mácani apana, étapa eta eyeherepiana éti. Tájina táiñehicaréna eta juca. Vahi nímisia-pavaimahi núti, juésenuinahini tayehe eta juca. Ímahainepe éti —máichapa.

¹⁶ Tacahe, máevatacavacapa náuchuca te mamirahu. ¹⁷ Tacahe, namutu ena apavasanana griégoana nacaratacapa ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene máimisiapavahini. Váhivare macatiuchahini. Ema Pablo tichavapa tayehe eta Antioquia

¹⁸⁻¹⁹ Tiyerehichaha eta jena sácheana manasirarichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi

eta te avasare Efeso, étapa te avasare Tiro, táunavahi eta Siria. Tásicha, ticame-tavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cen-crea. Te tiánuecanayarepa, ema Pablo ticachucasinumapa titahisinumapa eta machuti, máitauchirayarehi eta mayehe promesa. Te títecapanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta nárujisirareva ena israelítana. Téchajiricavaipa nayehe, máimitusiravacahi éna. ²⁰ Tacahe, éna navarahapa náminasicha, émasera vahi másapavahini. ²¹ Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanahayare éti, te mavaraha ema Viya tacuijaichu níchava —máichavacapa.

Tacahe, tíavacuhavarepa. Majunijicapa eta Efeso. ²² Te títecapapa ema Pablo tayehe eta avasare Cesarea, tiánucuhapa tayehe eta Jerusalén. Máechajipá-navacapa ena machamuriana. Te tâequenepa, tiyanapa te avasare Antioquía. ²³ Tiyerehi eta cájeana manasiranumahi tayehe eta avasare Antioquía. Tacahe, tiápechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiarihi ema Apolo te Efeso

²⁴ Te jena sácheinahí, títecapahi te avasare Efeso ema émana israelíta ticaijare Apolo. Éma máuchurehi te avasare Alejandría. Maituca ticametarairu éma. Máimativare yátupi tamutu eta Sagrada Escritura ticaijare Antiguo Testamento. ²⁵⁻²⁶ Mavapinahi éma tamutu, étaripa eta máechajisirana. Ema Apolo maitucahi eta máimiturapiana ema Juan Tícachasiricarahi eta máitecapirayare ema Cristo ema nacuchapaquenehi. Máechahi eta máicachasisírahi ema Juan ema Jesús, ema yátupiquenehi Cristo. Váhisera tamutuhini maecha eta máichavaquenavehi ema Jesús. Tamutu sávaruana, tiyanapa tayehe eta nárujisirareva ena israelítana. Ticametarairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasera te nasamapa ema Aquila ésupa esu Priscila, námapa éma te napena. Tásicha, námitucapa tamutu eta apamuriana téchacareana mayehe ema Jesús. ²⁷ Manasipanapa ema Apolo te jena cájeana. Tacahe, mavaraha tyanayare te tinapaica eta departamento Acaya. Tásicha, ena machamuriana náimicatacapa. Ticajureanapa eta carta nayehe ena nachamurianahi tayehe eta avasareana macaijuheyarehi apaesa táuri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya máijaracahi eta máitupajijiasiravahi. ²⁸ Máimitucahivare ena israelítana eta te nárujisiravana. Máiminecapáequenehávacahi tayehe eta Sagrada Escritura ema Jesús émahi ema Cristo ema nacuchapaquenehi.

19

Títecapapa ema Pablo te avasare Efeso

¹ Tiuri, manasipa ema Apolo eta te avasare Corinto. Te jena sácheinahí, ema Pablo tiúchucahi eta avasareana táunavanahi eta Frigia. Eta mayanihapahi te achene te márijuecuana. Tacahe, títecapapa tayehe eta avasare Efeso. Te jena

avasare, natarihihi ena apamuriana tisuapajirahianahi. Máimativacapaipa éna. ² Tacahe, mayaserecavacapa:

—¿Mávaháruhépa ema Espíritu Santo te ecájuhéinapa ema Viya? —máichavacapa.

Tásicha, éna najicapapa:

—Váhira visamairirica eta matiarihirahi ema Espíritu Santo.

³ Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? —máichavacapa.

Éna najicapapa:

—Eta vicaicachasirahi véhicahi eta máimiturapianahi ema Juan Tícachasiricarahi —náichapa.

⁴ Ema Pablo mamevacacapa:

—Tiuri, yátupi ema Juan máicachasicavacahi ena achaneana eta náitsivachiraya eta náitaresirana. Énerichuvare, mamevacacahi eta nasuapirayare ema achane téhiequenehapahí éma. Puiti numetacahe: Ema maca téhiequenehapahí ema Juan ticaijare Jesús. Émaqueneripahí ema Cristo —máichavacapa.

⁵ Tacahe, te nasamapa eta juca, navarahapa ticaicachasiana te máijare ema Viáquenu Jesucristo. Tacahe, ema Pablo máicachasicavacapa. ⁶ Tacahe, manacapa eta mavahu te nápusiana. Tásicha, tiúcupaicapa ema Espíritu Santo, mávahávacacapa. Témunahiricavanapa apáechajiríuvána. Ticametarairuanapa eta máechajiriruva ema Viya. ⁷ Eta nasimutuvahi ena nani, dóceanahi ena ajairana.

⁸ Tamutuhi sávaruana tiyana ema Pablo te náurujisirareva ena israelítana. Mapana caje ticametarairu nayehe ena achaneana. Vahi mapicacaracavahini eta macametarairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaquenehi. ⁹ Natarihisera ena apamuriana murácasamureánaríchucha. Váhivare návarahahini náehicahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihana ena tisuapajirahianahi, mámamurihana tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana. ¹⁰ Apina año eta máimituresirahi. Tacahe, ena máimitureanahi tiyananapa tipaicana. Ticametarairuanapaipa eta máechajiriruva ema Viya nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásicha, nasamairirícapa namutu ena achaneana: ena israelítana énapa ena apavasanana. ¹¹ Ema Viya máimicatacahi ichape ema Pablo eta máichirayare eta tiáramicareana. ¹² Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Máijaracavare nacaitecapaya nayehe ena nacajumaqueneana, tásicha tacanaracapaipa. Énerichuvare táquijicapahi ena éreana.

¹³⁻¹⁴ Te jena avasare, natarihihi ena siéteana israelítana ticaparapejiricacana, machichanaveanahi ema ticaijarehi Esceva, náiyarahaini ena tiyujacarachiana te Jerusalén. Tacahe, ena nani siétequeneana napaiririruanahi. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhisera náehicahini eta máimiturapiana.) Matiarihihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihaquenepahi ema Pablo. Piúchuca te máquehe ema maca macajumaquene —náichapa.

¹⁵ Tásicha, ema éreana majicapapa:

—Nímati ema Jesús, émapa ema Pablo. Étisera vahi nímatihe. ¿Nájahahepuca? ¡Ásajipucaini nusuapahehini! —máichapa.

¹⁶ Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiriarea-napaipa, ticajaranapaipa. ¹⁷ Tásicha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairi-ricapa, tipicanarinehi. Tásicha, nacahepa:

—Tétavicavapa tamutuira tarataha eta máijare ema Jesús, náquenu ena nani —nacahepa.

¹⁸ Tacahe, ena téhicanapaipa ema Jesús, te náurujisiravana te tiyu-jaracana, timetaurecavanapaipa tamutu eta náejecapiravana eta náitaresirahi. ¹⁹ Natiarihi ena apamuriana ticaratacanahi eta iápemarecare. Námavacapaipa eta náitucaqueneanaini nasiñarajianainihi, nayehepuca libro. Náijuquechavacapaipa te namirahu ena nachamuriana. Vaipa nacatie-quenehapahini. Natupaequenehapasera eta tavachanahi te navachare-cainapa tacapayacahi eta \$b250,000. ²⁰ Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

²¹ Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásicha, nánucuhayare te Jerusalén. Te tamutupa eta juca, nuyaninavarepa te Roma —macahepa.

²² Tacahe, máevatacavacapa náinapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

Tisemamurianapa ena achaneana te avasare Efeso

²³ Tacahe, te jena sácheinahi, tisemamurianapa ena apamuriana achaneana taicha camurianapaipa ena téhicanapahi ema Viáquenu Jesús. Áni tacahehi eta nasemirahi. ²⁴ Matiarihihi ema achane ticaijare Demetrio. Ema maca achane, máepiyacahi eta suyehe trónochicha esu nasiñaraji ticaijaro Diana. Ticutihi eta pétichicha eta táimahi eta templo suávhahí ésu. Amairihahi plata. Tiúrihi eta maganaresira éma, énapa ena apamuriana plateroana macutiqueneanahi. ²⁵ Tacahe, macurujicapa ena apamuriana plateroana. Tásicha, máichavacapa:

—Tátanaveana, éti ímatihi eta juca vématanerepihi, tiúrihi eta vigana-resira. ²⁶ Ímaharichuhi puiti éti, esamahivare ema maca Pablo maca-hehi eta máechajiruvahi ena nani visiñarajiana vépiyaruana viti achaneana vähiji yátupinahini vénainahini. Ichapemurianaripa ena tisuapanahi, taicha nasamaripa eta máimiturapiana namutuyareni ena achaneana ticavasanahi te juca viávasa Efeso, énerichuhivare ena ticavasanahi eta te avasarechichana táunavana eta Asia. ²⁷ Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suávhahí esu súrinaquene visiñaraji Diana témitiequenénapapuca, nacuijapapuca nacuechahi. Náemiti-sicáinapapúca eta táurivainihi eta náejirairahi namutu ena achaneana te juca apaquehe —máichavacapa.

²⁸ Tacahe, eta nasamirahi ena apamuriana, tisemanarinehi, tipiara-canapa. Ánipa nacahe:

—¡Viva esu Diana visiñaraji viti efesioana! —nacahepa.

²⁹ Tacahe, tisemamurianapa ena apamuriana achaneana. Apanapa eta napanerecha. Tiuri, natarihihi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta nárujisi-ráreva. ³⁰ Émapa ema Pablo mavarahapa masípamuriháyarehíni máechajicavacayarehi, énasera ena machamuriana vahi náisapahini. ³¹ Natarihivare ena apamuriana, tuparairucanahi tayehe eta departamento Asia, mayeheanahi amigo ema Pablo. Nacometarapipa vahi macuímisiápava. ³² Tacahe, eta nárujisirávahi tijajamurihanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyareni ena achaneana apápipijívachucha eta nacaye-maqueneana. Vahi náimatiéquenehahíni tájahapuca tacayemahi eta naúruji-sirávahi. ³³ Tacahe, ena apamuriana israelítana náichuhapa ema Alejandro. Nametacapa eta táicharacávahi eta nárujisirávahi. Tacahe, navanecapa téchajica, maconsejachavacayarehi ena achaneana. Tásiha, ema titupihapa te namirahu. Máimicutiarachapa te mavahu namatinachaha. ³⁴ Tásiha, náimativanepa ema émarichuhí israelítahi. Tépanavanavarepa tipiaracana. Apina hora nacahe eta napiararereresirahi:

—¡Viva esu Diana visiñaraji viti efesioana! —nacahepa.

³⁵ Tacahe, títecapanecha ema tayehehi alcalde eta avasare. Macamatina-cavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suávhahi esu súrinaquene visiñaraji Diana, esu sucapica-huquenehi taicha eta juca mari suáquehehi ánaquiaparipa eta táemirisirahi te anuma. ³⁶ Nájina tépuruina eta juca. Ésamiricavachucha. Vahi ecuijahuchava. Epanerechinava te tiúriyarepuca. ³⁷ Taicha ena nani ajairana iámaqueneanapahi, tájina natapiravainahini. Vahi nacaecahi esu visiñaraji, vahivare námeyecha ésu eta suyereruvana. ³⁸ Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchusihayare eta natapiravana. ³⁹ Téheserapuca apuna jácani evarahaquene, ticaechacasiyarehi te reunión tásihaqueneyarehi viyehe viti tuparairucana. ⁴⁰ Tíñehicare eta juca íchaquenehi. Náimijachaipa ena achaneana víchahi eta revolución puiti jena sache. Tijuricati natarihi tiyaserecahávianaya eta táicharacavahi eta juca. Tájina viviyavaimahi —macahepa ema alcalde.

⁴¹ Te tamutupa eta máechajisirahi, mavanecapa téjanerecana ena achaneana. Títavapa eta nárujisirávahi. Tacahe, téjanerecanapa ena achaneana, tamutupa eta nasemirahi.

20

Tiyanavare ema Pablo te departamento Macedonia étapa te Acaya

¹ Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánueca macaijuhepa eta te departamento Macedonia.

² Máejiravacapaipa namutu ena machamuriana ticavasanapahi te avasarechichana. Máetumechavácapahi éna eta maconsejachiravacapahi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya). ³ Ánaqui manasipanapa tayehe, mapana caje eta

mávihairahi. Tásicha, mapanerechaipa tiávacuhaya te pacure eta mánuesirayare macaijuheraya eta te Siria. Étasera te máechapa eta navarairahi nacapaca ena israelítana mánarana, téquecavapa eta mapanerero. Tiyanapa tipaica tichavapa tayehe eta Macedonia eta mávacuíyayarehi. ⁴ Eta machavirapa, náehicapa ena machamuriana ema ticaijare Sopater ticavasahi te Berea, ema Aristarco émapa ema Segundo ticavasanahí te Tesalónica, ema Gayo ticavasahi te Derbe. Máehicavare ema Timoteo. Natiarihivare ema Tíquico émapa ema Trófimo ticavasanahí te tinapaica eta Asia. ⁵ Tacahe, títecapanapa te Filpos, návihahi nútì. Tacahe, ena siétequeneana vichamuriana tínapucanapa tiyanana tiánuecanapa, nacaijuhepa eta apana puerto ticaijare Troas. Ánaquipa nacuchapihahavihi. ⁶ Tásicha víti, te táequenepa eta Pascua vinisirahi eta pan mayehere levadura, vipaenumavapa viúchuca tayehe eta Filpos. Viávacuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

Máejirapa ema Pablo ena machamuriana ticavasanahí te Troas

⁷ Te jena tínapuca sáche tayehe eta semana, tiúrujicavanapa ena vichamuriana. Viyuvetucayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica. ⁸ Eta viúrujisirávahí te anuquehe peti te mapanaquene piso. Tatiarihihi camuri eta namicahuana. ⁹ Matiarihihi ema émana amaperu ticaijare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucaipahi. Eta máimasirahi, tiáquipaicavapa te anuquehe ventana. Tacahe éna, tiúcupaicavaneánapa nacáechepupánayarehi. Éma tépenaripahi. ¹⁰ Tacahe, ema Pablo tiúcupaicapa, mapauchapa ema amaperu. Mayurata-nauchapa majupahacapa. Tacahe, máichapa ena machamuriana:

—Vahi ecueñamava. Tichavayare titareca —máichapa.

Jéhesaréinehi, tichavapa titareca ema amaperu. ¹¹ Tacahe, tichavanavare tiápanana te nárujisiávahí. Tacahe, tinicanapa. Tásicha, ema Pablo tijárahiácaríchaha eta máechajirísiravacahi. Te titapiricapa, tiyanapa. ¹² Tacahe, te téjane-recanapa, námapa ema amaperu máitareruhi. Ichape eta náurisamurevapahi.

Tiúchucanapa tayehe eta Troas, nacaijuhepa te Mileto

¹³ Viti viávacuharipa, viyanapa vicainapucavahi tayehe eta apanavare puerto Asón eta mávacuuyayarehi ema Pablo, taicha ichape eta táepiñu. Émasera ema Pablo tipaicayarehi tímítupiruchavapa. ¹⁴ Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Miti-lene. ¹⁵ Te apanapa sache viúchucavarepa tayehe, viánucuhapa te tachacaya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víchecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto. ¹⁶ Váipa vétavajicahini te Efeso, taicha ema Pablo vaipa mávarahahini váyereréjipahini eta vipaisirapahi te táunavahi te Asia. Taicha mavarahahí titecapavaneyare te Jerusalén, eta máimaiyayarehi eta napis-tara ticaijare Pentecostés. Étapa tiámahaviyare te viratavayarepuca.

Eta maconsejachira ema Pablo nayehe ena náiyarahana pastoreana ticavasana te Efeso

¹⁷ Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso. ¹⁸ Te títecapanapa éna, majacapavacapa. Tásicha, tépanavapa máechajiricavaca, máichavaca:

—Éti ímatinuhi táichararacavahi eta nítaresirahi eta jena sácheana te níteca-pauchahénapa. Tájina níchahini núti eta nuyehechiravana. ¹⁹ Tájinavare vahi népiyacavahini aquenucanuinahini eta eyehe. Nucaematanecahi ema Viáquenu. Vahi nusemaimahi tayehe tamutu eta níchavaquenévanahi naicha ena nujaneanana israelítana, navarairahi titaequenehanuana. Tasapiha ticaiyacanu naicha eta namásuapajiráivana. ²⁰ Tamutu numetacahehi eta táuriqueneana tiúrichaheyare éti apanava. Nímitucahehi te jácani viúrujis-rávana étapa te epenana. ²¹ Nuconsejachahivare namutu ena achaneana, eta náeneuchiravaina me Viya, eta náitsivachiraina eta náitaresirana, étapa eta nasuapiraina nacasiñairaina ema Viáquenu Jesucristo. ²² Puítisera nuyaninapa te Jerusalén. Taicha nuvanecasivahi mayehe ema Espíritu Santo. Vahi necha núti tájahapuca nícharacavaya eta ánaqui. ²³ Tacarichu necha eta mametasiranuana ema Espíritu Santo. Tamutu eta avasareana nupaisiha-napahi, timetacanupahi éma eta nucatajivairaya, napresuchiranuya te cárcel te Jerusalén. ²⁴ Tájinaserá vahi nupicacava. Tayanapanéine népenapuca, vahi néñama eta nítaresira. Nuvaraha nímiyanavaya eta nürivahi mayehe ema Viya. Nuvapinavahi eta nítouchiraya eta nutuparacasivahi mayehe ema Viáquenu Jesucristo. Taicha éma tituparacanuhi nucametarairuya eta máemunasira-havihi ema Viya vimutu viti achaneana.

²⁵ Numetacahe: Puiti juca nuyaniraya, vaipa iápechavaimahi ímahanu. Eti ínapureanahi nímitureanahi emutu éti te iávasanapachuhi. Nímitucahehi tamutu eta véhisiraya ema Viáquenu Jesucristo. ²⁶ Eta tacache, numetacahe puiti: Vaipa nútitaracáina te natarihinapuca téjecapavanaya te etaracu éti. ²⁷ Tamutuhi numetacahe eta mavarahaqueneana ema Viya. Tájina vahi nuyumurupicahini. ²⁸ Tiuri puiti, ejaneacavayare éti, énerichuvare ejaneacayare ena iúmurivana taicha etuparahaipa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma, máepusaicahi eta máitine. ²⁹ Ecaunevaicha muraca, taicha puiti juca nujunijisiraheya, tijuricati títecanaya ena navarahaya témejecapávacha-heánaya. Navarahaya ticajanerecaheanaya tacutiyare eta chuye tinicarahi te tacajanereca eta varayuana. ³⁰ Énaparichu ena vichamuriana te etaracu, natarihiyare ena tímiturecanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napane-reruana. ³¹ Tásicha, ecaunevaicha yátupina. Échavayare eta mapanaquene año eta nutiarihirahi eyehe. Tamutuhi sácheana, yátiana nuconsejachahehi, émanapachuhi numetaca. Niyahasamurehi taicha eta nímairehehi.

³² Puítisera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiri-ruvana ema Viya. Túmeheyarepaipa táicha. Ema Viya mavarahahi ímijuru-chayare eta juca máechajiriruva; taicha mavaraha tíjaracaheya eta ícuchianahi te anuma eta iávihayare, ecachaneraya ena apamuriana masántuchaqueneá-narípa. ³³ Eta návihirahi eyehe, vahi nujamurachahini eta emuirihana étaripa eta plata íjaracanuhini.

³⁴ Ímararacanuhi éti eta táichararacavahi eta nucaematanera. Nucaematanehi tiásihanahi te nuvahuana, nuyiyahi eta nucamunu-queneana, énapa ena tímicatacanuanahi. ³⁵ Tamutu nímitucahehi tacahayare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahí ema

Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicujamuracha náijaracasichahavi” macahepa.

³⁶ Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya. ³⁷ Tásicha, tíyahanapa namutu, najupacapa náetserarecapa ema Pablo. ³⁸ Tipanererecanipa taicha eta mametasiravacahi váipa tiápechavanaimahi náimaha éma. Tásicha, tiyananapa nanapana eta te mávacuiyayarehi.

21

Eta viyanirapa eta te Jerusalén

¹ Te vijunijicapa ena vichamuriana, viávacuhapa viyanapa vitupiruru-chapaipa eta tiúrupuhi ticaijare Cos. Te apanapa sache vicaijuhepa eta tiúrupuhi ticaijare Rodas. Te apanavarepa sache viánucuhavarepa eta puerto ticaijare Pátara. ² Étapa vicainunainehi eta apana pacure tiyanayarehi tayehé eta apachara apanavare departamento Siria. Tacahe, viávacuhapa tayehé, viyanapa. ³ Eta vipaisirapahi, viánucuhapa eta tiúrupuhi Chipre tanapaicaphi te sapa eta viyehe. Vímiyanavachucha vipaica vítecápira te puerto ticaijarehi Tiro tayehé eta Siria. Taicha eta pacure véhirupahi tanaquicayarehi eta carga támaquenepahi tayehé eta puerto. ⁴ Étapa vicainunainehi ena apamuriana vichamuriana. Vinasipanapa nayehe, siete sache vicahe. Te juca, ema Espíritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuitecasa te Jerusalén. ⁵ Téhesera tiúchucayarepa eta pacure véhirupahi, viyanapa te puerto. Téhicahavianapa namutu ena vichamurianahi, énapa ena nayenana énapa ena nachichanaveana. Tinapanahavianapa te pacure. Te vítecápapa te playa, vépuyucapa vimutu, viyujaracapa. ⁶ Te tamutupa, vémamavauchavacapa vicametavapa eta nayehe, viávacuhapa. Tásicha, tichavanapa éna te napenana.

⁷ Eta viásihairahi te Tiro, vítecápapa te Tolemaida. Étapa táenasihahi eta vipaisirahi te une. Viyanapa véchajicavacahi ena vichamuriana. Vinasipa étana sache eta nayehe. ⁸ Te apanaquinépa sache viyanapa vicaijuhepa eta avasare Cesarea. Te vítecápapa, viyanapa te mapena ema Felipe ema ticametarairurahi, ema nasietenehi ena nanerejiruanahi téchapajiricanahi eta nirureana nayeheana ena máimaruana. Vinasipa eta mayehe. ⁹ Ema Felipe, natiarahi ena cuátroana machichanaveana esenana, máimaruana-richaha. Ena nani máijaracahi ema Viya eta náitusirahi ticametarairuana. ¹⁰ Eta jena sácheana viávhairahi mayehe ema Felipe, títecápapa ema émana profeta ticaijarehi Agabo. Éma tiásihahi te Judea. ¹¹ Títecápauhahavipa tímahapanahaviyarehi. Tacahe, mayaseacapa eta maitijuhe ema Pablo. Tásicha, titiapechavapa, étapa eta mavahuana. Tásicha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náijararecayareva nayehe ena apavasanana” —macahepa ema Agabo.

¹² Tacahe, vimutu viti, énapa ena ticavasanahi tayehé, viyaseacapa ema Pablo eta vahi macuyana te Jerusalén. ¹³ Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náitiacanupuca. Núti níjaracava népena te Jerusalén máichavenénahi ema Viáquenu Jesucristo —máichapa.

¹⁴ Te vímahapa vahi váratahahini víchejica, vísapapa tiyana. Vicahepa:

—Énenarinepuca tácae, máimahavirinepa ema Viya —vicahepa.

¹⁵ Te tamutupa, vétupiricavapa. Viyanapa te Jerusalén. ¹⁶ Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tiúrupuhi Chipre. Tatarihisera eta mapena te Jerusalén, eta vítecapihayarehi.

Ema Pablo máejirapanapa ema Santiago

¹⁷ Te vítecapapa te Jerusalén, ena vichamuriana tiúrisamureanaríne eta najaçapirahavihi. ¹⁸ Te apanapa sache ema Pablo tiámahavipa, viúrujicavayarehi te mapena ema Santiago. Vichimapapa natarihipa namutu ena víyarahana pastoreana. ¹⁹ Tacahe, ema Pablo máechajicavacapa éna. Mametacavacapa tamutu eta máimicatasirapahi ema Viya eta macametarairuirapahi nayehe ena apavasanana étapa eta máichirapahi eta tiáramicareana.

²⁰ Te nasamapa ena mametaruanahi, nacunacharinehi ema Viya. Tacahe, náichapa ema Pablo:

—Tétavicavapa táuriva eta juca pimetarapiana. Pímahapasera natarihihira ena camuriqueneana ena vijaneanana téhicanahi ema Jesús. Énasera, muracaqueneanahi religiosoanahi, téhicanahi eta mayeherepini ema Moisés. ²¹ Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana. Pímitucavacahiji eta vähiji nacusuapa eta mavanairipiana ema Moisés, vähivaréji nacumarcacha ena nachichanaveana ajairana, vähivaréji nacuehica eta viyeherepiana. ²² ¿Tájahapuca táicharacava eta juca? Tijuricati ena achaneana tiúrujicavanainapa, te nasamairiricapa eta pitarihirahi. ²³ Tiúripana eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa. ²⁴ Pisipahacavaya, piámamuriha éna eta pímeresiravaya tayeha eta Templo. Pivachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiarayare eta vahi yátupinahi eta pépiyaequenehi, apaesa naímahavi eta pipicauchirahi eta mavanairipiana ema Moisés. ²⁵ Énasera ena vichamuriana apavasanana, vímiamarecaripa eta vicartane. Náecharipa eta vaipa étaparacáinahíni nayehe eta juca. Tacarichu vahi nacunica eta taeche eta sárare nayujaraurehi te tamirahu eta nasiñarajiana, vähivare nacunica eta táitine eta sárareana, vähivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina —náichapa ena pastoreana.

Nacaratacapa ema Pablo eta te Templo

²⁶ Tacahe, ema Pablo tísapavapa. Te apanaque nepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana. ²⁷ Tacahe, te náitauchapa eta siete sache eta nasipahasiravahi, tichavanapa te Templo. Te jena sache, natarihipavare ena apamuriana najaneanana tiásihanahi te tinapaica eta Asia. Eta máviharrichaha ema Pablo te Templo, náimahapa éma. Tacahe, náimiyusemacapa namutu ena achaneana. Nacaratacapa ema Pablo. ²⁸ Tipiaracanapa:

—¡Tátanaveana israelítana! ¡Yare, ímicatacahavi! Émara ema maca achane ema tipaicahi tamutu avasareana. Tímiturecapahi nayehe ena achaneana eta macontrachirahi eta viávasa. Énerichuvare macatianacahi eta mayeherepi ema Moisés, étapa eta juca viyehe Templo. Puiti

macasiapavare te juca Templo ema apavasanatataji. Majararecpa eta juca tacapicahuquenehi —nacahepa.

²⁹ Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahi ema Pablo te tajuhe eta Templo.

³⁰ Tacahe, tijúnapacarajiánapáipa namutu ena achaneana te tajuhe eta avasare. Ena ticticianacanahi ema Pablo nacaratacapa éma, nachururupai-capapa eta nacuchusirahi tayehe eta Templo. Tacahe, ena apamuriana náeratacavanepta etá tapajacura etá Templo. ³¹ Navarahapa nacapacavaneyarehini. Masámairiricavánepaséra ema comandante nayehe ena sunturana, tatiarihahí etá revolución te tajuhe etá avasare. ³² Tacahe, ema comandante máichuhapa ena masuntarurana énapa ena oficialeana. Tiyananapa tijunapanapaipa. Ena achaneana, te náimahapa etá máitecapauchirahí ema comandante, náinajicapa etá náehairahí ema Pablo. ³³ Tacahe, ema comandante mapauchapá ema Pablo, macavanairipipá nacarataca, náitiacapa te apipi cadena. Tásicha, mayaserecpa te nájahahipuca, tájahapuca maviurevahí. ³⁴ Énasera ena achaneana tipiaracanarichucha, apapipijipá etá nacayema. Vaipa mácaicutiarahini ema comandante tájahapuca etá nacayemahí taicha etá najajasirahí. Tásicha, macavanairipipá náma te cuartel. ³⁵ Ticajerahisera etá nápanirapaipa te tayehe grada etá cuartel. Nanaracuhapa ema Pablo, taicha ena achaneana navarahaichucha nacapacavane. ³⁶ Taicha namutu náehicaphi tipiaracanapaipa:

—Máepenávanetataji —nacahepa.

³⁷ Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—¡Jéhepuca, píti pítuca péchajica te véchajiriruva griego! ³⁸ Tacahe, ¿váhiyara pítina ema ticavasa te Egipto, ema táchahi etá revolución ticaeteharecahi cape juca viásinequenehi, ema majunaquenehi tiámamurihahi te mávapahi ena cuatro mílqueneana ticaphiana? —máichapa.

³⁹ Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu etá ichape avasare capital te Cilicia. Picatajicanusera písapanu néchajicapa nayehe ena achaneana —máichapa.

Téchajicapa ema Pablo te namirahu ena achaneana

⁴⁰ Tacahe, ema comandante másapapa téchajica. Titupihapa ema Pablo te tayehe grada etá cuartel. Tacahe, macanuquechapa etá mavahu, macamatinacapa ena achaneana. Te timatinanapa, tépanavapa téchajica etá náechajiriruva ena majaneanana, ánipa macahe:

22

¹ —Tátanaveana, nuparapenaveana. Esamanuchaha etá néchajisiraheya nucatiuchiravaya —macahepa.

² Tacahe, te nasamapa etá máechajisiravacahi te náechajiriruva, tésamirimuriávanapa ticasamarahianapa. Tinahacavapa téchajica ema Pablo, máichavacapa:

³ —Nútirichu ejaneana, israelítanu. Eta núchusine te avasare Tarso tayehe capital etá Cilicia. Ánipasera nujurusinehi te juca viávasa Jerusalén. Ema tímitucanuhi ema víyacara Gamaliel. Nujuruchahi etá nupicauchirahí yátupi etá viyeherepi náijararuuhavihi ena viáchucanaveanaini. Eta nítaresirahi,

nímicapicáuchahi ema Viya, tacutihu puiti eta ímicapicáuchirahi éti te juca sácheana. ⁴ Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena ese-nana. Nímicapacavacahi éna. ⁵ Tímatinuanarichuhi namutu ena aquenucara-hana émapa ema corregidor. Taicha éna tíjaracanuanahi eta órdene nayeheya ena vijaneanana ticavasanahí te Damasco, náimicatasiranuyare eta nucara-tasiraya ena téhicanahi ema Jesús. Tacahe, nuyanapa népanavacayarehini éna, ticaemecharahianayarehi.

*Ema Pablo mamevacacapa eta máehisirahiva éma apanava ema Jesús
(Hch 9.1-19; 26.12-18)*

⁶ Tacahe, eta nupaisirapahi te achene, nánehiripa eta avasare Damasco. Te jena las dócequeneyárepa sache, tiáramicarepa eta tijarahi timícauchanuhi tiásicha te anuma. ⁷ Náquipaicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipánaji-ricanu?” ⁸ Tacahe, nuyaserecapa: “¿Nájahavi piti tata?” níchapa. Tásiha, tijicapanupa: “Nuti Jesús Nazareno, nuti picatianaruhi, eta pipánajirisíravaca ena téhicanuanahi” máichanupa. ⁹ Énerichuvare ena téhicanuanapahi náimahahi eta tijarahi timícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi. ¹⁰ Tacahe, nujicapapa núti: “¿Tájahasica níchayare, Tata?” Tásiha, ema Viya máichanupa: “Péchepuca, piyana pítecupa te avasare Damasco. Ánaqui mararihi ema timetacavyare tamutu eta pémata-nerepiyare pítauchaquenéyare nuyehe” máichanupa. ¹¹ Tásiha, púchuquinupa taicha eta tijarahi. Tacahe, ena nucompañeroanapahi tiámanuanapa tichuru-canuanapaipa te nuvahu, nacaitecapiranupa te avasare Damasco. ¹² Eta ánaqui, matiarihihi ema émana vijaneana ticaijare Ananías. Títaurahi éma tayehe eta mavanairipiana ema Moisés. Namutuhi ena vijaneanana ticava-sanahi te Damasco nacunachahi éma. ¹³ Títecupa ema Ananías, tímahapananuhi. Te títecupauchanupa, máichanupa: “Nuparape Saulo, tachava eta pímaoirisira”. Tacahe, tijahúchavapa nímaoiririca. Nímahapa éma. ¹⁴ Tacahe, máichanupa éma: “Ema Viya nacasiñaquenehi ena viáchucanaveánaini, píti manerejiruvihi taicha mavarahahi tímimatichaviya eta mapanereru. Énerichuvare mavarahapa tímimatichavi ema máuriquene Cristo, émaquenehi téchajicavihi eta cape. ¹⁵ Péchajisihayare éma eta picametarairuirayare nayehe namutu ena achaneana picainunaqueneanaya. Pimetacayare eta juca pímairahi étapa eta pisamirahi éma. ¹⁶ Tiuri puiti, enevane picaicachasiya te máijare ema Viáquenu Jesucristo. Picasíñava mayehe eta tacasipairaya eta pipecaturana” máichanupa ema Ananías.

Ema Pablo mamevacacapa eta macavanahirahi nayehe ena apavasanana

¹⁷ Tásiha, te nuchavapa ani te Jerusalén, nítecupa ani te juca Templo. Te nuyujaracaipa, tiápechanuvarepa téchajicanu ema Viya. ¹⁸ Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahi tisuapavianaimahi eta péchajisiháiranuya”. ¹⁹ Tacahe, núti níchapa: “Tiuri, Tata. Énasera, tímatinuanahi eta néstarasiravacahi nupresuchiravacahi ena téhicavianahi. Tamutuhi te náurujisirarevana nutanusihavacapahi éna. ²⁰ Énerichuvare, te nacapacapa ema Esteban ema pivanarainihi, nutiarihi-hivare. Nímicatacavahivare ena ticapacanahi, nujaneasiravacahi eta namuir-ihana. Tijuricatipuca nasamararacanu eta numetasiravaca eta péchajisi-ranuhi” níchapa. ²¹ Émasera ema Viáquenu tipamicanuichucha: “Piyanaya-

resera. Núti nuvanecavi pipaicayare nayehe ena apavasanana ticavasanahi te tayererehiqueneana” máichanupa.

²² Tacahe, ena achaneana, eta nasamirahi eta juca, vaipa návarahahini nasamararaca. Tisemanapaicha. Tipiaracanapa:

—Tiúripana máepenachucha ema maca achanetataji. Vaipa táuricahini máitarecaríchahahíni —nacahepa ena mánarana ema Pablo.

Ema comandante macasiapapa te tajuhe ema Pablo

²³ Muracapanapa eta napiarasira. Tivejamuhiacavanapa eta nacamisana eta nasemaneva. Navehavare eta máteji. Náevajasicapa ema Pablo.

²⁴ Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimicaecherachaya ema Pablo eta maviurevahí, tájahapuca tacayemahi eta nasemirahi ena achaneana eta mayehe. ²⁵ Étasera te náitiacayarepa eta náestasirayarehi, téchajiuhanumapa ema Pablo eta mayehe ema nacapitara ena suntaruaná. Máichapa:

—Núti tavanaranuhi eta viávasa Roma. Picunevachucha, machu péjecapava eta péstasiranu, vuíchaha táimaticarehini eta nutapiravapuca —máichapa.

²⁶ Te masamapa ema nacapitara eta juca, tiyanapa mametaca ema comandante. Máichapa:

—Péchapavachucha eta pivarairahi pé mestareca ema maena achane. Taicha tavanaráji eta Roma —macahepa ema nacapitara.

²⁷ Tacahe, ema comandante tiyanapa mapaukahai ema Pablo. Máichapa:

—¿Yátupisaréji tavanaravi eta Roma? —macahepa.

Ema Pablo majicapapa:

—Yátupi —máichapa.

²⁸ Tásiba, macahepa ema comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujisiravahí eta pisiapirahi? —máichapa.

Ema Pablo máichavarepa:

—Núti tavanaranuhi eta Roma taicha étarichuvare náuchusinehi ena ticachichanuana —máichapa.

²⁹ Tacahe, térajijicavanapa ena téstacanayarehini ema Pablo. Émaripa ema comandante, te máechapa eta tavanarairahi eta Roma, tipicarinehi eta máitiasirahi.

Ema Pablo námapa te namirahu ena aquenucarahana

³⁰ Te apanapa sache, ema comandante mavarahapa máechayare tájahapuca eta maviurevahí ema Pablo eta nayehe ena majaneanana. Mavejapuacapa eta cadenana máitihanahi. Macurujicapa ema corregidor énapa ena aquenucarahana. Tiyanapa mámahi ema Pablo, macatupihapa te namirahu.

23

¹ Tacahe, ema Pablo máesenimurihana ena aquenucarahana, máichavacapa:

—Nuparapenaveana. Núti eta nítaresirahi puíticha juca nucahehi, tájina níchiraváinahi eta nusamiravahí te mamirahu ema Viya —macahepa.

² Ema corregidor Ananías, tisemapa eta masamirahi eta máechajiriruvana ema Pablo. Macavanairipipa ena titupihanahi te machacaya ema Pablo. Máichapa:

—¡Ésapajacacha ema mácatátaji!

³ Émasera ema Pablo majicapapa:

—¡Pítira téhaviyare ema Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarihipuca eta néjecapirava apaesa pémehanu. ¿Tájaha tacayema eta juca pivanairipihi? —máichapa.

⁴ Ena apamuriana achaneana natarihiqueneanahi náichapa ema Pablo:

—¿Tájaha tacayema piácapaemacha ema corregidor, macapicahuquenehi tiyujaracarahi mayehe ema Viya? —náichapa.

⁵ Ema Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiruva ema Viya. Ani tacahe: “Vahi picucajacha mácani tuparairuca tayehe eta piávasa”.

⁶ Tacahe, ema Pablo máimativacapa ena aquenucarahana, natarihirahi ena saducéoana, énapa ena apamuriana fariséoana. Tásiba, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira —máichavacapa.

⁷ Te nasamapa eta juca, ena fariséoana énapa ena saducéoana típutsimuriávanapa, napanerequenehapa. ⁸ (Taicha ena saducéoana, vahi nusuapa eta náechepusiraya ena náepenaqueneana; váhivare nusuapa eta natarihirahi ena ángeleana; váhivare nusuapa eta tatiarihirahi eta náchaneva ena náepenaqueneana. Énasera ena fariséoana nusuapa tamutu eta juca.) ⁹ Tacahe, téchajicanapa muraca. Tacahe, te nataracu ena fariséoana, natarihihi ena escribánoana. Téchepucana. Nacahepa:

—Ema maca achane, tájina matapiravaina. Éneserapuca táchajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

¹⁰ Tacahe, ichape eta semanere. Tíñepipa náicha. Tacahe, ema comandante, eta máimairahi eta nasevahí, tipicanecha tájahapuca náicharacahini ema Pablo. Tásiba, máimichuhavanepa ena suntaruana navehapa ema Pablo, náimijunijicapa te namirahu ena mánaranahi. Náimichavavárepá ema Pablo te cuartel.

¹¹ Tásiba, te jena yáiquenehi máechajicapa ema Viya ema Pablo, máichapa:

—Túmevinachucha, Pablo. Taicha tiúrihi eta péchajisihairahi eta níjare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

Napanerechapa eta nacapasiraya ema Pablo

¹² Te apanaque nepa sache, natarihihi ena apamuriana napanerechapa eta nacapasiraya ema Pablo. Nacahepa eta náechajiruvahí:

—Tacamunurine máepenavane ema mácatátaji Pablo. Tásiba puiti, víti vinacaya eta juca vícutiaraya. Vuíchaha vinicaimahi, vuíchahavare vérainahi, machu vásapiha vicaicuña me Viya te vahi vicuitaucha eta juca vipanereruhi. Tiámainucava te víturucapa vicapaca ema maca, vinicapa —nacahepa.

¹³ Náetavicalhipuca cuarentana ena ajairana, ena tíjaracavanahi ticaechajiruvanahi eta juca. ¹⁴ Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequeneháiraya ema mácatátaji Pablo. Vinacaripa eta juca vícutiaraya. Vuíchaha vinicaimahi, vuíchahavare vérainahi, machu vásapiha vicaicuña me Viya te vuíchaha vicuitaucha eta juca vipanereruhi.

¹⁵ Tacahe, puiti eti tuparairucana eyaseacayare ema comandante máma

achichu te emirahu, etanuca eta etseraruina macayaserehi ema Pablo eta juca máichavaquenévahi. Tásiha, víti vitsecavayare eta vicapasirayare éma te Vímahapa máuchuca —náichapa.

¹⁶ Tiuri, matiarihi ema suchicha esu maparape ema Pablo. Masamairicapa eta juca. Tiyanapa te cuartel mametapaná ema Pablo. ¹⁷ Tacache, ema Pablo máichuhapa ema nacapitara ena suntruana, máichapa:

—Piáma ema maca amaperu te mamirahu ema comandante. Jucarihi eta juca mamecaya —máichapa.

¹⁸ Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihiji eta timetacaviya —máichapa.

¹⁹ Tacache, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetacanuya?

²⁰ Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaseserehiyare eta juca máichavaquenévahi. ²¹ Váhisera picusuapavaca taicha cuarentana ena ajairana ticuchapanahí te picuchu-
capa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitauchapa eta napanereruhi, tinipana-
nainapa. Puiti éna, pítinecha nacuchapahi te pisuapayarepuca éna —máichapa ema amaperu.

²² Tacache, ema comandante macahepa:

—Tiuri, piyana te pipena. Nacuijasera picumetaca eta juca pimetarunuhi —macahepa.

Ema comandante máevatacapa ema Pablo mayehe ema Prefecto Félix

²³ Tiuri, ema comandante máichuhapa ena apinana nacapitarana ena suntruana. Máichapa:

—Etsecayare ena docientoana suntruana tiámanaya eta espada, dociento-
navare ena tiámanaya eta lanza, setentana ena ticaperanayarepahi. Enápa-
nayare ema Pablo te Cesarea. Iúchuca puiti te las nueve yati. ²⁴ Énerichuva
etsecayare étanaina cavayu maperainapahi ema Pablo. Táurisera eta iámriai-
napahi. Íjaracaya ema Prefecto Félix —máichavacapa.

²⁵ Tacache, máimiamarecavarepa eta carta. Eta juca táchajiriruvapahi eta carta:

²⁶ “Nuti Claudio Lisias nímiamareca eta juca carta piyehe piti piúriquene excele-
ntísimo aquenua. Néchajicavinuma tativa.

²⁷ Jucarihi eta juca téchacarehi. Ena israelítana nacaratacahi ema émana
achane ticaijare Pablo. Navarahahi nacapacaya. Étasera te néchapa
núti tavanarairahi éma eta Roma, nuyanapa námahi ena nusunta-
rurana nucatiuchapanapa. ²⁸ Eta nuvarairahi necha eta maví-
ureva, námapa te namirahu ena tuparairucana israelítana te juca.
²⁹ Nímahapa tájina matapiravainahini táimicpacahini táemeratacahi-
pucáini te cárcel. Étachuchanénipuca tímicatichahi eta nayeherepiana.
³⁰ Tásiha, nusamairiricavarepa eta nacamesairayarehi nacapaca. Tac-
ache, nímiamarecpa puiti eta piyehe. Énerichuvare nuvanecahi ena
timetauchanahí náiteca ara piyehe, étaina macayaserehiya.

Tamutupa eta juca néchajiriruvanahi piyehe”.

³¹ Tacahe, ena suntaruana náitauchahi eta vanairipi. Námapa ema Pablo te jena yati. Títecapanapa te avasarechicha ticaijare Antípatris. ³² Étapa nachavinehi te apanapa sache ena suntaruana ena tipaicanapahi. Énasera ena ticaperana tímiyanavánapa eta nanapaniraya ema Pablo. ³³ Tacahe, te títecapanapa te Cesarea, náijaracapa ema prefecto eta carta, émapa ema Pablo. ³⁴ Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

³⁵ Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiba, macavanairipipa macajaneha te palacio máepiyaruinihi ema ichav-icaini Aluresi.

24

Téchajichavapa ema Pablo te mamirahu ema Félix

¹ Te taequenepa eta cíncouene sache, títecapanapa te Cesarea ena tuparai-rucana tiásihanahi te Jerusalén. Matiarihihi ema Ananías corregidorhi, énapa ena apamuriana náiyacaranah. Matiarihipahiva ema abogado ticaijare Tértulo. Tiyananapa mayehe ema prefecto, timetaurecanapa. ² Tacahe, náepanapa ema Pablo. Te títecapanapa, tépanavapa téchajicapa ema Tértulo, ánipa macahe:

—Vihasulupayachavi, tátachicha Prefecto, eta viúrivahi pícha. Tájina víchiravainahini eta pítusirahi, pijaneacahavi eta juca aquenucairavihi eta viyehe.

³ Vimutu viti achaneana te avasareana, tamutuvare sácheana vicunachavihi. Vihasulupayachavihi, tátachicha Félix, eta piúrivahi eta viyehe. ⁴ Picatajicahavi, tata, pisamahavi. Vahi picuyacujihavi eta juca viyasearuvianaya.

⁵ Puiti vímatipa ema maca achanetataji, tihapapirahi éma. Tamutu avasareana te jácani viávihapahí viti israelítana, mayurucavaca ena vijaneanana. Émarichuva tachutirihahi nayehe ena téhicana ema Jesús Nazareno. ⁶ Énerichuvare mavarahapa máechipejicayare eta tacapicahuquene Templo. Eta tacahehi vicaratacapa. Vícuñacayarehi taicha tacahehi eta tavañesirahavihi eta viyehe ley. ⁷ Émasera ema comandante macatiuchapa tiverejimirauchahavipa taicha camuriana ena masuntarurana. ⁸ Tásiba, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi víti eta vimetasiravi. Te pivaraña, picayasesereru éma eta yátupirahi eta máichavaquenevahí ema maca eta vimetauchirahi puiti —macahepa ema Tértulo.

⁹ Tacahe, ena apamuriana natiaríhiqueneanahí, énerichuvare nacahehi:

—Yátupi eta juca máechajiriruvanahí —nacahepa namutu.

¹⁰ Tacahe, ema prefecto máimicútiarachapa máechajiuchava ema Pablo. Tépanavapa téchajica ema Pablo, ánipa macahe:

—Tájina táichava néchajichavaya te pimirahu taicha néchahi nútí ánaquiá-paripa eta juéseravihi tayehe eta viávasa. ¹¹ Tiúripana picayasesereru. Núti, dóceravahi sache eta nítécapirahi te jena viávasa Jerusalén eta néjirairayarehi ema Viya. ¹² Nájina nucájachaquenéa. Nájinavare nímiyusemaruina te tajuhe eta Templo, étaripa te náurujisirareva ena nujaneanana. Téhepucaíni cállleana nucajacharecuhini. ¹³ Ena nani tictalianacanuana, tájina naviya náetseraruinahini eta nametauchiranuhi. Vaipa tisuapacareana. ¹⁴ Ena nani náimijachahi vahi nétupicava eta nímituresirahi. Núsiera nusuapa tacutihi eta nasuapirahi namutu ena viáchucanaveanaini. Émarichuhi nucasiñahi ema

Viya, ema nacasiñaquenehivare ena viáchucanaveanaini. Núti nusuapahi tamutu eta táchajiriruva eta Sagrada Escritura. ¹⁵ Núti nucasiñavahi mayehe ema Viya, nucuchapavahi eta véchepusiraya te vécari vimutu viti matapiravareanahi, énapa ena ticatapiravana. Puiti, énaripa ena timetauchuanuanahi ticutinuanahi eta nasuapirohi eta macaechepusiraya ema Viya ena náepenaqueneana. ¹⁶ Núti, eta nusuapirohi tamutu eta juca, vahi návarahahini néjecapavahini te mamirahu ema Viya. Váhivare návarahahini néjecapava te namirahu ena achaneana.

¹⁷ Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya. ¹⁸ Te tamutupa eta tacasipairahi eta náchaneva étapa eta nuvahuana, nuyanapa te Templo eta nunapanayarehi eta námvahuana me Viya. Eta návihirahi te Templo, tichimapuanapa ena nujaneanana tiásahanahi te departamento Asia. Nájinaserá achaneanahini nachimapahini te nuchacaya. Váhivare náimahanuini nímiyusemacavacahini ena achaneana. ¹⁹ Ena nani nujaneanana tiásahanahi te Asia, énara títecanayarehini timetaurecana, te tatiarihinhapucaini eta nuviureva. ²⁰ Piyasereca ena nani natarihiqueneanahi puiti, te náimicacherachapuca eta nuviurevahí te ticatupiacanuanapa te namirahu ena tuparairucana. ²¹ Téheserapuca eta tímicaviuchanuhi eta numetasiravacahi éna: “Puiti juca sache ecatupihanuhi te juca emirahu táichavenehi eta nusuapirohi eta véchepusiraya te táchiquenénapa eta vépenira” níchavacapa núti —máichapa ema Pablo.

²² Émasera ema Prefecto Félix máecharipahi tamutu eta náehisirahi ena achaneana ema Jesús, étapa eta táurivahi eta nayeherepiana. Tásiha, te tamutupa eta náechajirisiravahí, máichavacapa:

—Tiuri, táchacheine achichupaine vélcha eta juca, te máitecapa ema comandante Lisias. Nuyaserecaya éma etá juca íchavaquenevahí éti —máichavacapa.

²³ Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacuerataca, táuri eta manarasiraina. Táuri eta náechapajirisiraina ena vichamuriana, téjiranayarepahi.

²⁴ Te jena sácheana, tiyanapa ema Félix te apána avasare. Te tichavapa, mámapa esu mayena ticaijaru Drusila. Ésurichuhivare israelíta. Náimichuhapa ema Pablo, téchajiricavanayare. Tacahe, ema Pablo mametacavacapa eta táicharacavahí eta náehisirahi ema Jesucristo. ²⁵ Eta máechajirisiravahí ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonachahayare ema Viya. Matapiravarehena te mamirahu. Énerichuvare, tiúrinapa eta ítaresiraya, eratahainapa ecaratacavayare. Puiti, táuricapa ecasiñavavane, taicha járajapa eta sácheyare nacayaserehirayare nácani ticatapiravahí. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamara-racavi. Te apahenavare nímicuhaviyare —máichapa.

²⁶ Ema Félix ticuchapavahi te máijaracayarepuca eta plata ema Pablo eta máuchucuiraya. Eta táchachehi máimichuhaparacahi téchajiricavanayarehi.

²⁷ Váhisera máuchucuhahini ema Pablo, taicha ema Félix mavarahahi tiúriyarehi nayehe ena israelítana. Apina año eta tayerevahí. Ticaitsivanecha ema Félix. Tisiapapa ema Porcio Festo, émapavapa prefectohi.

25

Nacatupiacapa ema Pablo te mamirahu ema Festo

¹ Te émapavapa aquenucahi ema Festo, te mapanaquenepa sache, tiyanapa te Jerusalén. ² Tacahe, ema corregidor énapa ena apamuriana tuparairucanahi, ticurujicacanapa mayehe ema aquenuca Festo. Nametauchapa ema Pablo. ³ Nayaseacapa ema Festo macátajicavacahini eta máevataca te Jerusalén ema Pablo. Taicha navarahahi titsecavanayarehi te achene eta nacapasiraya. ⁴ Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanayare nuchavaya tayehe. ⁵ Eta tacahe, te tatarihipuca eta échaqueneanahi eti tuparairucana, tiúripana éhicanu te Cesarea apaesa vecha te ticaviurevahipuca ema maena achane —máichavacapa.

⁶ Te tiánehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo. ⁷ Te títecrapapa ema Pablo, tisiapapa te mamirahu ema Festo. Témeñahavanapa ena mánarana tiásuhanahi te Jerusalén. Timetaurecanapa ema Pablo. Camuri eta máejecapiravahiji. Ichape eta maviurevhiji nayehe. Tájinaserá naviyahini eta náetserarúinahíni. ⁸ Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema ichapequene aquenuca Emperador —máichavacapa.

⁹ Émasera ema Festo, énerichuhivare mavarahahi tiúriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étina tacaechacasiya te numirahu eta juca píchavaquenévahi?

¹⁰ Tacahe, ema Pablo majicapapa:

—Étaripa návihahi puiti te pimirahu píti viyehe juez manacaquenevihi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana. ¹¹ Téheserapuca nucaviurevhini, táimicapanuríne eta nuviureva. Vahi nucatiuchavaimahi. Tájinaserá nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaíticanu, nuyasesereca puiti nuyana te mamirahu ema Emperador. Étina nucametauchacasiya mayehe —máichapa ema Pablo.

¹² Tacahe, ema Festo macayasesererupa nayehe ena mayeheana abogado. Tásaha, máichapa:

—Piti Pablo, piyaseserecahi piyana te mamirahu ema Emperador. Nísapavi piyana —máichapa.

Títecrapapa ema rey Agripa, ésupa esu Berenice

¹³ Te jena sácheana, títecrapapa te Cesarea ema rey Agripa, ésupa esu Berenice. Náechajipanayarehi ema Festo. ¹⁴ Eta nanasiquenerahi te jena sácheana, ema Festo mamecapa ema rey eta máichavaquenévahi ema Pablo. Máichapa:

—Mararihi ani ema achane ticaeratahi ticaijare Pablo. Manaquiruhi ema Félix. ¹⁵ Te nuyanapa te Jerusalén, ena tuparairucana timetacanuanapa eta máichavaquenévahi, tiyaseacanuanapa eta nímicapasiraina. ¹⁶ Tásaha, núti nujicapavacapa: “Viti aquenucarohana tayehe eta Roma, vahi tituparacahavi vímicapacahini mácani ticametauchacasihi te vuíchaha ticamirahucacanahi ema mánarahi” níchavacapa. ¹⁷ Tacahe, te títecapanapa ani, vahi náyererejhini núti. Te apanaque nepa sache néjacavanepa te návacure,

nímichuhapa ema Pablo. ¹⁸ Núti nímijachapa ichape eta maviureva. Étasera eta nametauchirahi, tájina vahi táíñepihini. ¹⁹ Étachuchanénipuca tímica-viuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Puítisera ema Pablo máechajishahi eta mápechiravahi titareca. ²⁰ Núti vahi nímatiequeneha eta táicharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévah?” ²¹ Émasera tiyaseuchavapa eta mayaniraya te mamirahu ema Emperador Augusto. Tacahe, níminanerecapa macajaneha tiámainucava te nítujicava níminanerecapa nanapanamayehe ema Emperador –máichapa ema Festo.

²² Tacahe, ema Agripa máichapa ema Festo:

—Núti apama nuvarahasa nusamaini ema mácara achane –máichapa.

Tacahe, ema Festo máichapa:

—Tiuri, achichu pisamaya éma.

²³ Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náitecapira. Jánunuha-cavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo. ²⁴ Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarihiqueneanahi te juca viúrujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca. ²⁵ Nútisera tájina nímaha matapiravaina táimicapacahini. Émasera tiyaseuchavapa tiyanayare te mamirahu ema Emperador Augusto. Nísapahisera mayana eta mayehe. ²⁶ Vuíchahasera nucajurehini ema náquenu Emperador, taicha tájina nuyiyahini eta matapiravainahini. Puítisera nucatupiha éma te pimirahu piti rey Agripa, étipa eti tátanaveana. Nuvaraha ímicatacanu eta táicharacavaya eta juca, apaesa nucajurepaini ema Emperador. ²⁷ Taicha vahi tiuri vévataca ema présuhi te tájina matapiravaina –macahepa ema Festo.

26

Ema Pablo téchajichavapa te mamirahu ema rey Agripa. Mametacavacapa eta máitaresirahi te vuíchaha máehicahini ema Jesús.

¹ Tacahe, ema Agripa máichapa ema Pablo:

—Tiuri, nímaha péchajica –máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

² —Tiúrisamurécate eti nítujisiravahi néchajica te pimirahu, piti rey Agripa, eta nucatiuchiravaya núti apanava eta juca nametauchiranuhi ena nujaneanana israelítana. ³ Núrisamure ichape taicha piti pímatih tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti pisamanu eta nuçayemaya. Pácayehe paciencia nuyehe.

⁴⁻⁵ Eta námaperuvahi núti, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena tipícauchacareánapána. Namutu ena nuchajuruhanahi tímatinuanahi eta nítaresirahi. Ena titametacavianaya eta nítaresirahi. ⁶⁻⁷ Puiti ticatupiacanuanahi te pimirahu, piti rey, táichavene eta vicuchapiravahi eta macaechepusirahaviya ema Viya te vépena, taicha tacahehi eta máechajiriruvahi nayehe ena viáchucanaveánaini.

Vimutu viti tachichanaveanahi eta viávapairu Israel, vimutu vicuchapavahi eta juca táitauchiravaya eta máijararuuhaviya ema Viya. Eta tacahéhi, tamutuhi sácheana, yátiana vítatihí ema Viya, viyujaracahi mayehe. Táichavenehi eta nucuchapiravahi nútí, timetauchuanuanahi ena nujaneanana. ⁸ Tiuri puiti éti, németeaca tisuapacarehi eyehe eta macaechepusiraya ema Viya ena náepenaqueneana.

*Ema Pablo mamecacavacapa eta mapánajirisíravaca ena téhicanahi ema Jesús
(Hch 8.1-3; 9.1-2)*

⁹ Nútiripa acane nímijachahi nétupicava eta me Viya eta níchaqueneánahi nucatianasiravacahi ena téhicanahi ema Jesús Nazareno. ¹⁰ Eta juca níchirahi te Jerusalén. Tímicatacanuanahi ena tuparairucana eta nucaratasiravacahi ena matapiravareanahi téhicanahi ema Jesús; nímisiapiravacahi te cárcel. Eta nímairahi eta nacpasirayarepahi, néhicahi eta napanereru éna. ¹¹ Ichape-murianahi ena nucarataruana. Némecharecavacapahi ena nétupiaruanapahi te nárujisirarevana. Níminajicavácapáipa eta náehisirahi ema Jesús. Nécatihavare eta náepuruiraya. Muraca eta nuvainarajichiravahi nayehe. Tamutuhi nutanusihavaca te apanaqueñeana avasareana tayerehiqueneana.

*Ema Pablo mamecacavarepa eta máehisiraipa éma apanava ema Jesús
(Hch 9.1-19; 22.6-16)*

¹² Étarichuvare tímiyananuhi te avasare Damasco. Tivanecanuanapa comisiónnuhi ena tuparairucana; tíjaracanuanahi eta órdene. ¹³ Tacahe, tata rey, te nánehipa te avasare, te jena sache las dócequenepa, tíjahúchavapa timícachanu eta majaraiva ema Viya, tiásicha te anuma. Tijarahipana tayehe eta sache. Timícachanupa, énapa ena téhicanuanapahi. ¹⁴ Tacahe, viáquipáicavapa vimutu eta vipisirahi. Nusamapa ema Viya, téchajicanuhi te véchajiriruva viti israelítana. Máichanupa: “Saulo, Saulo, ¿tájaha tacayema picatianacanuhi? Pésamiricavachucha, taicha pítijiváichucha píchavahi. Vahi piúrimahi te pímyanava pipanajiricavaca ena téhicanuanahi” —máichanupa. ¹⁵ Tacahe, níchapa: “¿Nájahavi, piti Tata?” Tijicapanupa éma: “Núti Jesús. Núti picatianaruhi, eta pipanajirisíravaca ena téhicanuanahi. ¹⁶ Péchepuca, pitupiha. Núti nímerecavahi eta piyehe, taicha nunerejiruvihi nuvanaraviya. Puiti numetacaviya eta juca pématanerepiyare eta nuyehe. Péchajisihayare eta níjare nayehe ena achaneana eta juca pímairanuhi puiti, étapa eta apamuriana nímerereruanayare. ¹⁷ Núti nucatiuchaviya te tájahapuca náicharacavi ena vijaneanana israelítana énapa ena apavasanana. Puiti nuvanecavihi péchajisihanuya eta nayehe ena apavasanana. ¹⁸ Pímitucavacayare eta mavanai-ripiana ema Vicaiyaquene. Nacaijuhe éma, apaesa náitujicava náimaha eta majaraiva. Náinajicapa eta náichaqueneasana te timapicu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napecaturana. Nasiapamurihaya ena náinapureanahi nunerejiruana” máichanupa ema Jesús.

Ema Pablo mamecacavacapa eta masuapirahi eta matuparacasivanahi me Jesús

¹⁹ Tacahe, tata rey Agripa, nusuapahi nútí ema Jesús eta mavanesiranuhi. ²⁰ Nucametarairupa tativahi nayehe ena ticavasanahi te Damasco. Te nuchavapa, étapa te Jerusalén, étapa te avasarechichana te Judea. Tásicha, núchucapa tayehe eta avasareana tayerehiqueneana nayehe ena apavasanana. Numetacavacapahi eta nácaijuheraina ema Viya, náeneuchi-ravaina náitsivachiraina eta náitaresiraina, táuripa eta náitaresiraina. ²¹ Étará eta juca tiviuchanuhi nayehe ena nujaneanana eta nacaratasiranuhi te

Templo, navarairahi ticapacanuana. ²² Émasera ema Viya tímicatacanuhi. Puítirichucha tímicatacanuhi éma. Eta tacahe, nutiarihichucha puiti. Tásicha, vahi nuchávacuéjechavahíni nucametarairuyarechucha nayehe namutu ena achaneana, ena páureana énapa ena rícoana. Tájinaserá vahi nuhapapicahini eta táechajiriruvanahí etá Sagrada Escritura etá tátiauchiravayarehi etá macatajivairayarehi máepenirayarehi ema Cristo. ²³ Tásicha, émayarehi tínapuca téchepuca te máecari. Éta, táicutiarahi etá véchepusiraya víti apana te vécari vimutu viti achaneana, viti israelítana énapa ena apavasanana. Tásicha, tivanecahavipa vimetacaya ena achaneana, apaesa nácasíñava mayehe éma.

Ema Pablo mavarahapa macajimuyasamurechayare ema Agripa etá máehisiraya ema Jesús

²⁴ Tímiyanavarichaha téchajica ema Pablo etá máechajiuchiravahí, témechajicavapa muraca ema Festo, macahepa:

—Máurishivipa piti Pablo, táichavene etá pivayuchiravapa picaravahu. Étapa timaurishichavihi.

²⁵ Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupiruvahí etá juca nucaye-maqueneanahí. Jéhevare etá yátupiqueneanahí. ²⁶ Émaripa ema maca rey Agripa máimativare tamutu etá juca. Eta tacahehi vahi nupicacaracavahini etá néchajisirahí te mamirahu taicha nucasiñavahí núti etá máimatirahí ema. Namutuhivare ena achaneana náechahi, taicha tájina vahi tayumuruca-vahini. ²⁷ Pítiripa piti rey Agripa ¿pisuapahi jácani etá nacayemaqueneanahí ena profetanaini? Núti németeacahi pisuapahi píti.

²⁸ Ema rey Agripa majicapapa:

—Picájimuyacayaréni etá nusamure. Núti apanavare néhicayare jácani ema Jesús.

²⁹ Tacahe, ema Pablo máichavarepa:

—Tiúripana pisuapavane puítinarichu, yátupina te pisamure. Nuyaseacaya ema Viya etá pisuapiraina. Énerichuvare nuyaseacayare etá esuapiraina emutu eti apamuriana eti esamararacanuanahí. Éhicavanéni ema Jesús, táchutihini etá néhisirahí núti. Váhisera nacuératacrahéni, vahi ecucutinuhini núti etá nucaeratairahí táichavenehi etá néhisirahí ema Jesús —máichapa.

³⁰ Te nasamapa etá juca máechajiriruvahí ema Pablo, téchepucapa ema rey, ema prefecto, esu Berenice, énapa namutu ena natarihiqueneanahí náejaruhanahí. ³¹ Tásicha, tiyananapa típutsiacavanapa, náechajisihayarehi etá juca. Náichacacapa:

—Ema maca achane, tájina maviurevaina támicacahini. Váhivare tauricahini macaeratahini te cárcel.

³² Ema Agripa mametacapa ema Festo:

—Tiúrihini picaitica ema maca achane te vahi macúyaseserécahini etá mayaniraya te mamirahu ema Emperador —máichapa.

Ticaevatapa ema Pablo te Roma

¹ Tiuri, matiarihihi ema capitán ticaijare Julio, nacapitarahi ena masuntarurana ema aquenucaini Augusto. Tacahe, te tiúripa etá napanereru etá náevatasirahaviya te Roma, natuparacapa ema Julio mámaya ema Pablo énapa ena apamuriana présoana. ² Viávacuhapa te ichape pacure tiásihahi tayehe etá

puerto Adramitio. Tiyanayarehi te apanavare puértoana te Asia. Téhicahipahipahi ema Aristarco ticavasahi te Tesalónica tayehehi capital eta departamento Macedonia. ³ Te apanapa sache, vítecapapa te puerto Sidón. Tacahe, ema Julio majapanupahi ema Pablo, másapahi tiyana máejirapanavaca ena vichamuriana. Náechapajiricahi ema Pablo. ⁴ Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapapahini eta técaticava. ⁵ Tacahe, vijuchecherecapaipa eta mar te tachacayapahi eta Cilicia, étapa eta Pamfilia, vítecapirapa te avasare Mira tayehe eta Licia.

⁶ Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheyarepa te Italia. ⁷ Te jena sácheana vahi vijuricatipahicháini eta vipaisira. Muracarichucha eta técaticava eta viácapirapahi. Muraca eta nacaematañeasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón te tasumuqui eta apanavare tiúrupuhi ticaijare Creta. Viávicchapáipa eta tiúrupuhi, étapa tiávichahávipahi tayehe eta técaticava. ⁸ Ticajerapahi eta vipaisirapahi. Vijúchecherecapáichucha, vítecapiravarepa tayehe eta apanavare puerto Buen Puertohiji eta ticaijare te tachacaya eta avasarechicha Lasea.

⁹ Ticachuricahavipa eta tiempo taicha eta viyérerejívapahi. Tíñehiripa eta tapaisirava te mar, taicha tinacuchavaipa eta muracana técaticava. Eta tacahehi ema Pablo maconsejachavacapa, macahepa:

¹⁰ —Tiuri, tátanaveana. Váipara tiuri vímiyanavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

¹¹ Émasera ema capitán Julio, ema comandante tayehe eta pacure, émaga ema piloto vahi návarahahini nánasihini. Vahi nasuapahini ema Pablo.

¹² Taicha vahi táurihini eta puerto, tájina távichahini tayehe eta muracana técaticava. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripana eta jena, távichahí tayehe eta muracana técaticava. Étaina vicuchapiha eta te táetupiricavapa eta sácheana —nacahepa.

Muraca técaticava te mar

¹³ Tacahe, tépanavapa eta técatiticavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técaticava*. Vahi náemeteacahini taequecavahini te cajaha. Viánehipaipa vicachacaya eta tiúrupuhi Creta. ¹⁴ Te ticaicutiaravapa, tíjahúchavapa téquecava, muracapa técaticava tiásihá te cajaha. ¹⁵ Tavehapa eta vipacure. Tiámahavipa. Viyerehipa eta tachaui. Navarahainipa náimichava eta pacure te tachausipahi, vahisera náratahahini. Tásiha, náisapapa tiámahavi eta técaticava. ¹⁶⁻¹⁷ Témetavicahavipa te apachacaya eta tiúrupuhichícha ticaijare Claudia, étapa tiávichahavihi. Váiparichu muracainahini eta técaticava. Étapa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaematañeasirapahi. Tacahe, náinunuacapa eta pacure te enureana apaesa vahi tacuvejiajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini

* ^{27:13} Acane eta ichapequeneana pacure, amairihaichaha te náurape eta napaisihahi te une. Camurianahi ena achaneana tinaucanapahi. Nacatupihavare eta ichapemequeneana sábanana tímicatacayarepahi tévatajica eta técaticava.

eta técaticava, taejahapaicahini eta pacure tayehe eta playa ticaijare Náecharisirareva. Tacahe, taevatajicapaipa eta vipacure, vétaviequenehairapa eta playa. ¹⁸ Tíñehichucha eta táepacuruhana. Eta napisirahi éna, náepuhecavaca te une eta tamaquenepahi. ¹⁹ Te mapanaquenepa sache, vivehavarepa eta apamuri tamaqueneanapahi tayereruvanapaichuhi eta pacure, véchipaicavarepa. ²⁰ Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa vémeteacavahini viúchucuhahini.

²¹ Ichapemurihi eta sácheana tájina vinicahini. Tacahe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha viúchucuhini tayehe eta Creta. Puiti vahi vicucatajivahini. ²² Puítisera, vahi ecupica, taicha nájina tépenaimahi. Técharicavayaresera eta pacure, témitiacaya. ²³ Néchahi nútì eta juca, taicha yati téchajicanuhi ema ángele mavaneruhi ema Viya, ema náquenuhi nucaematanearuhi. ²⁴ Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táichavenehi eta pitiarhirapahi eta nayehe. Picamesavayare pítecapaucha ema Emperador pitupihamiraureya” máichanupa ema ángele. ²⁵ Eta tacahe, tátanaveana, túmehénachucha, taicha nútì nucasiñavahi mayehe ema Viya. Nusuapahi eta mametarapiana ema ángele eta nuyehe. ²⁶ Tiámahaviyaresera eta técaticava tayehe eta tiúrupuhi —máichavacapa ema Pablo.

²⁷ Apinaquenepa semana eta támirahavipahi eta muraca técaticava te ichapequenehi mar. Te jena enumuhuquenepa yati, ena marinéroana náimijachaipa tiánehianaripa eta tiájipahi taicha nasamahi eta cachuela te tachausi. ²⁸ Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecavarepa, veinte y siete metro eta táupenava. Náemetearaca tiánehianaripa eta tachausi. ²⁹ Tacahe, nacajuchuchucapa eta cuatro áncala te tahivu eta pacure, taicha napicahi táemestaquihahini eta vipacure tayehe eta máriana. Navarahaiipaicha táijahúchavahini tijarahi. ³⁰ Eta napisiraipaicha, ena marinéroana navarahapa tijunanayarehini, tijunijicahavianayarepa. Nacucupaicapa eta étasi pacure vicavacurehi. Nacaetserarupa nacajuchuchucayare eta apana ancla te tasumu eta pacure. ³¹ Ema Pablo máimatiacavacapa eta navarairahi tijunana. Tacahe, mamecapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucuhaimahi —máichavacapa.

³² Tacahe, ena suntaruana náechupicavacapa eta enureana taitihapahi eta étasi pacure. Náinajicapa te une.

³³⁻³⁴ Te tijararahipa, ema Pablo tivanecahavipa vimutu vinicanuma. Máichahavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa tåetumechahe eta iávaresirayare. Nájinaserá témitiacaimahi te vitaracu —máichavacapa.

³⁵ Tacahe, te tamutupa eta mavanesiravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa. ³⁶ Vétumechavapa vimutu, vinicapa víti apanava. ³⁷ Camurihavihi viti tamaqueneanapahi eta pacure. 276 eta visimutuvapahi. ³⁸ Te vítanesipa eta vinisirahi, navehapa ena marinéroana eta apamuri trigo, náquijicapa te une, navarairahi téchacayare eta tamaquene eta pacure.

Técharicavapa eta pacure

³⁹ Te tijarahipa, ena marinéroana vahi náimativahini távihahipuca eta viávhahi. Náimahapaserá eta tachausi ticayehehi playa. Navarahapa náimipauchayare etá pacure, viúcupaisihayarehi te playa. ⁴⁰ Tacahe, náechuacavarepa etá enureana ticaratacanahí etá ánciana. Tanasivacapa te amahé une. Nacaesimucavarepa etá tayehéana leme etá pacure. Tacahe, nacanuquechapa etá étana tavanterame ticarataca etá técaticava tiávihapahi te tasumu. Táimicatacapa etá napauchiraya etá playa. ⁴¹ Tiámahavipasera tayehé etá remanso. Vaipa táupenahini. Tásicha, ticaratacavahipa etá playa. Tachuchucapa etá tavaparu. Vaipa tayamuricahini. Tacahe, etá tamuracavahí etá tépacuca, tacavaracapa etá tahivu etá pacure. ⁴² Ena sunturana navarahapa nacapacayarehi ena présoana, napisirahi náitujicavahini tijunana etá návaresiraya. ⁴³ Émasera ema capitán Julio vahi másapahini taicha mavarahahi macuchucuhayarehi ema Pablo. Macavanairipipa ena náitucanahí tiávarecana napaucha etá tachausi. ⁴⁴ Ena apamuriana máitucahanahí tiávarecana nayuratamecavacapa etá tabla, nacuchucuiyavahí te tiájipahi. Tacahehi etá viúchucuirahi vimutu.

28

Ema Pablo mávihaipa te tiúrupuhi Malta

¹⁻² Tacahe, te vimutupa viúchucuhahi, tiúchujiuchahavianapa ena ticavasanahí tayehé etá tiúrupuhi. Timetacahavianapa etá táijarehi Malta etá viúcupaisihahi. Nacamuruequechapa etá yucu, tíchuhahavianapa viásacavayarehi taicha vicasarechavacaipahi taicha etá une étapa etá tiquiva. Énapa titátihavianahí. ³ Tacahe, ema Pablo tinerecapa etá yucuqui máijuquechapa. Tatarihihipuca etá quichare te manereru. Tásicha, tiúchujicapa etá quichare, táimijunapa etá yucu. Táechucapa te mavahu ema Pablo. ⁴ Te náimahapa ena ticavasanahí tayehé etá tiúrupuhi etá táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahíchupuca. Tiúchucuhahi te une, ánipasera tavyihahi te tiájipahi etá matuparahahi. Vaipa máuchucuhahíni —nacahepa.

⁵ Émasera ema Pablo máquijipicapa te yucu etá quichare. Tájina máichavahini. ⁶ Tacahe, ena tímararacanahí nacuchapaipa máepeñahini, támahipucahini etá mavahu. Eta náimairahi tájina máichavahini, napanerequenehapa.

—Víyachupuca ema maca —nacahepa.

⁷ Te tachacaya etá vécharisinevahí, tatarihihi etá barraca, maverahi etá pétiana napenanahí ena machaneranahí ema subprefecto, tuparairucahi tayehé etá tiúrupuhi. Ema ticaijarehi Publio. Émapa tíchuhahavíhi téchapajiricahavíhi etá jena mapanaquenehí sache. ⁸ Matiarihihivare ema maiya ema Publio. Ticajumahi éma, etá muraca fiebre. Tisacahivare iti. Tívecahi éma te matuleta. Tiyanapa ema Pablo, máejirapanahí. Tiyujaracapa, mayaseacapa ema Viya etá macanarasiraina ema macajumaquene. Tásicha, manacapa etá mavahu te míainahu. Jéhesare, tinaracapa ema achane. ⁹ Eta náimairahi ema apamuriana achaneana etá macanarasirahi ema macajumaquene, náepanavacapa ema apamuriana nacajumaqueneana. Macanaracavacapaipa ema Pablo. ¹⁰ Mapana caje etá viávhairahi tayehé etá tiúrupuhi. Ichaperinehi etá náitátiyahavíhi ema achaneana. Te viávacuhayarepa, tíjaracasichahávianapa etá vicamunuqueneánayarehi etá vipaisirayareva.

Tímiyanavanavarepa eta napaisirahi, nacaijuherahi eta Roma

¹¹ Tasiha, viávacuhavarepa tayehe eta apanavare pacure tachimaru-hivare eta muracana técaticava tayehe eta puerto viávihahi. Eta juca pacure ticaijarehi Castor-Polux, Chámeana. Tiásihahivare te Alejandría. ¹² Eta vipaisirahi, vítecapapa te apanavare puerto ticaijarehi Siracusa. Víchecapa tayehe mapana sache vicahe. ¹³ Te viyanavarepa, vijuchechechecapaipa vítecapirapa tayehe eta puerto Regio. Te apanapa sache tépanavavarepa eta técaticava te vana. Tímicatacavahipa eta vipaisirapahi. Te apanapa sache, vítecapapa tayehe eta puerto Puteoli. ¹⁴ Te jena avasare, vicainunapa ena apamuriana vichamuriana, tíminasichahavianapa. Étana semana vicahe eta nayehe. Tásiha, vipaicapa te tiájipahi, vicaijuhepa eta te Roma. ¹⁵ Ena apamuriana vichamuriana ticavasanahi te Roma tisamairiricahavianaipa eta vítecapirayarehi. Nárajapapa tiácapahavianahi te achene te apanahivare avasare ticaijarehi Foro de Apio. Énerichuvare ena apamuriana tiácapahavianahivare, ticuchapahavianaipa tayehe eta apanahivare avasarechicha ticaijare Tres Tabernas. Te máimahavacapa ema Pablo, tiúrisamuréinehi naicha eta nácapirahavihi ena vichamuriana. Tétumechavapa ema apana. Mahasulupayachapa ema Viya. ¹⁶ Te vítecapapa te Roma, ema capitán Julio mahentregachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiarihihisera ema émana suntaru tijaneacahi.

Ema Pablo máimitucavacapahi ena téjirapanana te máitecapihahi

¹⁷ Te mapanapa sache eta vítecapirahi te Roma, ema Pablo máimichuhavacapa ena náiyarahana ena israelítana ticavasanahi te jena avasare. Te tiúrujicavanapa, ema Pablo máichavacapa:

—Nuparapenaveana, tájinanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchuanuanahi te namirahu ena tuparairucana romanoana. ¹⁸ Eta nayaseresiranuhi, navarahahineni ticaíticanuana taicha náimahahi éna tájina taviuchanuhini támicapacanuhini. ¹⁹ Énasera ena vijaneanana tuparairucanahí váhiquene návarahahini nacaiticanuhini. Eta tacahéhi nuyaseserecapa nútí étaina nucametauchacasiya te mamirahu ema Emperador. Tájinaserá vahi numetauchaimahi ena nujaneanana ticaetemajiricanuanahi. ²⁰ Eta tacahé, nímicuhahéhi nuvarahahí nímatihéyare éti, numetacaheyareva eta juca níchavaquenevahí. Ticaviurenúhi eta néhisirahi ema Cristo, ema vicuchapaquenehi vimutu viti israelítana, eta tímíticacanuhi puíticha te juca cadena —máichavacapa.

²¹ Tásiha, ena náichapa:

—Tájina váhiya visamairiricavi. Váhivare vijacapa eta carta tiásaha te Judea táchajisihavihini píti. Énapa ena vichamuriana israelítana tiásihanapahi eta ánaqui, váhivare náechajisihahini eta piviurevahipuca píti. ²² Vivarahasera visamavi puiti péchajisiha eta pipanerueruanahi, taicha visamairiricahi eta nacatichirahi ena vijaneanana tiávihanapahi te avasareana eta juca arairuhi éhiruhi —náichapa.

²³ Tacahé, náijarechapa eta sache máechajisiraya. Te jena sache, títecapanapa ena camuriqueneana israelítana tayehe eta máitecapihahi ema Pablo. Tépanavapa te jena yáticarahi téchajicahi éma. Tiámainucava te cáperehichichapa titapiricapa eta macametarairuirahi eta máechajiriruva ema Viya. Máimivehacipapahi eta máechajicuirapahi eta Sagrada Escritura. Máimitucavacahi

éna eta náimatiniraya ema Jesús eta émairahi Cristo, ema nacuchapaquenehi. Macajimuyacavacahi eta náehisiraina éma.

²⁴ Tásicha, típutsimurihavanapa ena tisamararacanahi. Natiarihiji ena apamuriana nasuapa eta macayemaqueneanahi ema Pablo. Natiarihisera ena apamuriana vahi nasuapahini. ²⁵ Éna, vahi návarahapahini nasama, timutserahavanapaipa tiyanana. Tacache, ema Pablo máichavacapa:

²⁶⁻²⁷ —Machu ecucutihini ena viáchucanaveánaini acane. Matupiruvahi ema Espíritu Santo eta máechajisiyahvacahi éna te mametacapa ema víyarahaini profeta Isaías. Máichapa: “Piyanapa pimetaca ena naena achaneana. Ani píchayare: Nímatihe éti eta emasuapajiraivahi. Épiyacavahi religíosohehi; tétabicavahisera eta tamuracavahi eta esamureana. Eta juca emasuapajiraivahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájinapa táichahíni vicuchapahini eta éneuchiraváina, evarairapucaini ecasiñahini me Viya, apaesa macanaracahehini” máichapa ema Espíritu Santo.

²⁸ Ácaicutiaraquenéna éti, puiti juca vicaijuheya vimetacaya ena apavasanana eta mavarairahi macuchucuhaya éna apana ema Viya. Tásicha, éna nasapihayare nasamararacayare —máichavacapa ema Pablo.

²⁹ Te tamutupa eta máechajisirahi ema Pablo, tiyananapa ena majaneanana, tiúmehavanapaipahi.

³⁰ Apina año macahehi ema Pablo tayehe eta máitecapihahi. Tamutu sácheana majacapavacahi ena tipaipiuchanapahi. ³¹ Máechajisihahi eta máechajiriruva ema Viya, máimitucahivare eta náehisiraina ema Viáquenu Jesús, émairahi yátupiquenehi Cristo. Nájina nacamatinacahini. Náisapahi ticametarairu.

Tamutupa eta néchajiriruvana eta piyehe.

Eta macartane ema Apóstole Pablo nayehe ena machamuriana ticavasanahi te Roma, ticaijare **ROMANOS**

¹ Nuti Pablo, mavanaranuhi ema Viáquenu Jesucristo, manerejirunuhivare eta mayehenuyarehi apóstole. Tituparacanuhi eta nucametarairuirayare eta mapanerechirahi ema Viya eta mavarairahi macuchucuhaya namutu ena ticasíñavanaya mayehe ema Machicha.

² Ema Viya, ánaquiaparipahi eta juca mametasiravacahi ena víyarahanaini santo profetana eta mapanerechirahi eta macuchucuiraya ena achaneana. Tásiba, nájuequeneharipahivare éna. ³ Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Crístohi éma. Achanequenehi eta máimahi. ⁴ Natarihihisera ena taticianacanahi éma. Náimicpacahí éma. Émasera ema Espíritu Santo, tiáramicarehi eta macaechepusirahi éma te máecari. Étapa tímereuchahi eta yátupiquenérahi Machicha ema Viya. ⁵ Puiti ema Viáquenu Jesucristo tijapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma. ⁶⁻⁷ Te namuri ena nasimutuqueneana, etiarihivare éti apanava. Tíchuhahelivare ema Viya, machanerayarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehini ichape ema Tata Vicaiyaquene, émapa ema Viáquenu Jesucristo; náijaracahéhini táurivaina eta epanereruana.

Ema Pablo mapanerechaipa tiyanayare te Roma

⁸ Núti, téavicavahi eta nucunachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupiraripahi éhica ema Viya. ⁹ Núti nuvapinavahi eta nucaemataneasirahi ema Viya, eta nucametarairuirahi eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana, nuyaseuchachahehi me Viya, máijaracahehini eta iúriváinahíni éti. ¹⁰ Nuyaseuchavahivare eta másapiranuinahíni nítujisiravainahini nupapiuchahe. ¹¹ Ichape eta nuvarairahi nímhaha, nímicatacahehini eta tajurusiraya eta iáchanevana apaesa muracaquenénapaini eta éhisiraya ema Viya. ¹² Éti apanava ímicatacanuhini. Vétumejiricacahivaréni eta véhisirahi ema Viáquenu.

¹³ Nuparapenaveana, nuvaraha numetacahe apaesa echa. Ichapemurihi eta nuvarairahi níteca nímhapanaha. Puíticha, vuíchahasera nítujicava. Tijuricati nétupicavahini eta nítésirainahini eyehe, natarihichuhipucaini nucajimuyacavacahini eta nanerejisiravainahini náehicahini ema Viáquenu, táchutihini te nupaicainapa te apana avasareana. ¹⁴ Taicha ichape eta néñamiravahi nútia eti nucatuparahairahi nucametarairuirayare nayehe namutu ena achaneana te ichapeana avasareana énapa ena tiávihana te vámahiana,

ena tiávhana te isanitiana. Nájina nunerejiruimahi. Namutuyare numetacavaca: ena cráyanana rícoana énapa ena páureana. ¹⁵ Tacahe, núti nutsere-reacavahi eta nupaipiuchiraheya te iávasa Roma, nuvarairahi nímítucahe eta máechajiruva ema Viya tayehe eta véhiruhi.

Vijacapacareipahi mayehe ema Viya táichavene eta vicasiñavairahi mayehe

¹⁶ Núti nuvapinavahi eta nímítusirahehi tayehe eta véhisirahi ema Cristo. Tájina vahi nutsirihahini, taicha téavicavahi eta macasiñacarevahi ema Viya máitauchayare tamutu eta macuchucuirahavi. Éma, téavicavahi eta mavarairahi nacasiñavahini ena israelítana eta mayehe, énapa namutu ena apamuriana achaneana. Téavicavahi eta máitupajijiasiravahi máitsivachinahí eta náitaresirana, tamutupa arairuhi máicha. ¹⁷ Taicha ema Viya máimerecaripa eta vijacapacarevahi eta mayehe vimutu viti vicasiñavanahí mayehe. Tájinapa vácumunuhini. Tarataripa eta vicasiñavairahi mayehe. Tásicha, éma ticuchucuhahaviripa. Taicha eta Sagrada Escritura, ani tacahehi eta taechajiruvahí: “Nácani ticasiñavanahí eta me Viya, tijacapacareanahí, máichecuaraqureyare eta náitaresiraya táicha”.

Ticaviurevana namutu ena achaneana táichavene eta náejecapiravana

¹⁸⁻¹⁹ Acane ema Viya manacasamurechahi ena achaneana eta matiarihirahi éma. Manacasamurechahivare eta máicuñasiraya namutu ena téjecapavanahí, máurirahanahí. Yátupihi eta nacaicuñairayare táichavenehi eta namasuapirohi eta yátupiqueneana, vahivare návarahahini náinajicahini eta navainarajivana. ²⁰ Máimahasihinéni ema Viya Eterno eta viyehe, véchahisera eta matiarihírahi, taicha tamutu vímaha eta máepiyaruhanahí, étaripa eta apaquehe étapa eta tatiarihiqueneanahí. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca viávacurehi. Étara vímatiarahi eta matiarihírahi ema máitupajijiaruvaquenahí. Énasera ena achaneana, vai návarahahini nacasiñavahini eta mayehe. Étapa naviurevahí éna. ²¹ Tamapurujihisera eta náimatirahi ema Viya, vahi návarahahini nasuapahini; vahivare napicauchahini. Vahivare nahasulupayachahini éma. Téavicavahi eta taejecapiravahi eta napanereruana. Étachucha napanerechahi eta tájiparacana. Muracasamureanahivare. ²² Ticasiñavavaicanahí taicha tímijachavanahí titupajijiacavana. Téavicavahisera eta namaiturerevanahí. ²³ Vaipa najirauchahini ema Viya máepenacacahi. Váipavare mapicauchacrehini nayehe. Tásicha, náemitisicaipa éma. Nasapihapa najirauchahí eta nasiñarajiana achanemirana matumerairahanahí náipunechucha ena achaneana. Tamutuchucha nacasiñarajipahi cágurepuca, quicharepuca, sáraremrapuca.

²⁴ Tacahe, eta máimairahi ema Viya eta náichirahi eta júcana, másapapa éma. Mánajiacavacapa. Puíticha navaraharichucha tímianavana naicha eta natuhusivana titsiriacareanahí. Tavayuacahivare eta najamuraraivana tamauriqueneana. Téavicavahi eta namaeperajisiracacahi. ²⁵ Téavicavahivare eta náepuruirahi ema Viya, émayarehi najiraureyarehini. Tasapihapa téjecapavanahí, eta náimijachirahi tiúripana eta najirauchira eta nasiñarajiana náepiyaruhanahí. Tásicha, náemitisicapa ema yátupiquenahí. Jéhevarequenahí máichecuaraqureyarehi eta majirauchacareva. Amén.

²⁶ Eta tacahe, ema Viya macaerajicavacapa. Vaipa mávarahahini máemechavacahini. Másapapa náichahí eta navarahaqueneanahí. Tásicha, téavicavahi eta náichaqueneanahí. Nararihi ena esenana, énajicacapa náichacacahi eta napecaturana. Vaipa nácameahini ema ajaira. ²⁷ Énaripa

ena ajairana, nararihivare énajicacahi náichacacahi eta pecatuana. Vaipa nácamesahini esu esena. Navayuchaipa eta najamurachiracacahi. Váhiqene nátsirihahini. Táichavenehi eta náejecapiravahi, énajivapa tímitaequenehavana tayehe eta náicuñayare.

²⁸ Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásicha, ema Viya máinajiacavacapa, vaipa émainahini máechavacahini. Máisapapa tímiyanavana eta náichirahi eta tájiparacana tamauriqueneana. ²⁹ Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarahiana, ticapinarurahiana, ticapahiana, tipiararecana te tisemana, tivayuarecana, sémarairihiana, téchejhiana. ³⁰ Tíñemahi eta náechejisirana nayehe ena apana achaneana. Nacatichavare ema Viya. Tiácapaemarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navarahaqueneana. Masuapajirairahanavare nayehe ena ticachichana. ³¹ Tímijachavanahi tétopicavana eta náichirahi eta tamauriqueneana. Tivayuarahiana eta náechajirisiravana. Vahi témunarahiana. Váhivare tiperdonarahiana, nájina najapanuquenéna. ³² Náechahinéni éna eta tamaurivahi eta júcana me Viya. Náechahivare éna, eta táimicapacasiravacayarehi, tímiyanavanarichuchasera eta náichirahi. Náimiaquipaicahi nácani apamuriana. Émasera ema Viya máitauchayarehi eta náicuñayare.

2

Ema Viya titupiruvahi eta máitauchirayarehi eta náicuñayare

¹ Étiarihisera éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhisera étupicavahini eta ecaecahirahi, taicha étirichuhi nacutiqueneanahi eta íchaqueneana. Énerichuhivare eti ecaviurevahivare. ² Víti véchahi matupiruvahi ema Viya eta máicuñasiravacaya ena tíchanahi eta juca tamauriqueneana. ³ Étipa, éjecapavahi eta ímijachirahi ticaíticaheyare eta ícuñayare, eti ícharahiana eta tavasiqueneana ecutirichuhinéni ena ecaecahiqueneana. ⁴ Émasera ema Viya, tétavicavahi eta máurivahi eta eyehe. Vahi maícuñacahevanehini. Ticamichahehi, ticuchapahehivare, mavarairahi éneuchavahini eta mayehe, ínajicahini eta íchira eta tamauriqueneana. Tásicha, vahi ecuemepurureca eta máurivahi eta eyehe. ⁵ Taicha táíñehiqueneyare eta ícuñasamiyare éti, te vahi ecueneuchava, ínajicavare eta tamuracavahi eta esamureana. Taicha evayuchapaichucha eta ecurumutusirahi eta etapiravana. ⁶ Taicha éma, matupiruvahi eta máijarasirayare eta táitsivayare eta víchaquenepachu. ⁷ Vítiripa viti machanerana ema Viya, tíjaracahavinapa éma máichecuaraqureyare eta vítaresiraya, taicha vivaraha puiti vicurisamurechaya éma, vímiyanavaya eta vivapinairavayare vicha eta táuriqueneana. Vicuchapavaya eta visiadiraya eta te majaraivahi, vicunachacareya mayehe, máichecuaraqureyra eta viúricacarevaya. ⁸ Muracainapasera eta máicuñasiravacaya namutu ena masuapajirairahanahi énaripa ena tictianacanahi eta yátupiqueneana, tasapihahi náuricahi eta tamauriqueneanahi. Navayucharipa etá náimiyusemasirahi ema Viya. ⁹ Ichape eta nacatajivairaya, tíyahahacavayare namutu ena tíchanahi eta juca tamauriqueneana. Ticuticacanayare

namutu eta náicuñayare, ena israelítana énapa ena apavasanana. ¹⁰ Étisera eti íchanahi eta táuriqueneana, tíjaracahénapa ema Viya eta iávhaya te majaraivahi. Tétavicavaya eta ecunachacarevaya mayehe. Tinaracainavarepa eta epanereresiranainihi. Ecuticacaya emutu eta iúricacarevaya. Eti israelítana, vahi ecachuricaimahi ena apavasanana.

¹¹ Ema Viya vahi manerejicaimahi ena máicuñaruanaya. Ticuticacanayarehi máicha. ¹² Nácani máimatiarahani eta mavanairipiana ema víyarahaini Moisés, ticaicuñanayare. Énerichu nácani námatihinénipuca, tаветијинапа тicaicuñanayare taicha vahi nasuapahini. ¹³ Taicha vahi tijacapacareanaimahi mayehe ema Viya nácani vahi náitauchahini eta nasamaqueneanahi. Tijacapacareanayaresera nácani titauchanahi tipicauchanahi eta vanairipiana. ¹⁴ Nararihivare ena tinerejicavanahi ena apavasanana, váhinéni námatihini eta vanairipiana, nasapihasera natupiruvahi te nasamureana eta náichirahi eta táuriqueneanahi, taicha yátupihi eta nasuapirohi eta manacasamurechaquenehi ema Viya. ¹⁵ Éna, náimerecahi eta manacasamurechirahi ema Viya eta vanairipi te nasamureana. Énajivaya tisamavana te napaneruana eta táurivahi eta náichaqueneana, éta ticatiuchavacahi. Te téjecapavanapuca, tisamavanahivare eta tamaurivahi eta náichaqueneana. Tásiba, napicahi eta náicuñayarehi táicha. ¹⁶ Járajapa eta sácheyare, ticayaseserehianainapa namutu ena achaneana te mamirahu ema Viáquenu Jesucristo. Éma, máimatiya tamutu eta náichaqueneana tayumururevanahi. Étarichuhi eta numetarapihi te nucametarairupa.

Ena israelítana, ena ticatuparahanainihi eta vanairipiana, váhisera náitauchahini

¹⁷ Étisera eti israelítana, ímijachavahi yátupihi ítaucha eta vanairipiana, ecunachavaipahi mayehe ema Viya. ¹⁸ Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi tímitucahehi eta enerejisirayare icha eta táuriqueneana. ¹⁹⁻²⁰ Tétavicavaipahivare eta ecunachiravahi taicha ímijachavaripa ecatuparaha eta ímitusiraya ena apavasanana apaesa náesenicahini ema Viya, náimatiyareva eta máechajiriruvana, náinajicayareva eta napecaturana, váipavare nanasimahi eta te timapicu. Ímijachahivare ímatiequeneha tamutu eta vanairipiana, ítamuturusirahi tamutu eta tayeheana yátupiqueneana. ²¹ Éti evarahahipuca ímitureca. Tituparacahehisera étivaya ítaurahi. Éti, ímiturecahi vahi nacuamereca ena achaneana; étisera epanerechahi eta iámeresiraya. ²² Tacutiquene váhivare iúrica nacaesenarahini ena eparajairavana; étisera epanerechahi eta ecaesenaraya. Ecatichavare eta nasiñarajiana; étisera matsiriadarahahehi eta evehairahi eta táijaracasiana eta nasiñarajiana. ²³ Ecunachavahi eta ímijachiravahi ítuca eta mavanairipiana ema Viya; étisera tamutu sácheana iácataya-yajicahi eta mavanairipiana. Tétavicavahi eta emapicauchirahi éma. ²⁴ Ani tacape eti Sagrada Escritura: “Ena achaneana vahi napicauchahini ema Viya íchavenehi éti israelítana” tacapeha.

²⁵ Eti ecunachavaipahi eti israelítairahahi. Tacamunuhisera eti ítauchi-rainahini eta vanairipiana. Taicha eti juca emaitauchirahi, tímicutijiri-cavaichucha vahi étinahini israelítanainahehini. ²⁶ Ticachuricaheanaripa nácani apavasanana, nasapihaipa náitauchahini eta vanairipianahi. Ema Viya máimahahi eta táurivahi eta náitauchirahi, váhineni israelítanainahíni éna. ²⁷ Ena apavasanana titaurahianahi tayehe eta vanairipiana, éna

tiyaseserecanainapa eta ícuñayare emutu eti emaitauchanahi, émepuru-recavaipahi israelítairahehi, étapa eta ecaravahuirahi eta vanairipiana. ²⁸ Váhivare étaimahi ecunachacarevaya eta ecamarcairahi te iáquehe eti israelítana. ²⁹ Nácanisera yátupiquenehi eta nasuapajiraiva, jéhevare ena yátupiqueneanahi israelítana. Vahi tágamesaimahi ticamaricana te náqueheana, taicha éna yátupiquenehi te nasamureana námahi eta nacamarcairahi eta machanerairavacahi ema Viya. Vahi étaparacainahini eta nacaravahuirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

3

Ena israelítana tímijachavanahi nacarichu ticunachacareana

¹ Eti nujaneanana ímijachavaipa ecunachacarehi taicha eta israelítairahehi, ecamarcairahivare te iáquehe. ² Jéhesare, jararihi eta ecunachacarevahí, máicha ema Viya. Éma, matuparacavacahi ena viáchucanaveanaini eta náimituresirahi eta yátupiqueneana máechajiruana, viti viti námariequeneana. ³⁻⁴ Tayanapané natarihihi ena vijaneanana vahi náitauchahini eta natuparahahi, émasera ema Viya, váhiquene titavaimahi eta máitauchiraya tamutu eta máijararuvanahi eta nayehe. Taicha téavicavahí eta máitauraivahí éma. Tayanapanepuca natarihi ena achaneana énaina náepiyahirahi, émasera ema Viya máitauchayare tamutu. Eta Sagrada Escritura, ani tacahe: “Tayanapané ena achaneana vahi navarahahini nasuapa eta pítauraivahí, piti Tátachicha, tamutu sácheana pímerecahi píti eta pítauraivahí. Tayanapané natarihi náimijachahi vahi tátupiruvahini eta píchaqueneana, téavicavahisera eta pitupiruvahí te tamutu” tacahepa. ⁵⁻⁶ Vimutu vímati téavicavahí eta majapanuraivahí ema Viya. Németeacaserá etiarihi eti ímijachahi tiápajucavayarehi eta macunachacareva taicha eta esipécaturairavacahi. Ímijachavavare vahi tátupiruvahini eta masemairahi eta ecapecaturairahí. ¡Tétavicavahí eta éjecapiravahí! Ecuti ena achaneana mapanererureana. Ema Viya, tatuparacahi máicuñacavacayare namutu ena téjecapavanahí, taicha téavicavahí eta masantovahí. ⁷⁻⁸ Ímijachavahí tísapacarehi eta épiyahiraiva, taicha ímijachavahí titametacahe eta yátupirahí eta tatupiruvahí eta máechajiruvana ema Viya. Ánipapuca tacahe eta epanereruana: “Ema Viya ticaijare tijapanurahi. Tacahe, tiápajucavayare eta macunachacarevahí éma, taicha táetaviuchayare eta majapanuirahavi eta máimairainapa eta vivayuchiravahí eta vivainarajivana. Tásicha, vahi tátupiruvahini eta mavarairahi tícuñacahavi, taicha tiápajucava eta macunachacareva vícha, ¿masi?” ecahepuca eta epanereru. Natiarihivare ena tépiyaequenehahavi náimijachahiji tacahe eta vímiturapi viti apóstoleana. Muracayaresera eta náicuña namutu ena tacahehi eta napánnereruana.

Vimutu viti achaneana vicaviurevahí eta me Viya

⁹ Eti nujaneanana, vahi ecuimijachava viti israelítana viúripanahí nayehe ena apamuriana achaneana. Tájinaquene viúrivainahini te mamirahu ema Viya. Taicha vímatiequenehapa eta vimutuirahí vicaviureva me Viya viti achaneana, viti israelítana énapa ena apavasanana. ¹⁰ Eta Sagrada Escritura, ani tacahe: “Nájina náurihini, émanainahipucáini máurihini, ésunainahipucáini esena súrihini. ¹¹ Nájinavare énajivainahini náimatihini ema Viya, váhivare navaraha náesenica ema Viya. ¹² Namutuhí téjecapavana, namutuhivare

táquipaicahi eta tamauriqueneana. Nájina náichahini eta táuriqueneana, émanahnipucaini máichahini. ¹³⁻¹⁴ Tíñemahipi eta náechejirisiravana. Tétavicavavare eta navayuaraivanahi. Éna nacuti eta quichare téchurahi, tétavicavahi eta nacaetemaraiva. Náematanechucha namaldicióncha nácani apamuriana. ¹⁵ Apaesarichu nacamunu navarahapavare ticaparecana. ¹⁶ Sirujiana eta náitaresirana, ticaetemarerecana. ¹⁷ Vahi natanucaimahi eta náurivainahini nayehe ena apamuriana. ¹⁸ Tájina vahi napicauchaimahi ema Viya” tacalhepa eta Sagrada Escritura.

¹⁹ Nujaneanana, eti ímijachavaipapuca vahi étinahini táchajisiha eta Sagrada Escritura. Téchajisihahehisera, taicha eti iávacuhanahi eta vanairipiana. Emutuhi ecaviurevahi. Te jena sácheyare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu. ²⁰ Natiarihipucasera nácani tímijachavanaripahi tijacapacareana taicha navarahainapa náitauchaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitauchirahi. Taicha eta vanairipiana, tímimatichahavichucha eta vicapecaturairahi.

Vijacapacarehi mayehe ema Viya táichavenehi eta vicasiñavairahi mayehe ema Machicha Jesucristo

²¹ Puítisera, ema Viya tímimatichahaviripa eta vijacapacarevayarehi eta viúchucuiraya. Vahi étaparacaina eta vivarairahipuca vítaucha eta vanairipiana. Tanasiqueneripa eta Sagrada Escritura, táchajisihaipahi eta máitecapiraya ema ticatiuchahaviya, vijacapacareya máicha. ²² Eta tacahehi puiti, yátupihi eta vijacapacarevahí vimutu viti vicasiñavanahí mayehe ema Jesucristo. Ema Viya vahi manerejicaimahi nácarichuhini ena tiúriana. Váhivare máepuruimahi ena achaneana tisipecaturanahí. Eta nacasiñairavahí eta mayehe, majacapavacahi namutu. ²³ Taicha yátupihi eta vicapecaturairahi vimutu. Vimutu véchuriaca eta viúrivana, vijacapacaréni me Viya. Nájina émanáinahíni mátupiruhíni. ²⁴ Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiñairahi ema Machicha Jesucristo. Émapa tivachachinahavihi eta vitapiravana táichavenehi eta vipecaturana. ²⁵⁻²⁶ Ema Viya, tétavicavahi eta matupiruvairahi. Vahi macamichaimahi ena téjecapavanahí te machacaya. Tásihasera, tijapanuhavihi. Máijararecahi ema Machicha eta mavachachirahi eta vipecaturana, vímicapacahi éma. Eta vicasiñaira ema Jesucristo, macaepahahi eta véjecapiravanahí vipecaturanahí. Tásicha, vijacapacarehi mayehe ema Viya.

²⁷⁻²⁸ Tacahe, puiti visamaripahi eta majacapirahaviripa ema Viya, étachucha tíchahi eta vicasiñairahi ema Jesucristo. Vahi vétupicavahini eta vicasiñavavairisirahi eta vítauchiraipa eta vanairipiana. Váhiquenevare étaparacaina.

²⁹⁻³⁰ Vahi ácarichuimahi eti israelítana ejacapacarehi me Viya. Énerichuvare tijacapacareanahí namutu ena apavasanana ticasiñanahí. Tijacapahavihi ema Viya vimutu viti vicasiñavanahí eta mayehe. ³¹ Váhivare ecuimijacha nútinahipucaini nímitucahe vaipa tasuapacarehini viyehe eta mavanairipiana me Viya. Viti véhicanahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínjicaimahi.

4

Vicutiyarehi ema víyarahaini Abraham eta macasiñavairahi mayehe ema Viya
¹⁻² Németeaca etiarihi eti evarahaipa échajisiha ema viáchucaini Abraham. Evaraha ecunacha eta macaematanearisanahí ema Viya, ímijachirahi éta

tíchahi eta majacapacarevahí me Viya. Ímijachahivare táuriha eta macasiñavavaisiravapuca éma. Numetacahesera: Eta majacapacarevahí me Viya, vahí étainahini táichahini eta macaematanearahí ema Viya. ³ Eta Sagrada Escritura, ani tacahe: “Ema Abraham, téavicavahí eta macasiñavairahí me Viya. Eta tacahe, tijacapacaréinehi me Viya” tacahepa.

⁴⁻⁵ Tiuri puiti, viti achaneana, te vicaematanerecahi, tatuparacahi ena vicaemataneyeruanahi eta navachachirahaviyarehi. Vahí tíjaracasichahavianaimahi eta najapanuirahavihini. Émasera ema Viya tijapanuhavihi, tijacapahavíhi táichavenehi eta vicasiñavairahí eta mayehe. Vahí étaparacaimahi eta vicaematanearahí. ⁶ Énerichuva ema víyarahaini David máechajisihahi eta náuricacarevahí ena ticapecaturarahiana eta majacapiravacahi ema Viya, tájina étaparacaina eta nacaematanearahí. ⁷⁻⁸ Ánipa macahehi: “Tétavicavapa eta náuricacarevahí nácani maperdonachaqueneanahí ema Viya eta napecaturanaini, tijacapahavíhi tímicutijircavainehi tacuijahini véjecapiravainahini” macahepa.

⁹ Tacahe, eta juca viúricacarevahí, vahí vácarichu viciatuparalahahini viti israelítana. Énerichuhivare tatuparacahivare ena apavasanana. Vécharipahi eta majapanuirahí ema Viya ema Abraham. Tacarichuhi eta macasiñavairahí, majacapahí ema Viya. ¹⁰⁻¹² Ímijachaipapuca éti, eta majacapacarevahí ema Abraham tásiquenahí eti macamarcairahí. Numetacahesera: Váhiquene étainahí táichahini eta macamarcairahí éma, taicha te taequenepa eta majacapirahí ema Viya, mapaenumavahí ticamarca ema Abraham. Étapa táchicayarehi eta majacapiraipa ema Viya táichavenehi eta macasiñavairahí. Émara ema achane máinapuiruhi ticasíñavahí me Viya. Puíticha ema Abraham, émapa vicaiyaquenahí vimutu viti vicasiñavanahí me Viya, vijacapacareipa víti apanava. Tacamunuipasera vácoticacahini vicasiñavahini mayehe, viti israelítana étipa eti apavasanana.

Ema Viya máitauchayare eta máijarasirahaviya eta vícuchihi táichavene eta vicasiñavairahí eta mayehe

¹³ Ema Viya tíjaracavahí eta máijarasirayare ema Abraham énapa ena mámariéqueneana tamutu eta apaquehe, návapairuyare. Máijaracayare táichavenehi eta macasiñavairahí ema Abraham. Vahí étaparacainahíni eta masuapirainahíni eta vanairipiana. ¹⁴ Taicha te tatiarihinhíni eta náicuchihi ena titáuchanahí eta vanairipiana, tamapurujipapucaini eta vicasiñavairahí, tamapurujipavarepuccaini eta máijarasiravahí ema Viya eta majacapirahiyare. ¹⁵ Taicha eta vanairipiana, étachucha támaparaucha eta náicuña ena téjecapavanahí. Tásaha, vimutu vicaicuchiyarehíni eta vícuña, taicha vimutu véjecapavahí*.

¹⁶ Ema Viya, téavicavahí eta majapanuraivahí. Tásaha, yátupi máitauchayare eta máijarasiravana nayehe namutu ena mámariéqueneana ema Abraham. Vahí nácarichuhini ena téhicanahí eta vanairipiana. Nayeheyareva namutu ena ticasíñavanahivare mayehe, ticutianahí ema Abraham eta macasiñavairahí. Eta tacahe puiti, eta vicaiyairahí vimutu víti ema Abraham te mavahuana ema Viya. ¹⁷ Taicha ema Viya, ánipa maicha ema Abraham: “Puiti nunacaviyare píti nacaiyaqueneyare ena achaneana te camuriquene avasareana”. Tásaha, ema Abraham, ticasíñavahí muraca me Viya

* ^{4:15} Ema Pablo te mayeherepi eta máechajiruvana, ani macahe: “Te táviha tájina vanairipi, nájinavare ticaviurevhini eta náejecipa tayehe”. Étasera eta macayemaquenahí, ani tacahe: “Tatiarihí eta viviurevhahí vimutu, taicha tatiarihí eta vanairipi te tamutu jácani vicaijuhepuca”.

eta máitauchirayare eta máijarasirayare ema machichaya, tayanapane eta mácheruanahi éma, ésupa esu mayena. Taicha ema Viya, tamutuhi máituruqueneha. Ema Abraham ticasíñavahivare eta majacapirayare eta máicuchihi, tayanapane tájinaichaha máimahahini.

¹⁸ Ema Viya mametacavarepa ema Abraham eta macachichairayare, camurianayare ena mámariéqueneanayare. Eta nasimutuvayare, tamutu nacavasayarepahi, camurianayarehi eta návasanaya. Ema Abraham, ticasíñavahí eta táitauchiravayarehi tamutu. Ticuchapavaipa eta máuchusirayare ema machichayarehi. ¹⁹⁻²¹ Ema Abraham, ichavicaipa éma, cien año eta mañañora. Ésupa esu Sara, ichavicaipavare, macheruhivare. Vaipa náurihahini eta nacachichairayarehi. Váhisera máeñamavahini ema Abraham. Ticasíñavahí muraca eta mayehe ema Viya eta tamutuirahi máituruqueneha eta máitauchirayarehi tamutu eta máijarasiravanahí. Váhivare mapicacaracavahini. Eta macasiñavairahi, téavicavahí eta macunachirahi ema Viya. ²² Eta tacahe, ichape eta majacapacarevahí me Viya táichavenehi eta macasiñavairahi muraca.

²³ Tacahe, eta vicaravahuira eta Sagrada Escritura, vímatiequeneha vahí mácarichuhini ema Abraham majacapacarehini me Viya. ²⁴⁻²⁵ Puiti, víti apanava vijacapacarehi me Viya eta vicasíñavairahi mayehe. Taicha ema Viáquenu Jesucristo táimicpacahí eta vipecaturana. Émasera ema Viya macaechepucahi ema Machicha te máecari apaesa vijacapacareyarehi mayehe vimutu viti vicasíñavanahí mayehe.

5

Téavicava eta viúricacarevahí táichavene eta majacapirahavihi ema Viya

¹ Puítiripa vijacapacareipa me Viya táichavenehi eta vicasíñavairahi eta mayehe. Tásiha, téavicavaipa viúrivahí eta mayehe. Vaipa vipicacaracavahini tayehe eta vícuñayarehini, taicha ema vímicuñaruhi ema Viáquenu Jesucristo, macaepaharipa eta vícuñayarehini. ² Máichavenehi ema Cristo, téavicavahí eta majapanuirahavihi ema Viya. Tásiha, tijacapahaviripa táichavenehi eta vicasíñavairahi eta mayehe. Tamutu sácheana viúrisamurehi eta vicuchapiraipa eta vijacapirayare eta vícuchihi visiapi rayare te majaivalahí ema Viya. ³ Te tatiarhinapuca eta vicatajivairayare, vivapinavachucha eta vicamichirahi taicha téumechahaviya eta vímiyanirava véhica ema Viáquenu. ⁴ Táichavenehi eta vímiyanirava véhica, vijacaparipavare eta vitumevayare viratahairayare vicamicha tamutu. Tásiha, eta vicamichirahi tamutu, vicuchapainapa eta táitsivayare vícuchihi. ⁵ Tájina tímipanererécahavimahi taicha yátupiyarehi eta vijacapirayare eta vícuchihi. Vicasíñavahí mayehe ema Viya taicha tímimaticahaviripa te visamureana eta máemunasirahavihi máichavenehi ema máijararuhavihi Espíritu Santo.

⁶ Víti, tájina viviyaimahi eta vicuchucuiraváinahíni. Émasera ema Cristo, te tiúrihi eta máimairahi, tíjaracavahí tépena víchavenehi víti máurirahanahi, eta macuchucuirahaviya. ⁷ Váhisera táchuticacahini eta visamureana viti achaneana. Vimutuhi véñama eta vítaresira. Téhesera tatiarhinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma. ⁸ Émasera ema Viya, téavicavahí eta máemunasirahavihi, tayanapane eta vicapecaturarahiri-chahanéni. Máijararecahisera ema Machicha Jesucristo máepeninahavihi. ⁹⁻¹⁰ Tásiha puiti, vijacapacareipa me Viya táichavenehi eta vicasíñairahi ema

Jesucristo eta máepeninahavihi. Ichapehinéni eta véjecapiravahi, vimaesenisirahi ema Viya, mavarahahisera éma macaepahayarehini eta vícuñayarehini táichavenehi eta vipecaturana. Eta máepenirahi te crusu ema Machicha, puiti ema Viya tíchuhahavihi vipauchayare éma. Tájina vipicahini eta viávahásiraipa éma. Tásiha puiti, eta vicasiñavairahi eta mayehe, vaipa véñamavahini tayehe eta viúchucuirayare taicha eta máechepusirahi te máecari, eta tímicae-cherachahi eta máitupajijiasiravahi eta macuchucuirahaviya. ¹¹ Puiti, tétavicavaipa eta viúrisamurevahi mayehe ema Viya máichavene ema Viáquenu Jesucristo. Tétavicavahi eta viúrivahi mayehe.

Ema Adán tímiaquipaica havi vimutu. Émasera ema Cristo émapa ticuchucuhahaviyare.

¹² Tacahe, ema Adán, ema máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, járajapapa eta vépenira, tavachaequenehi eta pecatu, taicha tímirijicahaviripa tayehe eta pecatu. ¹³ Te tájinaichaha májuchahini ema Moisés eta vanairipiana, tatiarihipahi eta pecatu te juca apaquehe. Étasera tamajinairaichaha eta vanairipiana, vuíchaha nacaviurevahini ena achaneana. ¹⁴ Namutusera ena mámariéqueneana ema Adán tépenanapaipahi taicha mámaparaucharipahi eta mapecatura éma, tayanapanepuca eta napecaturana vahi tácuthini eta mamausuapajiraivahi, tayanapanehivare tájinaichaha eta vanairipi májurehi ema Moisés. Ema Adán, émapa ticaetehahavihi. Te taequenepa, máraja-painapa ema apana, émainapa tétupiripanahaviyare. ¹⁵⁻¹⁶ Víti, tétavica-vaipahi eta visimutuvahi viti vicaicuñanayarehini tayehe eta ecuñaraqui te yucu infierno, étanaichuhinéni eta máejecapiravahi ema viáchucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhahaviyare máichavenehi ema Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenénahini. Tájinavare jácani vicaematanearacaimahi. ¹⁷ Étanarichuhinéni eta pecatu máejecapiravahi ema émana achane, émaripa ema viáchucaini Adán. Tiámairijicahaviripasera eta vépeniraya vimutu. Émasera ema Viya tiápajucavaipa eta majapanuirahavihi. Tijacapahaviripa máichavenehi ema émanaquenerichuvare achane, ema Jesucristo. Tíjaracahavinavarepa eta arairuyare vítaresirayare vimutu viti vicasiñavanahí eta mayehe.

¹⁸ Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo, tájina matapiravainahini eta máitaresirahi. Éma, tiámaparáuchahaviripa eta vítaresiraya víti, vijacapacareipa me Viya. ¹⁹ Camurihavihi viti tacaerajiruanahi me Viya, táichavenehi eta mamausuapajiraivahi ema émana achane. Puítisera camurihaviripa viti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máitaresirahi.

²⁰ Te taequenepa eta máejecapirahi ema Adán, ema Viya manaquicahi eta vanairipi. Éta tímítucahaviyarehi eta tavayuchiravahi eta vipecaturanahi. Puíticha tiápajucavapaipaicha eta pecatu, émasera ema Viya tiápajucavaichucha eta majapanuirahavi. ²¹ Tacahe, eta pecatu, ichape eta támáparáuchahavirahi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásiha, píjara-cahavinavarepa eta vítaresiraya máichecuaracuireyare máichavenehi ema Viáquenu Jesucristo.

6

Puiti eta majacapirahavipa ema Viya, viciatuparahapa vitupiruvainapa eta vítaresiraya. Vínjacainapa eta pecatuana.

¹ Tiuri puiti, németeaca etiarahi eti ímijachaipapuca tiúrihi vímiyanava vicha eta pecatu apaesapuca tácaecherapaipa eta táetaviuchirahi eta majapanui-rahavi ema Viya. ²⁻³ Váhiquenesera táuricahini vímiyanavahini vicha. Taicha tépaharipa eta tapamisirahavini eta pecatu. Nuvaraha vahi ecuemitisica eta ímitucasivanahi. Eta vicaicachasirahi eta víjarasiravahi véhicaya ema Viáquenu Jesucristo, viúrujiacaripa éma. Tásicha, tímicutijiricavaipa vácachanehini eta máepenirahi, vépenahivaréni víti. Vaipa tárataha tipamicahavi eta pecatu. ⁴ Eta vicaicachasiraipa te une, tímicutijiricavahi vicaecarasihi, vicachanepa ema Cristo eta máepenirahi. Énerichuvare eta viúchusirahi te une, vicutipa éma eta máechepusirahi te máecari. Tanasiripa eta ichasini vítaresira. Tásicha puiti, arairupa eta vítaresirahi taicha máetaviuchirahi ema Viya eta macaematanearahavi tacuti eta ichape mítupajijiasiravahi te macaechepucapa ema Machicha. Vaipa táuricahini víchahini eta pecatu.

⁵ Taicha eta viúrujiasiraipa ema Cristo, vicutiripahi éma eta máepenirahi. Tásicha, étarichu vicaheyarehi víti apanava eta véchepusirayarehi, vicutiyarehi éma eta máitaresirahi, tájina matapiravainahini. Tásicha víti, arairuina-eta vítaresira. ⁶ Tacutiquene, eta tamaurivainihi eta ichasini vítaresira tacapecaturaraivainihi, tímicutijiricavahi te vicaquenureca. Tétavicavahi eta tacavanarairahavihi, tipamicahavihi eta víchirayarehi eta tamauri-queneana. Puitisera táecarasipa eta ichasi vítaresira, tacutihi eta náecarairaipa ema Viáquenu Jesús. Vaipa tipamicahavimahi. ⁷ Taicha mácani achane eta máepeniraipahi, tícheceipahi eta macapecaturairahi. ⁸⁻⁹ Puiti vécharipa eta máechepusirahi te máecari ema Viáquenu Jesucristo, tájinapa tímiapechaimahi máepenahivaréni taicha tájinapa tárataha táimicacahini. Ene vicahehi víti eta viúrujiasiraipi ema Cristo. Vécaripahi eta tamaurivahi eta ichashi vítaresirahi. Puiti, tamutupa ticaitsivahi. Vicutinapa éma eta vítaresirainapa. ¹⁰ Eta máepenirahi ema Cristo, éta tímicapacahi eta vipecaturana. Éma, vaipa tiápechavaimahi tépena. Tamuturipahi. Tásicha, eta máechepusiraipahi, máichecuaraquirénapa eta máitaresira te mavaure ema Maiya. ¹¹ Ene ec-aheyare éti, écarainapa tamutu eta tapamisirahéni eta epecaturana. Puiti eta ítaresirainapa, macarichu ema Viya ecaematanearuya, táichavenehi eta iúrujiasirahi ema Viáquenu Jesucristo.

¹²⁻¹³ Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha tétavicavahi eta tamaurivahi eta tajamurachaqueneanahi. Tímicutijiricavainapa épenaque, vaipa échaimahi eta pecatu. Ítarecainpaseraya mayehe ema Viya, íjararecainpaseraya iáqueheana mayehe. Ísapainapa ema Espíritu Santo tipamicahé eti ecaematanearahaya ema Viya, eta íchiraya eta táuriqueneana. ¹⁴ Eta pecatu, vaipa ticavanarahémahi. Émainapaseraya puiti ema Viya, tímicatacáchénapa eti íchirahi eti táuriqueneana. Énerichuvare vaipa tacamunuhini eti tápicararesirahe eti vanairipiana apaesa vahi ecuquicha eti tamauriqueneana.

Ena ticapecaturarahiana tímicutijiricavahi ena ticaquenurecana eti tapamisirahi eti náichirahi eti pecatu

15 Puiti, németeaca etiarihi eti ímijachahi tísapacarechaha eta vicapecaturaira taicha vaipa tápicararecahavihini eta vanairipiana. Étisera, tétavicavahi eta táejecapiravahi eta epanereruana. Ímipanapa eta majapanuraivahi ema Viya. Vaipa epicauchahini. **16** Écharichuhi éti, te ímiyanavaya-rechuchapuca eta tapamisirahehi eta pecatuana, ecutirichahapuca mácani ticaquenurecahi, tipamicavayarehi eta masuapirayarehi ema máquenu. Ene ecahehi eta esuapiraichaha eta pecatu. Éta tiámaparáuchahehi eta esiapistaya te yucu infierno. Téheserapuca émainapa esuapaya ema Viya, tatupiruvainapa eta ítaresiraya. **17-18** Nuhasulupayachasera ema Viya eta ínajisiraipa eta tapamisirahénihi eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávácuharipa eta táuriva eta ítaresiraya. **19** (Nímicutichinahehi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta ítaresirahi, étarichaha íjararecahi eta iáquehe tayehetamauriqueneana, étaviuchahi eta evainarajivanañih. Puiti íjararecaya eta iáquehe íchayare eta táuriqüeneana, táurivaya eta ítaresira. Tacuija tahapapicahe eta ecaemataneasiraya ema Viya.

20 Taicha cape juca ítaresirahi étarichaha tipamicahéhi eta epecaturana. Vuíchaha étainahini ecaemataneaca eta táurivaya eta ítaresira. **21** Tájinavare ímaequenehahini eta íchirahi eta tamauriqueneana. Puítisera, tétavicavahi puiti eta etsirihacarevahi tayehet, taicha ímatipa tiámaparáuchahehi eta esiapistayarehini te yucu infierno. **22** Puítí iúchurepa tayehet, tapamisirahehi eta pecatu. Iávacuhaipa eta ecaemataneasiraya ema Viya. Jéhevare eta iúritaresirayare me Viya, máichecuaraquierenapa eta ítaresiraya. **23** Eta víchirahi eta tamauriqueneana, tacarichu tiámaparáuchahavi eta visiapistayarehi te yucu infierno. Émasera ema Viya mavaraha tíjaracasichahaviya etavítiresirayare máichecuaraquireya, te yátupina eta vicasíñairayare mayehe ema Viáquenu Jesucristo.

7

Viti véhicanahi ema Jesucristo, titavaripa eta tapamisirahavihi eta vanairipiana

1 Nuparapenaveana, écharichu éti eta yátupirahi tisuapacarehi eta vanairipiana nayehe ena achaneana, étachuchasera te titarecanarichaha. **2-3** Tímicutijiricavahi súcani esena sucaimaquene. Tatuparacahi ésu sucachaneyarehi macarichuhi ema suima, vahi sucucaeahi éma, te jácani achancerichaha éma. Te suvehapuca ema apava achane, ticapecaturaipa ésu. Téhesera te tépenapapuca ema suima, ésupa téchinava. Tísapacare suápechava suácaima mayehe mácani suvarahaqueneyare suímayare. Vahi pecatuina eta suápechiravayareticaima.

4 Ene ecahehi eti nuparapenaveana. Ema Cristo, máepeninahehi te crusu, macaepaharipa eta tapamisirahénihi eta vanairipiana. Puiti émapa téchahehi ema Cristo. Ecutiripa esu esena suépenaimaquene te tiápechava ticaima, tásicha apanapa ema téchahi ésu. Puiti mavanaraheripa ema Cristo, ema máecheprerequenehi te máecari. Mavarahahi ichapeyarehi eta ecaemataneasiraina eta mayehe ema Viya. **5** Taicha cape juca ítaresiraichaha, esuapahi eta tavarahaqueneana eta iáqueheana. Te esamapa eta vanairipi tiápajucavahi eta evarairahi ícha eta tamauriqueneana. Tásicha éta, tiámaparáuchahehi eta ícuchihi eta esiapistaya te yucu infierno. **6** Puítisera vaipa tapamicahavihini eta vanairipiana. Puiti viúchucurepa eta ichasi vítaresiraini. Émapa

vicaematacayare ema Viya taicha tépanavaripa eta arairu vítaresira eta mávahásirahaviripa ema Espíritu Santo.

Eta viáquehe tichurucuhavihi eta tavarairahi vicha eta tamauriqueneana

⁷ Etiarihipuca eti ímijachahi tipamicahehi eta vanairipiana eta escapecaturairaya. Váhiquenesera étaina. Vítiripa vahi vímatiequenehavanehini eta tamaurivahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta tamaurivahi eta vijamurachirana eta apayehe. Eta vanairipi, ani tacahehi: “Vahi picujamuracha eta apayehe”.

⁸ Téhesera te vímatipa eta juca vanairipi, viápajucavapa vijamuracha tamutu eta vímaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana. ⁹ Eta viámaperuvaichaha apaicape, vuíchaha vímatihini eta vanairipiana. Téhesera te vímatiequenehana, visamavapa eta tatarihipa eta véjecapiravahi eta vimaitauchirahi eta vanairipiana. Tásiba, véchapa eta vépenirayare, tatarihirahia eta vícuchihi eta vícuñayarehi. ¹⁰ Tacahe, víti vímijachaipahi viúchucuhayare te vítauchapapuca eta vanairipiana. Tájinachuchasera tájaracahavihini eta viúchucuirainahini. Étachucha tiámaparáuchahavi tayehe eta vépenirayarehi.

¹¹ Téhesera te amahe eta visamure, jararihi eta pecatu. Tavayuaracahavipaipa, tacamapurairavahi eta tatarihirahia eta vanairipiana, taicha tavaraha táimicapacahavi.

¹² Nuvaraha numetacahe: Tiúrihisera eta vanairipi, sántohivare, tatupiruvahivare. ¹³ Németeacasera etiarihi eti ímijachapuca vahi tiuri eta vanairipi taicha támapiricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparauchahavihini eta vépeniraya. Étarichu eta vicapecaturairahi, étapa tiámaparáuchahavihi eta vépenirayarehi. Étasera eta vanairipi tímereuchahavi eta vimaurivahi víti te visamureana, tétavicavahivare eta vimasuapajiraivahi.

¹⁴ Eta vanairipiana tavarahahinéni tímitupiruchahavi. Étasera eta veche máteji, tavayuararuhi eta tavarairahi víchaya eta tamauriqueneana.

¹⁵ Taicha víti váhiquene vímatiequeneha tájahapuca eta vícharacavaya. Vahi véhicahini eta vianerechaquenehi vivarahaquenehi vicha. Tasapihachucha víchahi eta vicatichaquenehi vimavarahaquenehi vicha. ¹⁶ Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásiba, te víchapapuca eta tamauriqueneana, visamava te visamure eta tamaurivahi eta víchirahi, vémechaemachirava eta tametasirahavihi eta vicaicuñairayare. ¹⁷ Tatarihi te viáchaneva eta pecatu. Tásiba, váipanéni vítijiricavahini víchahini eta pecatu. Étasera eta távahásirahavihi te visamure eta pecatu, étapa tipamicahavihi eta víchirayarehi eta tamauriqueneana. ¹⁸ Véchahivare víti eta tamaurivainihi eta táitaresiraini eta viáquehe. Tétavicavahi eta tamasuapajiraivainihi. Tímicutijiricavaipa tichururerecahavihi. Vivarahahinéni vétupiricavahini, váhiquenesera tásapahavihini eta viáquehe vétupiricavahini. ¹⁹ Te vivarahainipa vicha eta táuriqueneana, vahi váratahaimahi vicha. Étachucha víchahi eta tamauriqueneana vimavarahaquenehi vicha. ²⁰ Te víchahipuca jácani vimavarahaquenehi vicha, vaipa vítinahini tásihahini eta víchirahi, étapa eta pecatu tipamichahavihi, taicha tiávahácahavi víti.

²¹ Te vivarahainipa vicha eta táuriqueneana, tasapihachucha eta pecatu tímiapitavairicavahi tíchejmirauchahavihi. Eta tacahehi eta víchavaquenavahi. ²² Étasera eta viáchaneva, tétavicavahinéni eta tajamurachirahi víchahini eta mavarahaqueneanahi ema Viya. ²³ Jararihisera eta pecatu te

amahe eta viáquehe. Ichapemurihi eta táehacacairahi tacanarahi eta paure viáchaneva. Tavaraha tíchejimirauchahavi apaesa vahi vicuitauchahini eta mavarahaqueneana ema Viya. Tétavicavahi eta táitiasirahavihi, tímicutijiri-cavaipa vicaerata.

²⁴ ¡Tétavicavapa eta véjapanuraivasamihi viti páureana! ¡Tacahehi eta vícharacavahi! Németeaca eta vapanereruanahi víti, ticutimahinepa nájinapa tiratahaimahi ticuchucuhahavi tayehe eta tavayuasirahi eta viáquehe eta pecatu, támirahavyare tayehe eta vépenira. ²⁵ ¡Mararihisera ema Viáquenu Jesucristo! ¡Macarichu éma marataha ticuchucuhahavi tayehe eta juca tamauriqueneana! Puítiripa núti, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavarahaqueneanahí. Étasera eta ichasiquenetataji náquehe, ticavanaranuichucha tayehe eta pecatu.

8

Tiúriyarehi eta vítaresira taicha eta mávahásirahavihi ema Espíritu Santo

¹⁻⁴ Puítisera témitiacaripa eta vícuñayarehíni viti viávhácanapahí ema Cristo Jesús. Eta mávahásirahavihi ema Jesucristo, tiávhácahaviripavare ema Espíritu Santo. Émapa, ticaepahahi eta tapamisirahavihi eta pecatu, étapa eta támaparauchirahavihi eta visiapistiraya te yucu infierno. Ema Viya, eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca viáquehe viti achaneana. Éta máijarasiravahi, macamitiequenehaipa eta tapamisirahavihi eta viáquehe eta vicapécaturairana. Puiti émainapa téchahavyare ema Espíritu Santo. Véhicainapa eta mavarahaquenehi. Tásihá vínjicainapa eta visuapirainihi eta tavarahaqueneanainihi eta viáquehe tacapécaturaraivaini. Émapa tétumechahavihi eta vítauchiraya eta mavarahaqueneana ema Viya.

⁵ Nácanisera nasuapahí eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera viti visuapanahí eta mavarahaqueneana ema Espíritu Santo étainapa vapanerechaya eta vicurisamurechiraya ema Viya. ⁶ Nácani napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera viti vapanerechanahi eta mavarahaqueneanahí ema Espíritu Santo, viti vítarecayare. Viúrinapa mayehe ema Viya. ⁷ Nácani napanerechaichucha eta tavarahaqueneana eta náquehe, éna macatianaruhanahí ema Viya. Taicha váhiquene návarahaimahi nasuapa eta mavanairipi. ⁸ Tacahe, éna étachucha nacurisamurerecahi eta náquehe, vahi náitucahini nacurisamurechahini ema Viya eta mavarahaquenehi.

⁹ Puítisera éti, eta mávahásiraheripahí ema Espíritu Santo, vaipa étaimahi epanerecha eta tavarahaqueneanahí eta iáquehe. Étapa epanerechaya eta mavarahaqueneanahí éma. Nácani vahi mávaháruanainahini ema Espíritu Santo, váhivare machaneranainahini ema Cristo. ¹⁰ Étisera, eta mávahásiraheripa ema Cristo, tayanapane táguchirichuhi eta iáquehe eta tágopeniraya táchavenehi eta pecatu, étasera eta iáchaneva titarecayarechucha, taicha ejacapacaréipahi me Viya. ¹¹ Táchavene eta mávahásiraheripa puiti éti ema Espíritu Santo, ema Viya macaechepucayare eta iáqueheana, tayanapanepuca épena-quinénaripa. Tacutiyarehi eta macaechepusirahi ema Machicha Jesucristo te máecari. Éti iápechavayare ítareca maicha ema Espíritu Santo.

¹² Tacahe, nuparapenaveana, vicatuparahapa eta visuapiraya ema Espíritu Santo. Vaipa étaimahi visuapa eta tavarahaquene eta

viáquehe. ¹³ Taicha te étachuchapuca esuapa eta tamauriqueneana tavarahaqueneanahi eta iáquehe, tájinapa iúchucuiyaimahi, ecaicuchihi eta épeniraya. Téhesera éhicahi eta mavarahaquenehi ema Espíritu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítaresirainapa.

¹⁴ Taicha vimutuhi viti visuapanahi ema Espíritu Santo, machichahaviripa ema Viya. ¹⁵⁻¹⁶ Émaripa ema Espíritu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típicararecahémahi tayehe eta ícuñayarehini. Tímimaticahénapasera eta yátupirahi macachichairahéhi ema Viya. Tásicha, ecasiñavaipa eta mayehe ema Viya, émairaipahi ecaiyaqueñehi. “Tátachicha Nucaiyaqueñehi” ecaheyarehi. ¹⁷ Eta macachichahaviraipa ema Viya, vijacapainapa eta vícuchihi máijararuhaviya. Vicutinapa ema Cristo eta máijarasirahí eta máicuchihi éma. Puiti, eta vicatajivairahi te juca vítaresirahí, vicutihi ema Cristo eta macatajivairahi, tásicha, vicachanénapa éma tayehe eta mávihahi eta majaraivahi.

¹⁸ Puiti németeacahi nútì, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape viúricacarevaya te majaraiva ema Viya. ¹⁹ Jéhevare, tétavicavahi eta tajamurachacarevahi te táitecapapa eta sácheyare eta vímairaya eta vicuchapaquenehi eta tacaitisivairaya eta viáquehe vimutu viti machichanaveana ema Viya. ²⁰⁻²² Tacutiquene te jena sácheyare vicuchapaquenehi, tamutuinapa témitiacayare eta témcatajivachahavianainihi te juca apaquehe. Tamutuinapa arairuyare, tétavicavainapa eta táurivaya eta apaquehe. Vímaha puiti ticatajivanahi tamutu te juca apaquehe: Eta sárareana, ticajumanahi, táepenanahi; étapa eta sucurecana. Eta tacatajivairahi tacutihi eta sucatajivaira esu súcandi esena ticacatiruhahi eta suínasira. Étasera eta arairuyare apaquehe, ticaitsivainapa tamutu. Vaipa pecatupairemahi, tamicauchainevarepa eta majaraiva ema Viya eta viávihaya viti machichanaveanahi. ²³ Ema Espíritu Santo máitsivacharipa eta viáchanevana. Vaipa tásachaimahi vicha eta pecatu. Váipavare víchaimahi eta tamauriqueneana. Tásicha, víti, ichaperipa eta vicuchapiraipaicha eta jena sácheyare eta tacaitisivairayare eta viáqueheana. Títauchavainapa eta macachichairahavinapa ema Viya. Yátupinapa mayehehavinapa.

²⁴⁻²⁵ Yátupihi puiti eta machichahavirahi ema Viya. Ichapevare eta vicasiñavahi eta mayehe eta vicuchapirahi eta viúchucuirayare te jena sácheyare. Vácamicha tamutu, vímiyanava eta vicasiñavairahi eta mayehe támuntu sácheana. Tapaenumavainapa vímahainapa, tájinapa vicuchapaimahi.

²⁶ Énerichuvare, ema Espíritu Santo tímicatacavahí te tamutu eta vimarataqueneanahi. Tavetiji tímicatacavahí eta vimaitusirahí eta viyaseuchiravayarehi te viyujarasirana. Éma, tiyaseuchahavi te viáchanevana. Viúmitichahi taicha muraca eta vivarairahi eta mayasearuana. Vaipa virataha véchajicahini. ²⁷ Émasera ema Viya máimatihi eta visamureana jácani vivarahaqueneana viyaseaca, étaripa eta mayasearapi ema Espíritu Santo. Taicha ema Espíritu Santo máimatihi eta mavarahaqueneanahi ema Viya, tásicha tiyaseuchahavihi viti machaneranahi.

Ema Viya mavaraha ticachanehaviyare víti te majaraivahi

²⁸ Vécharipahivare tétavicavahi eta majaneasirahavihi ema Viya vimutu viti vémunacanahi éma. Tayanapane vicatajivahipuca, éma tamutuhi tiuri máicha. Títauchavayare eta mapanereruana éma eta viúricacareyarehi

eta máichuirahavihi. ²⁹ Acaneripahi eta máimatirahavihi, tinerejicahavipa machichahaviyarehi. Mavarahahi éma vicutiyare ema Machicha Jesucristo eta máurivahi. Tímicutijiricavayarehi viparapeya éma, véchavimurihi eta macachichairahavihi ema Viya. ³⁰ Tásaha, te máimahapa tiuri, tíchuhahavipa viti manerejiruanahi. Eta visuapiroha vipauchaipa éma, tijacapahavipa. Tásaha, tíjaracahavipa eta vícuchihi eta visiapiroha tayehe eta majaraiva.

Tájinaquene ticaerajicahavimahi mayehe ema Viya taicha yátupihi eta máemunasirahavihi

³¹ Tásaha puiti, nuvaraha yátupina eta ecaicutiarairaya eta juca: ¡Tétavicahavi eti macatiuchirahavihi ema Viya! Tájina táichava eti nacatianasirahavipuca nácani achaneana. ¡Váhisera nárataha ticapaquechahavianaimahi!

³² Eta majapanuirahavihi ema Viya, vahi mavayuacahini máijararecpa ema Machicha eti nacapasirahi víchavenehi vimutu víti. Tásaha, mavetijinapa eti macatiuchirahaviyare puiti te tamutu eti jácani víchavaquenevana. ³³ Puiti tájinapa viviurevaina táimicuñacahavihini viti manerejiruanahi, taicha ema Viya tépachiacahaviripa eti majacapirahavihi. ³⁴ Tájinaquenepa tímicuñacahavimahi taicha ema Cristo máepeninahaviripa, tichavaripavare titareca. Puíticha téjacahi te mavaure ema Viya, téchajiurucahaviripa éma. ³⁵ Ema Cristo, tájinaquene vahi máinajicaimahi eti máemunasirahavihi. Tásaha, yátupina eti vicasiñairaina éma. Tayanapanepuca vicatajivahi, váhivarepuca vicuitucahi vétupirica eti víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicararecahavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha. ³⁶ Te tamutu eti juca, vicuti ena machanerana ema Viya ena taechajisihaquenenahi acane eti Sagrada Escritura, ani tacahehi: “Tamutu sácheana ena tictatianacanahi ema Viya titanucahavianahi viti machanerana, navaraha ticapacahaviyare. Tivapinavanahi eti nacapasirahavihi, ticuti ena ticaparecanahi eti vaca te náichayare eti ichape fiesta”. ³⁷⁻³⁹ Váhiquenesera viciacaimahi eti náipicararesirahavianahi. Tétavicavahi eti máetumechirahavihi ema Jesucristo táichavenehi eti máemunasirahavihi. Tájinavare tihapapica havimahi eti véhisirahi éma. Núti nucasiñava ema Viáquenu eti majaneasirahaviya. Tájinaquene ticaerajicahavimahi eti máemunasirahavihi. Vahi étainapucaini eti vicatajivapuca eti vítaresira, étainapucaini eti vépenira, étainapucaini náipicararesirahavipuca puiti juca vítaresiraichaha, étainahipucaini táimipanererecahavihíni, jácani víchavaquenevaya eti vítaresiraya. Tájinaquene vahi viciacahini eti tipicacareanahi te juca apauehe, énainapucaini ena ichapemuriqueneana mayeheana ángele ema Váinaraji, étainahipucaini eti náiñehivanahi. ¡Tájinaquene ticaerajicahavimahi mayehe ema Tata taicha yátupihi eti máemunasirahavihi taicha viávahácahi ema Viáquenu Jesucristo!

9

Ena israelítana, éna manerejiruanahi ema Viya

¹⁻³ Nuparapenaveana, tétavicavahi eti néminasirahi ena nujaneanana israelítana. Eta tacahe, ichape eti náimipanerechiranuhi nucatisamurehivre, táichavenehi eti namaehisirahi ema Viáquenu Jesucristo. Táetaviucha eti néñamiravahi eti nayehe, nuvarahainehi níjararecahavini nuyanahini núti te jena yucu, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahéhi. Ema Espíritu Santo,

émaripa téchahi tamutu eta nupanereruanahi. Tímisamanuhi eta nétupirisirahi eta numetasirahehi.) ⁴⁻⁵ Tétavicavahi eta náuricacarevayarehini éna, taicha manerejiruanahi ema Viya, máichavenehi ema náchucaequerenéni Israel, mavarairahi ema Viya machichanaveanayarehi. Ichapemurihi eta macachaneravacahi, máimechirahi eta majaraiva. Máijaracavaca eta matratune eta majaneasiravacayare. Máimimaticahivare eta mavanairipiana. Máimimaticahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiyare nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivanarichuhi ema Cristo, najaneanarichuhi eta máucupaisirahi te juca apaquehe. Émasera, Víyahi éma. Puíticha émaripa téchahi tamutu. Maitavacacaipa eta vijirauchirahi. Amén.

⁶ Tayanapano eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témpururecavana. Vahi návarahahini náehica. Váhisera étainahini táichahini eta mamaitauchirahi eta matratune ema Viya. Nasapihapa namapuruji namutuyaréni, vahi machichanaveanainahini ema Viya, táichavenehi eta namasuapajiraivanahí. ⁷⁻⁹ Nuvaraha némechahe eta manerejisirahi ema Viya ena apinana machichanaveana ema Abraham. Matiarihihi ema Ismael, émapa ema Isaac. Ema Viya vahi manerejicahini ema Ismael, máijarasiravacayarehi eta náicuchihi ena mámariéqueneana. Macarichu ema Isaac, manerejiruquenehi ema Viya. Eta mametacasivahi ema Abraham eta me Viya, ani tacahehi: “Puiti juca cájeyare, níjaracavyare píti ésupa esu Sara ema echichayare, ticaijareyare Isaac. Núti níjaracavyare eta máicuchiyarehi ema Isaac, énapa ena mámariéqueneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi ena navaraha najacapayare eta náicuchihi, nasuapirohi eta máijarasiravahí nayehe.

¹⁰ Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi ena náinapureanahi nachichanaveana. ¹¹⁻¹³ Tacahe, vuíchaha náuchucuhini ena nani amuyana, tájinaichahavare napecaturainahini, táimaticarepahipucaini eta táuriva eta náichaquene. Te tiánehipa eta suínasirayare, ema Viya mametacapa esu Rebeca, ánipa macahe: “Chámeanayarehi ena pichichanaveana. Émasera ema tínapucayare tiúchuca, éma, mósoyare mayehe ema máti”. Étapaichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táichararacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

¹⁴ Puiti, vahi ecuimijachahini vahi tétopicava ema Viya eta manerejisiravacahi ena achaneana. Váquenesera énéna tacahe. ¹⁵ Ema Viya mametacahivare ema Moisés, ani macahe: “Núti necha mácani nujapanuqueneyare” macahepa. ¹⁶ Tacahe, vahi vámuto vácuticaca eta majapanuirahavi ema Viya máichuirahaviyarehi. Éma téchahi eta manerejisiravacahi nácani majapanuqueneana máichuhaqueanayare. Vahi étainahini eta náimijachiravahí táchuhacareana taicha eta náurivahí, napamisirahipuca naicha eta táuriqueneana. ¹⁷ Ema Viya ánivare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pimuracasamurevahí. Nuvarahasera núti nímmaticahiyare eta tamutuirahi nurataha nítupajijiasirava, apaesa táimaticare eta

níjare te tamutu eta juca apaquehe” macahepa ema Viya. ¹⁸ Tacahe, ema Viya manerejicahi nácani mavarahaqueneanayare máichuha. Máisapahisera ena masuapajirairahana tajurucachuchaini eta namuracasamurevahi.

¹⁹ Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tamauriqueneana. Émarichuhinéni tíchahavivi” ecahénapapuca éti. ²⁰ Vahi tacucae eta epanereruana. ¿Vahi epicahini iácapaemachirahi ema Viya? Eta cachapare mátejisi vahi táuricaimahi tácapaemachahini súcani tépiyacahi: “¿Tájaha tacayema pímpipanajicanu eta pépiyasiranuhi, váhiyapa nucunachacarehini eta pépiyasiranuhi?” vahi táichaimahi. ²¹ Esu típuarecarahi, ésu téchinavahi jácani taimahianayare eta suípune, suíchayarehi eta suícarahiyare, tásicha suépiyacavare eta suyehe vásenilla, tacahehi eta suvara haquenehi.

²² Tatuparacahi ema Viya máicuñacavaneya namutu ena achaneana vínarajiqueneana, máimitaequenehavacavane éna. Tatuparacahivare máimerecavane eta máitupajijasirava étapa eta masemirahi tayehe eta naurivahi. Tétavicavahisera eta macayehhevahí paciencia. ²³ Víti apana, ene tacahehi eta táetaviuchirahi eta majapanuirahavivi, máimerecahi eta táichapeva eta macunachacareva. Acaneripahi eta manerejisirahavivi eta vicachaneraya éma tayehe eta majaraiva. ²⁴ Vahi vácarichuhini viti israelítana manerejiruhavivi; énerichuhi eti apavasanana manerejiruhelivare. ²⁵⁻²⁶ Eta Sagrada Escritura májurehi ema víyarahaini Oseas, eta máechajiriruva ema Viya, ema yátupiquenehi eta macasiñacarevahí, ani macahehi: “Núti nunerejicayare níchuhabacayare ena ichapemuriqueneana ena achaneana apavasanana. Tayanapane vahi náesenicanuhini cape eta náitaresirahi, tijacapacareeanahisera nuyehe. Ichape eta némunasiravacayare taicha nuchichanaveanayarehi éna” macahepa. ²⁷ Énasera ena nujaneanana israelítana, ánimurianarichuhi ena tisuapanahi eta máichuarapi ema Viya. Nacuti éna ánimuriqueneana náechajisihahi ema víyarahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti viúchucuhanayare. ²⁸ Ema Viya, vaipa macamichaimahi eta náejecapiravanahí ena achaneana. Tíjahúchavayarepa eta máicuñasirayare eta apaquehe. Máijahúchayarehi máitaequeneha tamutu”. ²⁹ Ánivare macahehi ema Isaías: “Muracarinehi eta náquipaisirahi eta viávasa. Te tacuijahini eta majapanuirahavivi ema Viya viti vinerejiruanahi véhica éma, vítaequenehini vimutu. Nájina nánasihini te viávasa. Vicutiyaréni ena ticavasanahi te Sodoma, énapa te Gomorra, máitaequeneruanahi ema Viya, ema tétavicava eta máitupajijasirava, máituruequenehahi tamutu” macahepa ema Isaías.

Ena israelítana, vahi návaraha náehica ema Jesucristo

³⁰ Nuvaraha numetacahe eta juca, apaesa écha. Ena apavasanana nasapihahi tijacapacareanahi me Viya, váhinéni náesenicahini éma cape eta náitaresirahi. Tacarichusera puiti, táichavenehi eta nacasiñavairahi eta mayehe, tijacapacareanaripahi éna. ³¹ Énasera ena nujaneanana, tímijachavanahi tijacapacareanayarehi me Viya táichavenehi eta navarairahi náehica eta vanairipiana. Váhisera najacapacarehini. ³² Taicha éna, náemepururecahi eta najacapacarevayarehini me Viya. Vahi návarahahini nacasiñavahini mayehe ema Machicha Jesús. Éna tímijachavanahi étachucha nacunachiavahi

tayehe eta náitauchirahi eta navanesiracacanahi. Eta tiviuchahi eta nacatianasirahi muracaquenehi ema Viáquenu Jesú, vahi návarahahini nacasiñavahini eta mayehe. ³³ Ema Viya, eta máechajiriruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca tictorianacanaya éma, énapa ena ticasíñavanayare eta mayehe. Nácani tictorianacanapuca, énajivayare ticamitiequenehavanayare, ticaicuñanayareva táicha. Nácanisera ticasíñavanayare eta mayehe ema nuvaneruyare, vahi máinajiacavacaimahi” macahepa ema Viya.

10

¹ Nuparapenaveana, tétavicavahi eta néñamiravahi nayehe ena nujaneana israelítana. Eta nuyaseserepi me Viya te nuyujarasirana, nuvarahahini náuchucuhahini. ²⁻³ Nucunachavacahi éna eta náetaviuchirahi eta napicau-chirahi ema Viya. Téjecapavanahisera éna eta táichararacavahi eta vijacapacareva me Viya. Éna, tímiuriacavanahí tiúrianahi, tímijachavanahí tijacapacarenahí me Viya táichavenehi eta náitauchirahíji eta vanairipiana. Vuíchaha náimathihini eta táichararacavayarehi eta najacapacareva eta nacasiñavairaya me Viya. Váhivare návarahahini nasuapahini. ⁴ Taicha ema Cristo macaepaharipa eta tasuapacarevahí eta viyehe eta mavanairipiana ema Moisés. Vaipa étaparacaina eta viúchucuiraya. Tacarichu eta vicasíñavairahi mayehe éma, vijacapacareyare me Viya.

⁵ Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjecapiravainahi, tásicha ejacapacarenapa me Viya” macahepa. Nájinaserá náratahahini náitauchahini eta vanairipiana. ⁶⁻⁸ Máejerarepanasera eta vijacapacarevahí me Viya táichavenehi eta vicasíñavaira eta mayehe. Vahi tácamesahini vitanupanahini ema Cristo te anuma, taicha tiúcupauchahaviripa éma. Váhivare táchamesahini vitanupanahini te máecari vicaechepeupanahini éma, taicha téchepucaripahi éma. Tacamunuhisera eta vicasíñavairaina mayehe ema Cristo te visamureana. Eta vipiarasiraina eta máijare eta víjarasirava etá véhisirayare éma.

Tásicha núti, eta nucametarairuirahi, néchajisiha étachucha eta arairu véhiruhi eta majacapirahavihi ema Viya viti vicasíñavanahí eta mayehe. ⁹⁻¹⁰ Eta juca etá nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepeusirahi ema Machicha te máecari. Éma, macaepahayare eta vipecaturana, te yátupina eta vicasíñavairahi te visamure ema Je-sucristo. Tacamunuhi vare yátupina etá víjarasiravahi véhica éma. Víchayarehi éma: “Núti níjaracavahi néhicavi, Tata Jesú. Pítipa náquenuvihi, péchanupa píti” vicahenapa.

¹¹ Eta Sagrada Escritura, ani tacahehi: “Nácani ticasíñavanayare mayehe ema nuvaneruyare, tájina náichiraváimahi. Tamutu tiúriyare etá náitaresira”.

¹² Ema Viya, vahi máepuruimahi nácani ticasíñavanahí mayehe. Ticuticacyarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava etá majapanuirahavihi, ticuchucuhahaviya vimutu viti vicasíñavanahí mayehe. ¹³ Taicha ánivare tacahehi etá Sagrada Escritura: “Ema Viáquenu macuchucuhavacayare namutu nácani tipiaracanahí etá máijare táichavenehi etá nacasiñavairahi mayehe” tacahepa.

¹⁴ Tásicha, etá náuchucuhairayare, tacamunu napiaracaya etá máijare ema Viáquenu táichavenehi etá nacasiñavaira mayehe. Táurivaina etá nasamirahi etá náimitucasivana. Tacahe, tacamunuhi vare etá viyana vipaicayare viti

te tamutu avasareana eta vicametarairuiraya nayehe éna. ¹⁵ Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. Tásicha tiúriyare eta majacapirahavihi viti mavaneruana ema Viya” tacahepa.

¹⁶ Váhisera námutuhini nasuapahini eta juca arairuhi véhiruhi vímituquenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahí eta juca nímiturapiana nuvanahiana piyehe” macahepa. ¹⁷ Téhesera te táurihini nasama ena achaneana eta vímiturapiana mayehe ema Cristo, titupiruvanayarehi ticasíñavana mayehe.

¹⁸⁻¹⁹ Esamanuchaha. Ena nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamacarepaipa. Eta Sagrada Escritura, ani tacahehi: “Tamuturipahi te juca apauehe ticasamahuhi. Eta máechajiriruva ema Viya tamuturipahivare tacaitatapahihi te juca taquiñacucujiana te apauehe” tacahepa. Náimatipavare. Váhivare návarahahini nasuapa. Eta máechajiriruvanahí ema Viya májurehi ema Moisés, ani macahehi: “Ímaha, eti israelítana. Nasapihaya nujacapavacayare nuti ena apamuriana achaneana, énaripa ena máesenicanurahanahí. Nuvaraha etsirihaini éti, éneuchavayare eta nuyehe” macahepa. ²⁰ Jararihivare eta apana máechajiriruvahi, májurehi ema víyarahaini Isaías, ani macahehi: “Núti nímerecavaipa nayehe ena nani váhiquenehi náesenicanuhini, váhivare nacayasesereruhini”. ²¹ Ánivare macahe ema Viya: “Tamuhi sácheana eta níchuiravacahi ena nani israelítana. Tétavicavahisera eta namasuapajirivahi. Vahi návarahahini nachavahini eta nuyehe” macahepa.

11

Ánimurianarichu ena israelítana ena tisuapajirahianahi, macuchucureanayare ema Viya

¹ Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tacahe! Éti ímatinuhi nútirichuhi israelítanuhi, mámariéquenenuhivare ema Abraham, émapa ema apanavare náchuca Benjamín. ² Eta acane, tétavicavahi eta máemunasirahavihi ema Viya viti israelítana. Puíticha vahi máinajiacahavihini. Échava éti eta tacayemahi eta Sagrada Escritura eta máichavaquenevahí ema víyarahaini profeta Elías. Ani tacahehi eta mametauresiravahí me Viya eta mayujarasirahi: ³ “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navarahahivare ticapacanuana. Navetataicapavare eta pipena. Nucarinehi núti nítarecahi puiti” macahepa. ⁴ Tásicha, ema Viya majicapapa, ánipa macahe: “Vahi picarichuhini píti. Nararihi siete mil ena ajairana nujanearuanahí, ticasíñuanuanahí. Vahi náisapavahini éna náepuyumirauchahini ema nasiñaraji Baál ena masuapajirairahanatatajihi” macahepa ema Viya. ⁵ Ene vicahéhi víti, vahi vámutuhini viti israelítana masuapajirairahanahí me Viya. Vitiarichaha ánimurihavihi viti manerejiruanahí majapanuquenehavihi. ⁶ Numetacahe: Ema Viya, eta majapanuirahavihi viti israelítana, váhiquene táichavenénahini jácani víchirainahipucaini eta táuriqueneana. Jéhesare, tijapanuhavihi táichavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

⁷ Tacahe, vímaha puiti ena nujaneanana, ánimurianarichuhi ena ticasíñavanahi me Cristo, manerejiruanahi majacapaqueneanahí. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tiviuchahi vahi tijacapacareanaimahi me Viya, tayanapane nácani navarahahi. ⁸ Títauchavapahi eta táechajiriruvahí eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Puíticha ene nacahehi. ⁹ Ema víyarahaini David, ánivare macahehi tayehe eta Sagrada Escritura: “Ena nani, ticasíñavavaicana eta tavayuchirahí eta náimahaqueneana. Ichapemurihi eta nacapiestarairana náenisiracacana. Ichapevaresera eta náichirahí eta tamauriqueneana. Puiti, Tátachicha, pítsivachayare eta náurisamurevahí. Járajapainapa eta pícuñasiravacayare. ¹⁰ Nuvaraha púchuquianaina pícha. Vahi nacucaicutiara eta náitaresira. Tacaetipapaicainapa eta tajitacareva eta napisirahí. Tájinapa nanarasiraimahi” macahehi ema David.

Eta majacapirahi ema Viya ena apanapanenejiqueneana

¹¹ Esamanuchaha. Nuvaraha vahi ecuímijacha tanasiyarehi eta náquipaisirahí ena nujaneanana. ¡Váhiqene énéna tacahe! Puítisera nasapiha ena apavasanana najacapacarehi me Viya, taicha mavaraha máimicatsiriacavaca ena israelítana, apaesa náeneuchavayare eta mayehe. ¹² Puiti tijacapacareanahí me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, téavicavahí eta iúricacarevaipa. Jéhesare tiápajucavapanayaresera eta iúricacarevaya éti, étapa eta náuricacarevayare éna, te nachavapa náeneuchava.

¹³ Németeaca ímatinuhi núti eta nucatuparahaírapa eta nímitusiraheyare eti apavasanana. Táitusiava puiti téavicavahí eta nucunachiravahí eta nucaemataneasirahéhi. ¹⁴ Numetacavacahi ena nujaneanana eta yátupirahí eta ejacapacareirahí me Viya, apaesa nímhahini éna, te najamurachayarepuca eta najacapacarevahí éna apanava, ticutiheanayarepuca éti. Nuvaraha nanerejicavahini nácani náeneuchavahini, apaesa náuchucuhayare. ¹⁵ Páureanasami éna eta náquipaisirahí. Esapihahi éti apanapanenejiqueneana te juca apaquehe, téavicavahí táuriva eta ejacapacarevahí me Viya. Jéhesaresera, téavicavapaini eta tajaraivainahini te visamure te nachavirainahini, náeneuchavapaini éna, náehicapaini ema Cristo. Tímicutijiricavapaini eta navayuchirahí eta náurisamureva ena achaneana te macaechepusiravacaya namutu ena náepenaqueneana tiúrianahi. ¹⁶ Eta natarihirapa puiti ena nujaneanana tinerejicavahí téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranahí ema Viya vicuti eta ichape yucuqui. Ema Abraham macutihi eta táquehequi. Viti israelítana mámariéqueneanaini vicutihi eta tatavavajiana. Ema viáchucaini majacapaqueneripa ema Viya. Tásicha, németeaca namutuyaréni ena nujaneanana, énerichuvare náeneuchavapapucaini nacasiñavahini me Viya te jácani sácheyare, apaesa najacapacarevarepaini éna apanava. ¹⁷ Puiti ena nujaneanana náquipairuvahí, vuíchaha nasiapahini eta náicuchihi te namuri ena machaneranahí ema Viya. Étipa eti apavasanana, esapihaipa machaneraheripa ema Viya. Tíjaracaheripa éma eta táuricacarequene iávihayarehini te majaraivahí eta náicuchinihi ena israelítana. ¹⁸ Puiti étipavaipahi machanerahehi ema Viya. Nutuparacahesera, vahi ecucasiñavavaica eta ítujisiravahí esiapa tayehe eta náicuchihi ena nujaneanana israelítana. Taicha vahi ecachuriacavacaimahi éna eti

iúrvahinéni eta ejacapacarevahi me Viya. Vahi ecuemitisica eta esiapirohái táichahi eta náquipaisiravahi ena masuapajiraírahana. Éti máetumechahqueneana ema Viya; vahi étina étumechahini éma.

¹⁹ Váhivaresera ecupanerecha te esamureana: “Yátupi éna máquijicavahi ema Viya eta namasuapajiraivahi. Tásicha, tinerejicahavipa víti, taicha viúripanahi víti eta máimairahavihi ema Viya” váhinéni tácahehini eta epanereru. ²⁰ Taache, échapava éti apanava, machu ácutiriana ena nujaneanana. Éna, eta náquipaisiravahi tímicutijiricahi ticaechuanahi, táichavenehi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya. ²¹ Ena nujaneanana israelítana, éna tínapucanayarehíni nasiapamuriha ena machanerana ema Viya. Váhisera nacasiñavahini eta mayehe. Éti apanava, tacamunuhivare ecasiñava eta mayehe apaesa esiapahini. ²² Taache, ticaecheravapa eta máurivahi ema Viya, etapa eta matupiruvahi. Tétavicavahi eta matupiruvairahi eta náerajisiravacahi ena masuapajiraírahana. Tétavicavahivare eta máurivahi eta eyehe, eta ímyaniravahi eta ecasiñavairahi eta máurivahi. Nácanisera vahi nacasiñaimahi, macaerajicavacayare. ²³ Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacapavacayarehi éna, machichanaveanavarepa. Taicha éma, tétavicavahi eta majapanuirahi. ²⁴ Taicha éti cape juca eta ítaresira, énerichuvare masuapajirahehi éti, emaesenisirahi ema Viya, tásicha, tájinahinéni ejacapacarevainahini. Esapihasera éti esiapamuriharipa ena apamuriana machaneranahi ema Viya. Ene nacaheyarehi ena israelítana. Éna, te náesenicapa ema Viya, camuriqueneanayarehi ena ticasíñavanaya mayehe. Tisiapanayareva tayehe eta náicuchihi.

Te namutupa ena apavasanana manerejiruanahi ema Viya, tapaenumavainapa náesenicayare ema Viya ena israelítana

²⁵ Tiuri puiti, nuparapenaveana, vahi nuvaraha ecasiñavavaica eta ítupajijiasirava. Tásicha, nuvaraha numetacahe eta juca tayumururevainihi, máimimatichaquenénuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya. ²⁶ Taache, eta nacasiñavaira me Viya, tiúchucuhanayare namutu éna. Títouchavayare eta máechajiriruvahi ema Viya te Sagrada Escritura, ani macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena mājaneanana israelítana eta navainarajivana, máitsivachirayareva eta náitaresirana. ²⁷ Núti nítouchayare eta nutritunehi nayehe eta nápachiasiravacayare namutu eta napecaturana” macahepa.

²⁸ Taache, ena nujaneanana nacatianacapa puiti eta juca véhiruhi. Étasarepa ítujisiavayare éti. Émasera ema Viya máemunacavacarichucha, taicha manerejiruanahi ena náchucanaveanaini. ²⁹ Taicha ema Viya, tamutu eta máijararuanahi, vahi máemepururecaimahi. Máitauchayarehiva tamutu eta máichuarapiana. ³⁰ Éti acane eta ítaresirana, vahi ávarahahini esuapahini ema Viya. Puítisera eta namasuapajiraivahi ena israelítana, ichaperipahi eta majapanuirahéhi éma. ³¹ Énerichuvare éna, te jena sácheyare, majapanuvacayarehi éna, tacuti eta majapanuirahéhi éti puiti. ³² Taicha ema Viya máimatihi eta emutuirahi emasuapajiraivahi éti apavasanana, vítipa viti israelítana. Mavarahasera vicuticacayarehi eta majapanuirahavihi vimutu.

³³ Ema Viya, ¡tétavicavahi eta majapanuraivahi eta viyehe, tavayuchahi eta viúricacarevahi máicha! ¡Tétavicavahivare eta máitupajijiasiravahi! ¡Tétavicavahivare eta macachuriasirahavihi eta máimatiéquenehairahi tamutu! ¡Matupiruvahi éma tamutu eta manerejirisirah! ¡Vahi víturuequenehaimahi vicaicutiara eta mapanereruana! ³⁴ Taicha nájina tímatiequenehaimahi eta mapanereruana. Nájinavare náimitucahini éma. ³⁵ Nájinavare náijaracasi-chahini tájaháinahipucáini, étanainahipucáini máitsirijicavacahipucaini eta máijarasirahí éma. ³⁶ Taicha tamutu eta tatiarihiqueneanahí, tacarichu tásihauqueneanahí mayehe, étaripa eta víjaruaruanahí mayehe, mavaraha táitauchavapaini eta mapanerueruanahí táuriqueneanahí. ¡Máitavacacahi eta vicunachirahí éma! Amén.

12

Vicatuparahahi yátupina víjaracava eta véhisira ema Viya

¹ Tacahe, nuparapenaveana, nuvaraha ácaicutiara yátupina eta majapanirahehi ema Viya. Eta táetaviuchirahí eta majapanuirahéhi, ecatuparalahi íjaracava yátupina eta iáqueheana étapa eta iáchanevana eta éhisiraina émainachucha ema Jesucristo. Tacutihi eta iámavahuhi me Viya. Jéhesare, tétavicavaya eta ecurisamurechiraya éma tayehe tamutu eta ecaematañeasirana éma. ² Énerichuvare eta ítaresirana, vaipa ecuehica eta tayeherepi eta juca apaquehe. Ítsivachapaserá eta epanereruana, apaesa támutupa apanainahí eta ítaresiraina. Tásihá, ímatisarepa eta mavarahaqueneanahí ema Viya, ítucayareva icha eta táuriqueneana. Ecurisamurechayare éma eta íchira eta tatupiruvaqueneanahí.

³ Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máijararuheanahí ema Viya, apaesa tauri eta ecaematañeasiraina mayehe. Nacuija nacasiñavavaica. ⁴ Tacutihi eta viáquehe viti achaneana. Camurianahí eta túnavanahí, támatañepachuhivare. Vahi étainarichuhini eta tátucaqueneanahí. ⁵ Ene vicahehi viti. Camurihavihi, étanaichuhisera eta viáquehehi eta viúrujiasiracacahi eta véhisirahí ema Cristo, vímicatacacairahi eta vicaematañeasirahí éma.

⁶ Ema Viya, apanapanenejihí eta vítucaqueneana eta máijarasirahavihi eta vématanepachuyarehi máicha. Tacamunuhisera vahi vicuemepururecava eta vítucaqueneanahí máijararuhavianahí, apaesa tauri eta vicaematañeasiraya. Te tíjaracahavipuca éma eta vítusirayare vicametarairu, víjaneacavainapa, machu vihapapiricahini eta támiturapiána eta véhiruhi. ⁷ Te tíjaracahavipuca eta vítusirayare vímicataca ena vichamuriana, tatupiruvayarehi te visamure eta vímicatasiravacaya. Nácani náitucahi tímiturecana, vahi nayacujimahi eta náimituresiraya. ⁸ Nácani náituruequenehahí eta náetumechiraya nácani apana, vahivare nayacujimahi. Nácani tíjaracasírecanahí eta náimahaqueneana, tátupiruvayarehi te nasamure eta nacajirahí ena ticamunuwanahí. Nácani cátuparahanahí téchapajiricarahanayare, tivapinavanyare eta náitauchirahí eta natuparacasivahi. Nácani tímicatecanahí ena tijapanucareanahí, tiúrisamureanaya eta náimicataresir ahi.

Eta viúrivahí nayehe ena achaneana ticaecherayare eta yátupirahí eta véhisirahí ema Viáquenu Jesucristo

⁹ Nuparapenaveana, yátupina eta émunasiracacaina ena echamuriana. Vahi apimirahemahí, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana. ¹⁰ Tiápajucavainapa eta émunajirisiracacaina eta echamuricacairahí. Ecunachainapa namutu

ena echamuriana. Yátupina eta epicauchiracahi. ¹¹ Étumechavaina eta ecaemataneasirahi ema Viáquenu. Tavapinava eta esamureana. Tacuija eplujuvavacaina.

¹² Iúrisamurereacavayare eta ejacapiraya eta ecuchapaquenehi. Ecayeheyare paciencia tayehe eta ecatajivairana. Vahi tacuechuquiha eta eyujarasirana.

¹³ Ímicatajiricaca ena echamuriana, tayehe eta nacamunuiravana. Tiúriyare eta ejacapiracaca te epaipiuchacaca.

¹⁴ Te natarihinapuca nácani náehahe, napanajiricahepuca, ejapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

¹⁵ Te natarihinapuca jácani tiúrisamurecare nayehe nácani, éti apanava iúrisamureyareva. Téhesera te natarihinapuca eta ticatisamurecarehi nayehe nácani, ejapanuvacayare éna, íyahayareva éti apana.

¹⁶ Ecurisamurechacacaya ena echamuriana. Vahi ecucasiñavavairica. Ácuticacahi nayehe ena mánsuanahi, váhivare ecucasiñava eta ítusirahi.

¹⁷ Te natarihinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana.

¹⁸ Nacuija educaticha. Te natarihinapuca nacatianacahe eyanauchayare te napena émemunacavayare apaesa vaipa nacucatichahe. ¹⁹ Némunaru-

queneana, te tájahapuca náicharacahe, vahi ecuitsicava. Cápachi mararíhi ema Viya, máimahainepa éma téchayare eta náicuñayare. Taicha ema Viáquenu, ani macahehi tayehe eta Sagrada Escritura: "Nímahainepa núti eta táitsivayare. Núti néchahi eta náicuñayare ena ticaviurevanahi eyehe" macahepa. ²⁰ Ánivare macahe éma: "Te pímaha máecuhapahi mácani ticatianacavihi, pénicayare. Te mamaunepahipuca, pésichayare. Eta máimairainahi eta pémunasirahi, ticatisamurevainapa titsirihainapa" macahepa. ²¹ Vahi ecuisapava ítsicava eta náichiraheya te táiñehiqueneana. Étumechavasera eta íchiraya eta táuriqueneana. Étapa ticaepahayare eta nasemaneva.

13

¹ Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini. ² Eta tacahe, nácani tiácapauchavanahi nayehe ena tuparairucana, tímicutijiricavahi nácapaemachahivare ema Viya. Jéhesare, ticaicuñanayarehi ena téjecapavanaripahi. ³ Taicha ena tuparairucana, vahi étaina tíminacavacahi éna eta nápicararesiraya nácani tíchanahi eta táuriqueneana. Nácanisera ticaviurevanahi, táuricahi tipicanayarehi. Te evarahahipuca iúri nayehe, esuapajirahiya nayehe, tásicha, éna ticunachaheanainapa. ⁴ Taicha ema Viya, émahi macaejacavaca te návacureanahi, náurichayarehi ena achaneana. Téhesera ecaviurevhahi, epicayarehi taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana. ⁵ Eta tacahe, tavarahaichu esuapajirahiyare nayehe ena tuparairucana, apaesa vahi nacuicuñacahe. Tavetijipa esuapajirahiyare taicha éti etuparacasivahi me Viya. ⁶ Tacutiquene tatuparacahehi eta evachachirayare eta impuesto. Taicha ena tuparairucana, natuparacasi-vaichuhi mayehe ema Viya, náitauchiraya eta nacaemataneasira éma.

⁷ Tásicha, ítaurahiyare te jácani nayaseasiraheana eta cuota étapa eta nayaseasiraheana eta impuesto. Epicauchavare nácani tipicauchacareanahi. Émunacavare nácani témunacacareanahi. ⁸ Nacuija ecantevéya. Tituparacahe evachachavaneyare jácani entévehi nayehe. Tituparacahevare

émunacacayare ena echamuriana. Nácani títauchanahi eta juca náemunasira, náitauchahi eta mavanairipi ema Viya. ⁹⁻¹⁰ Te pémunarahihi píti nayehe ena achaneana piparaepiyahai ticutiyarehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apana esena mayena ema apana achane, váhivare pépiyaequenerecaimahi. Taicha nácani témunarahianahi, vahi nacaetemaimahi ena naparaepiyana. Te yátupi eta émunaraivaya, máejerare eta ítauchirayare tamutu eta vanairipiana.

¹¹ Eta tacaheyare eta ítaresirayare. Vaipa véjearacha eta sácheana. Vahi vímacacaracavaimahi. Vitsecavayarehisera taicha viánehipaicha eta jena sácheyare eta máitecapiraya ema véhiruhi. ¹² Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásicha, ínajicapa eta íchaqueneanaini te timapicu. Puiti tiápajucavasera eta iúrivana, étapa eta íchaqueneanaina te tijarahi. ¹³ Ímicapicauchavayare eta ítaresirana. Iúrisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuacahémahi eta tájiparacana. Vaipa iúmeharerecaimahi, váhivare ecapinarurahimahi. ¹⁴ Tásihasera, ímereca eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamurachaqueneanahi eta iáqueheana. Váhivare ecupanerecha eta íchiraya éta.

14

Vahi ecucaeahi ena echamuriana

¹ Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejapanuvacasera eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherepiana ichasiana, vahi ecuacapaemachahini éna. ²⁻³ Nararihi ena tituca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásicha, maechejirechucha eta nanica. Éna, vuíchaha muracanainahichaini tayehé etá véhiruhi. Eti tituca enica tamutu, vahi ecuepuruvaca éna vahi tinicanahi etá vaca. Étipa eti maechejirehi etá enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu. ⁴ Vahi ecuimijachavaimahi étinahi échavaca eyaseserecarahi ena machaneranahi ema Viya. Éma, téchavacahi ena mavanaranahi. Máimararacahi etá taurivahi náicha, macunachavacahi éna. Te váhipuca, émainahi techá etá maechechiracyaca.

⁵ Tacutiquene váhivare ecuepurucaca tayehé etá sache iúrujisiravana eyujarasirana. Nararihi náimijachahi tiúripana te sávarumuahuana. Nararihivare tiúripanahi nasama te lumincumuhuana. Nararihivare tamutuchucha sácheana tiúrihi etá náimairahi. Étipa échinava etá sache éhiruyare.

⁶ Nácani tiyujarauchavanahi te jena sache, ena navarahahi napicaucha ema Viáquenu. Ena apamuriana, vahi táchamesahini nanerejicahini etá sache, éna apanava napicauchahi ema Viáquenu. Ena nacahehi nácani tamutuchucha nanicahi, etá napicauchirahi ema Viáquenu, nahasulupayachahi éma. Nácanisera náepuruhi nanica etá jácani tinicacareana, táichavenehivare etá napicauchirahi ema Viya, nahasulupayachavare éma. Tamutuhi tiuri naicha.

⁷⁻⁸ Taicha vahi vítijiriruváinahini etá vítaresira. Émaripa téchahavihi ema Viáquenu. Émachucha vicaematanearuhi, visuapirayarehi éma te

tamutu. Étaripa eta vépenirapuca, váhivare vítijiriruváinahíni véchinavahini. Émarichuhi téchahavihivare te tamutu. ⁹ Ema Jesucristo, tatuparacahi eta máepeninahaviyarehi, tiápechavayarehivare tichava titareca, apaesa émainapa Viáquenuya viti vítareruanaichaha, énapa ena náepenaqueneanaripa.

¹⁰ Étisera, vahi étinahini tátuparacahehini échavaca eyaseserecarahi ena echamuriana. Váhivare étupicavahini eta épurujirisiracacahi. Échavarichu eta vimutuirayare vicayaseserehi te mamirahu ema Viáquen Jesucristo. ¹¹ Ema Viáquen, ani macahehi te Sagrada Escritura: “Núti acaneripahi eta nítaresirahi; puíticha máepenacacanuhivare eta nutiarihirayare. Tásiba, nútirichu nucatuparahahi nuyaseserecavacayare namutu ena achaneana. Namutu tépuyumirauchuanayare te numirahu. Tímatinuanayare eta yátupirahi núti tituparacanu júesnuhi nayehe, nuti Iáquen” macahepa. ¹² Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Tájina virataha viyumurucahini.

Vahi ecuimiaquipaica ena echamuriana

¹³ Tásiba éti, vaipa ímijachavaimahi étinahi échavaca, eyaseserecarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta iúrivahi nayehe. Tacuija jácani táimiaquipacavaca éna ícha. ¹⁴ Núti, eta mavanaranuirahi ema Jesucristo, numetacahe: Tájina eta tinicacareana tamaeperajicahavimahi eta vinisirahi. Nararishisera ena vichamuriana, tépuruana eta jácani tinicacareana, napisirahi eta tamaeperajisiravacayarehíji. ¹⁵ Tásiba, nuconsejachahe: Vahi ecuimiyusemaca ena nani, váhivare ecuacapaemachahini tayehe eta jácani tinicacare, machu ímicainajiruchavaca ena echamuriana mavachareruanahi ema Cristo eta máepenirahi. ¹⁶ Máchuvare émechajisiava tayehe eta ímatiquenehi tiúri. ¹⁷ Taicha eta véhiruhi ema Viya, vahi étaparacaina jácani vinicaquenerepiana, véraqueneana. Étaripa eta ticunachacarehi mayehe, eta víchirapaipa eta táuriqueaneana, navetijiva nayehe ena vichamuriana. Mavarahahivare vítucavahini tájina tahapapiricahini eta vicurujisiracacahi, apaesa táimiyanavaini eta viúrisamureva vimutu, maicha ema Espíritu Santo. ¹⁸ Éti, te yátupina eta émunasiravacahi ena echamuriana tépuruuanahi eta jácani tinicacare, tiúriyare eta ecaemataneasiraya ema Cristo. Tétavicavahi eta ecurisamurechirahi ema Viya, ecunachacarehivare nayehe ena achaneana.

¹⁹ Tacahe, vitanucayare eta viúrivaya nayehe ena vichamuriana, apaesa vétumechacaca tayehe eta véhiruhi. ²⁰ Vaipa iácapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi eti majanearuuanahi ema Viya. Yátupiquene eta táurivahi tamutu eta tinicacare. Tájina táimanéna. Énasera nácani tépuruuanahi jácani tinicacare, te nanicapuca, ticauyayacare táimiaquipaica tayehe eta pecatu. ²¹ Tiúripanaichu vahi ecunica eta vaca, váhivare ecuera eta cátsiama, machu étina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi. ²² Éti, yátupihi eta esuapirohi ema Viya tayehe eta tinicacareana. Ejaneacavasera te mamirahu éma. Tétavicava eta náuricacareva nácani náimatihí eta náurivahi te nasamure, vahi nacaecahirahihini énajivainahini. ²³ Nácanisera tísapavanahí tinicana, tiávamirahuanahí, énajivapa tímiaquipaicavanahí eta nanisirahi, taicha vahi tátupiruvahini eta nanisirahi. Tamutu jácani vahi tátupiruvahini eta visamure eta víchira, pecatu-anahi éta.

15

Ecurisamurechaya ena eparaepiyana. Vahi étijiricavaimahi ecaurisamurechava.

¹ Tacahe, viti vímatianahi eta táurivahi eta vinisirahi eta jácani tinica-careana, tituparacahaviripa véchapajiricavacaya ena vichamuriana tímijachanahi vahi táurihini eta nanisirapuca. Vácyeho paciencia nayehe. Vaipa vipederechahini étachucha vicurisamurechirava vítijiricáva. ² Emutuchuchasera éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapiraina eta véhiruhi. ³ Taicha ema Cristo, vahi mácarichuhini macurisamurechavahini. Éma, ticurisamurechahí ema Maiya te tamutu. Eta tacahe, nacatianacahi ena achaneana váinajarajqueneana. Tásicha, títauchavahi eta tametarapi eta Sagrada Escritura, ani tacahehi: “Núti nímiyanavahi eta nítouchirahi eta pivanairipiana eta nuyehe, tayanapane eta náumehairuananahi ena piánaranahi” tacahepa eta Sagrada Escritura. ⁴ Ema Viya tivanecahi ena víyarahanaíni profetana nájuchahi eta máechajiriruvana te Sagrada Escritura. Éta, ticamapuravacareyarehi eta táimitusirahaviyarehi, apaesa táetumechahavi eta véhisira, tacurisamurechahavinavare. Tímitucahavihivare yátupina eta vicasíñava me Viya eta máijarasiraparaca eta viúricacarevaya. ⁵ Puiti nuvaraha máijaracahehini ema Viya eta evarairahi ecutiya ema Jesucristo eta mapanereruana, étaripa vahi mácarichuhini macurisamurechavahini. Ema Viya máetumechahehini emutu, macurisamurechahevaréni te jácani íchararacavanapuca, apaesa táuri eta ecachanecacaira. ⁶ Nuvarahavare ácticacahini eta epanereru. Tásicha, te iúrujisiravana, étanainarichuhini eta iáhuana eta ecunachirayare ema Viya, Macaiyaquene ema Viáquenu Jesucristo.

Ema Pablo ticatuparahahi ticametarairuyare nayehe ena apavasanana

⁷ Tacahe, nuparapenaveana, ejacapacacayare eti echamuricacanahi, apaesa macunachacarehi ema Viya nayehe namutu ena achaneana. Ecutiyare ema Viáquenu Jesucristo eta majacapirahavihi víti. ⁸ Écharichuhivare eta máucupaisirahi éma te juca. Tétavicavahi eta mamansuvahi eta máimitusiravacahi ena majaneanana israelítana. Mavarahahi máimimatichavaca éna eta máitauraivahi ema Viya tamutu eta máechajiriruvana máijararuvanahi nayehe ena viáchucanaveanaini. Váhiquene tivayuarahi. ⁹ Énerichuvare máimimatichahi ena apavasanana eta majapanuiravacahi ema Viya apaesa nacunachayarehi éna apanava éma. Títauchavayarehi eta máechajiriruvahi ema Cristo eta Sagrada Escritura, ani macahehi: “Puiti núti, énapa ena nuchaneranahi apavasanana vicuticacahi eta vicunachiravihi, piti Tata, vijirauchiravihi eta vipicauchiravihi”. ¹⁰ Te apana Escritura, ánivare tacahé: “Eti apavasanana, étipa eti israelítana, étamurihéipa ecuticacainapa eta iúrisamurevaya me Viya”. ¹¹ Te apanavare Escritura, ánivare tacahé: “Étamurihénapa eta ecunachirahi ema Viya, eti apavasaqueneanahi. Váhivare ínajicahini eta ecunachiraya éma”. ¹² Eta májurehi ema víyarahaini Isaías te Sagrada Escritura, ánivare tacahé: “Tíjahúchavainapa ema Cristo, te nájina nacuchapaimahi. Éma, aquenucayare nayehe ena apavasanana. Macari-chuyare éma ticasíñavanayare mayehe, eta nacuneraya éma” tacahepa.

¹³ Ema Viya, tétavicavahi eta macunecarevahi, ticasíñacarehivare. Tásicha puiti, tétavicavahi eta nuvarairahi máijaracahéni éti eta tavayuchiraina eta iúrisamurevaina, tavayuchirainavare eta ecañáira mayehe, apaesa tanaracaina tamutu eta epanereruana. Eta mávahásirahehi ema Espíritu

Santo, máetumechahéni muraca apaesa táetaviuchiravaya eta ecasiñavai-rayare mayehe ema Viya eta máijarasiraparaca eta iúricacarevaya.

¹⁴ Tiuri puiti, némunaruqueneana nuparapenaveana, nucasiñavahi nútí eta eyehe, eta étaviuchiraipa eta iúriva étapa eta ímatiequenehairahi tamutu eta máimiturapiana ema Viáquenu. Yátupihivare ítucahi econsejachacaca.

¹⁵ Nucasiñahehivare eyehe puiti juca eta níjarasirava nucajurehe eta juca nucartane étapa eta juca táchajisihaqueneanahí, apaesa vahi ecuemitisica, taicha nutuparahahi me Viya eta nujaneasiraheyá eti apavasanana. ¹⁶ Éma, tituparacanuhi eta nuyanirayare nupaipica te tamutu avasareana, nucametarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanuhivare eta nujaneasiraheyare emutu eti esuapanahí éma. Tásicha, nuvaraha nútí nímerecaheyá te mamirahu ema Viya te jena sache ticutiyarehi námavahuhe. Éma tiúrisamurénapa eta majacapiraheyá, taicha máepachiaruhéipahi ema Espíritu Santo.

¹⁷ Eta mavanaranuirahi ema Jesucristo, nucunachava eta nucaemataneasirahi ema Viya. ¹⁸ Váhisera nucasiñavaimahi, nucuneuchavaimahi tayehe eta jácani nacaemataneasiranahí ena apamuriana mavanarana. Nútisera nítouchahí eta nucatuparahairahi me Cristo eta nímimatichiravacahi ena apavasanana eta nasuapirohí ema Viya, náehisirapaipahi eta nímiturapihi étapa eta núrivahí eta nayehe. ¹⁹ Nímechavacahi ichape eta tiáramiccareana eta nítupajijiasirava maicha ema Espíritu Santo. Tacahehi eta nítouchirahi tamutu eta nucametarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchecuhapa tayehe eta departamento Ilírico.

²⁰ Taicha ichape eta nuvarairahi nítecapauchaya tamutu avasare, te jácani nájinaichaha nacametarairuhini. Nuvarahaya nucametarairuyare nayehe ena achaneana tájinahí nasamihahini eta máijare ema Cristo. ²¹ Nítouchahí eta táchajiriruvahi eta Sagrada Escritura, ani tacahehi: “Náechapa puiti eta máijare ema Cristo ena achaneana tájinaquenehi apaesainahini nasamairi-ricahini eta máijare. Náimaticquenehapa eta máimiturapi, éna eta namaitucaquenehi namasamaquenehivare” tacahepa.

Ema Pablo mapanerechapa tiyanayare te Roma

²²⁻²³ Ichapemurihi eta áñoana nuvarairahi nupaipiuchahe éti, nucachaneheya apaesaina. Váhisera nítujicava, taicha eta nupaipiuchirapahi eta apava avasareana. Puítisera nítouchapa eta nupaisirahi tayehe eta avasareana. ²⁴ Tásicha, puiti nupanerechahi nétavauchachaheyare achichu juca, nuyanirayá te avasare España. Nuvaraha vicaurisamurechacacainapa. Te támutupa eta nucachaneraheya eta nétavauchiraheyare, németeaca ímicatacanuyare jácani eta nuyanirayareva. ²⁵ Nuyananumayaresera te Jerusalén. Nunapanumayare eta nanaquiruvana ena vichamuriana nayeheyare ena apamuriana vichamurianahivare ticavasanahí ánaqui. ²⁶ Taicha ena vichamuriana te Macedonia, énapa ticavasanahí te juca Acaya, tinaquiquicavanahi eta náimicatasihaya ena apamuriana vichamuriana páureana ticavasanahí te Jerusalén. ²⁷ Tétavicavahi eta náurisamurevahí eta nanaquisiravahí, navarairahi títsirijicavanaya nayehe. Táurica eta juca náitsirijisiravaya, taicha ena nachamuriana israelítana tímimatichanahí ena apavasanana eta máimiturapiana ema Viáquenu. Tásicha puiti, énapavaya ena vichamuriana apavasanana, nacajiyare ena nachamuriana israelítana. ²⁸ Tacahe, te támutupa eta níjarasiravacayare ena vichamuriana páureana eta nanaquiruvana ena nuchamuriana te juca, nuyaninavarepa nucaijuhe te España. Nétavajicainapasera eta ara eyehe. ²⁹ Németeaca eta nítecapauchi-

raheya, ichapeyare eta viúrisamurevaya eta vétumechiracacayare taicha eta véhisirahi ema Cristo.

³⁰ Nuparapenaveana, nuyaseacahe te máijare ema Viáquenu Jesucristo étapa eta vémunasiracacahi maicha ema Espíritu Santo. Nuyaseacahe ímicatacanuhíni eyaseuchanu me Viya te eyujarasirana. ³¹ Eyaseacahini eta majaneasiranuhini eta nítecapauchiravacayare ena masuapajirairahanahi ticavasanahi te Judea. Étapa eta juca námaqueneyarepahi nanaquiruvanahi ena vichamuriana, táurihini eta najacapirayare ena vichamuriana ticavasanahi te Jerusalén. ³² Eyaseacahivaréni ema Viya másapanuhini eta núrisamurevainahíni eta nítecapauchiraheya, ímicatasiranuhíni eta nítujisiravaina nucachanehe. ³³ Ema Tata Vicaiyaquene, tétavicava eta macanarasirahi tamutu eta vipanereruana. Nuvaraha puiti yátupina esamava eta macanarasirahehi éti. Amén.

16

Ema Pablo máemechajirisihá te macartane namutu ena máimatiqueneana machamuriana

¹ Nutuparacahe emutu échapajirisinanu eta suítecapauchiraheyare esu apama vichamuri Febe. Taicha ésu, tétavicavahi eta suítatiravacahi ena vichamuriana te avasare Cencrea. ² Tauri eta ejacapiraina esu, evapinavayare te máijare ema Viáquenu Jesucristo. Ímerecayare eta yátupirahi eparapehivare ésu eta echamurirahi tayehe eta véhiruhi. Ímicatacayare te jácani sucamunuiravana. Taicha ésu, camurianahi ena suímicataruanahi. Nútiripa, tétavicavahivare eta suímicatasiranuhi.

³ Échajisinanuyare ema Aquila ésupa esu mayena Priscila. Vahi némiticavaca éna eta nucachamurirahi tayehe eta vicaemataneasirahi ema Jesucristo. ⁴ Ena, vahi nacatiequenehahini eta náitaresirana eta nacatiuchiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana. ⁵ Échajisinanuvare ena apamuriana vichamuriana tiúrujicavaráhianahi te napena ema Aquila ésupa esu Priscila. Échajisinanuvare ema némunaruquenehi nítunacasare Epeneto. Éma tínapucahi majacapahi ema Cristo apaicape te nuyanapa te Acaya. ⁶ Échajisinanuvare esu María. Nusamairiricahi eta ichapemurirahi eta suímicatasirahehi éti. ⁷ Échajisinanuvare ena nujaneanana Andrónico émapa ema Junias. Éna, nuchamurianainihi eta vicaeratairahi te cárcel. Tétavicavahi vémunasirahi éna viti apóstoleana. Éna, tínapucanahi nuyehe eta náehisirahi ema Cristo.

⁸ Échajisinanuvare ema Amplias, émarichuvare némunaruquenehi eta véhisirahi ema Viáquenu. ⁹ Échajisinanuvare ema Urbano, ema vichamurihi tayehe eta vicaemataneasirahi ema Viáquenu Jesucristo. Échajisinanuvare ema némunaruquene Estaquis. ¹⁰ Échajisinanuvare ema Apeles. Yátupihi éma eta máimeresirahi tiúrihi eta máehisirahi ema Cristo. Échajisinanuvare ena machichanaveana ema víyarahaini Aristóbulo. ¹¹ Échajisinanuvare éma apanavare nujaneanana Heredión. Énapa ena machichanaveana ema víyarahaini Narciso, tétavicavahi eta nasuapajiraivahi éna me Viáquenu Jesucristo. ¹² Échajisinanuvare esu Trifena ésupa esu Trifosa. Énarichuvare ticaemataneacanahi ema Viáquenu. Échajisinanuvare esu vémunaruquene vichamuri Pérsida. Tétavicavahivare eta sucaemataneasirahi ema Viáquenu. ¹³ Échajisinanuvare ema Rufo. Éma, tétavicavahivare eta masuapirahi ema

Viáquenu. Échajisinanuvare esu maena. Ésu, tímicutijiricavahi mémehanini eta nuyehe ésu. ¹⁴ Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tiúrujicavarahiana te napena. ¹⁵ Échajisinanu ena Filólogo, ésupa esu Julia, ésupa esu Olimpas émapa ema Nero, ésupa esu maparape. Échajisinanuvare ena vichamuriana tiúrujicavarahiana te napena.

¹⁶ Puiti eta néchajisirahehi emutu eti nuchamuriana, nuvaraha nétserarecahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

¹⁷ Nuparapenaveana, nuvaraha ecuneuchavare nayehe ena tipanerechanahi típutsimurihaheana taicha navarahahi tihapapicaheana eta te éhiruhi. Ena nani nacatianacahi eta juca vímiturapihi iárvavahuhi. ¹⁸ Érajicavayare eta nayehe, taicha éna vahi émainahini nacaematacavahina ema Viáquenu Jesucristo. Énajivachucha navaraha tiúrichavana. Tétavicavahivare eta náitusirahi téchajiricavana. Títivehi eta náechajirisirava. Étachuchasera navarahahi tivayuarecana te nasamureana ena achaneana tijimuyapanneruana. ¹⁹ Namutuhi tímatiheana éti, náechahivare eta esuapajiraivahi. Eta tacahe, tétavicavahí eta núrisamurevahí ícha. Ecjurucaseraíni eta íchirahi eta táuriqueneana. Vahi ecuquicha eta tamauriqueneana. ²⁰ Nuti nucasiñavahí me Viya, máimicatasiraheya íputsicavaneya ena machanerana ema Satanás. Tásiha, tiúriyare eta íchararacavahí maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

²¹ Téchajicahe ema Timoteo, ema nuchamurihi eta vicaematacavahí ema Viáquenu. Énapa ena nujaneanana: ema Lucio, ema Jasón, émapa ema Sosípater.

²² Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

²³ Téchajicahevare ema Gayo, ema nítecapaurehi te mapena. Étarichuhivare viúrujisirarevahí te viyujarasirana. Téchajicahevare ema Erasto, ema tayehehi secretario tésorerohi eta te alcaldía. Téchajicahevare ema viparape Cuarto.

²⁴ Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

Eta táichecuaraqui eta macartane ema Pablo

²⁵⁻²⁶ Nuvarahahi vácoticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tacahehi eta nucametarairuolahí, nímitucavacahi namutu ena achaneana eta majacapiravacahi ema Viya eta nacasiñavirahí me Machicha. Acane eta táepaniravahí eta apaquehe, ema Viya Eterno mapanerechapa eta majacapirayare namutu ena achaneana ticasíñavanaya eta mayehe. Ena israelítana énapa ena apanapanenejiqueneana achaneana, namutu tijacapacareanayarehi. Étaripa eta náechajisihaqueneanahí ena víyaranhanaini profetana tayehe eta Sagrada Escritura. Nájinaserá nácaicutiarahini. Mapaenumavapa tímimatchanuhí nútia ema Viya eta mapanereruhi.

²⁷ Ema Viya, ¡tétavicavahí eta máitupajijiasirava! ¡Macarichuhí tijirauchacarehi ticunachacarevare tayehe tamutu! ¡Máitavacacayarehi eta vihasulu-payachirayare éma tivanecahavihi ema Jesucristo eta macuchucuirahaviyarehi! Amén. Tamutupa.

Eta macartane ema Apóstole Pablo nayehe ena machamuriana ticavasanahi te avasare Corinto, ticaijare **1 CORINTIOS**

1-2 Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe nútì émapa ema vichamuri Sóstenes, eta juca carta eyehe eti vichamuriana ecavasanahi tayehé eta avasare Corinto. Puiti éti iávaháruripa ema Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaematanacayarehi. Ecutiripa ena apamuriana vichamuriana ticavasanahi te tamutu avasareana, taicha ecasifíavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi. **3** Nuvaraha macatajicahehini ichape ema Tata Vicaiyaquene, émapa ema Viáquenu Jesucristo; náijaracahéhini táurivaina eta epanereruana.

Viúricacarepa ichape maicha ema Cristo

4 Núti nuhasulupayachaparaca ema Viya táichavene eta majapanuira-heripa. Eta iávahásirahi ema Jesucristo, ichaperinehi eta iúricacarevahi. **5** Tíjaracaheripa eta ítupajijiasiravahi eta échajisirana, échemaharipihi tamutu. **6** Écharipa eta numetacahequenehi eta máijarasiraheya ema Cristo eta iúrivaya. Puítipa tíjaracaheripahi. **7** Tamuturipa tíjaracahehi ema Viya. Tájinapa iátaji-vainahini eta ítupajijiasiravaipahi. Étanecha ecuchapayare eta jena sácheyare machavirayare ema Viáquenu Jesucristo. **8** Puiti ema Viya téturechaheyare puiti juca vicaijuheyare eta ítaresiraya apaesa tacuija ecuavamirahu te jena sácheyare machaviraya ema Viáquenu Jesucristo. **9** Ema Viya vahi mahapapicaimahi eta mapanereruanahi. Yátupi eta máitauchirayarehi eta máichuirahéhi, mavarahahi iúrujicavayare ecachanenapa ema Machicha Jesucristo ema Viáquenu.

Vahi táurica vicaerajicaca

10-11 Nuparapenaveana, ¿tájahapapuca ecayema éti vaipa tétopicava eta epanereruana? Núti nusamairiricahi eta íputsiasiravavacaripa. Taicha tacahéhi eta nametasiranuhi ena suchichanaveana esu vichamuri vénaraha Cloé. Nuparapenaveana, nutuparacaheyare te máijare ema Viáquenu Jesucristo, táciticáca eta epanereruana. Nuvaraha étanainarichu eta epanereruana. Vaipa ecuiputsiacaca. **12** Taicha ani tacahéhi eta nusamairirisirahehi. Ena apamuriana ánipaji nacahehi: “Víti viúripanahi viti véhicanahi ema Pablo”. Ena apamuriana énerichuvare nacahehiji: “Vítira viúripanahi viti véhicanahi ema Apolo”. Ena apamuriana énerichuvarejí nacahehi: “Jéhevaresera víti viúripanahi viti véhicanahi ema Pedro”. Ena apamurianavare nacahepaji: “Vítira viápajupanavahi viúripanahi viti véhicanahi ema Cristo”. **13** Váhira tiuri énenahini ácahehini, taicha ema Cristo vahi apapipijinahini eta máimiturapiana. Nuti Pablo, váhira nútinahini népenahini te crusu íchavenénahíni éti. Eta ecaicachasirahi, váhivare étainahini te níjare. **14-15** Tiúririchuhi vahi nútinahini nícacasicahéhini éti. Nájina tiyunacaimahi eta nútinahini nícacasicahéhini te níjare, náepiyaequenehanuhipucaini. Yátupi nícacasicavacahi

ema Crispo émapa ema Gayo. Téhesera te máijare ema Cristo eta ní cachasisiravacahi. ¹⁶ (Néchavapasera eta ní cachasisirahivare ema Estéfanos, énapa ena machichanaveana. Váipasera néchava nájahapuca nácani ní cachasiruanahi.) ¹⁷ Ema Náquenu Jesucristo tituparacanuhi nucametarairuyare eta viúchucuirayare máicha. Váhira étainahini mavanecanuhini ní cachasircalahini. Tacahe, tatupiruvahi eta nucametarairuirahi. Váhisera nuvayuyujicaimahi nútinapucaini nápajucavahini eta nusuapacareva, tásápihapapucaini vahi tacusuapacarehini eta máepenirahi ema Cristo te crusu.

Ema Viya máijaracahi ema Machicha Jesús eta máitupajijiasiravahi

¹⁸ Natiarihihi ena achaneana náimijachahi súnsurupiana eta juca nucametarairuirahi eta viúchucuiraya taicha eta máepeninahavihi te crusu ema Viáquenu Jesucristo. Ena nani masuapajirairahanahi énara táiturevanayare eta ecuñaraqui. Vítisera viti macuchucureanayare, tiúrihi visama eta yátupiqueneana tásihaqueñehi me Viya. ¹⁹ Ema Viya ani macahehi eta máechajirruva eta te Sagrada Escritura: “Tamapurijihi eta náitucaqueneanaini ena tíupajijahanainihi, énaripa máehicanurahanahi. Súnsurupihi nuyehe eta náechemaraivanahi” macahepa.

²⁰ Eta tacahe puiti, tájina tacunachacarevainasami me Viya eta máitucaquenehi ema achane tíupajijiacavahi, mácani máestropuca, tayanapanne macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájina vahi étaparacaina mayehe ema Viya eta júcana taicha súnsurupianachucha eta mayehe éma. ²¹ Tamutusera eta mapanereruanahi ema Viya, téavicavahi eta tapachinavavacahi. Éma, tivanecahavihi viti vicametarairuanayare. Nararihi ena tisuapanapahi eta vimetarairuana. Énaripa tiúchucuhanayarepahi. Tayanapanne ena apamuriana náimijachahi súnsurupianahi eta vimetarairuana. Ena nani achaneana, tamapuriji eta náechemaraivanahi, taicha vahi táimimatichavacahini me Viya. ²² Ena nani nujaneanana israelítana náepiyarichuhi tiyaseserecana, navaraha náimaha eta tiáramicareana tiásihana me Viya. Ena griégoana eta nayeherepi natanucahi eta tápajusiravaya eta náechemaraivaya. ²³ Eta tacahe, vahi tasuapacarehini nayehe eta vimetasirahi eta viúchucuirayare táichavene eta máepenirahi te crusu ema Cristo. Ena nujaneanana titsirihanahi eta juca, tásicha náepuru náehica éma. Ena apamuriana apavasanana náimijachaichucha súnsurupiana eta juca. ²⁴ Natiarihisera ena tisuapanapahi eta máichuirahi ema Viya, ena israelítana énapa ena apavasanananahi. Náimatiripa ema Cristo, eta vanairucairahi mayehe ema Maiya taicha éma tijaracahi ema Machicha eta máitupajijiasiravahi étapa eta matumeva. ²⁵ Tayanapanenesera te súnsurupihipuca nasama ena achaneana eta vimetarairuana, étasera tiápajucavahi tiúripanahi tayehe eta náitucaqueneanahi éna. Tayanapanevare náimijachahi mamaratahairainahi ema Viya, émahisera túmepanahi nayehe namutu éna. ²⁶ Ímativaichuhi, eti nuparapenaveana, te táchuhahépa ema Viya, vahi ámutuhini ímatihini eta táichararacavahi eta ítaresirahi te juca apaquehe. Váhivarenéni ámutuhini tuparairucahevacainahini. Váhivarenéni ámutuhini ecaimahaquenevacahini. ²⁷ Tayanapanne ena achaneana náimijachahepuca súnsuhéna éti, manerejiruhehisera ema Viya, taicha mavarahahi máimicatsiriacavacayarehi ena tímijachavanahi tíupajijiacavana. Tinerejicaheripa éti váhirichu túmejicuhénahini, mavarairahi máimicatsiriacavacayarehi ena tímijachavanahi túmejicuana. ²⁸ Tayanapanne eta épurucarehi, náimijachavare máiturerehe, manerejiruhehisera ema Viya.

Eta tímicaecherachavacahi eta taejecapiravahi eta napanereruana mayehe ema Viya, taicha vahi énaina matanuca ema Viya ena titupajijiacavana, aquenucarahaná, ticaimahaqueneanapuca. ²⁹ Eta juca mapanereruhi ema Viya, mamavarairahi nacuija nacucasiñavavaica te mamirahu éma, náimijachirapuca matuparaca éma nayehe éna. ³⁰ Puítisera éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, ichaperipa eta échemaraivahi máicha. Sántuheripa máicha, ecutipaipa eta masantuvahi éma. Iúchucurepaipahi tayehe eta ticaviurecarevana. ³¹ Tavaraha vítaucha eta taechajiriruvanahi eta Sagrada Escritura, ani tacahe: “Vahi vítijivaimahi vicunachava taicha eta vitupajijasiravana. Éma vicunachayare ema Viáquenu taicha ema tiúrichahavihi”.

2

Ema Pablo macametarairuhi eta mápenirahi ema Jesucristo te crusu

¹ Nuparapenaveana, échavarichuhi te nítecapauchahénapa cape juca viásinequenehi. Eta nímitusirahehi eta máechajiriruva ema Viya, tiúrihi eta níminecapaequenehairahehi, tamutuhi ticaicutiaracare eta néchajirisirahehi. Vahi tácajeraphihini eta néchajirisirahehi. ² Taicha nuvarahahi nímimatichaheyare ema Jesucristo, nuvarahahivare yátupinahini ácautiara eta masivachaquenehi macatajivairahi éma eta mápenirahi te crusu íchavenehi éti. Eta tacahe, nupamicavahi núti eta nímitusirahehi. ³ Núti, te nímitucahénapa, vahi nítupajijihahini eta nusamiravahi. Nupícacarácavahi támapurujihini eta nímitusirahehi. Ichape eta tayayacarevahí eta náquehe taicha eta néñamiravahi vahi tacusuapacarehini eta eyehe eta nímiturapiana. ⁴ Núti, vahi nácutihini mácani achane mavayuyupica eta máechajirisirava. Étisera ecaicutiaravanehi eta nímitusirahehi maicha ema Espíritu Santo. Ecaicutiaravanehi étairahi eta yátupiqueneana tásihaquevaneana me Viya. ⁵ Taicha nuvarahahi yátupina muracaina eta ecasiñavairahi mayehe ema Jesucristo taicha ímatihí te esamureana eta yátupirahi másihairahi me Maiya. Vaipa ecuehica eta nayeherepianaini ena viáchucanaveanaini.

Ema Espíritu Santo tímimatichahavihi eta mapanereruana ema Viya

⁶ Étisera ánaquiaparipa eta éhisirahi. Ímatiequenehávacaripa. Tacahe, táuricapa puiti vímitucaca eta apamuri échajirirucava titucacareana ticajerarapianahi. Eta juca titucacareana tiásihanahi me Viya. Vahi tásihaque-nénahini mayehe mácani vicutiquene achane. Énainahipucaini tásihahini nayehe ena ichapequeneana aquenucana, taicha vahi tánasimahi eta napane-reruana éna. ⁷ Eta júcana titucacareana tásihaquevaneanahi me Viya, mapanerueruana te tépanavainapa acanevaca. Ánaquiaparipasera eta macaerajisirahini. Tapaenumavapa puiti máimicaecherachinahavihi viti achaneana, mavarairahi visiapaya tayehe eta mávasa anuma. ⁸ Ena aquenucanahi, vahi náimatihini eta mapanereruana ema Viya. Nájina émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhipucaini nacuémétatacrahini te crusu ema Viáquenu. Tájina náimatihini eta émairaquénehi Viya, tiásihahi te anuma. ⁹⁻¹⁰ Vítisera víti, máimitureanahi ema Espíritu Santo. Vímatihí eta mapanereruana ema Viya. Émahi ema tímimatichahavihi taicha macarichu máimatihí eta tayumu-rurevanahi te mapanereruana ema Viya. Taicha ani tacahe eta Sagrada Escritura: “Tétavicavaya eta náuricacareva ena nani témunacanahi ema Viya.

Taicha máijaracavacaya eta náicuchihi natuparahahi maicha éma. Máimahasi-richaha eta tacutiquenehi eta náuricacarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

¹¹ Viti achaneana, vicarichu vecha eta vipanereruanapachu tásihaque-neanahi te visamureana. Nájina apanaina náratahahini naecha. Ene mac-ahehi ema Espíritu Santo. Macarichu éma téchahi tamutu eta mapanere-ruanahí ema Viya, taicha émarichuhi máchanevahi. ¹² Víti, tájina vahi vítiji-vainahini vímipanerechavahini mayehe ema Viya. Émasera ema Espíritu Santo tímitucuhavihi tamutu eta titucacareana tásihaqueneanahí me Viya, taicha mavarahahi véchayare. ¹³ Eta tacahe, eta juca vímiturapianahí tásihaqueneanahí mayehe ema Espíritu Santo. Vahi tásihaquenénahini te vipanereruanahí. Táitusiava, ena vímitureanahí natupiruvahi najacapa taicha mávaháruanahí ema Espíritu Santo.

¹⁴ Énasera nácani achaneana vahi mávaháruanaina ema Espíritu Santo, vahi najacapaimahi eta máimiturapiana, taicha náimijachahi súnsurupiana. Váhivare nárataha nacaicutiarahini, taicha ticamunucarehi eta máimitusiravacai-nahini ema Espíritu Santo. ¹⁵ Vítisera viti yátupiqueneanahí mávaháruana, vicaicutiarahi tamutu eta máimiturapiana éma. Énasera ena máehicaranahí, vahi nacaicutiaraimahi eta apanairaipahi eta viyeherepianahí víti.

¹⁶ Tacahehi eta táchajiriruvana eta Sagrada Escritura: “Nájina émanaina achane máemunahiricavahini máimatihini eta mapanereruanahí ema Viáquenu. Tavetijicha májina mácani máitucuhini máimituca ema Viya eta mamaitu-caqueneanapucaini” tacahepa. Nájinavare nácutihavihíni víti vicaravahu-quenehi eta máechajiriruanahí ema Cristo. Vímatiripa eta mapanereruanahí.

3

Vimutu vicompañerocaca tayehe eta vicaemataneasirahi ema Viya

¹ Nuparapenaveana, cape te nítecapauchahénapa, vahi tacajerapahini eta nímitusirahehi. Tacutihi te vicajuruca eta amuya, vépiyayasinahí eta vímitusira. Tativahi nímitucahe eta epaisirayare éhisirayarehi ema Jesucristo. Taicha éti vuíchaha támputuhini ínajicahini eta tajamurachaqueneana eta iáqueheana. Vuíchahavare éhicahini eta mavarahaquene ema Espíritu Santo. ² Vahi námainunujiachehini eta nímitusirahehi. Éti ecutihi ena nácani amuyana tiájicanarichaha. Vahi námainucavahini nanicahini eta cheruji. Ene ecahehi éti, vahi iámainucavaimahi ácaicutiarahini támputuhini. Puítirichucha vuíchahavare áratahaimahi ácaicutiarahini eta apamuriana titucareeanahí murácapanánahí. ³ Taicha éti vuíchaha támputuhini ínajicahini eta tajamurachaqueneana eta iáqueheana. Taicha ecapinarujiricacaichaha, ecatianajiricacaichaha, íputsimuriajiricacaichaha. Eta epanereruanahí ecutirichaha eta napanereruanahí ena apamuriana achaneana masuapajirairahanrichaha. ⁴ Éti épurujiricacahi nayehe ena echamurianahí, ánipa ecahe: “Víti viúripanahí viti véhicanahí ema Pablo”. Éti apamuri ecahepa: “Vítira viúripanahí viti véhicanahí ema Apolo”. Eta juca ecahehi, tacutirichaha eta napanereruanahí ena apamuriana achaneana masuapajirairahanrichaha.

⁵ Váhira nútinayarehi éhica nuti Pablo. Váhivare émaimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi víti vímitucahehi. Tamutuhisera mayeheanahí ema Viya eta esamaqueneanahí. Ema Viáquenu tijaracahavihi eta vituparaphapachuyarehi. ⁶ Yátupi núti nínapucahi nímisamahehi eta máechajiriruva ema Viya.

Te néquenepa, títecapauchahepa ema Apolo, émapa titametacahehi tamutu. Émasera ema Viya, ema ticajurusinahehi eta esuapajiraivanahi. ⁷ Táitaurevaquene nútihinéni névacahi te esamureana eta echajirirucavana, tájinaserahavi nútina néchahe. Émaripa ema Apolo, ema titametacahehi, váhivare émainatéchahe. Émara ema Viya, ema téchahi tamutu eta juca. Éma ticunachacare. ⁸ Núti, émapa ema Apolo, vicuticacahi vínumahui etavicaematanane. Vituparaphapachuhisera. Ema Viya tijaracahaviya etavícuchianapachu, te tiúrihi etavicáematanérana. ⁹ Víti manusurahavihi ema Viya. Éti ecutihi etasucurecana etamacajurusirahehi ema Viya.

Eta éhisirahi ema Jesús tacutihi etanáepiyasirahi etachapequene peti. ¹⁰⁻¹² Tativa, ema maestro tépiyarecarahi peti arquitecto, éma tinacucha etalabriyu etatatumearaya etayúchama. Tásicha, ena apamuriana máestroana, énapatiúnachana etayúchama étapa etatamaiquehe. Tiúriyare etanacaemataneraya. Nanerejicayare etatáuriqueneana tasivachaqueneana, navairahitijanunucayarehi etanáematane. Váhiyananacaimahi etatijuchacareana, yucuqui, muiji, cáchipaca; apaesa vahitacuiju etpeti. Taicha títecayaramáimahapanaya ema ticayeheyarehi etpeti. Tásicha, temáimahapa tiúrihi, mavachachainapa namutu ena ticaemataneanahi. Nutimanerejirunuhi ema Viya etanímimatichirahuehi ema Jesucristo, éhicapaipa éma. Puíticha etaeccajuherapaipa te anuma, nájina apanaina naratahahini námahehini. Macarichuhi marataha éma. Puiti, ena apamuriana manusurana ema Viyatímitucahehi apaesa tajuruca etesuapirahi. Tacamunuseratiúriyarehi etanáimitusiraheya. ¹³⁻¹⁴ Taicha tatarihiyare etasächeyare máimahayare ema Viya etavémataneanapachu, te tiúripuca. Te tiúrihi etavémataneanahi, ema Viyatijaracahaviya etatáitsivayare etavématanerepihi. Téhesera vahitáurihini, etamayucune tajuchayarehi etavémataneanahi. ¹⁵ Tacamitiequenehayare tamutu jácani tájina tacunachacarevainahini. Tájina táimaequenénaimahi. Yátupi viúchucuhahi víti, tájinaseravímaequenéhaimahi.

¹⁶⁻¹⁷ Écharichuhi éti etamávahásirahehi ema Espíritu Santo. Éti ecutihi mayehehi templo ema Viya, étarichuhi etamáucupaisirarehi máemunaruquenehi. Éma, máicuñacayare muraca nácanitijararecanahi éta. Táitusiava, ejaneacava éti, machuejarareca etaiúrujasiracacahi, ímyusemaca ema Viya.

¹⁸ Vahiecuejecapava etaimijachirahí imatipa tamutu etajuca vitaresirahi. Étisera ecaravahuya etame Viya. Éma, tímítucaehe etatíupajijiasiravanaya yátupiqueneana. Échemaraivaina máicha. ¹⁹ Taicha etanáitucaqueneanahi ena achaneana te juca apaquehe, súnsurupianachucha etamáimairahi ema Viya. Taicha etasagrada Escritura, ani tacahe: “Ena tímijachavanahi náimatiequeneha, énajivachucha tímiaquipaicavanahi maicha ema Viya, taicha etanamáetupisirávanahi”. ²⁰ Ánivare tacahe etasagrada Escritura: “Ema Viya máimati etanapanerueruana ena tímijachavanahi titupajijiacavana. Tájina etatacunachacarevanahi etamayehe”. ²¹ Táitusiava, vahitiuri ecasiñavavaicahini. Vahietúpicava etahéhisiravacahi ena enerejiruanahi éhica. ²² Ecaravahuinasera tamutu etavímiturapiana viti mavanaranahi ema Viya: ema Apolo, émapa ema Pedro, nútipa nuti Pablo. Ecampaupurava etatíaresiraichaha te juca apaquehe. Jararihiyarehi etaiúricacareva puitiéta etasácheana vicaijuhequeneana. Vaipa ecupica etahépeniraya. ²³ Échava ema Viya ematéchahehi, taicha éti mayeheheripa ema Machicha Cristo.

4

Eta nacatuparahairahi ena apóstoleana

¹ Nuvaraha némechahe eta vicatuparahairahi viti mayeheanahi apóstole ema Cristo. Mamusurahavihi víti. Tivanecahavihi eta vímitusiraheyare eta mapanereruana ema Viya, eta tayumururevanainihi. ² Puíticha, mácani ticatuparahayare tayehe eta ematanecana, tacamuñuhi yátupiyare eta máitauchiraina. ³ Natarihipuca ena ticaunenuanahi te nítaurahihipuca. Étiripa, enevanehipuca ecaunenu. Núti, tájinavare tacayema te ticaunenuanahipuca. Németeaca nítauchapaipa tamutu eta nucatuparahairahi me Viáquenu. ⁴ Váhisera nucasiñavavaicahini, taicha néchahi ema Viáquenu, máimahahi éma tamutu eta nucaematañesirahi éma, te tiúrihipuca, váhipuca. ⁵ Eta tacahe, vahi táuricahini tativainahini ecaunehini eta júcana, te vuíchaha ímatiequenahahi. Ecuchapaya eta mápechiravayare títeca ema Viáquenu. Éma tímicae-cherachayare eta tayumururevahí te timapicu. Éma tímereuchahaviya etá vianereruana te visamureanapachu. Tacahe, ema Viya ticunachahavinapa etá viúrivanahi.

⁶ Nuparapenaveana, numetacahe eta juca eta tiúrichaheyare apaesa ácuti eta máuriva ema Apolo, ácutinuvare núti apana eta nürivahi, taicha étanarichuhi eta vímiturapianahi tayehe eta véhiruhi. Vahi táurica enerejicahini nácani émunaruuanaya. Vácuticacasera eta émunasirahavina viti vímiturahianahi. Nacuijavare épuruquenéna nácani tímiturahianahi. ⁷ ¿Tájaha tacayema ímijachavahí éti iúripana nayehe ena apamuriana? Tájina apanaina ecasiñavaiya, tacarichu ecasiñavaiyaya tayehe eta máijararuheanahi ema Viya. Váchuripa tíjaracaheripa éma etá iúrivanahi, vahi étijivainahíni iúrichavahini. Tásiba, ¿tájaha tacayema ecasiñavavaicarichucha éti?

⁸ Éti, eta esamiravahí ecaemuñavaipa tímicutijiricavaipa ecayehehini tamutu, ecaimahaquenehini. Ímicutichavaipavare aquenucahrenahini eta esamiravahí. Ímijachavapa vaipa nucamunucarehi eyehe. Jéhechapucaini malayarine yátupinahini aquenucahrenahini apaesa víti apanava vémeñahavapaini eta eyehe. ⁹ Ímatirichu éti eta procesión náichaqueneasa ena tiverearecanapahi tayehe eta guerra. Nanacahi te náijiquimuri ena ticatuparahahanahi eta náopeniraya taniruanayare eta sárareana. Ichape eta náimahacarevahí nayehe ena achaneana. Viti apóstoleana ticutimahi tinacahavi ema Viya etá vicutihi ena nani páureanasamí. Ichape eta vímahacarevahí nayehe ena achaneana, énapa ena ángeleana. ¹⁰ Viti apóstoleana, eta vicaematañesirahi ema Cristo, tisunsuchahavianasamihiji ena achaneana. Étisera étaviucharipahiji eta ítupajijiasiravahí tayehe eta titucacareana mayehe ema Cristo. Tacutiquene náimijachahivare matumerairahahavisami. Éti, téavicavaipáji eta etumevavacahi. Tipicauchaheanaripáji ena achaneana. Vítisami tájinapa vipicauchacarevainahini nacahehi éna etá náechajiriruvahi. ¹¹ Puítiripa vinasirichuhi eta vicatajivairahi eta vinicaquenerepi, eta vimauneva, étapa etá véchuriasirapa etá vimuiriharapi. Ena achaneana téhahaviana. Tájina viviyava vijunaiya. ¹² Vicávitarcávahí te vivahuana etá vicaematanera. Ena achaneana ticajachachajicahaviana. Vítisera tájina vácayemahini nayehe. Tiúrihi etá vijicapirovacahi éna. Tipanajiricahavianapa, vítisera vicamichahi tamutu. ¹³ Tamutu sácheana téchajicanahi etá viyehe. Tíñemahi etá nacaye-mainahavi. Ichape etá vépurucarevahí nayehe. Vítisera vicayehehi paciencia nayehe, viconsejachavacahi.

Eta mahapasamureresiravahí ema Pablo nayehe ena machamuriana

¹⁴ Eta juca nucajureheirahi, vahi étainera nupanerecha nímicatsiriacahe. Nuvarahahisera nuconsejachahevare. Tétavicava eta némunasirahehi, tacutirichu eta nu cachichahehi. ¹⁵ Tayanapane camurianahi ena eyeheanahi máestroana tímitucaheanahi eta éhisiraina ema Cristo, diez mílnáinahipucaini; nútisera tímicutijiricavahi nácarichuhini éyanuinahini maestro taicha nuti nímmatichahehi tayehe eta iúchucuirayare maicha ema Jesucristo. ¹⁶ Eta tacahe, nécatiacacahehi eta éhisiraina etá núrivahi nuti.

¹⁷ Eta tacahe, névatacayare eta ara eyehe ema némunaruquene nuchicha Timoteo. Éma, titaurahi eta macaematacaneasirahi ema Viáquenu. Éma, tímitucaheyare, máemechirahayareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi.

¹⁸ Etiarihiripapuca eti ecasiñavaripa eta numaitujisiravaripa néjirapanahéhini. Ímijachaipapuca nupicahi. ¹⁹ Nuvarahapaicha nuti níjahuchavahini nítecapauchahehini. Nucuchapahi eta nítujisiravainahini maicha ema Viáquenu. Te nítecapauchahepa, nímahainapa ena nácarana tisiñavavaicanahi, te yátupihipuca eta nacaematacaneasirapa. Vahi tisuapacareimahi eta nacunachiravana te vahi náimicaecherachahini eta táurivahi eta nacaematacaneasirahi ema Viya. ²⁰ Taicha eta véhisirahi ema Cristo, tacamuñuhi vítauchayare vicaematacaneacayare. Vahi tácharichuimahiya eta véchajiriruvana. ²¹ Tiuri puiti, te ímiyanava ene ecahehi, némecharecaheyarehi te nítecapauchahepa. Téhesera te étupiricava eta epanereruana, ichape eta núrisamurevayarepahi etá nímairaheyare, nótserajicahénapa.

5

Ema Pablo mavaraha nacaerajica mácani téjecapavahi

¹ Jucarihivare eta juca apaña téchacarehi eta matiarihirahi ema émana echamuri téjecapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tiuri eta juca máichaquenehi! Énaripa ena navayurevagueneana ticapecaturarahiana vahi náuricaimahi eta juca. ² Esapihaichucha éti, ¡tétavicavahi eta tahapasamurechirahéhi eta íputsimuricacairahi tásihauquenehi eta ecasiñavavaisirahi! ¡Iúrihaipa etsirihapaini, táichavenéhi eta máichaquenehi ema echamuri! ¡Iúrihaipavare étupiricahini ema maca! Taicha ema Viáquenu Jesús tituparacahavi vicuchucayare te vimuri nácani téjecapavahi te vahi návarahahini náetupiricava. ³⁻⁴ Puiti, nuvaraha iúrujicavayare éti. Eyaseacayare ema Viáquenu Jesucristo máimicatacahe eta étupirisirayare etá juca. Núti apanavare, tayanapane eta nuyerehihehi, étasera etá náchaneva ticachaneheya. ⁵ Ichayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavimahi ema Viya. Máimahavinepa ema Satanás, émainapa téchavyare. Vivaraha pínajicaini etá juca pimaurivahi, apaesa táuchucuhaini etá piáchaneva te táitecapapa etá jena sácheyare machavirayare ema Viáquenu Jesús” ichayare.

⁶⁻⁷ Éti, vahi táuricahini ecasiñavavaicahini. Tacamuñu ecuchucavane ema mácará achane téjecapavahi apaesa vahi macupareacahe eti apamuriana, machu mámairijicahe. Taicha éma macutiripa etá levadura te nanaca te masa etá pan, tayanajicahi tamutu. Étisera, nuvaraha ecutiya etá pan mayehere levadura vinicasare te páscuamuhuana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi etá iásinequenehi te arairuhepa tacuti etá épaniravahi te éhicainapa ema Jesucristo. Taicha éma,

tamutuhi mavachacha eta vímicapasirahi, macutihi eta uvesa eta vímijararesirahi. ⁸ Táitusiava puiti, vicutinapa ena nujaneanana israelítana eta nacaerajisira eta levadura te napenana te páscuamuhuana. Tamutusera sácheana vicauneuchavaya tayehe eta tamauriqueneana, vahi pecatumarehavimahi. Tamutu sácheana eta juca vítaresirahi matapiravarehavinahi, tájinasarepa víchiravaimahi te mamirahu ema Viya.

⁹ Cape eta nucartanehivare eyehe, nímimetacahehi eta tamaurivahi eta ecachanevacahini ena tíchanahi eta juca pecatuana tivehajiricacanahi: Súcani esena suvehahi ema apana achane, mácani achane mavehahivare esu apana esena. ¹⁰ Tiuri, núti eta numetasirahehi, váhisera énaina nicha ena nani máehicaranahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tiámerahiana, énapa ena ticasíñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunuipapuca vérajicavahíni eta te juca apaquehe, apaesa vaipa nacuitecapauchahavihini. Váhira énaina níchaquenénahíni. ¹¹ Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasíñarajiji, émapa ema titupiarahi, émapa ema ticavaharasí, émapa ema tiámerahi. Mácani echamuri, te ene macahehi, tájina vahi táuricahini ácachanevacahini te enisirana. ¹²⁻¹³ Vahi nútina tatuparaca eta nacayaseserehiyayare te numirahu ena anecaqueneanahi eta viyehe. Téhesera te mamirahu ema Viya eta nacayaserehiraya. Éma téchavacahi éna. Étisera éti, échahi ena echamurianahi. Éti eyaserejiricacayare étijicacaya. Eta tacuhe, ecaevuisihayare ema mácaratéjecapavahi te emuri.

6

Vahi táurica vimetauchacacahini te namirahu ena máehicaranahanahi ema Viya

¹ Énerichuvare nuvaraha numetacahe eta apana: Te natarihinapuca ena echamurianahi navaraha timetauchacacana, vahi távaraha nayanahini nayehe ena tuparairucana máehicaranahanahi ema Viya. Étarichu nacamirahucacaiyayare te emirahu eti nachamuriana. ² Tativayare échava eta machaneraherahi ema Viya. Étijivayarehi étupiricaca eta íchavaquenovanahi. Vahi étinayare etanuca ena masuapajirairahanahi taicha járaji-payare eta sácheyare ticayaseserehianaya te emirahu éti ena masuapajirairahanahi. Puítisera eta íchavaquenovanahi ánichichaqueneanahi, éti tatuparaca étupiricaya. ³ Écharichu éti tituparacahaviyareva ticayaseserehianayareva ena ángeleana te vimirahu. Tacumapurujchapucaini eta tayeheanahi te juca vítaresirahi, vahi vicuituruequenehahini. ⁴ Puiti éti, te tatiarihipuca eta íchavaquenovahí tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamurianahi. ⁵⁻⁶ Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucahini ena tuparairucana máehicaranahanahi ema Viya. Tasapihahini étainahini mametauchihahini mácani machamurihi. Cúverarecpa nacuijahini te etaracu mácani émanainahini vahi macuituruequenehahini mayasesereca jácani téchacareanahi nayehe ena vichamuriana.

⁷ Vahi táuricahini íchahini eta juca. Étijicacainahini eta echamuricacahi evarahapa ejararecaca. Tivarahacarepana eta eratahairaina ecamicha,

tayanapanerine ecatajivahi naicha, tiámeyechaheanapuca. ⁸ Étisera etiva-vaicapa íchahi eta juca émecatajivachacacapa. Vahi táuricahini eta juca; násapihahini énahini echamuriana ena etupiaruanahí.

⁹⁻¹⁰ Váhipuca échahi éti eta namaitujisiravaya tisiapana te mávasa ema Viya ena tíchanahi eta tamauriqueneana. Taicha yátupihi eta namaitujisiravayare tisiapana ena ajairana tivehanahi esu apuna esena apayena énapa ena vahi nayenacacaquenena, énapa nácani tivehana esu esena amaperu máimaruchaha. Énerichuvare ena esenana, váhivare titújicavanaimahi tisiapana te mávasa ema Viya, súcani tivehahi ema achane vahi suímaquenenahi, ésupa súcani amaperu esena namutuchucha suvehapahi. Váhivare titújicavanaimahi tisiapana ena nani tivehacacana ajairacacana, énapa ena nani ticasíñarajiana, ena nani tiámerahiana, ena nani ticapinarurahiana, ena nani ticavaharasiana, ena nani titupiarahiana, énapa ena nani náipicararecapahi eta námeresirayare. ¹¹ Ene ecaheni éti eta iásinequenéni. Puítisera títsivacha-vaipahi eta ítaresira, sántuheripa maicha ema Espíritu Santo, ejacapacarepa mayehe ema Viya, máichavenehi ema Viáquenu Jesucristo.

Tiávahácahaviripa ema Espíritu Santo eta te viáquehe viti machanerana ema Viya; tásicha, tituparacahavipa tacuija eta vituhusivaina

¹²⁻¹³ Puiti jucarihivare eta numetacaheyare. Nararihipuca ena nacahehi: “Núti néchinava eta nítaresirahi. Eta náquehe tajamurachahi eta tavarahaqueñeanahi. Eta tinicacare táicuchihi eta viami. Eta viami tatuparahaichuhi tajacapaya eta vinicaqueneyare. Ene tacahe eta náquehe tavarahahí nu-veha esu esena tacutihí eta viami tavarairahi tinica” nacahepa. Nútisera te nupanereru, vahi énéna tacahe. Yátupi víti véchinavahi. Váhisera tavarahacrehini támputuhichaini víchahini eta tavarahaquenueñeanahi eta viáquehe, vivayuchahini víchahini eta tamauriqueneana. Yátupi tísapacarehi eta vinisiraya eta tinicacareana. Tatarihisera eta sácheyare, vaipa vácamuñuimahi eta tinicacare, maicha ema Viya. Ema Viya máepiyacahi eta viáquehe, mavarairahi vicaematanacayare éma. Émapa téchahavíhi puiti eta juca vítaresirahi. Vahi étainahini támepiyacahavíhíni eta víchiraya eta pecatuana esenamarehavinahini. ¹⁴ Ema Viya macaechepecuahi ema Viáquenu Jesús te máecari. Ene vicaheyare víti eta macaechepusirahaviyare víti apanava, taicha téavicavahi eta máitupajijiasiravahi.

¹⁵ Écharichuhí emetu éti, eta iáqueheana mayeheripahi ema Cristo. Émaripahi téchahehi. Etiarihipucasera ímijachapuca táuricahini vímicachanechahini eta viáquehe tayehe eta suáquehe esu esena túhusi. Váiparinehi táuricaimahi. ¹⁶ Nuvarahavare némechahe, te mavehahi ema achane súcani esena túhusi, tiánecacahi eta náqueheana eta nacamujichiracacahi. Acane, ema Viya máijaracapa esu Eva mayehe ema Adán. Tásicha, eta Sagrada Escritura, ani tacahe: “Te tivehacacapa, tímicutijiricavapa étanarinehi eta náqueheana”. ¹⁷ Ene tacahehi eta vítaresira mayehe ema Viya, eta mávahásirahavi ema Viáquenu, eta viáchaneva tacachaneripa éma.

¹⁸ Eta tacahe, ejaneacava yátupina, machu iáquipaicava tayehe eta túhusicare. Tamutu eta pecatuana náichaquenueñeanahi nácani achaneana, tajararecahi eta náchanevapachu. Tavetijipa, mácani achane tivehahi esu esena vahi mayena-quenueñahini máimijararecahivare ichape eta máquehe. Ticajachacareinehi eyehe éti eta juca. ¹⁹ Écharichuhivare éti eta mávahásiraheripa ema Espíritu Santo eta te iáqueheana, taicha mavaneruichuhi ema Viya eta mávahásiraheyarehi ema Espíritu Santo. Vaipa étinahini écha eta iáqueheana. ²⁰ Taicha mavachareruhehi ema Viya. Ichapemurihi eta macatajivairahi íchavenehi éti.

Puiti, eta iáqueheana étapa eta iáchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

7

Eta maconsejarapi ema Pablo nayehe ena máimaruana, énapa ena nacaimaqueñaana

¹ Tiuri puiti, nujicapaheyare eta juca eyaseresiranuhi te ecartane. Yátupi tiúrihinéni máyénarénahini mácani achane. ² Táichavenesera eta tavayuaraivahi eta pecatu, ticamunucarehi ena ajairana nayenapachuina, énaripa ena esenana ticamunucarehivre náimapachuina. ³ Mácani achane te sutarihipapuca esu mayena, tacamuñuhi máitauchayare eta máitá tiraya máemunasiraya esu mayena. Ésuripa esu esena te ticaimaripapuca, énerichuvare suítauchayare eta suítá tiraya suémunasiraya ema suima. ⁴ Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

⁵ Éti ecaimaqueñaanaripa, vahi ecuepurucaca tayehe eta iánesiraca cairana. Téhesera tatarihinapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta iánesiracacana. Te taequenénapa, táuricavare echávauchacacavare, apaesa ema Satanás vahi maculturuchahe eta máimijamurachirahe ena apanana.

⁶ Tiuri, eta juca numetasirahéhi, vahi nútina nucavanairipi. Nísapasera eta énéna ácahe. ⁷ Nuvarahahinéni ácutinuhini nútia etá mayénarenuirahi. Víjarcasipachusera me Viya etá vítaresiraya. Nararihi ena ajairana máyénareana etá náitaresira. Nararihivre ena esenana máimaruana etá náitaresira. Nararihivre ena apamuriana máijararuichu ema Viya ticaimana.

⁸ Énaripa ena nácaro vichamuriana máyénareanachaha, énapa ena máimaruuanachaha, énapa ena tépenaimana, tiúripanahinéni nánasihini máimaruuanainahini; nácutinuhini nútia. ⁹ Étasera te vahi náratahahi ticaratacavana, tacamuñuichuhi ticaimanayare, apaesa vahi nacuepujuquichava tayehe eta pecatu.

¹⁰⁻¹¹ Tásicha puiti, nutuparacavacayare ena nacaimaqueñaanaripa. Ema ajaira vahi macuinajica esu mayena. Esu esena vahivare succuinajica ema suima. Eta juca vanairipi tásichaquenehi mayehe ema Viáquenu, vahi tásichaquenéna nuyehe nútia. Téhesera natarihinapuca ena vichamuriana náinajicaca, vahi táuricahini nápechavahini nacaimahini, nacacachanehipucaini. Tacamuñuhi tichavauchacacanayare tivehacacana.

¹² Tiuri puiti, tájinachaha vanairipina tásichaquenéna me Viáquenu tayehe etá náinajisiracaca ena nacaimaqueñaana. Níjaracahesera etá juca nupanereru nútia. Te matarihipuca mácani vichamuri esu mayena vuíchaha vichamurinahi, te tiúrihipuca etá nacachaneracacahi, vahi táuricahini máinajicahini ésu. ¹³ Énerichuvare, te sutarihipuca súcani esena vichamuri ema suima vuíchahavare vichamurinahi, te tiúrihipuca etá nacachaneracacahi, vahivare táuricahini suínajicahini éma. ¹⁴ Taicha ema suima, ichape etá majapanucareva me Viya táichavenehi etá sucaimairahi esu mayena. Énerichuvare esu esena mayenahí ema vichamuri, ichape etá sujapanucareva me Viya táichavenehi etá mayenairahi ema achane vichamuri. Énaripa ena nachichanaveana majapanuhivre ema Viya náichavenehi ena ticachichana, vaipa náepurucarehini me Viya. ¹⁵ Téhesera mácani vuíchaha vichamurina suímahi

esu vichamurihi mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahi viúriyare, tacuijapa tahapapiricahavihi eta vipanerreuana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare másaparinevare suyana. ¹⁶ Taicha piti esena, vahi pecha te pimaitacayarepuca picajayayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayayasamurecha esu piyena eta suéhisiraina ema Viya.

¹⁷ Ema Viáquenu tíjaracahehi eta ématanerepianahi te tíchuhenapa. Etuparahapachuhi eta ématanerepiya. Váhisera ínajicaimahi, ímyianavare ítauchaya eta etuparahanahi. Étara eta juca nuvanairipi nayehe ena vichamuriana ticavasanahi te tamutu avasareana. ¹⁸ Nácani ticamarca naripa te máichuhavacapa ema Viya, vaipa tauricahini nacaepahavahini eta nacamarcairahi. Nácani mámárcareanarichaha te máichuhavacapa ema Viya, vaipa taurica nacamarcahini. ¹⁹ Tájina vahi étaparacaina te vicamarcahipuca, étasera tivarahacarehi vicaematanecayare eta mavarahaqueneanahi ema Viya. ²⁰ Namutu nácani máichuhauqueneana ema Viya, vahi náitsivachaimahi eta náematanerepianahi náijaracahi te máichuhainapa ema Viya. ²¹ Te ecaque nuhipuca éti te tíchuhenapa ema Viya, vahi ecueñamava eta ecaque nuirahi. Téhesera ímaha eta iúchucuiraina, tájinachucha táichava. ²² Taicha mácani achane músuhi eta máitaresira, tayanapanerine matiarihinahi ema máquenuinahi; téhesera te mamirahu ema Viya, tínunánaripahi mácani achane nájina máquenuinahini eta máitaresira. Puiti ena apinana mavanaranaripahi ema Viáquenu Jesucristo, taicha ticuticacanaripa eta nacaematanearisiraipa éma. ²³ Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaematanearisirayare ema Viya. ²⁴ Eta tacahe, nuparapenaveana, ímyanavayare ecaematanane mayehe ema Viya. Ítauchayare eta ématanerepipachu íjaracasihi me Viya.

²⁵ Tiuri puiti, tájina vanairipina tásihaqueñéna me Viáquenu nayehe ena amaperuana mágénareanarichaha énapa ena máimaruanchaha. Nútisera numetacaheya eta nupanereruhi. Nuvarahasera esuapanu taicha nútii nucaimitucusiquenehi mayehe ema Viáquenu, táchavenehi eta majapanuiranuhi. ²⁶⁻²⁷ Puiti juca vítaresirahi, tétavicavahi eta vicatajivairahi. Eta tacahe, németeaca nútii tiúririchu nánasi ena ajairana nayehe ena nayenana nácani nacayenaqueneanaripahi. Vahi nacuinajicaca. Énaripa ena mágénareanarichaha, vahi nacutanuca ena nayenaina. ²⁸ Mácanisera sutiarihi esu mayena, tájinachucha pecatuina eta mavirahi esu esena. Ésuripa súcani amaperu esena, te tatupiruvahi eta sucaimaira, tájinachuchavare pecatuina eta sucaimirahi. Táitsivasera ichapeyare eta nacatajivairaya eta náitátcacaya, tavetijipa te natarihinapa ena nachichanaveanaya. Eta tacahe, nuvaraha numetacahe apaesa vahi ecucatajivahini.

²⁹ Tiuri, nuparapenaveana, nuvaraha numetacahe ticutimahi ánipirine eta juca vítaresiraya puiti juca vicaijuheyare. Eta tacahe, taurica eta íjara siravahi yátupina eta ecaematanearisira ema Viáquenu. Étiripa, éti natarihi ena eyenana, vahi tacucarichu eta ecaeñamasirava nayehe ena eyenana, énerichuvare me Viya. ³⁰ Te jararihipapuca eta tacáiyasiráhe écatisamu repuca, vahi ecuisapa tahapapicahehini eta ecaematanearisira ema Viáquenu.

Te jararihipapuca eta tacaurisamurechirahe, váhivare ecuisapava tahapicahehini. Te ecaimahaquenehipuca, tísapacare eta ecamapura eta ímahaqueneana eta máijararuhehi ema Viya, váhivare ecuisapa tahapapicahehini eta ecaemataneasirahi ema Viáquenu. ³¹ Nuvaraha táurihini eta ítaresirayare te juca. Váhisera ecuisapava ecuñañamaracava eta ecayeheirayare eta ímahaqueneana te juca apaquehe. Taicha tamutuyarehi témitiaca te táitecapapa eta táitaviraya eta juca apaquehe.

³² Eta tacahe, vahi nuvaraha ecañañamaracava tayehe eta júcana, taicha mácani achane máyénarehi, tájina tahapapiricahini eta macaemataneasirahi ema Viáquenu, mavarahahi máicutichiravaya eta macurisamurechiraya ema Viáquenu. ³³ Mácanisera achane te sutiarihipa esu mayena, ticañañamaracavainapa taicha eta máitátirayare esu mayena, mavarairahi macurisamurechiraya ésu.

³⁴ Ene nacahehi ena esenana. Vahi tácoticaca eta napanereruana suyehé esu esena sucaimaquene ésupa esu esena máimaruchoha. Taicha súcani máimaruhi tahapasamurechahí eta suítatiraya ema Viáquenu, suvarairahi suítauchaya eta mavarahaqueneana. Suíjaracayarehi ema Viya eta suáchaneva étapa eta suáquehe. Ésusera esu esena sucaimaquenepa tahapasamurechapa eta suítatiraya ema suima, suvarairahi sururisamurechaya éma.

³⁵ Eta júcana nuconsejarapianahi eyehe, nuvaraha eta táurivaina eta ícharacavaya. Vahi nuvaraha nupamicahe tayehe eta tacajeraqueneana. Nuvarahasera tacuijahini eta tihapapicahe eta ítátirayare ema Viáquenu.

³⁶ Tiuri puiti, eta juca nuconsejarapi mayehe mácani achane te sutiarihipuca esu machicha esena máimaruchoha. Te tahapapiricaipapuca eta sucaimairayare esu machicha, táichavenehi eta suítanahasiraipa; te tiúrihi eta máimairahi, másapayarehi ticaima esu machicha. Tatupiruvayaresera eta sucaparaperayare. Tájinachucha táimanena; váhivare pecatuina. ³⁷ Mácanisera achane, te tájina máichiravainahini, nájinavare tipamicaimahi; te mavarapapuca suánasi máimaruina esu machicha, tiúrihi maicha. ³⁸ Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

³⁹ Esu esena ticaima tatuparacahi suítauchayare eta suíjarasiravahi ticaima, sunasirichuya eta mayehe ema suima eta náitaresirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítaresirayare. Tísapacarepa eta suápechava sucaima. Tacamunuhisera mácani vicutiquenehi vichamurihi tisuapajirahi me Viya. ⁴⁰ Tiápajucavasera tiúripanaya te suánasipa máimaruina. Eta juca tásishaquenepa te nupanereru. Németeacahi núti tétpicavapahi eta nuconsejarapiana taicha mávahárunuhi ema Espíritu Santo.

8

Ema Pablo mamecavaca eta nayaseresirahi te tiúrihipuca nanica eta tincacareana tacayujarahuquene te tamirahu eta nasiñarajiana ena achaneana

¹ Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasíñavaimahi eta vítusirahi. Tacamunuhisera tajurucaya eta vémunasiravaca ena vichamuriiana, vímicatasiracacaya eta véhisira ema Viáquenu. ² Taicha nararihi ena ticasíñavavaicanapa, tímijachavanapa náimaticequeneha tamutu. Eta juca náichahí táimerecahi vuíchaha náitucahini, vuíchaha nacapayayaracahini eta

mapanereru mácani yátupipa máituca. ³ Nácanisera yátupihi témunacanahi ema Viya, éta tímicaecherachahi eta machichanaveanairahi éma.

⁴ Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya. ⁵ Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana. ⁶ Vítisera viti vímatiequenehanahi émanarichuhi ema Viya Vicaiyaquene te anuma. Ema Jesucristo, émanarichuhi ema Viáquenuhi. Ema Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vitiarihiya eta vicaematanearasiraya éma. Tásiba, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaresira.

⁷ Tisimutuanasera ena vahi námatiequeneha eta juca. Énaripa ena vichamuriana, nararihi ena vuíchaha náemitisicahini eta navaraira napi-caucha eta nasiñarajianaini. Éna, tisamavanahi vaipa náetupicavanahi eta nanisirahi eta tinicacare tacayujarahuquenehi, vahi táuricahini eta nasamirahi. ⁸ Numetacahesera puiti, vahi étaparacaina eta tinicacare, vijacapacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tijararecahavimahi mayehe te tiúrihipuca eta vinisira. ⁹ Eta tacahe, ecauneuchava yátupina machu émejecapavacha ena apamuriana vichamuriana vuíchaha námatiequenehahini eta júcana.

¹⁰ Étisera éti ímatiequeneanaripa, te ísapavayarehipuca enica eta tinicacare nayujaraureeanahi te tamirahu eta nasiñarajiana; tacahe, te máimahapepuca ema echamuri, énerichuvare tísapavayarehi tinica. Táitsivahisera tipicacaracavahi jácani te masamure. ¹¹ Eta tacahe, échapavaya éti tayehe eta ímatiequenehairaripa machu émejecapavacha ema echamuri mácani vuíchahapiravahi máimatiequenehahini eta júcana. Émarichuhi iúmurivahi eta mavacharesirahehi ema Cristo eta máepenirahi te crusu. ¹² Éti, te ehapapicapuca eta táurivahi eta napanereruana ena echamuriana, éti ecapecaturaipa eta mayehe ema Cristo, taicha eta émejecapavachirahi ena echamuriana.

¹³ Ácutinu eta juca nuyeherepihi: Te nútinahipucaini némejecapavachaini mácani nuchamuri táchavene eta nunisirainahini eta vaca, váhirine nuncaimahi, apaesa vaipa nucuemejecapavachahini éma. Éti apanava, ene ecaheyare. Váhivare ecuemejecapavacha ena echamuriana.

9

Ema apóstole Pablo, tatuparacahi náitátiyare ena máimitureana

¹ Núti, nájina náquenuanahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímaquenehi ema Viáquenu Jesús. Étiripa, etupiruvahi esuapanu eta nímitusirahehi. Éta tímereuchanuhi eta táurivahi eta nucaematanearasirahi ema Viáquenu. ² Tayanapane nacañajivarinepuca nácani vahi tisuapapajicanuanahi eta apóstolenuirahi. Étisera esuapanuyarehi, taicha etiarihi eti nímitureanahi, étira ímereuchanuhi eta yátupirahi apóstolenuirahi mayehe ema Viáquenu. ³ Étara nucatiuchiavahi eta juca nayehe ena tépurujiricanuanahi.

⁴ Éti tituparacahehinéni ítatinuhini nútí tayehe eta nunicaquenerepi táichavenehi eta apóstolenuirahi. ⁵ Énerichuvare tituparacahehi ítatihivaréni te sutiarinhinahini esu esena nuyenainahini, súcani nucutiquenehi tisuapajirahi. Tácutihini eta ítátiravacahi ena esenana nayenanahí ena apamuriana apóstoleana, émaripa ema Pedro, énapa ena maparapenaveanahí ema Viáquenu. ⁶ Éti, ímijachaipapuca nútí émapa ema Bernabé, vicarichuhi vahi tatuparacahavihini eta ítátirahavinahini eta vicametarairuirahi. ⁷ Puiti nuvaraha nímicutiarachinaheyare eta nacaitaticasira ena ticaematanerahiana. Ani tacahe: Namutu ena suntaruana ticaitaticasianayarehi nayehe ena comandanteana. Énerichuvare, ema tisucurecahi eta tinicacare, tatuparacahi masamapuhayarehi eta tahi eta masucureanahí. Émaripa ticayehehi vaca tatuparacahi máerayarehi eta tacheneama eta mavacane. ⁸ Eta juca níchirahéhi, vahi nácarichu nútí nucapanereruhi eta júcana. Énerichuvare eta Sagrada Escritura májurehi ema Moiséini titametacahavihivare. ⁹ Ánipa tacahehi eta táchajiriruvahi: “Vahi picuitisumucha eta pivuiyerana, te ticaematanepahi taicha técuhanapahi éta”. Táitaurevaquene ema Viya vahi táchajiruhini eta vuiye eta máechajisihahi. ¹⁰ Énerichuvare víti mayunacahi te máechajiriruvahi. Mavarahahi vicaenicasiyare vimutu viti vicaematanerahiana. Tacutihí mácani achane ticaematanerahi. Macaematananeacahi muraca eta máesane, mavarairahi máimaequenehayare eta támameanahí eta máesane. ¹¹ Ene vicahehi víti eta vévasirahi eta máechajiriruva ema Viya te esamureana. Éta tiúrichahehi. Tásiba, éti ecutinapa eta sucureca tímejavahí eta tahi. Tájina táichava eta ítátirahaviyarehi víti. ¹² Ena apamuriana ticasinnavanahí eta eyehe. Tásiba éti, tiúrihi eta ítátirahi. Vivetijipa víti vítaticarehi eta eyehe.

Váhisera vávarahahini vicasinnavahini víti eta eyehe, viyaseacahehini eta ítátirahavinahini. Vicamichahi tamutu, vimavarairahi tatiarinhinahini jácani apanainahini tahapapiricahini eta esamirayarehi eta máechajiriruva ema Cristo. ¹³ Écharichuhi éti eta mavanairipi ema Viya nayehe ena téchapajiricana eta mayehe Templo, nanicayarehi eta tinicacare námaqueneasana ena achaneana nájaracasiruanahí ema Viya. Cájaracasianayareva éna ena vaca táchete etá námvahuanahí ena achaneana. ¹⁴ Ene tacahehi eta mavanairipi ema Viáquenu etá viyehe viti vicametarairuanahí eta tapachinaquene máechajiriruva, tituparacahavihi vijacapayarehi eta vinicaquene taicha etá vicametarairuirahi. ¹⁵ Nútisera tájina nímatiyahini nuyaseacahehini etá ítátiranuinahini. Étaripa puiti te juca nucartane, váhivare nuyaseacahefjáracanuhini. Nucamichahi tamutu. Tiúririnehipucaini népenavanehini, machu tachimaracanucaru táitava etá juca núrisamurevahí nútí tamajinairahí nuyaseacahehini.

¹⁶ Nútí vahi étaparacaina nucasinnavahí taicha etá nucametarairuirahi. Nutuparahaichuhi etá juca. ¡Páurechichananusami te némunahacava nínajica etá juca nucametarairuirahi! ¹⁷ Taicha nútí, vahi nútijivainahini níjaracavahini mayehe ema Viáquenu etá nucametarairuiraya, étapapucaini nujacapihahini etá nuvachayarehi etá mayehe. Nuvanecasivahisera me Viya etá matuparasiranuhi etá juca némataneyarehi. ¹⁸ Ichapesera etá nuvarairahi etá nucametarairuirahi, taicha tijarahi te nusamure etá nuratahairahi nucametarairu, tamajinairahivare nuyaseacahehini eyehe éti. Vahi nupamicahéhini etá ítátiranuinahini táichavenénahini etá nucatuparahairehi etá apóstolenuirahi.

¹⁹ Nájinahinéni te juca apaquehe napamicanuhini etá nucaemataneara-

sirainahini táichavénehipucaini jácani náitátiranuhini, énainahipucaini náechanuhini. Nútisera níjaracavahi nítouchayarehi tamutu eta nucamunu-carevahi nayehe ena achaneana, apaesa étainahipucaini níturusihavacahini ena nasimutuvaqueneana, machaneranainahini ema Cristo. ²⁰ Étaripa te nítecapauchavacavare ena nujaneanana israelítana, ichaperinehivare eta nupicauchiravacahi éna, apaesa najimuyasamurepapucaini eta náehisirainahini ema Cristo, étainapapucaini níturusihavacahini éna. Ena nani, ichape eta nasuapirahi eta mayeherepiana ema Moiséini. Tásicha, te nucainunavaca éna, tájinavare vahi nucaecahihini eta nayeherepihi, nupicauchahivare éna apanava. Váhineni nútiparacainahini tayehe eta náehiruhi. ²¹ Tatiarihisera eta yátupiquenéhi néhiruhi nuvanahihi mayehe ema Viya, máijararunuhi ema Cristo. Énerichuvare te nucainunavaca nácani apavasanana máehicarahanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamure-chavacahini éna apanava. ²² Te nucainunahivarepuca ena vichamuriana nácani vuíchahahi náitamuturucahini náimatiéquenéhahini eta véhisirahi ema Cristo, váhivare nucaecahivaca eta namaimatiéquenéhairarichaha. Ichaperinehi eta nujapanuiravacahi. Nímicatacavacapa, nuvarairahi náimatiéquenéhapaini yátupinahini eta véhiruhi. Namutu ena achaneana, nujapanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ema Cristo, machaneranainahini éna. ²³ Núti nítouchahi tamutu eta júcana apaesa najacapa eta tapachinaquene máechajiriruva ema Viya, apaesa vácuticacapaini vámutuhini vijacapa eta viúrivayare maicha ema Viya.

²⁴⁻²⁵ Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta narata-hairaya navvereasihaya ena nánaranayarehi. Te vahi najaneacavahini, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ema Viáquenu, ejacapihainasarepa eta etuparahahi mayehe. Eta navereareruanahi ena ticavijarurahiana, vahi tánasimahi. Témitequenéhavaneyarehi. Vahi táchutimahi eta vijacapaqueneyare me Viya. Éta, tájinapa ticamitiéquenéhaimahi. ²⁶ Nútiripa eta nucaemataneasirahi ema Viáquenu, ichape eta nupamisiravahi, taicha eta nímatirahi eta mavarahaquene. Vahi némepururecavaimahi. ²⁷ Nucarata-cavahi muraca. Vahi nusuapahini eta tajamurachaqueneanahi eta náquehe. Nupamicahi eta táemitisisirainahini eta tamauriquequeneana, machu néjecapavapapucaini, tásicha váipapucaini nucujacapahini eta níuchihi. Ichape eta nutsirihacarevapapucaini, tavetijipa eta camurianairahi ena nímitureana tayehe eta véhisira ema Cristo.

10

Ema Pablo maconsejachavaca vahi nacucuti ena ticasíñarajijiana

¹ Nuparapenaveana, nuvaraha némechaheyare eta náichararacavahi acane ena viáchucanaveanaini máumurivanaini ema Moiséini. Eta náehisirahi éma, tatiarihi eta úcaji timícauchavacapahi namutu éna. Eta nánuesirahi eta mar ticaijarehi Títsiama Une, namutu náimahahi eta tájjivahi eta nánuesiraya. ² Namutu ena nani tíjaracavanahi eta náitauchiraya eta náehisiraya ema Moisés, eta nánuesirahi eta ichape une mar, náehisirahi eta úcaji*. ³ Énerichuvare

* **10:2** Ema Pablo máimicuticha eta nánuesirahi eta ichapequene mar, tímicutijircavahi eta nacaicachasihini te une, étapa te jara úcaji.

namutu ticuticacanahi eta nanisirahi eta tinicacare tásihaquenehi me Viya.
 4 Namutuhivare térrana eta une tásihaquenehi me Viya. Eta juca une náeresaparacahi éna, táuchurehi tayehe eta mari, maicha ema Cristo. Émairahi ema tínapumirauchapahi éna, máitátivacapahi eta napaisirapahi. 5 Tamapurujihisera eta majaneasiravacahi ema Viya. Vahi émainahini éma náesenicahini. Tájinachucha vahi nacaurisamurechahini éma. Eta tacahe, máicuñacavacapa ema Viya. Namutuyaréni tépenaracánahi tayehe eta mávapahi apaquehe. Tiúchucuhanahisera ena nachichanaveana.

6 Ena viáchucanaveanaini, táimicuñacahi eta najamurachirahi eta tamauriqueneana. Étara eta juca ticauyayacarehi eta viyehe, énémahihávinahini víti apanavare vácutihini éna eta najamurachirahi eta tamauriqueneana.
 7 Váhivare ecuicutipa éna eta nacasiñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Ticaejacacanapa eta nanisiraya, téranapa. Téchepucanapa tirimaicanapa te tamirahu eta nasiñarajiji” tacahepa eta Sagrada Escritura. 8 Váhira énena vicucahe víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaicuñairahi táichavenehi eta náichirahi eta juca tamauriqueneana. Tépenaracanapa. 23,000 achane ena tépenanahi te jena étanaquenehi sache. 9 Váhira vicuyururujica tayehe eta mapanerueruanahi ema Viáquenu. Ena nani tiyuruchavanahi, vaipa nasuapähini ema Viya. Tásiha, máicuñacavacapa éma, taechucavacapa eta quichare. Tépenaracanapa.
 10 Váhira tacucarasacava eta échajisirana mayehe ema Viya. Vahi ecucuti eta náejecapiravahi ena viáchucanaveanaini. Macapapajiruanahi ema ángele mavaneruhi ema Viya. 11 Tacahehira eta juca náichavaquenevahi ena viáchucanaveanaini. Púiticha tanasihi te ajureca téjacahi tamutu maicha ema Viya. Tamutu eta juca témechahavihi víti, ticatsimavacarehivare viyehe víti vinecapaequenehanahi eta juca táitavirainapa puiti juca sácheana vicaijuyeyare. 12 Eta tacahe, vahi ecuimijachahini tájina tiáquipaicahena. Tatuparacahi ecauneuchavayare tayehe eta tamauriqueneanahi. 13 Puiti juca eta vítaresira, jararihi eta tavaraha témejecapavachahavi. Váhisera ecuaramihini, taicha eta tacahehi eta náichararacavahi namutu ena achaneana te juca apaquehe. Ecasiñavayaresera muraca mayehe ema Viya, taicha yátupi eta macasiñacarevahi. Éma, vaipa másapaimahi távayuchavahichaini eta tapamisirahe. Jéhesare éma, tíjaracahénapa eta etumevayare, ecamichirayare tamutu.

14 Tásiha puiti, eti nuparapenaveana némunaruqueneana, érajicavayare nayehe ena ticasíñarajijiana. 15 Éti ímatiequenehahi tamutu. Eta tacahe, numetacahe apaesa táuri eta epanerequenehairaya. 16 Étaripa eta juca vérasahi vimutu viyujaraureasahi te vinicayare, étarichuhivare táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejircacahi, étarichuhivare táicutiarahi eta maeche ema Viáquenu. Eta vérirahi étapa eta vinisirahi, táicutiarahi eta viúrujiasiracacahi te máijare, tásiha éma tiávahácahavahivare vimutu viti viúrujiacanahi éma. 17 Yátupi apanapanenejihavihi víti, visimutuvaqueneanahi. Émanarichuhisera ema viávaháruhi. Eta vinisirahi eta pan, étarichuhí te máijare eta viyujarauchirahi.

18 Eta juca viúrujiasiracacahi, vicutivacaipa ena nujaneanana israelítana. Éna, tiúrujiacacanahi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táichavenehi eta nanisira.
 19 Tiuri puiti, vímatiequenehahi tájinachucha táimanéna eta vaca nayuja-

raurehi náijaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini. ²⁰ Nuvarahasera némechahe, eta nayeherepiana ena nani máimatiarahahini ema Viya, énachucha náijaracasichahi ena éreanana eta tinicacare. Vahi émainahini ema Viya náijaracasichahini. Eta tacahe, vahi nuvaraha ímicasiapava éti eta nayehe, machu náimivehahe nayehe ena éreanana. ²¹ Vahi táuricahini apiquerehahavinahini: eta véhisirahi ema Viáquenu, tásicha véhica-hivarepucaíni ena éreanana. Te enicayare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña. ²² Machu ímyusemaca ema Viáquenu, taicha vahi áratahaimahi ecanara éma.

Vímerecaya eta vémunaraivanaya nayehe ena vichamuriana

²³ Yátupinéni víti véchinavahi, viyeherepipachuyarehi eta vinisiraya, vahisera tacuticacahini táetupicavahini mayehe ema Viya, vahivare tacuticacahini táimicatacahavihini eta vipauchiraya ema Viya. ²⁴ Tásicha, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

²⁵ Te enicayarepuca eta vaca tiásicha te mercado, vahi ecuavamirahu eta enisirayare, vahivare ecucamesa ecuecha te ticayujarahuhipuca eta vaca, apaesa tacuija tahapasamurechahe. ²⁶ Taicha ema Viáquenu, éma tépiyacahi eta apaquehe, étapa tamutu eta távapahianahí. Vituparahaichuhi eta vinisiraya máicha.

²⁷ Títecapa te náichuhahepuca enica nácani vahi vichamurianainahini, te ísapavayarepuca tiámaheana, tiúrichucha enica eta náijararuheyare. Vahisera ecuyasereca te ticayujarahuhipuca eta tinicacare. ²⁸⁻²⁹ Téhesera natarihi-napuca nácani tinecapaequenehanahí, te nametacahepuca eta nayujarau-chirahi te tamirahu eta nasiñaraji, tiúripana vahi ecunica, apaesa tacuija tahapasamurecha eta mapanereru ema timetacahehi. Éti, émitisicapuca eta epicauchirahi eta nasiñarajiana. Émasera ema echamuri, vuíchaha máemiti-sicahini. Tásicha, nuvaraha tacuija tahapapicahini eta mapanereruana icha éti.

³⁰ Téhesera etiarihinapapuca ecahe: “Vahi núrica nucarinepapuca núti tituparacanuhi nujaneacavayare apaesapuca vaipa nucuemejecapavacha eta mapanereru ema apana. Núti nuhasulupayachaparaca ema Viya eta nunisirayare” ecahepuca. ³¹ Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tiúriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tiúrihi icha tamutu. ³² Jéhesare, nájinapa émejecapavaruímahi, énaripa ena israelítana, énaripa ena apavasanana, navetijipa ena vichamurianahí, taicha vicuticacahi eta machichairahavihi ema Viya. ³³ Ácutinu núti eta nuyehe-repihi. Ichapemurihi eta nuvarairahi nucurisamurechavaca namutu. Vahi nácarichuhini núti nutanucahini eta núrichiravayare. Énerichuva nutanuca-hivare eta núrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

11

¹ Núti puiti juca nítaresirahi, étapa nupanahí eta máitaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

Esu esena témetserajicavaya nayehe ena suchamuriana te iúrujisiravana

² Ichape eta nucunachahe eti nuparapenaveana, taicha eta emaemitisisiranuhi. Ímiyanavahivare éhica eta ímitucasivanahi nuyehe. ³ Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaqueneanapa, éna nachutiriannahivare ena esenana nayenana. ⁴ Eta tacahe, viti ajairana vahi viúrihahini vicaepacasihini te viyujarauchavaya étaripa te vicametarairuyare. Taicha te vicaepacasihi, tímicutijiricavaipa vémepuruhi ema Cristo eta vichutirihairahi éma. ⁵ Ésusera esu esena tatuparacahi ticaepacasiyarehi te tiyujarauchavayare, étaripa te ticametarairuyare. Taicha te vahi ticaepacasihi, tímicutijiricavaipa suémpuruhi ema suima eta suchutirihairahi éma. Te vahi ticaepacasihi ésu, tímicutijiricavaipa sucachucasiquenénahini ésu. Sucutihi ena túhusiana. ⁶ Esu súcani esena vahi suávarahahini ticaepacasi, ésu tivaraha sucutiyare ema mácani ajaira. Tásicha, te suvarahapuca suácutihavi viti ajairana, tiúripanahi sucachucasipaini, suítahisivanepaini. Téhesera te tímitsiriacavyarehipuca eta suítahisiraya, tiúripanaichuhi sucaepacashini, suácutihini ena supáraesenávana. ⁷⁻⁹ Taicha te tépanavanainapa ena achaneana, ema máinapuiruhi ajaira vahi étainahini máuchusinenahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahihi ema Viya. Eta máurinavahi tásiquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásiquenehi mayehe. Eta témeipyacahi esu esena, macompañerayare ema ajaira, mayenayarehi ésu. Vahi ésuina esu suémeipyacahini ema ajaira eta sucaimairaya. Eta tacahe, eta viyujarauchiravana, viti ajairana tatuparacahavi vahi vicaepacashini, taicha viti vicaquehehi ema Viya, vicuticacahi ema viáchucaini Adán. ¹⁰ Énasera ena esenana, tatuparacavacahi ticaepacasanayare eta nayujarauchiravana, nacutiyarehi ena ángelana ticaepacamiranahi te natupihamirauchayare ema Viya, navarairahi náimereca eta napicauchirahi. ¹¹ Puítisera, eta juca vítaresirahi véhisirahi ema Viáquenu, ichapemurihi eta véjiasiraipa eta náitátrahaviya ena esenana. Vítiripa ichapemurihivare eta náejiasirahavihi éna eta vítatiraya viti ajairana. ¹² Esu esena, yátupihi eta súchusirahi ésu te maeche ema ajaira, puítisera viti ajairana étapa viúchusihahi te sujuhe esu esena ticachichahavi. Viásiquenehisera vimutu mayehe ema Viya.

¹³ Nuvaraha epanerequenehaya yátupina eta juca. Németeaca nájina éti ímijachavahini tiúrihi esu súcani máepacasinávehi eta suyujarauchiravahi me Viya. ¹⁴ Viti ajairana véchahi eta tatsirihacarévahi viújijiquihini eta vichutimaca. ¹⁵ Suímiturevahisera esu súcani esena súrihahi tiújijiquiyarehi eta suchutimaca. Étara tiúrinachahi ena esenana. Náijaraichuhi éna eta nacaepacashiraya taicha natuparahaichuhi éna. ¹⁶ Te natiarinhinapuca nácani vahi navaraha nasama eta juca nímiturapihi, tacamuñuhi napanerechinavayare tativaina. Tájina vímatiyahini eta juca apayeherepi. Énaripa namutu ena vichamuriana, tájina apanaina nayeherepinahini.

Ema Pablo macajachavaca eta namaetupisiravahi te tinicanayare eta tincacare táicutiarahi eta máepeninahavihi ema Viáquenu

¹⁷ Tiuri puiti, numetacaheyare eta juca apana. Tájinapa ecunachacarevainahini nuyehe, taicha vaipa táetupicavahini eta iúrujisiravanahi eyujarauchiravana. ¹⁸ Jucarihisera eta juca ticatihi nuyehe. Nusamairicahi te iúrujisiravana íchirana eta culto, vaipa tacuticacahini eta epanereruana, íputsimuriavavacapa. Németeaca núti cañarihihi eta íchavaquenévahi. ¹⁹ Páurehesami

eta íputsimuriavairacacahi. Étainapasera ecaeheraiyaya eti yátupique-neanahi machaneranahi ema Viya, énapa ena vahi machaneranainahini. ²⁰ Eta juca tíchahehi vaipa táetupicavahini te ecurujicaca enisirayare eta tinicacare táicutiara eta máepeninahavihi ema Viáquenu te crusu. Váipasera émainahini tatupiruruchahini. ²¹ Títecapa vaipa ecuchapacacahini. Nararihi ticainapupuiricavanapa tinicana nayéhechirávavacapa. Tinahacavanapa térrana técavahachávanapa. Nararihisera ena apamuriana técuhanaripaicha. ²² Tájinapa táurivainahini eta juca íchaquenehi. Ticutipa tacuijaquenénahini epenainahini, étainapaini enisihahini érihahini. Tímicutijiricavaipa épuru-vacahi ena apamuriana machaneranahi ema Viya. Ímicatsiriacavare nácani tájinaquenehi naviyavahini. Étupicavaipapuca eta juca ecahehi. Tájinaque-nepasera ecunachacarevaina eta nuyehe.

*Eta táetupisiravahi eta vinisirahi eta tinicacare táemechahavihi eta máepeninahavihi ema Viáquenu te crusu
(Mt 26.26-29; Mr 14.22-25; Lc 22.14-20)*

²³ Núti tatupiruvahi eta nucaimitucasirahi mayehe ema Viáquenu. Tásicha, étarichuhivare eta nímiturapihi eyehe. Taicha ani tacahéhi eta nímitusirahehi: Te jena yátiquenehi te ticaijararecasiyarepa ema Viáquenu Jesús, mavehapa te mavahuana eta pan. ²⁴ Te tamutupa eta mahasulupayachirahi ema Viya, mayuetucapa eta pan. Tásicha, máichavacapa ena máimitureana: “Enica eta juca néche. Étivenehi nímijararecavahi eta népeniraya. Eta juca apajarahiyare te apaquehe, te étipava énicaca, éta témechaheyare nuyehe” macahepa. ²⁵ Te tamutupa eta nanisirahi, mavehavarepa te mavahuana eta máerirare, mahasulupayachavare ema Viya. Tásicha, máichavarepa ena máimitureana: “Era eta juca nítineama táepusairuvayare. Eta juca táicutiarahi eta nucaejasirayare eta arairu matratune ema Tata Vicaiyaquene eta eyehe, majacapiraheyare eti ecasiñanuanayare, arairupa eta éhiruyare. Eta íchiraparacayare te énicaca, éta témechaheya eta nuyehe” macahepa ema Viáquenu. ²⁶ Puíticha tanasi eta juca. Apajarahiyarehi viyehe. Te vénicaca étapa eta vésichacaca, vémechacacahi ena vichamuriana eta máepeninahavihi ema Viáquenu. Tiámáinucava vicainajiruyare te mápechavavare máiteca.

Tacamunu eta vipicauchirayarehi te vinicaya

²⁷ Namutu nácani tinicanahi téranahi eta táicutiarahi eta máepeninahavi ema Viáquenu, te vahi tétupicavahi eta napanereruanahi, váhivare napicau-chahini, ticapecaturanaripa éna. Náemepururecaripa eta máitine étapa eta máepenirahi. ²⁸ Eta tacahe, nácani tinicanayare, tativanumayare tipanereacavanayare te tájinahipuca náichiravainahini te mamirahu ema Viya. Te tájinahini nasama, tísapavanayarehi eta nanisirayare, náerirayare. ²⁹ Taicha te vahi tipicauchacarehi eta náimairahi eta maeche ema Viáquenu eta nanisirayare, náerirayare, énajivaichucha tíchavanahí, tímicoñacavanaripahi eta nanisirahi. ³⁰ Étara tíchahehi eta juca táitusiava esimutupa eti ecajumanahi, tájinapa tatumevainahini eta iáqueheana. Ena apamuriana tépenanapaipa táicha. ³¹ Téhesera vítijivahi vétupirica eta vítaresirahi, ema Viáquenu vahi tímicoñacahavimahi. ³² Taicha mavarahahi vétupiricayarehi. Vaipa vicaicuñaimahi tayehe eta nacaicuñairayare ena apamuriana achaneana máimatirahanahi ema Viya.

³³ Eta tacahe, eti nuparapenaveana, te ecurujicacayare eta enisirayare, ecuchapacacayare apaesa ínuna eta enisirayare. ³⁴ Téhesera matiarihipuca mácani técuhasamureripaicha, tiúripana manicanuma te mapena, apaesa

vaipa macuemecharecahe ema Viya taicha eta tamaetupisiravahi eta iúrujisiravahi. Étasera eta juca apamuriana téchacareanahi viyehe, nímaharinepá nútì. Nétupiricaya te níteca eta ara eyehe.

12

Vimutu viti vítpajijiasiravapachuyare maicha ema Espíritu Santo

¹ Nuparapenaveana, nuvaraha numetacaheyare eta apána téchacareana, apaesa yátupina ácaicutiara. Jucarihi apanapanenejihi eta vítpajijiasiravayare maicha ema Espíritu Santo.

² Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicaheana éhica eta nasiñarajiana tájinaquenehi eta tajícaparaiváinahíni. ³ Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te nacahepuca: “Másájtatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espíritu Santo, nacarichu ena tatuparacahi náimatiyare eta aquenucairahi ema Jesús. Énasera ena vahi mávaháruanainahini ema Espíritu Santo vahi tatuparacahini nácahepuca: “Ema Jesús émara Viya Viáquenuhi”.

⁴ Víti mávaháruanahi ema Espíritu Santo, apanapanenejihi eta vítpajijiasiravana máijararuhavianahi. Émanarichuhisera éma. ⁵ Énerichuvare apanapanenejihi eta vémataneana máijararuanahi ema Viáquenu. Émanarichuhisera éma. ⁶ Te tamutu eta vicaematanerasira, ema Viya émarichuhi ema téchahavihi, tíjaracahavihi eta vitumevahi, viratahairaya vimutu. ⁷ Énerichuvare ema Espíritu Santo, víjaracasipachuhi eta vítpajijiasiravayare máicha, vímitusihayarehi eta tasimutuqueneanahi namutu ena vichamuriana. ⁸ Nararihi ena máimicatacavaca ema Espíritu Santo eta náitusiraya téchajicana, náimiturresiraya. Ena apamuriana máijaracavacavare máejerareyare eta nacaicuttiarairaya eta mapanereruana ema Viya. Émanarichuhisera ema Espíritu Santo tíjaracahi eta juca. ⁹ Nararihivare ena máijararuanahi eta nacuchapirayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena máijararuanahi eta nacanarasirayare ena nacajumaqueneana. ¹⁰ Nararihivare ena máijararuanahi eta nacuchusiraya eta tiáramicareana. Ena apamuriana náijaraichuvare eta ticametacasianaya mayehe ema Espíritu Santo eta máechajiriruvanahi ema Viya. Ena apamuriana máijaracavare eta náimatiasiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana máijaracavare eta tiúririchuya eta náechajisiraya eta apaechajiriruvana. Ena apamuriana máijaracavare eta náitusirayare, nápepica náechajisiha eta apaechajiriruva, trépeteanayarehi. ¹¹ Tamutu eta juca máichaqueneanahi ema Espíritu Santo. Macarichuhi ema máitaparahahi máijaracavaca eta náitucaquenepachuyare namutu ena mavarahaqueneanahi máijaraca.

Émanarichuhi ema véhiruhi

¹² Viti achaneana, apanapaneneji eta táijareana eta viáquehe. Tisimutuhi eta táitupajijiásiravana. Étanarichuhisera eta táuchusihahi te viáquehe. Ene tacahéhi eta véhisirahi ema Viáquenu Jesucristo. Vimutu viti véhicanahi éma, apanapanenejhavihi, visimutuhivare. Émanarichuhisera ema véhiruhi.

¹³ Tacahé, vahi étaparacaina te israelítahávipuca, te apavasasajuecuhavihi-varepuca, étaripa te máquenurehavíhipuca. Téhesera te vicaicachasipa eta

véhisirayare ema Viáquenu, étanarinepa eta vímahi maicha ema Espíritu Santo. Énerichuvare, eta mávahásirahaviripa, vicuticacaripa eta máecasarechirahavihi eta viáchanevana.

¹⁴ Yátupi eta viáquehe vahi étanainarichuhini eta táimahianahi, étapa eta títupajijiasiravanah. ¹⁵ Étaripa eta vívape, vahi távasihini eta vivahu, vahivare tacuticacahini eta títupajijiasiravanah. Étarichuhisera táunavahi eta viáquehe. ¹⁶ Étaripa eta vichaca, vahi távasihini eta viúquiha. Étarichuhivaresera táunavahi eta viáquehe. ¹⁷ Váiparinehi tauricaimahi amairihainahini eta viáquehe tacauquihahini. Tásiha, tacujapucaini viquiñainahini, tacujapaini visamaquenénahini. Vahivare tauricaimahi amairihainahini eta viáquehe tacaquiñahini. Tásiha, tacujapucaini visirinahini, tacujapaini vijiurenahini. ¹⁸ Ema Viya manacahi eta taeematanerepianayarepachuhi eta juca táunavanah eti viáquehe. Taicha tacahehi eta mapanereruhi ema Viya te tépiyacahavinapa. ¹⁹ Vahi mávarahahini étanainarichuhini eta títupajijiasiravainahini eti viáquehe, amairiquihahavinahipucaini. ²⁰ Yátupi tisimutuhi eta títupajijiasiravanah eti viáquehe, étanarichuhisera eta távhahi.

²¹ Tamutu eta juca viáquehe ticamunujircacahi. Étaripa eta viúquiha tacamuuh eti vivahuana. Étaripa eta vichuti tacamunuuhivare eta vívapeana, vipaisihayare. ²² Étaripa eta tiávihanahi te amahe vijuhe, matumearaira-haihah eti vímairahi, étahisera tiápajucavahi ticamunucarepanah. ²³ Jucarihi eti viáquehe ticutimahi vahi múnainah eti vímairahi. Étahisera tiápajucavapanah vimuiriachahi. Jucarihivare eti viáquehe vaipa tauricahini vímere-cahini. Tásiha, tiápajucavapanah vépacucurehi, vicatiuchahivare. ²⁴ Jucarihivare eti apana táunavahi eti viáquehe ticutimahi vaipa vicamunuhi vépacuchahini. Tímererecavahi nayehe ena achaneana. Tamutu eti juca máepiyaruanah ema Viya, máicuchahi eti táimahianapachuhi, mavarahahi tacuticacahi eti vémunasiraya tamutu eti táunavanah eti viáquehe. ²⁵ Eta tacahe, te vicaematan, tamutu eti viáquehe tiyamuricahi, tímicatajircacahi. Ichapehi eti taejiasiracacahi. Vahi táiputsiacacahini. ²⁶ Étaripa te tatiarihipuca eti táchavaqueneyahi eti táunavahi eti viáquehe, támairiacahi ticati eti viáquehe. Téhesera tatiarihipuca eti taurisamurevahi taicha eti títupajijiasiravanah, tamutuyarehi eti viáquehe tiúrisamure.

²⁷ Ene ecahehi éti eti éhisirahi ema Viáquenu Jesucristo. Eta iúrujisiravahi mayehe, ecuticacahi eti táunavanah eti máquehe. ²⁸ Énerichuvare, ema Viya tituparacahavipachu eti viávacurepachuhi, mavaraírahi vijaneacaheyare eti vichamuriana, machaneranah. Tituparacahavihi viti apóstoleana vímahaheya, énapa ena profetana, énapa ena tímiturecarahianah eti máechajiriruvana ema Viya, énapa ena tituruequenehanah nacuchuca eti tiáramicareana, énapa ena ticanararecanah ema nacajumaqueneana, énapa ena tímicatarahianah nayehe ena nacamunuquenévana, énapa ena tiúrianah eti nacavanairipirana, énapa ena tiúririchu eti náechajisiha eti apaechajiriruvana, énapa ena trépeteana titucanah nápepica eti apaechajiriruvana. ²⁹ Vahi étanainarichuhini eti viávacureanah. Vahi vámutuhini apóstolehavinhini, vahi vámutuhini profetahavinahini. Vahi vámutuhini vímiturecahini. Vahi vámutuhini vicuchuca eti tiáramicareana. ³⁰ Vahi vámutuhini vítupajijiacavahini vicanararecahini ema nacajumaqueneana. Vahi vámutuhini vechajicanahini te apaechajiriruvana. Vahivare vámutuhini trépetehavinahíni. ³¹ Tiuri puiti, étipa tacamunu eyaseaca ema Viya máijaracahe eti ítupajiji-siravaina eti ticamunucarepana. Jéhesare, nuvaraha nímitucaheyare eti apana taurinaquenepana. Esamanuchaha.

13

Eta ticamunucarepanahi eta vémunaraivaya

¹ Vítiripa, te tacuijahipucaini eta vémunaraivainahíni, vaipa tisuapacarémahi eta vimetarairuana. Vémunasiricavapa. Tayanapane vítucahipuca véchajica tamutu eta apaechajiruvana, vácutipucaini eta náechajisira ena ángeleana. ² Te tacuijahipucaini eta vémunaraivainahíni, tájinapa vicunachacarémahi me Viya. Tayanapane vicametarairuhipucaini eta vimetacasivanahi te anuma, támuthivarepuccaini víturuequeneháini, étaripa te máijahúchacucaini macayejecahini ema Viya eta ichapequene mari táichavenénahíni eta viyaseasirainahini eta vicasiñavairainahini eta mayehe. ³ Tásicha, te tacuijahipucaini eta vémunaraivainahini, tájina vijacapacaréimahi me Viya táicha. Tayanapanevare vicajiricahipucaini tamutu eta vímahaqueneana te vipena, téhevare vísapapucaini náijuchaini eta viáquehe táichavenénahini eta namaurisirahi véhica ema Viáquenu. ⁴ Téhesera yátupihi vémunarahi, vicayehheyarehi paciencia, vijapanurahiyare. Vahi vicapinarurecaimahi. Váhivare píncanillahavimahi. Váhivare vicasiñavavaicaimahi. ⁵ Váhivare vicavapajaimahi jácani táíñemahiqueneana. Váhivare viverejimirauchaimahi ena apamuriana achaneana. Váhivare tijuricati visemaimahi. Váhivare viciatianarecaimahi. ⁶ Váhivare táuricahini vicaecahirahihini te vímaha nácani ticaejeanahi. Viúrisamuresera te vímaha ena achaneana tiúrihi eta náitaresira. ⁷ Te yátupihi vémunarahi, vicamichayare tamutu. Vahi énevanémahi visuapa eta echajirrucavana náepiyapiruanahi ena achaneana. Vicuchapayarehi eta táetupirisiravayare eta panererucana. Vahi víjahúchavaimahi vínjicava, vicuchapinávayare. ⁸ Tájinapa titaimahi eta vémunaraivayare, vímiyanavainapa eta vítare-siraya. Eta jena sácheanayare, vímatiequeneha tamutu. Vaipa vicamunu eta vimetacasivana eta metarapianayare tásihaqueneanayare me Viya. Tájinapa viátajivaimahi eta visamirayare eta apaechajiruvana. Váipavare tácaje-ralimahi eta visamirayare vímatiequenehavanénapa. ⁹ Taicha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueneanahi me Viya. ¹⁰ Járajapainapasera eta sácheyare, vímatiequenehainapa yátupi eta mapanereruana ema Viya, eta vimáimatiéqueneruanahi puiti. Vaipa vácamunu ena tímituca-haviana.

¹¹ Nímicutichavahi nútì eta viámaperuvahi. Vuíchaha vítucahini vipanerereca, vimapachichijiricavaichaha. Téhesera te ajairahavipa, te esenapuca, títsivachavapa eta vipanereruana. Vínjicapa eta viámaperuvainihi. ¹² Ene vicahehi víti eta juca vítaresirahi. Puiti vuíchaha támuthíni vímatiequenehahini. Ticutirichaha te vímararacaicha eta vicuna te jácani ichasi espejo, vahi tacaecherahini. Járajapainapasera eta sácheyare ticaecherainapa tamutu. Puiti, ticajera eta vicaicutiarairahi víti. Ema Viya vuíchaha tímituca-hávhíni tamutu eta mapanereruana. Téhesera te apajarahnapa, tamutuya vicaicutiara máicha. Tacutirichu eta máimairahi puiti eta vipanereruana víti te amahe eta visamureana. ¹³ Puiti, eta juca vicaijuheya, vímiyanava vámuto muracaina eta vicasiñavairahi me Viya, váhivare vicuyacujihini eta vicuchapirapaipa eta viúrivainapaipa, tacuijavareni tahapapiricahini eta vémunaraivayare. Jéhesare, tiápajucavapanayarehi eta vémunaraiva. Étara ticunachacarepanahi me Viya.

14

Tísapacare eta náechajisiraya eta apaechajiruvana

¹ Tacahe, nuvaraha nútí yátupina eta émunaraivaina. Nuvarahahivare eyaseaca ema Espíritu Santo eta ítupajijasiravaina, étaripa eta ítusiraina ecametarairu eta máechajiriruva tásihaqueñeanahi mayehe ema Viya.

² Tájina táichava, nácani téchajicana ema Viya eta apaechajiriruva. Éma masamahi. Vítipasera viti apamuri vaipa vácaicutiarahini eta náechajiriruvahi. Yátupihipuca máimitureanahi ema Espíritu Santo, vähisera náimereuchavahini eta máimiturapihi éma. ³ Vahi tacuti nácani nacametarairuhi eta máechajiriruvana tásihaqueñeanahi mayehe ema Viya, ticaicutiaracarehi tamutu eta nametarapianahi. Tatupiruvahi eta námitusiravacahi ena apamuriana. Náetumechahi eta náchanevana eta nasuapiraina. Éta nacurisamurechihavacahi te jácani napanereresirana. ⁴ Ema mácani téchajicahi ema Viya te apaechajiriruva, mayehechiravarichuhi te máchaneva eta macajurusiraya eta masuapajiraivaya. Émasera mácani ticametarairuhi eta máechajiriruvana tásihaqueñeanahi mayehe ema Viya, macajurusinahi eta nasuapajiraivayarehi ena machamuriana.

⁵ Nuvarahahinéni nútí ámutuhini ítupajijiacavahini maicha ema Espíritu Santo, échajicahipucaini te apaechajiriruvana. Tiápajucavahisera eta nuvarairahi ecametarairuhini eta máechajiriruvana tásihaqueñeanahi mayehe ema Viya, taicha étara tiúripanahi eta juca tayehe eta échajisirainahini te apaechajiriruvana. Tiúrihínéni échajicahini, tacamunuhisera natariinhinahini nácani trépete, nametacavacasarepainedi ena apamuriana eta tacayemaqueneanahi apaesa tajurusihapaini eta nasuapajiraivainahini. ⁶ Nútiripa, nuparapenaveana, nítecapauchahepucaíni néjirapanahéhini, tásihá néchajicahipucaini te apaechajiriruva eta eyehe, éti vahi ácaicutiaraimahi, váiavare tímicatacrahémahi eta tajurusirainahini eta ecasiñavairahi me Viya. Tacamunuhi néchajicahíni te échajiriruvaichu eta námitusirahénahini, éti ecaicutiarasarepainedi tamutu eta numetacasivanahi me Viya, étapa eta máimerechaquenenuhi, étapapuca eta máimatiquenehi, arairu eta viyehe.

⁷ Eta juca tímicutijiricavahi te mapacharajíhi eta masiviviripi ema ticasivivihi. Vaipa tacaicutiaracarehini tájahapuca eta masiviviripi. Émaripa ema violinista, vähivare ticaicutiaracarehini tájahapuca eta mapununerapi.

⁸ Énerichu tacutihi mácani cûrnetérú nayehe ena suntaruana, te vähivare ticaicutiaracarehi eta macachujairahi, váiavinehi tiúrujicavanaimahi ena suntaruana táchuhaqueñeanahi, taicha vahi nácaicutiarahini. ⁹ Ene ecahehi éti, eta échajisirahi eta apaechajiriruva, nájina nacaicutiarahini. Tímicutijircavaipa nacuijahini nasamararacahehini eta échajisirahi. ¹⁰ Yátupi tisimutuhi eta apaechajiriruvanahi te juca apaquehe. Nayehepachuhisera nácani ticaechajiriruvanapahi. ¹¹ Vítiripa te náechajicahipuca ena extranjeroana te náechajiriruva, váiavinehi vácacutiaraimahi. Énaripa vähivare ticaicutiarahivanaimahi víti. ¹² Tiuri puiti, vahi tacumapuriji eta evarairahi ejacapa eta ítupajijasiravanaya máijararuheyarehi ema Espíritu Santo. Tiúripana eyasesereca eta ítusiraina ímitucavaca ena echamuriana apaesa tajurucapaipa eta nasuapajiraivaina éna apanava.

¹³ Tásihá, mácani téchajicahi te apaechajiriruva, tacamunuhi mayaseacahini ema Viya eta máitusirainahini mametacavaca eta tacayemaquenehí etá máechajiriruvahi apaesa nacaicutiarasarepainedi nácani tisamararacanahí.

¹⁴ Taicha etá viyujarasirahi víti te apaechajiriruvana, te vítapiricapa etá viyujarasirahi, vahi tánasihini véchavahini etá vicayemaqueneanapahi, vémitiscavanehi tamutu. ¹⁵ Eta tacahe, tiúripanahi viyujaraca te véchajiriruvaichu, tásihaqueñeanahi te visamure. Te vijirayarepuca, tiúripanahivare te véchají-

riruvaichuvare, tásihaqueñenahivare te visamure, vicaicutiarasarepaipa eta vicayemaqueneanapahi. ¹⁶ Téhesera apaechajiruvahí eta eyujarasirahí me Viya, yátupihi eta ecunachirahí éma. Énasera ena tisamararacaheanahí vahí náehicaimahi eta eyujarasirahí náimicatasirahehini eta nayujarasirahí; taicha vahí nácaicutiarapahíni eta ecayemaqueneanapahi. ¹⁷ Tiúrihinéni eta eyujaracasahi eta ehasulupayachirahí ema Viya, énasera ena echamuriana vaipa táimicatacavacahini eta eyujaracasahi. ¹⁸ Jéhevaresera núti, ichape eta nuhasulupayachirahí ema Viya taicha eta nítusirahí néchajica eta apaechajiruvana. Nucachuriacahehi emutu éti. ¹⁹ Étasera te nucametarairuyare te namuri ena vichamuriana, vahí nuvaraha nácuti ena tiúpiemana eta náechajisira te apaechajiruvana. Núti ánipirichu te néchajica, tamutuhisera ticaicutiaracarehi nayehe ena nímitureanahi.

²⁰ Nuparapenaveana, éti vaipa amaperuhénahini. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihini ena amaperuana vuíchaha náitucahini naicha eta tamauriqueneana. Énenapaini ácahehini éti. ²¹ Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiruvana náimitureca eta nuvanairipiana eta nayehe ena achaneana távacuanahí eta avasare. Váhuenesera nasuapaimahi” macahepa ema Viya.

²² Tacahe, nácani tiyujaracanahí te apaechajiruvana, táicutiarahí eta máijarasiravacahi ema Viya náichavenehi ena máehicaranhanarichaha ema Viáquenu. Jéhesare, tayuchusamurechavacayare eta nasamararasirahí. Énasera nácani ticametarairuanahí eta máechajiruvana ema Viya, tayuchusamurechavacayare ena téhicanahí ema Jesús, taicha ticaravahuanayare eta nasamararasirahí. ²³ Étasera te jácani iúrujisiravana, te eyujaracahipuca emutu te apaechajiruvana, tásicha, te natarihipuca nácani masuapajirairahanarichaha, ticaecahiheanayarehi éna, náimijachayarehi máurishihehi. ²⁴ Tiúripanayare eta ecametarairuiraya emutu eta máechajiruvana ema Viya, te échajiríruvaichu. Tásicha, te natarihipuca te iúrujisiravahí ena masuapajirairahanarichaha, ticatisamurevanayarehi taicha eta nasamararasiraya. Tipanerequenehavanainapa eta nacapecaturairahi. ²⁵ Tacahe, tímatiacavanainapa eta máimatinrahi ema Viya tamutu eta napecaturana tayumururevanainihi. Tépuycanainapa téneuchavanainapa mayehe ema Viya. Téchajisiaheanainapa: “Yátupiquenéyapa mávahácavacahi ema Viya ena nániana” nacahenapa.

Tacapicahu tamutu eta iúrujisiravana

²⁶ Nuparapenaveana, áni tacahheyare eta iúrujisiravanayare. Enerejicava eti íputsiacavayare eta ejirairaya. Énerichuvare tinerejicavayare mácani tíjaracavayare ema tímiturecayare. Énerichuvare te matiarihinapuca mácani mavarahahi ticametarairuyare eta mametacasivanahí me Viya, tájinachucha táichavahí. Tísapacarehivare eta échajisirayare te apaechajiruvana. Tacamu-nuhisera matiarihiyare ema trépeteyare. Tamutu eta júcana, étara ticajurucayare eta masuapajiraivainapaipaicha ena echamuriana. ²⁷ Téhesera te natarihinapuca apinana, mapananapuca ena tivarahanahí téchajicana te apaechajiruva, tájinachucha táichava. Tísapacarechucha. Tévachajiricacanayarehisera te jácani náechajisirayare. Váhivare téjiacavaimahi ema nayeheyare trépete. ²⁸ Téhesera nájinapuca naviyavahí ema nayeheyare trépete, tiúripanaichuhi vahí nacuechajica te apaechajiruva te namuri ena echamuriana náurujiruvanahí. Tiúri, te navarahahipuca náechajica ema

Viya, tavarahahi nacarichuyarechucha eta náechajisiraya. ²⁹ Nácani ticametarairuanayare eta máechajiruvana tásihaqueneanahi mayehe ema Viya, te apinanahipuca, mapananahipuca, tájinachucha táichavahi, tiúrichucha. Ticamunucarehisera ena náurujiruvanahi tisamararacanahi napaneréque-nehayarehi tamutu eta nacayemaqueneanapahi ena ticametarairuanahi. ³⁰ Téheserapuca matiarihihi mácani maejaruhi, ticametacasihiquenehi me Viya; tásiha mavarahapuca macuchujipica eta mamecasivahi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica. ³¹ Emutu eti ecametacasiqueneanahi eta máechajiruvana ema Viya, ítsivajiricacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava. ³² Ena ticametarairurahiana tatuparacahi ticuchapavanayare. Vahi ticainapupuicavananaimahi. ³³ Taicha ema Viya vahi mávaraha mapacharajinahini nácani ticametarairuanayare. Tásiha, éti ecaejarusinavayare apaesa ecurisamurecha ema Viya.

Táepiyarichuhi eta juca viyeherepi víti te viúrujisiravana. ³⁴ Ena vichamuri-ana esenana timatinanayarehi. Vahi téchajicanaimahi. Nasamararasinaavaichucha. Taicha suíjaraichuhi me Viya esu esena susamararasira-yareichuhi. ³⁵ Te tatiarihipuca eta suvarahaquenehi suecha esu esena, tiúripanahi te náitecapapa te napena suyaserecpa ema suima. Taicha vahi súrihahini esu esena sucayaseseruhini eta suvarahaquenehi suecha te namuri ena echamuriana.

³⁶ ¿Tájaha tacayema eta ecasiñavavaisirahi? Vahi étinahini ínapucahini mametacahehini ema Viya eta máechajiriruva. Váhivare ácarichuhini éti tatuparacahini eta ejacapirahi. ³⁷ Te natiarihipuca nácani tímijachavanaripa náimatiéqueneharipa tamutu eta máechajiriruva ema Viya, náimijachaipapuca mávahácavacaripa ema Espíritu Santo, tatuparacahi éna napáne-rechinávanumayare eta juca nájurehi eyehe, tásihaquenehi me Viáquenu, mavanairipichuhi éma. ³⁸ Téhesera matiarihihipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

³⁹ Tiuri, nuprapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva. ⁴⁰ Tacapicahuhisera támputu eta iúrujisiravana. Ecaejarusinavapahi tamutu eta íchaqueneanayare te iúrujisiravanahi.

15

Eta máechepusirahi ema Cristo te máecari

¹ Nuprapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta viúchucuirayare. Étara táemesiavahi eta juca te esemainapa, etupiruvavanehi ejacapa. Puíticha tanasihi eta esuapirahi. ² Tásiha, puiti iúchucuhapaipa táichavenehi eta ímiyaniravahi esuapa eta numetarairuanahi eyehe. Németeaca yátupihi eta íjarasiravahi eta éhisiraya eta juca esamaquenehi.

³ Écharichuhi eta nímiturapianahi eyehe, étarichuhivare tacahehi eta nímitucasivahi. Eta júcana eta tisuapacarepanahi: Yátupirahi máepeninahavihi ema Cristo táichavenehi eta vipecaturana, émairahi ema táchajisihaquenehi eta Sagrada Escritura. ⁴ Eta náimairahi tépenapa éma, náecarapa. Téchepucahisera éma te mapanaquenepa sache, taicha tacahehi eta tametarapihi eta Sagrada Escritura, timetacahavihi tamutu eta máichararacavayarehi éma.

⁵ Tímerecavahi mayehe ema vichamuri Pedro, énerichuvare ena apamuriana apóstoleana. ⁶ Tásihapa tímerecavavarepa nayehe ena quinientoqueneana

eta nasimutuvanahi ena vichamuriana. Puíticha nararihichaha maverana ena tímahanahi. Nararihipasera ena tépenanapaipahi. ⁷ Te táequenavarepa, tímerecavavarepa mayehe ema Santiago. Tásiha, tiápechavavarepa tímerecava nayehe namutu ena apóstoleana.

⁸ Tásiha, te táequenavarepa eta júcana, tiápechavapa tímerecava nuyehe, nútipavapa nímahahi éma. Ichape eta táramicarevahí nuyehe eta máichuiranuhí nútí néquenereruhi mayehenuyarehi apóstole, tacuti eta táijahúchirava te tiújucayare esu esena. ⁹ Ichapemurihinéni eta némepuruirávahí nútí nayehe ena apamuriana apóstoleana. Váhivare táuricahini apóstolenunahini eta nímairavahí, taicha ichapemurihi eta nupanajirisirávacahi ena náinapureanahí machaneranahí ema Viya. ¹⁰ Tíchuanuhisera ema Viya, taicha eta máemunasiranusamihi. Apóstolenuhi puiti eta mayehe. Váhisera némepurerecavahini eta máemunasiranuhí. Jéhevare nútí, nucachuricahí ena apamuriana apóstoleana. Ichapemuripanahí eta nucaematareasirahí éma. Váhisera níputsiaracavahini nútí. Eta máemunasiranuhí ema Viya, tímicatacanuhí eta nucaematanerahí. Tíjaracanuhivare eta nétumechiravahí. ¹¹ Tájinaserá vahí étaparacaina eta juca nájahapuca nácani ena ticaematanepanahí. Étarichuhí eta vímiturapiana eyehe, eta esuapaquenehi puiti.

Tayanapane vépenapapuca, véchepucayarehisera

¹² Víti vímitucaheripa eta máechepeusirahí ema Cristo te máecari. Németeacasera etiarihichaha eti vuíchaha esuapahini taicha nusamairiricahí eta ecahehiji: “Vahi téchepucanaimahi ena náepenaqueneana”. ¿Tájahapuca tacayema vuíchahacaruhi tasuapacarehini eyehe? ¹³ Éti ejecapavahí eta epanereruana. Ímijachaipapuca vahí máratahaimahí ema Viya mácaeche-pucavaca ena náepenaqueneana. Te vahí macuratahahini, váhivarepucaíni macucaechepeucahini ema Cristo te máecari. ¹⁴ Tacahé, te vahí macuechepucahini ema Cristo, váipapucaini tacusuapacarehini eta vímiturapianahí eyehe, tamapurujipapucaini eta esuapirahí. ¹⁵ Te yátupinahini vahí tacusuapacarehini eyehe eta náechepeusirayare ena náepenaqueneana, váhivare tacusuapacarehini eta macaechepeusirahí ema Viya ema machicha Cristo. Tímicutijircavaipahini vépiyahirahihini vivayuarerecaipapucaini víti te máijare ema Viya, taicha eta vímitusirahehi eta macaechepeusirahí ema Viya ema Cristo.

¹⁶ Te yátupinapuca vahí tisuapacarehí eta náechepeusirayare ena náepenaqueneana, váipavarepuca tásuapacarehí eta máechepeusirahí ema Cristo.

¹⁷ Énerichuvare, te váhipuca tisuapacarehí eyehe eta máechepeusirahí ema Cristo, tásiha énerichuvare váipapuca tisuapacarehivare eta macaepahaira ema Viáquenu eta epecaturana táichavenehi eta ecasiñairahí éma. ¹⁸ Te yátupinapuca vahí tisuapacarehí eta júcana, tímicutijircavaipa témitiequeneanaripa ena náepenaqueneanahí téhicanahí ema Cristo te achaneanarichaha.

¹⁹ Te yátupinapuca vahí tisuapacarehí eyehe eta júcana, tamapurujiripa eta vijaneasiravahí eta vítaresirahí puiti juca táichavenehi eta vicuchapiravahí vivarairahí vicachane ema Cristo te apana vítaresira. Te vahí tacuitauchava eta juca, ichapeyare eta vicatisamurevairaya.

²⁰ ¡Yátupiquenehisera eta máechepeusirahí ema Cristo te máecari! Tacahé, éma ecutiararehí viyehe eta véchepusirayare víti apanavare te vépenari-papuca. ²¹ Taicha eta vépenira manaqipairuhi ema máinapuiruhi ajaira te juca apaquehe ticaijare Adán. Ene macahehi ema Cristo, éma tinaquipaicahí eta máinapuisirahí tayehe eta véchepusiraya te vécarí. ²² Táichavenehi eta mámariequenerahavihi ema Adán, émapa tiámahavíhi tayehe eta vépenira. Puítisera táichavenehivare eta véhisirahí ema Cristo, émapa tiámahaviyare

tayehe eta viápechiravayare vítareca. ²³ Yátupiquenehi táejarurevahi eta juca. Tínapucahi ema Cristo téchepuca. Éma ecutiararehi viyehe. Tásiha, te mápechavare máiteca te juca apaquehe, énainapa téchepucanayare ena náepenaqueneanaripa machaneranahi. ²⁴⁻²⁷ Taache, tiánehinapa eta táchecuaraquiyare eta tamauriqueneanahi te apaquehe. Taicha ema Cristo macamitiequenahainapa tamutu eta náitupajijiasiravanainihi ena táquenuruhanainihi eta tamauriqueneana. Ema Viya máijaracayarehi eta matumevayare macapaquechirayarehi namutu ena mánaranahi, étainapa mácatayanusihavacayare. Taache, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”. ²⁸ Tájinaserá vahi ticasíñavavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tíjaracahi ema Machicha eta máitupajijiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

²⁹ Tiuri puiti, nararihi ena apamuriana ticaicachasianahi náitsivahi ena náepenaqueneanaripa, namavarairahi náemitiequenehahini tayehe eta náechepusirayare. Ena nani, muracahi eta nusuapirohi eta yátupirahi eta náechepusirayare ena náepenaqueneanaini.

³⁰ Nuvaraha ácutihavi víti eta vicasíñairavahi me Viya. Tayanapane ichape eta tacauyayacarevahi eta vépenirainahini puiti juca sácheana, vicamichahisera tamutu taicha vicuchapavahi eta macaechepusirahaviya ema Cristo. ³¹ Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurisamurechavasera eta nürismurevahí icha éti eta iúrivaipahi mayehe ema Viáquenu Jesucristo. ³² Núti muracahi eta nusuapirohi eta véchepusiraya te vécariana. Te váhipuca nusupahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táíñehiqueneanahí.) Tájinachuchasera táimaequenénahini nuyehe eta nímiyanavayare eta nucatiuchira eta vélhruhi, te tacuija yátupinahini eta véchepusirayare te vépena. Nararihisera ena téjecapavanahi eta napanereruana. Tímijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, viúrisamureyare taicha achichupuca vépenacaru. Tásiha, titavainapa tamutu eta viyehe” nacahepa.

³³ Vahi tacucaehe eta epanereruana éti. Taicha éna, vahi tétopicavahi eta nayeherepianahi. Ticauyayacarehi nájarareca eta taurinavaipahi eta eyeherepiana. ³⁴ Tátupiruvapa táuri eta ítaresiraina éti. Váipavare ecuquichá eta pecatuana. Taicha nararihi ena vuíchaha náimatihini ema Viya te emuri. Titsiriacereripahi eta nacásiriquirahehi eti machaneraqueneanahí ema Viya.

Apanainapa eta vicaqueheyare eta véchepusirainapa

³⁵ Németeaca nútí nararihi vuíchaha nusuapahini. Navarahapuca tiyaserecanuanaya: “¿Tájahapuca náicharacavayare eta náechepusirayare ena náepenaqueneanaini? ¿Tájaimahinapapuca eta nacaqueherayare?” ³⁶ Ena tiyaserecanuanaya, tájina náechaqueñéna. Puiti, nuvaraha epanerequeneha. Nímicutiarachinaheyare tayehe eta evaraqui. Eta evaraqui vélhira tímamuca te vahi vémuriachahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiha, te táchecuaraquiyare eti viáqueheana arairuya. ³⁷ Te vélvacapa eta jácani evaraqui, vémuriachapa te

apaquehe. Te tinanapahi eta apaquehe, tímarucapa eta vévaraqui. Váhisera étainahíni tachavahini táuchucuhini eta evaraquihi. ³⁸ Táquehepachuhi eta táimarusirahi eta evaraqui maicha ema Viya. Vahi apaimamajinahini eta táimaru. ³⁹ Étaripa eta veche viti achaneana, vahi távasimahihíni eta taeche eta sárare. Apanahi eta támahi. Eta taeche eta cágure, apanahivare eta támahi. Eta taeche eta jima, énerichuvare apanahivare eta támahi. ⁴⁰ Énerichuvare, eta nacaquehera ena tiávihanahi te anuma, vahi távasihini eta vicaqueherahí viti viávihanahi te juca apaquehe. Apanahivare eta táurinavahi eta nacaqueherahí éna. Víti, apanahivare eta táurinavahi eta vicaqueherahí. ⁴¹ Énerichuvare nuvaraha ácaicutiara eta tajaraivahi eta sache, apanahivare eta támahi. Vahi távasihini eta tajaraivahi eta caje. Étaripa eta tajaraiva eta jarairiquiana, apanahivare. Jararihivare eta tijarahipanvacahi tayehe eta apamuriana. ⁴² Ene tacaheyare eta vicaquehera víti te véchepucapa. Apanayare eta támahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepucayarehisera eta apana viáqueheyare eta máepenacacainapa. ⁴³ Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerrairahahi. Téchepucayarehisera eta viáquehe, tétavicavainapa eta tatumevayare. ⁴⁴ Ticaecaracasiyarehi eta enaha viáquehe. Téchepucayarehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahí ema Cristo eta máechepusiraipa. Tanasiyareichuhi eta támahi eta viáquehe, espíritu napasera.

⁴⁵⁻⁴⁶ Eta Sagrada Escritura, tacahehi eta taechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecahi eta vímarusirahi viti achaneana, viciutihi éma eta vijurusirahi eta vítaresirahi. Tásicha, te taequenénapa, ema apana ajaira ticaijare Cristo, émapa tíjaracahaviyare eta apanayare vítaresirayare, vicaquehenapa eta máquehe. ⁴⁷ Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

⁴⁸⁻⁴⁹ Viti achaneana, énerichuhivare mátejihi eta viáquehe, taicha mámariequenehavihi ema máinapuiru ajaira. Eta vicaqueherahí tavasimahihí eti macaqueherahí éma. Tipachinayarehisera eta viáqueheyare, tacutiyare eta tapachinavahi eta macaqueherahí ema ticavasahi te anuma. Eta vicaqueherayare tavasimahiyare eti macaqueherahí ema ticavasahi te anuma, taicha machichahavihi víti.

⁵⁰ Nuvaraha níminecapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticait-siva eta veche máteji, máepenacacayarehi éta. ⁵¹ Énerichuvare nuvaraha níminecapáequenehahéyare eta juca tayumururevainihi: Vahi vámuntuimahi vépenayare viti vítareruanáichaha. Ticaitsivayaresera eta viáquehe, víti énapa ena náepenaqueneanaripahi. ⁵² Ticaema eta chujare, tíchuhahavinapa viti vélhicanahi ema Cristo. Tíjahúchavainapa eta tátsivachiravainapa eta viáquehe viti vítareruanáichaha, tacutiyarechucha viúmatsisina. Tíjahúchavainarepa téchepucanayare ena náepenaqueneana, máepenacacanainavarepa éna. ⁵³ Taicha tatuparahahi eta viáquehe ticaitsivayare, máepenacacainapa. Máihecuarquirenapa eta vítaresiraya. ⁵⁴ Te tamutupa eta tátsivachiravayare eta viáquehe, titáuchavainarepa eta tametarapianahi eta Sagrada Escritura: “Ema Viáquenu macaepahaipa eta vépeniraini”. ⁵⁵ ¡Vaipa tápica-

carehi viyehe eta vépenirapapuca, taicha vahi vánasimahi vépena! ¡Yátupihi eta véchepusiraya te vécari! ⁵⁶⁻⁵⁷ Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayarehisera máichavenehi ema Viáquenu Jesucristo. Tásicha, te jena sácheyare, vaipa vicapecaturaimahi. Váipavare vicaicuñaimahi táicha. Vaipa vépenaimahi.

⁵⁸ Táitusiava, eti némunaruqueneanahi nuparapenaveana, ímiyanavachucha eta étumechiravaina tayehe eta juca véhiruhi. Vahi tacuequequérecava eta epanereruana. Ecaemataneacaquenenayátupina ema Viáquenu, taicha écharichuhi éti vahi támapurujimahi eta ecaemataneasirahi éma.

16

Eta nanaquiruvanayare

¹ Étasera eta juca enaququisiravayare eta nayeheyare ena vichamuriana ticavasanahi te Jerusalén, étarichu éhicayare eta nímitusiravacahi ena vichamuriana ticavasanahi te avasareana eta táchapevahi eta departamento eta Galacia. ² Puiti, nuvaraha nutuparacaheyare: Te lumincumuhuana, íputsisinavayarepahi, émanapachu eta manaquiruvanayare. Étisera échinavahi áyanahipuca jácani evachasanahi te semanamuahuana. Iúnasinávapaipa apaesa tacuijapa étaparacaimahi te nítecapauchahepa. ³ Te nítecapapa eta ara eyehe, vévatacapa ena enerejiruanahi éti nayana te Jerusalén. Éna tiámanayare eta enaquiruvanahi éti. Níjaracayaresera eta nucartane eta náimeraquiyyarepahi. ⁴ Téheserapuca nútinapaichu návaraha nuyana apaesa nútinapaipa nácáchanenupahi ena vanairucanayare.

Ema Pablo mavarahapa tiyanaya máejirapanavacaya

⁵ Eta nítresirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe. ⁶ Nuvaraha nunasipanayare eta eyehe. Tijuricati nucuchapa eta táetavisirahavina eta muracana técaticava. Tijuricati ímicatacanupahi éti apanava eta nímiyaniravayare nupaica. ⁷ Taicha vahi návarahahini ánipinarichuhini eta néjirairaheyare. Nuvarahahini nunasipanayare. Émapasera téchanuyare ema Viáquenu. ⁸ Nuvarahahivaresera nunasipananumayare ani te juca Efeso. Tiámainucava te táetavicapa eta piesta ticaijare Pentecostés, nútijapainapa. ⁹ Taicha nuvarahahini nucamapuravanumayare nucametarairu taicha camurianahi ena tivarahanahi tisamararacanuana. Énerichuwaresera nararihivare camuriana ena viánanaranahi.

¹⁰ Nutuparacaheya, te máitecapauchahepa ema Timoteo, tauri eta ejacapiraina. Échapajirisinanuyare, taicha émarichuhi nucutiquenehi eta vicaemataneasirahi ema Viáquenu. ¹¹ Nutuparacahevare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucuchapahi núti, énapa ena apamuriana nuchamuriana te juca.

¹² Nuvarahahivaréni mayanahini ema vichamuri Apolo eta ara eyehe, máehicavacahini ena tiámanahi eta nucartane. Váhisera másapavahini mayanahini puiti. Téhénarínevare apahenavare, mayanapa.

Táichecuaraqui eta macartane ema Pablo

¹³ Ecuneuchava yátupina. Túmehénahi tayehe eta juca véhiruhi. Yátupina eta éjairavavacáina. Vahi ecupica eta vicatajivairanahi. ¹⁴ Eta émunaraivayare yátupina táuchurena te esamureana, étainera tamutu jácani íchaqueneanayare.

¹⁵ Puiti nuvaraha némechahe ena tínapucanahi téhicana ema Viáquenu te avasare Corinto, ema Estéfanas, esu mayena, énapa ena machichanaveana. Ichapemurihi eta náijarasiravahi eta náitátirahi ena apamuriana vichamurianahi. ¹⁶ Puiti nuvaraha epicauchavaca esuapavaca ena nani. Énerichuvare epicauchavare esuapa ena apamuriana tímicatacahavianahi eta vicaemataneasirahi ema Viáquenu.

¹⁷ Ichaperinehivare eta núrisamurevahí puiti eta náitecapauchiranuhi ema Estéfanas, ema Fortunato, émapa ema Acaico. Tímicutijiricavainehi ámutuhini ítecapauchanuhini éti eta nímairavacahi ena nani mapanana tiásihanahi eta ara eyehe. ¹⁸ Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

¹⁹⁻²⁰ Téchajicaheana namutu ena vichamuriana ticavasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tiúrjiricavanahi te napena, taicha énarichuhi vicutique-neanahivare eta véhisirahi ema Viáquenu. Te iúrujicavapa, ejupacacayare éti, táicutiarainahi eta émunajirisiracacahi.

²¹ Nuti Pablo eta nímiamaresirahi eta néchajiriruva eta eyehe, nútijacaruvapa nájucha eta táichecuaraquihi eta nucartane.

²² Nácanisera máesacharahanahi ema Viáquenu náimainavapainepeána etá náicuñayare te machavapa. ¡Tata Viáquenu, pítecávanéni!

²³ Nuyaseuchaheparaca me Viáquenu Jesucristo táetaviuchahíni eta iúricacarevaya máicha. ²⁴ Nuvaraha ejacapaini ámutu eta némunasiráhevacahi máichavenehi ema Viáquenu Jesucristo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Corinto, ticaijare **2 CORINTIOS**

1 Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímitucaya ena achaneana eta máechajiruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranahi ema Viya ecavasanahi tayehe eta avasare Corinto, énapa namutu ena vichamurianahi machaneranahivare ema Viya ticavasanahi te avasareana tayehe eta departamento Acaya. **2** Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini eta táurivaina eta epanereruana.

Tétavicavahi eta macurisamurechirahavi ema Viya, macaepahairahi eta vicatajivairanahi

3 Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi. **4** Puiti éma, ticurisamurerecahavihi tayehe tamutu eta viátajivana, apaesa viratahivaréni víti apanava vicurisamurechavacahivaréni nácani ticatajivanhivare, tacutihi eta macurisamurechirahavihi víti ema Viya. **5** Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahí eta macurisamurechirahavihi ema Espíritu Santo máijararuuhavihi ema Cristo. **6** Yátupiquene ichape eta vicatajivairahi táichavenehi eta vímitusirahehi eta máechajiruvana ema Viya, vivarairahi vétumechaheyare apaesa iúchucuhayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana. **7** Víti vicasiñavahi eyehe eta ecamichirayare taicha vicuticacahi eta vicatajivairahi étapa eta macurisamurechirahavihi vimutu.

Eta macatajivairana ema Pablo

8 Nuparapenaveana, nuvarahavare numetacahe eta víchararacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchurihayaréni eta vitumevanahi tayehe eta vicamichirana tamutu. Váipavare vémeteacahini viúchucuhahini tayehe eta vépenira. **9** Vicutiripa nácani nacaparuasana te navahu ena aquenucana. Ema Viya másapapa eta juca, mavarairahi vaipa vítijivaimahi vicasiñava. Mavarahapa yátupina eta vicasiñairayarehi eta mayehe, taicha éma, macarichu maratahahi máimichava ticaitarecahavi te vépenapapuca. **10** Cape juca ticatiuchahaviripa tayehe eta vépenirayarehini. Puíticha ticatiuchahavirichaha. Tétavicavainehivare eta vicasiñavairahi eta mayehe, vahi tísapahavimahi vépenávanehíni. **11** Tacahe, nuvaraha ímicatacavahini eyujarauchahavini víti. Éti, németeaca camurihénapa éti eyujarauchahaviyare, camuriheyareva éti ehasulupayachainapa ema Viya eta máimiyanirava ticatiuchahavi.

Ema Pablo vahi máitujicavavanehini mayanahini tayehe eta avasare Corinto

12 Visamavahisera víti eta vicunachiravahi eta tájinairahi víchiravainahini, vahivare apipiemanhavinhini. Sánturuuhahaviripa te nataracu namutu ena

achaneana, evetijipa éti. Émahisera ema Viya tímicatacavahavihi táurihi eta vítaresirahi táichavenehi eta máemunasirahavihi. Vahi vítijiriruvainahini eta vítupajijiasiravanahí. ¹³ Puiti, tacahéhi eta nucartaneana. Vahi apipiemanuinahini. Váhivare tácajerahini eta ímatiequenehairayare. ¹⁴ Éti, ímatiequenéhapaipa eta nímiturapiana. Puiti nuvaraha esamayareva eta nuconsejarapiana apaesa vácuticaca vivapinacaca vítijicaca te jena sache te machavapa ema Viáquenu Jesucristo.

¹⁵⁻¹⁶ Tacahé puiti, eta táinapuiruhi nupanereruhi, nuvarahahi néjirapanaheyarehini, nétavauchiraheyarehini te nuyanirayarehi tayehe eta departamento Macedonia. Tásicha, te nuchavayarepáni, nápechavavare néjirapanáhe, apiheyarehini eta nucurisamurechiraheyarehini. Tacahé, te tamutuyarepa, ímicatacanupapucaini éti eta nuyanirayarevare tayehe eta departamento Judea. ¹⁷ Apanaripahisera eta nupanereruhi. Vuíchaha néjirapanahémahi. Váhivare nuvayuacahemahi eta nuvarairahi néjirapanahé. Nítouchayare nútí. Vahi ímijachaimahi éti nucuti mácani achane te mapanerechahí, váhisera máitauchahini. ¹⁸ Nútí nucasíñavahi eta máimatiranuhi ema Viya. Vahi nuvayuacahemahi éti. ¹⁹ Cape juca, te nímitucahepa nútí, émapa ema Silvano, émapa ema Timoteo, vímimatichahehi ema Jesucristo, Machichaquenehi ema Viya. Puiti ímatipa éma, tájinaquenehi mavayuaraivaina éma. Nútí apanava, tájina nuvayuacahéhini taicha mavanaranuhi nútí. ²⁰ Máichavenehi éma, títauchavahí tamutu eta mapaneruanahí ema Viya. Víti, te visamavaipa eta máijararuvanahí ema Viya, vijirauchahí éma. Vicahehi: ¡Amén! ¡Vicasíñava vímahainapa eta máitauchirainapa! ²¹⁻²² Émaripa ema Viya témuracachahavihi eta viúrujiasirahi ema Cristo, víti étipa éti. Timarcachahaviripahivare éma, táicutiarahi eta machichairahavipa, taicha manerejiruhavihi. Tíjaracahaviripavare eta mávahásirahavihi ema Espíritu Santo te visamureana, máitametasirahaviparaca títauchavaya tamutu eta viúricacareyarehí.

²³ Nútí, vuíchaha nítetacimahi eta ara eyehe, taicha némunacahehi, numavarairahi nucarameacahehini éti. Ema Viya tímatinuhi eta nutupiruvairahi. ²⁴ Vahi nuvaraha nupamicahé eta esuapiranuinahini nápepejicahehini, taicha éti muracaheripahi eta esuapirahi eta juca véhiruhi. Nuvarahahisera nímicatacahe eta tápajusiravaina eta iúrisamurevayare éti.

2

¹ Eta tacahé, vuíchaha nítetacimahi. Taicha vahi návarahahini nápechavahini némecatajivachahehini te esamureana eta néjirairaheyare. ² Taicha te ecatisamureva nícha, tímaticaréipahi nájina ticurisamurechanuimahi nútí. Ecarichuyarehí éti ecurisamurechanuyarehí. ³ Tacahé, eta táitsivahi eta néjirapanairahé, nucajurehepa eta táinapuiru nucartane, nuvarairahi ésamircavayare apaesa vaipa nucatisamurevaimahi icha éti. Nuvarahahisera núrisamurehini ícha. Tacahé, németeaca étiripa iúrisamurehivaréni ámutu eta nuyehe. ⁴ Jéhevare, te jena sache, te nucajurehepa eta nucartane, ichape-murihi eta nupanereresirahi, nucatisamurevahivare. Níyahacavahi ichape. Váhisera étaparacainahini nuvaraha némecatajivachahehini te esamureana. Nútí nuvarahahí ímatihini eta táchapevahí eta némunasirahehí.

Ema Pablo máijaracahi eta maconsejarapi eta naperdonachirayarehí ema téjecapavahi

⁵⁻⁶ Tiuri puiti, ema maca téjecapavahi máichahi eta pecatu, tétavicavahi eta ecatisamurevahí máicha. Nútí apanavare nucatisamurevahivare. Váhisera

táurica vivayuchava eta vémecharesira éma. Puiti, tarataharipa eta ecuchusirahi te emuri éti. ⁷ Puiti táuricapa erperdonachayare eta máichavaquenevahí. Ecurisamurechainapa éma apaesa vahi macuvayuchava eta macatisamurevahí, mánajicavapuca. ⁸ Nuvaraha puiti íápechavahini ímereca eta émunasirasamihi éma. Ejacapavare te emuri. ⁹ Eta tacahé, nucajurehi cape juca, nuvarairahivare nucaicutiarahe te esuapayarepuca eta nuvanairipianahi. ¹⁰ Núti nuperdonacharipa ema maca achane te máijare ema Cristo. Táuricapa erperdonachayareva, ecutiranuyare eta nuperdonachirahi. ¹¹ Taicha te vahipuca viperdonachacacahi, tíñehicarehi macamapurava ema Satanás, taicha tímaticarehi eta mavarairahi tímiáquipaica haviyare.

Vaipa máitucacarahanahini ema Pablo

¹²⁻¹³ Núti, te nítecapapa eta te avasare Troas, nímijachahi nuchimapahini ema nuparape Tito. Tétavicava eta néñamiravahí, nuvarairahi néchayarehi tájahapuca eta íchararacavahí éti. Yátupihinéni natarihihi ena camuri-queneana ena tivarahanahí tisamana eta nímituresirahí eta máimiturapiana ema Jesucristo. Étasera eta néñamiravahí eta eyehe émapa ema Tito, nucame-tavavarepa nayehe ena vichamuriana. Nuyanavarepa tayehe eta juca de-partamento Macedonia, nutanusirayare éma.

Ema Viya, tétavicavahí eta majaneasiravacahi ena mavanaranahí

¹⁴ Tásiha, tétavicavahí eta núrisamurevahí eta nuchimapirahí ema Tito eta te juca. Puiti, ichape eta nuhasulupayachirahí ema Viya eta majaneasirahiparaca, tíjaracahavihivare eta máitupajijasirava eta viratahairahí vicanara tamutu, táichavenehi eta mávahásirahavahí ema Jesucristo. Tituparacahavivare vicametarairuyarehi eta máimiturapiana, mavarairahí tiúriyarehi eta nasamiraya namutu ena achaneana tacuti eta najiusira jácani tájiye-queneana. ¹⁵⁻¹⁶ Taicha eta vicametarairuirahí tímicutijiricavahí eta tájiyeva eta incienso, eta máijarasirahí ema Cristo te mamirahu ema Maiya. Tacapusisiacahi namutu ena tisamahaviana. Natarihi ena masuapajirairahana, náemitiaruanayare taicha namavarairahí nasuapahini. Tijechehi eta najiusira tacutihí eta máquehe mácani máepenaquenehi. Natari-hivare ena tisuapanapahi náuchucureanayarehi; ticutirinehi najiucahini eta tájiyequene. ¡Tétavicavahí eta néñamiravahí eta vicatuparahairahí! ¹⁷ Virata-hasera vítaucha eta vituparahahí. Taicha víti, eta vicametarairuira, tájina vahí vicavacharapi eta máechajiriruva ema Viya, vétupiripicapahipucaini, vivarairainahí tajamurachacarehí, táchutihí eta náichira ena apamuriana tímijachavanahí yátupiqueneana mavaneruana ema Viya. Vítisera yátupi-quenehavahí mavanarahavahí ema Viya; vitupiruvahí eta vicametarairuira eta máimiturapi ema Cristo.

3

Viti vicametarairurahiana eta téqueneha matratune ema Viya

¹ Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, tipairiricana tiámanahi eta carta táchajisihahi eta nacunachacarevahí. Tájinavare vímatiyahini viyaseacahehini víti eta carta vímeraquinapahini táchajisihahini eta ecuna-chirahavinahini. ²⁻³ Étisera, tájina vénamiravaimahi eyehe. Taicha tímaticarehi te avasareana eta táurivahí eta ítaresirana éti, táichavenehi eta vinaca-samurechirahéhi eta máechajiriruva ema Viya. Eta juca tímereuchahavi víti eta yátupirahí mavanarahavianahí ema Viya. Éti, ecutihi eta carta vímera-quianapahí. Émaquene ema Cristo, ema iájuchahí, taicha tíjaracahehi ema

Espíritu Santo máitsivachaheyarehi eta ítaresirana, táuriyarehi eta esamureana. Arairuripa eta ítaresirahi. Puiti juca eta ítaresirahi, tájinapa étaparacaina esuapahini eta vanairipiana tacajuquenehi acane te márime tabla.

⁴ Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, máijarasiranuhivare ema Viya eta maitupajijiasiravana. ⁵ Taicha víti vahi vítijivainahini víjaracava eta vítupajijiasirava. Émaquenehi ema Viya tíjaracahavihi eta vitumevanahi eta vicaematanasirahi éma. ⁶ Émaquenehi tituparacahavi vicametarairuyarehi eta arairu matratune. Vahi étainahini nupamicaheyare eta esuapirayarehi eta vanairipiana. Taicha eta juca arairu matratune ema Viya, tíjaracahehi emutu ema Espíritu Santo, máitsivachinaheyare eta ítaresirana, arairuinapa. Étasera eta vanairipi tacarichu táimivanerecahi eta náepeniraya ena téjecapavana.

⁷ Acane, te jena sache te tiúcupaicapa ema Moisés te cerro, mámapahi eta vanairipiana tacajuquenehi te márime tabla. Eta mamira, tétavicavahi eta tarapepesirapahi táichavenehi eta macachanerahi ema Viya. Ena achaneana, vaipa náratahahini náimaranaraca eta mamira. Ichapehinéni eta tapicauchacarevahí eta vanairipiana taicha tétavicavahi eta tarapepesirapahi eta mamira ema tiámapahi. Étasera eta mayerevapa, timutserahavapaipahi témitiaca eta tarapepesirahi. Eta vanariplana, tacarichuhi táimicapacahi nácani téjecapavanahí. ⁸ Étasera eta arairu matratune ema Viya, eta nucametarairuquenehi puiti, tétavicavahi eta tápajusiravahi eta tasuapacarevahí taicha tiámahavihi eta mávahásirahavihi ema Espíritu Santo. ⁹ Yátupi eta tasuapacarevahí eta vanairipiana, tiápajucavahisera eta tasuapacarevapanahí eta máichuarapi ema Viya, vijacapacarehi mayehe táichavenehi éta. ¹⁰ Yátupi tirapepecahi eta mamira ema tiámapahi eta vanairipiana, váhisera étaparacainahini táurichahavihini. Jéhevarequenehi puiti, tétavicavahi eta viúrivahi maicha ema Espíritu Santo. ¹¹ Eta tarapepesirahi eta mamira ema Moisés, timutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tiápajucavahi eta tasuapacarevahí taicha máichecuaraqureyarehi eta viúrivaya táicha.

¹² Étavenehi eta vicasiñavairahi vímahayare eta juca sache vicuchapquenehi, viti matupararuana vétumechavahi eta vicametarairuirana. ¹³ Váhi vácutihini ema víyarahaini Moisés, tépacamirahavahi te páñome, tiúriyarepa eta náimaranasirayarehi ena machamuriana. Váipasare nanecapahini te timutserahavapa eta táemahairapahi eta tarapepesirahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi. ¹⁴⁻¹⁵ Puíticha ena nujaneanana israelítana vahi nácaicutiarahini eta juca. Tacahe, te náechejicuha eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijiricaváichucha táepacuchahi eta máepacamirahí ema Moisés. Ticajeraichucha eta nacaicutiarairayarehi. ¹⁶ Mácanisera achane, esenapuca, tíjaracavapa eta máehisirayarehi ema Viáquenu, ichapenapa eta macaicutiarairayare. Tájinapa táepacaquiñahaimahi. ¹⁷ Jéhesare, ema Viáquenu tíjaracahavisarepa ema Espíritu Santo. Tásicha, vaipa vipicacaracavahini eta vipauchiraya éma. Yátupina eta vivapinairavahi maicha ema Espíritu Santo. ¹⁸ Tacahe, vimutu viti véhicanahi ema Viáquenu vicutiripa eta espejo eta tarapepesirahi eta tajaraivahi eta sache. Víti, yátupihi vímerecahi eta máurivahi ema Viáquenu. Vaipa vicaepacamirahini. Eta tacahe, víti puiti tiápajucavainapaipa etá

vicutirayare ema Viáquenu taicha tiápajucavahi eta majaraivahi te visamureana. Étavenehivare eta mávahásirahavihi ema Espíritu Santo máijararuhi ema Viáquenu.

4

¹ Eta tacahe, váhiquene viyacujiequenehavaimahi eta vicametarairuira, taicha ema Viya tímechahavihi eta máemunaraiva eta matuparasirahavihi eta juca vicaemataneasirayarehi éma. ² Víti, tájina vímatiyahini viyumurujiricahini eta víchaqueneana. Váhivare víchahini eta titsirihacareana. Váhivare viútserurupinahipucaini vihapapicahipucaini eta máimiturapiana ema Viya, taicha vivaraha vicurisamurechaya éma. Tamutuhi véchajisihahi eta yátupiqueneana. Jéhesare, vivaraha nacaicutiarahini ena achaneana eta vímiturapianahi tásishaqueneanahi me Viya. ³⁻⁴ Nararihisamisera nácani vahi nacaicutiarahini eta vímiturapiana, taicha ema Váinaraji, tacaiyaquenehi eta juca apaquehe, éma tépacacuñahavacahi éna. Taicha vahi mávarahahini náimatiéquenehahini eta máimiturapiana ema Jesucristo, tétavicavahi eta tajarahiquenérahi taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemitiaruanayarehi tayehe eta ecuñaraqui táicha. ⁵ Te vicametarairu víti, vahi vítinahini vicunachavahini, vivarahahini éhicahavi. Vivarahahisera esuapahini ema Jesucristo, ecaquenuyarehivare éma. Víti vanairucahavichucha eta eyehe, taicha vicaemataneacahi ema Jesús. ⁶ Ema Viya, te máepiyacainapa eta juca apaquehe, macavanairipipa tatiarihiyarehi eta tijarahi, témitiacayarepa eta timapicuquenénihi. Ene macahehi eta viyehe. Tímimaticahávihi eta majaraiva ema Machicha. Tétavicavahi eta tajaraivahi te visamureana. Éma, tímimaticahavipaipahi eta máetaviuchaquenehi máurivahi ema Viya.

Puiti eta vítaresirahi, vímerecavaya yátupihi eta vicasiñairahi eta macatiuchirahipipa ema Viya

⁷ Eta juca véhiruhi vímiturapianahi, tétavicavahi eta tacunachacarevahi. Vahi vítinahini vicunachacarehini. Taicha viti páureanasami, vicutichucha eta muñeca náipune. Émasera ema Viya máimerecahi eta máitupajijiasiravahi, máijarasirapa eta tatumevayarehi eta viáquehe. Váhisera vítijivainahini. ⁸ Táichavenehi eta vicametarairuira, tatiarihihi jácani víchavaquenévahi; ticatiuchahavahisera ema Viya apaesa viúchucuhaparaca. Ichapevare jácani eta táimipanereresirahavihi; vicasiñavahisera eta majaneasirahavihi ema Viya. ⁹ Tipanajiricahavianahi ena viánarana, vahisera tijunijiacahavimahi ema Viya eta majaneasirahavihi. Tayanapane nachururupaicahavihini, émasera ema Viya vahi másapaimahi ticapacahaviana. ¹⁰⁻¹¹ Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana viámarairicaphi eta vépenira, vicutihi ema Jesús eta napanereuchirahi éma. Émarichuhisera ema Jesús máecheputrequenehi. Éma máimerecahi eta máitupajijiasirava eta macuchucuirahavipaipahi tayehe tamutu eta víchararacavaqueneanahi. ¹² Tayanapane víti viámarairicahi eta vépenira táichavenehi eta vímituresirahi, táitsivahisera ejacaphi éti eta tamaichecuaraqureyarehi eta ítaresira táichavenehi eta esuapirahavihi. ¹³ Ema víyarahaini David, ani macahehi eta máechajiriruvana eta te Salmo: “Núti nucasiñavahi mayehe ema Viya, tásicha vahi nupicacaracavahini eta néchajisirayare mayehe” macahepa. Énerichuhi vicahehi víti puiti. Vicasiñavahi mayehe eta macatiuchirahaviyare. Táitusiava, vahi

vipicacaracavaimahi eta vímituresiraya. ¹⁴ Taicha véchahi eta macaechepusirahaviyarehi ema Viya, vicutiyarehi eta macaechepusirahemachicha Jesús te máecari. Tásiha, étamurihavinapa, éti apanavare, eta vímeresiravayare te mamirahu éma. ¹⁵ Tamutu eta juca víchavaquenevanahi, támahi eta iúrivayarehi. Vicamichahi tamutu, taicha vivarahahi eti esimutuqueneanahi ejacapahini eta iúrivayare máijararuhehi ema Viya, apaesa ámutuhivaréni eti esimutuqueneanahi ehasulupayachahini éma, ecunachahivaréni.

¹⁶ Eta tacahe, váiparinehi vicainajiruvaimahi. Tayanapanepuca tivitaji eta viáquehe, étasera eta viáchaneva téavicavaichucha eta tatumeva tamutu sácheana. ¹⁷ Taicha eta viátajivanahi puiti juca vítaresiraichaha, vahi táunacacare. Técaticavánachucha, tiánucuhávanepa. Énerichuvare, jararihi eta táitsivahi, taicha vijacapahi eta táetaviuchiravaya eta viúricacarevayare. Puiti tájina tacutimahi eta viúricacarevayare, taicha máichecuaraquirénapa éta. ¹⁸ Eta tacahe, vahi vipicacaracavaimahi eta viátajivanahi, taicha vahi táunacacarehini. Vicasiñavahisera mayehe ema Viya eta máimisiapirahaviya eta te mávasa anuma. Tásiha, máichecuaraquirénapa eta viúricacarevayare eta viávihairaya tayehe.

5

¹ Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutihi te viáquipaica eta peti. Máejerarehi vicha taicha vahi muracainahini. Jararihisera eta viáqueheyarehi te anuma vícuchihi mayehe ema Viya. Éta, nájinapa tiratahaimahi tiáquipaica taicha máepiyaruhi éma. ² Puiti, téavicavahi eta tacatajivairahi eta viáquehe. Tamutuhi tasama. Eta tacahe, vivarahainehi táijahúchavahini tacaitsivahini eta viáqueheyare te anuma. ³ Taicha vicamunurinehi eta arairu viáquehe, apaesa vahi vitsirihaimahi eta vicachanerayare ema Viáquenu taicha vicutiyare éma. ⁴ Puiti eta juca vítaresiraichaha, tamutuhi tasama eta viáquehe. Ichape-murihi eta táimipanereresirahavihi. Váhisera étainahini eta vivarairainahini vépenávane, étasera vivarairahi tacaitsivahini eta viáquehe arairuinahini. ⁵ Tacahe, ema Viya tamutuhi máicucha eta táichararacavayare te apava vítaresira. Puiti tíjaracahavihivare ema Espíritu Santo. Émapa titametacahaviparaca eta vijacapirayare eta vícuchianahi.

⁶⁻⁷ Tacahe, nútì vahi nupicahini eta népenirayarepuca, taicha ichape eta nucasiñavairahi mayehe ema Viya. Tájina vahi néñamavaimahi mayehe eta máijarasiranuinapa eta arairu náquehe, tayanapane vuíchaha nímahahini. Eta táimiyaniravaya eta nítaresirahi, nuyerehi eta nícuhihi náqueheyare. ⁸ Nuvarahainehisera táijahúchavahini tacaitsivahini eta juca náquehe, nuyanasa-repaini nucachanehini ema Viáquenu. ⁹ Eta tacahe, vivaraha ichapemurihi eta vicurisamurechirahi eta vicaemataneasira ema Viáquenu puiti juca vítaresiraichaha. Tásiha éma, tiúrisamureyare eta viyehe te vímerecavainapa te mamirahu. ¹⁰ Taicha vimutu vímerecavayare te mamirahu ema Cristo te mávacureyare. Ánaqui tímaticareyare tamutu eta víchaqueneanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, vijacapainapa eta vícuchianapahi.

*Ema Viya mavaraha vipauchayarehi éma, macaepahairaya eta
vipicacarasiravahi eta vícuñayare*

¹¹ Nútisera, ichape eta nupicauchirahi ema Viya. Eta tacahe, nímiyanava numetacavacahi ena achaneana eta mayehe, taicha nuvarahahi námutuhini napicauchahivaréni éma. Émasera, téavicavahi eta máimatiranuhi táurivahi

eta nupanereruana eta nucaematanesirahi éma. Puiti nuvaraha échahivaréni éti apanava eta táurivahi eta nupanereruana. ¹² Tacahe, eta juca néchajisihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ena tímijachavanahi náimaticequeneha. Váhisera yátupinahini táuchurequenénahini te nasamureana. ¹³ Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaematanesirahi ema Viya. Tiúrihisera eta nuchuti. Nuvarahaparaca ichapenaini eta iúricacarevaina éti. ¹⁴⁻¹⁵ Núti nímatihi eta táetaviuchirahi eta máemunasirahavihi ema Cristo, taicha máepeninahavihi te crusu. Vimutu viti achaneana vituparahaichu vépenirapachu. Mavacha-chaipasera tamutu ema Cristo. Eta tacahe, tatuparaca vítsirijicava vicaemataneca éma. Tásaha puiti, viti machanerahavipa. Vaipa vítijiricavaimahi. Émapa téchahi eta vítaresira, taicha eta machavirahi titareca. ¹⁶ Eta tacahe, viti véhicanaripa ema Cristo, étainapa vapanerechayare eta vítsivachiraipa eta vítaresira. Vaipa véhicaimahi eta apana panereruca tayeheanahi te juca apaquehe. Étaripa cape juca viásinequenehi váhirichu visuapapajicahini ema Cristo, vímijacharichucha éma vicutihi viti achaneanasami. Puítisera vaipa táchahi eti vapanereruana. Visuapahi émairahi Machichaquenehi ema Viya. ¹⁷ Puítiripa viti viúrujiacanahi ema Cristo, apanahaviripa. Vínajicaipa eta viyeherepinihi tamauriqueneana. Tamutupa arairuhi puiti eta viyeherepiana.

¹⁸⁻¹⁹ Ema Viya, tétavicavahi eta máurivahi eta viyehe. Éma, mavarahahi vipauchayarehi éma. Mavarahahivare macaepahayarehini eta vipedicara-siravahi eta vícuñayare táichavenehi eta vipecaturana. Tásaha, mavaneca ema Machicha Jesucristo apaesa macaepahayarehi eta vipecaturana vimutu viti vicasiñavana eta mayehe, vaipa máecharairicaimahi. Tásaha, tájina eta vipedicarasiravaimahi eta vícuñainahini. Tásaha puiti, ema Viya tituparacahavipa viti véhicanahi eta víchuhairavacayare namutu ena apamuriana achaneana, apaesa éna apanava nacasiñavavare eta mayehe, váipavare tipicacaracavanaughmahí eti mayehe. ²⁰ Tacahe, viti mavaneruhavihi ema Cristo víchuhavacayarehi namutu. Tímicutijiricavaipa émaquenénahini máechajicavacahini ema Viya. Puiti viyaseacavacahi namutu nacasiñava mayehe ema Jesucristo; váipavare tipicacaracavanayarehini eti náicuñainahini náicuchiyaréni. ²¹ Ema Cristo, tájina mapecaturainahini. Étasera mavarairahi ema Viya viúchucuhayare viti, émapa ema Cristo tamuriacahi eta vipecaturana. Puiti, tájinasesarepa víchiravaimahi, tájinavarepa viviurevaina te mamirahu ema Viya vimutu viti viúrujiaruana ema Cristo.

6

¹ Tásaha, núti mavanaranuhi ema Viya, nuyaseacaheyare ímiyanava tauri eti éhisirahi éma. Vahi ecuemepureca eta máemunasirahéhi, majacapira-hehivare. ² (Taicha ani macahehi eta máechajiriruvahi tayehe eti Sagrada Escritura: “Nuchicha, tétavicava eta pisamacarevayare eta nuyehé te pipiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epiarasirayarehi éma, ejacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchucuhaheyare eti te ícuñayaréni taicha eti epecaturana.)

³ Núti nuvaraha nacuija nacaecahini eta vématanerepi viti apóstoleana. Eta tacahe, nupamicavahi núti tiúriyare eti nuyeherepiana. ⁴ Eta tacahe, ichape eti néchapiravahi te nímitureca. Nímercavahi yátupi eti mavanarai-ranuhi ema Viya. Ichapemuri eti nucamichirahi eti nucatajivairana, eti

néchuriasirana, étapa eta tacajeravana eta nítatijirísirava. ⁵ Vahi nucainajiruvaimahi táichavene eta náestasiranuhi ena nánarana, náeratasiranuhivare, tájinanéni viviurevainahini. Te apana avasareana timurijiacanuanahí taicha eta nasemanevahi. Eta nítatijirisiravahi, ichape eta tamuracavahi eta nucaematanerahí. Camurihivare eta numacaimasiravahi. Camurihivare eta nécuava eta nupaisirana. ⁶ Éti ímatinuhi yátupihi eta táurivahi eta nítaresira. Ímatinuhivare eta nucaimitucasihi mayehe ema Jesucristo. Táichavenehi eta mávahásiranuhi ema Espíritu Santo, nucayehehi eta paciencia nayehe namutu, nujapanurahihivare. Yátupiquenehi eta némunaraivahi. ⁷ Nímítucahi eta yátupihi máimiturapiana ema Viáquenu. Énerichuvare ema Viya tímicatacanuhi tayehé etá máitupajijiasiravahi te tamutu etá nucametairuirahí etá máechajiriruvahi, étapa etá nucatiuchirahí etá véhiruhi. ⁸ Eta nupaisirapaipahi, natarihihi ena ticunachanuanahí, tiúriemanahí etá nuyehe. Natarihihivare ena tépurunuuanahí, tíñemahipivare etá nacayemaquene etá nuyehe. Natarihihivare ena tímijarechanuana tépiyahirahí. Nutupiruvahisera tamutu etá nítaresirahi. ⁹ Natarihihivare ena vahi tisuapanuanaimahi, taicha tépuruanahí etá apóstolenuirahí. Natarihisamivaresera ena tisuapanuana taicha tisamairiricanuanahí etá yátupirahí etá nímíturapiana. Tatarihihivare te tiánehipa etá népenirayaréni. Núchucahisera, maicha ema Viya. Natarihihivare ena téhanacanuana muraca. Váhisera másapavaca ema Viya etá nacapasiranuinahini. ¹⁰ Tatarihihivare te nucatisamurevahí ichape. Nútisera nucurisamurereacavahi tamutu sácheana. Páurenui etá náimairanuhi ena achaneana. Ichapemurianahisera ena níjararuuanahí etá tacaimahaquenehi etá náchanevana. Ani, tájina nímahaquenéna. Téhesera apuna nítaresira, téavicavaya etá nucaimahaqueneraya.

¹¹ Nuparapenaveana némunaruqueneana, nutupiruvahi te nusamure etá juca nuconsejarapianahí eyehe. ¹² Vahi nuvaraha ecuimijachahini nínajiacache etá némunasirahehi. Németeacahisera éti ínajiacanuhi etá émunasiranuhi. ¹³ Éti, ecutihi nuchichanavehénahini etá némunasirahehi. Nuvaraha tachavahini etá émunasiranuhi, esuapiranuhivaréni.

Viti, tiávahácahavíhi ema Viya taicha machanerahavíhi

¹⁴ Nuparapenaveana, vahi ecuávahácavaca nácani máehicaranahí ema Viáquenu. Étaripa te arayenaheyare, vahi ecuveha nácani máehicaranahí. Taicha téjecacayarehi etá panererucana. Viti véhicanahí ema Viáquenu, tatupiruvahi etá vipanereru. Énasera ena máehicaranahí, tavayuacahi etá tamauriqueneana. Víti viúricahi etá tijarahí; énasera náuricahi etá timapicu. ¹⁵ Taicha víti, mávaháruhavíhi ema Cristo. Váiparinehi vicachanémahi ema Váinaraji. Tásiba, te viávahácavaca ena masuapajirairahana, tiápitavairicanahí etá véhisirahí ema Viáquenu. ¹⁶ Énerichuvare, tiávahácahavípa ema Viya, émaripa ema Vicaiyaquene. Taicha ani macahehi: “Núti návahácavacaya ena téhicanuanahí. Néchavacayareva éna, taicha éna yátupiqueneanahí nuchaneranahí” macahepa. Eta tacahe, váhiqune táuricahini etá vicasiapiravahini etá nayehe ena vahi machaneranainahí ema Viya, taicha apanahi ema nasiñarajíhi. ¹⁷ Taicha acane macavanairipipa ema Viya, ani macahehi: “Érajicava etá te namuri ena vahi nuchaneranaina, machu napareacahe etá namaeperajivana éna. Tacahe, éti nujacapaheyarehi. ¹⁸ Núti yátupiquenénuyarehi Ecaiyaqueñenuhi. Éti nuchichanaveanahí” macahepa ema Viya máitupajijahaquenehi.

7

¹ Tacahe, némunaruqueneana nuparapenaveana, vahi távarahahini vínaji-cavahini tayehe eta juca vicuchapaquenehi puiti. Tacahe, vécachinacha-yarehi tamutu eta viáquehe étapa eta viáchaneva. Víjaracavayarehi tamutu te visamureana me Viya taicha eta vipicauchirahi éma.

Eta máurisamurevahi ema Pablo táurivaipa eta náitaresira ena machamuriana

² Nuparapenaveana, nuvaraha ímiyanavahini esuapanuhini. Taicha nájinahi te etaracu éti nacatajivahini náinajicavahini níchavenénahini nútì. Nájinavare nucaetemaquenénahini, nímpinanájicavacahipucaini. ³ Váhivare nuvaraha nucajachahe puiti. Nutupiruvahi eta numetasiraheli cape juca: “Tétavicavahi eta nucasamureraheli. Tájina ticamitisicanuimahi, tayanapa-nepuca népena”. ⁴ Ichape eta nucasiñavairahi eta eyehe, nucunachahehi eta ecurisamurechiranuhi. Tayanapanehinéni ichape eta nucatajivairahi, tétavicavahisera eta étumechiranuhi ecurisamurechiranuhi.

⁵ Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticatianacanuanahi. Ichaperine-hivare eta néñamiravahi eta eyehe. ⁶ Émasera ema Viya tétavicavahi eta máetumeraivahi nayehe nácani téñamavasamureanahi. Nútiripa nétume-chavainehi maicha éma, eta nímairapa máitecapauchiranuhi ema Tito.

⁷ Tavetijipa eta mametasiranupa ema Tito eta ecurisamurechirarinehi éma. Timetacanuvare ichape eta éñamiravahi eta nuyehe; evarairaipaicha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavicavainehi eta ecurisamurechiranuhi!

⁸ Ichapehinéni eta táimipereresirahehi eta nucartane. Nútiripa, ichape-rinehivare eta táimipereresiranuhi nucatisamurevahi te nucajurepa. Némítisicapasera puiti, taicha ánipi eta táimipereresirahehi. ⁹ Puítisera, tétavicavainehi eta núrisamurevahi ícha, eta táetaviasiraheripahi eta ecatisamurevahi. Eta núrisamurevahi, vahi étainahini taicha eta ecatisamurevahi. Núti núrisamurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájinapa vácayemahini eta eyehe. ¹⁰ Taicha tatarihihi eta jácani máijararuhi ema Viya, táimipereresirahehi, mavarairahi eta éneuchiravaya tayehe eta ejecapiravahi apaesa macuchucuhahe. Eta ecatisamurevahi tiámahi eta iúricacarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náeneuchavahini eta me Viya. Éta, tiáma eta náepenira. ¹¹ Étisera, ¡tétavicavahi eta iúrivahi tásiquenehi eta ecatisamurevairahi! Enevanelinehi ínajicahi eta ejecapiravahi taicha evarahahí ímiyanava ecurisamurecha ema Viya. Ichaperinehi eta nucunachirahehi taicha epicauchainehi ema Viya tayehe eta juca íchavaquenévahi. Evarahainehi níjahúchavahini nítecahini eta eyehe nímicatacahehini. Étisera enevanepa ecurujicacahi taicha eta esemanevahi maicha ema téjecapavahi te etaracu. Enevanepe émecharecpa éma. Ímerecavahi eta tamajinairahi ejecapiravainahini éti. ¹² Núti, te nucajurehénapa eta tainapure nucartane, vahi émainahíni máimipererecanuhini ema téjecapavahi, váhivare émainahíni máimipererecanuhini ema maiya, émaripa ema majrareruhi. Íchavenehi éti eta ímipereresiranuhi te nucajurehénapa, nuvarairahi ímerechavayarehi eta yátupipapuca eta esuapiranuinahini te mavahuana ema Viya. ¹³ Eta tacahe, tétavicavainehi eta étumechiranuhi nútì eta nusamairi-sirahehi eta esuapiranuipa.

Tavetijipa eta nūrisamurevapa eta táurivahi eta ejacapirahi ema Tito. Tétavivahavi etá máurisamurevapahi ícha éti etá ésamirisiravaipa. ¹⁴ Váhirichu támapurujihini etá nucunachirahehi mayehe ema Tito etá nūrisamurevahí ícha éti. Puítiripa, ímerekuchavapa yátupihi etá ecunachacarevahí. ¹⁵ Éma, tiápajucavapaipa etá máemunasirahehi éti. Máecharairicahi etá táurivahí etá ejacapirahí éma, esuaparinehivare, táichavenehi etá emansuiravahí étapa etá epicauchirahí ichape ema Viáquenu. ¹⁶ Núti apanavare, tétavicavahivare etá nūrisamurevahí ícha éti. Nucasiñavahí taimianava etá esuapiranuina te tamutu.

8

Tatupiruvayare te visamure te vivaraha vicajirica

¹ Tiuri puiti, nuparapenaveana, vivaraha vimetacahe etá nanaquisiravahí ichape ena apamuriana vichamuriana ticavasanahi te avasareana tina-paica te juca Macedonia. Éna, nasuapavanepa etá manacasamurechirahí ema Viya etá nacajirisirayarehi. ² Ichapemurihinéni etá náichirahí ena taticianacanahi náemepaurechavacahi, váhisera náinajicavahini. Tivapinavanarichucha. Tatupiruvahí te nasamureana etá náijarasirahí etá nanaquiruvana. Páureanahinéni, tímecevahisera etá nanaquiruvana, ticutirine rícoanainahini. ³ Núti néchajisihahi etá juca taicha nunecapaequenehahi etá tápajusiravahí etá nanaquiruvana. Vahi náeñamahini, náijaracahi jácani nacayehequene. Vahi vipamicavacahini víti. ⁴ Énasera, ichapemurihivare etá nayaseasirahavihi vísapahini tinaquicavana éna apanava, navarairahí nacajiyare ena vichamuriana ticavasanahi te Jerusalén. ⁵ Éna, náetaviuchahi etá navapinairavahí. Tínapucapa tinaquicavanahí etá nacaematanasirahí ema Viya, navarairahí nacurisamurecha éma. Tásicha, étapa etá náicurehi ena vichamuriana. ⁶ Eta nímairahí núti etá navapinavairahí etá nacajirisiraya, nupanerechahi nuvanecaya ema Tito machava máiteca etá ara eyehe apaesa táitauchavapaini etá enaquiruvanahí éti apanava. Cape juca épaniravainapa. Puiti ítauchavanepaini. ⁷ Taicha éti, ichapemuri etá ecasiñavairahí me Viya. Tétavicavahivare etá échemaraivahí. Camurihevare éti ímiturahiana. Evapinavahivare etá ecaematanasirahí ema Viya. Tétavicavahivare etá émunaraivahí etá viyehe. Eta tacahé, táurica tápajucavahivaréni etá enaquiruvana ecajirisiraya.

⁸ Váhisera nupamicahe etá nuvanesirahénahini. Nuvarahahisera ímatiequenehahi etá navapinaraivahí ena apamuriana vichamuriana apaesa ímerekahini éti apanava etá yátupiquenérahi émunaraivahí. ⁹ Ímatirichuhi éti etá máemunasirahavihi ema Viáquenu Jesucristo. Éma, tamutu tiúricacarehi te mávihahi te anuma, tájinahinéni mácamunuhini. Étivenehisera tiúcupaicapa te juca apauehe. Páurehi éma etá máitaresirahí apaesa éti ejacapahini etá iúricacareva maicha éma.

¹⁰⁻¹¹ Németeaca táurica ítauchavanéni etá juca enaquisiravahí, váchupa épanavaqueneripahi cape año. Táimianava etá evapinairavayarehi etá ítauchiraya etá enaquiruvanayare tásichaquenehahi etá jácani tatarihi queñeanahí ecaye-hequeneanahí. ¹² Etiarihi erataha enaquiaca apaesachicha. Etiarihivare erataha iápajucava etá enaquisiravahí. Etiarihi erataha enaquiaca camuri. Tacamunuchucha tátupiruva te esamureana, evapinavahí etá enaquiruvaya apaesa tijacapacareya mayehe ema Viya.

¹³ Vahi nuyaseacahe échurihahini éti táichavénenahini etá ímicatasirayare ena apamuriana. ¹⁴ Nuvarahahisera ímerekavahini etá ímicatasiravacayare ena vichamurianahí. Puiti ecaimahaquenevacahi, eratahahí ecajirica ena

náechuriaruanahi. Tijuricati te apava año, étipavainapapuca échuriaca. Éna títsirijicavanainapa eta eyehe, énapavainapa tinaquicavanayare. Ene tacaheyare eta ítaresirayare, ecuticacayare. Nacuija nacucatajiva tayehe eta ecamunuqueneana. ¹⁵Vítauchayare eta tacayemaquenehi eta Sagrada Escritura, ani tacahe: “Namutuhi ticanruana. Nájina nácatajivahini, nájinavare náechuriacahini, váhivare náemepururerecahini” tacahepa.

Ema Tito énapa ena apinana vanairucanahi mayehe ema Pablo

¹⁶Núti nuhasulupayachahi ema Viya eta manacasamurechirahi ema Tito máeñamiravahi eta eyehe, tacutihi eta nusamure néñamiravahi eta eyehe.

¹⁷Éma, matupiruvahi tijicapanuhi eta nutuparasirahi téchapajiricaheyare. Ichape eta mavarairahi téjirapanaheyare, taicha téavicavahi eta máemunäsirahehi.

¹⁸Eta mayanirayare ema Tito eta ara eyehe, vévatacayare macachaneyarepahi ema apava vichamurihivre. Tímaticarehi éma eta macunachacarevahí te jácani máimituresirapahi nayehe ena vichamuriana tayehe eta véhiruhi. ¹⁹Ema maca nerejihí ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanahí. Víchahi eta juca, vivarairahi vicurisamurechaya ema Viáquenu. Vímereuchaheyareva eta evapinairavahi éti ecajiraivahi. ²⁰⁻²¹Taicha núti eta viámirayare eta ichapequene enaquiruvana, nuvaraha nímercayare eta táuriva eta víchira, apaesa vahi nacuechajisianu nácani achaneana. Ema Viya tímararacanuhí eta táuriva eta nupanereruana. Nuvarahavare tiuri eta náimairahi ena vichamuriana.

²²Énerichuvare vévatacayareva ema apanavare vichamuri. Éma, ichapemurihi tímereuchava eta mavapinairahi eta macaemataneasirahi ema Viáquenu. Puiti éma, tivapinavavarepa eta máitecapauchiraheya, taicha macasiñavahi eta máimatirainapa eta evapinavavahi eta ecajiraivahi éti.

²³Núti nuvarahahí námatiyarehi namutu ema Tito, eta émaírahi nujupaha tayehe eta juca vématanerepi. Vicuticacahi eta vicaemataneasirahe, véchapajirisrahehi éti. Étaripa te nacayasesererupuca nayehe ena apinana vichamuriana macachanequeneanayarehi ema Tito, énerichuvare emetacayare eta nerejianahí ena apamuriana vichamuriana, táichavenehi eta táurivahí eta nacaemataneasirahi ema Cristo. ²⁴Nuvarahahí ímerekavayare eta nayehe ena nani apinana vichamuriana eta yátupirahi eta émunaraivahi, apaesa ecurisamurecha namutu ena vichamuriana te nasamairiricapa, náimatirayare vahi támapuruji eta nucunachirahehi.

9

Tiúripana vivapinavayarehi eta vinaquisiravana nayeheyare ena vichamuriana

¹Tiuri puiti, núti nímatiheripahi eta evapinairava tayehe eta ecajirisira nayeheyarehi ena vichamuriana ticavasanahi te Jerusalén. Vaipa táchamunucarehini nápepejiricahehini. ²Ichapemurihi eta nucunachirahehi nayehe ena vichamuriana ticavasanahi te juca Macedonia. Numetacavahi eta evapinairavahi eta épaniravahi enaquisicava cápequenerípahi te apanahi año. Tacahe, eta nasamairirisrahi eta evapinairavahi éti, éna apanava tivapinavanavarepa ichape. ³Eta tacahe, névatacahi puiti ena nani mapanana vichamuriana, apaesa vahi ecuvayuaracanu. Vahi tacumapuruji eta nucunachirahehi eta enaquisirava. Nuvaraha tatsecavaipa támamu te nítecapauchahepa. ⁴Tijuricati náehicanupahi te níteca ena vichamuriana ticavasanahi te juca, tacuijarichaha tatsecavahi machu átsirihacare,

machu támapurujipa eta nucunachirahehi. Váipasare ecuimicatsiriaca nútia puiti ena nani vichamuriana, náinapumirauchanu náitecapauchahe, náimicatacahe eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinachucha nupamicahe.

⁶ Némechaheyare jucarihi eta échajirirucava, ani tacahehi: “Mácani achane ánicuchicharichu eta máesane máevaruhi, ánimurichicharichu eta mavehayare eta táchame etá máesane. Mácanisera ichapepana etá máesane, ichapemurivare etá táchame mavehaqueneyare” tacahepa. ⁷ Namutu nácani tinaquicavanayare, tavarahahi tatupiruvayarehi te nasamureana etá nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, tétavicava etá máemunasirahi mácani tatupiruvahí etá máijaracasi-resirahi. ⁸ Ecasíñavaya yátupina mayehe ema Viya, taicha éma, tétavicavahí etá máitupajijiasiravahi. Mavarahahi tíjaracaheya tamutu etá ecamunu-queneana. Vaipa échurihaimahi maicha éma. Ecayehenasarepa etá ímicatasiravacaya nácani apamuriana ticamunuvanahi. ⁹ Ecutiyarehi ema achane tiuri, ema táchajisihahi etá Sagrada Escritura, ani tacahehi: “Ema achane tiúrihi ticunachacarehi me Viya, tivapinavahí etá macajiraparacahi ena páureana. Tájina vahi téchuriacaimahi etá macajirisira te tamutu etá máitaresirahi” tacahepa. ¹⁰ Ema Viya, éma eti ema tinaquicahi etá evaraquiiana. Éma, macaejapacahivare etá tinicacare, étapa viáchanechiavayarehi. Ene macaheya eyehe éti. Tíjaracahepa etá enaquisiravaya, tímicutijiricavahí etá táchapasira etá evaraqui. Éma, ticajurucayareva etá enaquiruhi apaesa camurianaina ena ecatajiruanayare. ¹¹ Tásicha, ema Viya tíjaracahenapa etá ímahaqueneanayare apaesa ímiyanavayarehi íjaracasireca. Puítiripa etá viámaqueneyare enaquiruvanahi nayehe ena vichamuriana, ichape etá nahasulupayachirayarehi ema Viya. ¹² Taicha etá ímicatasiravacahi ena vichamuriana, ecuchucuhavacayarehi tayehé etá nacamunuiravahi. Tásicha éna, tiápajucavainapa te nasamureana etá nahasulupayachirayarehi ema Viya. ¹³ Ichapeyarehivare etá najirauchirayarehi ema Viya, nacunachirayareva éma. Eta evapinairavahi etá ecajirisirahi etá ímeresiravahi etá esuapirohi yátupi etá véhiruhi, étaripa etá máimiturapihi ema Cristo. Tímereuchahehivare etá iáchanevahi nayehe nácani ticamunuanahi. ¹⁴ Tásicha, tiyaseuchaheanainapa me Viya te nayujasarirana. Ichape etá náemunasiraheyarehi, navarairayareva náimahahevane táichavenehi etá ítsirjisiravahi etá máemunasirahehi ema Viya.

¹⁵ ¡Tétavicavahí etá viúricacarehi maicha éma! ¡Tájinapa viviya apanaina vácayema etá vihasulupayachira ema Viya táichavenehi etá juca víjaracasi!

10

Yátupi etá masuapacarevahí etá apóstolérahí ema Pablo

¹ Nuti Pablo, yátupiquenénuhi etá apóstolenuira. Puiti nuyaseacahe etá ímatiranuína etá némunasirahehi. Nucutihi etá máemunaraivahi ema Cristo étapa etá majapanuraivahi. Etiarihipuca eti ímijachahi népiyacavahí núri te emirahu; tásicha, te nuyerehihevare, tétavicavahíji etá nuvainarajivahi mapicaurairahanuhíji. ² Puiti nutuparacahe: Étupirisamurechavaipahini te tamirahu etá nítecapauchiraheya, apaesa vahi tacuitauchava nucusemaracahehini. Ena nani náimijachahi nucutihi mácani achanetataji, étachucha

nutanuca eta nuvarahaquenehi. Nucamatinacavacayaresera te nítecapau-chahépa. ³ Yátupi ecutiquenenuhi achanenuhi. Váhisera nácutihini ena apamuriana ajairana náipicararecanuma eta náeharaivana, navarairahi tisuapacareanayarehi. ⁴ Taicha nútì vahi néhacacaimahi te nuvahuana, tájinavare nácasíñaimahi. Mararihisera ema Viya ema tíjaracanuhi eta nítupajijiasi-ravaya nucamatinasihayare éna. Ema Viya, nájina ticachuricaimahi. ⁵ Eta tacahehi eta nucaepahairahi eta semanereana, ena ticasíñavavaicanahí, tímijachavanahivare ena téchinavanahí, vahi návarahahini máimicatacavacahini ema Viya. Váhivare návarahahini náesenicahini éma. Níturucayare-hisera nácani muracapanerueruanahí eta nasuapiraina yátupi ema Cristo. ⁶ Nucuchapahesera eta yátupina eta esuapajiraivaina. Tásicha, te nítecapa, nímiratahacava eta nítsivachirayare eta napanerueruanahí ena masuapajira-hanahí. Te váhipuca náeneuchava, némechavacayare.

Natiarihi ena tímijachavanahí apóstoleana, tímicutichavanahí ema Pablo

⁷ Éti ímijachaipapuca tájinaquenenuhi nítupajijiasiravainahini, eta ímairanuhi eta nímahisami. Németeacavare natarihi ena ticunachavanahí machaneranahí ema Cristo. Nuvarahasera náimatinuhini eta machanerairanuhi nútì apanava. ⁸ Natiarihipapuca náimijachaipapuca vahi nétupicavahi nútì eta nupamisirahehi eta esuapiranuhi. Váhisera nutsirihahini taicha yátupihi nutuparahaichuhi eta návacure apóstolenuhi. Taicha ema Cristo mavarahahi nétumechaheyare eta éhisirahi éma. Tájina vahi nucamitiequenehahémahi nútì. ⁹ Numetacahehi eta juca, váhisera tácharichuimahi nípicararecahehini te juca nucartane. Tamutuyare títauchava te nítecapauchahepa. ¹⁰ Ena nacahehi eta náechajiriruvahi: “Vahi eonusuapa eta macartane. Tayanapane muracapahi eta táchajiriruvana, émasera tájina mamuracavaina. Énerichuvare muracacaema eta máechajisira” nacahepa. ¹¹ Éna náimijachahí tacarichuhi muraca eta táchajiriruvahi eta nucartane. Tímahanuanayaresera te váhipuca nusuapacarehi te nítecapauchahepa eta ara eyehe.

¹² Nútì vahi nímicutichaimahi nayehe ena tímijachavanahí ticunachacareanapanahí. Ena nani énajiricavaichucha ticunachavana, tímijachavanahí nájina ticachuricanaina éna. Súnsurupichucha eta juca náichaquehini. ¹³ Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahi eta eyehe, tásichaquenehi eta níjarasirahehi eta táurinaqueneana máechajiriruvana ema Cristo. ¹⁴ Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahénapa te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi. ¹⁵ Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítouchiraina eta nucatuparahairahi me Viya. Tájina vahi nétaviviriacavahini eta nusuapacarevahi eta eyehe. ¹⁶ Núti, váhiquene nímicasiapavaimahi te jácani avasare nacame-tarairuquenéipa nácani apana, nucunachiravayarepuca tayehe eta táitaure-vapaipa apaemataneanahí.

¹⁷ Numetacahe: Nácani tímijachavanahí ticunachacareana, yátupinahiséraini eta nacunachacarevaina mayehe ema Viya. ¹⁸ Taicha mácani achane, te yátupihi eta macunachacarevahi, vahi émajivaimahi ticunachava. Émayarehi ema Viya ticunachayarehi.

11

Ichape eta máeñamiravahi ema Pablo nayehe ena machamuriana

¹ Tiuri puiti, nuvaraha ecamichaini eta juca nucayemaqueneanayare eta eyehe. Ticutiyare súnsurupiana. Nuvarahasera ítasamahini. ² Puiti, tétavivavahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sácheyare. Ácutihini súcani esena amaperu te sutupiruvahi eta sucaimaira, tájinasarera mácayemahini ema suima. ³ Eta néñamiravahi eyehe, nuvarahahi ecuijahini iáquipaicava, ecucamitiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás. ⁴ Ímicatisamurechanuhi eta esuapiravanehi ena tépiyahirahiana, apapipahi eta nametarairu tayehe eta náuchucuiraya. Núti, émahi ema Jesucristo ema néchajisihasahi. Énasera, apanahi ema náechajishahini. Émaripa ema Espíritu Santo, váhivare émainahini náechajishahini éna. Apanachucha ema nacasiñahi. Éti ejacaparipahi ema yátupiquenehi Espíritu Santo. ⁵ Núti németeaca vahi ticachuricanuanaimahi eta nucametarairuira ena tímijachavanahí apóstolequeneana ticametarairurahianahíji náichava. ⁶ Tayanapanepuca tóepurucarehi nayehe eta néchajisirasami, étasera eta nítupajijiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahi.

⁷ Etiarihiserapuca éti ímijachahi néjecapava eta némepaurechiravahi. Táitusiava népurucarehi eyehe, ichaperipahisera nûrichaheripahi éti. ⁸ Váhivare nuyaseacahehipucaini eta nunicaquenerepi eta nímitusirahehi. Yátupi tíjaracanuanahí ena apamuriana vichamuriana eta nénisiavayare. ⁹ Tásiha, te nítahapa eta plata, váhivare nuyaseacahehini eta nunicaquene. Taicha ena vichamuriana ticavasanahí te provincia Macedonia náimiamarecahi eta nucamunuqueneanahí. Tacahe, nujaneacavahi, vahi nuyaseacahehini éti. Váhivare nuyaseacahémahi puiti. ¹⁰ Jéhesare, nájina tiratahaimahi tihapapica eta nucunachacarevahi tayehe eta tájina nucobrachirahéhini eta nímitusirahehi emutu eti ecavasanahí te Acaya, taicha yátupihi eta nímatiequenehairahí tamutu eta yátupiqueneanahí máimiturapiana ema Cristo. ¹¹ Eta juca nucayemaqueneana, vahi ímijachaimahi étainahipucaini táichanu eta numaemunasirahénahini. Ema Viya máimatihi eta yátupirahí némunacahe.

¹² Énesera nucacheheyare nútì. Váhiquene nuyaseacahémahi. Nímiyanavaya eta nujaneasirava apaesa tacuija naviya eta taviuchanu nayehe ena tímijachavanahí tímiturahiana nácutinuhini eta apóstolenuirahi nútì. Taicha navarahahí ticunachacareanayarehi tímicutichavanayarehi eta nucunachacarevahi nútì. ¹³ Éna, tépiyacavanahí apóstoleana. Tivayuarahianasera eta náitaresirahi. Váhiquenevare vanairucanuanaimahi me Viáquenu Jesucristo. ¹⁴ Ena nani, vahi tiáramicareana éna eta navayuaraivahi, taicha ema Satanás, yátupiquenehi náquenu éna, tépiyacavahi macuti ema ángele vanairucahi me Viya, mavairahí tivayuareca. ¹⁵ Ene nacaheyarehi ena nani mavaranahí ema Satanás, tépiyacavanapahi pastoreana náuriqueneana. Járajapayarrehisera eta sácheyare najacapirayare eta náicuñayare táichaveneyare eta juca náimiaquipaisirahehi.

Ichapemuri eta macatajivairahi ema Apóstole Pablo taicha eta macametarairuirahi

¹⁶ Nuvaraha nápechava numetacahe: Vahi ecusuapa eta náimijachiranuhi máurishinu. Te etiarihipuca éti ímijachanu máurishi, ecayehe paciencia eta nuyehe. Ecamichanu eta juca nucunachiravasamipaini apaesachichainahini nácutipaini eta nacunachiravahi ena apamuriana. ¹⁷ Tájina mavanairipina ema Viáquenu tayehe eta vicunachacarevahi. Tíchanuhisera nucunachava taicha éti ímijachanu máurishinuhi. ¹⁸ Táichavenehisera eta nusamairirisirahi eta nacunachiravahi eyehe eta náitupajijiasiravahíji, énenapa nuchaheyare núti eta nucunachirava. ¹⁹ Éti, ímijachavahi ichape eta échemaraivavacahi. Evapinavahisera eta esuapirohi eta nayaseasirahehi ena máurishiana. ²⁰ Ecamichahivare tamutu eta napamisirahe ítaucha eta tivitacareana vanairipiana. Tiverejicaheanahi eta ecayehequeneana. Tiyurucaheana éhicavaca éna. Tasapihapa éti ecamichahi tamutu eta juca. ²¹ Núti, téavicavahi nutsirihahi énemahinuhinahini nácahehini. Te ímijachahipuca tiúrihi tamutu eta juca náichirahehi, eperdonachanuhini vahi níchahini éta.

Ena nani ticunachavanahi eta náurivahi. Núti apanava núriha eta nucunachiravayarehi, tayanapane ímijachanupuca máurishinuhi. ²² Éna ticunachavanahi énairahí hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchucaini Abraham, nucutirichuhivare éna. ²³ Éna, tímijachavanahi mavanarana ema Cristo. Nútisera, jéhevarequenenuhi mavanaranuhi ema Cristo. Nápajupanavahi núti eta nayehe. (Máurishinuhi eta nímaíravahi eta juca nucunachiravahi.) Jéhevare núti nápajupanavahi eta nucaematanearahí ema Viya, nucachuricavacahi namutu éna. Eta juca nucaematanearahí me Viya, témostacanuhi, témeratacanuhivare. Énerichuvare ichapemurihi eta táimicapasiranuyarehini. Ena nani nánarana, vahi náichahini, nájina nacatianacavacahini. ²⁴ Tacutiquene cincohevare nucaesta naicha ena nujaneanana israelítana te jácani nupaisiranapahi. Mapana arroba eta náestasiranuhi. ²⁵ Mapahevare tépuchiricanuanahi. Étahevare tiyucararacanuanahi te márijahiana. Mapahevare térica eta pacure tiámanupahi. Tásiba, étanavare sache étanapa yati nucahehi te táinahu eta une te ichapequene mar. ²⁶ Ichapemurihivare eta nupaisiranahi. Nímahavahivare eta táñehicarevahi eta tamuracava tajunapirahi eta une te ichape cajacure. Nupicacavahivare naicha ena tiámerahiana. Tipanereuchuanapanahi ticapacanuana ena nujaneanana, énapa ena apavasanana. Tamutuhi náemauchianupahi te jácani avasare, téhepa te mávapahi apaquehe, étapa te jácani nupaisirana te une tayehe eta pacure. Énerichuvare témauchanuana ena tímijachavanahi nuchamuriana táichavenehi eta népiyaequeneanahi. ²⁷ Ichapemuri eta nucaematanerahí. Nucatajivahí muraca. Ichapemurihivare eta numacaimarasiravahi. Nucatajivahivare tayehe eta nécuava étapa eta numauneva. Ichapemurihivare eta nucamichira eta ayunanuiranuhi. Nucatajivahivare taicha eta ticasarahi. Néchurihavare eta numuiriharapi.

²⁸ Tayanapaneinesera eta nucatajivairahi ichape, nímiyanavahisera eta néñamiravahi ícha emutu eti nuchamuriana te tamutu avasareana, nuvarairahi tacuijahini tahapapiricahehini tayehe eta éhisirahi ema Cristo. ²⁹ Te etiarihipuca eti vahi túmehénahini eta éhisirahi ema Viáquenu, ichaperinehi eta néñamiravahi núti. Tacutiquene te etiarihipuca éti náimiaquipairuhehi, téavicavahi eta nutsirirahivare, nusemasamurevarepa.

³⁰ Téhesera tatiarihipuca eta nacunachiravahi, núti apanavare nucunachavare. Étasera numaitupajijiasiravahi, étachucha ticunachacarehi eta nuyehe. ³¹ Émasera ema Tata Vicaiyaquene, Maiya ema Viáquenu Jesucristo,

máimatihi éma eta tatupiruvairahi eta nucayemaqueneanahi te juca nucartane. Éma, máitavacacahi eta majirauchacarevahí.

³² Tacutiquene te návihaipahi te Damasco, ema tuparairucahi tayehe, majupahahi ema rey Aretas, máimivanerecahi ena séntinelana te tapajana tayehe eta avasare, mavairahí ticaratacanuana. ³³ Énasera ena nuchamuriana tinacacuhanuanapa tayehe eta ichape saye túmehi, ticuchucuanapaná te ventana, ticajuchuchucuanapaná te tiupi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

12

Ema Pablo mavapuchahi tímerecava ema Viya

¹ Yátupi tájina nuvehaimahi eta nútijivairahi nucunachava. Numetacaheyaresera eta nímairahi te nuvapure máechajisiranuhi ema Viáquenu.

²⁻³ Catorce áñopa eta táetavisiravahí eta nímairahi tiámanuanapa tímipairiricanuanahíji te anuma te mávasa ema Viya. Váhisera necha te étahipuca eta náquehe námapahi eta nuyanirahi, te étachuchapuca eta náchaneva. Émasera ema Viya, éma téchahi eta níchararacavapahi eta mámiranuhi te mávasa anuma.

⁴ Ánaqui nusamapa eta mahu. Timetacanupa eta téchacareanahi tayumururevahí. Váhisera táisapacarehini numetajiricahini. ⁵ Étapapucaini nucunachiravahini tayehe eta nímahaquenehi nusamaquenehivare, taicha tímimatichanuhi ema Viya. Váhisera nucunachavaimahi tayehe. Núti nucunachavahí tayehe eta numáitupajijiasiravahí. Étachucha nucasiñavaiyahi tayehe. ⁶ Yátupihinéni eta nucunachacarevahí. Váhisera nucajamuravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahí eta nítaresirahí.

⁷ Tétavicavahí eta tiáramicare eta nímahaqueneana te anuma. Tásicha, ema Viya vahi mávarahaimahi nucasiñavavaicahini eta nímairahi. Máisapahi ema Váinarajiquene Satanás técajumachanuhi, cútirine tatiarihinhahini itape tayuvaraca te neche. Taicha ema Viya mavaraha vahi nucuvayuchava eta nucunachacarevaina. ⁸ Mapahe eta nuyaseasirahí ema Viya eta macanarasiranuinahini eta nucatiruhavahí. ⁹ Émasera ema Viya, ánipa máichanuhi: “Vuíchaha nucanaracavimahi. Nujapanuvisera. Níjaracavyare ichape eta pitumevaya, tayanapane eta pimaitupajijiasiravahí. Taicha nuvaraha náimatiyarehi ena achaneana eta nítupajijiasiravahí piyehe” máichanupa. Eta tacahe, núrisamuréichucha puiti eta tamajinairahi eta nítupajijiasiravainahini apaesa máimerecavahini ema Cristo eta máijarasiranuhi eta máitupajijiasiravahí. ¹⁰ Tásicha, nuvapinavahí puiti eta napanajisiranuhi, nucatjivairahi náicha, náumehairanuhivare táichavenehi eta mavanarairanuhi ema Cristo. Nuvapinavahivare eta numaitupajijiasiravahí étapa eta néchuriasirana, taicha eta nímairavahí tamajinairahi nítupajijiasiravainahini, nútisera nusamavahí eta nutumevapaipaicha maicha ema Viáquenu.

Ema Pablo tétavicava eta máeñamiravahí nayehe ena machamuriana

¹¹ Yátupi puiti eta néchajisavairahi nucatiuchiravahí, tímicutijirícavaipa máurishinuínahíni. Íchavenehisera éti, taicha éti tatuparacahi ecatiuchanuyarehini, váipasare nucuechajisavahini nútí, vahi nútijivainahini nucunachavahini. Navetijisera ena tímijachavanahí apóstoleanahíji ena éhiruanahí, jéhevare éna, tájinaquenepa nacunachacarevaina. ¹² Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucatiruhavanaugh, nucamichahisera tamutu. Nímechaheripahinéni eta tiáramicareana níchaqueneanahí, maicha

ema Espíritu Santo. Éta tímicaecherachanuhi eta yátupiquenénuirahi apóstolenu. ¹³ Ena apamuriana vichamuriana te apana avasareana ticajinuanahi éna eta nucamunuqueneanahí. Étisera, tájina vahi nuyaseacahehini étainahipucaini eta nunicaquene, nítcahipucaini íjaracanuini. ¡Váhisera ecusema eta juca numaitecapauchirahihi!

¹⁴ Puiti nutserereacavaipa eta mapaherayarepa nítca eta ara eyehe, nupaipiuchirahyea. Váhivaresera nácamunuimahi ítatinuhini. Váhivare étaina nutanucapahini eta ecayehequeneana. Étiquenesera nucamunuhepahi eta esuapiranuinahini. Taicha nuchichanavehehi éti. Vahi étinayare ítatinu. Núti nítatiheyare taicha nútia caiyaquenenuhi. ¹⁵ Váhivare néñamiáhemahi eta nucayehequenehi eta nítatirahéyare. Váhivare nuyacujimahi eta nucaemata-neasiraheyare táurivayare eta iáchanevana. Tayanapané váhipuca ecuemunajicanuhi, nútisera téavicavahi eta némunasirahehi.

¹⁶ Nararihvare ena téchajicanahi eta nuyehe. Ani tacahéhi eta náechajiriruvahi: "Yátupi te tipaipiuchahavi éma, váhinenicacha tiyaseacahavi eta macamunuquene. Máitucasera eta mavereasirahaviya eta viplatane" nacahéhi. ¹⁷ Eti ímatihi vahi énavanerecainahipucaini ena névataruasanahí eyehe, énainahipucaini navereacahehini níchavenénahini nútia. ¹⁸ Te nuvanecapa ema Tito émapa ema macachanequenepahi, téjirapanahaenayarehi, ¡tájinavare mayaseacahehini éma! Taicha vicuticacahi víti eta viúrivahi eta eyehe, táchavenehi eta vémunasirahehi ichape.

¹⁹ Eti ímijachaipapuca nutanucahi nútia eti nucatiuchiravayarehi eta eyehe. Váhisera táchahéhi. Vahi táchamunucaréimahi eta nucatiuchiravaya taicha nútia nutupiruvahi eta néchajisirahehi te mamirahu ema Viya étapa te máijare ema Cristo, nuvarairahi tajurucahini eta táurivaina eta iáchanevana, eti némunaruqueneanahí nuchamurichichana. ²⁰ Nútia, te nítca eta ara eyehe, nupicahi vahi núricaimahi ácahemahihíni eta nuchimapiraheya: éhajiricácahipucaini, ecapinarujiricacahipucaini, esemajiricacahipucaini, íputsimuriácacahipucaini, épíyéquenerejiricacahipucaini, iúmhajiricacahipucaini, ecasiñavavairicahipucaini, váhipuca tacuaquejiricacahi eta epanereruana. Te ecahehipuca, vahi iúricaimahi némecharecahehini. ²¹ Nupicahisera nátsirihacrehini nútia mayehe ema Viya íchavenénahini éti, vuíchaha étupiricavahini eti nuchimapiraheyare. Vahi nuvaraha ecaiyacanu éti enerejicavana ejecapavanahí, taicha eta ánaquiaparipahi eti émainajisiraichaha eti ecapecaturairana. Ímiyanavaichucha eti esenamarerahehi, étapa eti emapicaurahivaichucha.

13

Eta máipicararesirahi ema Pablo eta táchecuaraqui eti macartane

¹⁻² Puiti mapahenapa eti néjirairaheya. Cape te nítésinehi, numetacahevanehi nútijacaruvahi, camuriripa eti nuconsejachirahéhi eti ejecapavanahí. Iúrihapaini ínjica eti emaurivana. Puiti te nucartane, nápechavahi numetacahe emutu. Vaipa nucaitacaimahi nácani téjecapavanahí. Nútia nétupiricavacaya. ³ Etiarihihi eti épurunuhi eti mavanesiranuhi ema Cristo. Ímahayaresera ichape eti máimicatasiránuhi eti nétupirisiraheyare. Taicha éma, titupajijiacavahi eti máemecharesiraheya. Tipicacare eti máicuñaraqui.

⁴ Yátupi éma tísapavahi ticaetata, tímicutijiricavaipahi vahi macuratahahini ticatiuchava. Váhisera mánasihini mápenahini, tichavahi titareca puiti taicha eti máitupajijiasiravahi ema Viya. Ene nucahehi nútia nísapayarehi, tímicutijiricavahi vahi nucuratahairainahini. Ímahanuyaresera eti máijarasiranuhi

eta máitupajijiasirava táichavenehi eta mávahásiranuhi eta nétupiricaheyarehi taicha nucatuparalahi eta nujaneasiraheyarehi emutu éti.

⁵ Nuvaraha esamavayare étijiva, te yátupihipuca tiúrihi eta éhisirahi ema Viáquenu Jesucristo, te yátupipuca eta mávahásirahehi éma. Taicha éma mávahácavacahi namutu ena machichanaveana yátupiqueneana. Machu émepururecava eta íjarasiravahi éhica éma. ⁶ Nuvarahasera némechahe ímati-nuhini yátupinahini eta mávahásiranuhi ema Cristo, jéhevare núti yátupique-nenuhi machaneranuhi. ⁷ Núti, ichape eta nuyujarauchirahehi, nuyaseacahi ema Viya eta étupirisiravayarehi apaesa tacuña eviurevaina mayehe. Ichape eta nuvarairahi íchahini eta táuriqueneana. Tayanapanerinehipuca náepuru-nuhini, nuvarahasera ímiyanavayare éti íchayare eta táuriqueneana. ⁸ Taicha núti nutupiruvahi nicha eta táuriqueneana yátupiqueneana. Váhiquene nísapavaimahi nuhapapica eta yátupiqueneana. Eta tacahe, yátupina ésamiricava. Vaipa ecucamesa eta nápepejíricahe numetacahe. ⁹ Ichape eta ecurisamure-chiranuya te yátupinapa étupiricava. Étijivainapa eratahayare ecaratacava. Vaipa nútitaracaimahi eyehe. Puiti eta nuyasearapi núti me Viya, tamutuyarepa tichavaya eta táurivahi eta ítaresira. ¹⁰ Puiti nucajurehe eta juca carta, nucuchapavahi núti eta néjirairaheyare, támaturipahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta iáchanevana. Étahi eta nutuparacasivanahi me Viáquenu eta apóstolenuirahi mayehe.

¹¹ Tiuri puiti, nuparapenaveana, ítátijirícavahi. Etanucayare eta táuriqueneana eta ítaresirana. Ecurisamurechacaca. Tacuijahini eta semanerena eta eyehe. Tácuticaca eta epanereruana. Máijaracahehini ema Viya eta tanarasiraina eta iáchanevana, taicha tétavicavahi eta máemunaraivahi éma.

¹² Núti néchajicahe emutu. Nuvaraha nétserarecahevacayare táicutiarahi eta táetavisiravahi eta némunasirahehi te mavahuana ema Viáquenu. ¹³ Ani te juca téchajicaheana namutu ena vichamuriana.

¹⁴ Nuyaseuchaheparaca emutu éti me Viáquenu Jesucristo táetaviuchahini eta iúricacarevaya máicha, evapinavavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te Galacia, ticaijare **GÁLATAS**

¹ Nuti Pablo, yátupiquenenuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihi eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepecasiquénehi te máecari. Vahi apanainahini achane ema tinacanuhi, énainahipucaina ena nucutiqueneanahi apóstoleana nanacanuhini eta juca návacurehi. ² Puiti nucajurehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téchajicaheana ena apamuriana vichamuriana te juca návhahi.

³ Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini eta táurivaina eta epanereruana. ⁴ Ema Viáquenu tíjaracavahi tépena te crusu taicha mavarahahi ticuchucuhahaviyare tayehe eta vícuñayarehini táichavene eta vipecaturana, macámitiásinaháviripahivare eta vijamurachirainihi eta tamauriqueneana tayehe eta juca apaquehe. Eta tacahehi eta mapanereruhi ema Tata Vicaiyaquene. ⁵ ¡Máichecuaraqureyarehi eta vijirauchiraya éma! Amén.

Étanarichu eta doctrina véhiruhi, tájina apanaina

⁶ Ichaperinehi eta ímipanereresiranuhi. Váhica németeaca ene ácahehini eti éhicahini eta apanaquene doctrina. Tasapihapa esuapahi eta juca, vaipa émainahini esuapa ema Viya. Ínajicavanepa eta esuapirainihi éma. Émepuru-recapa eta máichuirahah. Tasapiha émepururecasa eta máopeninahehi ema Jesucristo eta máemunasirahehi. ⁷ Nutupiruva numetacahe, tájina apanaina doctrinaina tácuti eta juca véhiruhi víti. Néchahi eta juca íchararacavahi éti, nararihi ena témejecapavachaheanahi, navarahahi nahapapicayare eta vímiturapianahi tásihaqueaneanahi mayehe ema Cristo. ⁸⁻⁹ Víti vímitucaheripahi eta juca yátupiqueneana, étarichuhi eta máechajiriruva ema Viya. Cape juca, te viávihaicha eyehe, vimetacahévanahi eta macatichira ema Viya eta apanapanequeneana doctrina nahapapiruanahi. Puiti nápechahevare numetacahe: Ticatichacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepuca ema Viya, ticatichanuhini ema Viya taicha eta nuhapapisrainahini eta máechajiriruvana. Téhevare máitecapucaini mácani émana máimicutichavapahini ema ángele másihaqueñenahipucaini te anuma, te mavarahahivarepuca mahapapica eta vímitureheanaripa víti, énerichuvare macatichayarehi ema Viya.

¹⁰ Nararihipuca ena témeteacanuanahi nuhapapicahi eta máechajiriruvahi ema Viya, étainahipucaini níturusihahini ena achaneana, némemunasiravainahini nayehe. ¡Tájinaserá vahi nuhapapicahini nút! Nutupiruvahi eta nímituresirahi taicha nuvarahahi nucurisamurechaya ema Viya, nímerecavayarehi eta nûriva eta mavanaranuirahi ema Jesucristo.

Ema Pablo tímereuchava eta táichararacavahi eta masiapiroahí apóstoleyare

11 Nuvaraha numetacahe eti nuparapenaveana eta juca nucametarai-ruirahi, vahi tásihaquenénahi te nupanereru núti. **12** Váhivare nímitucasivainahи mayehe mácani apana achane nucutiquenehi apóstole. Émaquenehi tímítucanuhi ema Jesucristo.

13-14 Éti esamairiricanuhi jácani eta níchararacavahi eta nítaresirahi cape juca násinequenehi, te étarichaha néhicahi eta nayeherepiana ena israelítana náchucanaveanainihi núti. Núti, eta nujurusirahi, nímahahi eta tacapica-huirahi eta viyeherepiana. Ichapehi eta némuracachiravahi, nucachuricavahi ena nuparajuruuanahi. Nímicapicauchahi muraca, numavarairahi táemitequenehini eta viyeherepianahi nanaquipairuanahi ena náchucanaveanaini. Eta tacahehi, ichapemurihi eta nupanajirisiravacahi ena machaneranahi ema Viya, nuvarairahi nucámitiéquenehavacayarehíni eta náehisirahi ema Jesucristo. **15** Námavaquenévahiséra eta manerejisiranuhi ema Viya, te vuichaha núchucahini te sujuhe esu ticachichanu; tacahehi eta mapanereruhi eta máichuiranuyarehi, taicha eta máemunasiranuhi. **16** Tásiba, tímimatichanuhi ema Machicha, taicha mavarahahi nucametarairuyare nayehe ena apavasanana eta macuchucuirayare namutu ena tisuapaná ema Machicha. Váhisera nutanucalahini nácani námitucanuhini eta nucametarai-ruirayare. Nájinavare nuyasereruina. **17** Váhivare nuyanahini te Jerusalén nutanupanahipucaini ena náinapureanahi apóstoleana. Téhechucha apaquehe Arabia nucaijuhehi. Émasera ema Jesús, éma tímítucanuparacahi. Te váchupa, nuchavavarepa te avasare Damasco. **18** Te mapanaquenepa año, nupaenu-mavapa nuyanahini te Jerusalén, étapa nímatinehi ema Pedro. Nunasipanapa quince sache nucahehi eta mayehe. **19** Émapa ema Santiago, maparape ema Viáquenu, ema nímaquenehivare. Énasera ena apamuriana apóstoleana, nájina nímahavacahini. **20** (Puiti tímararacanuhi ema Viya, tájina vahi népiyahiraivaina eta juca nucáyemaqueneánapahi te juca nucartane. Nutupiruvahi eta numetasirahehi.) **21** Tájinaserá vahi nucaimitucasihini nayehe taicha nuyanavanevarepa nucaijuhehi eta te Cilicia, nánucuhapa tayehe eta Siria. **22** Tacahe, ena vichamuriana ticavasanahi te Judea, váhivare náimatinuhini taicha vahi náyerehini tayehe. **23** Tisamairiricanuanahisera eta néquesiravaripahi. Ánipaji tacahehi eta nasamairirisiranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámitiéquenehaháiyarehíni eta juca véhiruhi. ¡Puiti émarinecha tétecaracavahi ticametarairuhi eta juca véhiruhi víti!” nacahepaji. **24** Tacahe, ichaperinehi eta nacunachirahi ema Viya níchavenehi núti eta néquesiravahi.

2

Ema Pablo tímereuchava eta masiapamurihairapa ena apóstoleana, tásiba natupiruva najacapa éma

1 Catorce áñoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito.

2 Taicha numetacavacapa me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapiro, viúrujicavapa, énachuchasera vicachanehi ena tachutirihanahi. Tásiba numetacavacapa eta nímiturapianahi eyehe eti apavasanana étapa eta es-uapiro. Taicha nuvarahahi ena vichamuriana israelítana najacapahehini eti apavasanana vichamurianipahi. **3-4** Te jena, natarihihi ena tépiyacavanahи vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana

éhica eta nayeherepiana ena israelítana. Taicha tacahehi eta náechajiruvahi éna, ítauchayarehiji eta nayeherepiana éna, vähiji tacarichuimahi eta éhisirahi ema Jesucristo. Navarahahivare napamicayarehini eta macamarca ema Tito, eta apavasanairahi éma. ⁵ Tájinaserá vahi vísapavahini nacachuriacahavihini, taicha víti vivarahahi tacuijahini tahapapicahehini eta éhisirahi eta yátupiqueneana téhicacareanahi. ⁶⁻⁹ Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanuhini eta apamuriana téchacareanahi nayehe. Étasera eta nasamiranuhi, náimativanepa eta émairahi ema Viya tituparacanuhi eta nucametarairuiraya nayehe ena apavasanana. Nucutihi eta macatuparahairehi ema Pedro máimitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijaracahivare eta máitupajijiasiravahi. Ene nucahehi núti tíjaracanuhi eta návacurehi apóstolenuhi nayehe ena apavasanana. Tíjaracanuhivare eta nítupajijiasiravahi. Eta tacahehi, náimatipa eta émairahi ema Viya tíjaracasichanuhi eta juca nítuquenehi. Tacahe, tijupacahavianapa, núti émapa ema Bernabé. Eta juca náichirahavihi táicutiarahi eta náispirahaviyarehi vímiyanava vímitucavacayare ena apavasanana. Éna, tímiyanavanayare tímiturecanahivare ena israelítana. (Tépurunuuarichuchapuca eta náimairanuhi. Tayanapanesera vähipuca nujacapacarehi nayehe eta apóstolenúirahi. Nútisera néchahi eta manerejisiranuhi ema Viya eta apóstolenúirayare.) ¹⁰ Tacarichu tituparacahavianahi eta vímicatasirayarehi ena páureana. Eta tacahehi puiti, nítauchahi núti eta nuvanecasivahi nímicatiravacaya ena páureana.

Ema Pablo tímereuchava eta macajachirahi ema Pedro

¹¹ Te taequenepa, te jena áñoanahi, títecapauchahavipa ema Pedro te avasare Antioquía. Étasera eta mávihairahi viyehe, téjecapavainapa. Eta tacahe, nucajachapa éma. ¹² Eta máitecapirapa ema Pedro, tájinaipa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacahe, te jena sácheana, títecapanapa ena máemunacasareanahi ema Santiago, israelítana vichamurianahivare. Te máimahavacapa ema Pedro, titsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauchanahi eta nayeherepianahi ena israelítana. ¹³ Tacahe, ena apamuriana israelítana vichamurianahi, énerichuvare éna náehicapa eta máejecapiravahi ema Pedro. Téracicavanavare éna apanava. Émaripa ema Bernabé máehicavarepa eta náejecapiravahi éna. ¹⁴ Tacahe, te nímahapa núti eta náejecapiravahi, vahi táurihini eta náichaquenehi, nucajachapa ema Pedro te namirahu ena vichamuriana taicha májequihapa eta tavanairipihi eta yátupiqueneana máechajiruvana ema Jesús. Níchapa ema Pedro: “¿Tájaha tacayema eta pitsirihahi ena vijaneanana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi cape juca pítaresirahi, táitusiava eta picachanejiricavacahi ena apavasanana vichamurianahi. Tásicha puiti, eta pímaírapa náitecapirahi ena vijaneanarichu násihaqueneanahi te Jerusalén, péquecavavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

Namutuchucha tijacapacareanaya me Viya nácani navarahaya téhicanayare ema Jesús

15-16 Tacahe, numetacavacapa namutu eta juca yátupiquenehi: Véchahi víti eta vahi tágamesaimahi vítauchahini eta nayeherepianaini ena viáchucanaveanaini. Tarataripahi eta véhisirahi ema Jesucristo, vijacapacaréipa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipecaturaraivahi viyehe viti israelítana, titujicavanayarehisera tijacapacareanaya me Viya taicha eta náehisirahi ema Jesucristo. Tayanapane vitamuturucahipuca eta mavanairipiana ema Moiséini, tájina vahi vájacapacarémahi víti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

17 Natiarihipuca ena téjecapavanahi te napanereruana, ánipuca nacahehi eta náechajiriruvahi: “Yátupipucáji eta vijacapacarehi me Viya táichavenechucha eta véhisiraya ema Cristo, vivetijinapaserapuca tiápajucavaina-papuca eta visipecaturaivaya taicha vínjicainapa eta vanairipiana. Tacahe, émapapuca ema Cristo táemesiavaya eta vicapecaturaivaya” tacahenapapuca eta napanereruhi. Éna, timápachichijíruvachucha te napanereruana. Ema Cristo váhiquene émaina tásaha eta pecatuana.

18-19 Eta náhisirainihi apaicape eta vanairipiana, tájinachucha vahi táimicatacanuhini eta nujacapacarevayarehi me Viya taicha váhiquene étaparacaina. Eta tacahe, nínajicahi eta náhisirainihi. Nímatiripasera eta nujacapacarevarehi me Viya táchavene eta nucasiñairahi eta mayehe. Puíticha tiúripa eta nítaresirahi me Viya. Tásaha, ichapenapahini eta néjecapiravaya núti apana, te nuchavapuca néhica eta mavanairipiana ema Moiséini. **20** Eta nusuapirahi eta máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasiñahi taicha yátupihi eta macasiñacarevahí taicha yátupiquenehi Machichahí ema Viya. Eta máemunasiranuhi, tímijararecavahi níchavenehi núti. **21** Vahi némepururecaimahi núti eta máemunasiranuhi ema Viya. Nararihisera ena tímijachavanahi tijacapacareana mayehe táichavenechucha eta navarairahi náitaucha eta vanairipiana. Ena nani, tímicutijiricavahi náemepururecahi eta mapanereru étapa eta máemunasiravacahi. Tímicutijiricavahi náemepururecahivare eta máepenirahi ema Jesucristo te crusu.

3

Tacarichuchucha eta vicasiñairahi ema Jesús, vijacapacaréipa me Viya

1 ¡Páurehechapucaini, eti nuparapenaveana gálatana! Ímijachaipapuca étupicavahi eta juca ecahehi. Ínajicavanepa eta éhisirainihi eta yátupiqueneanahi. Vímimaticaheripahi eta iúricacarevahí tásahaquenehi eta máepenirahi ema Viáquenu Jesucristo te crusu. ¿Tájaha tacayema émepururecahi eta juca iúricacarevayarehini? **2** Esamanuchaha, puiti nuvaraha numetacaheyare. Eta mávahásirahehi ema Espíritu Santo, éta tíchahi eta éhisirahi ema Jesucristo. Vahi étainahini taicha eta ítauraivainahipucaini eta vanairipiana. **3** ¡Tétavicavapa eta esunsuvavaca éti! Te épanavapa eta éhisirahi, tájinainiripahi íchiravainahíni máicha ema Espíritu Santo. Éma téturemechahehi. Puítisera éti evarahapa ínajicaya eta mávahásirahénihí, ímijachaipapuca eta ticuchucuhaheyare eta ejairavanahí. **4** Tamapurujinapapuca eta máimicasasirahehi ema Espíritu Santo. Németeacasera núti vuíchaha émepururecavaimahi. **5** Ema Viya tijaracaheripahi ema Espíritu Santo eta mávahásirahehi.

Tímechahehivare eta tiáramicareana. Étaripa macatajisirahehi táichavenehi eta ecasiñavairahi tayehe eta máechajiruvana. Étasera eta ítauraivainahipucaini eta vanairipiana, tájinainapa táimijaracahehini.

⁶ Énerichuvare macahehi ema viáchucaíni Abraham. Ticasíñavahi éma tayehe eta máechajiruvana ema Viya. Tásicha, ema Viya, ichape eta majacapirahi éma. Máemitisicahi tamutu eta máejecapiravanahí. ⁷ Puiti, yátupina ácautíara eta juca: Te yátupina vicasíñava me Viya, vijacapacareya mayehe, taicha vicutiyare ema viáchucaíni Abraham eta macasiñavairahi me Viya.

⁸ Ema Viya mamecahi ema Abraham eta najacapacarevahí mayehe, nácani ticasíñavanayare éma. Áni macahehi eta máichirahi: “Tétavicavayare eta náuricacarevayare ena achaneana te tamutu avasareana nácani ticutivianayare eta picasiñairanuhi nútí” máichapa ema Viya. ⁹ Tásicha, viti vicasíñanahí puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

¹⁰⁻¹² Natiarihisera ena tímijachavanahí tijacapacareanayare me Viya táichavenehi eta navarairahi náitamuturuca eta vanairipiana. Téjecapavapanahisera. Taicha ani tacahé eta vanairipi: “Tamutu sácheana ítauchayare tamutu eta juca vanairipiana. Te éjequiha apaesachichaina, éta tímicuñacaheyare”. Váhiquenesera naratahahini náitaucha tamutu eta vanairipiana. Eta tacahé, náviraichu ticaicuñaya, vahi tijacapacareanaimahi. Ánivare tacahé eta vanairipi: “Te ítamuturuca eta vanairipiana, máichecuaraqureyare eta ítaresirayare táicha”. Tásicha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahé eta Sagrada Escritura: “Nácani ticasíñavanahí me Viya, tijacapacareanahí, máichecuaraqureyare eta náitaresiraya táicha”. Tásicha, nuvaraha ácautíara eta juca: Eta vijacapacarevahí tásihahi eta vicasíñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacapacareva me Viya. ¹³ Ánivare tacahé eta Sagrada Escritura: “Mácani achane ichape eta maviureva, ticaetatacasiyarehi te yucuqui. Eta táicutírahí eta máicuñasirayare ema Viya eta máchaneva”. Viti achaneana, ichape eta vícuñayarehini taicha eta vimaitau-chirahi tamutu eta vanairipiana. Émasera ema Jesucristo, tépeninahavihi te crusu, tamuriasirahi tamutu eta vícuñayarehini víti. ¹⁴ Éma máichahí eta juca, mavarairahi eta iúricacarevayare eti apavasanana táichavenehi eta ecutirahí ema Abraham eta macasiñairahi ema Viya. Puiti, tétavicavahí eta viúricacareva vimutu, taicha tiávahácahavihi ema Espíritu Santo máijararuhavihi ema Viya táichavenehi eta vicasíñairahi ema Jesucristo.

Tájinachucha tájaracahavi eta véhisirahi eta mavanairipiana ema Moiséini. Macarichu ema Viya tíjaracahaviya eta viúricacarevaya.

¹⁵ Nuparapenaveana, nuvaraha nímicutiarachináheyare eta juca. Te matiarihipuca ema achane, te tépiyarecahi tratu mayehe ema apana achane, nafirmachayarehi eta natratunehi. Tásicha, nafirmacharipa eta natratunehi, vaipa tauricaimahi nacaepaha eta tacajuquenehi. Nájinapavare tihapapicaimahi. ¹⁶ Ene macahehi ema Viya eta matratunehi mayehe ema Abraham. Ani macahehi: “Níjaracavyare píti eta piúricacarevayare. Énerichuvare níjaracayare eta máuricacarevayare ema piámariéqueneyare” macahepa ema Viya. Tacahé, émanarichuhi ema mámariequenehi ema táimijarechaquenehi eta matratune, vahi námutuhini ena nasimutuvaqueneanayarehi mámariéqueneanayarehi ema Abraham. Émahi ema ticaijarehi Cristo. ¹⁷ Tiuri puiti, nuvaraha nímicaecherachaya eta eyehe: Eta juca matratunehi ema Viya

mayehe ema Abraham, mafirmachaquenehi eta máijarasirayare eta náurica-carevaya nácani ticasiñavana eta mayehe. Étasera eta táetavisiravahi eta 430 áñoripahi, te májuchapa ema Moiséini eta vanairipianahí, vahi macaepahahini ema Viya eta matratunehi, váhivare máitsivachahini eta máijarasirayarehi ema Jesús, mámariéquénehi ema Abraham.¹⁸ Ema Viya mameatacahi ema Abraham eta máijarasirayare eta máuricacarevayare, taicha eta máemunasirahí éma. Ene vicahehi víti. Ema Viya tíjaracahaviyare eta viúricacareva taicha témunacahavihi. Eta viúricacarevaya, vahi étainahini eta vítauchirainahipucaini eta vanairipiana.¹⁹⁻²⁰ Etiarihipuca eti evaraha eyase-recanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿táchahaserapuca tacayemahí eta mavanesirahí ema Viya májucha ema Moiséini eta juca mavanairipiana?” Tiuri, puiti numeta-caheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimatichayare ena achaneana eta tamaurivahi eta pecatuana. Téhesera te títecápapa ema Cristo, vaipa táimiyanavahini tasuapacarehini eta mavanairipianahí ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahí ema Abraham. Vahi máimivanerecahini ema Viya, émajacarúvahí éma, eta máechajisirahí. Émasera ema Moiséini macaimitucusiquenechucha nayehe ena ángeleana.

Eta mavanairipiana ema Moiséini tivanecahavi vahi vicuquicha eta pecatuaná taicha tíñehicarehi eta júcana mayehe ema Viya

²¹ Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimahi vájacapacarehíni eta me Viya. Váhivare étainayare ticaitarecahaviyare.²² Esama eta juca máechajiriruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahí” tacahepa. Jararihisera eta viúchucuirayare taicha tíjaracavahi ema Viya ticuchucuhahaviyare vimutu viti vicasiñanaya ema Machicha Jesucristo.²³ Ánaquiaparipa eta tacaratasiravacahi eta mavanairipiana ema Moiséini nayehe ena israelítana náchucanaveanaini núti. Vahi tásapahini tasimutu-hichaini eta napecaturana. Tiámainucavapa te títecápapa ema Jesucristo, émapa tímitucahavihi eta arairuyarehi eta véhiruyare.²⁴ Táitaurevaquene eta mavanairipiana ema Moiséini eta típicararécahávihi tayehe eta táiñehicarevahí eta vicapecaturairana. Éta, téüpircalahavihi tacutihi mácani profesor eta máetupirisiravacahi eta napanereruana ena máimitureana. Ene tacahehi eta táchchapajirisirahavihi eta mavanairipiana ema Moiséini. Puítisera eta máitecapiraipahi ema Jesucristo, émapa véhicayare, vijacapacarénapa me Viya taicha eta vicasiñairahí ema Jesús.²⁵ Puíticha, émainapa véhicayare éma, vaipa étaimahi véhica eta mavanairipiana ema Moiséini.²⁶ Puiti, eta ecasiñairapa ema Jesucristo, machichaheripa ema Viya.²⁷ Puiti, eta ecaicachasirahí te máijare ema Jesucristo, tiávahácaheripa éma, éti ecutinapa eta máurivahi.²⁸ Tayanapane apavasasajuecuhehi éti; tayanapanehivare ecasiriquiquíjihi eti ajairana, ena esenana; tayanapanehivare músuánapuca, líbreanapuca. Téhesera te mamirahu ema Viya, étanarichuhi eta vímahí.²⁹ Puiti machichaheripa ema Cristo; tásicha, ecutiripa mámariequenehénahini ema Abraham. Ímaequeneharichucha eta matratunehi ema Viya eta máijarasiraheyare eta iúricacareyare táicha.

4

¹⁻² Esamanuchaha. Nuvaraha nímicutiarachináheyare. Te matiarihipuca ema achane camurihi eta máimahaqueneana te mapena, te matiarihipuca ema machicha, téhesera te amaperurichaha éma, natarihiyarehi ena téchapajiricanayare, énapa ena tímitucanayareva. Vahi náisapaimahi mamápachichijicaimahi eta máimahaqueneanahi ema maiya, tayanapane émahinéni ticayeheyare tamutu. Tiámainucavasera te máimahapa ema maiya eta maechemaraivahi ema machicha, másapainapa eta máemamacata etá máimahaqueneanahi. ³ Ene vicahehi víti cape juca viásinequene te vuíchaha vímatihini ema Cristo, vicutinihi ena amaperuana. Tipamicahavianahi véhica eta nayeherepiana ena viáchucanaveanaini. ⁴ Émasera ema Viya, te máimaha tiuri eta táitauchiravayarepa etá mapanereruhi, maevatacapa ema Machicha te juca apaquehe. Ema Jesús, tiáchanechavapa te sujuhe esu maena. Eta máuchusirahi, vivasimahi eta vicaqueherahi viti achaneana. Eta majurusirahi, ticaravahupa etá viyeherepiana viti israelítana. ⁵ Eta tímitecahi éma, mavarahahati ticuchucuhahaviyare viti achaneana. Mavarahahivare vimutu vijacapacareyarepa me Viya, machichahaviyarepa. ⁶ Puiti, etá machichairaheripa ema Viya, tíjaracaheripa ema Espíritu Santo tiávahácaheripa te esamureana. Émapa témechahehi mayehe ema Viya, tímitucahepa etá eyujarauchiravaya: “Tátachicha Vicaiyaquene” ecahenapa. ⁷ Tacahehira etá machichairaheripa, vaipa ísapaimahi nácani napamicahehini tayehe etá nayeherepiana. Tíjaracaheripa ema Cristo etá iúrivaya, iúchucuirayare máicha.

Ema Pablo, nahapasamurechahi ena machamuriana

⁸ Cape juca iásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esiñarajiana. Tájina eratahaimahi émitisica etá eyujarauchirahi tayehe. Éna, vahi yátupinahini víyanainahini, váhivare távahácavacaimahi etá máchaneva ema Viya. ⁹ Puítisera, ímatipa ema yátupiquenehi Viya. Tásiha, énerichuvare éma tímatihevacapa, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare etá ecasiñayare etá esiñarajiana? Eta ecasiñasanahi, tájina vahi tisamaheanaimahi, váhivare tímicatacaheanaimahi tayehe etá panererucana. ¿Tájaha tacayema ísapava napamicahe etá ítauchira etá nayeherepiana? ¹⁰ ¿Tájaha tacayema enasirichuhi epicaucha etá piéstamuhanu, étapa etá aracherumuhuana caje? ¹¹ ¡Chape etá néñamiravahi eyehe! ¡Tájuricati támápurujipahi etá juca nímitusirahehi!

¹² Esamanuchaha, nuprapenaveana. Nuvaraha váciticacahini etá vianeruana. Váhini vicuehicaini etá nayeherepiana ena achaneana. Németeaca esuapanu taicha vahi eyacujequenehanuhini. ¹³ Éti etupiruvahi ejacapanu cape te nítecainapa etá ara eyehe. Écharichuhi etá nucajumairapahi te nítecapauchahepa. Etupiruvahisera esuapa etá numetarairuhi etá eyehe. ¹⁴ Vahi ecaecahinuhini etá nucajumairapahi. Váhivare épurunuhini. Tiúrihi etá ejacapiranuhi tímicutijiricavainehi ángelenuinahini, Crístonuinahipucaini. ¹⁵ Ichape etá iúrisamurevahí te jena sácheana etá návhairahi eyehe. Nímatihí téavicavahi etá émunasiranuhi. Te nucamunuvali, evarahahí íjaracanu etá ecayehequeneana. Tájina éñamahini. Ichape etá nucunachirahehi. Tacahe, maejeha néchajisihahí etá émunasiranuhi.

¹⁶ Eti ímijachaipapuca nucatichirahehi etá numetasirahehi puiti etá juca yátupiqueneana. ¹⁷ Ena nani téchapajiricaheanahi, váhisera tátupiruvahini etá náemunasirahehi, navarairachucha típichasicaheanayare apesa vahi ecusuapanu núti, etá vaipa ecuehicanuhi. Navarahahivare éhicayare etá

nayeherepiana apaesa énainapa échapajiricayarehi. ¹⁸ Tiuri, nútì vahi nucaticha eta ítatiraina ena apamuriana achaneana. Táurisera eta náemunasiráhena táchuti eta néminasirahehi nútì. Éti apanavare evapinavayare tacativa nusama taicha eta ímipanereresiranuhi. Ticutirinehi súcani esena ticatiruhapa, taicha ticatihi susama eta amuya. Ene nucahehi nútì eta nucatisamureravahi, néñamiravahi icha éti. Nuvaraha ácutini ema Cristo eta máurivahi. Tiámainucava te nímahahépa ecutinasipa éma eta máurivahi, núrisamurenapa ícha. ²⁰ Eta tacahe, nuvarahanecha níjahúchavahini nítectapauchahe. Nútijacaruvainapáini néchajiricavahini eta eyehe eta nímitusirahenahini. Ichapemurihi eta ímipanererésiranuhi.

Ema Pablo máimicuticha ena apinana machichana ema Abraham

²¹ Éti evarahapa éhica eta mayeherepianaini ema Moiséini, puiti nuvaraha níminecapaequenehaheya eta táechajiriruvahi eta Sagrada Escritura mayehe ema Abraham. ²² Táechajisihahi éma, apinanairahi ena machichanaveana ajairana. Ema máinapurehi machicha ticaijarehi Ismael, esu maena ticaijaro Agar. Ema máequenereruhi machicha ticaijarehi Isaac, esu maena ticaijaro Sara. Esu Sara, mayenaquenehi ema Abraham. Esu Agar, suvanarahi esu Sara. ²³ Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasera eta maitupajijiasiravahi ema Viya, máijaracapa ema suchichahi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairayare ema suchicha”. ²⁴⁻²⁵ Puiti, nuvaraha nímicutiarachinaheya nayehe ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vicahéhi víti eta véhisirahi ema Cristo, nájina tihapapiricahavimahi. Vahi suácutihini esu Agar, tapamicahi eta suématanerepi taicha sirvientahi ésu. Ene nacahehi ena israelítana náchucanaveanaini nútì, napamicasivahi naicha tayehe eta nayeherepianaini. Étarichuhi eta vanairipiana májuchaqueneanahi ema Moiséini te mávihaipahi eta te anuquehe mari ticaijarehi Sinaí, táupahiva eta provincia Arabia, návasahi ena suámariequeneanaini esu Agar. Puíticha ena nujaneanana tachichanaveanahi eta Jerusalén nanasirichuhi eta tapamisiravacahi eta vanairipiana. ²⁶ Jararihisera eta apanahivare avasare ticaijare Jerusalén, tiávhahi te anuma. Víti tachichanaveanahi. Vaipa vítiparacainahini tapamicahavihini eta vanairipianaini. ²⁷ Ema Viya máechajisihahi eta te Sagrada Escritura eta juca arairu Jerusalén. Máimicutichinahi esu énsuna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacativa eta amuya. Puítisera tétabicavainapa eta piúrisamrevaya. Vaipa pánasimahi macheruvimahi taicha nárajapainapa ena pichichanaveanaya níjararuviyare nútì. Picachuricainapa nácani ese-nana ticachicharahiana” —macahepa ema Viya.

²⁸ Nuparapenaveana, viti véhicanahi ema Jesus, vítira tachichahavianahi eta arairu Jerusalén, taicha vituparahaichuhi eta tachichairahaviyare tacuti eta sucatuparahairehí esu Sara mayehe ema Viya, eta sucachichairayare ema Isaac. ²⁹ Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara máijararuhi ema Espíritu Santo. Puíticha, tanasirichuhi eta nacatianasirahavihi ena téhicanahi eta vanairipiana vimutu viti mávaháruanahi ema Espíritu Santo. ³⁰ Ánivarepa tacahe eta Sagrada Escritura: “Pivaneca esu Agar émapa ema suchicha, nayana náuchuca eta piyehe. Taicha vahi táuricahini mavehahini eta pímaqueneana

te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa. ³¹ Nuparapenaveana, ene vicahehi víti. Vahi vácutihini ema suchicha esu sirvienta. Vicutihi víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

5

Vímiyanavachucha véhica ema Jesús. Vahi vicuehica eta mavanairipiana ema Moiséini.

¹ Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te návirachupuca napamicahe, taicha ticajerayare eta ítauchiraina, machu ajirehéna táicha. Étipasera tacamunu étumechava te nayehe ena nani.

² Nuti Pablo nutupiruva numetacahe: Te ísapavapuca namarcachahe, tímicutijiricavahi tépurucarehi eyehe ema Cristo. Tímicutijiricahivare vahi márataha ticuchucuhahahe éti. ³ Énerichuvare numetacahe: Namutu nácani ajairana tísapavanayare ticamarcana, tacamunuhi náitauchayare tamutu eta vanairipiana. Tájina ánichichaimahi nájequihaimahi éta. ⁴ Eti enerejiruvana éhica eta vanairipiana, ímijachaipapuca ejacapacareipa mayehe ema Viya. Émepururecaripasera eta máemunasirahehi ema Viya. Émepururecahivare eta máimicasirasirahehi ema Cristo. ⁵ Vítisera viti vicasiñanahi ema Jesucristo vicunevaripa eta majacapirahaviya ema Viya máichavenehi ema Espíritu Santo eta mávahásirahavihi. ⁶ Eta mávahásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasiñairayare yátupina éma, vémunarahinapa eta vítaresiraya.

⁷ Éti, iúrinipahi eta éhisirahi ema Jesús. ¿Tájahaserapuca tacayemahi eta evarairahi ecainajiruva? Ísapavayarepa tiyurucaheana, tíminajicaheanaya-repaini eta yátupiqueneanahi. ⁸ Éti máichuhaqueñeanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani nahapapicahehini. ⁹ Échapavaicha nayehe ena tiyururahiana, machu napareacahe. ¹⁰ Nútisera nucasiñavahi eta me Viáquenu eta mamaisapiraheyare ínajicava. Németeacahi vahi ínajicaimahi eta nímiturapianahi. Émasera ema Viya téchahi eta juca náicuñayare nácani tivarahanahi tihapapicaheana.

¹¹ Esamanurichuhi, eti nuparapenaveana. Natarihihipuca nácani tépiyae-quenehanuanahi eta nupamisirahehi ecamarca eti nuchamurianahi apavasananahi. Étasera eta nímitusirahehi, tájina váhiquene nupamicahehini eta ecamarcairayare. Nasapihapa ena nujaneanana israelítana tipanajiricanuanahi taicha vahi nupamicahehini ecamarca. Étara tímiyusemacavacahi eta nasamirahi eta nucametarairuirahí eta viúchucuiraya táichavenehi eta máopenirahi te crusu ema Jesús. ¹² Ena nani tipamicaheanahi ecamarca, ¡náechaticavaichaha énajivaina! ¡Nuvarahasa yátupinapaini náechatihicavaini!

¹³ Taicha eti nuparapenaveana, vahi étaina tímichuhahéhi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tamauriqueneana. Ema Viya táchuhahéhi, mavairahí étijivaya ítátijiricacayarehi taicha eta émunasiracainahi. ¹⁴ Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi tácajera eta vítauchiraina jácani apana vanairipi. ¹⁵ Vahi táurica ecatichajiricacahini. Váhivare táurica ecaticanajiricacahini, machu étijivaina ecamitiequenehacaca.

Ema Espíritu Santo tímicatacrahavi eta vahi vicusuapa eta tajamurachaqueneanahi eta viáquehe

¹⁶⁻¹⁷ Esamanuchaha. Ema Espíritu Santo mavaraha tímicatacrahavi eta vahi vicusuapa eta tajamurachaqueneanahi eta viáqueheana. Étasera eta viáquehe vahi táisapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, ichapemurihi eta tacanarairahi ema Espíritu Santo. Tacahe, nécatiacachecha puiti eta esuapirainaicha eta mavarahaqueneanahi maicha ema Espíritu Santo eta eyehe. ¹⁸ Eta tacahe, éti, te émainapuca ema Espíritu Santo tímítucahe, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani ejecapiravanapuca tayehe eta vanairipiana.

¹⁹ Tímaticareanahi eta tamauriquenehi eta náichaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa ema apana achane. Ena amaperuana náichahi eta natuhusivanahi. Nararihi ena tivehacacanahi ena nacutiqueneana ajairana. Tavayuasiravacahi eta najamuraraivanahi. ²⁰ Natanucahi eta nasiñarajiyare. Nacaravahuhi eta iápemarecáre. Ticatianarecanahi tisemacacanahi. Téteajiricacanahi. Apaesarichu nacamunu tisemanaripavare. Énachucha navaraha titucavana, nacachuriaracapa mácani achane. Típutsimuriávanapa nayehe nácani apamuriana. Vaipa navaraha tipauchacacana. ²¹ Ticapinarucacanapa. Ticapahianapa. Ticavaharasianavare. Piéstamareana. Tamutuchucha naicha eta tájiparacana. Puiti numetacahevare nápechava, tacutihu eta numetasirahehi cape juca viásinequenehi. Vahi titújicavananaimahi tisiapana te mávasa ema Viya ena tíchanahi eta juca tamauriqueneanahi.

²² Vítisera, tiávahácahavihi ema Espíritu Santo. Te vísapa éma, tijaracahavihi eta vémunaraivaya. Viúrisamurerecavayare, tinaracainapa eta vianerueruana máicha. Tíjaracahavi eta vicayehleraya paciencia. Vijapanurahiya máicha. Vicajiraivayareva máicha. Vítaurahiyare. Vétaviuchaya eta viúrivayare. Tímicatacrahaviya eta vijaneasiravaya apaesa vahi vicuquicha eta tamauriqueneanahi. ²³ Te vítauchahi tamutu eta júcana, vicurisamurechahi ema Viya*. ²⁴ Tacahe, viti végicanaripa ema Jesucristo, vaipa víchaimahi eta tamauriqueneanahi tajamurachaqueneanahi eta viáquehe. ²⁵ Tásapihapapuca, eta mávahásirahaviripa ema Espíritu Santo, vísapavaya vámutu eta mavarahaqueneana máichayare te viáquehe. ²⁶ Vaipa táuricahini ecasiñavaicahini ecapinarujiricacahipucaini. Váhivare etanucaimahi eta semanere mayehe mácani echamuri.

6

Vímicatajiricacayare

¹ Nuparapenaveana, te natarihipuca ímaha téjecapavanahi ena vichamuriana, econsejachayare éti ímatiequeneharipa maicha ema Espíritu Santo. Táurisera eta échajirisiraina. Ecauneuchava éti apanava, machu iáquipaicava tayehe eta máquipaisiavahi ema echamuri. ² Ímicatacaca eta ecatiuchiravaina eta jácani íchararacavanahi. Ene tacahehi eta ítauchirahi eta mavanairipi ema Viáquenu Jesucristo, étaripa eta vémunasiracacayarehi. ³ Taicha nararihi ena tímijachavanahi vahi tiáquipaicavananaimahi tayehe eta pecatuana. Vahi ecucahe éti. Vahi tacaemuñavacarehini, taicha eta juca vahi tánecapácare.

* ^{5:23} Ema Pablo te mayeherepi eta máechajiriruvana, ani macahe: “Tájina jácani vanairipi tapamicahavihini vahi vícha eta juca táuriqueneana”. Étasera eta macayemaquenehi, ani tacahe: “Vicatuparaha víchayarehi tamutu eta juca táuriqueneana”.

⁴ Váhivare tácaemuñavacare vácahehipucaini: “Núti, váhirichu nuspecatura. Núripana nayehe ena apamurirana”. Te viúrihipuca, vimatinairayarechucha. Víti vechinavahi eta viúrivahí eta vítaresirahi. ⁵ Véchaquenevapáchupa víti eta vítaresiraya mayehe ema Viya.

⁶ Nutuparacahe eta apana. Ecajiyare eta ímahaqueneana mácani tímitucae eta máechajiriruva ema Viya, taicha eyeheyarehi eta máimiturapiana eta tiúrichaheyarehi.

⁷ Numetacahevare eta apana. Nuvaraha étupiricaya eta epanereruana. Machu ecatianaca ema Viya. Taicha te icha eta pecatuana, yátupiqueneyare eta ecamitiequenehavayare. ⁸ Te icha eta tájiparácana tavarahaqueneanahi eta iáqueheana, étarichuhi ticamitiequenehaheyare eta ítaresirana, tímicoñacaheyareva. Téhesera icha eta táuriqueneana mavarahaqueneanahi ema Espíritu Santo, yátupina táurina eta ítaresira. Ímahayareva eta iúchucuiraya, máichecuaraquirénapa eta iúricacarevaya. ⁹ Eta tacahe, vahi vicucainajiruva eta víchirahi eta táuriqueneana. Váhivare vicuyacujiequenehava eta vicuchapirahi eta vícuchihi mayehe ema Viya te táitecapapa eta jena sácheyare máijarasirahaviyare. ¹⁰ Táitusiava, te tatiarihinapuca eta vicamunucarevana nayehe ena achaneana, te vímahahipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca tipauchahavianahi ena vichamurianahi tayehe eta juca véhiruhi, vicajiyarehi éna.

Eta táichecuaraqui eta máechajiriruva ema Pablo

¹¹ Ímaha ichapevacanecha eta juca nuletrana. Nuvahurupajipa núti eta juca nucajureirahehi éti. ¹² Ena nujaneanana israelítana, téavicavahi eta nasemanevahi viyehe viti vicametairahuhi eta viúchucuiraya táchavenehi eta máepenirahi ema Cristo te crusu. Tásiba, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajircavaca. Navaraha nahapapicayarehi eta nasemaneva. ¹³ Navarahahivare ticunachavanayare eta nacamesai-rahehi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támputuhini eta vanairipiana. ¹⁴ Nútisera, eta nítiresirahi, nuvapinavahi ichape maicha ema Jesucristo, máepeninanuhi te crusu níchavenehi núti. Tacahe, núti apana nínajicaripa eta néhisirainahini eta tayeherepiana eta apaquehe. Vaipa nútiparacaina tayehe, taicha eta máepenirahi níchavenehi núti.

¹⁵ Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahi, váhivare eta vicamarcapucaini te viáquehe. ¹⁶ Éti, te esuapa eta juca nímiturapianahi eyehe, nuvaraha májapanuhehini ema Viya, máijaracahehini táurivaina eta epanereruana taicha eti yátupiquenehi machanerahehi ema Viya.

¹⁷ Tiuri puiti, németeaca núti tájina taeñamavacarehíni eta esuapajiraivahi eta nuyehe, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenérahi eta nucaemataneasirahi éma.

¹⁸ Nuparapenaveana, nuyaseuchaheparaca emutu éti me Viáquenu Jesucristo, tátetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo nayehe ena machamuriana ticavasanahi te avasare Efeso, ticaijare **EFESIOS**

¹ Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machaneraheripa ema Viya, táuriquenehi eta éhisirahi ema Jesucristo. ² Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini eta táurivaina eta epanereruana.

Tétavicavahi eta viúricacarevana táichavenehi eta viúrujiasirahi ema Jesucristo

³ Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táichavenehi eta viúrujiasirahi ema Cristo. Puiti tachichahaviripa eta anuma. Ichape eta viúricacarevahí maicha ema Espíritu Santo. ⁴⁻⁵ Acane, te tamirahu eta táepaniravapa eta apauehe, ema Viya tétavicavahi eta máemunasirahí namutu ena achaneana natarihiqueneanayarehi. Tásiha, émajivapa manacahi eta mapanereruhi eta mavarahaquenehi, étarichuhi eta majacapirayarehi namutu ena ticasíñavanayare mayehe ema Machicha Jesucristo. Eta viúrujiasirayare ema Jesucristo, yátupiqueneyarehi machichahavi, matapiravarehaviyarehi te mami-rahu, sántohaviyarevare. ⁶ Taicha mavarahahi vijirauchayare éma, vítsiri-jicavayarehi eta táetaviuchirava eta máemunasirahavihi. Mavarahahivare ichape eta viúricacarevana táichavenehi eta viúrujiasiraya ema máemuna-ruquene Machicha. ⁷⁻⁹ Tásiha ema Viya, tiúrihi eta máimaira, máimerecahi eta máemunasirahavihi ichape. Tíjaracahavihi ema Machicha tépeninahavyarehi eta macaepahairayare eta vipecaturana, viúchucuhayarehi máicha. Énerichuvare tíjaracahavihivare eta véchemaraivaya vímatiequenehairaya ichape, taicha tímitucahavihi eta mapanereruana. Váhisera máimerecavanehini eta juca mapanereruanahi acane; tapaemunava te tiúcupaicapa ema Machicha. Tivapinavahi éma eta máitauchiraya eta mapanereruanahi ema Maiya. ¹⁰ Tamutu eta juca mapanereruanahi títauchavayarepahi, jácani tatuparaquipahi. Te jena sácheyare manerejicaripa, ema Viya manacainapa ema Machicha Jesucristo aquenucaqueneyarehi, téchayarehi tamutu eta táichararacavana. Nasuapayarehiva namutu ena tiávihanahi te anuma, énapa ena tiávihanahi te juca apauehe.

¹¹ Eta acane te tépanavainapa, ema Viya máetupiricapa eta mapanereruhi. Vahi máejequihahini. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacanayarehi ema Jesucristo, mavarairahi tíjaracahavi eta vícuchianahi. ¹² Viti vínapuicanahi vélida ema Cristo, mavarahahi tiúriyare eta vítaresiraya, apaesa nacunachayare ema Viya ena apamuriana achaneana eta máimicatasirahavi ichape.

¹³ Tacutiquene éti, te tínapucainapa esama eta máechajiriruva ema Viya eta mavarairahi ticuchucuhahahe, enévanehi éhicahi ema Cristo. Tásiha, eta iúrujiasiraipa éma, tiávahácaheripavare ema Espíritu Santo. Émapa titame-tacahe eta machichairaheda ema Viya. Ema Espíritu Santo, ema vituparahahi vimutu viti vicasíñanahi ema Cristo. ¹⁴ Eta mávahásirahavihi éma,

títametacahaviparaca eta vijacapiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásicha, tétavicavainapa eta vicunachirare ema Viya taicha ichapequene eta máimicatasirahavihi.

Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús

15-16 Eta tacahe, nútí néchahehi éti tamutu te nuyujarasirana, taicha nusamairiricapa eta yátupirahi éhica ema Viáquenu Jesucristo étapa eta émunajirisiracacahi emutu eti machaneranahi ema Viya. Nuhasulupayachahi ema Viya eyehe. **17** Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi máijaracahehini eta échemaraivainahini maicha ema Espíritu Santo, apaesa ímatiequenehahini yátupina eta emetacasivanaya eta mapanereruanahi ema Viya. Nuvaraha ímatipaipaichaini éma. **18** Nuyaseacahivare éma yátupina eta ecaicutiarairaya, eti máichuhauqueneanahi éma, eta táetaviuchirayarehi eta viúricacarevayare te jena sácheyare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta viávihaya te anuma, vícuchihi viti machanerana ema Viya. **19** Nuvaraha ecaicutiaravare eta táetaviuchirahí eta maitupajijiasiravahí ema Viya, váhiqene tivitaimahi. Éma, macaematanecahi eta vítaresira, mavarairahi viúripanayare viti vicasiñavanahi mayehe. **20** Ema Viya máimerecahi eta maitupajijiasirava ichape te macaechepecapa ema Cristo te máecari, macaejacapa éma te mavaure tayehe eta anuma mávihahi puiti. **21** Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahí nayehe. Énerichuvare ena éreanana, mapamicavaca eta nasuapiroina. Éma, tétavicava eta macapicahuirahi. Nájina nácutihini éma. Nájinavare ticachuricaimahi. Apajarahiyarehi eta aquenucaira éma. **22** Ema Viya macaejacahi éma téchahi tamutu eta tatiarihiqueneana. Émaripa vicaiyaquenehi vimutu viti machanerana. **23** Viti, eta viúrujiasirahi éma, tímicutijiricavaipahi máquehavahi te juca apaquehe. Vicaematanecahi eta táuriqueneana tímicutijiricavaí emainahini macaematanehini, taicha tamutu eta víchaqueneanahi, éma téchahavihi, tétumechahavihivare.

2

Eta máemunasirahavi, ema Viya ticuchucuhahavahi tayehe eta vícuñayarehíni

1 Ema Viya tíjaracaheripa arairupa eta ítaresira. Tichavapa titareca eta iáchanevana, tacuti eta machavirahi titareca ema Cristo te máecari. Taicha éti, cape juca ítaresirahi, tímicutijiricavaichaha épenaquenénahíni táichavenehi eta evainarajivanaini étapa eta epecaturanaini. **2** Cape juca ítaresirahi éti, éhica-hivare eta tayeherepiana eta apaquehe, tamauriqueneanahi. Esuapahivare eta mavarahauqueneana ema Váinaraji, éma mapamicavacahi ena achaneana masuapajirairahanahi me Viya. **3** Vimutu viti, tacahenihi eta vítaresirahi eta acane. Étachucha véhicahi eta tavarahaqueneana eta viáquehe. Vítijiri-cavaripahi víchahi eta tajamurachaqueneana eta viáquehe, étapa eta vipane-reruana tamauriqueneanahi. Ichapemurihi eta vímyusemasirahi ema Viya, vicutihi ena apamuriana masuapajirairahanahi mayehe. **4-5** Tímicutijiri-cavaichaha vépenaquenénahíni táichavenehi eta vipecaturanainihi. Tétavicavasera eta majapanuirahaví ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta viúrujiasirahi ema Cristo. (Táichavenehi eta majapanuirahéhi, ticuchucuhahayarehi.)

6 Puiti, eta viávahásirahi ema Cristo, yátupihi eta véchepusiraya, vicaicuchipa

eta macaejasirahavinapa tayehe eta viávacureyare te anuma, vicachaneya ema Cristo. ⁷ Eta juca émavenehi ema Viya, mavarahahi máimereca maverahi eta viúricacarevana máijararuuhaviyare eta viyehe te jena sácheyare, taicha tétavicavahi eta máemunasirahavihi táichavenehi eta viúrujiasirahi ema Jesucristo. ⁸⁻⁹ Taicha eta viúchucuirayare eta viápechiravaya vítareca, étavenehi eta majapanuirahavihi ema Viya. Vijacapacareripa eta mayehe, táichavenehi eta vicasiñairahi ema Jesús. Vahi étaparacaina tacuchucuhahavihini eta víchaqueneanahi, taicha vahi vítijivainahini váratahahini vijacapacarehini. Tacahehi éta, apaesa nacuija nacucasiñavavaica eta nacuchucuiravapuca. ¹⁰ Arairuinapa eta vítaresira maicha ema Viya. Émarichuvare ticajurucahavi eta véhisirahi ema Jesucristo, mavaraírahi víchayare eta táuriqueneana. Eta víchirahi, vítauchahai eta mapanereruana acane.

Eta véhisira ema Jesucristo, étamurihavinapa. Vaipa víputsimuriavavacaimahi.

¹¹ Németeaca échavahi éti eta nacatianasiráhehi ena nujaneanana táichavenehi vahi éhicahini eta nayeherepiana. ¹² Éti, cape juca, tájina ímatiyahini eta máimiturapihanahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máijararuheanaya ema Viya. Eta tacahehi, éti ímijachaipa vahi ejacapacare eta mayehe. Vuíchahavare ácasíñavahini eta mayehe. ¹³ Puítipasera eta éhisirahi ema Jesucristo, iúrujiacaripahi éma. Tásiba, émeñahavaipahi mayehe ema Viya, taicha ecasiñavahí eta máepeninahehi ema Jesucristo. ¹⁴ Énerichuvare, étavenehi eta viúrujiasirahi éma, tihétamurichahaviripahi vimutu: éti apavasanana, vítipa viti israelítana. Vaipa víputsimuriavavacahini. Tímicutijiricavaipahi étanainehi eta viúchusine. Macaepaharipahi eta vicatianajirísiracacáinihi. ¹⁵⁻¹⁶ Eta máijararesirahi eta máquehe te crusu ema Jesucristo, macaepaharipavare eta tapamisirahavini vélida eti vanairipiana étapa eti nayeherepiana tipicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eti vicátianajirísiracacáinihi táichavenehi eti apavasanahavirahi. Puiti vimutu viti vélidcanahi ema Jesucristo, étamurihaviripahi máicha. Tájina víchiravaimahi. Táitusiava tiúrichahaviripa vimutu mayehe ema Viya.

¹⁷ Eta tímitecahi ema Jesucristo, timetapanahavihi eti táurinaquene echajirirucava eti najacapacarevaya namutu ena achaneana. Éma, tiúrichahaviyarehi mayehe ema Viya vimutu: viti vínapucanahi vímati eti máechajiriruvana, étipa eti epaenumavahí ímati eti máechajiriruvana. ¹⁸ Puiti, eti viúrujiasirahi ema Jesucristo, tiávhácahavihi ema Espíritu Santo. Tásiba, máichavenehi ema Espíritu Santo, vimutu vicuticacaipahi eti vipauchiraipa ema Tata Vicaiyaquene. ¹⁹ Eta tacahe, tájinapa taeñamacarehini eti ejacapacareva eti viyehe viti machanerana ema Viya. Esiapamurihaviripahi viti. Tachichaheripa eti mávasa anuma. ²⁰⁻²² Eta esiapamurihavirahi te vimuri, nímicuticharipa te náepiyaca eti ichape peti. Ema Jesucristo, tétavicavahi eti máetumechirahavihi vimutu viti vélidcanahi éma. Macuti eti tatumearaya eti yúchamana, eti manasirahi eti máimiturapihanahi. Tásiba, visiapa viti apóstoleana énaga ena profetana. Tacahe éti, eti esuapirohahi eti vímiturapihanahi, esiaparipahivare. Ecuti eti labriyuana étapa eti yucuquiana. Ema Espíritu Santo, tétavicavahi eti máitupajijiasiravahi tihétamurichahaviripihi. Vituparaphachihu eti manasirahavihi. Máepiyacavacapaipa. Te máitauchapa tamutu, tétavicavainapa táurinavaya eti ichapequenehi templo, mapenayare ema Viáquenu, sántoquenehi.

3

Ema Pablo, éma ticatuparahahi ticametarairuyare nayehe ena apavasanana

¹⁻² Németeaca nuti ímatiequeneharipa eta máetaviuchirahi eta máemunaisrahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirahi eta eyehe, étara tiviuchanuhi puiti juca nucaeratairahi. Nútisera nuyaseuchaheparaca éti te nuyujarasirana. ³⁻⁴ Taicha ema Viya timetacanuripahi te nuvapure eta mapanereruhi tapaemunava téchacarehi. Puiti te juca nucartane, eta échajicuira eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo. ⁵ Eta juca mapanereruhi ema Viya, nájina náimaticequenehahini cape juca tásinequenehi. Puítisera, ema Espíritu Santo tímechahaviripa viti mayeheana santo apóstoleana énapa ena profetana. ⁶ Ani tacahehi eta juca tayumururevanainihi: Eti apavasanana, éti apanavare ejacapacarehivare mayehe ema Viya maicha ema Jesucristo. Iúchucuhayare táichavenehi eta éhisirayare eta vimetarairuana. Esiapamurihahaviyare viti machanerana ema Viya. Étamurihaviripa. Vicuticacainapa eta vícuchihi viti israelítana.

⁷ ¡Tétavicavahi eta majapanuiranuhi ema Viya! Nútisamipa máichuhuquenehi eta nucametarairuyarehi eyehe. Tásiha éma, tétavicavahivare eta máetumechiranuhi te tamutu eta nucametarairuirahi. ⁸ Vahi németeacavahini nútinasamihini manerejica, taicha nararihihi ena titupajijiapanavanahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanaha eta máichuirahahi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicaya eta viúricacárevayare. ⁹ Tacahéhi eta mapanereruhi ema Viya eta viyehe acane te tépanavainapa máepiyacaya tamutu. Váhisera táijahúchavahini mametacahavihini. Tapaenumava timetacanuhi núti, matuparasiranuhi eta numetasiraheyare tamutu. ¹⁰⁻¹¹ Taicha mavarahahi natarihiyare camuria-nayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajijiasiravahi ema Viya. Náraminehi ena aquenucanahi tiávihanahi te anuma eta náimairahi eta juca. Eta tacahéhi eta mámirapahi ema Viáquenu Jesucristo tamutu eta mapanereruana eta acane ema Maiya. ¹² Tásiha puiti, tájina taeñamavacaréimahi eta vipauchira ema Viya. Vicasíñavahi eta mayehe, taicha ema Jesucristo émahi ema vicasíñasarequenehi. ¹³ Eta tacahé, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenehi eta nucametarairuirahi eyehe. Evapinavasera eta nucamichirahi eta nátajivana, taicha nuvarahahi nímereca eta táetaviuchirahi eta néminasirahehi.

Ema Pablo mayujaraucha ena machamuriana

¹⁴ Eta némechirana eta táetaviuchirahi eta máitupajijiasiravahi ema Viya eta juca mapanereruanahi, núti népuyumiraucha ema Macaiyaquene ema Viáquenu Jesucristo, nucunachirahi éma. ¹⁵ Éma, Táiyaquehenehi tamutu te anuma. Émarichuvare téchahi tamutu te juca apaquehe. ¹⁶ Nuyaseaca éma máijaracaheni éti, ichapenahini eta ítupajijiasirava étapa eti etume-vainahini te iáchanevana, maicha ema Espíritu Santo. Taicha ema Viya, tétavicava eta máitupajijiasirava, váhivare mayavanaimahi. ¹⁷ Nuyaseacavare yátupina eta ecasiñairaya ema Cristo, yátupinavare eta éhisiraina eti máimiturapiana. Túmeheyare eta émunaraivahi. Tájina tihapapicahéimahi

eta éhisirahi. ¹⁸⁻¹⁹ Nuyaseacavare ácutihini ena apamuriana echamuriana te tamutu avasareana, te yátupina ecaicutiara eta táichapevahí eta máemunasi-rahavi ema Cristo. Tájina titáina éta. Tayanapane vahi vicúcaicutiaraquenéna. Nuyaseacahivare yátupina émainahini ecasamure ema Viya.

²⁰ Tétavicavahí eta nucunachirahí ema Viya, taicha máituruequenehahí tíjaracahavi tamutu, máemetavicahí eta viyasearuanahí, étapa eta vianere-chirana. Tétavicava eta máitupajijiasirava ema Espíritu Santo eta máetupi-risirahí eta visamureana. ²¹ ¡Vicunachaparacahiní ema Viya vámuto viti véhicanahí ema Jesucristo! ¡Máichecuaraquirénapa eta vicunachira! ¡Amén!

4

Viúrujiacacahi maicha ema Espíritu Santo

¹ Yátupi núti tipresuchanuhi puiti táichavenehí eta néhisirahí ema Viáquenu. Eta tacahe, nutuparacaheya: Tacuija íchiravaina eta ítaresira te mamirahu ema Viya; taicha éti máichuhaqueñéherichuhi éma, mavaraírahi machane-raheyare. ² Yátupina eta emansuvaina, étapa eta iúrvaina. Ecayehe pa-ciencia. Ecamichayare jácani te ticaviurevanapuca nácani echamuriana, táichavenénahí eta émunasiracacainahí. ³⁻⁴ Émanarichuvare ema tiávahácahe, émaripa ema Espíritu Santo. Ísapava eta macurujisirahehi. Tacuija íchiravaina eta iúrujisiravahí. Étanainarichuhi eta epanereruana. Taicha ema Viya tíchuhahéhi. Puiti ecuchapahí eta iápechiravayare ítareca. ⁵ Émanarichuhi ema Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujiasira éma. ⁶ Émanarichuhivare ema Viya, Vicaiya-quenehí vimutu. Éma téchahavihi vimutu. Ticaematanecahavihi vimutu. Émavare tijaneacahavihi vimutu.

Vítucaquenepachuhi maicha ema Espíritu Santo

⁷ Énerichuvare ema Cristo, éma tíjaracahavihi eta vítucaqueneyarepachu, jácani mavarahaquenehí. ⁸ Taicha eta Sagrada Escritura, ani tacahehi: “Te tírapa éma te anuma, mámamurihaipa ena macuchureanahí. Máijaraca-sichavacapa eta náitupujijiasiravaya ena machanerana” tacahepa. ⁹ Epane-rechaya puiti eta tacayemaquenehí eta máraírahi. Eta juca tavaraha vicaicu-tiara eta máucupaisirahí tativa te juca apaquehe. ¹⁰ Te titáuchavapa eta tímiucu-paícahi, tírapa tichavapa te mávasa anuma. Tichavavarepa eta émairayare técha tamutu. ¹¹ Tásiba, ema Viáquenu tituparacahavi víti, tíjaracahavivare eta vítucaqueneanayarepachu. Taicha tinacahavipa eta viávacurepachuya apóstolehaviya viti manerejiruqueneanahí. Ena apamuriana, manacahivare profetanahí náimatiéquenehayarehi eta mapanereruanahí ema Viya apaesa náitametacavaca ena vichamuriana. Ena apamuriana, manacavare ticame-tarairurahianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu. ¹² Taicha éma, mavara-hahi máetupiricayarehi tamutu te etaracu eti machanerana; mavarahahivare vitiarihiyare viti vitatijiricaheyare eti vichamuriana, vicajurusira-heyarehi eta éhisirahí éma. ¹³ Apaesa yátupina vácuti vámuto eta máurivahí ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahí; vítamuturucaripahini tamutu eta vítucaqueneanahí tásibaqueneanahí me Cristo. Vácutipaini éma tamutu eta máitupajijiasiravahí. ¹⁴ Mavarahahivare vimutuyare vímatiequeneha.

Vaipa vácumahí ena amuyana, témunanasiricavanarichaha éna. Tísapajiricavanarichaha navayuaca tayehe eta apána náimurapiana ena tituruéquenehana tivayuarecana, napamisiravacahi namutu náehica eta tamauriqueneana. ¹⁵ Eta taache, vétumechavayare eta véhisirahi eta máimurapiana yátupiqueneana, yátupinavare eta vémunaraivahi, vicajurucacayarehivare eta viúriva, vicutiyare ema Viáquenu Jesucristo, taicha émahi ema téchahavíhi. ¹⁶ Nímicutichahehi eta viáquehe. Camurihi eta táunavahi eta viáquehe; étanachuhisera. Camurihivare eta títupajijiasiravanahí; tamutuhisera ticaematanehi, víchirahi eta vivarahaquenehi. Tájina vahi taejiacavahini. Tamutu tijaneacacahi. Ene vicahehi viti machaneranahí ema Jesucristo. Éma, tétumechahavíhi vimutu víti. Eta viúrujiasirahi mayehe éma, étamurihavíhi. Vimutu vítucaquenepachuhi máicha. Vématanerepipachuhi máicha. Vijaneacacahivare. Vicajurucacapaipahi táchavenehi eta vémunasiracacahi.

Apanainapa eta vítaresira taicha eta viávahásirahi ema Cristo

¹⁷ Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueneanahí ena máimatirahanahí ema Viya, náichahi éna eta náitaresirahi jácani tavarahaqueneanahí eta napanereruana súnsurupiana. ¹⁸ Tamutu eta napanereruana tétavicavahí eta tamapicuvahí. Vahi apaesainahini tavehahíni eta tijarahi. Máecharaireanahí éna, táchavenehi eta tamuracavahí eta nasamureana. Váhiqune navarahaimahí napaucha ema Viya apaesa macanaracavacahíni éna. ¹⁹ Tájinapa apaesainahini náimatihini eta titsirihacare. Tíjaracavanapa tayehe tamutu eta najamuraraivana. Tétavicavahí eta navapinairahi náichahi eta tamauriqueneana tájiparacana. ²⁰ Étisera vahi tacucahe eta ítaresiraya puiti eta éhisirahi ema Cristo. ²¹ Taicha németeaca yátupihi esamararacahi eta vímitusirahéhi. Ímatiripahi eta táuriqueneanahí yátupiqueneanahí tásichaqueneanahí mayehe ema Jesucristo. ²² Tásicha puiti, vaipa ecuesacha echavaucha eta ítaresirainihi acane echipejiricavahí taicha tivayuacahe eta ejamurachirahi eta tamauriqueneana. ²³ Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te iáchanevana. ²⁴ Tásicha, apanainapa eta ítaresiraya. Yátupi eta ecaquehéraina ema Viya, ácutini éma eta máurivahí étapa eta masantuvahí.

Étupiricayare tamutu eta ítaresirana

²⁵ Tásicha puiti, vaipa épiahirahimahí. Étupiruvayare tamutu eta échajirisiravaya nayehe ena echamuriana eparaepiyana, taicha étanarichuhí eta echamuriracacairahi, émanarichuhivare ema Viúrujiaruhi, ema Jesús.

²⁶ Te tatarihipuca eta támuyusemacahe, ejaneacavaicha machu escapeatura. Te esemapuca, vahi tacunasi eyehe. Énevanéna eperdonachacaca.

²⁷ Ecaunevayare, machu máiturucahe ema Váinaraji, táchavenénahí eta esemanevahí.

²⁸ Mácani tiámerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajirayare ena ticamunuwanahí.

²⁹ Váhivare ecunacajacachava eta tájiparácana echájirirucavana tamauriqueneana. Tátupiruva eta échajirisiraváina apaesa étina eyuchusihá eta nasuapiraina nácani tisamaheanayare, éta tétupirisamurechavacayare éna.

³⁰ Vahi ecuisapava ícha jácani tamauriqueneana, machu ímipanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahéhi tímicutijiricavaipahi eta ecamarcahi, taicha ímaticaréipahi

eta machanerahéirahi ema Viya; puíticha, étapa eta te títecápapa eta jena sácheyare viúchucuirayare.

³¹ Váipavare ecunaca eta semanereana. Váipavare ecatianarahimahi. Váipavare ecusemarairihi, vahivare ecuijajachava ecapiaracava. Vahi ecuichanareca. Ínajicaya éti tamutu eta júcana tamauriqueneana. ³² Táitsiva étaviuchayare eta iúrivayare nayehe nácani apamuriana, ejapanurahiyare. Te tatiarihipuca eta náejecapirava, eperdonachacacayare taicha ene macahehi ema Viya eta maperdonachirahehi máichavenehi ema Cristo.

5

Tiúriyarehi eta náitaresirayare ena machichanaveanahi ema Viya

¹ Puiti éti machichaheripahi ema Viya, máemunaruqueneheripa, tásiba ácutipa éma eta máurivahi. ² Émunajiricacayare eta ítaresiraya. Ecutiyare ema Cristo eta máemunasirahavihi. Éma, macurisamurecharipa ema Maiya eta máimijararesiravahi víchavenehi víti, macutihi eta sárarechicha uvesa nacaparuhi eta námvahuhi me Viya.

³ Eta machaneraheraripa ema Viya, vaipa táuricahini íchahini eta túhusicare. Tíñehi te mamirahu ema Viya. Vahivare ecupanerecha ícha jácani tiámanahi eta tamauriqueneana. Vahivare tacuvayuacahe eta tájiparácana. ⁴ Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera eta échajisiranaya, amairipiokenéna eta ehasulupayachiraya ema Viya. Jéhevare, éta iúrihaquenehi. ⁵ Németeaca ímatiequeneharipa éti eta vahi tiúchucuhanaimahi nácani ticaecahicacanayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana tivehajiricacanahí; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayuacavacahi eta najamurachirana, énarichuhi ticasíñarajiana.) Namutu ena nani tímereuchavanahi vahi machaneranainahini ema Cristo. Vahi tisiapanaimahi te mávasa ema Viya. ⁶ Tásiba éti, vahi ecuisapava nácani navaraha navayuacahe te náechajiriruva súnsurupiana, napamisiraheya ícha eta júcana tamauriqueneana, taicha eta júcana, éta tiviuchavacayare nácani masuapajirairahanahi me Viya, muracayare eta náicuñayare. ⁷ Tásiba, ejaneacava, machu ácuti ena nani tíchanahi eta júcana tamauriqueneana.

⁸⁻⁹ Échavaripa tacáhénihí eta ítaresirahi acane étarichu iámapiricainihi iávacuhahi te timapicu. Puítisera eta iúrujiasiraipa ema Viáquenu, tijarahiripa eta ítaresirahi. Tásiba, ímerecayare eta emicauchirayare ena apamuriana achaneana, ímeresirayare eta iúriva, étapa eta tipachinaqueneana eta ítaresira, étapa eta yátupirahi eta éhisirahi ema Viya. ¹⁰ Tamutu sácheana ecaravahuinavarepa eta mavarahaqueneanahi máuriruanahi ema Viáquenu. ¹¹⁻¹³ Ejaneacava éti, machu iápechava ícha eta tamauriqueneana náichaqueneásahi ena achaneana te timapicu. Taicha téavicavahi eta tatsirihacarevahi eta náichaqueneanahi eta nayumurusiravahi. Étisera ímitucavacayare éna. Emicauchayare eta tamaurivahi eta náichaqueneana, apaesa náimaha eta táíñehivahi eta náichaqueneanahi. Tásiba, natarihipuca ena tivarahanaya náinajicayare. ¹⁴ Eta emicahuchiravaca éna, tacuti eta táchajiriruva eta jirasare, ani tacahe:

Pítisami pímicutijiricava pépenaquene taicha
eta tavayuasiravihi eta pecatuana.

Péjamichavaichu eta pímacacarasiravahi

te timapicu.

Písapava macaechepecaví ema Cristo,
mavarahahi timícauchaviyare.

¹⁵ Eta tacahe, yátupina eta ejaneasiravaina. Vahi ecucuti ena máecharaireana. Ímerecavaya eta ítupajijiasiravahi. ¹⁶ Ecemapuravachaha tamutu sácheana eta ímitusiravacahi ena achaneana, taicha maverana ena tíchanahi eta tamauriqueneana. ¹⁷ Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu. ¹⁸ Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta ítaresira. ¹⁹ Eta ímiturapiyare nayehe ena echamuriana, eta salmo étapa eta jirasareana majiriahuana ema Viya. Eta ecunachirainahi ema Viáquenu, iúrisamureyarehi eta ejiraira. ²⁰ Ehasulupayachaparacaya ema Vicaiyaquenehi te máijare ema Viáquenu Jesucristo tayehé tamutu jácani íchararacavana taicha tásihaqueneanahi eta mayehe.

²¹ Emutu éti, ímereca eta iúriva táichavenehi eta epicauchirahi ema Viya. Ísapava eta nacamunuirahéhi ena echamuriana. Vahi étainachucha éhica eta evarahaqueneana.

Ema achane ésupa esu mayena náimerecayarehi eta náuriva énajicacayarehi

²² Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyareichu eta esuapirohí ema Viáquenu. ²³ Taicha mácani achane, tatuparacahi éma, téchaya eta máitátitraya esu mayena, tacutihi ema Jesucristo tatuparacahi éma téchahiyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi. ²⁴ Tásicha, yátupihi eta vipicauchirahi visuapahi ema Cristo. Ene nacaheyarehi ena esenana, nasuapayarehi napicauchayarehi ena náimanaveanahi te tamutu.

²⁵ Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi, ²⁶ taicha mavarahahi tisantuchahaviyarehi. Tásicha, masipahasinahavipa eta viáchanevana eta visuapirohí eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehé eta suaimairayare. ²⁷ Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecahavimahi, apanaimahi víchava. Mavarahahivare tétavicavayarehi eta visantovaya. Yátupi matapiravarehaviya víti. ²⁸ Ene ecaheyarehi eti náimanaveanahi, ímerecayarehi eta émunasirahí ena eyenana, tacutihi eta émunasirahí eta iáqueheana. Mácani máemunacahi esu mayena, tímicutijiricavahi eta máemunasiravahi éma. ²⁹ Taicha viti achaneana, eta vítarsirahí, váhiquene vicatichaimahi eta vécheana. Tétavicavahi eta vijaneasirahí, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavihivare viti machanerana. ³⁰ Víti tímicutijiricava eta táunavanahi eta máquehe táichavenehi eta viávahásirahí éma. Vicutijiricavavare eta maeche, máperanavare. ³¹ Échavaya eta táechajirisirahí eta Sagrada Escritura, ani tacahe: "Mácani amaperu achane ésupa esu mayenayare, te ticaimanapa, tatuparacavacahi típutscavanayarehi eta napenana ena ticachichana. Énajivainapa titáticacanayare. Eta navehacacairahi, tímicutijiricavaipa étanarinehi eta náqueheana" tacahepa. ³² Te juca tametarapi, jararihi eta tacayemaquene tayumururevaquenehi. Puiti

nímitucahe: Viti machanerana ema Cristo, eta viúrujiasirahi éma, étanamu-riháviripa tacuti eta étanarinehi eta náqueheana ena ticaimanahi. ³³ Tásicha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

6

Ena amaperuana, náimerecayarehi eta náuriva nayehe ena ticachichana

¹ Étiripa eti amaperuana, yátupina eta esuapajiraivaina nayehe ena ticachi-chaheana, taicha tituparacahehi ene ecaheyarehi eta éhisirahi ema Viáquenu. ²⁻³ Ema Viya tíjaracavapa tíjaracaheyare eta iúricacarevaya eti esuapajirahiana, taicha ani tacuhe eta máechajiriruva: “Epicauchayare ena ticachi-chaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasuapacarevahi eta juca mavanairipi ema Viya eta eyehe.

Ena náiyana, náenana, táurini eta námitusiravacaina ena nachichanaveana

⁴ Énerichuvare, eti náiyana, náenana, vahi ecuimiyusemaca ena echicha-naveana tayehé eta evanesirana. Tauri eta ecavanairipira, apaesa napicau-rahí eti najurusiraina, énajivayare ticaratacavana. Ímitucavaca tamutu eti máimiturapiana ema Viáquenu, apaesa nasuapajirahi.

Ena ticaquenurecana, táurini eta nacaematanearuhina

⁵ Énerichuvare eti ecaquenurecana, tituparacahehi esuapajirahiyare nayehe ena iáquenuanahi. Epicauchavacayareva, émunacayareva. Táurivai-nahini eti ecaematanearuhina, tacutirichu eti táurivahi eti ecaematanearuhina ema Cristo. ⁶⁻⁷ Evapinavayarehi te esamureana eti ecaematanera, vahi tacucarichu te natarihi ena iáquenuanahi te emirahu. Vahi ecuyacuji-rihi. Evapinavayaresera eti ecaematanearuhina éna, taicha émarichuvare ema Viáquenu ema ecaematanearuhina. Ímerecavayare eti yátupirahi mavana-rahehi éma. Tacaheyarehi eti ítauchirayare eti mavarahaqueneana ema Viya. ⁸ Taicha écharipahi émutu éti, vijacapayare eti vícuchihi mayehe ema Viáquenu te vítauchahi tamutu eti táuriqueneana. Vahi manerejicaimahi nácani líbreanahi énapa ena ticaquenurecanahi; vínumayarehi tayehé eti vícuchihi.

Énapa ena náquenuana, tituparacavaca eta náurivaina nayehe ena nachanerana

⁹ Énerichuvare eti náquenuana, tituparacahehi iúriyareva nayehe ena echanerana, ejapanuyare éna tayehé eti evanesirana. Vahi ípicararerecaimahi te evanesirana. Ínunayarehi échava eti matiarihirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena acha neana.

Yátupina eta vicasiñavairahi me Viya; vétumechavavare eti véhisirahi

¹⁰ Puiti nutuparacahevare, nuparapenaveana, ecasiñava yátupina mayehe ema Viáquenu apaesa máijaracahe éma eti matumeva étapa eti máitupajijasirava. ¹¹⁻¹³ Nuvaraha numetacahe eti juca: Ema Váinaraji ticanarahavíhi víti machaneranahavíhi ema Viya. Tétavicavahi eti mavarairahi tiáquipacahavi. Tásicha, tituparacahavi eti vechapajirisiravaya eti vicatiuchiravaya mayehe éma. Natiarihivare ena camuriqueneana majupahana, énapa ena masuntarurana. Váhisera achaneanainahini, váhivare viparaepiyanaainahini. Éreananahi éna, váinarajiqueneanahini. Tétavicavahi eti nasimutuvahi éna.

Tétavicavahivare eta náitupajijiasiravahi étapa eta natumeva eta nacaematanera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuaraquiana ema Váinaraji. Étumechava eta éhisira. Ecuti ema suntaru ticasíñavahi tayehe eta mamuiriha vahi tasiapahacaimahi eta espada. Tásiba, eratahayare ecamicha tamutu eta ecatajivairana. Vahi ecainajiruvaimahi. Iáquipaica-yareva namutu ena machamuriana ema Váinaraji. ¹⁴ Yátupinahisera esuapa eta vímiturapiana yátupiqueneana. Vahi ecuchavacuéjechava. Átupiruvahini eta ítaresirahi. Ecutiyare ema suntaru, manacahi eta maitijuhe, étapa eta fiérromehi tiávichayarehi eta matupa, tájinasa-repa náicharaca ena mánarana. ¹⁵ Vahi tacuechuquiha eta ecametarairuirayare eta majacapiraya ema Viya namutu ena achaneana. Etanucayareva eta eparuvevaya apaesa erataha eta epaisirayare te acheneana eta ítecapirayare tayehe eta tayerahiqueneana avasareana. ¹⁶ Tacutiquene eta ticamunucarehicha, yátupinahi eta ecasiñavairaina mayehe ema Viya. Eta ecasiñavairayare táimicutijiricavahi iávihui-nahini eta ticaemahaequenehayarehi eta tamuruirapahi eta mayucaraqui ema Váinaraji. ¹⁷ Tacutiquene, ecasiñavahi yátupina eta iúchucuirayare, tacuti eta macasiñavaira ema suntaru eta mayehe casco te machuti. Iúnacahi eta máechajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi. ¹⁸ Te eyujaraca, eyaseacaya ema Viya máijaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi. ¹⁹ Énerichuvare, te eyujarasirana, eyaseuchanuhini me Viya, apaesa máijaracanuhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya. ²⁰ Ema Viáquenu tinacanuhi núti námayarehi eta máechajiriruva, nucutiyarehi mácani achane embajador mayehe ema aquenuca Emperador. Éta tíchanuhi ticaviurenhi eta napresu-chiranuhi puiti. Eta tacahehi, nutuparacahe eyujarauchanu, eyaseuchanu me Viya, máijaracanuhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

Eta táchecuaraqui eta macartane ema Pablo

²¹ Tiuri puiti, máimahaherinesera ema vémunaruquenehi vichamuri Tíquico. Éma, titámetacaheyare tamutu eta níchararacávahi núti. Tétavicavahi eta máimicatasiranuhi eta vicaemata-neasirahi ema Viáquenu. ²² Eta tacahe, névatacachi éma eta ara eyehe. Titámetacaheyare eta víchararacavahi, té-tumechaheyareva éti eta éhisiraya ema Viáquenu.

²³ Puiti nuyaseacahi ema Vicaiyaqueñehi émapa ema Viáquenu Jesucristo, náijaracahehini eti nuchamuriana eta enarasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi. ²⁴ Nuyaseuchahevare táetaviuchahini eta iúricacárevaya emutu eti yátupihi éta émunasirahi ema Viáquenu Jesucristo.

Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Filipos, ticaijare FILIPENSES

¹ Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujiasiravahi ema Jesucristo. ² Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; náijaracahehini táurivaina eta epanereruana.

Ema Pablo mayaseuchavaca te mayujarasirana ena machamuriana

³ Tatiarihi eta te néchahe, nuhasulupayachahi ema Viya íchavenehi éti. ⁴ Te tamutu eta nuyujarasirana, téavicavahi nûrisamureva eta nuyaseuchirahehi emutu éti. ⁵ Taicha te jena tínapucainapa sache eta nucametarairuirahi eta eyehe, ichapequene eta ímicasirasiranuhi. Puíticha enasirichuhi. ⁶ Ema Viya, téavicava eta máurichirahe eta ítaresira cape juca. Núti, téavicavahi eta nucasiñavairahi mayehe eta máimianiravaina eta máurichiraheyare, mavarairahi iuri eta machimapiraheya ema Jesucristo te jena sache machavirayare. ⁷ Énerichuvare nucasiñavahi eyehe eta ejacapiraya eta máurichirahehi éma, taicha némunacahehi ichape emutu éti. Nucasiñavahivare vicuticacaipahi eta vijacapirahi eta máimicasirasirahavihi ema Viya, tayanapane viyerehicacahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava. ⁸ Tímararacanuhi ema Viya eta némunasirahéhi emutu éti, nucutihi ema Jesucristo eta máemunasirahéhi éma. ⁹ Nuyaseacahivare ema Viya eta iápajusiravainahini eta émunaraivaya. Ítupajijiacavahini, támutuhini ímatiequeneha, apaesa ímatiparacahini eta enerejisiraya eta táriquenehi. ¹⁰ Taicha nuvaraha tápajupanávainahini eta iúrivaina eta ítaresirana, tájina téchípejicahémahi. Matapiravarehéyare, tiúriyarepa eta machimapiraheyare te machava ema Jesucristo. ¹¹ Nuvarahavare iápajusiravainahini eta íchaqueneana táriqueneana eta ecaemataneasirahí ema Viáquenu Jesucristo. Tásiba, téavicavayarehi eta nacunachirayarehi ema Viya ena achaneana eta náimairahehi éti.

Eta vítaresirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaeratairahi. Eta návihairahi núti te juca cárcel, camuriana ena numetaruana eti máemunaraivahi ema Viya eta nayehe. ¹³ Énaripa ena tasuntarurana eti palacio énapa ena apamuriana achaneana náecharipahi eti táemeratasiranuhi eti náhisirahi ema Cristo. ¹⁴ Tacutiquene, eti náimairanuhi eti nupresuvahi, ena camuriqueneana nuchamuriana táetumechavacainehi eti nacometarairuira eti máechajiriruva ema Viya. Vaipa napicahini taicha ichape eti nacasiñavairahi mayehe ema Viáquenu. ¹⁵⁻¹⁷ Nararihi éna, tiúrihi eti napanereruana eti náimituresirahí te máijare ema Cristo. Tatupiruvahi eti náichirahi, tásibaquenehi eti náemunasiranuhi, taicha náechahi éna eti návihairahi ani, nucatiuchirayarehi eti yátupira eti viúchucuiraya maicha ema Jesucristo. Nararihisamisera ena tímiturecanahi te máijare

ema Cristo, váhisera tátupiruvaquenénahini eta napanereruana. Nacapinarruraivarichucha, navarairahi ticachuricanuana. Napanerechaichuchuchavare tiápajucavayarehi eta néñamiravana, tavetijipa eta návihairahi nuti te juca cárcel. ¹⁸ Tájinachuchasera táichavahi. Núti vahi nucapinaruvacaimahi ena nani páureanasami. Ticurisamurechanuanarichucha núti eta náechajisihairahi ema Cristo namutu.

Énerichu ichapemuriyarechucha eta núrisamurevaya, ¹⁹ taicha németeaca tiúriyare tamutu eta níchavaqueneyavare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicasiranuhi. ²⁰ Núti, ichape eta nuvarairahi váhini nucutsirihaini. Nuvaraha nuvapinava eta nímiyanirava nucasiñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasiñacarevahí ema Cristo. Tájina vahi nupicacavahini eta náimicatichiranuhipuca, támicapanupuca. ²¹ Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núricacarevaya. ²² Téhesera te nítarecari-chahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe. ²³ Nuvarahaipanéni níjahúchavahini népenahini apaesa nunaracapaini te machacaya ema Cristo. Eta juca tiúripanahí eta nímairahi. Váhisera nímatiequeneha tájahapuca eta néhiruyare. ²⁴ Néchahevaresera éti, néñamahevare nujunijicahe. Tiúripanaichupuca vuíchaha nucuepena. ²⁵⁻²⁶ Tásicha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahlenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacache, tétavicavapaini eta viúrisamurevainahini eta viúrujiacacairaya.

²⁷ Eta ítaresiraya, ímereca yátupina eta éhisiraina eta máimiturapiana ema Cristo. Tayanapane váhipuca nucuiteca eta eyehe, ímiyanavasera eta étume-chiravaina eta iúrujiasiracacahi. Nusamairiricahehini táurihini eta ímiyaniravahí éhica emutu, étanainarichuhi eta epanereru, evapinavahí eta ecamenteairuira eta véhiruhi tayehe eta viúchucuiraya. ²⁸ Vahi ecuarameca naicha nácani iánaranahí. Eta nacatianasirahehi, tímicaecherachahi eta nacaicu-chirahi eta náicuñayare. Támicaecherachahi eta iúchucuirayarehi éti maicha ema Viya. ²⁹ Éti, iúricacarehi maicha ema Viya eta ejacapacarevahí mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta. ³⁰ Ecuitinuripahi eta vicanarajirisiravacahi ena viánaranahí. Éti ímahanurichuhi cape juca eta nucanarairavacahi, puíticha esamairiricanuipahivare eta nunasirichuhi nucanaravacahi.

2

Tétavicavahí eta masuapajiraivahí ema Cristo. Tásicha puiti, tétavicavayarevare eta masuapacarevayare.

¹ Tacache puiti, németeaca esamavahí eta máetumechirahéhi ema Cristo, iúrisamurerahivare táichavenehi eta máemunasirahehi; evapinavahivare eta mávahásirahehi ema Espíritu Santo, máimitusirahehi eta ecajirahi ejap-nurahihivare. ² Tacache puiti, nuvaraha étanainarichuvare eta epanereru, ácuticacaini eta ecaemataneasiraina ema Viya; tacuticacahivaréni eta émunasiracacahi. Tásicha, tétavicavayare eta núrisamurevaya ícha. ³⁻⁴ Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvarahasera ímerecahini eta emansuvaina nayehe

ena echamuriana; énahi émunaruqueneanahi. Nativaina ímicatacavaca éna, tátaviuchiravainahini eta náuricacareva ícha. Vahi ecuítatijiva.

⁵ Emutu éti iámanahini eta táurivahi eta juca mapanereru ema Jesucristo, tisuapajirahi éma. ⁶ Éma, tacahehi eta mapanereruanahi: Vahi macasiñovahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi. ⁷⁻⁸ Tacahe, manaquicahi eta mávacuréni. Eta máucupauchirahavihi, macutipaipa mácani achane macahequenechucha eta máuchusirahi. Tamutusera eta máitaresirahi, tétavicavahi eta masuapajiraivahi, macutihí mácani moso. Eta masuapajiraivahi, étapa tiámaparauchahi eta máepenirahi te crusu. Titsirihacavahineni, máitauchahisera. ⁹ Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapicahuirahi ichape eta máijare, ¹⁰ apaesa námutu nácani tisamanahi eta máijare Jesús, tépuyucanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puiti te amahe apaquehe. ¹¹ Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vicaiyaquenehi.

Tétavicava eta najaraiva ena téhicana ema Jesús, nacuti eta jarairiqui

¹²⁻¹³ Núti nucunachahehi, eti nuparapenaveana némunaruqueneanahi, taicha tétavicavahi eta esuapiranuhi te nutiarihirichaha te echacaya. Puítisera nuvaraha tápajucavaini eta esuapiranuyare, puiti eta nuyerehirahehi. Ema Viya, émarichuhi ema tinacahi te esamureana eta evarairayare ecurisamurechayare éma; tiávahácahevare eta ítauchirayare tamutu. Tásiba, muracaina eta ejaneasirava tayehe eta tájiparacana, epicavarení eta ímicati-samurechira ema Viya. Tacuija táemitiequenehahini eta tapachinavahi eta iáchanevana.

¹⁴ Te tatiarihinapuca jácani íchaqueneanayare, vahi ecuevataemachavaca, váhivare ecuacapauchava, ¹⁵ apaesa tacuija échajisiacarevaina emutu. Tacuijavare etapiravainahí eta náimairaheyare ena achaneana. Ímerecavyarehi eta machichahérahi ema Viya, tájina táchipejicahehini nayehe ena achaneana váinarajipanerérana. Nímicutichinahe eta táurinavahi eta jarairiquiana vímahaqueneana te anuma te jácani yati timapicuquenehi.

¹⁶ Ímitucavacahini eta máechajiriruva ema Viya, eta íchuhairavacavare náehicavare, apaesa náuchucuhahini tayehe eta apana náitaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneanahi, tétavicavainapa eta nucunachiravaya núti íchavenehi éti eta táurivahi eta nímitusirahehi. Vahi támapurujihini eta nucaemataneasirahéhi. ¹⁷⁻¹⁸ Nímicutichahe eta esuapajiraivahi tayehe eta ecaemataneasirahí ema Viya. Ticutihi eta iámavahuhi mayehe. Núti, tijuricati táimicapanupuca eta nucametarairuirahí eta eyehe. Eta népenirainapucaini tacutiyareva eta námavahuhi mayehe ema Viya, tacachane eta iámavahuhi éti. Núti nuvapinavahi eta níjarasiravahi népena, núrisamu-rehivare eta nucamavahuirahí me Viya. Nuvaraha iúrisamureyareva éti apanava. Vahi ecucatiequenehanu. Ácutinu eta núrisamurevahí núti.

Ema Timoteo émapa ema Epafroditó, vanairucanayare me Pablo

¹⁹ Nupanerechahi névatacayaréni ema Timoteo eta ara eyehe, máimahapanahe apaesa núrisamurepaini eta nusamairirisiraheya te machavapa. (Máimahahavirinesera ema Viáquenu Jesúz eta vítujisiravaya.) ²⁰ Taicha ema Timoteo, yátupihi macutinuhi eta nuhapasamurechirava eta iúricacarevainahini éti. Nájina apanainahini nácutihini éma. ²¹ Nararihinéni ena apamuriana, énachuchasera tiyayauruircavanahí. Vahi tihapasamurechavananaimahi

eta iúricacarevaina eti machaneranahi ema Jesucristo. ²² Ímatiripahi éti eta máurivahi ema Timoteo eta máimicatasiranuhi tayehe eta vicametarairuirahi, tacutihí mácani machicha ema achane, eta táurivahi eta máimicatasirahi ema máiya. ²³ Vuíchahasera névatacaimahi éma. Néchanumayare eta juca níchararacavayare te juca. ²⁴ Nucasiñavahinénisera mayehe ema Viáquenu Jesucristo eta nútijacarúvainahini nímahapanaha.

²⁵ Tásihasera, nupanerechahi névatacahirvaréni puítirichu ema apana viparape Epafroditó, ema évataruhi tímicatacanuyarehi, tiámapahivare eta enaquiruvana. Puiti éma, tétavicavahi eta máimicatasiranuhi tayehe eta juca vématanerepihi, vicanarairahi eta tamauriqueneana. ²⁶ Mavarahaipaichavare tímahahe éma apanava. Téñiamavaipahi eta eyehe emutu éti taicha máechahi eta esamairirisirahi eta macajumairahi. ²⁷ Yátupihi eta macajumairahi, tiánehiyarehini tépena. Majapanuhisera ema Viya; tinaracahi. Tijapanunuhibare nútí apana apaesa vahi nucueñiamavahichaini, vahi tacuapiquihanuhini eta néñamiravahi puiti. ²⁸ Eta tacahe, nuyayaucha puiti névataca éma, apaesa eta ímairainahini éti, iúrisamurevarepainedi. Te néchapa eta iúrisamurevahí, étapa tacaepaha eta néñamavahí eyehe. ²⁹ Táurisera eta ejacapiraina éma te esamureana, taicha yátupihi echamurihi éma eta éhisirahi ema Viáquenu. ³⁰ Taicha éma, yátupihi tiánehipa eta máepenira, táichavenehi eta táetaviuchirahi eta mavaraira macaemataneca ema Cristo. Váhiqene tiyavanavahini eta máitaresirahi, taicha muraca eta mavarairahi máitaucha eta etuparasiranahí mayehe. Taicha éma ítsivahí éti, eta vahi ítujicavahini ítecahini étijacarúvainahini ítatinuhini.

3

Tiúripana véhica eta juca yátupiqueneana

¹ Nuparapenaveana, evapinava eta macachaneraheripa ema Viáquenu. Núti, vahi nuyacuji eta nápechirayare numetacahe te juca néchajiriruvahí te nájure taicha eta tiúrichaheyare éti. ² Échapavayare nayehe nácani achaneana tipamicacheana éhica eta mavanairipiana ema Moiséini, navarairahivare ecamarcayare, náimijachahi machaneraheya ema Viya taicha eta ecamacrairahi. Ena nani, tétavicavahi eta náiñehivahi eta náemejecapirachira ena vichamuriana. Éna, nacutihi eta jácani tamucu tétavicavahi eta tanicarraivahi. ³ Jéhesaresera vítquenehi machaneranahi ema Viya yátupiquenehavihi. Vicamarcaqueneanahí viti te visamureana maicha ema Espíritu Santo. Vítquenehi yátupiquenehavihivare viti véneuchavahí me Viya. Vivapinavahivare táichavenehi eta vicasiñairahi eta machanerahavirahí ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha. ⁴ Jéhevare nútí, táuricahinéni nucasiñavahini nútí nusamacarehini, taicha nítauchahí tamutu eta viyeherepiana viti israelítana. Nucachuricahi ena nujaneanana. ⁵ Núti yátupiquenenuhi israelítanuhi taicha nucamarcaripahi te óchopa sache eta núchusirahi, náitauchahí éna eta viyeherepi. Mámaríequenenuí ema Benjamín. Yátupiquenenuhi hebreo. Yátupiqueneanahivare hebréoana ena ticachichanuana, énapa ena náchucanaveanaini. Núti náchamurinuñihivare ena fariséoana. Nítucahi nímicapicaucha eta náitauchiraina yátupi eta viápajusiravahí religiósohavahí nayehe ena apamuriana nujaneanana israelítana. ⁶ Eta nímicapicauchira, ichape eta nupanajirisiravacahi ena náinapureana creyénteana. Nucasiñavahí nútí eta nítauchirahi yátupi eta viyeherepiana. Tájina néchajisiacarevahini

nayehe ena achaneana. ⁷ Puítisera eta néhisira ema Cristo, vaipa tacunacha-carehini eta nusamiravahi tamutu eta juca níchaqueneanahi nusiñavirainihi. ⁸ Tacahe, eta nímairahi, váhinéni étaparacainahini tayehe eta viúchucuiraya. Puiti nínajicapa tamutu eta júcana, taicha tihapapicanuhi eta néhisirayarehi ema Cristo; táichavare vahi táchutihini eta táetaviuchiravahi eta táurivahi eta néhisirahi ema Náquenu Jesucristo. Puíticha tamutupa némitisica. Émachucha nucaematanecahi. ⁹ Puiti eta návahásirahi éma, vahi étainahini eta táurivahi eta néhisirahi eta viyeherepiana. Ema Viya tijacapanupa táichavenehi eta nucasiñavairahi me Cristo. Taicha namutu ena ticasíñavanahí éma, tijacapacareanaya me Viya. ¹⁰ Nuvarahahi núti tajurucachucha eta nímatirayarehi ema Cristo. Nuvarahavare tacuija tahapapica eta macaematanearisanuhi, máimeresirahi eta táetaviuchiravahi eta máitupajijasiravahi, tacutipa eta máechepusiraipta éma te máecari. Nuvarahavare nucapayayarácahivaréni eta macatajivairahi. Étapa eta népenira, nuvarahavare táurichavacayare ena nuchamuriana, táchutihini eta táurichirahavihi eta máepenirahi ema Jesús. ¹¹ Taicha núti nucaunevahi eta néchepusiraya núti apanava te nécari.

Yátupiya eta vicaratasiravaya te vivaraha vítujicava viveha eta vícuchihi

¹² Núti vahi nímijachavaimahi tamutuhini nítoucha eta nítujisiravaya. Vuíchaha nítamuturuca. Nímiyanavaichuchchasera eta nupamisiravahi, nuvarairahi nucurisamurechayare ema Cristo te tamutu, taicha eta tacahehi eta máichuiranuhi néhisirayare. ¹³ Nuparapenaveana, yátupiquenehi vuíchaha tamutu nucapayayaracahini. Nuvarahaipasera némitisicayare tamutu eta nunaquiruana. Tásiha, nétumechavainapa eta nítouchiraya tamutu eta mavarahaqueneanahi níchaqueneanayarehi. ¹⁴ Nupamicavahi taicha ichape eta nuvarairahi nucurisamurechahini ema Viya, nuvehahini eta nícuhihi mayehe. Taicha eta tacahehi eta máichuirahavihi, mavarairahi tíjaracahavi eta viúrujiasirahi ema Jesucristo.

¹⁵ Tacaheyarehi eta epanerechirayare éti. Ecuitinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímitucaheyare ema Viya. ¹⁶ Jéhesare, yátupina vímiyanava véhica tamutu eta vímitucasivanahi.

¹⁷ Nuparapenaveana, nuvaraha yátupina ácutinu núti eta núrivahi eta nítaresira, éhicavaréni eta náurivahi ena apamuriana téchemachanaripa. ¹⁸ Ichapemurihi eta nutuparasirahehi tayehe eta juca. Puiti eta nápechirahéhi numetacahehi, níyahasamurehi taicha nararihichaha ena vuíchaha náimatiéqueneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisiha.

¹⁹ Ena nánisami témitiequeneanayare taicha tétavicava eta tavayuasiravacahi eta najamurachaqueneana. Nacasamurechucha eta tájiparacana te juca apauehe. Tisiñavavaicanahi, tivapinavanahí eta náichirahi eta tamauriqueneana titsirihacareana. ²⁰ Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahiquene, másihairaya te anuma. ²¹ Máitsivachainapa éma eta juca viáquehesami. Apanainapa eta táimahiyare. Tacutinapa eta macáquehéra éma, tapachinaquenehi. Tétavicavainapa eta tatumevayare taicha ichapequene eta máitupajijasiravahi éma. Maratahahi macapaquecha tamutu.

4

Iúrisamurereacavayare me Viáquenu

¹ Nuparapenaveana némunaruqueneanahi, tétavicavahi eta nuvarairahi nímahahe, taicha nucajamurahehi éti, tétavicavahi eta núrisamurevahi ícha.

Puiti nuvaraha ímyanava túmehéna tayehe eta éhisirahi ema Viáquenu, eti némunaruqueneanahi.

² Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu. ³ Nutuparacavivare, piti némunaruquenehi nucompañeruvihí: Pímicatacavacahini ena nani apinana esenana viparapenaveanahi, taicha éna ichapemurihi eta náimicatasiranuhi tayehe vicametarairuirahi. Náimicatacahi ema Clemente, énapa ena apamuriana ena nucompañeruanahi. Eta nájareana ena nani ticajuanaripa tayehe eta libro tiama eta víjareana viti vítareruanayare.

⁴ Támutuhini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe. ⁵ Námutuhini ena achaneana náimatihehini éti eta táetaviuchirahi eta iúriva. Taicha ema Viáquenu, tiánehipa eta máitesiraya.

⁶ Vahi ecueñamava, te tatarihinapapuca eta íchava. Ecasíñavasera eta eyaseasira ema Viya te eyujarasirana. Ehasulupayachavare tayehe jácani máijararuheanahi. ⁷ Jéhesare, ema Viya macaepahayare eta jácani ecatisamurevana eta juca máijarasiraheyarehi táurivayare eta esamureana étapa eta epanereruana, táichavene eta iúrujasirahi ema Jesucristo. Eta macurisamurechirahavihi ema Viya, tétavicavahi eta tacachuriasirahi eta nacurisamurechira nácani achaneana.

Epanerechayare eta táuriqueneana

⁸ Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta tipicauchacareana, tayehe tamutu eta ítauraivaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹ Ímyanava éhica eta nímiturapiana. Ítauchayare eta numetarapianahi esamararuaruanahi. Ácutinu eta níchaqueneanahi ímahaqueneanahi. Ítauchaya eta juca, tásiba ema Viya, tamutuinapa tíjaracaheyare eta táurivaya eta epanereruana éti.

Tinaquiquicavanapa ena machamuriana ema Pablo, náimicatasiraya éma

¹⁰ Tétavicava eta núrisamurevahi eta mayehe ema Viáquenu eta máijara-sirahehi éma eta epanerechirahuhi tayehe eta iápechavahi ímiámareca eta nuyehe. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahi. ¹¹ Vahi táichavenénahíni jácani nuvayuchiravainahini eta nucamunuirava. Núrisamuréichucha, nítucasamihi núti eta nítatiravahi tayehe jácani tatarihi-quenehi. ¹² Nítucahi eta nítaresirahi puiti eta nupauréravahi. Nítucahivre te nucaimahaquenéichaha. Nítucahi eta nucamichirahi eta nátajivanahi, te nunicapuca, váhipuca; te nucaimahaquenehipuca, te tájinahivarepuca nímaquaquenéahini. ¹³ Núti nuratahahi nucamicha tamutu, taicha ema Cristo éma tétumechanuhi. ¹⁴ Tájinaserá táichavahini eta ímicatasiranuhi tayehe eta ímámareruhi, evarairahi ímerecanu eta émunasiranuhi, ítátiranuhi eta numaitujisiravahi nutanuchavahini.

¹⁵⁻¹⁶ Eti nuchamuriana, nucunachahe eta némechirahéhi eta ímicatasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahi

eta ímiámaresinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti iápechavahi ímiámareca eta enaquiruvana. Jéhevare nájina apamurianainahini nacutihehini eta ímicatasiranuhi. ¹⁷ Váhisera étainahini jácani nuvarairahini iápechavahini ímiámareca eta nuyehe eta enaquiruvana. Nuvarahahi níminecapaeque-nehahe: Eta ímicataraivahi te juca apaquehe, puiti te anuma ánaqui táurujisiavahi eta enaquiruvana te mamirahu ema Viya. ¹⁸ Nuti ichapemuripa eta nujacapirahi eta enaquiruvana, eta mámaquenepahi ema Epaafrodit. ¡Tétavicavahi eta ecajiraivahi! Eta ímiámareruana, tacutirinehi eta inciensoinahini, eta táijiyevali te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavahuana te Templo. ¹⁹ Máimahahéine ema Viya. Éma, máitsivachayare tamutu eta enaquiruvanah. Tíjaracaheyare te jácani ecamunuiravana. Émarihi téchayarehi ema Viáquenu Jesucristo. Éma, tétavicavahi eta tamutuira marataha. ²⁰ ¡Máichecuaraqureyare eta vicunachiraya ema Tata Vicaiyaquenehi, tijarahi eta vijirauchira éma! Amén.

Eta táicheckuaraqui eta macartane ema Pablo

²¹ Eta iúrujiasiracacahi mayehe ema Viáquenu Jesucristo, nuvaraha échajisinanuini namutu ena machaneranah ema Viya, vichamurianah etá véhisirah ema Viáquenu Jesucristo. Téchajicaheanahí éti ena nucompañeruana, ena nucachanequeneanahí ani te juca. ²² Téchajicaheanahivare namutu ena vichamuriana machanerana ema Viya, ena ticavasanahí ani te juca. Nararihivare ena tiávihanahí te mayehe palacio ema Emperador, énarichuvare vichamuriana. Téchajicaheanahivare éna apana.

²³ Nuyaseuchaheparaca emutu éti me Viáquenu Jesucristo táetavicavahini eta iúricacarevaya máicha.

Tamutupa eta néchajiriruvanahí eyehe.

Eta macartane ema Apóstole Pablo nayehe ena machamuriana ticavasanahi te avasare Colosas, ticaijare COLOSENSES

1-2 Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehé eti avasare Colosas, taicha éti machaneraheripa ema Viya, tiúrihi eti éhisirahi ema Jesucristo. Téchajicahe ema vichamuri Timoteo.

Nuvaraha macatajicahehini ichape ema Tata Vicaiyaquene, máijaraca-hehini eta táurivaina eti epanereruana.

Ema Pablo masamairirica eta náehisirahi ema Jesús ena ticavasanahi te avasare Colosas

3-8 Puiti títecapauchahaviripa ema vémunaruquene Epafras, ema vichamurihi eti vicametarairuirahi. Éma, ichape eti macunachacarevahí. Tiúrihi eti máitauchirahi tamutu eti macavanarairahi ema Cristo, máimitusirahehi yátupi eti máimiturapiana ema Viáquenu. Ema Epafras titametacahavihi eti íchararacavahí, eti éhisiraipa ema Jesucristo, étapa eti émunasiracacairahi emutu éti, émunasirahivare ena iúmurivanahi te apana avasareana, machaneranahivare ema Viya, taicha ecuchapavainapa eti esiapiraya tayehé eti mávasa anuma. Viúrisamurevahí eti visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eti viúrisamurevahí eti táurivahi esama eti macametarairuirahi ema Epafras eti yátupiquene máechajiriruva ema Viya, etupiruvahí esuapa eti ímitucasivahí, te esemainapa eti máemunasirahehi éti apanava ema Viya. Étarichuhi eti juca vímiturapihi nayehe ena apamuriana achaneana ticavasanahi te apanana avasareana. Natarihipahi ena tisuapanapahi eti vímiturapiana.

Ema Pablo mayaseuchavaca te mayujarasirana ena machamuriana

9 Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eti ítusiraina, ímatiraina yatupina eti mapanereruhi ema Viya. Máijaracahehivaréni eti échemaraivainahini, ecaicutiarayare eti máechajiriruvana, máichavenénahini ema Espíritu Santo. **10** Víti viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eti ecaurisamurechirayare éma. Táurihini eti ecaemetaneasirahi, támutuhini ítapharaha eti táuriqueneana. Iápajucavapáipahivaréni eti ímatirayare éma. **11** Énerichuvare viyaseacahi ema Viya máijaracahéni eti ichapequene máitupajijiásirava apaesa ecamichahini tamutu eti ecatajivairana, ácayehehini pacien-cia muraca, iúrisamurereacavachuchaini. **12** Éhasulupayachahini ema Tata Vicaiyaquene eti máichuirahéhi éti apanava, mavarairahi tíjaracahaviyare vimutu eti tajarahiquene vícuchianahi viti machaneranahi éma.

Ema Viya mavaraha ticuchucuhahaviyare

13 Ema Viya ticatiuchahaviripa mayehe ema Váinaraji ticaratacavahinihi. Téquecahaviripasera véhicayarehi ema Machicha Jesucristo máemunaru-quenehi. Vaipa véhicaimahi eti nayeherepiana ena timapicumareana. Émapa

téchahavihi puiti. Viávacuhaipa eta mavanairipiana. ¹⁴ Taicha ema Viáquenu Jesucristo tépenahi te crusu eta macaepahairaya eta vipecaturana, viúchucuhaipahi máicha.

Ema Jesucristo, ema tinacuchahi tamutu. Émarichuvare téchahi puiti.

¹⁵ Yátupi máimahasihi ema Tata Vicaiyaquene. Émasera ema Jesucristo tétavicavahi eta macavasirahi ema Maiya, émapa tímimatichahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu. ¹⁶ Éma, mavanahihí me Maiya eta máepiyasirahi tamutu eta vímahaqueneanahi puiti: te anuma, étapa te juca apaquehe, étapa tamutu eta vimaratahahqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énapa ena túparairucanahi, énapa ena apamuriana tijacapanahi eta vanairipi nayehe ena majupahanahi, énapa ena apamuriana ángeleana masuntaruranahi. Máepiyacahi tamutu, máitauchiraripa tamutu eta mapanereruanahi. ¹⁷ Ema Cristo manasique-neripa acane te tamirahuichaha eta táepanirávayarehi tamutu. Puíticha éma téchahi tamutu. ¹⁸ Énerichuvare ema téchahavihi vimutu viti véhicanahi éma, taicha machichaquenehaviripa. Éma, vínapuaraquihi viti véhicanahi, taicha éma tinacuchahi eta juca arairuhi véhiruhi. Énerichuhivare marata-hahi ticaechepucava te máecari, éne tacahheyare eta macaechepeusirahavyare viti apanavare. Puíticha, éma téjacahi tayehe eta mávacurehi aquenucairahi. Ichapequeneya eta vipicauchira vimutu. ¹⁹ Taicha ema Viya máijaracapa ema Machicha macutiyarehi eta masantuvali, étapa eta máurivahi, étapa eta máitupajijiasiravahi. ²⁰ Eta mapanereruhi ema Viya eta mavañesirahi ema Machicha te juca apaquehe, tépenayare te crusu taicha mätupiricayarehi tamutu eta juca apaquehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

Eta máepenirahi ema Jesucristo, mavacharecahi eta mámirahavyare mayehe ema Maiya

²¹ Étiripa eti, cape juca iásinequenehi ecatianacainihi ema Viya. Vahi táurihini eta epanereruana, taicha eta íchirahi eta tamauriqueneanahi. Iávamirahuinihi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi. ²² Eta tacahéhi eta máimitesirahi ema Jesucristo te juca apaquehe. Tépenahi te crusu táichavenehi eta macaepahairayare eta etapiravanainihi, masantochiraheyareva, apaesa tacuijapa ecuavamirahu te jena sácheyare eta mámiraheyare te mamirahu ema Viya. ²³ Tacahé, nuvaraha étumechavayarechucha, ímiyanava táuri eta éhisirahi. Vahi ecúyacujiéquenehava eta ecuchapirahi eta iúchucuiraya. Vahi ecuemepurureca eta esuapiroipahi eta máechajiriruva ema Viya. Tétavicavahi tasuapacarevahi nayehe namutu ena achaneana te juca apaquehe, nájina tanerejiruina. Nútiripa nuti Pablo vanairucaquenenuhi, étarichuhivare tacahéhi eta nucametarairuirahi.

Ema Pablo matuparahaichuhi máechapajiricayare ena máumurivana

²⁴ Puiti núti, vahi nucatieuquenehavahini eta nucatajivairahi táichavenehi eta nucatuparahairehi nucametarairu eyehe eti apavasanana. Ema Viáquenu Jesucristo, ichape eta macatajivairahi te crusu víchavenehi viti. Tatiarihichahasera eta macatajivairayarehi. Eta juca nucatajivairahi, tacutihini eta macatajivairahi éma. Nucatajivanumapaipahi íchavenehi eti machichanaveana, eti vichamurianahi. ²⁵ Taicha tituparacanuhi ema

Viya eta néchapajiricaheyarehi emutu éti. Nuvanecasivahi mayehe eta nímitusiraheyare tamutu eta máechajiriruvana.

²⁶ Nímimatichaheyare tamutu eta juca mapanerueruanahi ema Viya, tayumururevainihi eta táitaresirahi acane, énaripa ena viáchucanaveanaini vahi támuthini náimatihihi. Puítisera ema Viya tímimatichahaviripa viti machaneranahi tamutu eta júcana. ²⁷ Tétavicavahi táramicarevahi maicha ema Viya eta máimimatichirahavihi eta juca tayumururevainihi ímitucasivahi puiti eti apavasanananahi. Eta juca tayumururevainihi, émahi ema Jesucristo títecapauchaheripahi tiávahácaheripa. Puiti, ejacapacarépahi me Viya. Ecunevainapa maicha ema Jesucristo eta esiapistaya te mávasa anuma. ²⁸ Eta tacache, émaquenehi ema Cristo véchajisihahi víti te vicametarairu. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapanerueruanahi ema Viya, náchemarahivacahini táicha. Vivaraha ítamuturucaripahini te táitecapapa eta sache vímeresiraheyare te mamirahu ema Cristo. ²⁹ Eta tacache, nupamicavahi núti eta nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

2

Ema Pablo tímereuchava eta máemunasiravacahi ena machamuriana

¹ Núti ichapemurihi eta néñamiravahi eyehe eti numaimatiqueneanarichaha, énapa ena apamuriana vichamurianahivare ticavasanahi te Laodicea. ² Nuvarahahai ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahi araenumahi vanairucahi me Viya. Nuvarahahivare ímatiequenehayare eta mapanerueruana ema Viya apaesa ichapenahini eta ecasiñairavainahini eta mayehe. ³ Nájina mácuti ema Cristo, ema tíjaracahavihi tamutu eta vítupajijiasiravanahí, véchemarahivacahi máicha. ⁴ Eta tacache, nutuparacahecha: Vahi ecuisapava nahapapicahe ena tiyururahiana. ⁵ Tayanapane viyerehicacahi, vahi vímahacacahini, núrisamurehisera ticutirinehi étainahini návihahini eta ara eyehe, néchirahi eta tamajinairahi íchiravainahini, yátupihi esuapa eta éhisirahi ema Cristo.

Vímyanava tauri eta vélhisirahi ema Jesucristo

⁶ Tásiba puiti, tauri eta iávahásiraina ema Viáquenu Jesucristo. Ímiyanava eta ítauchira eta íjarasiravahi éhica éma. ⁷ Etupihayare muraca mayehe ema Cristo, apaesa tápajucavapaipa eta ítupajijiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha tacachehi eta ímitucasivanahi. Vahi ecuainajiruva eta ehasulupayachiraya ema Viya.

⁸ Échapavayaresera, taicha nararihi ena navarahayare tiyuruchaheana, navarairaya éhica eta napanerueruana. Vahi ecuisapava náemejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásibaquenechucha te napanerueruana éna. Eta júcana, tájina tavehapica apaesainahini eta máimiturapiana ema Cristo. Vahi ecusuapa ena nani.

⁹ Ema Viáquenu Jesucristo, jéhevare éma, yátupiquenehi santo. Taicha ticuticacanahi ema Tata Vicaiyaquene eta nasantuvanahi éna. Ticuticacanahivare eta náurivahi, étape eta náitupajijiasiravahi. ¹⁰ Éti apanavare, puiti eta iávahásiraripa ema Cristo, tisantuchahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahí ena

ángaleana. Éma, túmepanahi nayehe ena éreanana. ¹¹ Ema Cristo, timarca-chaheripa eta iáchanevana puiti eta iávahásiraipa éma. Ticamitisicaheripahi eta tajamurachaqueneanainihi eta iáquehe tavarahaqueneanainihi icha eta tamauriqueneanahi. Jéhevarequene, eta emarcahi éti, ecachuricahi eta nacamarcairahi ena israelítana náechatisirahi eta náquehe. ¹²⁻¹³ Éti, cape juca iásinequenehi, vahi ímatihini ema Cristo. Vuíchaha ecamarcahini mayehe. Tímicutijiricavahi táepenaquenénahini eta iáchanevana taicha eta epecaturanahi. Tímicutijiricavahi épenaquenénahini, ecaecarasihini tacutihi eta macaecarasirahi ema Cristo te máecari. Puítisera, eta ecaсиñairaripa ema Jesucristo, ema Viya macaitaresinaheripa eta iáchanevana. Puiti ticutiripa échepurénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiraripa eta mayehe ema Cristo, táicutiarahi eta juca macaechebusiraripa eta iáchanevana. ¹⁴ Taicha ema Viya, eta máimairahi eta macatajivairahi ema Machicha máepenirahi te crusu, tiperdonachahaviripa eta vipecaturana. Énerichuvare macaepaharipa eta vitapiravana tímicoñacahaviyarehini. Puiti matapiravarehaviripa eta máimairahavihi éma. ¹⁵ Eta máepenirahi ema Jesús tayeha eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehe. Puiti táquijicavacahi éna, te vipiaraca te máijare ema Jesús. Vaipa tipauchahavi anaimahi.

Ema Pablo mavanecavaca vahi nacusuapa ena tiyururahiana

¹⁶ Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiri-caheanahipuca epicaucha eta napiestarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuahuana, navarahayareva epicaucha. ¹⁷ Tamutu eta júcana, vaipa tásuapacare taicha náchucarapianachucha éna. Étasera eta juca máechajiriruvanahi ema Cristo, jéhevare eta yátupiqueneanahi. Tisuapacareanahi. ¹⁸ Eta tacahe, vahi ecusuapa ena nácani navaraha típicararecaheana, te náichahepuca: “Vahi tiuri eta juca éhiruhi”. Váhivare ecusuapavaca, te ticamesajiricaheana-hipuca éstacava, étapa eta ejirauchirainaji ecaсиñairainaji ena ángelena. Éna náimijachahi tacarichu eta ejacapacareya me Viya taicha eta juca. Ena nani, ticasиñavavaicanahi taicha tímijachavanaripahi máechajicavacahiji ema Viya. Vaipa navaraha nacainajiru eta navayuacasivanahi. Tamutu eta juca tímereuchavacahi éna, máehicaranahanahi ema Cristo. ¹⁹ Vítisera vimutu viti apanapanenejiquenehavianahi véhicanahi ema Jesucristo. Eta viúrujiasiraipahi éma, vaipa apaimamajihavinahini máicha. Tímicutijiricavaipahi mácani achane máitucahi eta macajurusirahi ena machichanaveana. Náurujiacahi namutu nácani machinanaveana, machinenana, mámarinaveanapuca. Émanarichuhisera ema téchahi. Ene vicaheli viti véhicanahi ema Cristo. Macarichu ema téchahavihi. Vímicatajiricacahi vicatiujiricacahivare vimutu maicha ema Viya.

²⁰⁻²² Puiti, eta éhisiraipa ema Cristo tímajicaheripa eta éhisirainihi eta nayeherepiana ena achaneana tamauriqueneana. Tacahe, vaipa ecusuapa ena ticamesajiricaheanahi te navanecahepuca: “Éhicahavi eta viyeherepiana tayeha eta vinisiraya, apaesa ejapanucare eta me Viya”. Machu navayuac-ahé ena nani, taicha tamutu eta juca nayeherepianahi, tájina vahi étapa-racaina tayeha eta viyapiraina te anuma. Eta juca nayeherepianahi, tásiaqueneanachucha te nachuti ena náchucanaveanaini. ²³ Eta juca

nayeherepiana cútirinehi yátupiquenénahini tásihaqueñenahini eta me Viya. Tásihasera vahi táimanaca. Ichape tayeréhi eta máechajiruvana. Ena nani, tímijachavanahí nacurisamurechahi ema Viya. Tépiyacavanaripahi mánsuanahí eta náichirahí eta muraca penitencia. Téstacavanapa náijararecaripa eta naeche tayehe eta tacatiquene. Tamapurujihisera eta náichirahí, náviraichuhí náichahí eta tajamuraraivahi eta náqueheana.

3

Tihapasamurerecaheyare eta vivarairayare véhica eta máurivahi ema Cristo

¹⁻² Puítisera arairupa eta ítaresira maicha ema Cristo. Étainapa tihapasamurerecaheyare eta máurivahi éma étapa eta ítecapauchira éma tayehe eta anuma máejasihahi te mavaire ema Maiya. Vaipa étaimahi tihapasamurerecaheyare eta eyeherepianainihi tamauriqueneanaini. ³ Taicha íjararuvaipa eta ínajisi-rayare eta júcana. Puiti ticaitarecaheripa éma táchavenehi eta iávahásiraipa ema Jesucristo. Iúricahi puiti. Vuíchahasera ímahahini tamutu eta táetaviuchiraya eta iúricacarevaya. ⁴ Téhesera te machava ema Viáquenu Jesucristo, máitsivachainapa eta iáqueheanayare, tajarahiqueneanayare. Tásiba, ecachanenapaipa éma. Tétavicavaya eta viúricacarevaya vimutu máicha.

Vínajicayare eta viyeherepini eta viásinequene

⁵ Tásiba puiti, ínajicainapa eta eyeherepianaini tamauriqueneanahí. Nacuijapa nacuveha esu apána esena. Vaipa ecupanerecha eta panererucana tamauriqueneana. Vaipa ecujamuracha icha eta tamauriqueneanahí. Vaipa tihapapiricahemahi eta ecaimahaquenéraina, taicha ena titanucanahí eta juca, nacutihi nácani ticasíñarajiana. ⁶ Ena masuapajirairahana, náichahí tamutu eta juca tamauriqueneana. Étapa tímicuñacayarehi éna, taicha támimiyusemacaichucha ema Viya. ⁷ Éti apanavare étainichuhivare iávacuhainihi cape juca iásinequenehi.

⁸ Puítisera ínjica tamutu eta júcana: esemarajivana, ecatianaraivana, evainarajivana, iúmeharaivana, étapa eta táiñemahiqueneana eta échajiruvana. ⁹ Vahi ecuépiyaequenehacáca. Ímereuchava yátupina eta ínajisirahí tamutu eta eyeherepianaini cape juca ítaresirainihi. ¹⁰ Puíticha, amairiharipahi arairupa eta juca ítaresirahí, machichaheripa ema Viya. Tajurucapaipaini eta ecutirayare éma eta masantuvali étapa eta máurivahi éma. ¹¹ Tayanapane apavasananajihavihi viti véhicanahí ema Viáquenu, émasera tihetamurichahaviripa viti israelítana, étipa eti apavasanana, énapa ena máicachasianana. Te mamirahu ema Cristo, vaipa apavasananajihavinahini, étanarinepa eta vímahí maicha éma. Tayanapane tajina emarcainahini te iáqueheana. Váhisera ticachuriacaheanaimahi ena ticamarcanahí. Tayanapanevare ecaquenuhipuca. Váhivaresera vicachuriacahemahi viti libleanahí. Ema Cristo tiávahácahavíhi vimutu.

Vicaravahuinapa tiúriyare eta vítaresira

¹² Ema Viya tétavicavahi eta máemunasirahéhi. Eta tacahe, tinerejicahehi eti machaneranayarehi éma, ecutipaipa éma, eta masantuvali. Eta tacahe, puiti étijiváinapa ecaravahuyare eta táurivayare eta ítaresirayare. Étaviuchayare eta ejapanuraivaya, émunarahiyareva. Ímerecaya eta emansuvayare. Ecamicha tamutu. ¹³ Te tatarihinapuca eta náejecapiravaina ena echamuriana eta eyehe, vahi ecucaticha, ácayehhevare paciencia. Eperdonachacacayare, ecutiyare ema Cristo eta maperdonachirahéhi éti. ¹⁴ Tamutu eta juca

numetaruheanahi, ítauchayare. Énerichuvare tiápajucavayare eta émunarai-vayare. Taicha te vémunajiricacahi, tétavicavayarehi eta viúricacarevaya eta viúrujíasiracacahi. ¹⁵ Vahi ecuemepurureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahéhi eta máichuirahéhi, mavarahahi étanayaréichuhi eta epanereruana eta iúrujiasiracacahi. Ehasulupayachahivaréni tamutu sácheana.

¹⁶ Étaviuchahini eta iúnasiráina te esamureana eta máechajiriruvana ema Cristo. Étumechacacahini eta ímitusiracacaya eta échemaráivayare. Evapinavahini te esamureana eta ejiraira te iúrujisiravana. Ejirayare eta mājirahuana ema Viya, eta ehasulupayachirayarehi éma. ¹⁷ Tamutu jácani ecaematanerana, échajirisiravana, ímereuchava eta machaneraheirahi ema Viáquenu Jesucristo, iámirapaipa eta māijare. Te tamutu eta jácani íchararacavana, ehasulupayachayarehi ema Tata Vicaiyaquene.

Vímerecayare eta viúriva nayehe ena vichamuriana

¹⁸ Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu. ¹⁹ Éti apanavare eti náimanaveanahi, émunacayare ena eyenana. Vahi ecuímipanajanajica éna. ²⁰ Éti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te ítaucha eta juca, ecurisamurechayare ema Viya. ²¹ Énerichuva eti náiyana, vahi ecuímiyusémaraca ena echichanaveana apaesa vahi nacuipuñacava eta eyehe.

²² Étiripa eti ecaquenurecanahi, esuapajirahiyare nayehe ena iáquenuanahi. Ítauchayare eta navanairipianahi. Tátupiruva te esamureana eta ecaematanerana. Vahi tácarichuimahi ítaurahiyare te natarihi te echacaya ena iáquenuanahi. Te nájinahipuca, tacutiyarerichu eta ecaematanerayare. Taicha ema Viya tímararacahehi. Éma epicauchayarehi. ²³ Evapinavayare icha eta evanecasivanahi nayehe ena iáquenuana, támicutijiricavahi émainahini ecaemataneca ema Viáquenu. ²⁴ Taicha eti manusurahehivare ema Cristo, ema tiápajucavahi iáquenupanahi. Écharichuhi éti eta tatarihirahi eta ícuchihi íjaracasiyarehi eta mayehe. ²⁵ Énasera ena téjecapavanapuca, maimararacahi ema Viya eta náejecapiravanahi. Étánapa tímicuñacayarehi. Nájina mamunanequeneanaimahi.

4

¹ Éti apanavare eti náquenuanahi ena músuana, tiúriyareva eta ecavanairipiraya, vahi ecuímipanajanajicavaca. Ítauchayare íjaraca eta nacamunuque-neanahi. Échavayare éti apanavare eta maimararasirahehi ema Viya, émahi Iáquenuquenehi.

Eta téqueneha matuparasirahavihi ema Pablo viti vélhicanahi ema Viáquenu

² Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya. ³ Énerichuvare ímicatacavahi eyujarauchahavi, apaesa vítujicavapaini viúchucuha, vímiyanavapaini vímimaticahini ena achaneana eta juca tayumururevainihi mayehe ema Cristo. Étavenehi puiti présunuhi táicha.

⁴ Nécatiacahecha ímicatacanu eyujarauchanu apaesa nítujicava nucame-tarairu, taicha nutuparahaichuhi me Viya.

5-6 Táuri eta ítaresiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta ejicapiraina te natariihinapuca nácani tiyaserecaheanayare. Ecamapuravachaha puiti juca sácheana eta ímitusiravacahi.

Eta táicheckuaraqui eta máechajiruva ema Pablo

7 Máimahaherinesera ema vémunaruquenehi vichamuri Tíquico. Éma, titametacaheyare tamutu eta níchararacavahi núti taicha éma nucachanehi eta te juca návihahi. Tétavicavahi eta máimicatasiranuhi eta vicaemata-neasirahi me Viáquenu. **8** Eta tacahe, névatacahi máiteca eta ara eyehe. Éma timetacaheyare eta víchararacavahi. Énerichuvare tétumechaheyare éti apanava. **9** Énerichuhivare névatacahi ema Onésimo némunaruquenehivre. Éma, tiásihahi eta ara eyehe. Puiti émarichuhi vichamurihi eta te juca. Tétavicavahi eta máitauraivahi eta macaemataneasirahi ema Viáquenu. Ena nani apinana, éna titametacaheanayare eta víchararacavahi víti te juca viávihahi.

10 Téchajicahe ema Aristarco, ema nucutiquenehi eta nucaeratairahi. Téchajicahevare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahepa, tiúriyare eta ejacapirayare éma. **11** Énerichuvare téchajicahe ema Jesús Justo. Nacarichuhi ena nani mapanana nujaneananahi israelítana tímicatacanuanahi. Nacachuricahi ena apamuriana nujaneanana vichamurianahi. Ichape eta náimicatasiranuhi eta vicametarairuira ema Viya. Ichape eta nacurisamurechiranuhi éna.

12 Téchajicahevare ema Epafras, ema eyehe pastor. Ema maca, yátupiquenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímiyanavahini étumechava yátupinahini ítauchahini eta mavarahaqueneana ema Viya. **13** Ichapemurihi eta nímararasirahi núti ema Epafras eta máecharairisiráhehi éti, énapa ena ticavasanahi te avasareana Laodicea étapa Hierápolis. **14** Énerichuhivare téchajicahe ema médico Lucas, ema vémunaruquenehivre. Téchajicahevare ema Demas.

15-16 Tacahe, te támputupa eta échajicuirayare eta juca nucartane, ímiamarecaya nayehe ena apamuriana vichamurianahi ticavasanahi te avasare Laodicea. Nuvarahavare échajisinanuini éna. Échajisinanuvare ema Nífas, énapa namutu ena tiúrijicavarahianahi te mapena. Nímiamarécahivareséra eta nucartane nayeheyare namutu éna. Te táitecapauchahe, échajicuhayarevare éti apanava. **17** Piti apanavare piti Arquipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

18 Nuti Pablo nútiquenepa nájucha eta juca táicheckuaraquihi eta nucartane tayehe eta némechajirisirahehi. Nutuparacahe vahi ecuemitisicanu te eyujarasirana. Eyaseasinanu eta núcucuirávanéna.

Nuyaseucheparaca me Viáquenu Jesucristo, táetaviuchahini eta iúricacrevaya máicha.

Tamutupa eta juca néchajiruvahí e yehe.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare

1 TESALONISENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epaneruruana.

Ema Pablo tiúrisamure eta máechirahi náimiyaniravahi náehisirahi ema Cristo

² Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya. ³ Taicha tamutu sácheana vécharairaheparaca eta ímeresirahi eta esuapirahi éhisirahi ema Viáquenu Jesucristo, étapa eta epamisiravahi ecaematanecahi yátupi táichavene eta émunasirahi éma, étapa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta íchararacavana.

⁴ Nuparapenaveana, éti, máemunaruuanaripa ema Viya. Véchahi eta manerejisirahehi éma.

⁵ Taicha te vímitucahepa eta máechajiriruva ema Viya tayehe eta viúchucuiraya, éti etupiruvahi ejacapa eta vimetarairuana taicha ímatihí yátupiquenérahi mayehe ema Viya. Ema Espíritu Santo tinacasamurechahehi eta táurivahi esama eta vímitusirahehi. Ímatihavihi eta mavanesirahavihi ema Viya. Ímahahivare eta viúrivahi eyehe.

⁶ Jéhesare puiti, étijivapa eta épaniravahi éhicahavi eta viúrivahi víti, vicutiyare eta máuriva ema Viáquenu. Ecátajivanúmahi ichape taicha eta ejacapirahi eta vimetarapiana. Iúrisamurehiséra maicha ema Espíritu Santo. ⁷ Tacahe, ena apamuriana vichamuriana ticavasanahi te tinapaica eta Macedonia étapa te Acaya, eta náimairahi eta yátupirahi eta esuapirahi, étarichuhi náehicahi éna.

⁸ Éti ímisamahi eta máechajiriruva ema Viya namutu ena achaneana ticavasanahi te Macedonia étapa te Acaya. Téchacarehivare te tamutu avasareana te jácani vítecapihapahi eta juca yátupirahi esuapa ema Viya. Vaipa tácamesahini vimetataracavacahini éna eta esuapajiraivahi éti. ⁹ Timetacahavianaphivare eta etupiruvairahi ejacapa eta vimetarapiana, étapa eta ínajisiraipa eta esiñarajianaini, équesiravarípa eta ecaijuherapa yátupi ema Viya. Puíticha tépanavaripa eta ecaematanneasirahi éma. Éma, yátupiquenéhi Viya. Yátupiquenéhivare eta masamaraiiva. ¹⁰ Énerichuvare timetacahavianaphivare eta machaviraya ema Machicha ema Viya másihairaya te anuma, ema maca Jesús émarichu ema macaechepucasiquenéhi te máecari maicha ema Maiya. Émara ticatiuchahavyare tayehe eta ecuñaraqui náicuchihi ena masuapajirairahana.

2

Eta máematanerepihi ema Pablo nayehe ena ticavasanahi te Tesalónica

* ^{1:1} Ema Silas, eta máijarequene Silvano te náechajiriruva ena romanoana.

¹⁻² Écharichuhi eti nuparapenaveana, tamutu eta náichirahavihi ena achaneana, tímicuñacahavianahi ánaqui te avasare Filipos. Váhisera vácatsimavahini te vítecapauchachahepa ani, vímiyanavaríchucha vicametarairu taicha téturechahávirichucha ema Viya eta vímitusirahehi eta máechajiriruva, camurianahineni ena tictacianacahavianapahi. Váhisera támapurujihíni eta véjirairahehi. Éti etupiruvahi ejacapa eta vimetarairuanahi. ³ Taicha vahi véjecapavahini eta vímitusirahehi. Váhivare étainahini vipanerechaphahini eta tájiparacana tamauriqueneana, váhivare vivayuaraquina eta véchajisirapahi. ⁴ Víti manerejiruhavihi ema Viya taicha máechahi eta vítauchirayarehi eta vituparacásivayarehi mayehe. Eta tacahe, tituparacahavihi muraca viámayare eta máechajiriruva nayehe ena achaneana eta náuchucuiraina. Étapaichuhi eta juca véchajiriruvanapahi. Vahi étina vivaraha táememunacahávihini nayehe ena achaneana. Vítouchahí eta mavarahaqueneana ema Viya eta vicurisamurechihahi éma, taicha éma, máimararacahi eta visamureana. ⁵ Écharichuhi éti eta vicayemaqueneanapahi, vahi vémeterajircavapahini eyehe. Váhivare étina vétseraruinapahini vivereacahehini eta eplatane. Vitupiruvapahi eta vicayemaquenehi te mamirahu ema Viya. ⁶ Vahi vápanerechahini náetserajicahavihini ena achaneana, étiripa, viratahahineni vímereca eta vituparahaquenehi mayehe ema Viáquenu Jesucristo. Váhisera vávarahahini vímerecava vácutihini mácani achane ticamusura. ⁷ Véchapajirícahehiséra tacutihi eta suéchapajirisira suémunasira súcani esena ena suchichanaveana. ⁸ Ichape eta vémunasirahehi. Vímitucahehi eta máechajiriruva ema Viya eta iúchucuiraya. Víjaracavahi ichape te visamureana, vivarairahi esuapa éti apanava, taicha vémunacahehi. ⁹ Nuparapenaveana, te vinasiqeneripa eta eyehe, eta vicametarairuirahi eta máechajiriruva ema Viya, ímararacahavirichuhi éti eta vicaematanerahí muraca eta vítatijirisiravahi. Tamutuhi sácheana, yátiana vicaematanehi, taicha vahi vávarahahini vétsepanáracahahahehíni eta vinicaquenerepi.

¹⁰ Éti enecapaequenehahi tamutu eta víchararacavahi. Tímararacahávihivare ema Viya. Vitupiruvahi yátupi eta viúrivahi eta eyehe eti vichamurianahi. Tájina naviyahini nayunaca ena apamuriana achaneana. ¹¹ Énerichuvare échahi eta vétumechirahehi, émanapachuhi viconsejacha vicutihi mácani achane tiuri eta maconsejachira ema machicha. ¹² Vécatiacahehi ichape eta iúrvaina éti, ímerekaya eta macáchichairaherípa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te távihihi eta majaraiva.

¹³ Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasi-rahehi taicha eta esamirahi yátupiquenehi, tásishaquenehi ema Viya. Ímativanehi vahi vipanereruinchuchaini víti, émainapucaini mácani apana achane. Eta juca eta tiúrichahehi eti esuapanahi. ¹⁴ Énerichuvare tiúrihi eta ecamichirahí eta ecatajivairahi nacatianasirahehi ena ejaneanana, ecutihi ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneanananarichu israelítana, táichavene eta náehisirahi ema Viáquenu Jesucristo. ¹⁵ Ena nani nujaneanana nacapacahi ema Viáquenu Jesucristo nacutihu ena náchucanaveánaini eta nacapasiravacahi apaicape ena profetanaini. Tipanajiricahavianavare víti. Ena nani náimiyusemacahi ema Viya. Váhivare návaraha nasamahini ena apamuriana achaneana eta máechajiriruva ema Viya. ¹⁶ Taicha te vivara-

hainipa vímitucavaca ena apavasanana apaesa náuchuhahini éna apanava, nacatichavare ena nujaneanana eta vímitucavaca éna. Tíchejimiráuchahavianapa. Eta tiviuchahi, tivayuchavapaichucha eta natapiravana. Ema Viya vaipa macamichahini eta náejecapirávana. Puítisera táitecapáuchainapa eta náicuñaya máicha.

Ema Pablo mavaraha tiápechava máejiravaca ena machamuriana

¹⁷ Nuparapenaveana, tayanapane viyerehicacahi puiti juca cájeana, vahi vímahacacahini, tanasihisera vicaimairuhehi te viúquihana. Vivarahaine víjahúchavahini vítecapauchahe vímahahehini. ¹⁸ Nútiripa nuti Pablo, ichape-murihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucalahávichuchapúca jácani. ¹⁹⁻²⁰ Véñamavahi víti eta eyehe taicha vivarahahi tánasihíni eta iúriva eta machimapiraheya eta machaviraya ema Viáquenu Jesucristo. Tásiha, viti vicuchapavainapa eta vijacapirayare eta vícuchihi mayehe éma. Viúrisamu-rénapa víti te jena sache, íchavenehi éti.

3

¹⁻² Eta tayerevaipahi eta vimaimanasirahehi, téavicavahi eta véñamiravahi eta eyehe. Vaipa viúrisamurehini. Vivarahaiipaicha vecha tájahapuca eta ícharacavahi. Tásiha, vapanerechapa vévataca ema vichamuri Timoteo, máiteca máimahapanaha. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vicutiquenehi eta vicaematanerahi tayehe eta máechajiriruva ema Viáquenu Jesucristo. Nuvanecahi tímicatapanáheyare témuracacháheyare eta esuapajiraivaina, ³ apaesa nacuija nacuchavacuejechava tayehe eta ecatajivairana naicha ena tictorianarahiana. Écharichuhi éti eta vicatajivairaya táichavene eta véhisirahi ema Jesucristo. ⁴ Váhisera táramicare eta juca, taicha vimetacahévanehi te vinasiquenerichaha eta eyehe, eta vicatajivairayarehi. Jéhesaréinehi títauchavahi puítiripa, ímaharipahi éti. ⁵ Eta tacahe, téavicavahi eta néñamiravahi núti eta eyehe. Vaipa núrisamurehini íchavenehi éti. Tacahe, nuvanecapa ema Timoteo máimahapanáhe te enasirichuhipuca eta éhisirahi ema Jesús. Taicha nímicauyayahehi máquipaicahehíni ema Satanás, támapurujihini eta vicaematanearasíraipa ema Viya.

⁶ Puítisera eta machaviraipa ema Timoteo, másihirahi eta ara eyehe, timetacahavipa tájinairahi íchiravainahini eta éhisirahi ema Viáquenu Jesucristo, étapa eta émunasiracacahi. Timetacahavivare eta écharairisirahávihi émunasirahavihi víti, evarairahi íjahúchavahini ímahahavi. Vicuticacahi eta vivairahi vímahahe víti. ⁷⁻⁸ Eta tacahe, nuparapenaveana, vécharaháinehi eta visamairirisirahehi eta táurivahi eta éhisirahi ema Viáquenu. Tacamitiacarine eta véñamiravahi. Étumehahavirinehi eta vicatajivairana. Tichavarinehi eta viúrisamureva. ⁹ ¡Ichape eta vihasulupayachirahi ema Viya táichavenehi eta iúrivahl! ¡Tájinarine tacutihini eta viúrisamurevahí mayehe ema Viya, íchavenehi éti! ¹⁰ Tamutu sácheana, yátiana, viyujaracahi mayehe ema Viya, viyaseacahi vítujisirávainahíni viápechava vímahahe. Vímitucahehini eta apamuriana titucacareana tayehe eta juca véhisirahi ema Jesús. Támutuhini ítuca.

¹¹ Eta tacahe, viyaseacahi ema Tata Vicaiyaquene émapa ema Viáquenu Jesucristo náijaracahavihini eta vítujisiraváina víteca véjirapanáhe. ¹² Énerichuvare macajurucahini ichape ema Viya eta émunaraivaina nayehe ena

echamuriana, énapa ena apamuriana achaneana, tacuteihini eta vémunasisrahehi víti. ¹³ Máijaracahéni táurivaina eta esamureana tacuija etapiravaina, máepachinachahini eta iáchanevana apaesa ecurisamurecha ema Tata Vicaiyaquene te jena sácheyare machaviraya ema Viáquenu Jesucristo, másihairaya te anuma, mámirayarepahi ena apamuriana manerejiruanahi.

4

Mavaraha ema Viya táuri eta vítaresiraina

¹ Tiuri puiti, nuprapenaveana, vituparacahecha muraca te máijare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti iápajupanaváinapáipa eta iúrivaya. ² Ítucaripahi eta juca ímitucasivanahi viyehe. Étarichuhi vivanecasivanahi mayehe ema Viáquenu Jesucristo.

³ Taicha eta juca mavarahaquenehi ema Viya, tiápajucavayare eta iávhásirahi éma. Vaipa ecuquicha eta pecatuana. Nacuijapa nacuveha súcani apana esena. Ésuripa esu esena, vahi sucuveha ema apana achane. Énaripa ena echichanaveana, tacuija eta natuhusivaina. ⁴ Nacuchapa eta náitauchiraváina yátupina te mamirahu ema Viya. Emutu éti, yátupina eta émunasiraina ena eyenanaveana. Tauri eta ítaresiraina te epenana. ⁵ Vahi ecucutipa ena ajairana esenamareana. (Éna náichahi eta juca taicha eta namaimatirahi ema Viya.) ⁶ Nacuija nacuveha esu mayena ema mácani echamuri. Taicha ema Viya, yátupi eta máicuñasirayare nácani ena tíchanahi eta juca. Étarichuhi eta vímiturapianahi eyehe cape juca te vítecainapa eta ara eyehe. ⁷ Taicha víti máichuhaqueneánaripa ema Viya, mavaraha tiúrinayare eta vítaresiraya, vaipa víchaimahi eta juca tamauriqueneana. ⁸ Tacache, ema mácani tépuruhi eta juca vímiturapianahi, máepuruhibare ema Viya; taicha mavanairipianahi eta juca, vimetacasivahi víti mayehe ema Espíritu Santo, eta mávahásirahavihi.

⁹ Puiti numetacahe núti: Tájinapa vaipa néñamava eta eyehe eta émunasiracahi, taicha ema Viya tíjaracaheripa eta émunasiracahi. ¹⁰ Vaipa néñamavahini taicha nusamairiricaheipa eta émunaraivahi nayehe ena echamuriana títecapauchaheanahi tiásihanahi tayehe eta táunavanahi eta iávasa Macedonia. Nuprapenaveana, puiti vituparacahecha iápajucavayare éti eta émunaraivaya. ¹¹ Énerichuva viápechava vituparacahe tauri eta ítaresiraina. Échapajirica eta émataneana. Ecaemataneacava yátupina, eviyihayare eta ecamunuqueneana tásihaqueneánayare te evahuana, ¹² apaesa tacuija ecucamunu te epenana. Te ítaucha eta juca, tipicauchaheanayare ena apamuriana achaneana.

Vahi téñamavacareana ena vichamurianaini náepenaqueneana taicha tiápechavanayare titarecanayare

¹³ Nuprapenaveana, énerichuvare vivaraha vimetacahe eta náichararacavayare ena vichamuriana náepenaqueneanaripa. Vahi ecucatisamureva nayehe. Ena apamuriana achaneana ticatisamurevanapa te náecarapaná ena náepenaqueneana, taicha vahi nácasíñavahini me Viya, nacunevahini eta nápechiravaya téchepucana te náecari. Vahi ecucahe éti. ¹⁴ Víti visuapahi eta máechepusirahi ema Jesús te taequenepa eta máepenirahi. Tásiha, visuapahivare eta macaechepusirahaviya ema Viya te vépenapa, vicáchanénapa ema Jesús viti vécicanahi éma. ¹⁵ Eta tacahe, vimetacahe eta juca vímitucasívanahi mayehe ema Viya. Te machavapa ema Viáquenu Jesús, te vuíchahapuca vicuepenahi víti, vahi vicainapucavaimahi nayehe ena náepenaqueneana.

16 Taicha émarichu ema Viáquenu tiúcupaicaya tichavayare, tiásihaya te anuma. Tipiaracaya muraca tíchuarecaya. Ema Arcángel énerichuvare tipiaracayareva. Ticaemayareva eta machuja ema Viya. Tacahe, téchepucanainapa tínapucanaya ena náepenaqueneana ena tisuapajirahianahi mayehe ema Cristo. **17** Tacahe, viti vitareruanaichaha viyanainapa. Vimutu vicáchanénapa ena náepenaqueneánaini. Viácapajicáinapa ema Viáquenu te anuquehe te távihahi eta úcaji. Tásiba, máichecuaraquireyare eta vicachaneraya ema Viáquenu. **18** Eta tacahe, emetajiricacayare nayehe ena echamuriana tamutu eta juca vímiturapianahi, apaesa nacurisamurechavaya éna apanava.

5

Tíramicareyarechucha eta machaviraya ema Viáquenu

1-2 Nuparapenaveana, vahi ecuemitisicava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacutiyare mácani tiámereca te yati, nájina tinecapaina. Ene tacaheyare eta máitesirayare ema Viáquenu. Váhisera vécha tájamuhuyarepuca. **3** Énaripa ena achaneana vuíchaha náemeteacaimahi eta tánehiraripa eta máitecapiraya. “Viúririchucha puiti. Tájina víchiravaimahi” nacaheyare éna. Vahi tinecapauchavanaimahi eta táitecapauchiraya eta náicuñayare tacutiyare esu súcami esena ticajari, tijahúchavapa ticati eta sujuhe eta suínasiraya. Ene nacaheyare éna. Tájina najunaiyaimahi. **4** Étisera, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya. **5** Taicha viti viávihahi te majaraivahi ema Viya, viti vipaicahi te sáchemuhu. Vahi táïñehavina eta yati, taicha vínjicaipa eta tamapicuquene. **6** Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahí tímamacarácavana, tájina náechaquenena éna. Vítisera vijaneacavaya tamutu sácheana, yátiana. Tájina víchiraváimahi. **7** Ena achaneana, tímamacarácavanahí te yátiana, ena apamuriana ticávahaháracavánahi te yátiana. Vahi najaneacavahini éna. **8** Vítisera tamutu sácheana vicunevayare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanovahini eta vémunasiracacaina. Vácasíñavahini eta macuchucuirahaviya éma. Tájina vahi vicuyacujiequenehava eta vicuchapiraya eta jena sache. **9** Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñaimahi. **10** Ema Jesucristo tépenahi te crusu vítivenehi, mavarairahi vítarecayare vicachaneyare éma. Te máitecapa éma, macaechepucainapa ena náepenaqueneana vichamurianaini. Tásiba, viti vitareruanaichaha tihetamurichahavinapa, taicha mavarahahi vicachaneyare éma. **11** Eta tacahe, étumechacaca, ecatiacacavare. Núti nucasiñavahi eta eyehe eta íchirapaipa puiti eta juca.

Ema Pablo tímyanava eta maconsejachiravaca ena machamuriana

12 Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya. **13** Échapajiricavacaya éna. Émunasinávaicha, taicha éna tiúrihi eta náimicatasirahehi. Tacuija ecuichiravaina éti eta nayehe.

14 Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaematananeana. Énerichuvare étumechavaca ena tiyacujiririhana. Ena nani tínanájiricavanahí, muracaina eta ímitusiraina. Ecayeheyaresera paciencia nayehe namutu.

¹⁵ Échapavayare. Tijuricati natarihína navaraha titupiacaheana, vahi ecujicapa. Váhivare ecuitsicava. Ímerecayaresera eta iúrivaya nayehe ena echamuriana, énapa namutu ena apamuriana achaneana.

¹⁶ Iúrisamurerecaya tamutu sácheana. ¹⁷ Vahi ecucainajiruva eta eyujara-sirana mayehe ema Viya. ¹⁸ Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

¹⁹ Váhivare ecuemepurureca eta mavarahaqueneanahi maicha ema Espíritu Santo eta eyehe. ²⁰ Te esama nácani téchajisihanahi ema Viya, vahi ecuepuru. ²¹ Vahi ecuemunanasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueneana. ²² Téhesera vahi tiúrihi, vahi ecuisapava, taicha eta tamauriqueneanahi.

²³ Tiuri puiti, máijaracahéni ema Viya táurivaina eta epanereruana. Yátupi-nahini tacuijahini ecuichiravaina eta iávahásirahi éma. Majaneasinahehini eta iáchanvana, eta iáqueheana. Tacuija eta etapiravainahini te machavapa ema Viáquenu Jesucristo. ²⁴ Taicha éti máichuhahuqueneanahi éma. Yátupi eta macasiñacarevahi. Máitauchayareva tamutu eta juca.

Eta téqueneha matuparaha ema Pablo

²⁵ Nuparapenaveana, ímicatacahavi eyujarauchahavi me Viya.

²⁶ Échajisinahavi namutu ena vichamuriana.

²⁷ Nutuparacahe te máijare ema Viáquenu échajicuha eta juca vicartane te namuri ena vichamuriana apaesa námutu nasama.

²⁸ Nuyaseachaheparaca me Viáquenu Jesucristo táetaviuchahíni eta iúrica-carevaya máicha.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare

2 TESALONICENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. ² Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epaneruiana.

Ema Viya máicuñacayare ena ticapecaturarahiana te táitecapapa eta machaviraya ema Cristo

³ Nuparapenaveana, tatuparaca vihasulupayachaparaca ema Viya, taicha visamairiricahi eta tápajusiravapaipaicha eta esuapirohi ema Viya. Tajurusirapaipahi eta émunasiracacairahi. Eta tacahe, vihasulupayachaparacahi ema Viya. ⁴ Tájinarine tacuti eta vicajamurairahehi nayehe ena vichamuriana te viúrujisirávana te jácani vítecapihapahi. Vimetcavacapahi eta táimiyanirávali eta éhisirahi, ecamichirahivare tamutu eta nacatianasirahéhi ena achaneana étapa eta ecatajivairana, táichavene eta éhisirahi ema Viya. ⁵ Tímarracahehisera ema Viya eta ecamichirahí eti ecatajivairahi. Máimerecahi éma eti máuriva, máitauchirahí tamutu. Éma tijacapaheyare eti esiapirayare tayehe eti mávasa.

⁶ Máiimaháinpaséra ema Viya eti máicuñasiravacayare ena ticatianacahanahi éti, taicha macarichu éma ticatuparahahehi juésyarehi téchayarehi.

⁷ Étisera, ticanaracaheyare ema Viya eti ecatajivairana, vicuticacainapa eti vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sácheyare, mámayarepahi ema mayeheana ángeleana, tíñehianainapáipa máicha. Tacutinapaipa eti ichapequene yucu eti máucupaisirayare. ⁸ Eta tímitecayare éma, máicuñacayare ena váhiquene návarahahini náimati ema Viya, váhivare návarahahini nasuapa eti máechajiriruva. ⁹ Ena nani máehicarahanahi ema Viáquenu Jesucristo, ticaquijianainapa eti te infierno. Váhivare nacamichahini náimarraraca eti mamira taicha táetaviuchahi eti máiñehivahi. Tájina náuchucuiraimahi. ¹⁰ Te jena sácheyare te máitecapapa ema Viáquenu, viáramimícainapa ichape eti mayehe vimutu viti manerejiruanahi. Tétavicavaya eti vicunachirainapa éma. (Éti apanava etiarihiyarehi, taicha esuapahi eti vímiturapianahi.)

¹¹ Eta tacahe, tamutu sácheana te viyujarasirana, viyaseuchahéhi me Viya eti ímyaniravaina eti iúriva, taicha éti íchuarecasivahi eti mayehe. Énerichuvare viyaseuchahéhi me Viya eti máijarasirahéna eti ítupajijiásiraváina tayehe eti juca ématanerepihi táichavenénahí eti esuapajiraivahi. Eta juca, ichape tacurisamurecha ema Viya. ¹² Tásiba, ena apamuriana achaneana nacunachayare ema Viáquenu Jesucristo táichavenéhi eti náimairahi eti íchirahi éti eti táuriqueneana. Énerichuvare, éti ecunachacarénapa me Viya, taicha tétabicavahí eti máemunasirahéhi, émapa ema Viáquenu Jesucristo.

* ^{1:1} Ema Silas, eti máijarequene Silvano te náechajiriruva ena romanoana.

2

Ema Achane Váinarajiquene

¹⁻⁴ Puítiripa, nuparapenaveana, naririhi ena tépiyaequenehanaripa ema Jesús, náimijacharipa matiarihiripa, tichavaripa puiti. Vituparacahecha vahi ecusuapa nácani tépiyahirahianapahi. Tayanapané nácahepuca: “Eta juca vimetacasivahi me Espíritu Santo”. Nácahepuca: “Ema Pablo tímitucayahavihi eta juca”. Te náepiyaequenehahavipuca náimechahepuca eta carta, náimijachayarehi tásichaquene viyehe, váhiquenesera ecusuapavane. Váhi tacuimpinererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare viti manerejiruanahi.

Nuvaraha numetacahe eta apaña. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásicha, tímerecaváinapa ema Achane Váinarajiquene. Ema maca achane, macatichainapa masama eta máijare ema Viya. Étaripa eta nasiñarajiana ena achaneana, váipavare máuricaimahi. Macavanairipinapa ena achaneana te tamutu avasareana náepuyumirauchayare éma. “Nuti Víyanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támputupa, yátupiquenenapa eta máicuñayare muraca.

⁵ Échavarichuhi éti eta nímitusiraheparacahi cape juca te návihaichahahi eyehe. Numetacahehi eta táchararacavayarehi. ⁶⁻⁷ Puiti ena achaneana, nararihipa tivainarajichavanapaipahi. Vuíchahasera másapahini ema Viya navayuchavahini. Mararihi ema mavaneruhi tíchejimiráuchavacaríchaha. Eta tacahe, vuíchaha máuchujicahíni máimerecavahíni ema Achane Váinarajiquene. (Éti Ímatichuhi ema tíchejimiráurucahi.) Tacahe, ema Viya másapainapa térajicava ema tíchejimiráurucahi. ⁸⁻¹⁰ Tásicha, mapenumavainapa tímerecavayare ema Achane Váinarajiquene. Tuparairucayare mayehe ema Satanás. Éma, tijaracayarehi eta máitupajijiásiravayarehi. Tamutuyare máimereca eta tiáramicareana tacutiyare yátupiquenénahíni mayehénahíni ema Viya. Ema maca, máetaviuchainapa eta mavayuaraiva nayehe ena achaneana. Éna, tísapavanainapaipa náehica eta táiñehiqueneana mavayuaraquianapahi. Váhisera máyerémahi. Tiúcupaicavanénapa ema Viáquenu Jesús. Tiáramicarénapa eta majaraivayarepahi. Te máchajurapa, máquipaicainapa macapacainavarepa ema Achane Váinarajiquenéni. Tacahe, ena nani achaneana máiturevanahí témitequenehanainapa. Ticaicuñanainapa taicha vahi návarahahini náehica eta yátupiqueneana tiúriana echájirirucavana. Te nasuapahini, tiúchucuhanahini tayehe eta ecuñaraqui. ¹¹ Taicha eta namasuapirahi ema Viya, másapayarehi ena nani achaneana nasuapa eta mavayuaraquiana ema Achane Váinarajiquene. ¹² Tacahe, namutuyare ticaicuñanayare éna, taicha vahi návarahahini nasuapa eta yátupiqueneana vímiturapiana. Navapinaichucha eta náichiraya eta tamauriqueñeána.

Tiúchucuhanayare ena téhicanahi ema Viya taicha manerejiruanahi

¹³⁻¹⁴ Étisera, nuparapenaveana, máemunaruuanahi ema Viya. Víti tatuparaca vihásulupayachaparácayare ema Viya íchavenehi éti, taicha manerejiruhéhi ema Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichuirahéhi éma. Éma ticuchucuhahheyare taicha ímiyanavahi esuapa eta yátupiqueneana máimiturapiana ema Cristo. Émapa ema Espíritu Santo máimiyana ema mávahásirahehi,

máijaracahe eta esantuvainapaipaicha puiti juca ecaijuheyare. Tásiba, ítujicavainapa esiapa tayehe eta mávihahi ema Viáquenu Jesucristo, ímahainapa eta majaiva.

¹⁵ Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étapa eta juca véchajiriruvanahi te carta, vémevataruanahi eyehe.

¹⁶ Nuparapenaveana, tétavicavahi eta máemunasirahavihi ema Viáquenu Jesucristo, émapa ema Tata Vicaiyaquene. Tayanapane vahi viúrihíni, énasera navarahahiciurisamurechahavianaya. Tásiba, vicunnevainapa eta viúricacrevaya, máichecuaraquirénapa náicha. ¹⁷ Puiti nuvaraha esamavaini éti eta nacurisamurechirahe te esamureana. Náetumechavaréni eta ímiyaniravaya icha eta táuriqueuneana, táurihivaréni eta échajirisiravana.

3

Ema Pablo mayaseacavaca eta nayujarauchiraina me Viya

¹ Títecapa, vivaraha vituparacahe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacareváinahíni muraca nayehe ena achaneana eta vimetarairuana máechajiriruvana ema Viya, tacutihini eta esuapirávanehi éti. Táitecapauchavanehíni ena ticavasanahi te tayerehiqueneana te juca apaquehe. ² Énerichuvare, eyaseuchahavi macátiuchirahávinahíni ema Viya nayehe ena achaneana váinarajiqueneána titupiarahiana. Taicha camuriana ena masuapajirairahanahi me Viya. ³ Váhisera taeñamavacarehini eta máurivahi ema Viya eta viyehe, yátuplehi eta máitauchirahí tamutu. Tétumechaheyare éma eta ímiyanavairaya. Tijaneacaheyareva mayehe ema Váinaraji. ⁴ Víti vicasiñavahi eyehe eta esuapirahaviya tamutu eta vitupararuheanahi taicha éti éhicahi ema Viáquenu, táicha esuaparipa eta tainapureanahi vitupararuheanahi cape juca. ⁵ Maimicatacahehini ema Viya eta ímatiraina eta máemunasirahéhi. Máijaracahevaréni eta ecayera paciencia, ácutihini ema Cristo.

Tatuparaca vicaemataneyare

⁶ Nuparapenaveana, te natarihinapuca ena echamurianahi plújuana, váhipuca náesachahi ticaematanéana, te váhipuca návarahahini náetumechavahini, nasuapahini eta vímiturapianahi, vivanecahe éti te máijare ema Viáquenu Jesucristo: Vahi ecuemeñahava nayehe. ⁷ Écharichuhi éti eta etuparahahiciusiraina ítátijirícava, éhisirayarehi eta viyeherepianahi víti te viávihaichaha eta ara eyehe. Vahi plújuhávima. ⁸ Váhivare vinicairihihini te epenana. Víti vicaematanéhi muraca eta vítátijirísiravahi. Tamutu sácheana, yátiana, vicaematanéhi, taicha vahi vávarahahini vétsepanáracahéhini eta vinicaquenerepi. ⁹ Tatuparacahinéni viyaseacahéhini eta énisirahavinahíni, vivarahahisera vímechaheyarehi eta vicaemataneraivana, apaesa étainarichuhíni éhica éti. ¹⁰ Étaripa te vinasiqueneichaha eta eyehe, vivanecahehi: Vahi ecuenica mácani vahi mavarahahiciurisicahí eti natarihirahí ena echamuriana tinerejicavanahí plújuana. Vahi náesachahini ticaematanéana, tinicairihianahi. Tímiapitavairicavanapaipahi te pétiana. ¹² Étihi íchanahi eta juca, vivanecahe te máijare ema Viáquenu Jesucristo: Yátupina táuri eta ecáematanérain, eviyayare eta ecamunuqueneana. ¹³ Éti apamuriana nuparapenaveana, vahi ecuinajica eta táurivahi eta ecaematanerana. ¹⁴ Te natarihinapuca nácani vahi nacusuapa eta vivanairipianahi te juca carta, ecauneyare éna. Tásiba, emetacapa ena echamuriana vaipa nacucachane éna, apaesa nátsirihaichu ena nani eta

namasuapajiraivahi. **15** Váhisera ecucatichavaca, econsejachavacachucha taicha echamurianahi éna.

Ema Pablo mayujarauchahi ena machamuriana

16 Tiuri puiti, nuyaseacahi ema Viáquenu ema tiúrichahavirahi, máimiyanovahíni máijaracahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

17 Nuti Pablo, nútjacaruvapa nájucha eta juca táchecuaraquihi eta nucartane, apaesa ímati eta táimahihi eta nuyehe letra nuvahurupajiji.

18 Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo mayehe ema machamuri Timoteo, ticaijare **1 TIMOTEO**

¹ Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicunequenehi eta mápechiravayare tichava. ² Nímiamareca eta juca nucartane piyehé piti nuparape Timoteo. Némunacavihi tímicutijiricavahi nuchichavinahíni táichavénehi eta péhisiranuhi eta nusuapajiraivahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipaneruana.

Ema Pablo mameetaca ema Timoteo eta macunerayare ena tihapapirahiana

³ Pécharipahi eta juca numetaruvihí, te nuyanayarepa tayehe te tina-paica eta Macedonia, eta nutuparasiravihi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca. ⁴ Pécatiacaicha ena vichamurianahi, vahi nacusuapa eta echájirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchuca-naveanaini. Eta juca náechajiriruvanahi, ticauyayacarehi táemejecapavachavaca ena vichamuriana, machu nachavacuejechava táicha. Étavanerecái-nahipucáini náimicatacrahávihipucáini eta vítauchiráinahini eta véhisirahi ema Viya. ⁵ Nutuparacavihi taicha nuvarahahi náimerecaya ena vichamuriana yátupina eta náemunasiracacaina táuchurenavare te nasamureana, tapachinavarení eta napaneruana. Tacuija nacúquichiraváinahíni eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa. ⁶ Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana. ⁷ Tásicha, tépiyacavanapa náimatihi tamutu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táchajisihaqueneanahi. Ena nacahehi: “Víti véchahi tamutu”, tájinanéni náechihahíni.

⁸ Tájina táichava eta tatarihirahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava. ⁹ Taicha véchahi eta tacaemata-neasirahi eta vanairipiana eta táimitupiruchiravacaya ena ticapecatura-rahiana. Nácani achaneana tiúriana, vahi énaina tatuparaca eta vanairipianahi. Tatuparacahisera ena nácani mapicauruirahana masuapajirarahana; énapa nácani váinarajipaneruana ticapecaturarahiana; énapa nácani mapicaucharahana ema Viya, ena tictichana eta máechajiriruvána; énapa nácani téhana ena náiyana, ena náenana; énapa nácani ticipahiana; ¹⁰ énapa ena túhusiana énapa nácani ticaecahiana ena nayenana, navehapa esu apuna esena; énapa nácani tivehana ena nacutqueneanahi ajaira; énapa nácani tiámerecana achane, amaperupuca, esenapuca; énapa ena tépiyahirahiana; énapa ena tépiyaequenerahiána. Énerichuvare eta vanairipi tatuparaca ena tictichana eta táuriqueneana vímiturapiana. ¹¹ Taicha nútì nutuparacasivahi me Viya eta nímituresiraya eta táurinaqueneanahi máechajiriruvana, eta

tímicaijuhechahaviya tayehe eta táurinaquene mávasa ema Viya. Tétavicavahi eta macunachacarevahí éma.

Ema Pablo mahasulupayacha ema Jesucristo taicha eta máichuirahi

¹² Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítuchi-rayarehi eta nutuparacasivayarehi mayehe. ¹³ Éma, tituparacanuhi eta juca, ichapemurihinéni eta néjecapiravahi mayehe, tíñemahahi eta néchajiri-ruvanahi mayehe. Nupanajiricavacahi ena náinapureanahi téhicanahi éma. Tijapanunuhisera éma, vuíchahahinéni nusuapahini néhicahini éma. Taicha vahi néchahini émahnénipuca nucatianacahi, eta níchirahi ena machanerana éma. ¹⁴ Tásihasera tétavicavahi eta máemunasiranuhi ema Viáquenu Jesucristo. Ichaperinehi eta máijarasiranuhi eta nusuapirohi yátupi éma, étapa eta máijarasiranuhi eta némunaraivahi.

¹⁵ Nuvaraha námutuhini ena achaneana nasuapa eta véhiruhi taicha yátupihi eta juca vímiturapiana: Ema Viáquenu Jesucristo tímitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanavánihi eta nucapecaturaraivánihi. ¹⁶ Émasera ema Viáquenu Jesucristo tijapanunuhi, táitusiava tíchuhanuhi núti. Taicha mavarahahi máimerecayare ichape eta mayehe paciencia eta nuyehe, nuvayurevaquenénihi eta nucapecaturarávainihi. Eta tacahe, nucaicuttiarapa eta majacapirayareva namutu ena tisuapanayare, máichecuaraquirénapa eta náitaresiraya máicha.

¹⁷ Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacacahivare. Jéhevarequene éma, viyehehi Rey acanequene te tépanavainapa, étapa puiti juca vicaijuheyare. Amén.

Ema Pablo matuparacahi ema Timoteo

¹⁸ Nuchicha Timoteo, nutuparacavicha muraca eta piratahairaina picanara eta tamauriqueuneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahi ena vichamuriana mamecaruanahi ema Espíritu Santo. Vahi picuemepurureca. ¹⁹ Taicha nararihi ena ticainajiruvanapaipa, náechahinéni eta táïnehivahi eta náichaqueneanahi, váhisera návarahahini nácainajiruvahini eta tamauriqueuneanahi. Tínajicavanarichucha eta náehisrainihi ema Viya.

²⁰ Émaripa ema Himeneo émapa ema Alejandro, tacahehi eta náinajisiravahi eta náehisrainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaecahirahi ema Viya.

2

Ema Pablo máimituca eta nayujarauchiravaya

¹ Tativayaresera nutuparacahe, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana. ² Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina eta avasareana, váhini vicuimahaini eta táïnehiqueneana. Víti vímiyanovahini viúrihini te mamirahu ema Viya, vicapicahuhini nayehe ena achaneana. ³ Taicha ema Viya Macatiurahíquene máuricahi eta víchirahi víti eta júcana. ⁴ Taicha mavarahahi éma máimimatichayare namutu ena achaneana eta yátupiqueneana máechajiriruvana apaesa náuchucuha éna apanava. ⁵ Taicha májina apanainahini ticatiuchavacaina éna, macarichu

ema Tata Vicaiyaquene. Émapa ema Machicha ema achane Cristo Jesús, macarichuhi ema téchajurahi viyehe viti achaneana te mamirahu ema Tata Vicaiyaquene. Nájina apanaina téchajiúrahínahi viyehe. ⁶ Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatichayare namutu eta juca arairuhi vímiturapiana. ⁷ Eta tacahehi, manerejirunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiroina éna eta yátupiqueneana máechajiruvana ema Viya. Nutupiruvahi nútì eti juca néchajisirahi, vahi népiyahiraivainahi.

Ema Pablo máimitucavaca eta náicharacavaya te nárujisiravana

⁸ Tiuri, nutuparacahevare pímitucavacavare ena vichamuriana eta juca apana: Tauri eta nárujisiravaina te nayujarasirana. Ena ajairana, vahi nacueñamavahini me Viya eta máitauchirayare eta nayasearuhi. Tátupiruvahini te nasamureana. Vahi nacúsemamajuhehíni eta nayujarasirayarehi nacajapavaquichavapuca. ⁹ Énaripa ena esenana, táurihini eta nacamui-rihairana. Vahi nacúyeheheácaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyeheheacavahini eta oro, eta perla, eta tasivachaqueneana múiriareana. ¹⁰ Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa. ¹¹ Énerichuvare, tiúriyare eta nasamararasira eta náimitucasivana. Vahi nacuácapae-marahi nácani tímitucanahi. ¹² Énerichuvare ena esenana, vahi tatuparaca náimitucahíni ena víyarahanapa te viúrujisiravana, taicha vahi tatuparacahini náimiturecahíni éna. Nasamararacayarechucha eta náimitucasivana. ¹³ Taicha te máepiyacainapa ema Viya ena viáchucanaveánaini, tínapuca máepiyacahi ema Adan, téquenehapa esu Eva. ¹⁴ Váhivare émainahini ema Adan máinapucahini máquipaicavahíni. Ésuhi esu esena, tísapavahi mavayuaca ema Satanás. Eta suísapiravahi, tiáquipaicavanapa tayehe eta pecatu. ¹⁵ Tásiba, ticatajivainapa eta suínasirana. Puíticha tanasihi nayehe ena esenana. Tiúchucuhanayaresera, te náimiyanava náehica ema Jesús, étapa eta náemunaisraina ena vichamuriana. Tacuijavare natapiravaina te mamirahu ema Viya, táurihini eta napanereruana.

3

Tiúrianayarehi eta náitaresira nácani tatupararuanayare eta avacurecacare pastorecare

¹ Étaripa eta juca evacureca pastorecare, puiti nutupiruva numetacahe. Te natarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhecare. ² Tacamunuhisera mácani ticavacureya eta pastorecare, tájina matapiravainaya eta máitaresirahi, tacuija nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitaresira, máitucahi tipanerereca. Mácani achanesamure tijacaparahi nayehe nácani tichimarachanaya. Mácani máituca tímitureca. ³ Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi. ⁴ Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicau-rahianayare máicha. ⁵ Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana.

Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana. ⁶ Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirohi eta matuparahahi. Eta tacahe eta máquipaisiravahi ema Váinaraji. ⁷ Énerichuvare tacamuñuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

Tiúrianayarehi eta náitaresira nácani tatupararuanayare eta avacurecacare ticaijare diácono

⁸ Énerichuvare, nácani ticavacureya eta diáconocare, tacamuñuhi ticapi-cahanayare eta náitaresirahi. Vahi apipiemanaimahi eta náechajirisiravanaugh. Váhivare ticavaharasianaimahi. Váhivare tijamurarahianaimahi. ⁹ Tacamuñuhivare náimatiyare yátupi eta tisuapacareanahi mayehe ema Jesús, náitauchiraripa tamutu, tájinapa náichiravaimahi te mamirahu ema Viya. ¹⁰ Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énara tuparairucanayarehi eta evacureca diáconocare.

¹¹ Énerichuvare, ena esenana, tacamuñuhi ticapicahuana. Vahi nacuechajiji. Súcani tijaneacavahi eta suítaresira. Tájina náichiravaimahi, titaurahiá-nayare.

¹² Ema tuparairucayare, tacamuñuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena. ¹³ Taicha te náitauchahi tamutu eta natuparahana ena tuparairucana, ticunachacareanahi tipícauchacareánahivare. Tásiba, énerichuvare tétemesamúrechaváinapa eta nacametarairuirahi eta máimiturapiana ema Jesucristo.

Jéhevare eta juca téhicacare

¹⁴⁻¹⁵ Puiti nucunevaipa eta nítecapirovaneña eta ara piyehe, téhesera vuíchahapuca nucuitujicava níteca. Nucajurevhisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejruanahi ema yátupiquenehi Viya. Viúnacahi vímiturecahi yátupi eta máechajiriruvana. ¹⁶ Taicha eta juca véhiruhi vimutu, téavicavahi eta táuriva: Vimutuhi visuapahi eta máucupaisirahi te juca apauehe ema Jesucristo, macaqueherahi eta juca viáquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.
Te tamutupa, tichavapa éma te mávasa anuma.
Tásiba, viti mavanarana véchajisihihi tamutu avasareana eta macuchucuira-haviyare vimutu viti achaneana.

Ichapemuriana ena ticasíñavanahi mayehe, téhicanahi éma.

4

Natiarihiyare ena tínajicavanaya eta náehisira ema Jesús

¹ Eta mameparapi ema Espíritu Santo, puiti juca vicaijuheyare, natiarihinapa ena timútserahávanayarepahi tínajicavana eta náehisirahi ema Jesús. Nasuapainapaipa ena tiyururahiana. Náehicainapa eta náimiturapiana ena éreanana. ² Nasapihainapa tisamacareanayare ena apipiemaná tépiyahirahiana. Ena nani, máimatiacavarahánahi eta náepiyahiraivana taicha náitunaipahi eta nacahirana. ³ Ena nani achaneana nayurucainapaipa ena

vichamuriana. Ánipa nacaheyare: “Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasulupayachayarehi te vinicayare eta máijararuhavianahi ema Viya. ⁴⁻⁵ Taicha tamutuhi tiuri eta máepiyaruana ema Viya. Vahi táuricahíni vépuruhíni. Vijacapayarehi tamutu, vihasulupayachayarehi te vinicaya; taicha víjaracasihi mayehe ema Viya, timetacahavihi eta táurivahi. Tacaurisamurechahi ema Viya eta viyujarasirana. Puíticha tanasihi viyehe víti. Te vinica, vihasulupayachayarehi ema Viya.

Ema yátupiquene mavanara ema Jesucristo

⁶ Te pímitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurinaquenehi echájirirucava, étarichuhi eta vímiturapianahi eta piyehe, éta tétumechaviyare eta pímiyaniravahi pisuapa eta juca véhiruhi. ⁷ Váhisera picusuapavaca ena nani tíchanahi eta juca echájirirucavana tamauriqueneana. Súnsurupianachucha éta. Pímiyanavasera picaravahu eta piúrítaresiráina mayehe ema Viya. ⁸⁻¹⁰ Tacuti eta náimicaravahuchirava ena ticavijarurahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahuirahi. Te yátupihi vicaravahu viúrítaresiraya mayehe ema Viya, tétavicavaya eta viúrivaya eta visamiravaya puiti juca vicachehi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechachucha apaesa viúrítaresira eta mayehe. Vímiyanavachucha vímitucavaca ena achaneana apaesa náurítaresira éna apanava mayehe ema Viya. Taicha yátupiquene eta echájirirucava ani tacahe:
Ema vicasiñaquenehi, éma yátupiquenehi Viya.

Éma, téchahavi vimutu viti achaneana.
Vivetiji viti véhicanaripa éma,
tétavicavahi eta macatiuchirahavipahi.

¹¹ Ena pímitureanaya, pituparacavacaicha muraca eta júcana. ¹² Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúriva apaesa étaina náehicavi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasiñavairahi mayehe ema Viáquenu. ¹³ Te vuíchahapuca nucuitecapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuinayare eta Sagrada Escritura apaesa nasama namutu. ¹⁴ Pémechavayare eta nametarapianahi ena víyarahana mametaruuanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepureca eta péchemaraivahi maicha ema Viya.

¹⁵ Pípanerecha yátupina eta juca pímetacasivanahi. Pímereca eta táurivahi eta péhisirahi, apaesa náimaha namutu eta piúrívainapaicha. ¹⁶ Péchapavaicha yátupina eta pímituresirahi eta juca véhiruhi. Pítijiva pipamicava pítauchayare tamutu. Te pítaucha eta juca, picuchucuhavayare píti, énapa ena pímitureanahi.

¹ Te natarihinapuca náejecapava ena víyarahana ichavicapananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijana ajairana, tauri eta piconsejachiravacáina tácuti eta péchajisira ena pichuquiqueneana. ² Énerichuvare ena vénarahana ichavicapananahi piyehe, te náejecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

³ Pímicatacavacaya ena tépenaimanahi, nácani tájinahi naviyahini, yátupihi eta nacamunuiravana. ⁴ Téheserapuca natarihihi ena suchichanaveana esu tépenaimahi, suámarianapuca, énapa titátianayarehi. Ticaravahuanainapa eta náitátijirísiravaya. Títsirijicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirjisiraváina eta nacajurusira ena ticachichana. ⁵ Pímicatacayaresera súcani tépenaimahi sucarichuhipuca, nájina suchichainahi, nájinavare suviyahini. Sucuchapainapa eta tásihaqueñeyá mayehe ema Viya, taicha suíjararuvaipa yátupi eta mayehe. Tiyujaracainapa tamutu sácheana, tamutu yátiana. ⁶ Ésusera súcani suícutichiravahi suicha eta suvarahaqueneanahi, ésu tímicutijiricavaipa suáquijiruvahi eta mayehe ema Viya. ⁷ Pímitucavacayare ena tépenaimanahi, apaesa táuri eta nacaematanearainá ema Viya, tacuija natapiravaina. ⁸ Taicha ena vichamuriana, tatuparacavacahi náeñamavayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahi ema Viya. Tiápajucavapanapa éma eta nayehe ena masuápajirairahánahi.

⁹ Nacarichu pinacayare te nalista ena tépenaimana ena ticayeheanaripa sesenta año eta nañañora. Súcani émanarichuhi ema suímaini eta suítare-sirahi. ¹⁰ Ésupa súcani tímaticarehi eta táurivanahi eta suématanerepiana. Súcani tiúrihi eta sucajurusirahi ena suchichanaveana. Súcani tijacaparahi te supena nayehe nácani tichimarachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani ticatajivanahí ticajumanahí, ticatiruhanahí. Súcani tamutuhi suítaparaha suicha eta táriqueneana.

¹¹ Énasera ena tépenaimanahi amaperuanarichaha, vahi picunaca te lista. Tijuricati tiáquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tiápechavanayarehi ticaimana. Tijuricati ticainajiruana eta náehisirahi ema Cristo. ¹² Tacamitiscavacapáipa, énapa tímínajicanapahi eta náehisirahi ema Cristo. ¹³ Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náematanepa tipaipiricana te pétiana, námapaipa eta cuéntoana. Tímisíáparacavánapáipa. Nácaematananeaca náechajisihapáipa jácani náimahaqueneanapahi te pétiana. Vahi tácatuparaha náichahíni eta juca. ¹⁴ Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana. ¹⁵ Taicha nararihi ena tépenaimanahi tínajicavanapaipa eta náehisirahi ema Jesú, náehicapa ema Satanás.

¹⁶ Te sutiarihihipuca tépenaimahi esu vichamurihi, te natarihivarepuca ena sujaneanahi vichamurianahivare, ena titátianayarehi ena sujaneanaranichu; apaesa vahi sucuapitavairicahi nayehe ena máimaruhanahi titátijiríruanahi, táichavenehisera jácani tamajinairahi naviyahini éna.

Tatuparacavacahi ena vichamuriana náimicatacayare ena pastoreana eta náitátiravahi

¹⁷ Ena pastoreana, te tiúrihipuca eta náechapajirisiravaca ena vichamuriana, ichapeyare eta náemunacacarevayarehi. Tatuparacavacahi ena vichamuriana náimicatacayare tayehe eta nanicaquenerepi ena pastoreana, taicha éna, eta náematanerepihi tímiturecanahi ticametarairuanahi. ¹⁸ Taicha ani tacahehi eta Sagrada Escritura: “Vahi picuitisumucha eta pivuiyera te ticaematanepahi taicha técuhapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

¹⁹ Vahi picusuapavane te tatiarihinapuca eta máepiyaequenena mácani náiyacarahi ena vichamuriana. Téhesera natarihinapuca ena apinana, mapananapuca tinecapaequenehanahi eta máejecapiravahi, jéhesare tisupacare éta. ²⁰ Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsiriha napica ena apamuriana, vaipa nacuquicha eta juca. ²¹ Nutuparacavicha muraca, pítouchayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahí mácani téjecapavahi, taicha maimaracahi ema Tata Vicaiyaquene, émapa ema Viáquenu Jesucristo, énapa ena mayeheana ángeleana manerejiruanahi.

²² Te matarihinapuca mácani navaraha nacasiapa pastor, picasamairunumaya te tiúrihipuca éma. Vahi picuíjahúcha picunacavane éma. Tijuricati tatiarihinapahi eta máejecapiravahi. Machu pítina tamuriaca taicha eta pímisipiraina éma. Pijaneacavaicha tayehe eta juca. ²³ (Puiti néchavahi eta picajumamajipa eta pítaresirahi te piami. Tásicha, nuconsejachavi: Pímisiriquicha apaesainarichu eta vino eta pérésarama une, pípurujinahi.) ²⁴ Tacamunuhisera eta picasamairunumaya nácani tisiapanayare eta pas-torecare, taicha nararihi ena máchasihi eta napecaturana. Vahi táimaticarevane, tapaenumavaya picasamairunuma éna. Nararihisera ena ticaecheravane eta napecaturana. Tímaticareanavane. ²⁵ Ene tacahehi, nararihi ena tímaticareanavanehi eta náichirahi eta táuriqueneanahi. Nararihivre ena tacamunuhi eta picasamairunuma, apaesa ticaecheravanehi eta táuriqueneana náichaqueneanahi.

6

¹ Ena vichamuriana músuahipuca, tatuparacavacahi napicauchayare ichape ena náquenuanahi. Vahi tijicapairihianaimahi apaesa vahi nacuyunaca ena achaneana eta máijare ema Viya, váhivare nacucaeahi eta vímiturapiana. ² Étaripa te nacaquenuhipuca mácani vichamurihi, tiápajucavayare eta napicauchirayare. Vahi tímipanavanáimahi eta nachamurirahi éma. Náimerecayare yátupi eta táurivaya eta náemataneana, taicha ema nacaemataneyeruhi, nachamurihi máemunaruvar ema Viya.

Ticurisamurechahavihi eta véhisira ema Jesús

Piti nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana. ³ Natarihinapuca ena nácani navaraha tímiturecana eta apana doctrina. Nahapapicainapa eta vímiturapiana, tájinaserá vahi tavehapicaimahi eta juca yátupiqueneanahi tásichaqueneanahi mayehe ema Viáquenu Jesucristo. ⁴ Ena nani, ticasíñavaváicanahi, tájinahineni náitucaquenénahíni. Ena nani, náurica téchajicana. Navayurevanapahi nácapaemachapahi tayehe eta

tacayemaqueneana eta véchajiriruvana te vímiturecahi. Ticapinarurahiana éna, tiúmeharahiana, tíchanarahiana, tipícacarácavanapa. ⁵ Tamutu sácheana tictorianarerecana taicha máuripanererurahána ena, máimatiaranahí eta yátupiqueneana. Navaraha nacavacharapiyare eta nayehe religión. Píti vahi picupauchavaca ena nani.

⁶ Jéhesareva, tétavicava eta viúricacareva máicha ema Viya, eta véhisirahi éma. Tavetiji te vicurisamurechava tayehe eta vicayehequeneanahí máijara-ruhavianahí éma. ⁷ Taicha te viúchucapa suyehe esu ticachichahavi, tájina viámapahini vímahaquenenahíni. Ene tacaheyare eta vítavirayare, tájinavare viámaimahi eta vímahaqueneanahí. ⁸ Eta tacahe, te tatiarihipuca eta vinícaquenéna te vipenana, vicamuirihahipuca, tarataripa visuapayarehi. ⁹ Énasera nácani tipanerechanahí tirricuchavana, apanapanepa eta najamu-rachaqueneana. Tacananesircapa eta naplatanechiavaya. Énajivapa tímicu-ñacavana taicha eta najamuraraivana súnsurupianahí. Eta juca ticauyaya-carehi étaina táimicuñaca eta náchanevana. ¹⁰ Táitsivahisera ena achaneana, náetaviuchahi eta tavayuasirahi náichapa tamutu eta tájiparacana, táichavenehi eta najamurachira eta plata. Namapurujipaipa ena vichamurianaini. Natiarihinapaipa timutserahavanapaipa eta tayurusiraina eta najamura-raivana. Tásapihapapuca táiminajícapahi eta náehisirainihi ema Jesús. Énajivapa titanucavanahí eta naviurevahi, timutserahavanapaipa eta nacata-jivairanahí eta nátaresiranahí.

Yátupina eta véhisiraina ema Jesucristo

¹¹ Pítisera vahi picupanerecha eta juca mamavarahaqueneana ema Viya. Pérajicava tayehe, taicha mavanaraviripa éma. Tátupiruvahi eta pisamure mayehe éma. Táimiyanava eta juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta piman-suvaina te pisamure. ¹² Péturechavachucha eta picaemataneasirahi ema Viáquenu. Muracaina eta picasiñavaira mayehe. Vahi picuyacujiequenehava eta picuchapirahi eta pítaresiraya máichecuaraquireyare, taicha máichuhu-quenevirichuhi ema Viya. Vahi picuemepurureca eta péchajiriruvanahí te namuri ena vichamuriana, te píjaracavainapa eta péhisirayare ema Viya.

¹³ Puiti, tímararacavihi ema Viya eta nutuparasiraviya. Éma, ticaite-recahi tamutu eta vímahaqueneanahí eta te juca apaquehe. Tímararacavi-hivare ema Viáquenu Jesucristo. Pécharichuhivare eta matupiruvairahi eta máimereuchiravahi éma te mamirahu ema Poncio Pilato. ¹⁴ Pítauchayare píti tamutu eta juca nuvanairipianahí taicha tásishaqueneanahí me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimapiravina ema Viáquenu Jesucristo te máitecapa te táitauchavapa te jena sácheyare máicutiarahi ema Tata Vicaiyaquene. ¹⁵ Ichapenapa vicuna-chainapa ema Tata Vicaiyaquene taicha macarichuhi éma yátupiquenehi tamutu marataha. É mahi Réyquenehi, Viáquenuquenehi. Tivanecahi namutu ena réyeana énapa ena aquenucana. ¹⁶ Macarichu éma, yátupiquenehi máepenacaca. Máetaviuchahi eta maváyuháuquiráivahi. Nájina tiratahaina ticachacayaina eta majaraiva tayehe eta mávhahi. Éma, nájina tímahaina, taicha máimahasiquenehi éma. Éma, vipicauchaquenehi vivapinaquenehi ichape. Maitavacacainapa eta vicunachirayare éma. Jéhevare éma, tamutu marataha. Amén.

¹⁷ Énerichuvare ena vichamurianahí ticaimahaqueneanahí rícuñahí, pímitucavacayare eta vahi nacucajamurava. Váhivare nacucasiñava eta nacaimahaquenérahi, taicha tijuricati titava eta náimahaqueneanahí,

témitiequenehana tamutu. Nácasíñavasera mayehe ema Viya, jéhevarequene ema ticasíñacare. Éma tíjaracahavihi tamutu eta vicamunuqueneana, viúrisamurerecahi máicha. ¹⁸ Tacahe, ena vichamuriana rícuanaahi, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuwanapahi. Tátupiruva te nasamure eta náijarasiraina ena ticamunuwanahí. ¹⁹ Te yátupina náitaucha eta juca, tatiarihi eta sácheyare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya titarecana, taicha éna yátupihi eta náimicataráivahi eta náitaresirahi te apauehe. Máihecuaquirénapa eta náuricacarevaya.

Eta téqueneha matuparaha ema Timoteo

²⁰ Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajishana eta tájiparacana, técaticavánachucha. Váhivare picujicapa ena nácani navaraha ticanaraemachaviana. Ena nani tímijachavanahí náimathíji eta táuriqueneana, tásihasera ichape nayerehi eta náehisirahnáhíni ema Viya. ²¹ Nararihipaipa ena vichamurianaini tínajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha.

Tamutupa eta néchajiriruvahí piyehe.

Eta macartane ema Apóstole Pablo mayehe ema machamuri Timoteo, ticaijare **2 TIMOTEO**

1 Nuti Pablo mayehenu apóstole ema Jesucristo. Ema Viya tivanecanuhi eta nucametarairuirayare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuaracuirénapa eta vítaresira máicha. **2** Puiti nápechavavare nucajurevi eta juca apana nucartane piyehe piti nuchicha Timoteo némunaruquene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipanereruana.

Ema Pablo máetumechahi ema Timoteo

3 Núti nécharairicavihi te sácheana yátiana te nuyujarasirana, nuyaseu-chavihi me Viya. Nuhasulupayachahi éma eta piúrivahi máicha. Éma nucasiñahi nútì, tacutihì eta nacasiñairahi ena viáchucanaveanaini. Tájina níchiravainahi eta nusamiravahi te mamirahu. **4** Tétavicavahi eta nu-varairahi nápechavahini nímahavi. Vahi némitisicavahini eta píyairahi te nujunijicavinapa. Nuvarahahi píjahúchavahini pítcapauchanuhíni, nürismurepáini eta nímairavinahíni. **5** Taicha némechavahi yátupihi eta pímiyaniravahi pisuapa ema Viáquenu. Picápayayarácavacáinehi eta susuapirohi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe.

6 Puiti nutuparacavicha muraca vahi picucaemaha eta péchemaraivahi maicha ema Viya. Pímiyanavachucha. Vahi tacumapuruji eta nunasirahi eta nuvahuana te piápusi. **7** Taicha ema Viya vahi mavaraha vipícacarácavahini. Éma tíjaracahavahi eta vitumesamurevana eta vicatuparaphairahi. Éma tímitu-cahavihi eta vémunaraivaya. Tíjaracahavivare eta vicaratasisiravayare yátupi eta vítaresira. **8** Eta tacahe, vahi picutsiriha eta picametarairuiraya eta máechajiriruvana ema Viáquenu. Váhivare picutsiriha eta táemeratasiránihu eta nucametarairiranahi nútì apana. Yátupina picamicha eta picatajivairaya. Taicha ema Viya, éma tíjaracaviva eti pitumevaya eta pímiyaniravaya picametarairu. **9** Ema Viya tiámavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerechainapa eta máichuirahaviyare vimutu viti vélhicanayare ema Machicha, mavairahi ticuchucuhahaviyare, váhinéni viámavahini viúrihini eta vítaresirahi. Puítisera ema Viya mavaraha mapecaturarehaviya te mamirahu. **10** Puíticha, eta majapanuirahavihi ema Viya, máevatasinahavihi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiriruvahi eta macaitaresirahaviya víti apana. Te jena sácheyare máitsivachainapa eta viáquehe, máopenacacahávinapa. **11** Ema Viya tituparacanuhi nucametarairuyare eta juca. Éma tinacanuhi apóstolenuhi, nímitucayarehi ena apavasanana. **12** Eta tímicaviuchanuhi eta juca, puíticha nucatajivahi ichape, taicha eta nítauchirahi eta nutuparacasivahi. Váhisera nutsiriha eta néhisirahi, taicha nímatihi nútì eta yátupirahi eta macasiñacarévahi ema nucasiñaquenehi. Néchahivare eta majacapirahi tamutu eta nématanerepiana. Nucunevainapa eta jena sácheyare eta máijarasiranuyare eta nícuhihi mayehe.

¹³ Píti apána, eta péhicayare eta juca yátupiqueneana nímiturapianahi piyehe, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácaviripa ema Jesucristo. ¹⁴ Piúnacaicha yátupina eta juca máechajiruvana ema Viáquenu. Te natarihipuca návaraha nahapapica eta vímiturapiana, vahi picuisapava. Máimahavinesera ema Espíritu Santo, ema tiávahácahavihi. Éma tímicatacavyare.

¹⁵ Títecapa, pécharichuhi píti eta namáimicatasiránuhi ena náiyaranahanahi ena vichamuriana ticavasanahi te Asia. Émavanénahíni máitecahini ema Figelo, émainahipucaini ema Hermógenes. ¹⁶⁻¹⁸ Macarichu títecapauchanuhi ema Onesíforo. Te títecapapa éma te Roma, matupiruhi titanucanu, tétupiacanupa te juca cárcel nucaerataiyahi. Éma, tájina mapicaimahi ena tictorianacanuana. Ticajinuhi eta nucamunuqueneananahi. Pímaharichuhi píti apána eta máimicasirahavihi te viávihaichaha te Efeso. Eta tacahe, nuyaseacahi ema Viya macatajicahini máimicatacähini éma, énapa ena machichanaveana. Majapuhini te jena sácheyare vítecapauchiraya ema Viya.

2

Yátupina eta véhisiraya ema Jesucristo

¹ Pítisera némunaruquene nuchicha Timoteo, nuvaraha yátupina máetumechavini ema Viáquenu Jesucristo. ² Píti pímatirichuhi tamutu eta nímiturapiana, taicha pisamahi eta nímitusiravacahi ena vichamuriana te avasarena. Puiti pitanucaya ena apamuriana vichamuriana nácani pímitureana titaurahianahi. Pituparacaya éna tauri eta náimitusiraina ena apamuriana vichamurianayareva, tacutirichu eta nímitusiravihi nútì.

³ Nutuparacavi: Picamichayare piti tamutu eta picatajivairana. Yátupina eta masuntaruravina ema Jesucristo. ⁴ Picutiyare eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheyare piti eta pítauchirayare eta mavanairipiana ema Viáquenu. ⁵ Eta juca tacutihi ena ticavijarurahiana eta pelota. Te vahi náitauchahi tamutu eta tavanaiparianahi, vahi tivérearecanáimahi. ⁶ Píti pipamicavaya muraca eta pítauchiraya eta pituparahana. Picutiya eta mapamisirava mácani isanitireru eta macaematanera te máesane, mavarairahi tiúchucuhayare eta máematane. ⁷ Pipanerecha yátupina eta juca numetaruvianahi. Németeaca tímicatacavyare ema Viáquenu eta picaitiarayare tamutu.

⁸ Vahi picuemitisica eta juca nímiturapianahi mayehe ema Jesús, eta émairahi yátupiquene Cristo, mámariéquenenihí ema rey David. Éma, máepenaquenénihi. Macaecheputahisera ema Viya. ⁹ Eta tímicaviuchanuhi eta juca, puíticha nucatajivahi ichape taicha eta nucametarairuirahi. Étara témerataganuhi puiti, ticutirinehi nucaviurevahini. Váhisera vicainajiruvaimahi eta vicametarairuiraya eta máechajiriruva ema Viya, cápachi etiarihipa éti. Étinapa nítsivahayare. ¹⁰ Nucamichahisera tamutu eta náichiranuhi, nuvarairahi nasuapahini nácani máichuhaqueñanayarepahi ema Viáquenu Jesucristo, apaesa náuchucuhahini éna apanava, náitujicavahíni nasiapa tayehe eta táuricacarequene mávasa. Máiçhecuarquirequene eta vicachaneraya éma. ¹¹⁻¹³ Jéhesare, yátupiquenehi eta juca véhiruhi vimutu:
Te vépenaca mayehehavihi ema Viaquenu,
éma ticitarecahavyare vicachanenapa
éma tayehe eta mávasa.

Te vicamicha eta vicatajivairanahi
máichavenénahi éma, vítujicavayare vicajupahayare
éma eta macavacureraya.

Téhesera vicaerajicavahi eta véhisirahi éma,
éma apanavare ticaerajicahaviyareva te mamirahu.
Te vínjicavahipuca eta véhisirahi éma,
émasera vahi máinajicahavihíni.

Manasirichucha ticuchapahavíhi te
viápechavayarepuca vichavayare mayehe.

Taicha éma, vahi apánapanéna eta mapanereruana.

¹⁴ Nutuparacavi: Pémechavaca ena pímitureana tamutu eta júcana. Pécaticacaicha muraca te máijare ema Viáquenu. Vahi nacuevataemajíricáca te jácani náechajirisiravána. Taicha tájina táijaracaimahi, machu étaina tahapapica eta napanereruanahi ena vichamuriana eta nasámararásirainahi.

Yátupiyare eta náurivaya ena mavanarana ema Viya

¹⁵ Píti, yátupina tauri picha eta picuematanerahí ema Viya, picurisamu-rechirayare éma. Tájinasarépa piávamirahuimahi taicha tamutuhi tiuri eta pémataneana. Tatupiruvayarehi eta pímituresirahi eta yátupiqueneanahi máechajiriruva ema Viya. ¹⁶ Téhesera natarihinapuca ena téchajisihanahi eta tájiparacana técaticavana, vahi picujicapajírcavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana. ¹⁷ Tíñehiqueneanahi eta náechajirisiravana taicha eta tavayuarasiravahi, ticauyayacarehi nahapapica ena vichamuriana. Ene tacahehi eta náejecapiravanahí ema Himeneo, émapa ema Fileto. ¹⁸ Péchapavayare nayehe ena nani apinana, taicha nacaerajiruvaipahi tayehe eta yátupiqueneana vímiturapiana. Taicha ena nani tépiyaequenehanahi eta táetavisiravarí-pahiji eta náechepusiraipahiji ena náepenaqueneana. Jéhesare, natarihipahí ema náemejecapavaruanapáipahi. ¹⁹ Vitiarihichahasera viti vímiyanavahi véhicahi ema Viya. Taicha muraca eta vicasiñavairahi eta majaneasirahavihi, taicha éma tímatihavihi eta machanerairahavihi. Yátupivare visuapa eta juca máechajiriruva, ani macahe: “Náinajicayarehi eta tamauriqueneana namutu ena tiámanahi eta máijare ema Nuchicha Jesucristo” macahepa.

²⁰⁻²¹ Eta tacahe, víti, ichape eta vijaneasiravayare tayehe eta tamauriqueneana. Yátupiyarehi eta vicamunucarevaina mayehe ema Viya, vítauchirayarehi eta vicaemataneara éma. Jéhesare, ichapenapa eta vimunavyarehi mayehe. Véperajicavayarehiséra mayehe tacutiyare eta náeperajisira ena rícoana eta nayereruvana táuriqueneanahi nayeheana jarra oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucuquisiana: eta raveta, eta yuvaraqui, étapa eta nacasuelana mátejisiana.

²² Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jácani tamauriqueneanahi. Pítisera pímiyanava eta táurivahi eta pítaresirahi. Táuri eta picasiñairahi ema Viáquenu. Yátupinavare eta pémunaraivaina. Pétupiricayareva eta náichavaqueneva ena achaneana. Énaina pitanuca pácacchanevaca nácani pichamurianarichu tiúripanereruanahi, taicha éna nacasamurehi ema Viáquenu tamutu sácheana.

²³ Énerichuvare vahi picujicapajírcavaca nácani navarahahi tiyasere-caviana eta súnsurupiana. Taicha pímatipahi ena nani eta nacahirana, étachucha natanuca eta semanereana. ²⁴ Viti mavanarana ema Viáquenu, vahi

viúriha vímisiaparacavahíni tayehe eta semanereana. Táitsivasera vétaviuchayarehi eta viúriva eta nayehe namutu. Vicayeheyareva paciencia eta nayehe namutu ena achaneana. Vímiturahiyareva eta táuriqueneana. ²⁵ Énaripa ena viánaranahi, tiúriyare eta véchajirisirayare. Vicuchapayare eta táetupirisiravaina eta napanereruana, máijaracahini ema Viya nasuapiraina eta máechajiruvana, ²⁶ apaesa nacuchucuhavahini eta náchanevana eta tacaeratirahi maicha ema Váinaraji. Taicha eta máiturusiravacahi éma, mavarahahi náitauchaya eta mavarahaqueneanahi éma.

3

Ena achaneana téváinajarachavanáinapáipa

¹ Eta apana eta juca nuvaraha péchayare. Puiti juca vicaijuheyare tavetijinapaipa eta taejeravayare nasamira ena achaneana eta náehisiraina ema Jesús. ² Taicha tivayuchavainapa eta náichirayare eta najamuraraivana. Tavayuacainapa eta plata. Ticasiñavanainapa, navayuchayare eta náechajirisiravana. Tipanararahiana. Énerichuvare, masuápajirárahánainapa nayehe ena ticachichana. Tájinainapa eta náitsirijirápinaya. Váipavare napicauchaimahi ema Viya, nasapihaya-rechucha nacaecahiyare éma. ³ Nájinapa náemunaruimahi. Nájinavarepa najapanuquenémahi. Téchajihianainapa. Vaipa téchajicacareanáimahi. Titupiarahianainapa. Nacatichainapa eta táuriqueneana. ⁴ Cáetemarahiana. Mapicauruirahanainapa. Ticasiñavaváicainainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya. ⁵ Nararihipuca ena tímijachavainainapa yátupinahini nácaijuhe ema Viya. Váhisera náunacaimahi eta máechajiruvana, váhivare tísapavanaimahi máemetupirucha ema Espíritu Santo eta napanereruana.

Puítiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe. ⁶ Taicha nararihi ena achaneana tiyururahiana tépiyacavanapaipa tipaipicana te pétiana, nayuru-cavacapaipa nácani esenana máecharaireana. Ena nani esenana tisipecaturanahi, tavayuaruanahi eta tájiparacana. ⁷ Nametainipa ticaravahuanahi, tájinaserá vahi nacaicutiaraimahi eta yátupiqueneana. ⁸ Puíticha ena nani tiyururahianahi, éna ticaecahiana eta vímiturapiana yátupiqueneana taicha máuripanerérurahiána éna. Tacutihi acane ena iápemareana ema Janes émapa ema Jambres tiácapaemachanahi ema víyarahaini Moiséini. Tímaticareana-hisera eta namaimatirahi eta yátupiqueneana. ⁹ Váhisera camurianaimahi ena náiturevanaya, taicha ena achaneana náimatiacavaneyarehi eta náepiyahiraivana súnsurupianahi éta, tacutiyyarehi eta náimatisiravacahi acane ena achaneana ena nani apina iápemareana tiácapaemachanainihi ema Moiséini.

Eta téqueneha matuparacasisvahi ema Timoteo mayehe ema Pablo

¹⁰ Pítisera péhicahi yátupi eta nímiturapiana. Picutinuhi eta nûrivahi nayehe namutu achaneana, étaripa eta nupamisiravahi eta néhisirahi ema Jesús, nucasiñavahi yátupi mayehe. Picutinuhivare eta nucayeherahi paciencia, étaripa eta némunaraivahi, étaripa eta nucamichirahi tamutu. ¹¹ Péchahivare eta náichiranuhi ena achaneana, eta nucatajivairahi náicha. Ichapemurihi eta napanajirisiranuhi eta te avasareana Antioquía Ichipichu, te Iconio,

épata te Listra. Émasera ema Viya ticatiuchanuhi tayehe eta juca náichiranuanahi. ¹² Énesera tacaheyarehi eta juca. Tímiyanavanayare tipanajirica-havianayarehi vimutu víti vivarahana vélida yátupi ema Jesucristo. ¹³ Énerichuvare, ena achaneana vánarajiqueneana tiápajucavainapa eta navainara-jivanaya. Énerichuvare ena ticaetemarahiana, tiápajucavainapa eta nacaete-maraivaya. Énajicacainapa ticaetemacacanayare.

¹⁴ Pítisera pímiyanavahi eta péhisirahi eta juca pímitucasivanahi. Yátupihi pímerecahi eta pisuapirohi. Píti pímatihavirichuhi viti vímitucavianahi, nútiripa. ¹⁵ Piámavahi te amuyavichaha pímatihí eta Sagrada Escritura. Éta, tímitucavihi tayehe eta viúchucuiraya te apána vítaresira, táichavenehi eta visuapirohi yátupi ema Jesucristo. ¹⁶ Taicha tamutu eta Sagrada Escritura tásihaqueneanahi mayehe ema Viya. Jéhevarequene eta viviyihayare eta ticaravahucareana, eta vímitusihaya vélchajisihayare ena achaneana eta viconsejachihayareva, vímitupiruchihavacaya tayehe eta táurivayare eta náitaresirana. ¹⁷ Tacahe, ena vichamuriana mávaháruana ema Viya téchera-hianayarehi, yátupi náitucayarehi tamutu eta náichiraya eta táuriqueneana.

4

¹ Puiti nutuparacavyare muraca te máijare ema Viya, émapa ema Viáquenu Jesucristo. Taicha éma, títecavaneeyare eta macavacureiraya te juca apauehe. Viti vitareruanaichaha énapa ena náepenaqueneanaripa vicayaseserehinapa te mamirahu tájahahipuca eta vicaemataneasiranahi éma. ² Eta tacahe, pímiyanavachucha picametarairu eta máechajiriruva ema Viya te jácani pítujisiravana. Vahi picúyacujiéquenehava. Pécatiacavacaicha muraca ena téjecapavanahi eta náeneuchirávaina. Piconsejachavaca. Pétumechavaca ena tiúripanereruanahi. Pácayehesera paciencia eta pímitusiravacaya namutu. ³ Taicha tatiarihiyare eta sácheyare ena achaneana vaipa nasuapaimahi eta vímiturapiana táuriqueneana, étainapa náichayare eta navarahaqueneanarichu. Natanucainapa ena nácani tímitucanayare tayehe eta tájiparacana, nacarichuinapa tisamacareanayare nayehe. ⁴ Tasapi-hainapa náepuruyare eta yátupiqueneana, nacaepaquecuinapa. Étasera eta náepiyapirohuana ena achaneana, tasapihayare eta tisuapacareyarehi nayehe.

⁵ Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pituparacasivahi.

⁶ Puítisera, núti tiánehipa eta nítaviraya te apauehe. Nucutiripa eta yúcipi te titavayarepa témahayarepa, éneripa nucahehi núti. ⁷ Váhiquene néñamavacare. Nítavavarerupa eta nucanarairahi eta tamauriqueneana. Vahi nuvitaeque-nehahini. Nítauchahi eta nutuparacasivahi mayehe ema Viáquenu. Núnacahi muraca eta nusuapirohi ema Jesús. ⁸ Puiti núti étanecha nucuchapahi eta jena sácheyare eta máijarasiranuyare eta níjaracasiya me Viáquenu, taicha eta néhisirahi yátupi. Taicha éma, máitauchayarehi eta máijarasiránuyare eta nícuhihi mayehe. Váhivareséra nácarichuimahi núti nucajaracasiyare. Énerichuva máijaracayareva namutu nácani ticuchapanahi eta machaviraya.

Ema Pablo máimichuha ema Timoteo

⁹ Pítatijirícavaicha eta pítesirávaneyare ani nuyehe. ¹⁰ Puiti tijunijicanuripa ema Demos, taicha tétavicavahi majamurachirahi eta mavaraha ticaimahaqueneyare te juca apauehe. Tiyanapa macaijuhehi tayehe eta Tesalónica. Émasera ema Crescente, névatacahi te departamento Galacia. Énerichuvare ema Tito, névatacahivare te departamento Dalmacia.

11 Macarinehi nucachanehi ema Lucas. Pivenumapahi ema Marcos, máiteca ema apanavare. Tétavicavahi eta nucamunuirahi éma. **12** Ema Tíquico, nuvanecahi máiteca ara piyeho te avasare Efeso. Émainachaha pítsivaina. **13** Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe ema Carpo, étapa eta nuyeheana libro, étapa eta apamuri ajumerucana.

14 Numetacavivare eta máejecapiravahi ema Alejandro eta nuyehe; tétavicavahi eta macatichiranuhi ema maca herrero. Máimahainesera ema Viáquenu. Ema títsirijiequenehayare eta máichiranuhi. **15** Eta tacahe, picuneuchavaicha eta mayehe, taicha tétavicavahi eta macatichirahi eta vicametarairuirahi.

16 Étaripa, te tínapucainapa nucatiuchavahi te mamirahu ena tuparairucana juéseana, nájina náimicatacanuhini. Namutuhi tijunijijicanuanahí. Tiuri, tacuijaseraini macuícharacáini ema Viya, maperdonachavacaini ena tijunijicanuanahí. **17** Émasera ema Viáquenu tijaneacanuhi, tímicatacanuhi. Vahi másapanuhini nanacanuhini te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe ena apavasaqueneana. **18** Ene tacaheyare eta máimianiravayare ticatiuchanu ema Viáquenu tayehe eta táñehiqueneana. Tiámanuyarehi tayehe eta mávasa anuma. Máiñecuaraqureyarehi eta vijirauchiraya éma. Amén.

Eta táchecuaraqui eta máechajiruva ema Pablo

19 Péchajisinanuvaca ema Aquila ésupa esu mayena Priscila, énapa ena machichanaveana ema Onesíforo.

20 Émasera ema Erasto, nunaquicahi te Corinto. Émapa ema Trófimo nunaquicahivare te Mileto taicha ticaicumahí éma.

21 Pítécavanecha te tamirahuinarichaha eta muracana técaticava. Téchajicaviana ena vichamuriana ema Eubulo, ema Pudente, ema Lino, esu Claudia, énapa ena apamuriana vichamuriana.

22 Núti nuyaseuchaviparaca me Viáquenu Jesucristo majaneacavihini tamutu sácheana, táetaviuchavaréni eta iúricacarevaya emutu éti máicha.

Tamutupa eta néchajiruvahí piyeho.

Eta macartane ema Apóstole Pablo mayehe ema machamuri TITO

1-4 Nuti Pablo, nucajurevi piti nuparape Tito. Némunacavihi tímicutijiri-cavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiu-rahiquene viyehe. Náijaracavini eta táurivaina eta pipanereruana.

Acane, eta táepaniravahi eta juca apaquehe, ema Viya macametarapihi eta máijarasirahaviya eta vítaresiraya máichecuaraqureyare. Ene tacaheyare, taicha ema Viya tájina máepiyahiraivaina. Puiti, títecapauchahaviripa eta sache máicutiarahi ema Viya, eta máijarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiu-rahiquenehi viyehe. Tituparacanuhi nítouchayare núti eta námirayare eta máechajiriruva. Tivanecanuhi eta nímitusiraya ena apamuriana manere-jiruana ema Viya eta nasuapajiraivanayare, mavarairahi náimaticequeneha tamutu eta tímítucacareana yátupiqueneana apaesa tauri eta náitaresiraina. Tacahe, nacunevaina eta jena sácheyare te máijaracahavipa eta vítaresiraya máichecuaraquirénapa.

Eta macatuparahaira ema Tito

5 Péchavarichuhi te nunaquicavina ete te tiúrupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvihi pinerejicaya ena pinacaquenayare eta návacureanaya ena pastoreanaya téchapajiricanayare nácani náijamuripachu tisuapajirahiana.

6 Nayehepachuina pastor, tacamunusera mácani achane maoaporavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna. **7** Taicha tacamunu matapiravarena nácani pitupararuanayare; taicha éna, tuparai-rucanayarevare mayehe ema Viya. Mácani, tímítucacarehi. Mácani, vahi tisemarairihi. Váhivare tavayuaruina eta téracare. Váhivare macueharahi. Váhivare tijamurarahi. **8** Mácanisera achanesamure tijacaparahi nácani tichimarachana. Máurica macachane ena tiúripaneréruana. Mácani, máituca tipanerereca. Mácani, titaurahi tamutu nayehe ena achaneana. Mácani, macaijuhe ema Viya, titaurahihivare mayehe. Mácani, táuriquene eta macaratasisrava. **9** Énerichuvare tacamunu ema mácani tisuápajiráhiquene tayehé eta vímiturapiana tisuapacareana, apaesa éma táurivare eta máimituresiraina. Taicha tacamunu eta máijarasirayare eta natumevaina ena tisuapajirahianahi. Tacamunu hivare eta macajimuyasiravacaina ena nácani tictadiana-canarichaha eta máimiturapiana. Máijaracainavare eta nasuapajiraivaina.

10 Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tiápajucavana eta natupiaraivana. **11** Picamatinacayare ena nani. Vahi picuisapa eta náimitureca eta tamauriqueneana, machu náemejecapavacha ena vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

12 Matiarihinihi ema nayhenihi profeta najaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana,

tépiyahirahiana éna. Tíñehi eta náichaquene nacuti eta sárare tíñehi. Cánisiuquiana. Plújuanavare éna” macahepa éma. ¹³ Yátupi tacahehi eta náitaresirahi puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayeha eta tájiparácana. Tauri eta náehisira eta véhiruhi. ¹⁴ Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímitucacareana.

¹⁵ Ena tipachinanahi te napanereruana téhepa nasamureana, énara ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasera ena masuapajirairahana váinarajipanereruana, éna vahi táurihini nasamira eta tiúriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamaurivahi eta náichirahi. ¹⁶ Éna nacahéhi: “Véhica ema Viya”. Tímaticareanahisera eta namáehisirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táíñemahiqueneana. Ena nani, masuapajirairahanahi eta mayehe. Tájinaserá vahi náituruéquenehaimahi ena nani náichahini eta táuriqueneana.

2

Eta yátupiquene vímiturapiana

¹⁻² Pítisera pímiturecaya tamutu eta táuriqueneana. Ena víyarahana ichanaruna, pímitucayareva eta najaneasiravaina eta náitaresira, náitaurahivaina, náitusiraina tipanererecana, nasuápajiráhiquenéna tayeha eta mavanai-ripiana ema Jesucristo. Náemunarahi nayehe ena achaneana. Yátupina eta nacamichiraina tamutu. ³ Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta téracare. Náimiturahisera eta táuriqueneana. ⁴ Náimitucayareva ena amape-ruana esenana apaesa náituca eta náemunasiraina ena náimanaveana énapa ena nachichanaveana. ⁵ Náitusirayareva tipanererecana. Napicaucha ena náimanaveana. Nasuapajirahivare nayehe. Napicauchacare nacaenacare te napenana, náitusiraina náechapajírica eta nayereruvana. Náurivaina éna, apaesa tacuija náechajisiacareváina tayeha eta náehisirahi eta máechajiriruva ema Viya.

⁶ Énerichuvare piconsejachayare ena amaperuana ajairana, yátupina eta náitusiraina tipanererecana. ⁷ Tamutu eta juca, pinaquipairuyare píti eta piúrivaina, apaesa étainera náehica ena vichamuriana eta piúrivahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya. ⁸ Táuri eta pímituhapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

⁹ Piconsejachayare ena músuana eta nasuapajiraivaina nayehe ena náquenuana. Náitaucha támputu jácani navarahaqueneana ena náquenuana. Vahi nacujicapaírihi tayeha eta vanairipiana. ¹⁰ Váhivare nacuavijaca eta nacayehequeneana ena náquenuana. Yátupina eta nacasiñacarevaina tayeha tamutu eta natuparahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

¹¹ Ema Viya, acaneripa eta majapanuirahavihi vimutu viti achaneana. Eta tacache, máimitesinahavihi puiti ema Machicha eta macuchucuirahaviya. Eta juca tímicaecherachahi víti eta majapanuirahavihi ema Viya. ¹² Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta vítauraivaina tamutu nayehe ena achaneana, étapa eta vítauraivaina mayehe ema Viya. Vaipa víchaimahi eta tájiparacana tamauriqueneanahi. Váipavare víchaimahi eta tajamurachaqueneana eta viáquehe. ¹³ Tásiba, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraiva. Tétavicava eta viúrisamurevainapa te jena sácheyare. ¹⁴ Éma, máepeninahavihi, mavarairahi macaichepaicaya tamutu eta víchirahi eta tamauriqueneanahi. Máepachinachayare tamutu eta tamaeperajivana eta viáchanevana. Taicha mavarahahi machaneraquenehavyare. Tacache, puiti vivapinavayarehi vicha eta táuri queneana.

¹⁵ Tiuri, pímitucayare eta júcana nutupararuvianahi, tamutu piconseja-chavacayareva ena achaneana. Tijuricati natarihi navaraha téjecapavana, picortachavaneyare. Péturechava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

3

Eta vítaresira viti vélhicana ema Cristo

¹ Pémechayareva ena vichamuriana eta nasuapiroaina ema ichapequenehi aquenuca, tásiba, énapa ena tuparairucana. Énerichu pémechavare ena vichamuriana énaina nápajucava eta návanacare tayehe jácani ematane-canaya. ² Vahi nacuechajica nayehe nácani achaneana. Váhivare nacume-hareca. Váhivare nacutupiarahi. Mánsuanáinasera, najapanurahi nayehe ena achaneana.

³ Víti, acane eta masuápajirárahahavirichaha, vimáimatiéquenehahinivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna. ⁴⁻⁵ Puítisera, vaipa vácahehini, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tijapanuhavisera éma. Maspacaipa eta visamureana, máquijicaipa eta tamauriqueneanahi eta viyehe. Énerichuvare tíjaracahavipa ema Espíritu Santo. Ema Espíritu Santo máitsivachinahávipaipahi eta vítaresira, tímítucahavipa eta viúrvayare eta viyehe-repiyare. ⁶ Tétavicavahi eta viúricacarevanahi maicha ema Espíritu Santo máijararuhi ema Jesucristo Macatiurahiquenehi eta viyehe. ⁷ Majacaphaviripa ema Viya, tiásihaqueñehi eta máemunasirahavihi ichape. Énerichuvare timetacahavihi eta máijarasirahavyare eta vítaresiraya máichecuaraquirénapa. Tásiba, vivapinavahi víti eta vicuneiravahi eta jena sácheyare.

⁸ Yátupiquenehi tasuapacareva eta juca vímitucasivahi. Eta juca néchajisihaqueneanahi puiti, nuvaraha pímitucayare tamutu sácheana apaesa náimiyanava naicha eta táuriqueneana ena vicutiqueneana tisuapajirahiana me Viya. Tétavicavahi táuriva eta vímiturapiana. Tájina táichiravaina, taicha eta juca tíjaracarahi eta náurivaya nayehe namutu ena achaneana.

⁹ Puíticha nararihi ena tisuapanarichaha eta nahapapiruanahi nayehe-repiiana ena viáchucanaveánaini. Te návarahapuca náevataemachavi, vahi picujicajiricavaca, taicha súnsurupianachucha eta nayasereruvianaya.

Váhivare picuimicasiapava nayehe nácani tiyunacana eta mayeherepiana ema Moiséini. Te navarahapuca nácani tica jachaviana, vahi picujicapa. Piha papicayaresera eta tajuricatira eta nasemanevanahi. Técaticavachucha éta.

¹⁰ Te matiarihipuca ema mácani mavaraha mahapapica eta napane-reruana ena vichamuriana, pímichuhayare picórtachávaneya eta mapane-reruhi. Te apihequenénapa eta pímichuha, te máviraichu vahi macusuapavi, pévatacayare mayana máuchuca. ¹¹ Taicha tímaticarepahi ema achane eta mamaimitucacarevaya. Étavenérahi eta mapecaturana táimicuñacaya.

Eta téqueneha matuparacasivahi ema Tito mayehe ema Pablo

¹² Tiúri, névatacayare pítsivayare ema Artemas eta ara piyehe, téhesera émapuca névataca ema Tíquico. Te máitecapauchavipa ara piyehe, pítecáva-neyare ani nuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técaticava, nupaenuma-vainapa nuyanaya. ¹³ Énerichuva títecapauchaviya ema vichamuri abogado Zenas, émapa ema vichamurivare Apolos. Pímicatacavacayare éna eta nayanirayare. Péchapajircayare éna, te náechuriapuca eta napaisiraya. ¹⁴ Pímitucayare ena vichamuriana eta achanesamurevacaina, maejeraréna eta nacajiraivaina nayehe ena achaneana. Yátupina náitaucha eta nacamunu-carevanahi.

¹⁵ Téchajicaviana namutu ena natiarihiqueneanahi nuyehe. Tásiba, péchajisinanuya namutu ena némunacasáreana vicutiqueneana eta visuapajirai-vanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricacarevaya máicha.

Tamutupa eta néchajiriruvanahi piyehe.

Eta macartane ema Apóstole Pablo mayehe ema machamuri **FILEMÓN**

¹ Nuti Pablo tapresuchaquenenuhi eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivihi vémunaruviquenuehi tayehe eta vématanerepianahi. ² Vémechajisi-havare namutu ena vichamurianahi tiúrujicavarahianahi te pipena. Péchajisinhavivare esu vichamuri Apia, émapa ema Arquipo, vicompañeroquenuehi muraca tayehe eta vématanerepianahi. ³ Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini táurivaina eta epanereruana.

Eta máurivahi ema Filemón

⁴ Néchaviparaca te tuyujarasirana, nuhasulupayachahi ema Viya. ⁵ Taicha nusamairiricahi eta pímiyanirávahí pémunaca ema Viáquenu Jesús, péhicahi yátupi. Pémunacahivare namutu ena machanerana ema Viya. ⁶ Nuyaseuchavacahi me Viya nayehe namutu ena téhicavianapaipahi táichavenuehi eta náimairahi eta pisuapirohí yátupi. Nuvaraha nácaicutiaraquenénaini muraca tamutu eta táuriqueneana máijararuhavianahi ema Cristo Jesús. ⁷ Ichaperinehi eta nürisamurevahí picha piti nuparape. Tijarahinehi picha te nusamure eta nusamairirísirahí eta pímiyaniravahí pémunacavaca yátupi ena vichamuriana, étapa eta picurisamurechiravacahi ichape éna.

Ema Pablo maechejiucha ema Onésimo mayehe ema Filemón

⁸⁻¹⁰ Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanuhinéni nuvanecavihini. Étasera eta vémunasiracacahi, nuyaseacavi nuti paure ichavica, nucaerataquenuehi puiti máichavenuehi ema Cristo. Puiti éma, nuchichahi némunaruquenuehi te juca cárcel taicha éma téhica-hiripa eta visuapirohí ema Jesús.

¹¹ Ema maca Onésimo, cape juca másinequenuehi, vahi máitaurahini eta picamusurairahi. Tijunahivare. Púitisera éma, ichaperinehi eta máitátraruhi. Eta máitátraruhi núti tacutiyare eta máitátraviyareva píti apana.

¹² Puiti névatacayare éma eta ara piyehe. Picatajicanu pijacapinanuyare táimicutijiricava nútinayarehi nítcapauchavi piyehe. ¹³ Nuvarahahineni mánasihini eta ani nuyehe. Émainahini pítsivainahini eta pivarairahi píteca pítatínuya eta návihairahi te juca cárcel táichavenuehi eta nucametarairuirahí eta máechajiriruvana ema Viya. ¹⁴ Nuvarahahineni níminasicha éma, nucuchaphisera tájahapuca picayemayare píti. Váhisera nuvaraha nupamicavi eta juca picatajisiranuya, nucuchapayare eta pijicapiranuyare. Nuvaraha étachucha tásihaqueñeyarehi eta táurivaina eta pipanereru. ¹⁵ Táitaurevaquene tijunjicavihi ánipi ema Onésimo. Émarichuserapuca jácani ema Viya tásihahi másapahi eta macaheyarehi ema Onésimo. Puítisera tétupiricavapa éma. Márabajapainapa tichavayare eta ara piyehe, apajarahinapa eta máitátraviyaya.

¹⁶ Váipa táchutimahi cape juca másinequenuehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta néminasirahí ema maca. Énénapa picaheyare píti apanava, tiápajucavainapaipa eta pémunasiraya ema maca.

¹⁷ Te yátupina pémunacanu eta nuchamurivírahi, pijacapinanuyare éma táimicutijiricava nútinayarehi pijacapa. ¹⁸ Te tatiarihinapuca eta máejeca-piravahi piyehe, ticantevehipuca, nútinarine picobracha. ¹⁹ Nuvachachaviyare nútí. Nuti Pablo, nútiquenehi nájuchahí eta nufirmachirahi puiti eta nuvachachiraviyare. Nuvarahahinéni némechavi pítí apana eta pintevehi nuyehé eta nucatiuchiravihi. ²⁰ Tiuri, nuparape, picatajicanuchaha eta juca nuyasearuvihí táichavenehí eta nucachamurivirahi mayehe ema Viáquenu. Picurisamuréchanuya.

²¹ Németeaca vahi taeñamavacare eta juca pisuapiranuyare. Eta tacahe, nucajurevihi puiti. Taicha néchahivare eta vahi tacularchuimahi pítauchaya eta juca nuyasearuvianahi. Tatiarihiyare jácani apanayare píjararuvanayare pítí tásichaqueneyare te pisamure. ²² Énerichuvare nuvaraha pétupirisinanuya eta nítecapihaya. Étanecha nucchapahí eta tasamacarevaina eta eyujara-casana me Viya eta nítujisiravaina nítecapauchahe.

Eta táchecuaraqui eta mächajiruva ema Pablo

²³ Téchajicavi ema Epafras, ema nucompañerohi te juca cárcel, tapresucha-quenehivare ema apana eta véhisirahi ema Jesucristo. ²⁴ Énerichuvare téchajicaheana ena apamuriana vicompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

²⁵ Nuyaseuchaparaca ema Viáquenu Jesucristo táetaviuchahíni eta iúricaca-revaya máicha.

Tamu tupa.

Eta apanavare carta nayehe ena israelítana téhicanahi ema Jesús, ticaijare **HEBREOS**

Ema Jesús titametacahavi eta máechajiruvana ema Tata Vicaiyaquene

¹ Acane eta náitaresirahi ena viáchucanaveanaini, natiarilihíhi ena camuri-queneana santo profetana mavanaranahi ema Viya. Éna, náitametacahi ena achaneana eta máechajiruvana mapanereruanahi. Ichapemurivare eta náimeresirahi eta máitupajijasiravanahi ema Viya. Apanapanenéjivare eta náimituresira eta máechajiruvana. ²⁻³ Puítisera viti vitareruanahi puiti juca áñoana, ema Viya mavanecahi ema Machicha eta viyehe, titametacahaviya eta taequenereruana mapanereruana. Ema maca Jesucristo, Víyahivare éma, taicha machichahi ema Viya. Acane émahi tépiyacahi eta apaquehe, eta anuma, étapa eta vímahaqueneanahi puiti, máitauchirahi tamutu eta mapanereruana ema Maiya. Émarichuvare ticatuparalahi me Maiya eta émairahi téchahi tamutu. Puíticha émahi téchahi tamutu, máetaviuchahi eta máitupajijasiravahi. Ema Cristo ticayehéhi eta majaraivahi máijararuhi ema Maiya. Eta máucupaisirahi eta viyehe, tímimaticahavipa eta máurivahi ema Maiya. Tásicha, te tamutupa eta macaepahairahi eta vipecaturana vimutu viti achaneana, tichavapa te anuma. Ánaqui ema Maiya macaejacapa te mayehe trono te mavaure.

Ema Cristo, éma ticapicahupanahi nayehe ena ángeleana

⁴ Tacache, ema Cristo, éma ticapicahupanahi nayehe namutu ena ángeleana, taicha ema Maiya máijaracahi eta ichapequene mávacurehi ticapicahuhi. ⁵ Taicha eta máechajiruvahí ema Viya mayehe ema Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacache, ena ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Ema Viya máechajisihahi ema Cristo, ani macahehi: “Ema maca, ema yátupiquenévihi nuchicha, taicha nútiquenenuhivare máiyau” macahepa. ⁶ Tacache, te macucupaicapa ema macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana. ⁷ Énasera ena ángeleana, téachajisihahi eta Sagrada Escritura, ani tacache: “Ena ángeleana vanairucanachucha éna. Nacutihi eta técaticava eta najuricativa te ticavanahiana. Nacutihi eti yucu eta nasipasirayare jácani tamaeperajiqueneana” tacachea ema Sagrada Escritura. ⁸ Ánisera tacache: “Ena ángeleana vanairucanachucha éna. Nacutihi eti técaticava eta najuricativa te ticavanahiana. Nacutihi eti yucu eti nasipasirayare jácani tamaeperajiqueneana” tacachea ema Sagrada Escritura. ⁹ Píjaracayarehi eti téaurivayare eti náitaresira ena achaneana tiúriana tisuapavianaya. Énerichu píjaracayare eti náicuñayare ena achaneana váinarajiana masuapajirairahanahi eti piyehe. Eta tacache, ema Tata Vicaiyaquene, ema Ticachichavihi, tíjaracavihi tamutu eti picapicahuirayare nayehe ena pichamuriana téhicanahia. Tétavicavahi eti náurisamureva pícha”. ¹⁰ Ánivare tacache: “Píti yátupiquenévihi Viáquenu. Píti pítucahi eti taimahiyare eti taepeaniravahi eti apaquehe étapa eti anuma, pépiyuaruanahi te pivahuana. ¹¹⁻¹² Tayanapane titavayarehi tamutu eti juca vímahaqueneanahi, ichasipaipahi tacutipaipa eti táchicasivapaipa eti vimuiriha. Pítisera pinasiyarehi. Te pímahapa

táuricapa eta pítsivachiraya tamutu, máejerareyarehi pícha. Picañapupujicainapa tamutu. Taicha píti, máitavacacaviyarehi eta pítaresirahi” tacahepa. ¹³ Jararihi eta apana máechajiriruvahí ema Viya, ani macahehi mayehe ema Cristo: “Yare, péjaca te nuvaure, eta picuchapihayare eta nucaepuyusiraya te pimirahu ena tictorianacavianahí” macahepa. Énasera ena ángeleana, tájina vahi máichahini: “Péjaca ani te nuvaure”. ¹⁴ Taicha ena ángeleana, mavaranahí ema Viya. Éna, espírituanahí. Vahi énajivainahini nacapicahuhini. Eta natuparahahí éna, tijaneacahavianaya víti macuchucureanayare ema Jesú.

2

Tacamunuhi eta vipamisirava tayehe eta véhisirahi ema Jesú

¹ Eta tacahe, tituparacahe yátupina eta ecaravahuiraya eta ímitucasique-neanahí, machu émitisica, machu étainera taviuchache vahi iúchucuhahini. ² Eta acane, ena ángeleana, éna tímitucanahí ema víyarahaini Moisés eta vanairipiana. Tétavicavahí eta tasuapacarevahí. Ticaicuñavaneanahí ena téjecapavanahí, timasuapanahí eta nasamaquenehi. ³ Puiti numetacahe: Tisuapacarepanahí eta véhiruhi. Tájina vahí ticaíticahémahi eta ícuñayare te váhipuca ecucamapuravahí eta iúchucuirayare. Taicha émarichuhi ema Viáquenu tínapucahi máichuhavacahi ena achaneana eta náuchucuirayare. Tac-ahé, ena tisamanahí éma, tíchuhahavianapa víti. ⁴ Énerichuvare, ema Viya máimerecapahi eta tiáramicareana, máicutiaranahí eta émairahi vanairuca, mavarairahi tisuapacareyarehi eta nametarapiana. Énerichuvare puiti ema Espíritu Santo, éma tíjaracahavíhi eta vítucaquenepachuyare apaesa vítauchayarehi eta vématanerepipachuhi víjarahi máicha.

Ema Jesucristo, achanehi eta máimahi eta máitesirahi te vitaracu

⁵ Ema Viya, váhivare énainahini matuparacavacahini ena ángeleana eta énairayare téchanaya eta arairuyare avasare eta vicuchapaquenehi, étaripa eta véchajisihaqueneyarehi. ⁶ Eta Sagrada Escritura, ani tacahehi eta taechajiriruva: “Piti Tata Viáquenu, tétavicavahí eta pijapanuirahavihi viti achaneanasami. Víti, váhinéni táunahini eta vítaresirahi. Váhivare véñamacarehini. Pítisera péñamavahí eta viyehe, váhivare pémitisicahavihini viti pépiyuuanahí. ⁷ Te pépiyacapa ema viáchucaini Adán, vahí mácutinasivacahini ena ángeleana. Ena, nacachuricahi éma eta náitupajijiasiravana. Váhisera tánasimahi eta nacachuriasirahi. Taicha pijapanuhavihi viti mámariequenehana ema Adán. Píjaracahavíhi eta viávacurehi tajarahiquenehivare, tétavicahivare eta vicapicahuirahi. Aquenucahavíhi pícha. Véchahi tamutu eta pépiyuuanahí. ⁸ Visuapacarehi viti tamutu eta pituparasirahavihi” tacahepa etá Sagrada Escritura.

Tacahe, téchajisihahavíhi etá Sagrada Escritura etá véchirahi tamutu etá máepiyuuanahí ema Viya, tájina ticaejeraimahi, maicha ema Viya. Vuíchahasera vímahahini vicayamuricahini tamutu táichavenénahini etá visuapacarevahí. ⁹ Mararihisera ema Jesú. Tiúcupaicahi ánipihi te juca apaquehe, nacachuriacaripa ena ángeleana etá náitupajijiasiravana. Eta máemunasirahavihi vimutu viti achaneana, ema Viya máimicacapari-chahavare te crusu vítivenehi. Téhesera te taequenepa, macaejacapa ema Jesú tayehe etá tajarahiquene mávacurehi tacapicahuquene, táitsivahi etá macatajivairahi etá máepeñirahi.

¹⁰ Ema Viya émarichuhi téchahi tamutu. Ema, tétavicavahí etá máechemaraivahí etá manerejisirahi ema Machicha etá macuchucuirahaviyarehi,

tiámahaviyarehi eta te mávasa, viti machichanayarehi. Émaripa ema Jesús, eta macamichirahi tamutu eta mátajivana, títauchavahi tamutu eta matuparahahi. ¹¹ Eta máepachinachiraripa eta viáchanevana, visiapamurihaipa ena machichanaveanahi ema Viya, vicutiripa ema Jesús eta machichairahi ema Maiya. Eta tacahe, ema Jesucristo, ichape eta máurisamurevahí eta viyehe eta majacapirahavihi maparapehaviyare. ¹² Eta te Sagrada Escritura, ani tacahehi eta máechajiriruvahí ema Cristo: “Nuvapinava eta néchajisihairaviyare, Tata, nayehe ena nuparapenaveana. Nuvaraha nujirauchaviyareva, nacachanenuhivare éna”. ¹³ Ánivare tacahehi: “Tétavicava eta nucasiñavairahi mayehe ema Tata Nucaiyaqueñe”. Eta apana, ánivare tacahehi: “Ani návhahi nútí, énapa ena pichichanaveanahi, ena pinerejiruanahi píjararunuanahi piti Tata” macahepa.

¹⁴ Viti achaneana, étanarichuhi eta vicaechera étapa eta vítine. Ene macahehi ema Jesucristo, macaechehi, macaitinehivre étarichuhi tacutihi eta vítine víti. Eta tacahe, eta máepeninahavihi, macapaquechiyaharehi ema Váinaraji, émarichuhi muracaquenénihi eta mítupajijasiravahí eta macaparereresirahi. ¹⁵ Viti achaneana, ichapequenénihi eta vipisirahi eta vépenirayarehi, taicha vipicahi eta vícuñayare. Eta vipisirahi tahapapiricahi eta vítaresira. Émasera ema Jesucristo macaepaharipa eta vícuñayarehini, vaipa tápicacarehini eta viyehe. ¹⁶ Éma, eta máitesirahi, vahi étainahini táimitecahini eta máimicatasiravacayarehi ena ángeleana. Yátupihisera viti achaneana, víti máimicataruanayarehi, taicha eta vicasiñavairahi eta mayehe, vicutirahi ema víyarahaini Abraham eta macasiñavairahi me Viya. ¹⁷ Eta tacahe, eta máucupaisirahi ema Viáquenu, tatuparacahi macaqueheyarehi eta viáquehe eta máitaresirahi, ticutihaviyarehi viti maparapeneveana te tamutu eta vítaresirahi, yátupiyarehi eta máetaviuchiraya eta majapanuirahaviya, máetaviuchayareva eta macasiñacarevaya eta viyehe. Taicha macarichuhi ema tiyaseuchahaviparacahi te mamirahu ema Viya Macaiyaquene, macaepaháinahaviyarehi eta viviurevanahi táichavenehi eta vipecaturana viti achaneana. ¹⁸ Ema Jesús, ichape eta macatajivairahi, macaitsamarajiquenehi ema Váinaraji. Macamichahisera tamutu, vahi másapavahini. Tásicha puiti, éma marataha tímicatacavahiyare víti eta vicamichirayare eta viátajivana táichavenehi eta macaitsamarajirahavihi ema Váinaraji.

3

Ema Cristo tiápajucavahi eta macunachacarevapanahi mayehe ema víyarahaini Moisés

¹ Nuvaraha numetacaheya eta apuna, eti nuparapenaveana máepachiruanahi ema Viya, máichuhauqueneanahivare eta esiapiraya eta mávasa. Nuvaraha epanerecha apaesa ácaicutiara eta táetaviuchirahi eta mítupajijasiravahí ema Jesús. Éma, yátupihi mavaneruhi ema Viya eta máimitusirahaviyarehi eta juca véhiruhi. Macarichuhi ema tiyaseuchahaviparacahi te mamirahu ema Viya. ²⁻⁶ Ema Jesús, tétavicavahi eta máitauchirahi tamutu eta mavanahiana matuparacasivanahi me Viya. Énerichuvare ema víyarahaini Moisés, titaurahivare eta mavanahi eta maconsejaraivahi, máimitusirahivare ena achaneana tamutu eta mavanairipiana ema Viya. Énerichuvare máechajisihihi tatiarihiyare eta apuna mapanereruana ema Viya vuíchahasera máimerecahini ema Viya. Émasera ema Jesucristo, ema tiápajucavapanahi eta macunachacareva, macachuricahi ema víyarahaini

Moisés. Ticunachacarepanahi taicha machichahi ema Viya, ticatuparahivare téchahavihi vimutu viti machanerana ema Viya. Émasera ema Moisés vanairucaichucha. Ema Moisés máichuhavacahi ena achaneana. Émasera ema Jesucristo, é mahi tépachinachahi eta viáchanevana viti machanerana, tihetamurichahavivare. Víti yátupihi machanerahavihi, te vímiyanava eta juca véhisirahi éma, vicasiñavavare eta mayehe, viúrisamurevare eta vicuchapirahi eta viúchucuiraya te jena sácheyare.

Ema Viya tícuchahavihi eta vinarasihayare viti machaneranahi

⁷ Eta tacahe, nuvaraha ejaneacava. Ema Espíritu Santo, ani macahehi eta máechajiruvahi tayehe eta Sagrada Escritura: “Puiti jena sache, esamayare esuapayare éti eta numetarapiana nútì. ⁸ Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apauehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi nútì. ⁹ Tétavicavahisera eta nucamichiravacahi eta namasuapajiraivahi. Cuarenta áñoripahinéni eta nímechiravacahi eta tiáramicareana níchaqueneanahi, váhisera nasuapnuhini. ¹⁰ Eta tacahe, te táequenepa, nusemapa nayehe ena nani achaneana. Taicha éna, táetaviuchahí etá taejecapiravahí etá nasamureana. Vahi návarahahini náimathihini etá taurinaquene achene, nuvarahaquenehi nímechavaca. ¹¹ Nútì náetupiricaripahi etá náicuchihi nanarasihayarehini etá nuyehe. Tétavicavahisera etá náimiyusemasiranuhi. Tásicha, nucahepa nútì: Ena nánitáji váhiquene nasiapaimahi tinaracanaimahi etá nuyehe” macahepa ema Espíritu Santo.

¹² Eta tacahe, nuparapenaveana, nuvaraha ejaneacavayare yátupina. Machu éhica etá napanereru ena masuapajirairahana, machu emutserahava íminajicava etá éhisirahi ema yátupiquenehi Viya Vicaiyaquene. ¹³ Étumechacacayaresera nayehe ena apamuriana echamuriana támutohi sácheana puiti juca vicaijuheyare, apaesa nacuija navayuaca ena tivayuarahiana tayehe etá pecatu, machu étaina táemuracacha etá esamureana. ¹⁴ Taicha viti machamurihavianahi ema Cristo. Vijacapainasarepa etá vícuchihi mayehe éma, te vímiyanavahi etá vicasiñairava mayehe, vétumechiravahivare etá véhisirahi. ¹⁵ Eta tacahe, nápechavavare némechahe etá máechajiriruva ema Espíritu Santo: “Puiti jena sache, esamayare esuapayare éti etá numetarapiana nútì. Tacuija etá tamuracavaina etá esamureana. Vahi ecucuti ena achaneana mámaqueneanahi ema Moisés te mávapahi apauehe. Ichape etá namasuapajiraivahi etá nuyehe, náetaviuchirahi etá nacaitsamarajiranuhi nútì” macahepa.

¹⁶ Puiti nuvaraha epanerechaya etá juca. Némechaheya ema víyarahaini Moisés etá macuchusiravacahi ena viáchucanaveanaini tayehe etá avasare Egipto. Tétavicavayaréni etá náuricacareva. Tamapurujisera etá nasamirahi etá mahu ema Viya, máijarasirahi etá mavanairipiana. Náimiyusemacapaipa éma etá namasuapirahi. ¹⁷ Tamapurujivare etá cuarenta áñohi etá macamichiravacahi ema Viya. Taicha tavayuacahi etá napecaturana éna, etapa tiviuchahí etá náepenarasirahi te mávapahi apauehe. ¹⁸ Eta namavarairavacahi nasuapahini, éma manacapa etá mayehe juramento etá namaitujisiravayare tisiapananaracahini etá mayehe. ¹⁹ ¡Ácaicutiara éti! Táichavenehi etá namasuapajiraivahi, puiti vímahaipahi etá namaitujisiravahí tisiapanayatehe etá mávasa ema Viya.

4

¹ Tacahe puiti, vicasiñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émepururecava éti, tijuricati vahi ecuitujicava esiapa. ² Taicha víti vicametacasihivare eta viúchucuirayare tacutihi eta nacometacasirahi éna. Tamapurujihisera eta nacometacasirahi eta náuchucuirayarehíni, váhiquenesera nasuapahini.

³ Yátupisera jararihi eta vinarasihayarehi, taicha ánipa macahe ema Viya: “Núti nétupiricaripahi eta náicuchihi nanarasihayarehini eta nuyehe. Tétavicahisera eta náimiyusemasiranuhi. Tásaha, nuchahepa nútì: Ena nánitáaji váhiquene nasiapaimahi tinaracanaimahi eta nuyehe” macahepa ema Viya. Vítisera viti visuapajirahiana, vítujicavayare visiapa tayehe eta juca vinarasihayare eta mayehe ema Viya.

Émarichuhi ema Viya máetupiricaripahi eta vinarasihaya, taicha tinaracapa éma, te táequenepa eta máitauchirahi macaemataneasirahi tamutu eta juca apaquehe. ⁴ Taicha eta Sagrada Escritura, ánipa tacahe: “Saisi sache eta macaematnerahi ema Viya. Téhesera te siétequenepa sache, tinaracapa éma, taicha máitaucharipahi tamutu” tacahepa. ⁵ Tásaha, nápechavavare némechahe eta juca máechajiruvana ema Viya: “Váhiquene nasiapaimahi tinaracanaimahi eta nuyehe” macahepa. ⁶ Tacahe puiti, mávacuichahahi eta nanarasihayarehini ena tínapucanahi tisamanahi eta náuchucuirayare, táichavenehi eta namasuapajiraivahi. Étainapasera viávihayare viti véqueneruana visuapajirahianayare. ⁷ Ánaquiaparipahi eta táetavisiravahi eta áñoanahi te táequenepa eta namasuapirahi ena nani, máichapa ema Viya eta te Salmo, ánipa macahe: “Puiti jéna sache, esamayare esuapayare éti eta numetarapi nútì. Tacuija eta tamuracavaina eta esamureana”. Eta macaheirahi eta juca, ema Viya máimicutiarachahi eta apaña sache ticamapuravacarehi eta visiapistayare eta te vinarasihayare eta mayehe. ⁸ Yátupihi ema víyarahaini Josué macaitecapavacahi ena nani achaneana tayehe eta apaquehe natuparahahi. Váhisera étainahini eta nanarasihayare mavara-haquenehi ema Viya. Eta tacahe, eta máechajisihapa eta apaña sácheyare visiapistayare viti. ⁹ Tacahe, jararihichaha eta juca tacapicahuquenehi vinarasihayare, táicuchihi eta viáchaneva viyehe viti machaneranahi ema Viya. ¹⁰ Eta visiapistayare vinaracaya eta mayehe ema Viya, yátupi máitavacacayare eta vinarasiraya, vaipa vicaematanémahi. Vicutiyare ema Viya eta manarasirahi tayehe eta máemataneanahi. ¹¹ Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémpurureca eta vícuchihi, machu vácuti ena masuapajirahrainahi.

¹² Taicha eta máechajiriruva ema Viya, tétabicavahi eta taitupajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta viáchanevana viti achaneana. Tímechahavi eta tamaurivahi eta visamureana. Tasiapavare eta vapaneruana. Tímitucahavivare eta vétupirisieca eta vítaresirana. ¹³ Ema Viya máimraracahi tamutu. Tájina vahi viratahaimahi viyumuruca eta víchaqueneanahi. Tamutuyarehi tiúchujica te mamirahu éma vépuyumiraureyarehi te máichuhahavipa eta vimetauresiravayare mayehe.

Ema Jesús macarichu éma tiyaseurahi eta viyehe

¹⁴ Ema Jesús, yátupiquenehi Machicha ema Viya. Macarichuhivare ema tiyaseurahi eta viyehe taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi.

15 Éma, yátupihi tiyaseurahiquenehi eta viyehe, taicha tímatisihavi eta vimatu-mevahi. Tijapanuhavisera, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavihi víti. Váhisera macapecaturahini ema Jesús. **16** Eta tacache, vicasiñavayarehi te viyujarasirana, vémeñahairavahi me Viya témunarahiquene. Taicha tétavicavahi eta majapanuraiva táichavenehi eta máemunasirahavihi. Éma, yátupihi eta máimicatasirahavi tayehe tamutu eta vicamunuiravana.

5

1 Nuvaraha epanerechaya nayehe ena nácani catuparahanayare tiyu-jaracarohana viyehe viti israelítana. Éna, nerejianahi te nataracu ena achaneana. Natuparacasivaichuhi éna ticaitecapanayarehi me Viya eta námavahuana ena achaneana, étapa eta nanaquiruvana táichavenehi eta napecaturana, nayaseuchirayarehi ena achaneana mayehe ema Viya. **2** Éna, tijapanurahianayarehi nayehe ena máiturerereana énapa ena téjecapavana, taicha énarichuvare ticatajivanahi tayehe eta naeche máteji. **3** Étaripa eta nacatajivairana, ticamunuwanahi éna apana ticamavahuanahi mayehe ema Viya táichavenehi eta napecaturana.

4 Tacache, mácani ticatuparahayare tiyaseurahiyarehi, vahi émajiriru-vaimahi máichuhacasivarichuhi. Émahi ema Viya tíjaracahi eta matuparahahi mapicahuyarehi, tacutihi eta máijarasirahi ema víyarahaini Aarón eta matuparahahi macapicahuirahivare. **5** Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi ema Viya tíjaracahi eta matuparahahi mapicahuyarehi, taicha ani macahehi ema Viya: “Píti yátupiquenévihi nuchicha. Puiti nucaeja-cavihi te piávacure” macahepa. **6** Eta apana máechajiriruva, ánivare tac-ache: “Nunerejicavihi píti piyaseurahiyare. Nutuparacavihi péchajura-hiyare nayehe ena achaneana. Máiitavacacayare eta juca pituparaha, pi-cutiyare ema nuvanaraini Melquisedec” macahepa ema Viya. **7** Tacache, ema Cristo, te matiarihichaha ani te juca apaquehe, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitisicahini ema Maiya eta macaechepusirayarehi te máecari te taequenepa eta máepenirahi te crusu. Jéhesare, tisamacarehi te mayujarasirana, táichavenehi eta mavarairahi máitaucha tamutu eta mapane-reruana ema Maiya. **8** Taicha ema Cristo, machichahi yátupiquene ema Viya. Váhisera máeñamavahini. Váhivare majunijicahini eta macatajivairanahi. Macamichahi tamutu, macaravahuirahi eta masuapajiraivahi. **9** Eta tamutu-tuirapa eta máepenirahi, téchepucavarepa, tásiha maratahapa eta macuchu-cuhairahaviyare vimuti viti visuapanahi éma. Máiitavacacayarehi eta vítare-siraya máicha. **10** Eta tacache, ema Viya manacahi eta mávacure téchajurahi eta viyehe macutihi ema víyarahaini Melquisedec.

Ecunevahi machu ánasi ácuti ena amuyana

11 Ichapemuriyare eta taechajisihaquenehi eta juca numetaruhehi. Ticajerahisera nítametacahehini taicha tétavicavahi eta tamuracavahi eta echutiana. **12** Ánaquiaparípahinéni eta ecaravahuirahi, iúrihaipahini puiti máestrohevacainaipahíni. Ecamunuichahahisera natiarihiyarehi nácani tiápechaheanaya titametacaheanayarehi jácani vahi táchajerahini eta vímitucasivanahi me Viya. Puiti éti épiyacavaripahi máiturererehe. Ecuitripa ena amuyana, tacamunuhi vésichayarehi eta leche eta ticitarecayarehi, taicha vuichaha taitucahini tanicahini eta tinicacareana.

13 Taicha ena amuyana tiájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana. **14** Énasera ena yátupihi eta nacaravahuirahi, ena nacutihí ena ichanaruuanahi. Téchavanaripa náitucaripa tinerejiuchavana eta táuriqueneana, náepurupa eta tamauriqueneana.

6

1 Núti, nuvaraha ímiyanavayare eta ecajurusiraya eta échemaraivahi tayehe eta juca véhiruhi. Ichananuhénahini tayehe, vaipa ecucutihini ena amuyana. Éhicapaini yátupi eta máimiturapi ema Cristo. Vaipa ecuápechavahíni épanaequenereca eta táinapureanahi iárvahuanahi. Éti, vaipa ecamunuhini viápechahéhini vímitucahéhini eta éneuchiravayarehi eta epecaturana tímicapaheyaréni, vahivare viápechavahíni vímitucahe eta ecamunuirahi yátupina eta ecasiñavairayarehi me Viya. **2** Éti ímatipa eta táichararacavahi te ecaicachasinapa, étapa eta táichararacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaraqui máitavacacayare. **3** Tásiha puiti, nímitucaheyare eta apamuri, te máijaracanurichahapucaini ema Viya eta nítupajijiasiravaya, étapa eta ecaravahuiraya.

Ecunevahi, machu ínajicava eta véhiruhi

4-6 Páureanasamisera ena tínajicavanapuca eta véhiruhi, tichavanayarepuca. Taicha nácani natupiruvahi najacapa ema Jesús, tásiha énévanehi najirica te nasamure eta majacapiravacapa ema Viya, machichanaipa; mávahácaripa ema Espíritu Santo; tacurisamurechavacavarepa eta máechajirruva ema Viya; náimatiéquenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tiápechavana náeneuchavahini. Taicha eta náinajisiravapa, náepuruipahi ema Machicha ema Viya. Tímicutijiricavaripa nacaecahihini éma te namirahu ena achaneana, nápechavahini náetataca te crusu éma. **7** Nímicutichayare. Eta macamirisirahi ema Viya eta tiquiva, táerapaisiravanehi tamutu eta apaquehe. Jararihi eta apaquehe, tiúrinasarepa eta tasucucureruvana, maicha ema Viya. **8** Jararihivare eta apana apaquehe, tájina tasucucureruvaina. Itapepairechucha, ijarevare. Ema Viya máijaracayarehi eta táicuñayare, tíjuinapa te yucu táicuchihi.

Vahi vínjicavaimahi taicha tatiarihi eta vicuchapaquenehi

9 Puiti, muracacaha apaesa eta numetasirahehi, nútisera nucasiñavahi eta eyehe eta vahi ínajicavaimahi, eti némunaruuanahi nuparapenaveanahi. Nucasiñavahi eta máijarasiraheya ema Viya eta iúricacarevayare te macuchucuhahavipa. **10** Ema Viya tétavicavahi eta máitauraivahi, váiparinehi máemitisicaimahi eta ecaemataneasiranahi. Étapa tímereuchahéhí etá emunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímiyanavairahi ecaemataneaca. **11** Nuvarahavare ímiyanavahini eta evapinavairavaca ámutu éti etá ecaemataneasirahi, yátupina ecasiñava mayehe ema Viáquenu, ecuchapaya eta machaviraya. **12** Vahivare nuvaraha plújuhéra. Ímiyanavahí éhica ácuti ena echamurianaini yátupiquenehi etá nacasiñavairahi me Viáquenu, nacamichahi tamutu. Jéhesare, ecuticacasarepa éna etá ejacapiraya etá ícuchihi mayehe ema Viya.

13-14 Émechava eta acane eta máechajiriruvana ema Viya eta máijarasiravahi eta máuricacarevayare ema Abraham. Ánipa máicha: “Yátupiyare eta níjara-siraviyare eta piúricacarevayare, tásicha, níjaracaviyareva eta náichapemu-rivaya ena piámariéqueneana. Nútijiva nupamicava eta nítoucherayare etá juca néchajiriruvana níjararuviyare” máichapa. Ani tacahehi eta máechajiriruvana, taicha nájina apanainahini tipamicaimahi éma. Tásicha, émajiva tipamicavayare. **15** Ema víyarahaini Abraham, ichapemurihi eta macasiñavairahi me Viya, eta macuchapirahi eta máijararuvanahi ema Viya. Tásicha, téavicavahi eta máuricacarevahí. Máimahahivare ema machicha Isaac énapa ena mámarinaveana. **16** Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicayarehi eta máitauchiraina. Te mácani achane majurachapuca, tájina taeñamavacarehini eta máitauchirayare. **17-18** Ene macahehi ema Viya, tíjaracavahi eta mapamisiravayarehi máitaucha eta máijarasirahaviyare eta viúricacarevayare. Tipamicavayare, taicha mavaraha vahi véniamavaimahi. Tímaticarehi eta máurivahi ema Viya. Tájina taeñamavacaréna eta vicasiñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véniamavaimahi eta vicuchapirahi eta máijarasirahaviyare eta vícuchihi. **19** Eta juca vicuchapaquenéhi, étara téturechahavihi muraca te viáchanevana. Téavicavayarehi eta vicasiñavaira eta vipauchirayare ema Viya, taicha mararihiyare ema tímisipahaviyare te mávhahi ema Maiya. **20** Taicha ema Jesús, ema tínapumirauchayarepahi eta máetupirisirayare etá viyanirayarehi, taicha macarichuhi éma ticatuparrahahi eta mayaseuchirahaviyare, macutihi ema víyarahaini Melquisedec.

7

Ema Jesús, ema tiyaseurahi eta viyehe, macutihi ema víyarahaini Melquisedec

1 Ema maca Melquisedec, émahi maparajuruhi ema Abraham. Taicha acane, te jena año, ema viáchucaíni Abraham énapa ena masuntarurana téhacacanapa nacanarapa ena réyeana, navarairahi nacuchucuha ena námereruana, émaripa ema máneva Lot, énapa ena machichanaveana. Maitahacacavacahisera. Matiarihivare ema apuna rey, táquenuhi eta avasare Salem. Émahi ema Melquisedec. Éma, mavanarahivare ema Viya, tiyujaracarahi éma. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham. **2** Tacahe, ema viáchucaíni Abraham títsirijicavapa. Máijaracapa ema Melquisedec eta diésmuri tayehe eta maganareruanahi nayehe ena mánarana. Étahi eta mámavahuhi me Viya. Ema Melquisedec, aquenucahi éma tayehe eta avasare ticaijare Salem. Eta máijare, te vechajiriruva ticaijare: “Ema Rey máuriquenéhi, tájina táichava tamutu te mávasa”. **3** Ema maca Melquisedec, eta majurusirahi, vahi taimaticarehini nájahahipuca ena ticachichanahí, nájinavare majaneanaina. Váhivare taechacare eta máuchusira étapa eta máepenirahi. Énerichuvare, nájina ema máitsivainahini ema Melquisedec. Eta matuparrahahi, ene macahehi puiti ema Machicha ema Viya, nájina máitsivainahini. Máihecuaquairehi eta mávacure tiyaseurahi.

4 Nuvaraha epanerequeneha. Ema maca Melquisedec ticapicahupanahi maicha ema Viya. Eta tacahe, ema viáchucaíni Abraham máijaracahi eta diésmuri eta maganareruhi nayehe ena réyeana máitajaruanahi. **5** Acane, matiarihihi ema mámariequenéni ema Abraham, ticaijare Leví. Te taequenepa, matiarihihi ema mámariequenéni ema Leví, ticaijare Aarón, maparapehi ema

Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahanayare éna. Tavanecahi ticobrarecanayare eta diésmuri eta navachayare ena najaneananarichuhi, mámariéqueneánaini ema Abraham. Nájina tacaitiruinahini. ⁶ Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujarauchirahi éma. Tayanapane tímijachavahipuca ticunachacarepanahi ema Abraham táichavenehi eta máijararuuanahi ema Viya eta mayehe ema Abraham. ⁷ Eta tacahe, vimutu vecha víti, mácani tiyujarauchahai ema apana, éma ticunachacarepanahi mayehe mácani mayujarauchaquenehi. ⁸ Tacahe, ena apamuriana tiyujaracarahiana tépenanapaipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táchajisihi ema, máichecuaraquire eta máitaresirahi. ⁹⁻¹⁰ Émaripa ema Leví énapa namutu ena tiyujaracarahiana mámariéqueneanáinihi, natuparahaichuhi náicuchihi eta náuchusirayare mámariéqueneanayare ema Abraham. Tásiha, tímicutiji-ricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

¹¹ Ena tiyujaracarahiana mámariéqueneanáinihi ema víyarahaini Aarón, éna tímítucanahí ena achaneana eta vanairipiana májureanahí ema víyarahaini Moisés. Váhisera naratahaimahi napamicavaca ena achaneana náitaucha tamutu. Taicha te náitauchapucaini, váipapucaini tacucamunuini ema apana tiyujaracarahi macutiyarehi ema Melquisedec, vaipa mámariéquenénahini ema víyarahaini Aarón. ¹² Émasera ema Viya máechajisihi ema apana tiyujaracarahiyare matupararuyarehi. Émapa tímechahaviyare eta máitsivachirayare eta viyanihayare mayehe. ¹³⁻¹⁴ Jararihi puiti eta apana. Taicha ema Viáquenu Jesús, vahi mámariéquenénahini ema Aarón. Éma, máchucaíni ema Judá. Te nataracu namutu ena majaneanaini, nájina émanainahini mayujaracarähihini. Ema Moisés vahi máechajisihi ema matiarahiyare ema tiyujaracarahiyare, mámariéquenehi ema Judá. Émasera ema Jesús táchajisihaquenehi eta Sagrada Escritura eta émairayare tiyujaracarahiyare.

¹⁵ Tacahe, vímatiequenehahi yátupi eta máitsivachirapa ema Viya eta viyanihayare eta mayehe, taicha ema arairuyare tiyujaracarahi, taca-munuhi eta macutirayarehi ema Melquisedec. ¹⁶⁻¹⁷ Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahiyare. Nutuparacavihi péchajiurahiyare nayehe ena achaneana. Máitavacacayare eta juca pituparaha, picutiyare ema nuvanaraini Melquisedec” macahepa. Tásiha, vímatiequenehahi puiti ema tictatuparahahi ema Jesús táichavenehi eta máitaresirayare máitavacacahi. Vahi étaparacainahíni eta nájahahipuca ema máchucaíni. ¹⁸⁻¹⁹ Tacahe, tépahapa eta vanairipiana náehiruinihi ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitauchirahini víti. Vahi tacaitecapahavihini me Viya. Puítisera ema arairuhi, tétavicavapa eta macasiñacarévahí ema. Émapa ticaitecapahavihini mayehe ema Viya.

²⁰⁻²² Ena náinapureana tiyujaracarahiana, tájina eta júramentoinhíni eta nacatuparahairahi. Émasera ema Jesús, ticapicahupanahi eta mávacurehi taicha tíjaracavahi ema Viya eta juramento, te matuparacapa ema Machicha. Taicha eta Sagrada Escritura táchajisihi, ani tacahe: “Ema Viya, váhiqene máitsivachaimahi eta máechajiriruvana. Majurachapa, ánipa macahe:

Nunerejicavihi píti, piyaseurahiyare. Nutuparacavihi péchajurahiyare nayehe ena achaneana. Maitavacacayare eta juca pituparaha, picutiyare ema nuvanara Melquisedec” macahepa. Jéhesare ema Jesús, tétavicavahi eta macasiñacarevahi eta máitauchiraya tamutu eta máijararuvanahi ema Viya. Tiúripanahi eta arairu viyanihayare me Viya. ²³ Tiuri, eta tayerevahi eta áñoanahi, camurianahi ena tiyujaracarahaniana mámariéqueneánaini ema Aarón, taicha ticaitsivanapahi, arairuanapahi éna. Étasera tíchahi ena tépenanapaichucha, vahi náimiyananavahini náitarecahini. ²⁴ Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi. ²⁵ Tásiha puiti, macarichu éma maratahahi ticatiuchahavihi viti vicasiñanahi éma. Éma, ticaitecapahavihivare me Viya. Maitavacacayarehi eta máechajiuchirahavihi taicha váiparinehi tépenaequenehahavimahi. ²⁶ Tacahéhi puiti eta macatuparahairehi ema Jesús téchajiu-chahaviyare. Tétavicavahi eta vicamunuirahi éma, taicha yátupiquenehi santo, matapiravarehi éma. Tájinavare máimatiyahini macapecaturahini. Váhiquene mácutihini ena pecatumareana eta napanereruana. Puíticha éma mávihahi tayehe eta anuquehe anuma te machacaya ema Viya. ²⁷ Éma, váhivare mácutihini ena apamuriana tiyujaracarahaniana. Éna, nacamu-nuichaha tamutuyarehi sácheana nacapaca eta sárare náijuchaqueneyarehi, tásiha nativayarepa tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachachirahi eta vipecaturana vimutu, tíjaracavainapa eta máepenirahi te crusu. ²⁸ Ena nani ajairana ticatuparaha tiyujaracarahanayarehi taicha eta vanairipiana, étasera vahi nánasihini te juca apaquehe, náepenaequenehapaichucha eta náematanere-pianaini. Émasera ema Jesucristo tiyaseurahiquenehi yátupihi. Eta macatuparahairehi tacachuricahi eta nacatuparahairehi ena nani. Maitavacacahivare eta máechajiúchirahávihi. Taicha ema Viya máichahi eta juramento eta matuparasirahi ema Machicha.

8

Ema Jesús ema vituparahahi téchajiu-chahavihi viti véhicahi eta arairu viyanihayarehi

¹ Tiuri puiti, nuvaraha yátupi ácaicutiara eta juca: Ticunachacarepanahi ema téchajurahi eta viyehe víti. Taicha matiarihi te anuma, téjacahi éma te mayehe trono te mavaure ema Viya. ² Ánaqui, eta máitauchihahi eta mávacure tayehe eta yátupiquenehi Santuario tiávhahi te anuma, máepiyaruhi ema Viya. Vahi táchutihini eta náepiyaruhi ena achaneana. ³ Namutu ena tiyujaracarahaniana, tatuparacahi náimerecayare eta námvahuana étapa eta nanaquiruvana. Éne macahehi ema Jesucristo, tatuparacahi máimerecaya eta mámvahuuyarehi, tiúripanahisera éta. ⁴ Ena náinapureana tiyujaracarahaniana, nacarichuhi ena ticatuparahanahi náimerecayarehi eta námvahuana tacamunuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi. ⁵ Énasera ena tiyujaracarahaniana te juca apaquehe, eta náemamacasareana te nayujarasirana, étachucha eta tavasihi eta tiávhahanahi te anuma. Véchahi eta tavasichucha, taicha ema Viya máemechahi ema víyarahaini Moisés eta yátupiquene Santuário tiávhahi te anuma. Ánipa maicha: “Pépiyacayare eta

Santuário tavasiyare picha eta tiávhahi te anuma nímeruvihi te piávihai pa te cerro” macahepa. ⁶ Émasera ema Jesús, tiúripanahi eta máematanerepi taicha te anuma eta máechajichirahavihi. Éma, téchajiurahi tayehe eta arairu matratune ema Viya. Eta arairu matratune, tiúripanahi eta táinapurehi, taicha téavicavahi eta viúricacarevayarehi taicha máijaracahi eta máechajiruva ema Viya. ⁷ Jéhesare, eta táinapuiru matratune, vahi náitauchaimahi ena achaneana. Taicha te náitauchahipucaini, vahi táchamunuhini máijaracahini eta apana arairu. ⁸ Émasera ema Viya, eta máimairahi vahi náitauchahini, tiápechavavarepa eta máechajiruvahí, ánipa macahe: “Tatiarihiyare eta sáchevayare tépanavayare arairu eta nutritune nayehe ena achaneana israelítana. ⁹ Vaipa táchutimahi eta natratunehi nayehe ena náchucanaveanaini te jena sache te nuvecuhainapa te nuvahu, nucuchucavacapa tayehe eta avasare Egípto. Váhisera náitauchahini eta nutritunehi eta nuyeh. Eta tacahe, nujunijiacavacapa. ¹⁰ Eta nutrituneyare nayehe ena nani israelítana te jena sácheyare, nunacachutichayare te nachutiana eta nuvanairipiana. Najiricainapa te nasamureana. Jéhevarénapa núti nacaiyaqueneyare. Tásicha, éna, jéhevarénapa nuchichanavequeneanainapa. ¹¹ Vaipa nácameaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Núti yátupiquenenuhi náquenunuhi. Namutuinapa tímatinuanayare: ena amaperuana, ena ichanaruana, énapa ena ichavicana. ¹² Énerichuvare nuperdonachavacainapa núti eta napecaturana navainarajivana. Vaipa nécharairicaimahi eta natapiravanaini” macahepa ema Viya. ¹³ Tacahe, ema Viya, te máechajisiha eta arairu matratune, tépaharipahi eta táinapurénihi. Éta táemitiaruripahi. Vaipa tasuapacarehini.

9

Eta santuário tiávhaini te Jerusalén, tavasihi eta táimahi eta Santuário tiávhahi te anuma

¹ Tacahe, eta táinapuiruhi matratune ema Viya nayehe ena nani náinapureana tiyujaracarahaniana, tatiarihihi eta nayeherepichuhi te tiyujaracana me Viya. Jéhesare, te jena Jerusalén eta távhahi eta santuario nayujarasirare. ² Ani tacahehi eta táimahi te náepiyacainapa: Eta tínapuca cuarto ticaijarehi “Lugar Santo”. Tacapicahuquenéhi éta. Éta távhahi eta candelero étapa eta mesa távirare eta pan sagrado. ³ Eta apana cuarto, ticaijarehi “Lugar Santísimo”. Éta téavicavapanapa eta tacapicahuira. Tatiarihihi eta ichapequene cortina. ⁴ Te tachacaya eta ichapequene cortina, tatiarihivre eta mesa náijuchirare eta incienso, amairiha oro. Te tajuhe, tatiarihi eta cajune, amairihavare oro, tacaunaiyahi eta márimeana ajureca eta diez mandamiento, étapa eta cajeta amairihavare oro tacaunaiyahi eta maná, étapa eta matsucurupa ema Aarón eta tímartsicaipahi. ⁵ Te tainahu eta cajune, natiarihihi ena apinana ángeleana, ticaijare “querubín”. Eta juca querubín támahi eta majaraivahi ema Viya. Tásicha, eta napavana tâepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivre eta apamuriana tayereruvanainihi eta santuario, váhisera nuvaraha nájuchahini te juca puiti.

⁶ Eta tacahehi eta táimahi eta náemamacasareana eta te santuario. Tacahe, tamutu sácheana ena tiyujaracarahaniana tisiapaparacanahi tayehe eta tínapuca cuarto eta náitauchihaparacahi eta náematanerepiana. ⁷ Étasera eta te apajuhe, tátaviuchahi eta tacapicahuvali. Macarichuhi tisiapa ema náquenumuri ena tiyujaracarahaniana. Étaherichuvare tisiapa te étana año,

mámayarepahi eta táitine eta sárareana. Éta tivachachayarehi eta mapecatura ema tisiapahi, étapa eta napecaturana ena achaneana. ⁸ Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísimo, vahí táisapahini tisiapaná ena achaneana. Puítisera vísapacarehi víti eta vítecapauchaya ema Viya. ⁹ Tamutu eta juca tacamunuhi vímatiequenehayare. Eta jena náichasareanahí ena nani tiyujaracarahaná etá nacamavahuirahí, vahí tacanarasínávacahini etá napanerueruana ena téneuchavanahí, apaesa tiúriyarepahini etá náitaresirana. ¹⁰ Vahí étapara-cainahini tayehe etá náchaneva, taicha etá námavahusana éna, tinicacarea-nachucha téracarechucha, étapa etá nacasipavahuirá te tisiapaná tayehe etá Templo. Eta júcana nayeherepianahí, vahí tímivanavaimahi. Taicha te tépenapa ema Cristo te crusu, máitsivachahi ema Viya etá vítecapauchirayarehi éma.

Tiúripanahi etá yátupiquenehi Santuário tiávhahi te anuma

¹¹ Puítisera, tímerecavapa ema Cristo. Jéhevare éma, yátupiquenehi tiyujaracarahi etá viyehe. Tétavicavahi etá táuriva etá viáchanevana máicha. Eta Santuario te anuma távhahi etá mayujarasirare, vahí tayehena te juca apaquehe tamauriquenehi. Te jena, tamutu tiúrihi, tipachinahivare. Tétavicavahi etá tacunachacareva. Tacachuricahi etá santuario nayujarasirare ena apamuriana tiyujaracarahaná, náepiyaruchucha ena vicutiqueneana achaneana. ¹² Ema Cristo, jéhevare éma mávihahi tayehe etá yátupiquene Lugar Santísimo te anuma. Vaipa mámavahuhini etá táitine etá sárareana chiqueru, chívanahipucaini. Eta mámavahuhi éma, étaquenepa etá maitine. Étaherichuhi máicha éma. Vimutuhisera viti macuchucureanahí. Tásicha, maitavacacaipa etá vítaresiraya. ¹³ Ena nani tiyujaracarahaná náepusasapairuhi etá títine etá toro étapuca etá chívachicha, étapa etá tsimapama tayehe etá esena chiqueru náijureasa. Eta júcana, tépacchinachinavacahí etá náqueheana, apaesa tásapacarepa nasiapa tayehe etá Templo. ¹⁴ Étasera etá maitine ema Cristo ema matapiravarequenehi, tétavicavahi etá títupajijiasiravahí. Tacachuricahi etá náepusasapairuhi ena nani tiyujaracarahaná. Taicha taratahahi tacaepeha tamutu etá vipecaturana, viperdonachacarepa táicha. Tímicutijircavahi tisipacahavihi tamutu etá vianerueruaini tamaeperajiquenehi, étaripa etá tímicapacahaviyarehini. Puítisera etá vítaresiraya, émainapa vicaematanecacainapa ema yátupiquenehi Viya. Ema Espíritu Santo mietetumechahi muraca ema Jesús etá máijarasiravahí tímicapacava te crusu, taicha mavaralahi etá mámavahuyarehi me Viya.

Ema Jesucristo, éma yátupiquenehi abogado etá viyehe

¹⁵ Puíticha ema Cristo, éma yátupiquenehi viyehe abogado, téchajuruca-havihi tayehe etá taequenereruhi matratunehi ema Viya. Eta maitenirahi ema Cristo, mavachacharipahi tamutu etá vipecaturanaini viti máichuhaque-neanahí éma: viti, énapa ena náinapureanaini tijacapanahí etá tainapurénihi matratune ema Viya. Tásicha, yátupihi etá macuchucuirahaviya, máijara-cahavi etá vítaresiraya maitavacacayarehi. ¹⁶ Nuvaraha nímicutichinahe: Mácani achane te manaqicahi etá testamento, májuchapa etá mavairahí máijarasicasichavacayarehi ena machichanaveana te maitenapapuca. Eta tasuapacarevayarehi, etá ley tacamesaequenehayarehi tacayaseseru te yátupipuca tépenaripa ema achane. Te yátupihi tépenaripahi, etá testamento tisuapacarehi. ¹⁷ Vuíchahasera tasuapacarehini etá testamento, te vuíchahahi tépena ema maca tépiyacahi. ¹⁸ Tacutiquenehi, etá taepriravahí etá

táinapuiruhi matratune ema Viya, tacamunupa tépena eta sárareana, apaesa navehaya eta táitine. ¹⁹ Ema víyarahaini Moisés macametarapipa tamutu eta vanairipiana nayehe namutu ena achaneana. Tacahe, mavehapa eta titsi lana mátiapusichapa eta yucuqui, máepusasapaisihayarehi eta ítiaman, táitineana eta chiqueruana, chívana. Tativa máepusasaca eta libro tiámahi eta vanairipiana. Máepusasacavare ena achaneana náurujiruvanahi. ²⁰ Tacahe, mamecacavacapa éma: “Eta juca ítiaman népusaruhehi, eta táicutiara eta íjarasiravahí itauchayare tamutu eta matratune ema Viya eta eyehe éti” máichavacapa ema Moisés. ²¹ Énerichuvare ema víyarahaini Moisés máepusasacavare eta ítiaman te tapaja eta santuário étapa tamutu eta náemamacasareana te nayujarasirana. ²² Taicha tacahehi eta vanairipi: Ticaepusasahayarehi te iti tamutuyaréni eta náemamacasareanahi eta nayujarasirayarehi, náepachiasi-hayarehi. Taicha te vahi tacuepusaicavahini eta iti, váhivare tacuepahahini eta pecatuana.

Eta máitine ema Cristo tacaepaha eta pecatuana

²³ Tacahe, eta juca náemamacasareanahi ena nani, tacamunuhi náepusasacayarehi eta nayujarasirayarehi apaesa tapachinavacahini. Eta santuário te Jerusalén náepiyaruhi ena achaneana étapa eta náemamacasareanahi, náicuti-paqueneanahi eta tiávihanahi te anuma. Étasera eta Santuário tiávihahi te anuma, tacamunuhi eta apaña iti tasivachaquene, tacachuricayarehi eta iti náepusasaruhi tayehe eta santuário tiávihahi te juca apaquehe. ²⁴ Ema Jesucristo, tájina máimatiyahini mayujaracahini eta te jena santuário te juca apaquehe. Étaquenehisera masiapa eta mayujarasirayare eti te Santuário tiávihahi te anuma. Puíticha matupihamirauchahi ema Viya eta mayaseuchi-rahavihi víti. ²⁵⁻²⁶ Ema maca tiyujaracarahi te juca apaquehe, áñopahi eta masiapira tayehe eta téqueneha cuarto Santísimo. Ticamavahupahi eta táitine eta sárare, vahi máitinénarichuhíni éma. Émasera ema Cristo, étaherichuhi eta máepusaisirahi eta máitine. Vahi mápepejircavahini te añoana. Te mápepe-jircavahini, énerichuhivaréni tiápepejicavahini eta máepenirahi puiti juca táepeniravahí eta apaquehe. Ema Viya mapanerequenehapa eta táicharracavayarehi tamutu. Te máimahapa tiuri, mavanecapa ema Machicha te juca apaquehe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha. ²⁷ Víti achaneana, eta víchararacavahi eta vítaresirahi, étaherichuhi eta vépeniraya vimutu. Te taequenepa, járajapainapa eta viyaseserehiyare. ²⁸ Énerichuvare, eta máitaresirahi ema Cristo, étaherichuhi eta máepenirahi te crusu eta macaepahairayare eti vipecaturana viyehe viti camuriqueneana achaneana. Yátupisera tiápechavaya tímerecava. Váipasera étaimahi tímiteca mavachachaya eta pecatuana. Eta tímitecayare éma, tépanahaviyarepa viti véhicanahi vicuchapanahi éma eta macuchucuirahavyarehi.

10

Eta máitine máepusairuhi ema Cristo, tacarichuhi tarataha tépachiacahavyare

¹ Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tiúrichahavyarehi. Ticutihi eta tacuna eta yucuqui. Vahi tánasihini máitavacac Cainahini eta mavanairipiana, taicha vahi táurichahini ena achaneana nácani tivarahanahi ticaijuheana ema Viya,

taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana. ² Te yátupinahini táurichavahini eta náichirahi eta nayeherepi, vahi nacuapepejiricavahini nacamasuhuhini ena tiyujaracarahaniana, énerichuvare ena achaneana tisamavana-ripahini eta náuchucuirahi. ³ Taicha tacamuñuhi nápechava te áñoana eta nacapasirahi eta sárareana, taicha tiápechavana ticapecaturanahi. Étaripa eta táepeniranahi eta sárareana táemecharairicavaca eta nacapecaturairaripa. ⁴ Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

⁵ Étasera te tiúcupaicayareipahi te juca apaquehe ema Cristo, ánipa mache mayehe ema Maiya: “Píti Tata, vahi pácamunu eta nucamavahuhini nunaquicavahipucaini eta piyehe, táitinehi eta sárareana. Píti píjaracanuhi eta juca náquehehi. Váhisera táemepururecavaimahi eta píjarasiranuhi. Eta náquehe tisuapaviyare jácani pivanésiranuya. ⁶ Váipavare pácamunu eta nacamavahuira ena achaneana eta sárareana, nájuchahini te pimirahu, táimicpacahini eta tacaepahairayarehi eta pecatuana. ⁷ Núti, tímitecanuhi puiti nítouchayare tamutu eta pivarahaqueneanayare eta nuyehe, piti Tata. Nusuapaviyare te tamutu eta pituparasiranuhi tacajuquenehi eta te Sagrada Escritura” macahepa.

⁸ Tiuri puiti, nuvaraha ecaicutiarayare eta vaipa mácamunuhini ema Viya, váipavare máurica nácamavahuhini eta sárare nájuchahipucaini ena achaneana, navarairahi táepahayare eta napecaturana, tayanapane nayeherepichucha eta náitauchirahi eta vanairipiana. ⁹ Énerichuvare, nuvaraha epanerechavare eta juca máechajiriruva ema Cristo: “Tímitecanuhi puiti nítouchayare tamutu eta pivarahaqueneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahí eta mavarahaqueneana ema Maiya. ¹⁰ Jéhevare, ema Viya tépachiacahaviripa máichavenehi ema Cristo, eta masuapirahi máitauchirahi eta mavarahaqueneana ema Maiya, máijararecahi eta máquehe eta máepeninahavihi. Étaherichuhi máicha, vahi mápepejiricavahini.

¹¹ Namutu ena nani tiyujaracarahaniana vahi nanaracahini. Tamutuhi sácheana ticamesavanaugh nanacahi eta námavahuana. Vahi táchchuquihahini eta náichirahi eta juca. Tájinaserá váhiquene tacaepahahini eta pecatuana.

¹² Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjacaripahi te mavaire ema Viya. ¹³ Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena tictianacanahi éma. ¹⁴ Taicha eta máepenirahi, eta mámavahuhi me Viya eta máquehe. Tétavicavainehi eta tajacapacarevahí me Viya eta máepachiasihahaviyarehi viti máichuhaqueanahí. Váhiquene tacamuñuhi mápepejiricavahini. ¹⁵ Ema Espíritu Santo, étarichuhivare tacutihí eta máechajiriruvahí, titametacahavíhi. ¹⁶ Ani macahehi: “Eta nutrituneyare arairu nayehe ena nani te jena sácheyare, níjaracavayare nunacasamurechayare te nasamureana eta nuvanairipiana. Najircainapa te napanereruana”. ¹⁷ Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini étapa eta navainarajivianaini” macahepa. ¹⁸ Tacahe, nuvaraha ecaicutiara eta juca: Te yátupihi táepahairahi eta pecatuana eta mámavahuhi, vaipa tacamesahini tápepejiricavahini nacamavahuhini ena apamuriana.

Vicasiñavayare eta vicaijuheiraya ema Viya

¹⁹ Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísmo, táichavenehi eta máepachiasirahavihi te máitine ema Jesucristo. ²⁰ Véhicayare eta juca arairu achene mavejiaruhi, yátupi eta tacaijuhérahi me Viya. Tájinapa táichejimirauchahavihini taicha mavejiacahi tamutu ema Cristo, eta máepenirahi te crusu. ²¹ Tacahe éma, yátupiquene tiyujaracarahi eta viyehe taicha émaquenehi téchahi namutu ena machichanaveana ema Viya. ²² Eta tacahe, tatupiruvayarehi eta visamureana eta vicaijuhérahi ema Viya. Vácasifñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájinapa eta táechipejicahavihini eta vipecaturana, tímicutijiricavahi vicavahini eta te tapachinaquene une. ²³ Eta tacahe, vímiyanava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitauchayare tamutu eta máijararuvahi eta viyehe. ²⁴ Puiti vétumechavayare vímicatajircacayare eta tápajusiravaina eta vémunaraivanaya. Vímitucacayareva eta víchirayare eta táuriqueneana. ²⁵ Váhivare viyacujimahi eta viúrujisiravana. Vahi ecucutihini ena vichamuriana, tinerejicavanahí mayanaranahanahi te viúrujicava. Vétumejircacayaresera, tavetijipa puiti eta vímairapa eta tánehirapa eta masacheraya ema Viáquenu eta machavirayare.

²⁶ Taicha te ímiyanavaichuchchapuca icha eta pecatuana, tayanapanehi ímatiripahi puiti eta yátupiqueneana, eti émepururecaripahi ema Cristo eta ímicasirahí táichavenehi eta epecaturana. Páurehesami, taicha nájina apanainahini ecasiñahini. ²⁷ Ena nani náemepururecaripahi ema Cristo, tétavicavahi eta tamuracavaya eta náicuñayare. Tisiapanayare eta táñehiquene yucu táijurequene. Eta juca eta náicuchihi návhayare ena tictianacanahí ema Viya. ²⁸ Tacutihí acane eta macaicuñaira mácani téjecapavahi tayehe eta mavanairipiana ema Moisés. Te natarihihipuca apinanahí, mapananahipuca ena testigoanahí, tímahanahí eta máejecapiravahi, tatuparacahi nacapacavaneyarehi ena tuparairucana. Vahi tijapanucaremahi éma. ²⁹ Tásicha, tétavicava muraca eta náicuñayare ena témpururecanahí ema Machicha ema Viya, ¿masi? Taicha náemepururecahivre eta máitine máepusairuhi, nacaecahivre ema Espíritu Santo, náemepururecahivre eta máemunasiravacahi ema Viya. Váhivare návarahahí náimati eta máitine máepusairuhi, étara vivachahi eta majacapirahaviyarehi ema Viya. ³⁰ Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasiracayare. Nútichucha némecharecavacayare éna”. Tásicha, ánivare macahehi: “Ticayaserehianayare ena achaneana te numirahu”. ³¹ ¡Tipicacarequenehi eta náicuñayare ena témpururecanahí te mamirahu ema Viya, tamutuquene máimaha!

³² Németeacasera ímiyanavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena tictianacaheanahí. Ecamichahisera éti. ³³ Etiarihihi éti ecaumehacasihi ecaehanahí te namirahu ena achaneana. Etiarihihivare éti ímicatacanahí tayehe eta náichavaquenevanahí ena ticaehananahí. ³⁴ Ejapanuhivare nácani ticaeratanahí te cárcel. Tacutiquene ecurisamurechavachucha eta naverejisiraheanahí eta ímahaqueneana, taicha échahi éti tictarihihi eta ímahaqueneanayarehi te anuma. Tétavicavahi tiúripanahí tayehe, máitavacacahi éta. ³⁵ Tásicha puiti, vahi ecuyacujihini. Étumechavasera eta ímitusirahi eta máechajiriruva ema Viya. Éta tiúrichaheyare, ejacapayare

eta mavachachiraheyare ichapequeneya. ³⁶ Ecayehechahavare paciencia. Ímiyanavavare ítaucha eta mavarahaquenehi ema Viya, tásicha yátupina ejacapainapa eta ícuchi eta mayehe. ³⁷ Taicha eta Sagrada Escritura, ani tacahehi: “Vaipa máyeremahi márajapainapa ema Cristo ema vicuchapaquenehi”. ³⁸ “Nácani natupiruvahi eta nasamureana, ticasíñanuanayarehi eta náitaresirahi. Énasera nácani tichavacuejechavanahi, nucaerajicavacayare táicha” tacahepa. ³⁹ Vítisera vahi vácutimahi ena tichavacuejechavanahi, énajivaya tímitaequenehavanayare. Vítisera viti vímiyanavanahi eta vicasíñavaira me Viya, vicuchucuhayarehi eta viáchanevana táicha.

11

Tétavicavaya eta viúricacareva te vicasíñavahi mayehe ema Viya eta vítaresira

¹ Te yátupi visuapa eta máechajiruva ema Viya, vicasíñayare éma, vicasíñavavare eta mayehe eta máitauchirayare tamutu eta máijararuvanahi, tayanapane vuíchaha vímahaimahi. ² Ena viáchucanaveanaini, tétavicavahi eta nasuapajiraivahi. Macunachavacahi ema Viya taicha eta nasuapajiraivahi.

³ Tacutiquene, te visuapa eta máechajiruva ema Viya, vímatiequeneha eta máepiyasirahi acane eta juca apaquehe, tájinarichahasera eta táimahacarehini. Visuapahi tamutuhi máitaucha eta mapanereruhi, máetupirisirahi tamutu eta vímahaqueneanahi puiti.

⁴ Émaripa ema víyarahaini Abel, eta masuapajiraivahi mayehe ema Viya, tétavicavahi eta tajacapacarevahi eta mámavahuhi mayehe ema Viya, tacachuricahi eta mámavahuhi ema maparape Caín. Tásicha, ema Viya macametarapihi eta majacapacarevahi ema Abel. Puíticha, májinarihpahinéni, ánaquiaparipahi eta mápenirahi, tanasihisera eta tacunachacareva eta masuapajiraivahi.

⁵ Étapa eta masuapajiraivahivare ema víyarahaini Enoc, vahi mápenanumahini te juca apaquehe eta mayaniraya te anuma. Tamutuhi eta máquehe mámahai tayehe eta apana vítaresira, eta mámirahi ema Viya. Eta Sagrada Escritura táechajisihahi eta macurisamurechirahi ema Viya. Táitusiava, mámapa éma. ⁶ Tásihasera víti, te tájinahai eta visuapajiraivainahini me Viya, váiparinehi vicurisamurechaimahi éma. Eta vicaijuheiraya éma, tativayarehi tacamunu yátupina eta vicasíñavaira mayehe, eta majacapirahaviya, viúricacareyare máicha.

⁷ Émaripa ema víyarahaini Noé, ticasíñavahi me Viya. Tásicha, tijacapacarepa. Taicha masuapahi eta mavanecasivahi máepiyasirayarehi eta ichapequene pacure, eta macuchucuiyavayarehi éma, énapa ena machichanaveana tayehe eta ichapequene une. Tájinaichahanéni ecutiararenahini eta taquivairayarehi. Máichuhavacavarepa ena apamuriana achaneana nasiapavare. Ticaicuñanapasera, taicha eta namasuapirahi.

⁸ Émapa ema víyarahaini Abraham, masuapahivare eta máichuirahi ema Viya, máijarasirayare eta apana apaquehe mávasayarehi. Tacahé, ema Abraham tiúchucapa te mávasaini, váhinéni máimatihini távihapuca eta macaijuyeyarehi. Ticasíñavahisera me Viya eta mámirahi. ⁹ Eta máitecapirahi, tímiyanava eta macasiñavairahi me Viya. Manasipa macavasahi eta apaquehe máijararuhi ema Viya, tayanapane vuíchaha mayehenahi eta apaquehe. Tájinavare mapenainahini. Cárpachucha eta mapenahí. (Ema machicha Isaac, ene macahehi eta máitäresirahi, émapa ema mámari Jacob. Taicha éna, énerichuvare natuparacahi eta juca apaquehe návasayarehi.) ¹⁰ Émasera ema

Abraham, vahi máeñamavahini. Yátupihi eta macasiñavairahi, ticuchapa-vaichucha eta máijarasirayare ema Viya eta mávasayare máepahacacayarehi eta tiásihaqueñeyarehi te mavahuana ema Viya, máetupiruhi tamutu.

11 Ésuripa, esu Sara ticasíñavahivare mayehe ema Viya, máitauchayarehi eta máijarasirava eta sucachichairaya, ichavicachicharipahinéni. Macheruhivare ésu. Máijaracahisera ema Viya eta suchicha taicha eta susuapirohi eta máitauchirayare ema Viya tamutu eta máijararuvanahi eta suyehe. **12** Tacahé, ema Abraham ichavicachicharipahivare, mapaeñumavapa ticachicha. Tásiha, tiúchucanapa ena camuriqueneana mámariéqueneana. ¡Tétavicavahi eta nasimutuvahí! ¡Vaipa natupachacarehini!

13-14 Tacahé, namutu ena nani néchajisihaqueneana, tímiyanavana eta nasuapirohi ema Viya tamutu eta náitaresiranahi. Tétavicavahi eta nacasiñavairahi eta máitauchiraya eta máijararuvanahi. Te navapureana, náimahapa eta návasaqueneyarehi. Tásiha, vahi náetupiricavahini eta nanasirayare te juca apauehe. Navaraahaiphi náitecapauchavaneyarehi eta arairu avasare natanujiruhi. **15** Éta tímicaecherachahi vahi nacatiequenehahini eta apauehe návinénihi, taicha vahi néchajisihahini nachavahini. **16** Natanucahisera eta arairu apauehe tiúripanahi, eta tiávhahi te anuma. Eta tacahé, tétavicavahi eta máurisamurevahí ema Viya eta nayehe, táichavenehi eta nacasiñavairahi eta mayehe éma. Taicha máicuchavacahi eta arairu návasayarehi, émairahi nacaiyaquenehi éma.

17 Apanavare eta máimerechirahi ema Abraham eta masuapajiraivahi, te ticavanahipa eta macapasirayarehi ema machicha Isaac, máijuchirayarehi eta macamavahuiraya me Viya. Vahi macatieuquenehahini ema émanaracavahi machicha. Taicha yátupihi eta masuapirohi ema Viya eta máechajirruva, ani macahehi: **18** “Ema pichicha Isaac, níjaracayare ena camuriqueneana mámariéqueneanayare”. **19** Taicha ema Abraham máimatihí eta tamutuirahi máituruequeneha ema Viya. Maratahahi macaechepuca ema Isaac te taequenepa eta máepenirahi. Téhesera te macapacayarepáini ema machicha, ema Viya téchajicapa. Vaipa másapahini eta macapasirayarehi, taicha máimahapa yátupihi eta masuapajirairavahí ema Abraham. Tásiha, tímicutijiricavahini máecheprénahini ema amaperu Isaac.

20 Émapa ema Isaac, yátupihivare eta macasiñavairahi me Viya eta máitauchirayare eta máechajiruvana. Te ichavicapa, mabendiciónchapa ema machicha Jacob émapa ema maparape Esaú, mavairahí najacapayare eta táurinaqueneana máijararuanaya ema Viya.

21 Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavairahí najacapayarehi eta náicuchiana. Te titapiricapa tamutu, téneuchavapa me Viya, ticayupaicaripa eta te mayupairiqui.

22 Émapa ema José, te tiánehipa eta máepenirayarehi, macaechajiruvapa eta náuchusirayare ena israelítana tayehe eta apauehe Egipto, nayanirayare te apauehe náicuchihi. Eta macasiñavairahi mayehe ema Viya, macavanai-ripipa eta náunasirayarehi eta máperana éma, tásiha, námayarehi te náuchucapa.

23 Énerichu eta nasuapajiraivahi ena ticachichanahi ema Moisés, ticasíñavanahí mayehe ema Viya. Vahi napicahini eta mavanairipiána ema rey eta nacapapajisirayarehi ena amuyana ajairana. Eta náimairahi eta

máurinavahi ema amuya, nayumurucapa éma. Mapana caje eta nayumurujirisirahi. ²⁴ Tásiha, náitucahi eta sucajurusirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahih. Vahi macatieuquenehahini eta majunijiasirayarehi esu ticajurucahi. ²⁵ Váhivare mapicaracahini eta macatajivairayarehi eta macachanerayare ena majaneanana machaneranahi ema Viya. Vahi tavayuacahini jácani tájiparacana pecatuuanahi te apaquehe. ²⁶ Ticasíñavaipahi éma eta tatiarihirayare eta máimahaqueneanayare táitsivanayare eta macatajivairaya táichavenuehi eta macatiuchirahih ena machamuriana, tacutihi eta macatiuchirahavihi víti ema Cristo. Tájinahinéni mácamunuuhini eta táimahaquenehi tayehe eta avasare Egipto.

²⁷ Táichavenehivare eta masuapajiraivahi ema Moisés, vahi mapicaracahini eta masemirayare ema rey tayehe eta Egipto eta macuchucuiravaca, mámavacahi ena machamuriana israelítana. Tétumechavarichucha taicha ticasíñavahi eta majaneasiravacaya ema Viya, tayanapané maimahasi ema Viya.

²⁸ Eta masuapajiraivahi ema Moisés, máitauchapa eta mavanairipi ema Viya. Mavanecavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tiámayarehi eta náepenira ena náechavimuri te jácani peti.

²⁹ Énaripa ena machumariana ema Moisés, eta nasuapajiraivahi, naratahahi nánueca eta ichape Mar Titsi. Témunahiricavahi tiájiji te túpiricuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu. ³⁰ Táichavenehivare eta nasuapajiraivahi ena israelítana, tiáquipaicavapa naicha eta tayuchamarana eta avasare Jericó, te jena siétequenepa sache eta návicuruarasirahih eti avasare.

³¹ Ésuripa esu Rahab túhusini, eta susuapajiraivahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

³² Nuvarahahineni numetacahe tamutu eta nasuapajiraivanahi ena apamuriana: ema víyarahaini Gedeón, ema víyarahaini Barac, ema víyarahaini Sansón, ema víyarahaini Jefté, ema víyarahaini David, ema víyarahaini Samuel, énapa ena víyarahaini profetanaini. Nararihivare ena apamuriana, tétavicahivare eta nacasiñavirahih mayehe ema Viya. Váhisera nunaca tamutu te juca eta náijareana. ³³ Eta nasuapajiraivahi éna, nararihihi ena titahacanapahi ena nánarana te avasareana. Nararihihi ena apamuriana aquenucanahi, tatupiruhi eta nagobernachirahih eti návasana. Ema Viya, eta majaneasiravaca ena apamuriana, máeratajacachavacahi eta tajacana eta tainéhiqueneana sárareana. ³⁴ Ena apamuriana, macaemahainequivare eta tajjurequene yucu te jórnu. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumechavacahisera eta nacaemataneasirahih éma. Ena apamuriana, tétavicavapa eta náitupajijasiravapahi tayehe eti guerra, náitahavacapaipa eti ichapequeneana ejército ena nánaranahi. ³⁵ Natarihivare ena esenana, eta nasuapajiraivahi, mápechava máimichava ema Viya titarecana ena najaneananaini náepenaqueneanahi. Natarihivare ena apamuriana náemépenahi eti nacatajivairasamihi. Nacamichahisera tamutu taicha eti nasuapajiraivahi, namavarairahih náinajiacahini ema

Viya, navarairahivare náimahayarehi eta táuricacarequene eta náitaresirayare te náecheputaca. ³⁶ Natiarihivare ena apamuriana, ichapemurihi eta nacaecahirasamihi, ticaestanahivare, táimitiacavacahivare te cadena tayehe eta cárcel te nacaerataiyapahi. ³⁷ Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunavacavarepa te napenana. Tiyananapa témostajiricavanapaipa. Tépacuchavanapa te taparumachichana eta sárareana eta náechuriasirapa eta nacamuirihakuene. Tájinapa naviyavapahini taicha eta napaurevavacapaipa. ³⁸ Ena nani páureanasamí, ichape eta napicauchacarevainihi. Vaipa náurihahini eta najunanairisirahi te mávapahiana apaquehe eta tataracuana eta máriana, nacapenajuechapahi eta enurujuheana. ³⁹ Jéhesare, namutu ena nani néchajisihaqueneanahi, ticatajivanahi eta náitaresirahi. Majacapavacaipahi ema Viya táichavenehi eta nasuapajiraiwanahi. Vuíchahasera náijahúchavahini nacaijaracasihini eta náicuchianahi me Viya. ⁴⁰ Taicha mavarahahi éma tihetmurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

12

Vicutiyare ema Jesús eta macamichirahi tamutu

¹ Puíticha víti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puiti éna tímararacahavianahi víti tájahapuca táicharacavahi eta vipaisirahi víti. Eta tacahe, tituparacahavi vínjicayarehi eta táitiasirahavihi eta tájiparacana, tiámaparaaurahiana tayehe eta pecatuana. Tacahe, vicamichayare tamutu, táurivaya eta vicaemataneasirahi ema Viya, apaesa vijacapa eta vícuchihi. ² Vicutiyareva ema Viáquenu Jesús. Éma, tímitucahavihi eta véhiruhi, éma tínapuisinahavivare eta masuapajiraivahi. Tayanapane ichape eta matsirihahi te máimahapa eta macatajivairayare eta macaetatairayare te crusu, vahi machavacuejechavahini. Tétumechavahisera taicha máechahi éma tatiarihihi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

³ Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ec-aheyare éti, vahi ecuyacujihini, étumechavayaresera eta éhisirahi éma.

⁴ Táitaurevaquene éti, tájinaichaha ímahahini ecatajivahini táimicapacahehipucaini eta ínajiasiraipa eta tájiparacana te juca apaquehe pecatupaire. ⁵ Vahi ecuemitisica eta máemunasirahehi ema Viya te jácani máemecharesiraheana táichavenehi eta machichaheirahi. Taicha ani tacahehi eta Sagrada Escritura: “Piti nuchicha, vahi picueñamava jácani máemecharesiraviana ema Viya, mavairahí máetupiricayare eta pipaneruana. Váhivare picuinajicava tayehe eta maconsejachiraviana. ⁶ Taicha éma, máemecharecayarehi nácani máemunaruhanahi machichanaveanahi” tacalhepa. ⁷ Tacahe, ecamichayare éti jácani máemecharesiraheyare ema Viya táichavenehi eta máemunasirahehi eti machichanaveana. Tácuti mácani achane, te matiarihi ema machicha, tímerecavahi eta tacaiyairahi eta mapena eta máemecharesirahi ema machicha, mavairahí máetupiricayare eta mapaneruana. ⁸ Yátupihi eti máemecharesirahavi ema Viya vimutu viti machichanaveana. Téhesera te tacuija ímaha eti máemecharesiraheana éma, máimerecaripa éma vahi

yátupinahini machíchahénahíni. ⁹ Tacutihi eta vijurusirahi víti te amuya-havirichaha. Témecharecahavihi ena ticachichahaviana, visuapavacapa táicha. Tásicha, tавetijipa eta visuapirayarehi ema Tata Vicaiyaquenehi apaesa éma tíjaracahaviyarehi eta taurivayarehi eta vítaresiraya. ¹⁰ Ena ticachichahaviana, ánipirichu eta námitusirahavihi jácani eta navarairahi éna viúriyarehi nayehe ena achaneana. Émasera ema Viya, tiúripanahi eta vímitucasivahi mayehe. Éta tiápajucava tiúrichahaviyare. Tépachinachahaviyarehivare éta. Mavarahahi vicutiyarehi eta masantuvahi éma. ¹¹ Jéhevare, te tatiarihipuca eta vicaemecharahirana, vahi viúrisamurémahi táicha. Ticatili visama. Téhesera te vétupiricava táicha, tétavicavayarehi eta viúricacarevaya te visamureana taicha tatupiruhi eta vítaresira.

Tétavicava tavarahacareva te visama eta máechajiruva ema Viya

¹² Tacahe, nuparapenaveana, nutuparacahe étumechacaca nácani nayacu-jihipuca. Ímicatacaca eta etupihaira muraca eta éhisirahi. ¹³ Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicaheanahi te équene. Táuri eta iámiracacaina, apaesa nacaravahuyare náetupirica eta napanereruana, náetumechavavare énajiva.

¹⁴ Tacuijavare ecuichiravainahi nayehe namutu ena achaneana. Yátupina eta epachinavaina te esamureana étapa eta iúriva eta ítaresirana. Taicha te vahi tiúrihi eta ítaresirana, vahi eratahaimahi ítecapaucha ema Viáquenu. ¹⁵ Ejaneacavaicha yátupina, machu etiarihipuca eyacujihi, tásicha émepurureca eta máimicatasirahe ema Viya. Tacuija eta ecuimipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca taurinaguenehi, táimicacapapa. ¹⁶ Nacuijavare te etaracu nacuveha esu apana esena. Nacuija nacuepuru jácani tipicauchacareanahi. Vahi ecucuti ema achane ticajire Esaú. Eta mavarahaihi tijahúchava tinica, máijara-recapa eta máicuchinihi mayehenihi, taicha éma, máechavihi ema maparape. ¹⁷ Écharichuhi éti, te taequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tíyahahi. Vahi maratahahini ticajimuyacahini ema maiya.

¹⁸ Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihihi eta yucu timuruhi te tápusi. Énerichuvare te távhahi eta timapicuquenehi, távhahivare eta tainiquene emarere. ¹⁹ Muracaguene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tisamanahi. Eta tacahe, tiyaseserecanapa vaipa macuechajicavacahini. ²⁰ Eta napicacarasiravahi, navaraha tichavacuej-chavana. Ichapequenehi eta tapicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tiápanapuca te juca cerro. Ecapacavaneyarehi te márijahi, te váhipuca ticayu-varayarehi te lanza” tacahepa. ²¹ Tacahe, tétavicavahi eta tainiquene, émaripa ema Moisés ani macahehi: “Nuyayacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca tipicacareanahi.

²² Étisera tachichaheanapa puiti eta mávasa ema Viya Vicaiyaquene, ticaijare Arairu Jerusalén*, eta távihahi eta cerro Sión te anuma, te náurujisi-havahi ena camuriqueneana ángeleana eta najirauchirahi ema Viya. ²³ Éti esiapapa eta nasimutuva ena ecutiqueneanahi machichanaveanahi ema Viya. Ecajucunavare eta nalista. Natiarihipa ánaqui eta náchanevana ena machichanaveana náepenaqueneana. Natupiruhi eta náitaresirahi. Tipachinavaqueneanaripahi puiti, sántohivare. Matiarihivare ema Viya, yátupiquenehi Juese viyehe vimutu víti. ²⁴ Matiarihivare ema Jesús ema tiyaseurahiquene eta viyehe. É mahi ema tiámahi eta arairu matratune ema Viya. Émaripa máepusaicapa eta máitine tasipahacahaviyarehi, apaesa vijacapacareyarehi me Maiya. Eta máitine ticunachacarepanahi tayehe eta máitine ema víyarahaini Abel.

²⁵ Eta tacahe, échapavaicha éti. Vahi ecuepuru eta máichuarapianahi ema Jesucristo. Machu ácuti ena tépuruanahi eta mavanairipiana ema Viya, máimiturapianahi ema Moisés. Étapa tímicuñacavacahi éna. Vivetijinapapuca víti eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma. ²⁶ Taicha eta acane, eta mahu ema Viya, tétavicava eta tamuracava. Tiyayacarehi taicha eta apaquehe. Puítisera, ani macahehi éma: “Étaherineyare tiyayacare nicha eta apaquehe. Váhisera tácarichuimahi. Éneyareichuvare te anuma” macahepa. ²⁷ Eta juca máechajiriruvahi, tímaticareipahi eta táitavirayare tamutu jácani tiyamuricanahi máepiyaruhanahi ema Viya te juca apaquehe. Tacarichu tanasiyare jácani máitavacacaqueneana taicha mayamurianahi.

²⁸ Étaripa eta mávasa ema Viya, mavarahaquenehi máimiávhahavíhi, máitavacacaquenehi éta. Eta tacahe, vihasulupayachaparaca éma. Vétaviuchainavare eta vipicauchiraya éma. Tásicha, vicurisamurechaina éma eta vivapinava ichape eta vijirauchirahi éma. ²⁹ Taicha ema Viáquenu macutihi eta yucu, maratahahi máitaequeneha mámainuca.

13

Vicurisamurechayare ema Viya

¹ Tiuri, nuprapenaveana, vahi ecucainajiruva eta émunajirisiracacahi, táichavenehi eta echamuricacairahi te mavahuana ema Viya. ² Vahi ecuemitisicava eta táurirayare eta ejacapiraya ena echimarana te epenana. Taicha tajuricati ángeleanainapahi nácani tipaipiuchaheanahi, éta vahi ecuimatihi.

³ Énerichuva échayareva nayehe ena ticaeratana. Ejapanuvaca éna, támicuñijicavahini étinahini ecaeratahini ecachanevacahini. Énerichuvare ejapanuyare nácani náemejapanuráruana taicha éna étarichuhi eta náqueheana tacutihí eta iáqueheana éti.

⁴ Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijasera eta échipeacava eta evehacacairahi ena apanana. Ema Viya máicuñacayarehi nácani tivehacacanahi vahi nacuchapahini náitauchavahini, énapa ena ticayepecacanahi.

⁵ Váhivare tacuvayuacahe eta plata. Taratarichu tacurisamurechahe jácani íturevahí ecayehequenehi. Ema Viya ani macahehi eta máechajiriruvahi: “Vahi nujunijicavimahi, váhivare némitisicavimahi” macahepa. ⁶ Tacahe, vicasiñavayare mayehe ema Viya te viyaseaca. Ani vicaheyare te visamure:

* **12:22** Te pivaraha pecha eta apana tayehe eta Arairu Jerusalén, pitanuca te libro Apocalipsis 21.2-27 étapa 22.1-5.

“Ema Viáquenu ema tímicatacanuhi. Vahi nupicaimahi jácani náichiranuhi nácani achaneana” vicaheyare.

⁷ Échavayare ena tímitucaheanapaini tímisamaheanahini eta máechajiruva ema Viya. Natupiruhi eta náitaresiraini. Éti, epamicava ecutiyare éna eta nacasiñavairahi me Viya.

⁸ Ema Viáquenu Jesucristo, vahi máitsivacha eta máurivahi eta viyehe. Manasihi puíticha, étapa eta apajarahiyare. ⁹ Eta tacahe, vahi ecuisapava ecuehica eta jácani apanapenenejiqueneana náimiturapiana. Tiúripana étumechayare eta esamureana, táichavenehi yátupiquene eta máemunasirahavihi ema Viya. Étapasera eta nayeherepiana tayehe eta tinicacareana, vahi étaparacaina taicha tájinachucha támicatacavacahini ena ticayeherepianahi.

¹⁰⁻¹¹ Eta nayeherepinihi ena tiyujaracarahaniana tayehe eta santuario te Jerusalén, natuparahahi eta nanicasarehi eta námvahuana ena achaneana. Étahi eta navachachahi eta nacaemataneasirahi. Étasera eta sárareana námvahuanahí, navarahahi tacaepahayarehi eta napecaturana, éta, tituparacavaca vahi nacunicahini. Étachucha eta táitine mámahi ema náquenu ena tiyujaracarahaniana tayehe eta téqueneha cuarto Lugar Santísimo. Étasera eta táqueheana, náijuchaqueneyarehi te tachachacu eta avasare. Vítisera, mararihi ema apana tiyujaracarahi eta viyehe, apanapavare eta mayujarau-chirahavi. Vahi énaparacaimahi ena náinapureana tiyujaracarahaniana. ¹² Ema Cristo, ticatajivahi eta máepenirahi te tachachacu eta avasare, mavarairahi máepachiaca havyarehi viti achaneana tayehe eta máitinerihu éma. ¹³ Tacahe puiti, vínjicavayarehi eta nayeherepiana ena vijaneanana. Vahi étaparacaina viyehe. Yátupina véhicayare ema Jesús. Tayanapane vicatajivayarepuca, vicutiyaresera éma eta macatajivairahi. ¹⁴ Taicha te juca apaquehe, tájina vahi táyeremahi eta avasareana étapa eta tayeherepiana. Vítisera tachichahavipa eta avasareyare arairuyare. Apanainapa eta viyeherepiana víchaqueneanayare. Tétavicava eta vijamurachirahi viyápavane. ¹⁵ Tásicha puiti, eta véhisirahi ema Jesús, tavaraha eta vijirauchiraparacayarehi ema Viya tamutu sácheana, yátiana. Te jácani tájahapuca víchararacava, váhasulupayachavare éma. Eta juca eta viámavahuhi eta mayehe. Éma vicavapajayarehi. ¹⁶ Énerichuvare, vahi ecuemitisica eta íchirahi eta táuriqueneana. Ecajiyareva ena echamuriana eta ecayehequeneana. Eta tímicutijiricavaipa eta iámavahuhi me Viya. Éta ecurisamurechirahi éma.

¹⁷ Esuapayareva nácani tímitucaheanahí, evapinavayare nayeheta esuapajiraivahi. Taicha éna, tijaneacaheanahí eta iáchanevanahí éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuimipanerechavaca eta eyacujiva, emasuapajiraivapuca.

¹⁸ Eyaseuchanuyare nútí te eyujarasirana. Nucasiñavaipahinéni nútí táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehetamutu ena achaneana. ¹⁹ Nuvarahasera eta eyaseuchinanu me Viya, másapanuhini éma níjahúchavahini nuchavahini eta eyehe.

Ema Apóstole mayaseuchavacahi ena machamuriana me Viya

²⁰ Ema Viya, tétavicavahi eta macanarasirahavihi eta vipaneruruana. Éma tétavicavahivare eta máitupajijasirava taicha macaechepucahi ema Viáquenu Jesucristo te máecari, apaesa émayarehi yátupiquenehi Pastoryare,

tijanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma. ²¹ Núti nuyaseuchahé me Viya, máimicatacahehini ítauchayare tamutu eta mavarahaqueneana, íchirahi eta táuriqueneana apaesa ecurisamurechahini éma te tamutu eta ítaresira eta éhisirahi ema Machicha Jesucristo. ¡Máitavacacayare eta vicu-nachira ema Cristo! Amén.

Eta táchecuaraqui eta natuparacasivahi

²² Nuparapenaveana, nuvaraha nuyaseacahe ácayehéni paciencia tayehe eta juca nuconsejarapihi eta eyehe. Ánipichichahi nájurehi tayehe eta juca nucartane. Jararihisera camuriqüeneana eta apava nuvarahahi numetaruheyarehini. ²³ Numetacahevare ema viparape Timoteo tiúchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanaha.

²⁴ Néchajicahe emutu eti ejanearahiana ena vichamuriana. Échajisina-nuvaca namutu ena vichamuriana vicutiqueñeanahí tisuapajirahianahí te jácani návihahi éna. Ani te juca, nucachanevacá ena vichamuriana náiteruana te Italia. Téchajicaheanavare éna.

²⁵ Nuyaseuchahéparaca emutu éti me Viáquenu Jesucristo, táchetaviuchahini eta iúricacarevaya máicha. Amén.

Tamutupa eta juca néchajiriruvahi eyehe.

Eta macartane ema Santiago nayehe ena majaneanana machamurianahivare, náejanerepairuanahi te avasareana, ticaijare **SANTIAGO**

1 Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

Eyaseacayare eta ítupajijiasiravaina

2-4 Nuparapenaveana, nuvaraha nuconsejachahe: Te tatiarihinaipuca eta ecatajivairana puiti juca ítaresirahi, vahi ecucainajiruva. Evapinavachucha, ácasíñava mayéhe ema Viya. Taicha te yátupina ecasiñava mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratamacava. Mavarahahi ema Viya tátupiruvahini eta ítaresirana. Eta tacahe, te tatiarihipuca eta ecatajivairana, ecaurisamurechavachucha. Evapinavaya, taicha iúripanayare eta iúchucuirayare.

5 Tacahe, te tatiarihinaipuca eta téchacare, te váhipuca íturuequenehahini, eyaseacayare ema Viya eta ítupajijiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta viyaseasirana jácani vicamunuqueneana. **6** Yátupinahisera ácasíñava me Viya eta eyaseasirayare eta ítupajijiasiravaya. Vahi ecueñamava mayehe. Taicha te éñamavapuca, tímicutijiricavaipahi ecutihi eta táepacuruha eta une téquequerecavahi. **7-8** Taicha nararihi ena téquequerecavanachucha eta napanereruana. Vahi étanainarichuhini jácani navarahaqueneyare náicha. Nácani tacahehi eta napanereru, éna tájina máijaracaimahi ema Viya.

9 Émaripa mácani vichamuri, te páurehipuca eta máitaresirahi, tivapinavayaresera taicha eta máimicatasiraipa ema Viya taicha eta máemunasirahi.

10 Émaripa mácani vichamuri rícoquenehi eta máitaresirahi, énerichuvare tivapinavayareva, tayanapane titahapuca eta máimahaqueneanahi. Taicha eta vímahaqueneanahi te juca apaquehe, vahi taeñamacarehini, taicha titavyarehi tamutu. **11** Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu titava eta táurinajivainihi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapane vahi macuvaraha titava, máitucahipuca eta macaematanera.

12 Tétavicava eta náurivayare nácani vichamuriana ticamichanahi tamutu eta nátajivanahi. Járabajayare eta sácheinayare eta najacapiraya eta táitsivayarehi maicha ema Viya, máijaracainapa eta táurivayare eta náitaresirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

Másapa ema Viya eta jácani víchavaqueneyanaya, mavarairahi tétupiricahaviyare

13 Téhevare tatiarihinaipuca eta ejecapiravaya jácani tamauriqueneanahi, vahi émaimahi émeteaca ema Viya. Taicha vahi tásichaquenéna me Viya eta juca tájiparacana. Nájinavare mapamiruimahi náichahini eta júcana.

14-15 Nácanisera náquipairuvana tayehe eta tamauriqueneana, táchurepa te

napanereru tamauriqueneana, tásicha navaraha náichayarehi eta pecatuaná. Vaipa nanecapavahini eta náichiraipa. Téhesera te táequenénapa, étapa tiviuchayarehi. Tíñehicha eta táimicapasiravacaina.

¹⁶ Némunaruqueneana nuparapenaveana, machu éjecapava tayehe eta juca numetaruheanahi. ¹⁷ Ema Viya, étanarichuhi eta mapanereru. Vahi apanapanenejinahi eta máuriva viyehe. Éma, tíjaracahavihi viti achaneana eta majaiva, étapa tamicahuhi eta viáchanevana. Taicha tamutu eta juca taurique-
neanahi vijacapaquenehi puiti, tásichaqueneanahi me Viya. Vahi apaesasajiruinaichuhini eta taurivahi. Jéhevare eta yátupiqueneanahi. ¹⁸ Taicha acane tacahehi eta mapaneruana, mavarairahi vijacapayarehi eta yátupique-
neanahi máechajiruvana apaesa machichahavyarehi. Eta máitsivachirahi eta viáchanevana, ticaecherahi máitsivachayarehi tamutu eta apamuriana máepiyaruana te juca apauehe.

Vímerecavaya yátupi eta visuapirayare eta máechajiruvana ema Viya

¹⁹ Eta tacahe, eti némunaruqueneana nuparapenaveana, nutuparacahecha yátupina tauri eta esamiraina eta máechajiruvana ema Viya. Vahi ecuijajahúchava eseema. Epanerechinava eta échajisiraya. ²⁰ Taicha nácani tisemarai-
rihiana, vahi étainahini náichahini eta mavarahaqueneana ema Viya. ²¹ Puiti te juca vítaresirahi, jararihi eta tavarairahi vianerechaya tayehe eta tájiparacana, tamaeperajisira eta viáchanevana. Tétavicavavare eta tapamisirahavihi vicha eta tamauriqueneana. Puítisera nutuparacahe: Ínajicapa tamutu eta júcana. Ecasamureyareva eta máechajiruvana ema Viya eta ímitucasi-
vanahi. Yátupina esuapa. Jéhevare, éta ticuchucuhayare eta iáchanevana.

²² Ítauchayare eta tametarapianahi eta máechajiruvana ema Viya. Vahi tacuejecapava eta epaneruana, machu ímijachapuca taratarichuhi eta esamararasirahi. ²³ Vahi ecucuti nácani nasamarararuchucha, tásicha vahi náitauchahini eta tavanairipihi, tímicutijiricavaipa nácani tímacunachavanahi te espejo. ²⁴ Tásihasera, vahi nasipacahini eta náimahaquenehi nachipequivahi. Tásicha, tiyananavanepa, náemitisicavanepa. ²⁵ Étisera ecutiyare ena natupiruvanahi eta nasamirahi tauriva eta yátupiqueneana vímiturapiana tásichaqueneanahi me Viáquenu. Vahi ecuemitisica. Tásicha, ítucayare enerejica eta tauriqueneana, esuapayareva eta ímitucasiqueneanahi. Tásicha, tétavicavaya eta iúrivaya táicha.

²⁶ Nararihipuca nácani tímijachavanahi religiosoana. Téhesera vahi náitucahini ticaratatajachavana, ena nani téjecapavanahi eta napane-
reruana. Tájinachucha vahi émainahini nasuapahini ema Viya. ²⁷ Vítisera, eta vitauchirahi eta yátupiquene téhicacare, te vivaraha tájina vechajisiacarevaina te mamirahu ema Tata Vicaiyaquene, tatuparacahi vijapanuyare vítatiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavihivare vahi víchaimahi eta pecatuana te juca apauehe.

2

Nácuticaca ejacapa ena achaneana

¹ Nuparapenaveana, éti éhicanahi ema máitupajijihaquenehi Viáquenu Jesucristo, vahi tauricahini enerejicavaca ena echamuriana ejacapaqueneanaya.

² Étaripa te natarihinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacapiraya mácani tiúrinahapahi eta macamuirihirahi, ticasurutijapahipuca eta oro. Énerichuvare ejacapayare mácani paure, tévichíjhahapahípuca. ³⁻⁴ Taicha téjecapavahi eta epaneruana,

te macarichuhi mácani tiúrinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta maejasicha, tasapiha evanecainapapuca téjahapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

⁵ Némunaruqueneana nuparapeneveana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tiápajupananavanahí etá náurivaya taicha ena ticaicu-chianahi eta mávasa ema Viya taicha machaneranahi. Nacachaneyarehi ena apamuriana témunacanahi éma. ⁶ Étisera evarahapa ímitsirihavaca ena páureana, nasapihana échapajiricahi ena rícoana. Ticutiripa vahi ímativacahini eta náemeratasiraheripa, te apaesachichapa éjecapava. ⁷ Ticutiripavare vahi ímativacahini eta nacaecahirahi ema Cristo, nacaecahihivare eta iámirahi eta máijare tacapicahuquenehi.

⁸ Puítisera éti, yátupiyare ítaucha eta ticunachacarepanaqueñenehi mavanairipi ema Viya tayehe eta Sagrada Escritura. Ani tacahehi: “Pémunacayare ema piparaepiya táchuti eta pémunasiravahi píti”.

⁹ Téhesera enerejicaichucha nácani émunaruanahi, ecapecaturaichucha eta emasuapirohi eta mavanairipi ema Viya, éta tiviuchaheya. ¹⁰ Taicha te natarihipuca nácani náitaucha tamutuyaréni eta vanairipiana, téhesera apesarichu eta néjecapiravahi, étapa tiviuchahi eta náicuñayare, tímicutijiricavahi vahi náitauchahini. ¹¹ Taicha ema Viya, ani tacahehi eta mavanairipihi: “Vahi picuveha esu apana esena. Váhivare picucapareca”. Piti, te váhipuca pivehahini esu apana esena, picaparecahisera-puca, piáviraichuhi picaviurevahi.

¹² Iúrihainehi ejacaparahihini nayehe namutu, táurihini eta échajirisiravana. Vahi ecuemitisica eta tatiarihiraya eta sache ecayaserehiraya tayehe eta juca vanairipiana. Étara tétupiricahavihi. ¹³ Taicha nácani majapanurairahanahi nayehe nácani apamuriana, tájinavare najapanucarevaimahi te nacayasese-rehipa. Nácanisera tijapanurahianahi, ichape eta najacapacarevanaya me Viya te jena sácheyare.

Vímercaya eta visuapajiraivaya étapa eta vicaematañesiraya ema Viya

¹⁴ Nuparapenaveana, nuvaraha níminecapaequenehaheyare. Te natarihiñapapuca nácani nacahehi: “Núti nusuapa ema Viáquenu”, tásahi vahi náichahini eta táuriqueneanahi, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu. ¹⁵ Nuvaraha nímicutichinaheyare eta juca. Te mararihipuca mácani vichamuri ticamunuvhahi eta mamuiriharapiyare, manicaquenerepipuca te sácheana.

¹⁶ Tásahi, mácani echamurihi tépiyacavahipuca tijapanurahiihi. Máichahipuca: “Páurevisami piti, te picasarechahipuca, pépacuchava. Te pécuhapuca, pinica”. Tásihasera, te vahi máijaracahini eta macamunuquenehi, tamapurujichucha eta máichirahi. ¹⁷ Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

¹⁸ Tiuri puiti, németeaca etiarihiyarepuca eti épuruyare eta juca numetaruheanahi. Áninapapuca ecaheyare: “Tarataripa eta vicasiñavairahi me Viya. Vaipa étaparacaina víchahini jácani apamuriana táuriqueneana” ecáhénnapapuca. Nútisera numetacahe: Vahi tisuapacaremahi eta ecasiñavairahiji, te vahi íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasiñavairahi mayehe ema Viya.

¹⁹ Éti ímijachaipapuca tarataripahi ticuchuchuhahayare eta esuapirohi eta

matiarihirahi émanarichu ema Viya. Táitaurevaquene esuapahi eta matiarihirahi ema Viya. Apanasica ena éreanana nasuapahivare eta matiarihirahi ema Viya. Tayanapane eta nasuapirohi, váhiquene tiúchuhuanaimahi éna. Énaripa, tiyayacareanahi éna te nasama eta máijare ema Viya. ²⁰ ¿Vuíchahacaru ácaicutiarahini? Tiuri puiti, níminecapaequenehaheyare, taicha nuvaraha ácaicutiara: Tacamunuhi íchayare eta táuriqueneana tacachaneyarehi eta ecasiñavairahi. Tamapurujicha eta ecasiñavairahi te vahi ecuquichahini eta táuriqueneana.

²¹ Nuvaraha némechahe mayehe ema viáchucaini Abraham. Eta acane, émaripa macaitsamarajih ema Viya, te yátupihipuca eta masuapajiraiva. Mavanecahi máechatinucayarehi ema machicha Isaac. Tacahe, ema Abraham, máechatinucayarepainti ema machicha, máimeresirayarehi eta masuapajiraivahi yátupi. Eta tacahe, ema Abraham, tétavicavahi eta majacapacarevahi mayehe ema Viya. ²² Étara ícutiaraya eta juca masuapajiraivahi yátupi ema Abraham. Vahi máeñamahini ema machicha eta mavarairahi máimerecayare yátupi eta masuapirohi. ²³ Taicha eta táchajiriruvahi eta Sagrada Escritura, ani tacahehi: “Ema Abraham masuapahi ema Viya. Tásicha, tétavicavainehi eta majacapacarevahi ema Abraham. Éma, máemunacasarehi ema Viya”.

²⁴ Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirohi. Vahi tarataha eta vicaheira: “Núti nusuapa ema Viya”. ²⁵ Níminecapaequenehahe eta acane tacahehivare eta súchucuirahi esu esena túhusiquenénihi ticaijaro Rahab. Ésu, ticiuchavacahi ena vanairucanahi mayehe ema víyaraha Josué, suímicatacavacahivare eta náitujisiravayarehi tijunana nayehe ena tifaratacanayarehini. Eta máimairahi ema Viya eta juca suíchirahi, ichaperinehivare eta majacapirahi ésu. ²⁶ Eta juca tacutihu eta viáquehe te tajunijica eta viáchaneva, enevanerinehi tésamiricava eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viúrivahi, víchirahi eta táuriqueneana.

3

Eta vijaca, tamutu tajarareca

¹⁻² Nuparapenaveana, yátupi vimutu véjecapava tayeheteta vechajisirana. Nájina émanaina vahi macuejecapavaini eta máechajisira. Te matiarihinaini mácani achane vahi macuejecapavaini, ichapehini eta macunachacarevahnini, taicha éma, yátupihi eta máitupajijiasiravahi, máitucahivare ticaratacava eta máquehe. Eta tacahe, nuvaraha nuconsejachahe: Tacamunu na-janeacava muraca nácani náimereca eta navarairahi máestroanayarehi tayeheteta máimiturapiana ema Viáquenu. Échavayare eta vicayaseserehirayarehi muraca me Viya viti máestroanahi.

³ Nuvaraha nímicutichinahe. Eta juca tímicutijiricavahi te vicapera eta cavayu: vinacapa eta freno, vichurujacachapa, viámapa te jácani vivara-haquene viámiha. ⁴ Tacutiquene eta ichape lancha, tábavatajicaneni muraca eta técaticava, étapa eta tajunapira muraca eta une, taratahayarehisera táimitupirucha eta tayeheteme váhineni ichapenahini, ema piloto máimitupiruchayarehi te jácani mavarahaquene mámihayarepahi. ⁵⁻⁶ Ene tacahehi eta juca vijaca. Ánichicharichunéni tayeheteta viáquehe. Tasapihahisera táchajisihihi eta ichapequeneana. Tacutiquene eta yucu. Ánichicharichunéni eta táepanirava tájucha, taratahayahisera tájucha eta ichapequene vámahi. Nácani achaneana te vahi náitucahini tifaratajacachavana, amairijipa tamutu eta

náitaresira. Tíñehicarehi najarareca ena nácani camuriana achaneana taicha eta náechajiriruvanahi. Ena nani téchajisihanahi eta tamauriqueneana, éna mávaháruanahi ema Váinaraji, téchahi eta infierno.⁷ Ena achaneana narataha namansucha eta cágureana étapa eta quichareana étapa eta táiñehiqueneana sárareana tiávhana te apaquehe étapa te une.⁸ Étasera eta jacare, nájina ticaratacaina, taechajisihayarehi eta tamauriqueneana. Tacutihi eta jumare te nájina tiratahaimahi tipuchaina, tiámahivare eta tacapasiravacayare ena achaneana.⁹⁻¹⁰ Eta jacare, étarichuvare táuchusihai eta náechajiriruvana ena ticunachanayarehi ema Tata Vicaiyaquene. Ticunachacarehi eta juca. Váhisera ticunachacaremahi te tiúchucahi eta jacare eta náumehair ena nacutiqueneana achaneana naparaepíyanahi me Viya. Nuparapenaveana, tatuparacahi vahi ecaecahihini ena ecutiqueneana tiámanahi eta macaquehera ema Viya.¹¹ Tacutiquene eta une, te tipachinahi eta tajututurusirahi te apaquehe, vahi tíjhúchavaimahi titsiriecava, táuchucapucaini tisucarea-mahini, ticheveamapucahini.¹² Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinapahini. Ene tacahehi eta une, vahi tajututurucahini te apaquehe eta tipachina une tacachanepahipucaini eta ticheveama. Nuconsejachahe: Ecunachachucha. Vahi ecumehareca.

Te yátupihi eta véchemaraivahi, tatuparacahi víchayarehi eta táuriqeneana

¹³ Te natariihinapuca te etaracu nácani náchemahahi tamutu, tatuparacahi náichayare eta táuriqeneana, yátupinavare eta namansuvayare. Étapa tímicaecherachayarehi eta náitusirahi.¹⁴ Te etiarihipuca eti ímijachavahi échemahahi tamutu, tásicha ecapinarurecarichuchasera te esamureana, evarahapa iápajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini.¹⁵ Eta juca échemaraivavacahi, vahi étainahini tásihaqueñenahini me Viya. Tayehechucha te juca apaquehe tásihaqueñechucha eta ne achaneana, máevaequeneruhi ema Váinaraji.¹⁶ Taicha ena ticapinarujircacanahi téhajircacanapa. Vahi tacutecacahini eta napanereruana. Náicharichucha eta tájiparacana.¹⁷ Nararihisera ena yátupiquenehi eta náchemaraiva, tásihaqueñehi me Viya eta náitupajijiasiravanah. Náimerecahi tativa tatupiruvahi eta napanereruhi. Táurivahivare eta náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqeneana, ticajirahianahi. Nájina nanerejiruina. Tatupiruvahi eta náechajirisiravana.¹⁸ Nácani ticatiurahianahi, náetupiricahi eta náitaresira ena apamuriana. Jéhesare, tájinasarépa náichiravainah. Nanaquipaicahi eta táuriqeneana.

4

Ema Viya mavaraha vínjica eta tájiparacana

¹ Puítiripa, ¿tájaha tacayema eta éhajiricácahi? Éti ecuticacahi ena apamuriana eta ejamuraraivanahi. Éta, timaurichahéhi eta tájiparacana, étijivaichucha íchavahi.² Éti ejamurachahi ecaimahaquene. Étasera emaitusiravahi, evarahapa ecapaca ena ticaimahaqueneanahi. Éti ecapinarurecahi. Éta emaitusiravahi, téhacacapa eta échajirisiravana; tásicha, éhacacauchapa. Nuconsejachaheyare: Eyaseaca ema Viya eta ecamunuqueneanahi.³ Éti eyaseacahinéni éma, váhisera máijaracahehini, taicha vahi táetupicavahini eta eyasesearapiana, étachucha eta tajamurachaqueneanahi eta iáquehe.

⁴ ¡Tétavicavapa eta emaetupisiravahi eti achaneana! ¡Éjecapavahi ichape mayehe ema Viya! Evarahapa éhica eta nayeherepianahi ena achaneana masuapajirairahanahi. Tihapapicahepa eta tájiparacana te juca apaquehe. Masapihapa epuruyarehi ema Viya, ecatianacapa éma. ⁵ Éti ímijachai-papuca taepeiyevahi eta taechajiruvahi eta Sagrada Escritura. Ani tacahéhi: “Eta mávahásirahavihi ema Espíritu Santo, téñiamahaviripa vahi vihapasamurechaimahi tayehe eta tamauriqueneana”. ⁶ Étaripa eta máemunasirahavihi ema Viya, tétumechahavihi, mamavarairahi víchahini eta tamauriqueneanahi. Taicha ánívare tacahéhi eta Sagrada Escritura: “Ema Viya macatianacavaca ena tisiñavavairicana. Máemunacavacahisera máimicatacavacahivare ena mánsuana”.

⁷ Eta tacahéhi, esuapa yátupina ema Viya. Ecanaraya ema Váinaraji, te mavaraha mavayuacahe. Jéhesare, tijunijicahénapa éma. ⁸ Puiti, yátupina eta epauchipirahí ema Viya. Tásiha, ema apanavare tipauchaheyare. Ínajicapa puiti eta íchira eta tamauriqueneana. Émitisicainapa eta ejamurachira eta tájiparacana te esamureana. Taicha éhicasareipa ema Viya. Vaipa ecupanerecha eta nayeherepiana ena achaneana masuapajirairahana te juca apaquehe. ⁹ Puiti, éneuchava me Viya. Íyauchava táichavenehi eta éjecapiravanhí. Vaipa ecuecarairicava, vaipa ecurisamure eta íchira eta tamauriqueneana. Ácatisamurevasera táichavenehi eta tamutu eta tamauriqueneana íchaqueneanahi. ¹⁰ Ecajapanuravayare eta éneuchiravayare te mamirahu ema Viáquenu. Tásiha, tétavicavayare eta ejacapacarevainapa mayehe ema Viya.

Vahi picucaeahi ema pichamuri

¹¹ Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macaecahipuca, mavaraha máicuñaca mácani machamuri. Émaripa máepurripahí eta mavanairipi ema Viya. Nuvaraha numetacahe: Te épuruhi éti eta mavanairipi ema Viya, eta tímicaecherachahehi eta emasuapirohi éma. ¹² Ema Viya, émahi ticavanairipihi. Macarichu éma tatuparacahi téchayarehi te tiúrihipuca eta náichaqueñeana ena achaneana. Téchayarehivare eta máicuñasiravacahi ena téjecapavanahi. Vahi étina tatuparacahehini ícuñacahini ena echamuriana.

Vahi vítina vecha eta vítaresira

¹³ Esamanuchaha. Vahi táuricahini ácahehini: “Puiti juca sácheana, achichupuca, nuyanaya te apaza avasare. Níjararecaya eta nucayehequeneana. Tiámainucava nuchava te apaza año. Ichapeyare eta nuganare-ruyare”. ¹⁴ Éti, vahi échahini tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyaru. Ánipirichu eta tacaecheraira. Tásiha, témitiacaripavare. ¹⁵ Iúrihainehi ácahehini: “Ema Viya téchahavihi eta vítaresira. Te mavaraha éma, vítauchayarehi eta juca vipaneruhi” ácahehini. ¹⁶ Étisera, tétavicavapa eta ecasiñavavaisirahi eta échajisirana. Ticutirinehi étinahini échinavahini eta ítaresirana. Vahi táurihini eta ecasiñavavaisirahi. ¹⁷ Némechahe eta juca yátupiquenehi: Mácani máimatihí eta macatuparahairahi máichaya eta tamauriqueneana, tásiha te vahi máitauchahini máichahini, ticapecaturaipahi te mamirahu ema Viya.

¹ Tiuri puiti, nuvaraha numetacahe eta náichararacavaya ena rícoqueneana. Éna, ichape eta nacatajivairayare. Náurihaipa náiyahasamureripahini taicha eta nacatajivairaya. ² Taicha titavainapa eta náimahaqueneana. Étaripa eta nacamuirihairana eta taurinaqueneana, tanicacamecainapa eta cachusiri. ³ Tájinapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náeñamirahi, tájina náimicatarapínahini. Étainapa tímicoñacavacayare te jena yucu te táitecapapa eta jena sácheyare. ⁴ Nararihi ena nani rícoqueneana, ichape eta navayuasiravacahi eta navachachirahi ena ticaematanecanahí eta nayehe. Tatarihiyaresera eta sácheyare táitecapau-chayare eta náicuñayare, taicha ema Viya máimaranaracahi tamutu, masamahivare eta nayaseserepianahí ena páureanasami músuana. ⁵ Ena rícoana puiti te juca apaquehe, tétavicavahi eta náuritaresirahi. Tamutuhi nanica eta táurinisiqueneana, tisatuheherecanahí. Tésinanacavanahí nacuti eta cuchi te náesinacha. Éna, tijahúchavayare eta náepenirayare, nacutiyare eta tajahúchirava nacapaca eta cuchi náesinaruhi. ⁶ Tacutiquene náimicaviurehi náimicapacavare ena matapiravareanahí, náimipanapa eta namaitusirahi tiácapauchavana nacatiuchavahini.

Vicamichayare tamutu, taicha táetumechahavi eta vicuchapirahi eta machavirayare ema Viáquenu

⁷ Étisera, nuparapeanaveana, ecamichayare tamutu, táichavenehi eta ecuchapirahi eta machavirayare ema Viáquenu. Ecuyare mácani achane ticaematanerahi. Macamichahi tamutu eta macatajivairana. Tiámainucava te tiúchucuhapa eta maevaru, mapaenumavapa majacapa eta macuchapa-quenehi maevaraqui. ⁸ Ene ecaheyare éti, yátupina ecamicha tamutu, vahivare ecuinajicava eta juca éhiruhi. Ecuchapavachucha, taicha tiánehipa eta máitesirayare ema Viáquenu.

⁹ Nuparapenaveana, vahi ecuquicha eta tájiparacana nayehe ena echamuriana. Vahivare ecuemeteaca éna, apaesa tacuija eta táimicatsiriacahe te ecayaseserehipa te mamirahu ema Viya. Écharichuhi éti eta tanehirapa eta máuchujisirayare ema Juez, ecayaseserehinapa.

¹⁰ Nuparapenavechichana, nuvaraha ácutini ena profetanaini eta nacamichirahi tamutu eta nacatajivairahi, táichavenehi eta nacometarairuirahi te máijare ema Viáquenu. ¹¹ Némechahe: Ichape eta nacunachacarevahí eta viyehe nácani ticamichanahí eta nátajivanahí. Écharichuhi eta macamichirahi ema víyarahaini Job. Échahivare eta tauriquenehi máijaracasihí me Viáquenu. Taicha tétavicavahí eta majapanuraivahí ema Viáquenu.

¹² Tacutiquene nutuparacahecha éti nuparapenaveana: Te ecayaseserehipuca, vahi ecuquicha eta juramento te máijare ema Viya, ema tépiyacahi eta anuma étapa eta juca apaquehe. Vahiquene ecuquicha eta juramento. Átupiruvachucha te ítauchayarepuca, “Nítauchayare” ácahepa. Téhesera vahipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

Tatuparaca eyujarauchacacayare

¹³ Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahí, tatuparacahi ejira eta alabanza.

¹⁴ Téhevare etiarihinapuca eti ecajumanahí, ímichuhayare ena víyacarana vichamuriana apaesa nayajisicahe eta aceite, te máijare ema Viáquenu.

Tásicha, tiyujarauchaheanayare. ¹⁵ Jéhesare, tisamacareyarehi eta nayaseasirana, táichavenehi eta nacasiñairava me Viya. Tásicha, ema Viáquenu macanaracayarehi eti ecajumaquenehi. Te étapuca tiviuchahehi eta epecaturana, macaepahayareva ema Viya eta epecaturana. ¹⁶ Eta tacahe, te tatarihipuca eta ejecapiravanahí mayehe ema echamuri, eyaseacayare maperdonachahe. Tásicha, eyaseuchacacayare te eyujaraca eta enarasiraina. Taicha tétabicavahi eta tasamacarevahí eta nayujaracasa ena matapiravareana. ¹⁷ Émaripa ema vicutiquenéni achane víyarahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva. ¹⁸ Tásicha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraquiana te apaquehe.

¹⁹⁻²⁰ Nuparapenavechichana, te natarihinapuca nácani vichamuriana téjecapavanahí tayehe eta yátupiqueneana, eti ecatuparaha iúrichavacayarehi éna, econsejachavacayare apaesa nachava éna, náinajicahini eta náejecapiravana. Tétabicavahi eta táurivahí eta íturusiraina eta nachavira, taicha táemesiava eta ecuchucuiravacayare tayehe eta náicuñayarehini, taicha eta táemesiavahí eta táepahairapa eta camuriquenehi eta napecaturana.

Tamu tupa.

Eta macartane ema Apóstole Pedro, ticaijare 1 PEDRO

¹ Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia. ² Emutu eti, yátupiquenehi eta manerejisirahehi ema Tata Vicaiyaquene taicha tacahehi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaiturana eta te máitine ema Jesucristo, máitsivachinahehivare eta ítaresirana, máimicatasirahehivare eta esuapajiraivahi me Viya. Puiti, nuvaraha tajuru-caini eta ecaicutiaraira eta máemunasirahehi ema Viya; tájinavare tahapapiri-cahini eta táurivahi eta epanereruana.

Vijacapayare eta vícuchihi te anuma te tauri eta vítaresiraina

³⁻⁴ Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásicha, viratahahi vicamichahi tamutu eta viátajivana te juca vítaresirana taicha vicuchapahi eta sácheyare visiapaya eta mávasa ema Viya. Máitavacacayare eta vítaresirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapaca-hemahí, váipavare íchaimahi eta tamauriqueneana. Máitavacacayare eta iúrisamurereasiravanayare. ⁵ Puítisera, tétavicavahi eta máitupajijasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhahayare te jena sache táepaniravayare eta viúritaresiraya.

⁶ Puiti, apanapaneyarechaha eta ecatajivairayarechaha. Nucasiñava-hisera eyehe éti, vahi ecainajiruvaimahi. Eta ecasiñavairahi me Viya, evapi-navaichucha eta ecamichirahi tamutu, taicha ímatihí vaipa túnaimahi eta ecatajivairaya. ⁷ Ema Viya másapahi eta juca ecatajivairana, mavairahi ímereuchavayare eta yátupiquenehi eta ecasiñavairahi eta mayehe. Ecutiyare eta oro te nacaitsamaraji te yucu te yátupihipuca étaquenehi. Étisera étavi-viriacahi eta tatumeva eta oro, taicha eta oro titavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

⁸⁻⁹ Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásicha, ichapeyarehiva eta iúrisamurevaya, tájina eviyaimahi ácayemahini eta ecunachiraya éma, te jena sache iúchucuhainapa eta ítaresiraya máichecuaraquirenapa. Étasera eta taitsivahi eta ecasiñavairahi mayehe ema Viáquenu.

¹⁰⁻¹¹ Eta juca viúchucuirayare, acaneripahi eta tacaecherairahi. Énaripa ena víyarahanaini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta machavirayare tayehe eta taurinaquenehi mávasa. Énasera ena profetana vahi náimatimahi tamutu. Navarahahi námatiyare ¿nájahapuca ema máiteru-yarehi? ¿Tájahapuca ema máijareya? ¿Tájamuhuyarepuca ema máimeresiravaya?

¹² Émasera ema Espíritu Santo (ema másihauquenehi te anuma), mamevacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítareruanaichaha, vítipa vímatihí éma. Te vicametarairupa mayehe ema Jesucristo, ema Espíritu Santo titametacahehi te esamureana. ¡Tétavicavayare eta viúricacarevayare víti, te viúchuchuhapa! Énaripa ena ángelleana, ichape navarahahi náimatihini tájahapuca táchadaracavayare eta viúricacarevayare.

Ema Viya, eta máichuirahavihi, mavarahahi tépachinachahaviyare eta vítaresirayare

¹³ Eta tacahe, ecaratacava tayehe eta epanereruana, táurivainavare eta ítaresiraya. Ecasiñavayare eta ejacapirayare eta ícuchihi me Viya, máijara-ruheyare te machavapa ema Viáquenu Jesucristo. ¹⁴ Ímerecavayareva eta machichairahéhi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya. ¹⁵ Puítisera, sánturuuhahénapa eta ítaresirayare. Taicha ema tíchuhahéhi, tétavicavahi eta masantuvali. ¹⁶ Taicha ema Viya, ani macahehi eta máechajiriruvahi tayehe eta Sagrada Escritura: “Nuvaraha sántuhéna eta ítaresiraina, taicha nútì, yátupiquenehi eta nusantuva”.

¹⁷ Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavacahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana puiti juca ítaresiraichaha te juca apaquehe. ¹⁸ Ema Viáquenu Jesucristo ticuchuchuhaheripa tayehe eta tamaurivainihi eta ítaresirana, iámapiri-caichaha eta nayeherepianaini ena iáchucanaveánaini. Écharichuhi éti eta mavacharesirahehi ema Cristo eta iúchucuirahi, váhisera te plátainahini, óroinahipucaini. ¹⁹ Étasera eta máitine máepusairuhi éma eta mavacharesirahehi, étivenéhi ímijararecahi éma, cútiripa te cáijararecasí eta uvesa matapiravarequenehi. ²⁰ Acane te tépanavainapa eta apaquehe ema Viáquenu Jesucristo ticatuparahaipa tacaheyarehi eta máepeniraya. Váhisera táitauchavavanehini. Tapaenumavapa puiti, títauchavahi eta étavenepa eta iúchucuirayarehi éti. ²¹ Énerichu táchavenehi eta éhisirahi ema Cristo, ímatipa puiti ema Viya, ema ticaechepecuahí ema Machicha te máecari. Puíticha téjacaripa éma tayehe eta mávacure te anuma. Eta tacahe, tétavicavainehi eta ecasiñavairahi mayehe éma, ecuchapavaipa eta mayehe.

²² Puiti tipachinaripa eta iáchanevana táchavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímerecavainapa puiti yátupina eta émunasiracacahi nayehé ena echamuriana. Evapinavavare eta te esamureana eta émunasiraca-caffrahi. ²³ Cape juca, eta ítaresirahi, tájina vahi íturuequenehahini eta iúchucuiraya. Puítipasera machichaheripahi ema Viya. Ítsivachaipahi eta ítaresirainihi eta esuapirahi eta máechajiriruva ema Viya. Éta ticaitareca-caffrahi; jéhevare eta máitavacacahi. ²⁴ Eta Sagrada Escritura, ani tacahehi eta táchajiriruva, májurehi ema víyarahaini profeta Isaías: “Eta vítaresirahi viti achaneanasami te juca apaquehe, vicutihi eta táimarusira eta muiji. Tijurucapa, tásicha tiájijipa. Eta vitumevainihi étapa eta vítupajijiasiravainihi, titavayare tacutihi eta flore: tépunehapa, tijiyupa, témiricapa. Étasera eta máechajiriruva ema Viya, jéhevare eta máitavacacahi” tacahepa. ²⁵ Eta juca

máechajiriruva ema Viya, étaquenehi eta emetacasivanahi apaesa táuripa eta éhisirahi.

2

¹ Eta tacahe, támutupa ínajica eta evainararajivanainihi, tamutu eta ecaete-maraivainihi, eta apipiemairahénihi, eta ecapinaruraivainihi, étapa eta échajivanainihi. ²⁻³ Puiti, eta ímatiraripahi yátupi eta máurivahi ema Viya, tijurucainapa puiti eta esuapirayare eta máechajiriruvana. Ecutinapa eta najurusira ena amuyana. Ánipichichapachu técuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiriruva ema Viya, apaesa tiápajucavaya eta ímatiequenehairaina eta mapanereruana.

Ema Cristo macutihu eta mari máepenacacahi

⁴ Yátupina eta ecasiñavaira me Viáquenu, taicha téavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha téavicavahi eta macunacha-carevahi mayehe. ⁵ Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracacainapa. Macarichu ema Viya ema ecaematananeacaya. Tivayuacaheya eta esuapajiraivaya eta máijarasiraheyarehi eta ématanepachuyare. Énerichuvare ecatuparahaipa sántuhénapa. Ecutiyare ena tiyujaracarahaniana eta te Templo. Ecatuparahaipavare eyaseurahiya nayehe ena echamuriana. Étapa eta ecamavahuira me Viya, étaripa eta esuapajiraivahi, eta ehasulupayachirahi ema Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya. ⁶ Eta Sagrada Escritura, ani tacahe eta máechajiriruvahi ema Viya: “Núti névatacahi ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Téavicavahi eta macunachacarevahi eta nuyehe. Nácani ticasíñavanahi eta mayehe ema nuvaneruyare, vahi máinajiacavacaimahi” macahepa ema Viya. ⁷ Éti, téavicavahi eta macunachacarevahi ema Cristo eta eyehe, taicha yátupihi eta ecasiñairahi éma. Énasera nácani masuapajirairahanahi mayehe, náepuruhi éma, nacuti ena tépiyarecarahaniana eta Templo, eta náepuruirahi eta mari ticunacharepanayare eta te peti. ⁸ Nácani masuapajirairahanahi eta máechajiriruvana ema Viya, tacutiqueneyarehi náepuruhi ema mavaneruhi ema Viya. Nacutihu mácani achane máquipairuhi táichavenehi eta macayutetuirahi. Tisemahi, mavaraha térajicavayare eta tímicayutetuchahi.

Ena machanerana ema Viya

⁹ Étisera manerejiruheripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchi-nvacayare ena achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhaqueneheripahi tayehe eta timapicu, tímisiapaheripa tayehe eta táuricacarequene majaraiva éma, apaesa emetajircaya eta táuricacarequeneana máematanerepi ema Viya. ¹⁰ Cape juca ítaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuirahéhi éma. Puítisera evapinavahi eta ímatirahi yátupi eta majapanuirahéhi, taicha machaneraheripa.

Yátupina eta ecaematanasirayare ema Viya eta ítaresiraya

¹¹ Némunaruqueneana nuparapenaveana, puiti éti, tímicutijircavaichaha estranjerohehi taicha iáviharichaha te juca apaquehe. Váipasera áyeremahi

eta eyanirayare eta iávasayare te anuma. Eta tacahe, nuconsejachahe: Vaipa táuricahini íchahini eta tajamurachaqueneana eta iáqueheana. Taicha téavicavahi eta tavarairahi tacamitiequeneha eta iáchanevana. ¹² Iúrihisera eta ecachanerarichaha ena achaneana te juca apaquehe máimatirahanahi ema Viya. Tayanapanerine tictorianacaheana, téchejicanahi eta eyehe ecutihi ena máuritaresirana náicha. Ímerecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta ítaresiranahi.

¹³⁻¹⁴ Táichavenenahí eta éhisirahi ema Viáquenu, ímerecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, tictuparahanahi náicuñacavacayare ena achaneana váinarajiqueneana, téjecapavanahi. Énasera ena achaneana tiúriana títaurahianahi, ticaemunacasianayarehi. ¹⁵ Taicha ema Viya, éta mavarahahí íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

¹⁶ Yátupihi vaipa tapamiruhénahí éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahe-nahini, táetseraruina icha eta tamauriqueneana. Esapihasera ímerecavayare yátupihi eta mavanaraherahi ema Viya. ¹⁷ Epicaurahiyare nayehe namutu ena achaneana. Émunajiricacayare nayehe ena vichamuriana. Ímerecapa eta epicauchirahi ema Viya. Epicauchayarehivare ema Emperador Presidente.

Vácuti ema Jesucristo eta macamichirahi eta mátajivana

¹⁸ Éti, te ecaematanerecapuca, esuapajirahiyare, epicauchayareva nácani iáquenuanahi. Vahi nacucarichu esuapa nácani tiúriana achaneana. Tácuticaca eta epicauchiraina nácani váinarajianahi. ¹⁹ Te ecatajiva náicha, tájinapa eta eviurevanainahini, téavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya. ²⁰ Téhesera náicuñacahepuca táichavenénahí eta íchirahi eta tamauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahehi, téavicava eta ecunachacarevaya te mamirahu ema Viya. ²¹ Taicha ema Viya, eta máichuirahéhi, mavarahahí ecutiyarehi ema Cristo eta macamichirahi tamutu eta mátajivana íchavenehi éti, mavarairahi ecaravahu eta máurivahi, ecutiyarehi éma eta macayehera paciencia. ²² Éma, tájinahineni maviurevainahini, mapecaturainahipucaini. Nájinavare macaetemaquenénahíni. ²³ Te nacaetemajiricapa, éma, vahi mácapaemachavacahíni, macatitiemahipucaini eta náemecatajivachirahi. Máechajicahisera ema Maiya, máimahainehi éma. Taicha yátupihi eta máicuñasiravacaya ena témeccatajivachanahi. ²⁴ Yátupihi ema Cristo ticaicuñahi víchavenehi víti eta vícuñayaréni vícuchinihi táichavenehi eta vipecaturana. Téavicavahi eta mátajivana te máquehe eta náemetatasirahi eta te crusu. Macamichahisera tamutu, mavarahahí vaipa tacuvayuacahavi eta pecatu, tatupiruvayarehi eta vítaresiraina. Eta majarana, éta ticanaracaheyare. ²⁵ Eta ítaresirainihi acane éti, ecuti eta uvesa támítiaru. Puítisera iávahácaripa ema Cristo, émapa tijaneacahehi, ticatiuchahehivare eta iáchanevana.

¹ Tacutiquene eti esenana ecaimaquevaneana, epicauchayareva ena ímanaveana, apaesa mácani vahi masuapahini eta máechajiruvana ema Viáquenu, ecajimuyasamurechavaca táichavenénahi eta iúrivahi nayehe. ² Vaipa tacamesaimahi échajirica taicha náimahayare eta esuapajiraivahi nayehe, epicauchirahivare. ³⁻⁴ Ímerecayareva eti iúriva yátupiquenehi, tásihaquevanehi te esamureana, tímicutijiricavahi eta iúrina eti emira. Tayanapanepuca ichanaruheripa, iúrinachavaya te esamureana. Evayuchahini eti étupisirava eti ésamirisirava. Eta juca, tétavicavahi eti ecunachacarehi mayehe ema Viya. Vahi étaparacaina eti evayuyujisirahipuca eti ecamuirihira etapa eti ecatatasirana, vahivare étina eti ecayehera oro. ⁵ Taicha acane ena vénarahana esenana náinapureanahi téhicanahi ema Viya, tacahéhi eti náurinachiravahi eti náitaresirana, taicha yátupihi eti nacasiñavairahi mayehe ema Viya. Tásicha, tétavicavahi eti nasuapajiraivahi nayehe ena náimanaveana. ⁶ Ecutiyare esu vénarahana Sara. Suímerecahi eti susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásicha éti, vahi ecupica eti esuapirahi ena ímanaveana. Ímereca yátupina eti iúrivahi nayehe.

⁷ Étipa ajairana ecayenaquevaneana, ejapanuyare ena eyenana. Ejaneacavare, échahi éna eti vahi túmenahini. Yátupinahisera eti émunasirahi éna, taicha ecuticacayare eti ejacapirayare eti ícuchihi eti ítaresiraya mayehe ema Viya te jena sácheyare. Te iuri nayehe, esamacareya te eyujaraca.

Tiúriyare eti ecamichirahi eti iátajivana táichavenénahi eti íchirahi eti táuriqueneana

⁸ Ámutu éti, ácuticacahi eti epanereruana. Ejapanucaca, émunacacavare nayehe namutu ena echamuriana. Ecajirahi. Mánsuhénahi. ⁹ Tijuricati natupiacahepuca, náumehahe, vahisera ecujicapa. Eyaseacachucha ema Viya eti náuricacarevaina. Taicha mavaraha ema Viya vijapanurahiyarehi víti, vicutiyare éma eti majapanuraivahi. Tatarihiyare tátsivayare viyehe máicha. ¹⁰ Taicha ani tacahéhi eti Salmo: “Mácani mavarahahi tiúritaresira te apaquehe, támputuyare sácheana tiúriya, vahi téchajijicaimahi tivayuarecaimahi. Vahivare ticaetemarecaimahi tépiyahirahimahi. ¹¹ Vahivare máichaimahi eti tamauriqueneana. Máichahisera eti táuriqueneana. Macamitiacahi eti semanereana. ¹² Ema Viya majaneaca ena náuriqueneana; tisamacareanahi eti nayujarasirana. Énasera ena tíchanahi eti tamauriqueneana, macatianaruuanahi éma” tacahépa eti Salmo.

¹³ Nájina tíjaracavaimahi titupiacaheana te náimahahi icha eti táuriqueneana. ¹⁴ Tijuricati natarihipuca ena tictalianacaheanahi táichavenéhi eti táurivahi eti ítaresirahi, tásicha, tétavicavaya eti iúricacareva. Vahivare ecupica eti jácani náichirahipuca, vahivare iávamirahuimahi nayehe. ¹⁵ Íjaracavasera yátupi eti éhisira ema Viáquenu. Te nayaserecahepuca eti tacayema eti éhisirahi éma Jesucristo, tiúrihi eti ejicapiravacaya tayehé eti ecuchapaquene. Mánsuhéna éti, epicaurahivare. ¹⁶ Tátupiruva tamutu eti íchaqueneana, táurivare eti náimairahena namutu ena achaneana, apaesa ecamatinaca nácani téchajisiaracaheanahi eti táurivahi eti éhisirahi ema Jesucristo, nátsiri-hapaini eti náechajijisira. ¹⁷ Te másapahipuca ema Viya eti náemecatajivachirahe táichavenéhi eti iúrivahi, tacunachacareyare mayehe eti ecamichira. Tájinaserá ecunachacarevaimahi te ecaviurevahi.

¹⁸ Yátupi ema Cristo, étaherichuhi vímicapacahi táichavenéhi eti vipecaturana. Éma, tétavicava eti máuriva, matapiravarehivare. Tíjaracavahisera ticatajivaya víchavenéhi víti váinarajiqueneana, mavarairahi tiámahavi

me Viya. Tépenahi eta máquehe, étasera eta máchaneva tímiyanavaichucha titareca. ¹⁹⁻²⁰ Tiyanavarepa máejirapanavacahi eta náchanevana ena náepenaqueneanaini nacaerataqueneanahi te infierno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinenihi eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahi eta ichape pacure. Tacahe, te témiricapa eta ichapequene tiquiva, macarichuhi ema Noé ésupa esu mayena, énapa ena machichanaveana énapa ena nayenana, óchoanaichuhi ena tiúchucuhanahi tayehe eta ichapequene une. ²¹ Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vicaicachasirahi te víjaracavapa véhica ema Jesucristo, vahi étaparacaina táepachiacadahavimahini eta viáquehe. Étasera eta vicaicachasirahi, étapa tímereuchahavi eta maperdonachirahaviripa ema Viya tamutu eta vipecaturana. Máepachinachinahaviripavare eta viáchanevana, tájinapa taviuchahavihini, eta visamiravahi te mamirahu. Yátupina eta viúchucuirayare táichavenehi eta máechepusirahi te máecari ema Viáquenu Jesucristo. ²² Puiti éma, tiyanaripahi te anuma; téjacaripa te mavaure ema Maiya. Tétavicavahi eta masuapacarevahí nayehe namutu ena mayeheana ángeleana. Énapa ena váinarajiana, nasuapahivare.

4

Eti éhicanahi ema Viáquenu, tituparacahe ecaratacavayarehi apaesa vaipa íchaimahi eta tamauriqueneana

¹ Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Éti apanavare, ecutiyare éma. Vahi iávamira-huimahi eta ecatajivairaya. Nímicutichaheyare eta mácani achane tépenapa, máinajicaripa eta pecatu. ² Eta tacahe éti, táichavenehi eta iúrujasirahi ema Jesucristo, tímicutijiricavaipa épenaipahini, ínajicaripavare eta pecatu. Puiti eta tápechiravaripa táitarecahini eta iáchanevana, tatuparacahi ecaemataneacayare ema Viya. Vaipa tivayuacahémahi eta tajamuraraiva eta iáquehe. ³ Tamapurujipa eta táetavisiravaripa eta áñoana eta íchirahi eta tamauriqueneana, taicha emaimatirahi ema Viya. Tamutuhi icha eta tájiparacana, tivayuacahéhi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta piesta. Íchahi eta tájiparacana tamauriqueneana eta ejaneasirahi eta esiñarajiana achanemirana. ⁴ Puítisera éti, vaipa ecasiriquimurihini ena émunacasareana. Vaipa íchaimahi eta táíñemahiquene eta náitaresirahi. Ichapemurinehi eta náejiasirahehi. Tásicha, téchajicanapa eta eyehe. ⁵ Járabajapainapasereta sácheyare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseserehiraya víti, vitarerua-naichaha énapa ena náepenaqueneana. ⁶ Eta tacahe, ema Jesucristo ticame-tarairuhi nayehe ena náepenaqueneana, mavairahí macuchucuhayare eta náchanevana apaesa nápechavahini náitareca te mamirahu ema Viya, tayana-pane eta náeche máteji táitavapapuca tayehe eta tacaecarasiyahi.

Yátupina eta émunajirisiracacaya, ítátijíricacayareva

⁷ Esamanuchaha, tiánehipa eta táitavirayare tamutu eta juca. Eta tac-ahé, ecaratacava eta epanerueruana apaesa táurivaina eta eyujarasiranaya.

⁸ Tiápajucavayarehisera ichape eta émunajirisiracacayare éti. Te yátupihi eta émunajirisiracacahi, máejerareya eta eperdonachiracacaya eta jácani éjecapi-ravana. ⁹ Evapinavaya eta ejacapiracacaya, te epaipiuchacaca te epenana.

¹⁰ Ema Viya tíjaracahevacaripa eta ítucaquenepachuhi. Tacahe, yátupina ítauchaya eta ecaemataneasiracacahi te mamirahu. ¹¹ Eti máimitureana ema Viya eta échajisira, ecuneuchava échajica yátupi eta máechajiruvana éma. Eti ímicatarahiana ítativaca ena echamuriana, vahi éñamaimahi eta etumeva máijararuhehi ema Viya. Étavenehi éhisirahi ema Viáquenu Jesucristo, tamutu tauri eta jácani íchaqueneana apaesa nacunacha ema Viáquenu namutu ena tímahaheana. Éma, ¡téavicavahi eta macunachacarevahi! ¡Téavicavahivare eta máitupajijasiravahi eta máechirahavihi tiuri! ¡Máitavacacahivare eta véhisiraya éma! Amén.

Vahi ecuavamirahu eta ecatajivairaya táichavene eta éhisirahi ema Jesucristo

¹² Némunaruqueneana nuparapenaveana, vahi ecuarami eta muracairaya eta iátajivanayare, tímicutijiricavayarehi táramicarehini eta eyehe. ¹³ Evapinavachucha taicha ecapayayaracahi eta macatajivairahi ema Cristo apaesa evapinava te jena sácheyare eta enecapirayare éma eta máucupaisiraya mámirayarepahi eta majaraiva. ¹⁴ Te náumehahepuca máichavenénahi ema Cristo, téavicavayare eta iúricacarevaya éti. Taicha tiávahácaheyare ema Espíritu Santo, másihaquenehi te majaraiva ema Vicaiyaquene. Tayanapane náepurupa éma, étisera ecunachahi éma. ¹⁵ Te etiarihipuca eti ecatajivahi náicha, tacuijasera étaimahi tiviuchahémahi jácani ecapahivainahini, iámeravainahipucáini, váhivare étaimahi tiviuchahémahi jácani ímisiapirasiravaina-hipucáini tayehe eta náichaqueneana nácani apanana achaneana. ¹⁶ Étisera, te ecatajivapuca táichavenénahi eta éhisirahi ema Cristo, vahi ecutsiriha. Evapinavachucha, ehasulupayachavare ema Viya tayehe eta ecaijarerahi eta máijare ema Cristo.

¹⁷ Puiti juca sácheana viávacurehi, táitecapaurehaviripa ichape eta vicatajivairayare, mavarairahi ema Viya vímereuchava eta viúriva víti machichanaveana. Énasera ena masuapajirairahanahi eta náichuirahi ema Viya, páureanasami taicha tiápajucava eta nacatajivairaya, ichape eta náicuñaya.

¹⁸ Ichape eta vicatajivairahi te juca apaquehe víti macuchucureanayarehi ema Viya. ¡Páureanasamisera ena achaneana masuapajirairahana, váinarajiqueneanahivare! ¡Ichapepanayare eta nacatajivairaya! ¹⁹ Puiti víti véhicanahi ema Cristo, ichape eta vicatajivairahi. Váhisera vicainajiruvaimahi. Vímiyanavayarehi vicha eta táuriqueneana. Vácasiñava mayehe ema Vicaiyaquene eta majaneasirahavihivare, taicha éma, téavicavahi eta máitauraivahi.

5

Ema Pedro maconsejachavaca ena machamuriana

¹ Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nímararasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya viávihayare te majaraiva ema Cristo te táitecapa eta machaviraya. ² Tauri eta ejaneasiravacaina namutu ena vichamuriana, taicha éna tímicutijiricavahi uvesanainahini mayehe ema Viya. Ítauchayare eta etuparacasisvahi. Ema Viya mavarahahi evapinavahini eta ejaneasiravahí. Vahi ecuyacujiequenehavaca. Váhivare ecupanerecha ecavacha. Evapinavayaresera eta ecaemataneasiravacaya. ³ Váhivare ímipananájicavacáimahi taicha vahi ecavanaravacahini. Ímerecayarehisera eta iúrvaya nayehe, apaesa éna náehica eta iúrvanahi. ⁴ Apaesa te machavapa ema

yátupiquene Pastor eta viyehe, tétavicavaya eta macunachiraheya. Tíjaraca-henapa éma eta evachayare ícuchihi. Máitavacacainapa eta ecachaneraya éma te mávihahi eta te majaraivahi.

⁵ Eti apanava eti amaperuana, nuconsejachahe: Esuapayare eta navane-siraheana ena víyarahana. Emutuyare esuapacaca. Mánsuhénahi. Taicha ema Viya vahi majapanuimahi ena ticasíñavavairicana. Tétavicavasera eta majapanuiravacaya ena mánsupanerueruanahi. ⁶ Te ímereca eta emansuva-vacahi tayehe eta ecasiñavairahi eta me Viya, éma, te máimahapa tiuri, ticatiu-chahenapa te tamutu eta íchararacavaqueneana. Tásiba, tétavicavayare eta iúrisamurevaya. ⁷ Te tatiarihipuca eta éñamiravana, emetaca tamutu ema Viya. Éma, ticanaracaheyare taicha tétavicavahi eta máeñamiravahi eta eyehe.

⁸ Ecuneuchava yátupina. Ejaneacavahivare, taicha ema viánarahi Váinaraji, macuti eta táíñehiquene sárare tatanujiriricahi eta tanicayarehi. Ene mac-ahehi éma, matanucahi ena máquipairuanayare. ⁹ Eta tacahe, túmehéna ecanarairayare éma, machu máquipaicahe. Ácasiñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraina, ecutiyare eta nacamichirahi ena vichamuriana ticavasanahi te tamutu avasareana. ¹⁰ Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánpirinesera eta ecatajivairaya puiti juca sácheana. Émasera ema Viya, tétavicavahi eta majapanuraivahi. Éma, tímararacahehi eta ecamichirahi; tásiba éma, tíjaraca-henapa eta evayuchiravainapaicha eta etumevaya. Tájina ticayayacahemahi máicha. ¹¹ Éma, ¡máitavacacahahi eta macunachacarevahi! ¡Macachuricahi eta máitupajijiásirava, máitavacacahivare éta! Amén.

Eta táicheckuaraqui eta macartane ema Pedro

¹² Ímati emutu ema vichamuri Silvano. Éma, tétavicavahi eta máitauraivahi te tamutu. Puiti, émahi ema tiáminanurihi eta juca nucartane. Núti, ánipi-chichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupihi eta vicaijuheirahi me Viya táicha.

¹³ Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihi eti eta manerejisirahehi. Téchajicahehivare ema nuchicha Marcos. ¹⁴ Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máijaracahehini tanaraca tamutu eta epaneruerana emutu éti machaneranahi ema Viáquenu Jesucristo.

Tamutupa eta juca néchajiriruvahi eyehe.

Eta macartane ema Apóstole Pedro, ticaijare 2 PEDRO

¹ Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo. ² Puiti, nuvaraha tajurucaíni eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapaneruana éma, émapa ema Viáquenu Jesucristo. Tájinavare tahapapiri-cahini eta táurivahi eta epaneruana.

Eta náurivana ena téhicanahi ema Jesucristo

³ Táichavenehi eta vímatirahi ema Viya, tétavicavahi eta máitupajijiasi-ravahi eta macaemataneasirahavihi eta vítaresirana, mavarairahi vétaviuchahini eta viúrиви, vicutiyarehi éma eta masantuvali. Étahi eta mapanereruhi eta máichuirahavihi. Tásiha, visuapavanepa taicha vímahapa eta majaivali, vímahavarepa tétavicavahi eta máurivahi taicha camuriquenehi eta táuriqueneana máichaqueneanahи. ⁴ Tíjaracavaripavare éma tátaviuchayare eta viúricacarevanayare maicha te jena sácheyare, tijamurachacareanahи tamutu. Muracahi eta vicasiñavairahi eta máitauchirayare tamutu eta júcana, taicha tétavicavahi eta máurivahi étapa eta majaraivali. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiyare éma eta macasamurerahи eta táuriqueneana. Vaipa tivayuacahemahi eta tajamurachaqueneanahи eta iáqueheana, taicha tétavicavahi eta tamaeperajichirahehi eta cape juca eta ítaresirana. ⁵ Eta tac-ahе, etuparahahi puiti, ímiyanavahini eta éhisirahi éma, epamicavavarehini iúriva nayehe namutu ena achaneana. ⁶ Epamicavavaréni ecaravahu apaesa ímatiequeneha eta mapaneruana ema Viya, ecaravahuvarehini ecaratava, étumechavavarehini eta ecamichira eta jácani iátajivana. Epamicavahivareni ácuti ema Viya eta masantuvali. ⁷ Epamicavahivareni iápajucaya eta émunaraivali nayehe ena echamuriana, ecajirayare. Epamicavahivareni eta émunaraivali nayehe ena apamuriana achaneana, tayanapane vahи náehicahavihini. ⁸ Eta tacaheyare eta ítaresirana éti, ítamuturusirahi tamutu eta júcana iúrivanahи, ecutipaipahi ema Viáquenu Jesucristo eta máurivahi éma. Énerichuvare te muracahi íjaracava ecaravahupaipahi eta júcana, tiápajucava-paipahi eta ímatiequenehairahи eta máimiturapiana, tiápajucavapaipahivare eta etumeva tayehe eta ecaemataneasirahи éma. ⁹ Nácanisera vahи návara-hahini nacaravahu, tímicutijiricavahi ena púchuquiana énainapa ticatajivayare. Taicha náemitisicaipahi eta máepachinachiravacahi ema Viya tayehe eta táinapurénihi napecaturana náichaquenénihi cape eta náitaresirahи.

¹⁰ Étisera, eti nuparapenaveana, nuvaraha échavahini eta máichuirahavihi ema Viya, manerejisirahehi. Epamicavahini eta ímeresirahi yátupi eta machicha-herahи. Eta ímiyaniravahi eta ecaravahuira eta juca néchajisihaqueneanahи, jéhesare, tájinapa tímiáquipaicahémahи. ¹¹ Tásiha, tétavicavaya eta iúricaca-revaya eta machimapiraheya ema Viáquenu Jesucristo te macuchucuhahепа eta te juca apauehe, mámiraheya eta te mávacureya. Máiavacacaya eta macachanerahaviya vimutu.

¹² Tacahe nútí, nupamicavahi puiti eta némechiraheya eta júcana, tayana-pané nímatihehi eta ímatiraripahi, muracaripavare eta éhisirahi eta yátupi-queneana ímitucasivanahí. ¹³ Németeaca nétupicavahi eta juca nuconseja-chirahehi puiti juca nítaresiraichaha te juca apaquehe. ¹⁴ Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya. ¹⁵ Nuvarahahisera vahi ecuemiti-sica eta juca numetaruheanahí, tayanapanéinepuca népenaipa. Eta tac-ache, nupamicavahi eta nímiájurecahe emutu, taicha nuvarahahi échayarehi tamutu sácheana.

Viti vímahahi eta majaraivahi ema Jesucristo

¹⁶ Viti vitupiruva eta vímitusirahehi tayehe eta táichararacavayare eta machaviraya ema Viáquenu Jesucristo, máimeresiraya eta máitupajjiásirava ichape. Vahi vépiyahirahimahi, váhivare vivehaquenéna te vichuti. Vímatipa yátupi, taicha vímahahi te viúquihana eta majaraivahi eta aquenucairahi. ¹⁷⁻¹⁸ Taicha víti vitiaríhihi te machacaya ema Viáquenu Jesús, vicachanehi éma tayehe eta cerro santo, te vinecapaequenehapa eta macaijareirahi éma etá Aquenucairaya. Visamahivare eta mahu ema Tata Vicaiyaguene etá macunachirahi ema Machicha. Ánipa macahehi: “Ema maca éma yátupi-quenehi Nuchicha némunaruquenehi. Tétavicavahi eta núrisamurevahi máicha” macahepa.

¹⁹ Víti vítamecatahi eta nacayemaqueneanahí ena víyarahananini profetana tayehe eta Sagrada Escritura, eta náechajisihairahí etá aquenucairayarehi ema Viáquenu. Eta náimiturapiana tacutihi etá tajaraiva etá lámpara etá tamicauchirahavihi apaesa táuriyare etá vítaresirana te juca apaquehe tamaurivahi. Tacahe, étumechava tayehe etá ecuchapiravaya etá sácheyare te márajapainapa ema yátupiquene etá majaraiva, tétavicavayarepa etá mamicauchirahayare tamutu etá esamureana. Tacahe, tituparacahehi esuapayare etá juca esamaqueneanahí ímitucasivanahí. ²⁰⁻²¹ Nuvarahasera yátupina ímatiequeneha etá juca: Vahi táurica viveha te vichuti etá vímijachirahi etá tacayemaqueneanahí etá Sagrada Escritura. Vicatuparahahi vicaravahuyarehi etá yátupiquenehi. Ena víyarahananini profetana, váhivare navehaquenénahíni te nachutiana etá nájuequenehairahí etá máechajiruvana ema Viya. Ema Espíritu Santo, éma tímítucavacahi etá nájuequenehairaya éna tayehe etá Sagrada Escritura vímahaquenehi puiti.

2

Natiarihiyare ena tépiyahirahianaya tímijachavanayare pastoreana

¹ Tiuri, acane natarihiyaresera ena tépiyahirahiana tímijachavanahí profetana te namuri ena náchucanaveanaini israelítana. Ene tacaheyare puiti, natarihiyareva ena tépiyahirahianaya, tépiyacavanaya pastoreana eyehe. Éna típicasicaheanayare. Témejecapavachaheanaya, apanaya etá náimiturapiana. Vahi émaimahi náechajisiha ema Viáquenu ema náimicaparuhivare. Énajivahi táchavanahí natanucahi etá náicuñayare, táijahúchiravayarehi etá náemitiequenehairayare. ² Camurianayare ena náemejecapavaruanayare, náehicainapa etá nayeherepi, táetaviuchirahi etá natuhusivahi. Náichavenehí éna, téchajicanainapa ena apamuriana achaneana, nacaecahinapa etá juca véliruhi táurinaquenehi achene. ³ Ena nani, tímítucavacahí etá náimiturapiana náepiyahiraiyanahí, taicha navarahahi titucavana tivereacaheanainapa éti, taicha tétavicavahi etá najamurarasirahi etá plata. Tájinaserá

náipuinayare, vahi táevejuacaimahi eta náicuñayare. Taicha acanevacaipa eta tacaecherairahi eta náicuñayare.

⁴ Nacutiyare ena ángeleana téjecapavanahí. Tájina vahi maperdonachavacaimahi ema Viya. Máquijicavacapa tayehe eta táíñehiquene infierno távihahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna. ⁵ Nuvaraha némechahe nayehe ena machamurianaini ema víyarahaini Noé eta acane, váhivare májapanuvacahini ema Viya táichavenehi eta namasuapajiraivahi. Macamiricapa eta ichape tiquiva náicuñahí. Tériganahi namutu ena nani achaneana, taicha náepuruhi eta máichuiravacahi ema Noé, táurivayarehini eta náitaresirana. Nacarichuhi tiúchucuhanahi ema Noé, esu mayena, énapa ena sáisiqueneana machichanaveana. ⁶ Nuvaraha némechahevare nayehe ena ticavasanainihi te avasare Sodoma, étapa te Gomorra, váhivare majapanuvacahini ema Viya. Macamiricahi eta yucu, náicuñahí éna. Táijahúchavacapa tacamitiequenehavaca namutu. Títavanapa, amairihanecha tsimapa eta náitavirahi. Ema Viya máimerecahi eta juca, nayehe ena najurureanapa te juca apaquehe puiti, mavarairahi máemechavaca ena achaneana váinarajipanerueruanahi te napicayarepuca. ⁷⁻⁸ Téhesera te nataracu, matiarihi ema víyarahaini ticaijare Lot. Éma, tamutuhi sácheana ticatisamurevahi taicha máimairavacahi ena achaneana náichirahi eta tamauriqueeneana, masamirahivare eta náechajisihairahi eta titsirihacareanahi. Téñamayahivare éma eta máimairavacahi ena achaneana, natuhusivavacahi eta náitaresiranahi. Tacahe, macuchucuhahi ema Viya, taicha éma Lot, tétavicavahi eta máurivahi, tisuapajirahihí mayehe ema Viya. ⁹ Eta tacahe, ema Viya tétavicavahi eta macatiuchirahavi puiti, ticuchucuhahavi viti véhicanahi éma, tayehe eta viátacajivana. Énerichuvare yátupihi matsecaripa eta náicuñayare nácani achaneana masuapajirairahanahi.

¹⁰ Ema Viya, yátupihi máicuñacavacayarehi namutu ena tivayuchanahi eta náechipejisirahi eta náqueheana taicha tétavicavahi eta tavayuasiravacahi eta natuhusivana, énapa ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájina návamirahuquenéna eta náumeharaiva. Nasapiha nacaecahivare ena ángeleana tiámana eta majarivahi ema Viya. ¹¹ Apanasica ena ángeleana tiávianahi te mamirahu ema Viáquenu, vahi náijaracavahini nacajacharecahini ena váinarajiana, tétavicavahinéni eta natumeva. ¹² Énasera ena nani tépiyacavanahi pastoreana, nacaecahihisera eta téhicacareana namaitururequeneruanahi. Éna, nacutihi eta táitaresira eta sárare, tájina nacaicutiaraquenéna. Najurupairuchucha te apaquehe. Éna, táuriavasahi eta justicia, máejehahi náerataca táimicacavaneypare. Tépenanayarehi nacuti eta táepenira eta sárare. ¹³ Éna, náimicatajivachahi nácani apamuriana achaneana. Páureanasamisera éna, tiápajucavayare eta nacatajivairayare.

Ena nani, tétupicavanahi eta náimairavahi, tiúrisamurereácavanahí eta nacavahairahi tamutu sácheana. Táitaurevaquenehi tétavicavahi eta natsirihacarevayarehi eta namaetupicushivanahi, eta nacasiriquirahéhi te jácani énisiracacana ena echamuriana. Ticamapuravanahí ticurisamurechavana, navarairahi náituruca jácani najamurachaqueneana. ¹⁴ Namutuchucha najamuracha nácani esenana. Tájina náipuina eta náesenamarévana. Náechemaha eta náiturusiraya súcana esena máejerarehi. Náimitucavare ena ajairana tájina náituruéqueneha, nacutiyare éna eta náesenamarevanahi. Tájina tivechuquihamahi eta nacapecaturairahi. Ecuñaraquisera eta náicuchihi éna. ¹⁵ Témunasiricavanahí éna, taicha namaimatirahi eta achene nacaijuheyá

eta táuriquenehi. Nacutipahi eta mayeherepini ema maca achane Balaám, machichaini ema Beor. Éma, tétavicavahi eta majamurachirahi eta plata, mavachayare eta máichirayare eta tamauriqueneana.¹⁶ Ema Viya máimahahi eta tamaurivahi eta mapanereruhi ema Balaam. Eta tacahe, eta burro macaperaquenehi ema Balaam téchajicapa, tacajachahi ema Balaam. Éma, macaicutiarahi eta táchajiriruvana eta mapera. Enevanepe témitiacahi eta mapanereruhi tamauriquenénihi.

¹⁷ Ena nánitátaji achaneana nacutihi eta tiájicu eque. Nacutivare eta úcaji tamarairiruhi eta técaticava. Éna, jararihipa eta náicuchi náicuñayare tayehé eta táetaviure eta tamapicuva. ¹⁸ Ena téchajisiavanapa ticunachavanapa eta náichaqueneana napecaturanahi náiturreuranahi. Náiminajicapaipa nácani náiturevanapahi eta táurivainiripahi eta náehisirahi eta táuriqueneana, tichavannaipa tayehé eta tamaeperajivanahi eta náitaresira. ¹⁹ Éna, ánipa tacahe eta náechajiriruvahi: “Víti, nájina vísapaimahi tipamicahavi. Tacutirichuhi te vicha eta tamauriqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi libreana. Énasera tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaruanahi eta napecaturana, vaipa énainahini náechinavahini. ²⁰ Tacutiquene nácani tínajicavanahi eta náehisirahi ema Viáquenu Jesucristo, tichavanapa tayehé eta tamaeperajivahi eta náitaresirana te juca apaquehe, éna, tiápajupanavanapa eta nacaicuñairayare, taicha eta naviurevahi. ²¹ Tiúripanaichuhipucaini vahi nacuimatihini eta táurinaquene véhiruhi, váchupa náimatiripahi eta tiúrina achene, tásicha tínajicavanarichahavare tayehé eta táurinaquene vanairipi najacapaquenénihi. ²² Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étapa eta cuchi, tamapuruji vícachahini éta, taicha técarajicavayarehi te tiúraji”. Ene nacahehi ena tínajicavanahi tayehé eta véhiruhi, tichavanapa tayehé eta tamaeperajiqueneanahi.

3

Vaipa táyeremahi eta machavirayare ema Viáquenu Jesucristo

¹ Némuraruqueneana nuparapenaveana, apihepa puiti nímiamaréca eta juca nucartane. Eta táchajiriruvahi eta apinaquene nucartane, nuvarahahi nuconsejachahe, apresa tacuija tahapapicahe eta éhisirahi ema Viáquenu. ² Nuvarahavare yátupina eta esuapiraina eta Sagrada Escritura nájureanahi eta acane ena víyarahananaini santo profetana, étapa eta máimiturapiana ema Viáquenu Macatiurahiquene. Étarichuhivare vímiturapihi puiti eta eyehe viti apóstoleana.

³ Tínapucayare nuvaraha némechaheyare eta juca. Te jena sache tánhipa eta táitavirayare, tímerecavainapa ena achaneana ticaecahirahiana tayehé eta juca yátupiqueneana vicuchapaqueneanahi víti. Eta náitaresirahi éna, apanachucha eta tihapapiricavacahi eta náichirahi eta tamauriqueneana najamurachaqueneanahi. ⁴ Áninapa nacaheyarecacha: “Táicharacava eta juca ecuchapaquenehi. Vuíchahacarú machavahini ema Cristo, ímijachaquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitaresirainihi ena viáchucanaveánaini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

⁵⁻⁶ Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare

eta táimeresiravahi máicha, eta tiájipahi tétupiecahi te une. Énerichuvare, te taequenepa, únehi eta náicuñahi máicha, macamirisirahi eta ichapequene tiquiva. Téricanahi namutu ena masuapajirairahanahi. ⁷ Numetacahe puiti: Ema Viya tiápechavayare máicuñacayare eta juca apaquehe. Yúcuyarehisera eta tacamatiequenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahí eta tayerevaya étapa eta tāvapahianahi. Jéhesare, te jena sácheyare, titapaicavacayare namutu ena achaneana masuapajirairahanahi váinarajianahi.

⁸ Váhivare ecuemitisica, nuprapenaveana, eta matuparaquihi ema Viya, vahi tacuti eta vituparesira viti achaneana. Éma, étana sache matuparacahi, vítisami mil áñoripa eta vitupachirahi tayerevaipa. ⁹ Éma, manacahi eta juca tayerevahí, mavarairahi macuchapayare ena achaneana eta náeneuchiravayare mayehe. Vahi tacahequenénahini eta juca taitaresirahi maicha eta apaquehe. Ichapemuri eta macayeherahí paciencia eta viyehe, mamavarairahi vámutuhichaini vémitiequenehíni. Nararihisera ena achaneana téjecapavanahi te napaneruana. Eta náimairahi eta mayerevahí ema Viya eta máicuñasiravacayarehi, náimijachahí vaipa maratahaimahi máicuñaca eta juca apaquehe.

¹⁰ Esamanuchaha. Te taitecapapa eta sácheyare taitavirayare tamutu maicha ema Viya, vahi vinecapauchavaimahi, taicha tacutiyare eta mayumurussirava eta máitesira mácani tiámerahi. Eta anuma, étapa tamutu eta tāvapahianahi, tamutuyare témitiaca. Ticaemayare muraca, tacutiyare eta tacae-maira eta ichapequene yucu te ichape curiche. Étapa eta tiávihanahi te apaquehe, tamutuyarehi titava, énapa ena tāvapahianahi. Tamutuyare tājuchayare eta yucu.

¹¹⁻¹² Tásiha éti, écharipahi eta juca taitavirayarehi eta anuma étapa eta apaquehe, tājuirayare tamutu te yucu. Puítipa tacamunuipahi ámutuhini ésenicahini ema Viya, étaviuchahini eta iúrivahí eta ítaresirahi. Puiti, yátupi ávarahahini taitecapavanehini eta jena sácheyare. Eyaseaca ema Viya taitecapavane. ¹³ Taicha viti machaneranahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tihapapicahavimahi. Tétavicavayarehi eta tauriva.

¹⁴ Eta tacahe, némunaruqueneana nuprapenaveana, puiti eta ecuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi. ¹⁵ Échava yátupina eta macayeherahí paciencia eta viyehe ema Viáquenu taicha mavarahahi ticuchucuhahaviya. Étarichuhívare tacahehi eta máimiturapihi ema apana viparape vémunaruquenehi Pablo, táchavenehi eta máitupajijiasiravahi máijararuhi ema Viya. ¹⁶ Tamutu eta macartaneana máimiamareruanahi eta eyehe, étarichuhi taechajisihihi eta júcana. Jararihisera ticajerahí eta ecaicutiarairainahini. Nararihisera ena ticaravahuana apaesachicha, vuíchahavare túmevacaimahi eta náehisirahi. Náequpecasamichucha eta támíturapi eta macartane. Nahapapicavare eta támíturapihi eta apana Escritura. Táimicuñacavacayaresera eta nahapapisirahi.

¹⁷ Eta tacahe, némunaruqueneana nuprapenaveana, vahi tacumapuriji eta ímatiequenehairahi eta juca, machu nahapapicahe eta epaneruana ena tivayuarahianatataji. Máchuvare náiminajicahe eta éhisirahi ema Viáquenu.

¹⁸ Puiti, nuvaraha tajurucaparichuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi

ema Ticatiuchahavihi. ¡Tétavicavahini eta vijirauchira, vicunachahini éma, te vinarasirana, te véjamisirana! ¡Te visiapainapa eta mávasa, vímiyana-vayare! ¡Amén!

Eta macartane ema Apóstole Juan, ticaijare 1 JUAN

Eta viúrujiasira ema Jesucristo

¹ Nuti Juan nímiamareca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tíjaracahavi eta echájirirucava ticaitarecarahi. Éma, matiarihihi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémamahaca te vivahu. ²⁻³ Éma, matiarihihi acane, manasiqueneripahi mayehe ema Maiya. Tiúcupacapasera eta viyehe. Víti vímatipa eta achánequenérahi éma. Tásicha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahíni mayehe ema Tata Vicaiyaquene émapa ema Machicha Jesucristo. Tásicha, éti apana iúrujicavahíni nayehe. ⁴ Tásicha, nucajurehe eta juca taicha nuvaraha yátupina eta iúrisamurevaina.

Eta majaraivahi ema Viya

⁵ Vimetacahe eta máimitusirahavi ema Jesucristo. Eta juca eta macayemaquenehi: “Jararihi eta tijarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

⁶ Tiúri, te vinasirichupuca víti te timapicu, tásicha te vicahehipuca: “Viúrujicava mayehe ema Viya”, tásicha víti vépiyahirahiripa. Vahi viúrujicavahini mayehe, váhivare visuapahini eta mavanairipiana. ⁷ Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihí eta manasirarichuhi éma eta te majaraivahi. Tásicha, eta vinasirarichuhi eta te majaraivahi, viúritarecayarehi eta viúrujiusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta máitine eta máepachinachirahavyarehi.

⁸ Te vicahehipuca: “Tájina eta nupecaturaina”, tacahe, vahi vátupiemahini eta vipanereruhi. Vítijiva vivayuaracavahi víti.

⁹ Téhesera vitupiruvahí eta vimetauresiravahí eta vicapecaturairana mayehe ema Viya, jararihiripa eta mapardonachirahavahí. Taicha tíjaracavahí éma eta mapardonachirahavyare, vahi táeñamavacarehíni. Énerichuvare májahaya tépachinachahavyare tamutu eta tamauriqueneana viyehe. ¹⁰ Téhesera vicahehipuca: “Tájina nupecaturaina”, vépiyaequenehahi ema Viya. Vímicutijircapa ema máepiyahirahini. Vahi tátupiruvahíni eta vijachapirainahini eta máechajiriruva.

2

Ema Jesucristo, ema ticatajirahi

¹ Nuchichanaveana, nucajurehehi eta júcana taicha nuvaraha vahi ecuapecaturaini. Téhesera íchapuca eta pecatu, mararihi ema ticatajirahi viyehe te mamirahu ema Tata Vicaiyaquene. Ticaijare Jesucristo ema ticatajicahavirahi. Éma, matapiravare; tétavicava eta máuriva. ² Éma, tímicapacavahí táchavenehi eta macaepahairayarehi eta vipecaturana apaesa viúri mayehe ema Viya. Váhisera táchirichu eta vipecaturana víti. Támicapacahí éma

eta macaepahairayarehi eta napecaturana namutu ena achaneana te juca apaquehe.

³ Tiúri puiti, vicasiñavahi eta vímatirahi ema Viya, taicha visuapahi eta mavanairipiana. ⁴ Te nararihipuca ena nácani achaneana nacahehi: "Núti nímati ema Viya", téhesera vahi nasuapahini eta mavanairipiana, tacahé náepiyevahi éna. Vahi tásuapacarehini eta náechajiriruva. ⁵ Étasera eta visuapirahi víti eta mavanairipiana tímechahavihi eta viávahásirahi ema Viya. Yátupihi eta vémunasirahi ema Viya. ⁶ Víti vicahéhi: "Viávaháca ema Viya", tásicha, tacamunuhi eta táurihini eta vítaresirainahini táchutihini eta táurivahi eta máitaresirahi ema Jesucristo.

Eta mavanairipi ema Viya eta vémunasiracacaina

⁷ Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuhherahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo. ⁸ Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraiva ema Maiya. Tásicha éti, te esuapa eta juca mavanairipi, te émunacaca, epauchainapaipa eta majaraiva ema Viya. Térajicavainapa eyehe eta timapicu.

⁹ Te nararihipuca ena nácani achaneana nacahehi: "Núti návihahi eta te majaraiva ema Viya", téhesera nacatichahipuca ena nachamuriana, návirarichuhi te timapicu. Vahi napauchaimahi eta majaraiva ema Viya.

¹⁰ Nácanisera náemunacahi ena nachamuriana, nanasirichuhi te majaraiva ema Viya. Tásicha, tiúrihi eta napaisirahi, apaesa vahi náejecapavahini.

¹¹ Énaserá ena nácani nacatichahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi táisapahíni náimairiricahíni.

¹²⁻¹⁴ Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaguene.

Eti ávinaveana, nucajurehe taicha éti ímatihí ema Jesucristo, ema matiarihi-quenehi acane te tépanavapa tamutu.

Eti átinaveana, énerichuvare nímiajurecahehi taicha tanasirichu iúnacahi te esamureana eta máechajiriruva ema Viya. Tásicha éta, téumechahehi eta ecapaquechirapahi ema Váinaraji.

¹⁵ Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarihiqueneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaguene. ¹⁶ Taicha tamutu eta napanereruana ena achaneana te juca apaquehe, tájina táurivaina. Napanerechahi naicha eta tamauriqueneana. Najamurachaipa eta apayehe. Navarahaipa nacayehe náimijachaipapuca tiúrihi eta náimairahi. Te ticaima-haqueneanapa, tisiñavanapa táicha. Éta juca napanereruana, vahi máijara-ruinahini ema Tata Vicaiyaguene. ¹⁷ Numetacahe puiti: Títavainapaipa tamutu eta apaquehe. Énerichuvare titavainapaipa tamutu eta najamurachaqueneana ena achaneana. Vítisera, te visuapa eta mavarahaquene ema Viya, máichecuaraquirénapa eta vítaresira.

Ena ticatianacana ema Cristo

¹⁸ Nuchichanaveana, puiti tiánehinapa eta táichecuiraya, titavainapa tamutu. Vimetacaheripa eta máitesirayare ema maca achane ticaijare Ánticristo, ema

ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Ánticristo. Tásicha, véchainapa eta tiánehinapa eta táichecuiraya tamutu. ¹⁹ Ena ticatianacana ema Cristo náuchurehi eta viyehe. Váhisera viúmurivainahini éna. Taicha te viúmurivainahini, nanasirichuhini eta viyehe. Náerajiruvaipahisera eta viyehe. Tásicha, vímatipa eta vahi viúmurivainahini.

²⁰ Ema Viáquenu Jesucristo tíjaracaheripa éti ema Espíritu Santo. Tásicha, emuturipahi ímati eta yátupiqueneana. ²¹ Nucajurehehi táichavenehi eta ímatirahi. Nuvaraha ácaicutiaraquenénahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

²² Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaguene, váhivare émaina Maiya ema Jesús” nacahepaina. ²³ Numetacahe eta apaña: Nájina tiávahá-canaimahi ema Tata Vicaiyaguene ena vahi nasuapahini ema Jesús etá machichairahi ema Tata Vicaiyaguene. Viávahácahisera víti ema Tata Vicaiyaguene vimutu viti visuapanahi ema Jesucristo etá machichairahi ema Viya.

Eta viávahásirahi ema Jesucristo

²⁴ Tásicha, ecapanereruyaréchucha éti eta máechajiruva, tamutu eta esama-queneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaguene émapa ema Machicha. ²⁵ Taicha tíjaracavahi ema Jesucristo tíjaracahaviya eta vítaresira máichecuaraquirénapa.

²⁶ Puiti nararihi ena navarahayare tivayuaracaheana. Tásicha, nucajurehe apesa ecuneuchava éti nayehe ena témejecapavarahiána.

²⁷ Éti, mávaháruheripa ema Espíritu Santo mavaneruhi ema Jesucristo. Tásicha, nájina apanaina ácamunuhini máimitucahehini, taicha tímitucahehi tamutu ema Espíritu Santo. Éma, yátupiquenehi eta máechajiruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

²⁸ Puítisera, nuchichanaveana, ímiyanava eta iávahásiraina éti ema Jesucristo apesa túmesamurehéina éti, vahi ecutsiriha mayehe eta te machava.

²⁹ Éti échahi eta máetaviuchira eta máurivahi ema Jesucristo. Tásicha, ímatiyare ena apamuriana machichanaveana ema Viya, táichavene eta náichirahi etá tauriqueñeana.

3

Viti machichanaveana ema Viya

¹ Nuchichanaveana, tétabicava táramicareva eta máemunasirahavi ema Tata Vicaiyaguene. Yátupihi tímijarechahavihi “machichanaveana”. Puítiripa yátupiquenehi machichahaviripahi. Énasera ena apamuriana achaneana vuíchaha nácaicutiarahíni eta macachichairahavihi ema Viya, taicha vuíchaha náimatihíni eta máemunaraivahi éma. ² Némunacasareana, vécharipa etá macachichairahavipa ema Viya. Vuíchahasera tímechahavi éma etá viúrivayare. Vécharipavare etá vicutirayare ema Jesucristo etá te machava. Taicha vímahayare etá máimahiquene éma. ³ Tásicha, vimutu víti vicuneyayare etá vicutiraya ema Jesucristo, puiti vácoticaca viúrihini táchutihini etá máurivahi éma.

⁴ Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi. ⁵ Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipecaturana. ⁶ Víti, te viávahácahi ema Jesucristo, tituparacahavi vaipa vicuimisiapava tayehé eta pecatuana. Énasera ena ticapecaturarahiana vahi náimatihini ema Cristo.

⁷ Nuchichanaveana, vahi ecuisapava navayuacahe. Víti, te vímisiapavahi tayehé eta táuriqueneana, vímerecaya eta viúriva. Vicutinapa ema Jesucristo eta máetaviuchirahi eta máuriva. ⁸ Te náimisiapava ena apamuriana tayehé eta tamauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majarareruanahi ema Váinaraji.

⁹ Víti machichahaviripa ema Viya. Váipa vímisiapavaimahi tayehé eta vicapecaturairana taicha vicutinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicapecaturaimahi. ¹⁰ Nácani vahi tíchanahi eta táuriqueneana, váhivare náemunacahíni ena nachamuriana, náimerecahi eta vahi machichavacainahini ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerecavahi eta macachichairahavihi ema Viya.

Eta vémunasiracaca

¹¹ Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare. ¹² Tásicha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masuapajiraivahi, máichirahi eta táuriqueneana. ¹³ Nuparapenaveana, énerichuvare puiti nararihiya ena achaneana ticatichaheanayare éti apana. Váhisera ecuarami eta juca.

¹⁴ Nuparapenaveana, véchahi víti eta viápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énasera ena vahi náemunacahini ena nachamuriana, nanasirichu. Vahi tiúchucuhananaimahi tayehé eta náopenira. ¹⁵ Namutu ena ticatichanahi ena vichamuriana, nacutihi ena ticapahiana. Eta náichararacavayare ena ticapahiana, véchahi eta namauchucuirayare. ¹⁶ Ema Jesucristo tímehahavihi eta máemunasirahavihi, taicha tíjaracavahi tépena vítivenehi. Tásicha víti, te jácani táichararacava, tituparacahavi víjaracavayare vépena énavene ena vichamuriana, vímechiraya eta vémunasiracacahi. ¹⁷ Te mararihi ema mácani achane ticaimahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahini ema Viya. ¹⁸ Nuchichanaveana, vémunacachucha vicajicaca eta vicayehequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasiñavaya te mamirahu ema Viya

¹⁹⁻²⁰ Tásicha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasiñairahi eta majapanurahavihi. Taicha majapanurahiquenehi éma. Téchahi tamutu. ²¹ Tiúripana, némunacasareana, te tájina eta tapicacararasiravaina eta visamure. Tásicha,

vahi vipicaimahi eta viyasearapianaya mayehe ema Viya. ²² Vicasiñavainapa eta máijarasirahaviyare tamutu eta viyasearuanahi, taicha visuapahi eta mavanairipiana, vicurisamurechahi ema Viya. ²³ Eta juca mavanairipianahi: “Ecasiña ema Nuchicha Jesucristo, énerichuvare émunacaca”. Tacahéhi eta mavanairipi viyehe. ²⁴ Te visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarihirahi ema Viya eta viyehe, máicha ema Espíritu Santo mavaneruhi éma.

4

Ena mávaháruana ema Espíritu Santo énapa ena mávaháruana ema Váinara

¹ Némunacasareana, ecuneuchava nayehe ena tépiyacavana ticametairaihuana. Taicha puiti nararihi éna. Vahi mavaneruanaina ema Viya, vahivare mávaháruanaina ema Espíritu Santo. Tásicha, te náitecapauchahepuca ena návaraha tímítucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapianahi víti. ² Eta juca eta ímatiarayare ena mávaháruana ema Espíritu Santo te nacahehipuca: “Ema Jesucristo yátupiquenehi achane eta máuchusirahi”. ³ Énasera ena apamuriana, te náñauchahipuca eta yátupirahi achane ema Jesucristo, vahi mavaneruanaina ema Viya. Éna, ticatianacanahi ema Cristo. Vimetacaheripa eta náitesirayare ena ticatianacana ema Cristo. Tiuri, puítirichu nararihipa ani viyehe.

⁴ Nuchichanaveana, éti machichahe ema Viya. Néchahi núti eta emaisapiravahi tivayuacaheana taicha mávaháruhehi ema Espíritu Santo. Éma, túmepanahi mayehe ema Váinara, náehiruhi ena nani tivayuarahiana. ⁵ Ena nani, tahapapiricavacahi eta tájiparacana tayeheana eta apaquehe tamauriqueneana. Tásicha, ena achaneana máehicarahanahi ema Viáquenu náuricaipa náitecapauchavaca. ⁶ Vítisera machichahavihi ema Viya. Tisamararacahaviana ena tímätiana ema Viya. Énasera ena apamuriana máimatrihana ema Viya, vahi tiúrimahi eta nasamirahavi. Tásicha, tímaticareanaya ena mávaháruana ema Espíritu Santo. Énerichuvare tímaticareanaya ena mávaháruana ema Váinara.

Témunarahiquene ema Viya

⁷ Némunacasareana, tacamuñu eta vémunacaca vámutu. Taicha ema Viya tímítucahavihi eta vémunasiracacaya. Vimutu viti vémunacacanahi, étapa tímereuchahavihi eta macachichairahavihi ema Viya, yátupihi eta vímatirahi éma. ⁸ Énasera ena nani vahi témunacacana, vahi náimatihini ema Viya. Taicha ema Viya, yátupiquenehi eta máemunaraiva. ⁹ Éma, tímehahaviripa eta máemunasirahavihi, eta mavanesirahi ema macarichuquene Machicha. Mavanecahi tíeca te juca apaquehe, tíjaracahaviyare eta vítaresirayare máichecuaraquirénapa. ¹⁰ ¡Téavicava eta máemunasirahavihi! Vítisera vahi vitívainahíni vémunaca ema Viya. Mativahi ema témunacahavihi. Eta máemunasirahavi ema Viya, máijararecahi ema Machicha. Mavanecahi tépenayare te crusu étavene eta macaepahairayare eta vipecaturana.

¹¹ Némunacasareana, máetaviucha eta máemunasirahavi ema Viya; tásicha, vítipa tacamuñu eta vémunasiracacáina. ¹² Nuvaraha ácaicutiara eta juca: Nájina tímahaina ema Tata Vicaiyaquene. Téhesera víti, te vémunacacapuca, tiávahácahaviya éma. Tásicha, vicutihi ema Viya eta máemunaraivahi éma.

¹³ Puiti, viti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espíritu Santo

mavaneruhi eta viyehe. ¹⁴ Tásicha, viti vicachaneanaripa ema Jesús, vimetacavacapahi namutu ena vímanaruuanapahi eta máucupaisiraipa te anuma, taicha vivaraha náimatiyare namutu eta mavanesirahi ema Viya máiteca ema Machicha ticatiuchahaviyare vimutu viti achaneana te juca apaquehe. ¹⁵ Tacahe, te nararihipuca ena nacahehi: “Ema Jesús machichara ema Viya”; tásicha, tímaticareanahi éna, mávaháruanahi ema Viya, étapa eta návahásirahi éma.

¹⁶ Víti véchahi eta yátupirahi máemunasirahavihi ema Viya. Eta tacahe, vicasiñavahi eta mayehe. Témunarahiquene éma. Tásicha, víti apuna, te vémunarahipuca, viávahácaya ema Viya; éma apuna, tiávahácahaviya. ¹⁷ Vétaviuchaya eta vémunasiraya ena vichamuriana taicha eta viávahásirahi ema Viya. Tásicha, vahi vipicaimahi eta jena sácheyare te viyanapa te mamirahu ema Viya. Vahi vipicaimahi taicha machichahavihi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

¹⁸ Ena apamuriana achaneana tipicacaracavanahi taicha téchavanahi eta nacaicuñairaya. Vítisera vahi vipicaimahi taicha vicasiñavahi eta máemunasirahavihi ema Viya. Te yátupihipuca vicasiñahi, macaesamiricaya eta visamure eta vipsira. Tásicha, nácani tipicanahi, napicahi taicha vahi nácasinavahini eta máemunasiravacahi ema Viya.

¹⁹ Víti vémunacahi ema Viya taicha ema mativahi témunacahavi. ²⁰ Te nararihipuca ena nacahehi: “Viti vémunaca ema Viya”; téheserapuca nacatichaichucha ena nachamuriana, éna tépiyahirahianahi. Taicha náimahnénipuca ena nachamuriana, váhisera náemunacahini, ene tacahehi eta namaemunasirahi ema Viya máimahasiquenehi. ²¹ Eta juca eta mavanariipihi viyehe ema Viya: “Émunacanu nuti yátupiquenehi Viya; émunacavare ena echamuriana”.

5

Virataha vínjica eta tamauriqueneana

¹⁻² Yátupihi eta macachichairahavipa ema Viya vimutu viti visuapanahi ema Jesús eta émairahi ema Cristo. Tásicha, vémunacarine ema ticachichahavihi. Tásicha, te vémunaca ema Viya, téhepa visuapa eta mavanairipiana, tituparacahavi tacutiyareichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya. ³ Étavene eta vémunasirahi ema Viya, visuapaya eta mavanairipiana. Taicha vahi tányacujicarehini eta visuapiraya eta mavanairipiana. ⁴ Tásicha, viti machichanaveana ema Viya viratahaya vínjica eta tamauriqueneana eta vítaresiraya. Taicha tímicatacaviripa ema Jesús táichavenehi eta vicasiñairahi eta mayehe. ⁵ Víti visuapahi eta yátupirahi Machicha ema Viya ema Jesús. Tásicha, viti véhicanahi éma, vicarichuhi viti virataha vínjica eta tamauriqueneanahi eta vítaresira.

Ema Jesucristo, Manerejiruhi ema Maiya

⁶⁻⁸ Te títecapa ema Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásicha, te vímatiequeneha eta macaicachasirahi te une, étapa eta máepusaisirahi eta máitine, témechahaviripa eta manerejiruichuhi ema Maiya. Eta une étapa eta máitine témechahavipa ema Jesús eta émairaqueñehi Cristo. Ema Espíritu Santo, émapa titámetacahavi. Taicha ema Espíritu Santo yátupihi eta mame tarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahi eta

tacayemaqueneana. ⁹ Tacutihi eta masuapacareva ema mácani achane tiuri. Tiápajucavasera tasuapacarevapana eta mame tarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”. ¹⁰ Tásiha, te vicasiña ema Machicha ema Viya, visuapava vicasiñava te visamure eta yátupirahi eta mame tasirahi ema Viya. Ena apamuriana vahi nasuapahini ema Viya, náimicutichapa máepiyahirahihíni ema Viya, taicha vahi nasuapahini eta mame tarapianahi mayehe ema Machicha. ¹¹ Étarichuvare eta juca eta mame tasirahi ema Viya, eta máijarasirahaviripa eta vítaresirayare máichecuaraquirénapa. Ema Machicha ema Viya, éma téchahi eta vítaresira. ¹² Ena ticasiñanayare éma, titarecanayare. Énasera nácani vahi ticasiñanahi ema Machicha ema Viya, vahi titarecanaimahi.

Eta vítaresirayare máichecuaraquiréyare

¹³ Tiuri, némunacasareana, nuvaraha échayare eta ítaresirayare máichecuaraquirénapa, taicha ecasiñahi ema Machicha ema Viya. Eta tacahehi eta nucajureirahehi.

¹⁴ Tásiha, tájina taeñamavacarehini eta viyase aruanahi ema Viya, taicha vechahi víti eta masamirahavihi, taicha eta viyase arapiana tásiha queneanahi eta vímatiequenehairahi eta mavaraha quenehi ema Viya. ¹⁵ Tásiha, vechahi eta máijarasirahaviya tamutu eta viyase aruana, taicha vechahi eta tasamaca revahi eta viyase arapianahi eta mayehe.

¹⁶⁻¹⁷ Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchatitcavaneya ema Viya eta vítaresira táicha. Jararihivare eta apana pecatuana vahirichu tíñehicha. Te mararihipuca ema mácani vichamuri ticapecatarrahi, eta vahirichu tíñehicha eta máepeniraina; te ímahapuca eta macapecaturairahi, éti eyaseuchaya éma, mayehe ema Viya. Tásiha, ema Viya máijarcayare eta máitaresirayarechaha ema ticapecaturarahi. Téhesera mararihipuca ema mácani ticapecaturarahi eta tíñehipana mayuchaticavaneya ema Viya eta máitaresira, vahi nuvanecahe eta eyaseuchahini ema maca achane ticapecaturarahi.

¹⁸ Vecha eta vahi vímisipavaimahi tayehe eta vicape caturairana viti machichanaveanahi ema Viya. Taicha ema Machicha ema Viya tijane ac havihi vimutu víti. Vahi máratahaimahi ticaetemahavi ema Váinaraji.

¹⁹ Taicha vechahi eta macachichairahavihi ema Viya. Váhisera vámputu. Nararihihi ena apamuriana achaneana machaneranahi ema Váinaraji.

²⁰ Vítisera vechahi eta máitesirahi eta te juca apaquehe ema Machicha ema Viya. Éma tímitupanahavihi. Émavenéhi témesenica havihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuaraquirénapa.

²¹ Nuchichanaveana, vahi ecucasiñaraji; vahi ecucuti ena achaneana ticasiñarajiana eta achanemirana.

Tamutupa eta juca néchajiriruvanahi eyehe.

Eta macartane ema Apóstole Juan, ticaijare 2 JUAN

Eta vémunaraivaya

¹ Nuti Juan, víyarahanaupu, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi nútì, tacuti eta náemunasiravaca namutu ena apamuriana titucana tisuapanava etá yátupiquene máechajiruva ema Viya. ² Viti vémunacahe taicha vicuticacahi eta visuapira etá yátupiquene máechajiruva ema Viya. Máichecuaraquirénapa eta visuapiraya. ³ Nuvaraha macatajicahehini ichape ema Tata Vicaiyaquene, émapa ema Jesucristo, Machicha ema Viya. Nájapanuhéhini, náijaracahehini eta táurivaina etá epanereruana, taicha yátupiquenehi etá náemunasirahehi.

⁴ Núrisamureinehi eta néchirahi eta nanerejisiravahi ena pichichanaveana, tiúrihi etá náehisirahi etá yátupiqueneanahí, tímiyanavanavare etá nasuapirohi etá mavanairipiana etá viyehe ema Tata Vicaiyaquene, taicha ene vicaheyarehi.

⁵⁻⁶ Tiuri puiti, ati, nucajurevi, taicha nuvaraha némechavi etá juca mavanairipi ema Viya, étarichu etá vémunasiracacayare vimutu. Te vémunaca ema Viya, visuapaya tamutu etá mavanairipiana etá viyehe. Te tépanavainapa etá vicasiñairahi ema Viya, tivanecahaviripahi etá vémunasiracacayare. Tásicha puiti, etá ecaheyare etá émunasiracacairayare etá ítaresirayare.

Ena tivayuarahiana

⁷ Nuvaraha némechavi etá juca, taicha nararihi te juca apaquehe te viávihahi ena navarahahi ticaetemaheanaya. Ena nani, vahi návarahahini náimicae-cheráchahíni etá máuchusirahi yátupiquenerahi achane ema Jesucristo. Ena nani, tivayuarahianahí, tictalianacanahivare ema Cristo. Vahi návarahahini véhica éma. ⁸ Tásicha, ecaunevayare tayehe etá navayuarapiana. Échapavachucha éti, machu nacamitisicahe tayehe etá ícuchihi ématanevachahi. Nuvaraha ejacapayare tamutu.

⁹ Viti visuapahi etá máimiturapiana ema Cristo, viti viávahácahi ema Tata Vicaiyaquene émapa ema Machicha. Váhisera návahácaimahi ema Viya nácani vahi návarahahini nasuapa etá máimiturapiana ema Cristo. Tasapihapa, náimitucahi etá nayehechiravarichu etá napanereruana. ¹⁰ Tacache, te náitecapauchahepuca te iúrujisiavahi ena nácani, téhesera vahi nacuechajisiha etá máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna. ¹¹ Taicha te íchapuca etá juca, ticutinapapuca etá étirichuhi nachamuriana ena tivayuarahiana. Váhira ecuimisiapava nayehe, máchura étainera etapiravaina etá juca náichirahi éna etá tamauriqeneana.

Eta táchecuaraqui etá macartane ema Juan

¹² Tiuri, júcarahi apamuri etá numetaruheanaya. Vuíchahasera numetacahemahi puiti te juca carta. Taicha nucunevahi etá nítésiraya eyehe apaesa vechajiricavainapa etá vímanajirisiracacayare. Tásicha, viúrisamurénapa vimutu.

¹³ Téchajicaviana ena suchichanaveana esu péchavi, ésurichuvare manerejiruhi ema Viya.

Tamutupa eta juca néchajiriruvahi eyehe.

Eta macartane ema Apóstole Juan mayehe ema Gayo, ticaijare 3 JUAN

Ema Juan macunacha ema Gayo

¹ Nuti Juan, víyarahuanupa, nucajurevi piti némunaruquenehi Gayo. Núti yátupihi eta némunasirávihi.

² Némunaruquene, nuyaseuchavihi me Viya táurivaina eta pématañeanana. Énerichuvare nuyaseuchavivare táurivaina eta pítaresira, táchutini eta táurivaipa eta piáchaneva. ³ Tétavicavahi eta núrisamurevahi, te títecapanapa ena vichamuriana, taicha timetacanuanapa eta pisuapirohi, péhisirahi eta yátupi-queneana echájirirucávana mayehe ema Cristo. ⁴ Tájinarínehi táchuti eta núrisamurevahi taicha eta nusamairirísiraparacahi eta éhisirahi eti nuchichanaveana eta yátupiquene echájirirucava mayehe ema Cristo.

⁵ Némunaruquene, tájina táichavahi eta pijacapirahi péchapajirisirahi ena vichamuriana, váhinéni pímatiquenevacáinahíni éna. ⁶ Te títecapanapa ani te viúrujisiavahi, timetacahavianainapa. Tájina táichava eta piúriva, pímicasiravacahi eta nayanira ena vichamuriana. Eta picaheyare pímiyanavaini eta piúriva nayehe, taicha eta juca víchirahi tacurisamurechayare ema Viya.

⁷ Taicha éna, táimpipaicahi eta nacametarairuirahí eti tiuri echájirirucava mayehe ema Jesucristo. Eta napaisirahi, tájina nayaseserecapahini éna nayehe ena achaneana masuápajiráirahanaríchaha. ⁸ Tásiba, tavarahaichu eta véchapajirícavaca ena nani, apaesa eta vímicatasihaya éna eta nacametarairuiraya eta yátupiquene tiuri echájirirucava.

Eta mamaurivahi ema Diótreves

⁹ Nucajureripa ena pichamuriana te piávhahi. Mararihisera ema Diótreves. Éma máurica ticainapupuircava te namirahu ena achaneana. Éma, vahi ma-suapa eta vituparahaná. ¹⁰ Tásiba, te nutiarihinapa eta ara eyehe, núti nítame-tacaheyare tamutu eta máichaqueneana. Éma, téchajicahi eta viyehe. Cátichacarehi eta máechajiriruvana, váhisera másuapacarehini. Váhivare tácharichu eta juca máichahi. Éma, vahi majacapaimahi ena vichamuriana tipaicanahi. Te natiahi ena navaraha najacapa, ema maca macavanairipi nacuija nacujacapa. Énerichuvare mavaraha macaerajica te emuri ena tivarahaná najacapa.

¹¹ Némunaruquene, vahi picuicutipa ena tíchanahi eta tamauriqueneana. Picutiyaresera ena tíchanahi eta táuriqueneana. Taicha viti víchana eta táuriqueneana, viti machichanaveana ema Viya. Énasera ena tíchanahi eta tamauriqueneana, éna, vahi náimatihíni ema Viya.

Ema Juan macunacha ema Demetrio

¹² Nutuparacavi pijacapayare ema Demetrio. Namutu nacunacha éma, taicha yátupiquenehi táuriva eta mayeherepi. Núti apanavare énerichuvare nucunacha eta máuriva. Píti pímatinuhi, eta tatupiruvahi tamutu eta néchajiri-ruvana.

Eta táchecuaraqui eta macartane ema Juan

¹³ Tiuri, jucarihi apamuri eta numetaruvianayare. Vuíchahasera numeta-cavimahi puiti te juca carta. ¹⁴ Nútijapainapaserá eti ara piyehe apaesa nímahavi. Tásiba, véchajiricavainapa eta vímanasirácacayare.

15 Puiti, nuvaraha máijaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásiba, péchajisinanu émana-pachuina ena nájiriareana núti.

Tamutupa eta juca néchajiriruvahí piyehe.

Eta macartane ema San Judas, ticaijare JUDAS

¹ Nuti Judas néchajicahevacá emutu eti nuparapenaveana nuchamurianahi. Núti mavanerunuhi ema Viáquenu Jesucristo. Éti ímatihí ema nuparape Santiago. Núti nucajurehevacá eta juca nucartane taicha eti apanavare machanerahepa ema Tata Vicaiyaquene, taicha esuapahi eta máichuarapihi. Tétavicavahí eta majaneasirahehi táichavene eta iúrujiasirahí ema Machicha Jesucristo. ² Puiti, nuvaraha tajurucaíni eta evapinairavacahí eta máemunasirahehi ema Viya, étapa eta majapanuirahéhi; tájinavare tahapapiricahini eta táuriva eta epanereruana.

Yátupiyare eta náicuñayare ena tivarahanahi náemejecapavacha ena vichamuriana

³⁻⁴ Tétavicavahí eta nuvarairahí nucajurehe emutu éti, nétumechaheyare eta éhisiraina ema Viáquenu Jesús. Puítisera nusamairircapa eta náimisia-piravahí eta eyehe ena nácani tépiyahirahiana tímijachavanahí vichamurianahi. Tásicha, nuvaraha ecuneuchavaya nayehe. Étumechacaca, vahi ecusuapavaca ena nánitátajiana, machu náemejecapavachahe. Táimiyana va tauri eta éhisiraina eta véhiruhi. Taicha ena víyarahana apóstoleana tímítucahavianahí eta máimiturapiana ema Viáquenu Jesucristo. Tásicha, vahi táuricahini vihapapiricahini. Énasera ena nani tépiyahirahiana, tétavicavahí eta namapicauvahí eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavicavahí eta máemunasiravaca. Tavetijipa tíñemahipanapa jararihiva eta náimiturapi, ánipa nacahe: “Vahi tipicauchacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Máimahainepasera ema Viya eta náicuñayare éna, taicha acanevacaipa eta mame tarapi ema Viya: “Muracaqueneya eta náicuñayare namutu ena ticaecahinuanahí eta némunasiravacahi”.

⁵ Németeaca éti écharipa eta náichararacavahí ena viáchucanaveanaini israelítana eta náuchusirapa te avasare Egipto. Nuvarahasera némechahe émahi ema Viáquenu ticuchucuhavacahi namutu éna. Téhesera te taequenepa, tétavicavahí eta namasuapajiraivahí ena namutuyaréni. Tásicha, máitapaimuríhapa ena masuapajirahananahí. ⁶ Énerichuvare némechahe eta náichararacavahí ena ángeleana masuapajirahananahí. Ena nani aquenucaranahaini te anuma, sántuanainihi. Tímisiapavanapasera tayehé eta tamauriqueneanahí. Tásicha, ema Viya macavanairipipa eta náiyaracuha ena ángeleanaini téjecapavanahí eta te timapicu infierno, nacaerataiyahi. Puíticha váhiquene titurucavanaimahi tiúchucana. Te jena sácheyare mayaseseresihaya ema Viya, muracayare eta náicuñayare namutu éna. ⁷ Échahivare eta náichararacavahí ena achaneana ticavasanahí te apinaquene avasare Sodoma étapa eta Gomorra, étapa eta avasarechichana te tachacayanahí. Éna, tétavicavahí eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta táijahúchiravahí eta máemecharesiravacahi ema Viya ena ángeleanaini, macamiricahi eta yucu, táijuchavacapa namutu ena nani achaneana váinarajiqueneana. Eta juca tavaraha yátupina vicaicutiarahi tayehé eta nacaicuñairavacayare eta te yucu infierno namutu ena tíchanahí

eta tamauriqueneanahi. Máitavacacainapa eta nacatajivairaya. ⁸ Táitusiava, vahi náechavahini ena nani tímisiapavanahí eyehe. Navayucharichucha eta náechipejisirahí eta náquehe taicha téavicavahí eta tavayuasiravacahí eta natuhusivana. Ena nani tépuruanahí ema Viáquenu eta émairahí téchavacahí. Nacaecahihivare ena ángeleana tiámana eta majaraivahí ema Viya. ⁹ Vahi táurihini eta juca. Nuvaraha némechahe eta jena sache máepenirahí ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángel Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa. ¹⁰ Énasera ena nánitátajiana achaneana, vahi napicaurahihini. Tíjaracavana nacaecahi jácani tájahánapuca váhinéni náimatiqueneha. Éna nacutihí eta sárareana. Tinicanahí, téranahí, esenamareanahí. Nájina tatsiri-haquerénahí. Étapa tímucuñacavacaya.

¹¹ ¡Páureanasami ena nani! Muracayare eta náicuñayare te yucu, taicha nacutihí ema Caín eta mamasuapajiraivahí me Viya. Nacutivare ema Balaam ema témejecapavacachavacahí ena achaneana eta mavarairahí eta plata. Nacutivare ema Coré ema tépuruhi ema mavaneruhí ema Viya. Étapa tiviuchahí eta macapasirahí ema Viya. ¹² Téavicavahí eta natsirihacarevahí eta náimisiapiravahí eyehe te iúrujisiravana eta énisirana ena echamuriana. Taicha éna, tájina napícauchaqueñahíni eta náurisamureravahí te nanisirana, náerirana. Éna, navarahahí epicauchavacayare éti, navarairahí ticaete-majiricaheana. Ena nánitátajiana nacutihí eta úcajiana te ichape sácherehi. Ticutimahi tiquivayarehi. Técaticavachuchasera eta támapahi. Tájina taquivahini. Nacutivare eta yucuquiana máhiriquireana te ticahipaipa eta apamuriana yucuquiana tachamuriana. Tamapuruji eta vicuchapirahí eta náichirahí eta táuriqueneana taicha nacutivare eta yucuquiana tájiqueruana vinereruana, tépurihapa. Váipaguene tímarucaimahi. ¹³ Éna, nacutivare eta táepacuruha eta une te técaticavapa muraca eta ichape une, camurihi eta tarisasama. Téavicavahí eta tatsirihacarevahí eta náichaquerénahí eta tamauriqueneana. Nacutivare eta jarariquiana tiyejerecavana. Jararihisera eta nacaicuñaiyayare eta ichapequene timapicu. Máitavacacayare eta nanasirayare.

¹⁴⁻¹⁶ Ena nánitátajiana, téavicavahí eta nacaecahirahí tamutu. Etachucha natanucahi eta najamuraraivana. Ticasíñavavaicana eta náechajirisiravana. Nacunachahí ena ticaimahaqueneanahí, navarairahí nacaetemajiricavaca éna. Ticaicuñayaresera, taicha ema víyarahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apauehe. Mámayarepahi namutu ena mayeheana ángeleana. Téavicavahí eta nasimutuvahi. Nacurujicavacayare namutu ena ticapecaturarahiana. Náimerecayareva tamutu eta naviurevana ena achaneana váinajaríqueneana, taicha téavicavahí eta náichirahí eta tamauriqueneana. Navetijinapa ena ticaecahirahiana me Viya, ichapepanainapa eta naviureva” macahepa. Téavicavahí eta masuapacarevahí ema víyarahaini Enoc, taicha mámariequeneni ema Adán, sántoquenehivare éma.

Ema Judas matuparacavaca ena machamuriana

¹⁷ Nuvarahavare némechahe, eti nuchamuriana némunaruqueneana, eta nametarapi ena víyarahana apóstoleana mayeheanahí ema Viáquenu Jesucristo. ¹⁸ Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare

návarahahíni náinajica eta tamauriqueneana” nacahepa. ¹⁹ Puiti numetac-
ahe: Natiarihipa puiti ena ticaecahirahiana. Tímaticareana éna, taicha
navaraha náiputsicavaca ena vichamuriana. Étachucha natanucahi eta
najamuraraivana. Éna, vahi návarahahíni émainahíni máechavacahini ema
Espíritu Santo.

²⁰ Étisera némunaruqueneana, étumechacacaya eta éhisirahi ema Viáquenu,
taicha téavicavahi eta tasantuvahi eta véhiruhi. Ísapavayareva tímitucae
ema Espíritu Santo eta eyujarauchirana. ²¹ Tauri eta ítaresira, vahi ecuem-
tisicavahini eta táetaviuchiravahí eta máemunasirahehi ema Viya. Váhivare
ecuyacujihini eta ecuchapirahi eta jena sácheyare táepaniravaya eta vítaresira.
Máitavacacayare eta vítaresiraya taicha eta majapanuirahavihi ema Viáquenu
Jesucristo.

²² Étumechayare ena echamuriana nácani tipanerechanaripa náehica ena
tivayuarahiana. ²³ Ena apamuriana, ena téhicanaripa eta náepiyahiraivana,
epamicayare éna apaesa tachava eta náehisiraina yátupína ema Viáquenu.
Ecuchucuhavacayare eta náejecapiravana, tacuti te vicuchucuhahi eta
viyereruvana te tíjahúchavapuca tiju eta vipena. Ejapanuyare nácani
muracaripahi eta náejecapiravanahi. Ecuneuchavasera, machu napareac-
ahe eta náejecapiravana, taicha téavicavahi eta tamauriva. Epicayare éta.

Tétavicava eta vicunachirahi ema Viya

²⁴⁻²⁵ Ema Viya, téavicava eta máitupajijiasiravahi. Macarichuhi
éma marataha ticatiuchahavi tayehe eta vícuchinihi vícuñayarehini,
taicha mavanecahi máepeninahaviya ema Machicha, ema Viáquenu
Jesucristo. Puíticha téavicavahivare eta majaneasirahehi éti apaesa
vahi ecuaquipaicavahini tayehe eta pecatu. Taicha mavarahahi
máepachinachayare eta iáchanevana, tacuijahivaréni eviurevaina eta
mámiraheyare te mamirahu te jena sácheyare. Tétavicavainapa eta
iúrisamurevaya te ímahapa eta majaraivaquenehi. Acane nacunachanahi
ena ángeleana. Énerichuvare víti, téavicavayareva eta vicunachiraya éma
vimutu víti, taicha téavicavahi eta máramicarevahí taicha ichapequenehi
eta máitupajijiasirava. Vépuyumiraucha eta víjarasirava visuapayare.
Máitavacacayare eta vitsiusirayare éma. Amén.

Eta mametacasivanahi ema Apóstole Juan te mavapure, ticaijare **APOCALIPSIS**

¹ Ema Tata Vicaiyaquene mavarahahi tímimaticahavyare eta táijahúchi-ravaya táichararacavayare eta apaquehe, apresa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús mavanecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apresa écha éti apanavare eta táicharara-cavayare. ² Tacuti eta yátupihi eta nucametarairuirahi nútì etá máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele. ³ Tétavicava eta náuricacarevaya ena téchajicuhanaya eta juca máechajiriruvanahi ema Viya, eta máimimatirunuhi. Énerichuvare tétavicava eta náuricacarevaya namutu ena tisamanaya tisuapanaya eta juca. Taicha tiánehinapa eta táitavirayare tamutu.

Ema Juan macajure ena siétemuriqueana machamuriana

⁴ Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahehini ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiarihiquenehi te tépanavainapa, puiti manasirichuhi eta viyehe, émarichuva manasiqueneyare te táitavapa tamutu. Te tamirahu eta máejasihahi trono, natarihi ena siétequeneana mayeheana arcángaleana. Navarahahivare eta iúricacarevainaini. ⁵ Ema Viáquenu Jesucristo, ema yátupiquenehi tiámaparauchahavihi eta juca vímitucasivanahi. Énerichuhivare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuriacavacaya ena réyeana te juca apaquehe. Éma, yátupihi eta máemunasirahavihi, masipasinahavihi eta viáchanevana tayehe eta vipecaturana te máitine máepusairuhi. ⁶ Énerichuvare, tinacahavihi te namuri ena manerejiruanahi tuparairucahavyarehi eta mayehe, mavairahí viyujaracaráhiyare mayehe ema Viya. ¡Támutuhini sácheana vicunacha eta máitupajijiasiravahi! ¡Viáramiparacahini eta aquenucirahí! ¡Amén!

⁷ Ímaha, márajapainapa ema Cristo. Támayarepahi eta úcaji. Namutu-yare nanecapa ena achaneana te juca apaquehe. Náimahainapa, tásiha, tipicanainapa. Tíyahahacavanainapa eta náimairayare, énaripa ena námarie-queneana ena tijarachanahi, taicha téchavanahi éna eta náejecapiravahi ena náchucanaveanaini. ¡Ene tacaheyare! ¡Máitecapavanepaini!

⁸ “Nútira nunacuchahi eta táepaniravahi eta apaquehe. Nútirichuvare nécha eta táimianiravaya tiuri. Néchayareva eta táitavirayare tamutu” maca-hehi ema Viya, tétavicava eta máitupajijiasirava, máituruequenehahi tamutu. Éma, matiarihiquenehi te tépanavainapa, puiti manasirichuhi eta viyehe, émarichuva manasiyare te táitavapa tamutu.

Eta máimeresirava ema Jesucristo mayehe ema Juan

⁹ Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapiroayare te mávasa, aquenucahaviya.

Núti, tiáquijicanuanahi tayehe eta tiúrupuhi ticaijare Patmos te etupiereca mar, táichavenehi eta nucametarairuirahi eta máechajiriruva ema Viya, néchajisihairahivare eta máijare ema Jesucristo. ¹⁰ Te jena sáchequenehi lumincuquenehi, ema Espíritu Santo tímimahanuhi eta mavarahaqueneana tímechanu ema Jesucristo. Tacahehi eta táepaniravahi eta máimimahaque-nenuhi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi. ¹¹ Ánipa macahehi:

—Piájuchaya tamutu eta juca pímaqueneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea* —macahepa.

¹² Tacahe, néviurucavapa. Nuvarahapa nímahayarehi ema téchajicanuhi. Tásicha, nímahapa eta siete candelero tiúquiana, amairiha oro. ¹³ Te enumuhumuri eta siétequene candelero, matiarihi ema achane vivasimahi. Tiúmají eta mamuiriha. Títecapa te máivapeana. Ichapeme eta máitijuhe, títecapa te matupa. Amairihavare oro. Eta máitijuhehi táicutiarahi eta aquenucairahi éma. ¹⁴ Eta machutimaca amairiha tijapu, tirapepejicaquenehi. Eta máuquihana, tétavicavahi eta tavayuhauquiaivahi. ¹⁵ Eta máivapeana tijanunupevachava, tacuti eta bronce eta tajanunusira. Eta mahu, tétavicavahi eta tamuracavahi eta marurehuchirahi. ¹⁶ Te mavahu vaure, macaratacahi eta siete jarairiquiana. Te majaca tiúchucahi tavasimahiyaréni eta espada. Táetaviuchahi eta tacasiriva, tínunapehivare. Eta mamira, tétavicavahi eta táeramemesirahi tacuti eta sache.

¹⁷ Nupicarinehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta tátavirayare tamutu. ¹⁸ Núti yátupiquenénu nucaitarecarahi, taicha nuchavahi nítareca te taequenepa eta nacapasiranuhi. Puiti máichecuaraquirénapa eta nítaresira. Nútirichuvare necha ena tépenana. Nucaecheputayare eta náqueheana ena náepenaqueneana nácani níchuqueneanayare. ¹⁹ Piti Juan, piájuchayare eta juca pímaqueneanahi puiti, étapa eta pisamaqueneanahi nutupararuvianahi nayehe ena pichamuriana, étapa eta táichararacavayare nímechaquenéviyare. ²⁰ Numetacaviya eta tacayemaquenehi eta siétequene jarairiqui nucarataruhi te vaure, étapa eta siétequiqueneana candeleroana óroquiana. Éta juca siete jarairiqui, énara ena ticametarairurahiana nayehe ena siétemuriqueneana pichamuriana. Eta siete candeleroana, énara ena siétemuriqueneana nuchanerana.

2

Eta mame tarapi ema Jesús nayehe ena machaneranahi ticavasanahi te Efeso

¹ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Efeso: Núti iáquenunuhi taicha núti nucaratacahi eta siétequene jarairiquiana te nuvahu vaure. Núti návihahi te tamuri eta siétequiqueneana candeleroana óroquiana, táicutiarahi eta néchirahahi emutu éti. ² Núti nímati tamutu eta íchaqueneanahi, étaripa eta tamuracavahi eta ecametaneasiranuhi, ecamichirahi tamutu. Váhivare

* ^{1:11} Tamutu eta jucana avasareana tiávihanahi te provincia Asia. Puíticha eta juca provincia ticaijare Turquía.

iúricahini ecasiriquihini ena achaneana váinajarajana. Váhivare ejacapahini ena tépiyacavanapahi apóstoleana, ímatiacavanehi éti ena tépiyahirahianapahi. ³ Nímatihe eta ecamichirahi tamutu eta iátajivanahi táichavenehi eta ecaemataneasiranuhi nútì. Vahi eyacujihini. ⁴ Jucarihisera eta juca eviurevahi nuyehe. Puiti ecamitiacaripa eta émunaraivana. Vaipa táchutihini eta émunaraivanahí te épanavainapa. ⁵ Puiti nuvaraha étupiricayare eta juca, tachava eta émunaraivahi. Éneuchavaya tativaina apaesa íchavare eta táuriqueñeana tacuti eta acane. Te vahi ecuetupiricava, nútijacaruvayare níteca, nítisivachayare eta candelero ícutiarahi eyehe. ⁶ Éti, ecunachacarehi eta ecatichirahi eta tamaetupisiravahi eta nayeherepiana ena apamuriana téhicanahi ema Nicolás. Ene nucahehi nútì, nucatichahivare eta nayeherepiana.

⁷ “Ema Espíritu Santo tímíticaheyare eta juca numetarapiana eti nuchaneranahi. Etupiruvayarehi esuapa. Emuto eti ecamichanahi, ímiyanavahivare eta éhisiranuhi, nucasiapaheyare nútì tayehe eta paraíso ícumunahi me Tata. Nénicaheyareva eta tahi eta yucuqui tiama eta táuricacarevayare eta ítaresira.

Eta mame tarapi ema Jesús nayehe ena machaneranahi ticavasanahi te Esmirna

⁸ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Nútì nunacuchahi eta tääpaniravahi. Nútirichuvare néchahi eta tátavirayare tamutu. Nuti nacaparuhi, nuchavahisera nítareca. ⁹ Nútì nímati tamutu eta íchaqueneanahi, eta ecatajivairahi, étapa eta epaureravanahi. Tétavicavahisera eta iúricacarevahi, tímicutijiricavaipahi rícohénahíni. Nímativare vahi esemahini taicha eta épiyaequeneanahi nayehe ena tímijachavanahi machanerana ema Viya. Mávaháruanahi ema Váinajarji, machaneranahivare. ¹⁰ Vahi ecupica eta ecatajivairaya. Numetacahe: Ema Váinajarji tímisiapaheya te cárcel eta máitsamaresiraheya te tímijacaheyarepuca. Ecamichachuchasera, taicha diésquenerichu sache eta ecatajivairayare. Nutuparacahecha: Ejicapaicayare tayanapanepuca nacapacahe. Nútì níjaracaheyare eta táitsivayare. Tiúriyare eta ítaresiraya.

¹¹ “Ema Espíritu Santo tímíticaheyare eta juca numetarapiana eti nuchaneranahi. Etupiruvayarehi esuapa. Emuto eti ecamichanahi, ímiyanavahivare eta éhisiranuhi, nucuchucuhahayare. Vahi ecatajivaimahi tayehe eta nacatajivairayare te yucu ena masuapajirairahanahi.

Eta mame tarapi ema Jesús nayehe ena machaneranahi ticavasanahi te Pérgamo

¹² “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Pérgamo: Nútì nítuca némecharecavaca nácani téjecapavana taicha nucayehe eta espada, tátaviurequenehi eta tacasiriva. ¹³ Nútì nímati tamutu eta íchaqueneanahi. Nímativare eta éñimiravahi taicha namutuyaréni ena echácayapenána téhicanahi eta máimiturapi ema Váinajarji Satanás. Váhisera ínajicavahini, étumechavaichucha eta éhisiranuhi nútì. Étaripa te ímahapa eta nacpasirahi ema nuchaneraini Antipas, yátupiquenehi eta masuapiranuhi éma. Ena machaneranahi ema Váinajarji nacapacahi éma te jena iávihahi éti. ¹⁴ Jucarihisera eta juca eviurevahi nuyehe. Taicha ísapavaichucha natarihihi ena nanerejiruvana ena echamuriana vahi návarahahini náinajica nanica eta tinicacare nayujaraurehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímítucahi ema Balac eta máimiaquipaisirvacahi ena israelítana tayehe eta juca tamauriqueñeana. ¹⁵ Énerichuvare

nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucatichirahi núti eta máimiturapiana ema Nicolás taicha tétavicavahi eta tamaetupisiravahi. ¹⁶ Eta tac-ahé, éneuchavayare eti éjecapavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

¹⁷ “Ema Espíritu Santo tímitucaheyare eta juca numetarapiana eti nuchane-ranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nénicaheyare eta ícuchihi me Viya eta ticaijare maná, tayumu-rurevaquenerichaha. Énerichuvare níjaracahevacayare eta tijapu mari. Eta te mari tatiarihiyare eta ajureca arapiru. Nájinaserá tímatiequenehaimahi. Macarichu ema ticayeheyare, éma tímatiyare eta máijare arapiru.

Eta mame tarapi ema Jesús nayehe ena machaneranahi ticavasanahi te Tiatira

¹⁸ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Tiatira: Núti Machichanuhi ema Tata Vicaiyaquene. Núti nímatihí tamutu, taicha tijarahivaca eta núquihana, tétavicavahi eta tavayuhauquiraivahi. Eta nívapeana tijanunucavacava tacuti eta bronce eta tajanunusirahi. ¹⁹ Núti nímati eti íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena achaneana, étapa eta ecamichirahi. Nímativare muracapanaipahi eta ecaemataneasi-ranuhi. Tiápajucavaipahi puiti tayehe te épanavainapa. ²⁰ Jucarihisera eta juca eviurevahi nuyehe. Ísapahi tisiapamurihahe esu esénatátaji. Ésu, vahi tátetupicavahini eta suyeherepiana, sucutihí esu Jesabélnitatají eti acane. Tímijachavahi mavanara ema Tata, suémejecapavachahisera ena nuchaner-ana. Suímitucavacahi naicha eta piesta, tásicha nanicavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare. ²¹ Núti íchapemurihi eta nucuchapirahi ésu, eta suéneucha-vahini, apaesa suínajicahini eta sutuhusiva. Váhiquenesera suvaraha suínajica eta suyeherepi. ²² Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suíturevanahi, nícuñacavacayareva muraca, te vahi nacuínajica eta suíchaque-neasanahi ésu. ²³ Énerichuvare ena suchichanaveana níjaracayare eta na-jumayare, nímicapasiravacayare. Tásicha, échainapa eti nuchaneranahi eti nímatirahi tamutu eta epanereruana, eta te esamureana éti. Nímahine-pasera núti eti nícharacavacayare ena téjecapavanahi, étapa tiámayare eti náichaqueneana. ²⁴⁻²⁵ Tájina apanainahini eti eviurevahi nuyehe. Núrisa-murehi eyehe eti matapiravareanahi, eti vahi éhicahini eti suímiturapiana esu esénatátaji. Váhivare ávarahahini íjaracava éhica eti suhiapemarevanahi, susiñavavairisirahi eti máimitusirahi ema Satanás. Tásicha puiti, nutupa-racahe eti nuchanerana iávihanahi eti te avasare Tiatira: Ecaratacava mu-raca tayehe eti juca éhiruhi. Ecunenuyare eti nuchaviraya.

²⁶ “Emutu eti ecamichanahi, ímiyanavahivare eta éhisiranuhi, váhivare ínajicahini eti ecaemataneasiranuhi, núti níjaracahénapa eti tuparairuca-rahénapa tayehe eti avasareana. ²⁷ Ecutinuyare núti eti máijarasiranuhi ema Tata Ticachichanu eti tamuracavahi aquenucairuhi. Ene ecaheyare éti. Muracayare eti aquenucairaheyare. Ecaratacayare eti etsucurupayare fiérroqui. Esuapacareyare muraca. ²⁸ Tétavicavayare eti ejaraivayare nicha núti, taicha nujupahaheyarehi éti. ²⁹ Ema Espíritu Santo tímitucaheyare eti juca numetarapiana. Emutu eti nuchaneranahi, etupiruvayarehi esuapa.

3

Eta mame tarapi ema Jesús nayehe ena machaneranahi ticavasanahi te Sardis

¹ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Sardis: Núti néchavacahi ena siétequeneana arcángeleana, étipa eti ecametarairurahiana taicha núti támaraurehi eta siétequeneana jarairiquiana. Núti nímati tamutu eta íchaqueneana. Ena achaneana tímijachanahi tiúrihi eta ecaemataneasiranuhi. Nútisera nímararacahi eta esamureana. Nímatihe tiánehi eta ínajisirainapa eta éhisiranuhi. ² Ecaunechavayare apaesa vahi ecuemitiaca eta éhisiranuhi. Taicha nímararacahi núti vahi tátupiruvahini te esamureana eta ecaemataneasirahi ema Tata. ³ Puítisera, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nútijapayare tíjahúchavayare eta nítecapirayare némecharepanaheya. ⁴ Váhinéni ámutuhini ejecapavahini éti ecavasanahi te Sardis. Natiarihihi ena matapiravareanahi, váhivare náechipejicavahini. Ena nani, níjaracavacainapa eta namuirihayare tijapu. Ticachane-nuanayareva taicha tatuparacahi eta návihairayare eta nuyehe.

⁵ “Emutu eti ecamichanahi, ímiyanavahivare eta éhisiranuhi, níjaracahayare ecamuirihayare eta tijapu. Váhivare nucaepahaimahi eta íjareana tayehe eta libro tiama eta nalista ena náitareruanayare. Nímimatichaheyareva eta me Tata, énapa ena ángeleana. ⁶ Ema Espíritu Santo tímíticaheyare eta juca numetarapiana. Emutu eti nuchaneranahi, etupiruvayare esuapa.

Eta mame tarapi ema Jesús nayehe ena machaneranahi ticavasanahi te Filadelfia

⁷ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Núti yátupique-nénuhi Viya, yátupiquenehivare eta nusantuva. Nucarichu núti néchahi eta tapajacura eta arairuyare avasare Jerusalén, tacuti eta máechapajirisirahi ema náchucaíni rey David eta táinapiruinihi Jerusalén. ⁸ Núti nímati eta íchaqueneanahi eta ecaemataneasiranuhi. Nímahahivare eta vahi camurihé-nahini. Nímathihivare eta ecatajivairahi, váhisera ecainajiruvahini eta éhisiranuhi. Ímiyanavahivare esuapahi eta nímiturapiana. Tásiba, puiti níjaracahayare eta apaña ématanerépiya. Nájina nísapaimahi tihapapiricaheánaimahi eta ítauchiraya éta. ⁹ Núti nítahacavacayare ena israelítana tépiyacavanahi machanerana ema Tata, machaneranahisera ema Váinaraji. Nucaepuyucavacayare te emirahu, apaesa náimati eta némunasirahehi.

¹⁰ “Éti, ítauchahai eta nuvanairipi eta ecamichiraya tamutu. Eta tacahe, nujaneacaheya núti apaesa vahi tacuimivehahe te táitecapapa eta nucaete-majirisiravacayare namutu ena achaneana támavahianahi te juca apaquehe.

¹¹ ¡Tiánehipa eta nuchaviraya! Étumechavaya eta éhisirahi, machu émepurureca ejacapirayare eta ícuchianayare.

¹² “Emutu eti ecamichanahi, ímiyanavahivare eta éhisiranuhi; nítsirijicavayare eyehe. Máihecuarquireyare eta ecachaneraya ema Tata te mávasa. Iámayare eta máijare, étapa eta níjare arairu. Iámayarevare eta tájare eta arairu Jerusalén, taicha tachichahievacaya. ¹³ Ema Espíritu Santo tímíticaheyare eta juca numetarapiana. Emutu eti nuchaneranahi, etupiruvayarehi esuapa.

Eta mame tarapi ema Jesús nayehe ena machaneranahi ticavasanahi te Laodicea

14 “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Núti náichasa ‘Ema titaurahi’. Námapahi eta yátupiqueneana táuriqueneana echajirirucava. Núti tójinaquenéhi néjequiha. Núti nítouchahi tamutu eta mapanereruanahi ema Tata, te népiyacapa eta anuma étapa eta apaquehe. **15-16** Éta juca numetarapi eyehe éti: Nímati eta íchaqueneanahi. Éti apáesasajíruichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunuinehi átupiruvahini, yátupinahini ímerekava eta éhisiranuhi. Machu étina taviuchahe eta nucaerajisirahéna nuyehe. **17** Taicha éti ímijachavahi rícohe, tójina íchiravainahini, tójinavare ácamunuhini. Vahi esamauchavahini ichapemurihi eta éjapanuravahi. Váhineni rícohenahini. Etihinéni ecaijare páureana, púchuquiana, mamuiriareana. **18** Nuvaraha nuconsejachahe: Te evarahapa yátupina eta erricovayare, íteca eta nuyehe. Jéhevare núti núrichaheyare, ecutiyare ena ticayeheana eta yátupiquene oro. Jéhevare núti níjaracaheyare eta emurihayare tijapu apaesa vahi ecutsiriha te numirahu. Nétsarachaheyareva eti ipuruji apaesa ímairirica. **19** Núti nétupiricaya eta napanereruana namutu ena némunaruana te náejecapava. Te vahi nacusuapanu, némecharecayarehi. Tásiba éti, tituparacahehi étupiricavane eta epanereruana, étumechavavare tayehe eta éhisira. Éneuchavavare apaesa tacuija ecuichiravaina. **20** Núti nujapanurahi. Nuvaraha tachava eta vicachaneracacahi. Vaipa ecuévuisiha eta nuyehe. Íchuhanuvare. Viápechava vivapinava eta véchajirisiravaparacayare*.

21 “Emutu eti ecamichanahi, ímiyanavahivare eta éhisiranuhi, núti nucaeja-cahevacyare tayehe eta néjasihayare, tacutiyare eta néjasirahi te mavauve ema Tata, taicha eta nétumechiravahi nucamichirahi tamutu. **22** Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa” tacahehi tamutu eta máechajiruvana ema Viáquenu eta eyehe.

4

Ema Juan máimaha eta natsiuresira te anuma

1 Te táchiquenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema tínapucahi téchajicanuhi. Tirurehucha eta mahu. Tíchuanupa, ánipa macahe:

—Yare, piápana. Nuvaraha nímechavyare eta táchicavayare puiti juca vicaijuheyare —macahepa.

2 Tacahe, eta nusamirahi eta íchuarapi, ema Espíritu Santo tíjaracanupa eta nucaicutiarairayare tamutu eta nímahaqueneanayarehi. Tíjahúchavapa nímaha ema Viya, téjacahi te trono te anuma. **3** Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távhahi eta trono, tétavicava eta tajaraivahi tacutiyaréni eta támahi eta ahe eta táurinava. Véresera eta támahi.

4 Távhahi eta ichape trono, tatiarihivare te tachachacu eta véinticuatro trono. Natiarihivare ena véinticuatroanavare téjacanahi tayehe, víyarahana tuparairucana. Tijapu amairiha eta namuirihana. Namutu ticayeheana corona

* **3:20** Te juca, ema Viáquenu tímicutijiricava eta máehahamesira te jácani tapajacura, mavarairahi masiapa, manica macachane ena ticavasanahi te tajuhe. Étasera eta máechajisihauqueneana, vahi étai-nahini eta tapajacura eta vipena. Te juca, ema Viáquenu máechajisihahi eta majapanuirahavi étapa eta mavaraira vichavaya vipaucha éma, tachavahini vivapinava mayehe, viúriyareva te machacaya.

te nachutiana, amairiha oro. ⁵ Tásicha, nímahahi eta térameca tásihaqueñenehi tayehe eta trono. Nusamavare tirurehuchanahi. Ticaemapa. Tásicha, tatiarihihi te tamirahu eta trono eta siete tijarahivaca tacutiyaréni tanene eta yucu. Énali ena siétequeneana arcángelleana mayeheana ema Viya. ⁶ Tijararacavare te tamirahu eta trono tacutipa eta tijarahivahi eta ichapequene une.

Natiarihivare ena cuátroqueneana tijanearecanahi te machacaya ema Viya. Éna, ecutiarareana eta máitupajijasirava. Tacutimahi ticauquihavacahi te namirahu téhepa nachepa. Amairiha eta náuquihana. ⁷ Eta tínapuca tavasimahiyaréni eta sárare táñehiquene*. Eta apala tavasimahiyaréni eta torillo. Eta apala tacutimahiyaréni achanemira. Eta apala tacutimahiyaréni eta ichape málitihi tiárarairicahi. ⁸⁻⁹ Tacahe, ena nani cuátroqueneana ecutiarareana tiávihanahi tayehe eta trono, sáisivaca eta napavana. Ticauquihavacavare amairiha eta napavana. Ena nani, vahi táchchuquihahini eta nacunachirahi ema Viya, ema acanevacauquene eta máitaresirahi. Tijiranahi tamutu sácheana, yátiana. Ánipa nacahe:

“Tétavicavahi eta pisantuva, piti Tata.
Tétavicavahivare eta pítupajijasiravahi,
píturuequeneha tamutu.
Piti pitiañihiquenehi te tépanavainapa eta apaquehe.
Puiti pinasirichuvare eta viyehe.
Pítirichuvare pinasiyare te táitavapa tamutu.
Puiti vihasulupayachavihi eta pichanerahavihi”
nacahepa ena ángeleana.

¹⁰ Énavarepa ena véinticuatroqueneana víyarahana tuparairucana tépuycanahi te mamirahu ema Viya, mávihahi te mayehe trono. Nacamavahupa eta nayeheana corona. Titsiurecanavare. Ánipa nacahe:

¹¹ “¡Tata Víyaquene, piti Viáquenuvih!
¡Tétavicavahí eta piúrivahi!
Picarichuhi piti vicasiñaquenévi.
Ichapequenehi eta vicunachiravihi.
Tamutuhi pirataha píti.
Taicha píti pépiyacahi acane tamutu eta juca
vímaqueneanahi puiti.
Pítirichuvare péchahi puiti tamutu eta
pépiyaruuanahi”.

5

Ema Cordero macarataca eta ajureca tiama eta siete sello

¹ Tacahe, te mavahu vaure ema máejaruhi tayehe eta trono, nímahapa macaratacahi eta ichapeme ajureca ticayuruquihi, ticanaracacahi eta letra te tajuhe étapa te táquecumbe. Ticaipistahi tayehe eta siete sello, táipistaruvanahi. ² Nímahapa ema ángele tipiaracahi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tivepistacayare eta tayeheana sello eta juca ajureca, maveruruasirayare! ¡Tatuparacapa máiteca puiti! —macahepa.

³ Nájinaserá náijaracavahini navejiapanahini eta ajureca: énaripa ena tiávihanahi te anuma, énavanerecañahipucaini ena tiávihanahi te apaquehe,

* ^{4:7} Te jena avasare Asia (puíticha ticajare Turquía), tatiarihihi eta tíñehiquenehi sárare náimijarechahi “león”. Te táiyahapa, eta tahu tacuti eta ichapequene toro, étapapuca eta ichi ajaira.

énaripa ena tiávihanahi te amahe apaquehe. Nájinavare tipatsicavaina náimara-racahini eta ajureca. ⁴ Níyahahacavapa núti eta nímairahi namajinairahi náijaracavahini naveruruacahini eta ajureca, náechajicuhahipucaini, étavanerecainahipucaini náimararacahini. ⁵ Tacahe, téchajicanupa ema émana víyarahua tuparairucahi. Máichanupa:

—Vahi picuiyaha. Taicha matiarihi ema Cristo, ema yátupiquenehi manerejiruhi ema Viya ema téchaya tamutu eta juca apaquehe. Éma, tíjarcavahi eta máepenirahi víchavenehi víti. Tichavaripahisera titareca. Tásiba, macarichu ema tatuparacahi maveruruacayare eta ajureca, mavepistahayareva eta siétequene tayeheanahi sello táipistaruvanahi —máichanupa ema víyarahua.

⁶ Tacahe, nímahavarepa ema Jesús, ticaijarehivare Cordero. Titupihahi éma te tamirahu eta trono, nachayacahi ena cuátroqueneana ecutiarareana énapa ena víyarahana tuparairucana. Nímahahi eta majara, taicha támicapacahi éma eta macaepahairahi eta vipecaturana viti achaneana. Siete eta majihuana. Eta juca táchicuarihi eta aquenucairahi. Siétevare eta máuquihana. Eta juca táchicuarihi eta tamutuirahi máimatiqueneha, taicha navanahihi ena siéteana arcángelleana mayehe ema Viya, eta náimarasiraya tamutu eta apaquehe. ⁷ Ema maca Cordero tiyanapa, majacapahi eta ajureca te mavahu vaure mayehe ema máejaruhi te trono. ⁸ Te macaratacapa eta ajureca, ena nani cuátroquene ecutiarareana, énerichuvare ena véinticuatroqueneana víyarahana tuparairucana tépuyucanapa te mamirahu ema Cordero. Ena nani véinticuatroqueneana, namutuyehehi te navahuana eta guitarra étapa eta escudilla, amairihasera oro. Tiama eta incienso, táchicuarihi eta taurivahi eta nayujarasiranahi ena machaneranahi ema Viya. ⁹ Tijiranahi eta juca jirasare arapiru. Ánipa nacahe:

“Picarichu pítí tituparacavihi eta picaratasirayare eta ajureca, pivepistashayare eta tayeheana sello.

Tituparacavihi taicha píjaracavahi pítí tímicapacavihi eta pivacharesirahaviyarehi tayehe eta pítine vimutu víti apaimamajiquenehavihi te juca apaquehe.

Taicha pivarahahi machanerahavyarehi ema Tata Vicaiyaquene.

¹⁰ Píjaracahavihivare viyujaracaraiyare mayehe ema Viya.

Pítí píjaracahavíhi eta aquenucairahaviya tayehe eta avasareana” nacahepa.

¹¹ Tásiba, nusamavarepa eta nahu ena camuriqueneana ángeleana nachayacahi eta trono, eta návhahi ena cuátroqueneana ecutiarareana, énapa ena tuparairucana. Tétavicava eta nasimutuvahi éna. ¹² Énerichuvare tijirana muraca. Ánipa nacahe:

“Piti Cordero, piti nacaparuhi, picarichu tatuparacahi pijacapayare puiti eta piávacure mayehe ema Viya.

Tétavicava eta piúricacarevahi táchica.

Tétavicava eta pímatiequenehairahi tamutu.

Tétavicava eta pitumevahi.

Tétavicava eta pipicauchacarevahi.

Tétavicava eta picunachacarevahi.

Tijarahi visama te vijirauchavi” nacahepa.

¹³ Nusamavare eta tahu tamutu eta máepiyaruanahi ema Viya, eta tiávihanahi te anuma, étapa eta tiávihanahi te apaquehe, énerichuvare eta tiávihanahi te amahe eta apaquehe, étapa eta tiávihanahi te une. Ánipa tacahéhi:

“Tétavicava eta pítupajijiasiravahi, piti Vicaiyaquene, pítipa piti Cordero.

Éti, tétavicava eta epicauchacarevahi.
 Éti, tétavicava eta ecunachacarevahi.
 Tijarahi visama eta vijirauchirahe.
 Maitavacacayare eta vitsiusiraheyare” nacahepa.

¹⁴ Énapa ena cuáetroqueneana ecutiarareana najicapapaipa:
 —Amén, ene vicaheparacayare —nacahepa.
 Tásicha, ena véinticuatroqueneana víyarahana tépuyumurihanapa, natsiu-
 capa ena apinana.

6

Eta táepistasira eta sélloana

¹ Tacache, nímahapa ema Cordero te mavepistacapa eta tínapuca sello. Tásicha, nusamapa ema émana ecutiararehi. Eta mahu tacutichucha tirurehucha. Ánipa macahe:

—Yare, piúchuca —macahepa.

² Tacache, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca táicutiarahi eta máquipairisiraparacaya ena mánarana, taicha guerrerohi éma.

³ Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

⁴ Tacache, tiúchujicapa eta apuna cavayu. Titsi eta táimahi. Ema ticaperahi mámahi eta ichapequenehi espada. Ticavanahipa eta manacasamurechirayare ena achaneana eta náehacacairayare. Téchepucainapa eta guerra. Ticapajiricacanainapa ena achaneana camurqueneana.

⁵ Nímahavarepa ema Cordero mavepistacavarepa eta tamapanane sello. Nusamavarepa ema apuna ecutiararehi, máichapa:

—Yare, piúchuca —macahevare.

Nímahapa eta cavayu tiquisa. Ema ticaperahi macaratacahi eta balanza te mavahu. ⁶ Nusamavarepa eta mahu ema apuna te namuri ena cuáetroqueneana ecutiarareana. Ani macahehi eta máechajiruvahi:

—Ticatajivanayare ena ticaematanerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

⁷ Te mavepistacavarepa ema Cordero eta tacuatrone sello, nusamapa ema apuna cuátroquene ecutiararehi, máichapa:

—Yare, piúchuca —macaheripavare.

⁸ Nímahapa eta apuna cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarihivare ema téhicapahi, ema táquenu eta náchanevana ena náepenaqueneana. Tacache, eta cuarta parte eta nasimutuva ena achaneana tépenanaya naicha ena apinana. Taicha ticapajiricacanainapa ena achaneana tayehe eta guerra. Ena apamuriana técuhanainapa. Apanapanenapa eta najumanayare. Énerichuvare tanicainapa eta sárareana táñehiqueneana.

⁹ Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena náepenaqueneana táimicaparuanahi eta náehisirahi ema Viya. Vahi náinajicahini eta náehisirahi te náimahapa eta nacatajivairayare.

* **6:6** Ema ecutiarare máechajisihahi eta taqui ticajare cebada. Eta juca tacuti eta arusu.

Váhivare timatinanaimahi eta nametasirahi eta máechajiruva ema Viya.
10 Puiti éna, tipiaracanahi. Ani nacahe eta napiarasirahi:

—Tátachicha, sántoquenevihi píti. Yátupiquenuevihi eta picasiñacareva. Píti pirataha tamutu. ¡Puiti vivaraha pítouchayare eta pitsirijiequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

11 Tásicha, ticaijaracasianapa eta namuirihanayarehi eta tijapu. Ticame-tacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarechahavare ena téhicanahi ema Cristo.

12 Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, téavicavahi eta taquisava. Énerichuva eta caje amairihapa ítime. **13** Eta jarairiquiana tiávihanahi te anuma, témiririjicapa te juca apaquehe, tacuti eta tahi eta mitu te muracaicha técaticava. **14** Eta anuma témitiacavarepa tacutipa te téchuquimeca eta ajumeruca. Tásicha, eta ichapequeneana cerro tiyamericavacapa tiyejecavavacapa. Étaripa eta tiúrupuhiana te mar énerichuvare tiyejecavavacapa. **15** Tacahe, tijunanapa ena réyeana te avasareana, énapa ena presidenteana, énapa ena comandanteana, énapa ena aquenucarahanana, énapa ena rícoqueneana, énaripa ena müsuana, énapa ena libreana. Ticayumurú-quianapa te tajuhe eta ichapequeneana máriana cerro.

16 Ánipa nacahe:

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táíñehiquene máicuñaraqui ema Cordero.

17 Táitecapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

7

Ena dócemuriqueneana israelítana nacamarcaqueneanayare

1 Tacahe, nímahapa ena cuáetroqueneana ángeleana. Titupihanahi te tainahu eta juca apaquehe, náichejimiraurusirahi tamutu eta técaticavanaugh. Éna, náichejicahi eta técaticava apaesa tacuja eta técaticava te apaquehe étaripa te une, étavanerecainahipucaini tacaecherahini te yucuquiana. Ticatuparanasera éna nacamiriuchayarehi eta táicuñayare te apaquehe etapa te une mar. **2** Énerichuvare nímahavarepa ema apena ángele tiásihahi te táuchusinehi eta sache. Macaratacahi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuáetroqueneana ángeleana.

3 Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar etapa eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

4 Tásicha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násichaqueneanahi nayehe ena dócemuriqueneana israelítana. **5** Doce mil ena ticamarcanahi machichananavéqueneana ema Judá. Doce mílvare ena ticamarcanahi machichananavéqueneana ema Rubén. Doce mílvare ena ticamarcanahi machichananavéqueneana ema Gad. **6** Doce mílvare ena ticamarcanahi machichananavéqueneana ema Aser. Doce mílvare ena ticamarcanahi machichananavéqueneana ema Neftalí. Doce mílvare ena ticamarcanahi machichananavéqueneana ema Manasés. **7** Doce mílvare ena ticamarcanahi machichananavéqueneana ema Simeón. Doce mílvare ena ticama-

rcañahi machichanavéqueneana ema Levi. Doce mílvare ena ticamarrcañahi machichanavéqueneana ema Isacar. ⁸ Doce mílvare ena ticamarrcañahi machichanavéqueneana ema Zabulón. Doce mílvare ena ticamarrcañahi machichanavéqueneana ema José. Doce mílvare ena ticamarcañahi machichanavéqueneana ema Benjamín.

Camurianavare ena apavasajuecuana tijapumuirihavacahi

⁹ Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca. ¹⁰ Namutu tipiaracanahi, ánipa nacahe:

—Vihasulupayachavi, piti Tata Vicaiyaquene, pítipa piti Cordero, taicha éti ecuchucuhahavihi —nacahepa.

¹¹ Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyarahana tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya. ¹² Ánipa nacahe:

“¡Eta vicaheyare!

Máitavacacayare eta vitsiusiraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, étapa eta pipicauchacarevahi, étapa eta pitumeva.

Picarichu piti péchahavíhi.

Ichape eta vihasulupayachiravihi.

Tijarahi te visamure te vijirauchavi. Amén”.

¹³ Tacahe, ema émana víyaraha máichanupa:

—Te pivaraha pímati, nímmatichaviyare ena nani ticamuirihanahi eta tijapu, távhavarepuca násiha —máichanupa.

¹⁴ Tacahe, níchapa nútì:

—Picatajicanu, pimetacanu, tata.

Tásiha, máichanupa:

—Ena nani énara ena nacatajivaqueneanahi ichape taicha eta náehisirahi ema Jesús, tiúchucuhanaripasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviurevainahini. ¹⁵ Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi. ¹⁶ Ena nani tájinapa nácamunuimahi, vaipa técuhana, váipavare timauneana. Váipavare ticatajivanaimahi taicha eta tájureva eta sache. ¹⁷ Taicha ema Cordero, ema tiávihahi te tamirahu eta trono, tétavicava eta majapanuraivahi, majaneacavayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyaraha.

8

Éma Cordero mavepistacapa eta téqueneha sello

¹ Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira. ² Tásiha, nímahapa ena siéteana ángeleana, titupihanahi te mamirahu ema Viya. Ticaijarracasianapa eta siete chujareana nachujanayarehi. ³ Tásiha, títecavarepa

ema émana ángele. Mámapahi eta censario, amairiha oro. Tatarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Náijaracapa eta incienso tisimuri. Tacahe, macaratacapa eta censario te tápusi. Macapusisiacapa ema Viya, tacachanepaipa eta nayujarasirana namutu ena machanerana ema Viya. ⁴ Tásicha, eta taquijarera étapa eta mayujarasirana tiápanapa mayehe ema Viya, tásihaquenehi te mavahuana ema ángele. ⁵ Tásicha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásicha, máepuraicapa te apauehe. Tíjahúchavapa térameca, ticaema, tirurecapa. Tiayacarepa eta apauehe.

Eta nacachujairayare ena siétequeneana ángeleana

⁶ Tacahe, nímahavarepa ena siétequeneana ángeleana titsecavanaripa eta nacachujairayare.

⁷ Te ticachujapa ema tínapuca ángele, témiricapa te apauehe eta uverequi étapa eta tiquiva ítiama. Témiricavare eta yucu. Tájuchapa eta tercera parte te apauehe. Támairiacapa eta yucuquiana, eta muiji, étapa eta sucurecana.

⁸ Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiama táchica. Tercera pártehivare eta ítiama. ⁹ Támairiacapa tacapapajicavaca eta sárareana tiávihana te une. Étapa eta pacureana tachimaranuanahi, técharicavanapa. Téririjicanapa tamutu.

¹⁰⁻¹¹ Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana étapa eta cáquiureana. Venenoamapa taicha eta jarairiqui. Ichapemurianavare ena achaneana tépenaracanahi taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

¹² Te ticachujapa ema apana ángele, tiúchujicapa eta tépacuchahi eta sache, eta caje étapa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacaecherairahi eta sache. Ocho hóravare eta tacaecherairahi eta caje étapa eta jarairiquiana.

¹³ Tacahe, nésenicapa te anuquehe. Nímahavarepa ema émana ángele tiáraraicahi. Nusamapa tipiaracapahi muraca, ánipa macahe:

—Páureanasami ena tiávihanahi te apauehe. Tétavicavaya eta nacatajivairayare, puiti te táitauchavapa eta nacachujairaya ena mapanaqueneana ángeleana, téquenehanaya ticachujana —macahepa.

9

¹ Te ticachujapa ema apana ángele, nímahapa ema ángeléni mavasihi eta jarairiqui. Máquipairuvahi te apauehe. Máisapa ema Viya eta mavejiasi-rayare eta pozo táupenaquene ticaijare Abismo. ² Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare. ³ Témunahircavapa tiúchuca eta tavasiqueneana eta tsacarana, tayehe eta quijare. Amairipahipá tamutu eta apauehe. Tajarachapahi eta tayucaraivahi tacutipa eta tayucaraiva eta sáserahi. ⁴ Ticatuparacasipa vahi tacunica eta tamuijira eta apauehe étapa eta tapacajiana eta sucurecana étapa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehe eta mamarca ema Viya.

⁵ Cíncoyarehi caje eta tayereva eta tayucararereresirayarehi. Váhisera tépenanáimahi ena achaneana tayucaqueneanayarehi. Tétavicavasera tacativa-yarehi nasama. Eta tayucaraqui tacutiyarehi eta sáserahí eta tacativayarehi nasama. ⁶ Te jena sácheinayare ena achaneana navarahayare ticapacavana. Váhisera tépenanáimahi, tayanapane navarahayare tépenana.

⁷ Eta juca tavasiqueneana tsacarana, nímicutíchapa eta cavayuana te titsecavanahí tayehe eta guerra. Tásicha, te tachuti tacutimahiyaréni ticayehé corona oro. Eta tamira achanemirayaréni. ⁸ Tiuji eta tachutimaca, tacutiyaréni eta suchutimaca esu esena. Tíñehivaca eta táheana. ⁹ Eta taparuma tacutiyaréni eta fierro muracaquenehi. Vahi táechucaimahi eta isavipe. Eta tárairahi, jtétavicavahi eta tamuracavahi! ¹⁰ Ticaijiquivaca tacutiyaréni eta sáserahí. Eta juca tiyucarahi, cinco cájeyarehi eta tacaitemajirisiravacayare ena achaneana. ¹¹ Mararihivare ema táquenu ema téchahi éta, ema ángeléni tivejiacahi eta táupenaquene pozo. Ema maca ángeléni, eta máijare te náechajirruva ena hebreoana “Apolión”. Te véchajiriruvana víti, ticaijare “Tijarrerahi”.

¹² Títauchavapa eta tínapuca ecuñaraqui nímahaquenehi. Jucarihichahava-resera apinachaha eta ecuñaraquiyare.

¹³ Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tiámahi eta maycuneasa ema Viya, tiávihahi te mamirahu éma. ¹⁴ Ticavanairipipa ema ángelé ema ticachujahi, ánipa macahe:

—Picaíticapa ena cuátroqueneana ángeleanaini váinarajiana, tiávihanahi te tachacaya eta cajacure Eufrates —macahepa.

¹⁵ Taicha acane ema Viya manerejicaripa eta juca hora eta macaitisi-rainapa ena cuátroqueneana ángeleanaini, másapainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapuacanapa éna. ¹⁶ Tacahe, tiúchujicanapa ena suntaruana ticaperana. Nusamapa eta natupa. Dosciento millone eta náichapemuríva.

¹⁷ Tacahe, eta nímaírahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táiñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha. ¹⁸ Camurianahi ena achaneana, ena tacaparuanapahi eta juca mappaquene ecuñaraqui eta tacuchusirapahi te tajaca: eta yucu, eta quijare, étapa eta azufrepuha. ¹⁹ Énerichuvare tatiarihi eta táijiqui ticutipainehi eta quichare. Tétavicavahi eta táiñehivapahi eta tacaparaqui táuchurepahi te tajaca étapa te táijiqui.

²⁰⁻²¹ Énasera ena apamuriana achaneana tacaitiruanahi eta ecuñaraqui, váliquene navarahaimahi náinajica eta náichira eta tamauriqueneana. Váliquene téneuchavanáimahi. Váhivare náinajicahini eta nacapahivana, eta nahiapemarevana, étapa eta náesenamarevana, étapa eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruanahi oro, plata, bronce, márijahi, yucuqui. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairiricahini.

10

Ema ángelé macaratacahi eta ajurecachicha

¹ Tacahe, nímahapa ema apanavare ángelé tiúcupaicahi te anuma. Tétavicava eta máñehiva. Tamuichapahi eta úcaji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta

mapaiqueana tijarahivaca ticutipahi timuruquiape. ² Téjiacahi eta ajurecachicha eta macaratasirahi te mavahu. Tásicha, eta mapaique vaure mácatayaecahi eta une te mar. Eta étaquiae sapa tacatayacahi te tiájipahi. ³ Tásicha, tipiaracapa muraca, tacuti eta tahu eta tíñehiquenehi sárare. Te titapiricapa, nusama eta nahu ena apamuriana tacutiyaréni eta tirurehuchahi. Siétequenehi eta najicapirahi. ⁴ Te timatinapa, nuvarahapa nájuequenehaya-rehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumetajirica —máichanupa.

⁵ Tásicha, ema maca ángele nímaquenehi eta mácatayasirahi eta une étapa eta tiájipahi, masuvechapa te anuma eta mavahu vaure. ⁶ Ánipa macahe:

—Tivanecanuhi ema Viya, ema acanevacauquenehi eta máitaresira, ema yátupiquenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tiyeremahi eta táitaviraya”. ⁷ Ánaquiaparipahi eta nacametacasivahi ena profetana eta mapanerueruana ema Viya. Puítisera te macachujapa ema téqueneha ángele, titavainapa tamutu eta mapanerueruanahi —tacahepa eta mame tarapihi ema ángele.

⁸ Tacache, nusamavarepa eta mahu ema téchajicanuhi tásichaquenehi te anuma. Tivanecanuvarepa nupaucha ema ángele titupihahi tayehe eta une étapa te tiájipahi. Ánipa macahe:

—Piyana piyaseaca eta ajureca macarataruhi ema ángele —macahepa.

⁹ Tacache, nuyanapa mayehe ema ángele. Nuyaseacapa eta ajureca. Tásicha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyare eta rápama. Étasera te piami, tisucareyare pisama —macahepa.

¹⁰ Tacache, nuvehapa eta ajurecachicha te mavahu ema ángele. Nunicapa. Jéhesaréinehi titivéinehi eta nusamira te nujaca tacutirinehi eta rápama. Téhesera nujiricapa, tisucarepa nusama te nami. ¹¹ Tásicha, nucametacasi-varepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

11

Ema Viya mavanecainapa ena apinana mavanaranayarehi profetanaya

¹ Tacache, te nuvapure, tíjaracanuanapa eta ecutiriqui. Tásicha, máichanupa ema Viya:

—Piyanayare tayehe eta Templo te Jerusalén. Pícutichaya tamutu eta peti étapa eta canchón. Pícutichavare eta náijuchirarehi eta sárareana námavahu-queneana. Tásicha, pitupachayareva áyananahipuca ena achaneana téneuchavarahianahi eta te canchón. ² Váhisera picuicuticha te aneca tamirahuhi eta Templo. Taicha ena apajuecuruhana, nísapaqueneanapa eta návihairaya éna. Nísapainavarepa eta náitahasiraya eta tayereruvanaini eta avasare tacapicahuquenehi Jerusalén. Ichape eta namapachichijisirayare. Cuarenta y dos caje eta náichirayare. ³ Nútisera nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare —macahepa.

⁴⁻⁵ Tásicha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi

tamutu eta juca apaquehe. Eta juca táicutiara eta majaneasiravaca ena apinana mavanarana, taicha manerejiruanahi éna, nacometarairuyare eta náeneuchiravayare ena achaneana. Te natariihinapuca nácani tivarahnayare titupiacana, éna ticatiuchavanayare. Tiúchucayare eta yucu te njaca. Táijuchayare muraca, tacapacayareva ena nánaranayarehi. ⁶ Énerichuvare ena nani, naratahayarevare náichejica eta tiquiva te jena sácheana nacometaruirayare. Étaripa eta une, náepiyacayare ítiamayare náicha. Nacuchucayareva eta táñepahiyare nayehe ena achaneana, apanapaneneyiyarehi náicha, te jácani navarahaqueneyare éna. ⁷ Téhesera te táitauchavapa eta nacometaruirayare, macanaravacainapa ema Tíñehi Achane Váinara-jiquene ticaijare Útsutsure. Émaripa ema majupaha ema Satanás. Tásicha, masapihainapa ticaparecayare macapacavacainapa ena apinana mavanarana ema Viya. ⁸⁻⁹ Tásicha, ema Tíñehi Achane Útsutsure vahi másapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetatainehi ema Viáquenu. Eta juca avasare, tétavicavahi eta tamauriva tacuti eta avasare Sodoma, étapa eta Egipcio. ¹⁰ Ena achaneana, natariihiyare te tamutu avasareana ena tiúrisamureanaya eta náimairaya ena tépenanahi. Ticapie-staranaainapa. Tíjaracasichacacanainapa eta námavahuana. Taicha titavanariпа ena nani profetanaini, énaripa ena tihapapiricanahi eta náichira eta tamauriqueneana. ¹¹ Tásihasera, te taequenénapa eta mapanaquene sache y medio, macaechepucavacainapa ema Viya. Tichavanainapa titarecanayare. Namutu ena achaneana náimahaya. Ichape eta napisirayare. ¹² Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, iápana —máichapa.

Tacahe, járajapapa eta úcaji taeponavacapa éna, támapa te anuma. Ena ticanaranahi náimrararacaripa eta nayanirahi. ¹³ Enevanepa tiyayacarepa eta apaquehe. Muraca eta tayamurisirahi. Camuri eta pétiana tiáquipacavavacahi. Siete mil eta náichapemuriva ena náepenaqueneanahi. Ena achaneana taeemachanahi, tétavicavainehi eta napisirahi. Náimatinumainehi ema Viya. Napiaracapa, nacunachapa eta máitupajijiasiravahi ema Viya tiávihahi te anuma.

¹⁴ Títauchavapa eta juca apinaquene ecuñaraqui. ¡Váhisera tayerequene-haimahi eta mapanaquene ecuñaraqui!

Ticachujapa ema téqueneha ángel

¹⁵ Tacahe, ticachujapa ema téqueneha ángel. Tásicha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techá tamutu —tacahepa eta nahu.

¹⁶ Tacahe, tépuyucanapa ena véinticuatroqueneana víyarahana, ena téjakanahi tayehe eta trono te mamirahu ema Viya. Titsiucapairicanapa, nacunachapa ema Viya. ¹⁷ Tijiranapa, ánipa nacahe:

“Vihasulupayachavi, Tata.

Tétavicavahi eta pítupajijiasiravahi, píturuequeneha tamutu.

Píti pitiahiquenehi te tépanavainapa eta apaquehe.

Pinasirichuhivare puiti eta viyehe.

Puiti péjacapa tayehe eta piávacure ichapequene, pítirayarepa pecha tamutu.
¹⁸ Tétavicavahi eta nasemanevahi ena achaneana eta piyehe.
 Muracapanainapasera eta pícuñasiravaca éna.
 Puiti ticayaseserehianainapa te pimirahu ena náepenaqueneana.
 Jéhesare, picamitiequenehainapa namutu ena ticamitiequenerahianaini te
 juca apaquehe.
 Puiti pítsirijicavainapa eta nacaematañesiravihi ena pivanarana ticameta-
 rairurahiana eta péchajiruva.
 Puiti píjaracainapa eta náicuchihi ena yátupiqueneanahi
 pichichanaveanahi tiámanahi eta píjare:
 nácani ichavicana, araitanana, énapa ena amaperuana” nacahepa.

¹⁹ Tacahe, téjiacapa eta tapajacura eta Templo tiávihahi te anuma, mapena ema Viya. Ticaecherapa eta sagrario tacaunaiyahi eta echajirirucavana matratuneanahi ema Viya nayehe ena israelítana. Tásicha, enevanepa téramecahi, ticaemapá, tirurecapa. Témiricapa eta uvarequi timítutupahi. Tiyamuricavarepa eta apaquehe.

12

Máimahavare ema Juan esu esena tínacayarehi étapa eta táñehiquene sárare ticajare Serpiente

¹ Nímahavarepa eta apana ecutiarare te anuma. Tiáramicarehi éta. Sutiarihi esu esena. Eta sumuiriha tacutiyaréni eta tajaraiva eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jarairiqui. ² Esu suca esena ticajarihi. Tipiararecahi eta suínasirayarehi. Ichape eta sucatajivairahi.

³ Tásicha, témunahiricavarepa tiúchujica eta táñehiquene sárare. Ichapequenehivre. Ticajare Serpiente. Máchaneva ema Satanás. Titsi eta táimahi. Siete eta tachuti. Diez eta tajihuana. Ticayehéhi eta corona eta te tachutiana. ⁴ Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásicha, titupihapa eta sárare te sumirahu esu esena esu tínacayarehi. Titsecavaipa eta tanisirayarehi eta suchicha.

⁵ Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aquenucayarehi tayehe tamutu eta avasareana. Macaratacayare eta matsucurupa fiérroqui. Váhiqueneyarehi tijapanucareanaimahi nácani náichahi eta tamauriqueneana. Muracayarehi eta náicuñanayare ena téjecapavana. ⁶ Tásicha, esu esena tijunavanepa te mávapahi apaquehe eta suávihayarehi maicha ema Viya. Natiarihiyarehisera ena ténicanayarehi ésu. Mil doscientos sesenta sácheana eta náitátirayarehi esu esena.

⁷ Tacahe, tiúchujicapa ema Arcángel Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natarihivare ena tayeheanahi ángeleanaini váinarajianahi. ⁸ Apaquehererupasera eta ichapequenehi Serpiente, énapa ena tachamuriana. Tásicha, vaipa másapa ema Viya nanasihini te anuma. ⁹ Tacahe, ticaquijianapa te juca apaquehe namutu ena ángeleanaini, émapa ema náquenumurihi Serpiente, ema ticaetemahi acane esu Eva. Émarichuhi ema Váinaraji ticajarehivre Satanás. Puíticha ticaetemajiricavacahi ena achaneana te juca apaquehe.

¹⁰ Nusamavarepa te anuma eta mahu muraca, ánipa macahe:
 —Títauchavapa puiti eta náuchucuirapa ena téhicanahi ema Cristo. Máimererupa ema Viya eta tamutuirahi marataha. Máijaracapa ema machicha Cristo eta émairapa techá tamutu. Taicha ticaquijipa ema

Satanás, ema timetauchaparacainihi me Viya eta náichavaquenévanahi ena vichamuriana, tamutu sácheana, yátiana. ¹¹ Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasíñavanahi tayehe eta máepenirahi ema Cordero. Énerichuvare náimimatichahi ena apamuriana achaneana eta máechajiruvana ema Viya. Éna, vahi napicacavacahini tayehe eta náitaresira. Tíjaracavanahi te náepenirayarehi, vahi návarahahini náinajica eta náehisirahi ema Cordero. ¹² Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe étapa eta tiávihanahi te une te mar, taicha ema Váinaraji máucupauchavacaipa. Tétavicava eta masemanevapahi taicha máechahi eta ánipirinehi macaheyare —macahepa ema maca.

¹³ Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suínaruhi.

¹⁴ Ésusera ticaijaracasipa eta apina ichapequeneana supavanayarehi tacuti eta tapava eta ichape mÁtihi. Sumaitasiavayarehi tiara tayehe eta mávapahi apaquehe suávihayarehi. Ánaqui natarihiyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapau-chaimahi ésu. ¹⁵ Tásiha, eta Serpiente táchicapa eta une te tajaca, tavarairahi tíjahúchava tatiarihi eta cajacure apaesa suéricahini esu esena. ¹⁶ Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente. ¹⁷⁻¹⁸ Tacahe, eta táimairavahi eta Serpiente vahi táratahahini, tavetijipaicha eta tasemirahi suyehe esu esena. Tiyanapa nayehe ena suchamuriana, énapa apavequeneanahi. Tavarahapa tacapacayarehi ena sucutqueneanahi tisuapanahi ema Viya, téhicanahivare eta máimiturapianahi ema Jesucristo.

13

Máimahavare ema Juan eta útsutsure étapa eta sárare tíñehiquene

¹⁻² Te taequenepa eta juca, te nuvapure, nutupihahi tayehe eta playa eta mar. Nímahapa eta útsutsure tiúcupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táiñehiquenehi eta tajaca. Eta tívapeana tacutiyaréni eta tívape eta aticure. Tásiha, te tachutiana tatiarihi eta ajureca tímijachavahi Víyainahíni. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaetemaraivayarehi maratahairayarehi tamutu. Aquenucayare te tamutu avasareana maicha eta Serpiente. ³ Te étana machuti ema Útsutsure, tatiarihi eta majara eta ticapacahi. Tásihasera, tichavahi titareca, tinaracavarepa. Tacahe, eta náimairahi ena achaneana te tamutu avasareana, ichaperinehi eta nárami. Tásiha, náehicapa nasuapapa ema Útsutsure. ⁴ Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehe:

—Tétavicavahi eta máitupajijiasiravahi ema maca. Nájinavare tiratahaimahi nacanara náquipaica éma —nacahepa.

⁵⁻⁷ Tacahe, ema Viya másapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masiñavavaisirahi, tímijachavahi Víyainahini. Tíñemahipivaca eta máechajisira, macaecahirahi ema Viya étapa

eta mapena. Macaecahivare ena tiávihanahi te anuma. Énerichuvare mapanajiricavaca ena machanerana ema Viya. Máimicaratacavacapa, mavaraírahi máimicapacavacaya. Cuarenta y dos caje eta macamichiráhi ema Viya eta máimiyusemasirahi ema Útsutsure.⁸ Eta acane te tépanavainapa eta apauehe, tatiarihi eta libro tiama eta nalista ena titarecanaya te apana vítaresira. Macarataruhi ema nacaparuhi Cordero. Natiarihisera ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

⁹ Te evarahapuca ecaicutiara eta juca, tavaraha epanerechaya ichape. ¹⁰ Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani ticaparecahi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

¹¹ Tásiha, nímahavarepa eta apana sárare, táïñehiquenevare. Tiúchujica te amahe apauehe. Eta juca sárare, macunahi ema achane ticaijare Falso Profeta*. Eta juca, tatiarihihi eta apina eta tajihuana, tacuti eta tajihu eta uvesa. Étasera eta táechajisira tacutiahu eta tahu eta Serpiente Satanás.

¹²⁻¹⁴ Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tiáramicareana. Maratahahivare macamirica eta yucu tiásihaya te anuma. Náimahahi namutu ena achaneana te juca apauehe. Ichape eta náramirahi. Étavenehi eta juca táimeresirahi eta tiáramicareana, étainapa tivayuacaya ena achaneana, tisuapacarenapa titsiucacarenarepa ema Útsutsure. Taicha náimahahi eta manarasirahi eta majara te tumare; tiápechava titarecahi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya.

¹⁵ Ema Viya macamichahí tamutu eta máichaqueñeanahi ema Falso Profeta. Vahi máicuñacavánehíni eta máchanechirahi eta náepiyaruhi máimahi ema Útsutsure. Téchajicayare máicha. Eta juca nasiñaraji titupajijiacavainapa tivanereca, ánipa tacahe:

—Namutu tatuparacahi natsiucanu nútì. Nácani vahi návarahahini titsiucanuhini, ecapacavacayarehi —tacahepa.

¹⁶⁻¹⁷ Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureana-hipuca, líbreanahipuca, mósoanahipuca. Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena mamarcareana. Ticatajivanainapa eta náiturusirayare eta nacamunuqueneana taicha vahi nacamarcahini.

¹⁸ Tacamuñuhi yátupina vipáneréquenehayare maicha ema Viya, apaesa vácaicutiara eta tacayemaquenehi tayumururevahí eta tuparaqui máijare ema Útsutsure eta 666. Éta, tacunahi eta máijare ema maca achane.

14

Eta najirasa ena 144,000 ena téhicanahi ema Cordero

¹⁻³ Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiarareana énapa ena véinticuatroqueneana víyarahana tuparairucana.

* **13:11** Te pivarahapuca pecha eta apana, pitanuca eta capítulo 16.13.

Nímahavarepa ema Cordero. Te machacaya natarihihi ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiyaréni eta muraca tirureca. Tásiha, títsivachavavarepa. Nusamapa ticapununeanahi eta camuriqueneana guitarra. Tacahe, ena 144,000queneana tijiranahi te mamirahu ema Viya. Arapirohu eta najirasahi. Nájina apanaina titúcaina eta najirasahi. Nacarichu titucanahi ena 144,000queneana. Ena nani náuchucureanahi te namuri ena ticavasanahi eta juca apaquehe.

⁴ Matapiravareanahi éna te mamirahu ema Cordero. Tájinavare váhiquene náechipejicavahíni, navirainahini esu esena túhusi. Náehicahi ema Cordero te jácani mapaisirana. Ena nani, ena náinapureanahi masantuchaqueneanahi ema Viya émapa ema Cordero. ⁵ Tájina náimatiyahini eta náepiyahirahihini. Tájinaquene natapiravainahini te mamirahu ema Viya.

Eta nametarapi ena mapanana ángeleana

⁶⁻⁷ Nímahavarepa ema émana ángele tiáraraicahi. Ticametarapihi eta tquéneha mame tarapi eta máichuaresirahi eta náeneuchiravaina ena achaneana tiávianahi te tamutu avasareana, apaechajiruvauqueneana. Maitavacacainapa eta náitaresiraya nácani ena tisuapanahi. Muraca eta máichuaresirahi, ánipa macahe:

—Éneuchava eta epecaturana. Epicauchayare ema Viya, taicha éma tépiyacahi eta anuma, eta apaquehe, eta mar, étapa eta cáquiureana. Émaina ejiraucha, ecunachaya. Émaina etsiuca. Taicha járajapainapa puiti eta máicuñasiraya ena achaneana máeneuchavarahana —macahepa.

⁸ Tacahe, tiúchujicavarepa ema apana ángele. Émapavavare téchajica. Tiáramicare eta macayemaquene. Ánipa macahe:

—Tájinapa táipuina tacamitiaruinapa eta ichapequenehi avasare Babilonia, taicha téavicavahi eta tamutuirahi taicha eta tamauriqueneana. Tavayuacahi tamutu eta apana avasareana táichiraya eta tamauriqueneana, tacutihu súcani esena suétaviurequenehi eta sutuhusivahi, namutupahi suvayuaca —máichapa.

⁹ Te titapiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájinavarepa táipuina eta náicuñanayare ena tijirauchanahi ema Útsutsure étapa eta máimahi náepiyaruhi nasiñarajiji, énaripa ena tiámanahi eta mamarca te nanahuana étapa te navahuana. ¹⁰ Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetirarásina eta tamuruira. Muracaquenehi eta nasamira. Táitusiava, natsirihainapa eta máimararasira ema Cordero, énapa ena ángeleana. ¹¹ Máichecuaraqureyare eta nacaicuñairayare. Tájina ticaemahaimahi eta yucu. Tamutu sácheana, yátiana nacaheyare te yucu ena tijirauchanahi titsiucanahi ema Útsutsure, tiámanahivare eta mamarca, tacuna eta máijarehi ema nasiñaraji. ¹² Eta tacahe, ena machaneranahi ema Viya, ena tisuapanahi eta mavanairipiana, túmesamureanayare eta náehisiraya ema Jesús, puiti nacamichayarehi tamutu —máichapa ema ángele.

¹³ Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Téavicava eta náuricacrevaya ena táimicaparuanayare puiti juca vicaijuheyare eta náehisirahi ema Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihi taicha eta nacaemataneasirahi ema Viáquenu. Tájinapa nácamunuimahi, tinaracanainapa —macahepa.

Eta nacurujisiraya ena ángeleana ena achaneana

14:16 Te nésenicapa, nímahapa eta tijapu úcaji. Matiarihihi ema támaque-nepahi. Téjacahi éma te úcaji. Achanehi eta máimahi. Te machuti tatiarihihi eta mayehe corona oro. Németeaca titsecavaipa eta macurujisirayare eta trigo. Tásaha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu* —máichapa.

Tacahe, ema téjacahi te úcaji, tíjahúchavapa macurujicapa ena náequenerruanahi manerejiruanahi ema Viya. Macuchucavacapa eta te juca apaquehe.

17 Tásaha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva†. **18** Énerichuvare tiúchujicavarepa ema apana ángele eta te mesa tiámahi eta maycuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Tícuñacacareanapa ichape, taicha tétabicavahi eta náichirahi eta tamauriqueneana. Vaipa ticuchapacarehini eta náeneuchiravaina‡ —máichapa ema ángele.

19 Tacahe, tiyanapa ema ángele. Macurujimurihapa ena achaneana tíchanahi eta tamauriqueneana. Tíñehiquenehi eta náepenirahi taicha títecapapa eta táíñehiquene ecuñaraqui tiásihahi me Viya taicha eta náimiyuse-masirahi éma. Tacajapapahecavacahi éna.

20 Te tachachacu eta viávasa eta tacajapapahesihahi. Tiúchucapa eta náitine, tacuti eta cajacure. Étana metro eta táupenava. Trescientos kilómetros eta táunavayare.

15

Ena siétequeneana ángeleana najacapapa eta siétequene ecuñaraquiana

1 Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natarihihivare ena siétequeneana ángeleana. Ticatuparacasianapa éna eta nacamirisirayarehi eta siétequene ecuñaraquiana te apaquehe. Te táitavapa eta juca ecuñaraquiana, titavainavarepa eta masemanevahi ema Viya.

2 Níma tativa eta ticutiyaréni táimahi eta une te ichapequene cáquiure. Tétavicavasera eta tajanunusira tacutihi eta espejo. Tásaha, tacutiyyaréni eta yucu eta táimahi. Natarihihivare ena másapavarahanahi najirauchahini natsiucahipucaini ema Útsutsure étapa eta máimahi náepiyaruhi, vahivare náisapavahini nacamarcahini eta mamarca. Te tachacaya eta une titupihanahi. Nacaratacahi eta nayeheana guitarrrana máijararuana ema Viya. **3** Tijiranahí eta jirasare majirasaini ema víyarahaini Moisés, mavanaraini ema Viya. Najirauchahí ema Cordero. Ani tacahehi eta jirasare:

* **14:14-16** Te pivarahapuca pecha eta apana, pitanuca Mateo 13:24-39, étapa te 24:30,31. † **14:17** Te juca, ema Juan máechajisihahi eta nacurujisirahi eta uva, tahi eta épire. Te jena avasare, eta nayeherépi ena achaneana, nácatayayajica eta uva te raveta, navarairahi nacuchuca eta tachi. ‡ **14:18** Ema ángele máimicujiyicahi eta tíñehiquene ecuñaraqui ticapacayare ena camuriqueneana achaneana étapa eta sárareana. Vuíchahasera étina etáequeneha ecuñaraqui.

“Píti ichapequenevihi aquenuca,
 Tétavicava eta pítupajijiasirava.
 Tamutuquenehi píturuequeneha.
 Tétavicavapa eta táramicarevahi eta pépiyaruuanahi.
 Tiúricacarehivare eta pinaquipairuanahi.
 Vahi apanapanenejinahini eta péchajiriruvana.
 Yátupihi eta piúriva.
 Píti aquenucavihi, péchaya tamutu avasareana.
⁴Namutuhi tipicaviana, piti Tata.
 Namutuvare ticunachaviana taicha piti yátupiquenévihi eta pisantuva, nájina
 nácutivihini.
 Títecanayare nácani achaneana te tamutu avasareana.
 Titsiucavianayare taicha náimahahi tatupiruvahi tamutu eta píchaque-
 neanahi”.

⁵⁻⁶ Tásicha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticatuparahanahi eta siétequene ecuñaraquiana táequenere-ruyare tiúchujica. Eta namuirihana, amairiha eta lino tijapu tirapepea-cavaca. Eta náitijuheana ichapemevaca, títecavaca te natupana. ⁷ Tásicha, nímahapa ema émana ecutiarareana nacuatronehi. Máijaracavacapa étasivaca eta escudilla oro ena siétequeneana ángeleana. Te tajuhe eta escudilla támaphi eta táiñehiquene ecuñaraqui táicutiarahi eta masemaneva ema Viya. Éma, acanевacaquenehi eta máitaresira. Máimahapa tamutu eta tamaurique-neanahi náichaqueneanahi ena achaneana. ⁸ Tacahe, nímahapa tíjahúchavapa eta tajurusirahi eta majaraivahi ema Viya, ema acanевaca eta máitaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásicha, nájina tiratahaina tisiapano te Templo, vahivare tímaha-carehini eta tapajacura táichavenehi eta tavayuchiravahi eta majaraivahi. Tiámainucava te táitauchavapa eta siétequene ecuñaraqui taequenereruyarehi námaquenepahi ena siétequeneana ángeleana.

16

Títauchavapa eta ecuñaraquiana nacimirihuhi ena siétequeneana ángeleana

¹Nusamapa muraca eta mahu ema Viya tásichaquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacaheta navanahi:

—Eyanapa ecamirica te apaquehe eta juca siétequene ecuñaraqui táiñehi-queneana tiávihanahi te escudilla taicha eta nusemanevahi —máichapa ema Viya.

² Tacahe, tiyanapa ema tínapuca ángele. Máepusaicapa te apaquehe eta ecuñaraqui tiávihahi te escudilla macarataruhi. Tacahe, ena achaneana tiámanahi eta mamarca ema Útsutsure, táichavenehi eta natsiusirahi eta máimahi nasiñarajiji, témunahiricavapa táuchuacavaca éna eta caracha ticajachacarepa tijechevare, tacutiyareni eta espuntiu.

³ Ema apana ángele máepusaicavarepa eta macarataruhi tayehe eta mar. Tacahe, eta une tíjahúchavapa ítama, tijechearampa. Tépenaracanapa tamutu eta sárarechichana ticavasanahi te mar.

⁴ Ema apana ángele máepusaicavarepa eta macarataruhi tayehe eta cajacureana, te cáquiureana, étape te tatavarapiana. Énerichuvare ítiamavarepa.

⁵ Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriva, piti Tata Vicaiyaquene, eta pícuñasiravacaipa puiti ena ticaviurevanahi. Yátupiquenevihi eta pisantuva. Píti pitiarahi-quenehi te tépanavainapa, puítiripa pinasirichuhi eta viyehe. ⁶ Tícutichava-nainapa puiti eta navarahaqueñehi téraneta íti ena tépusaicanahi eta náitine ena pichanerana táimicaparuana eta náehisiravihi píti, étapa eta nacameta-rairuirahi eta péchajiriruva. Puiti píjaracaipa eta náerirayare eta ítiama taicha naviurevanahi éna.

⁷ Nusamavarepa eta mahu ema apava tayehe eta mesa tiámahi eta mayu-cuneasa ema Viya. Ánipa macahe:

—¡Tata Vicaiyaquene, tétavicavapa eta vicunachiravi! Píti, tétavicava eta pítupajijiasirava, píturuequeneha tamutu. Pitupiruvahí eta pícuñasiravacahi ena ticaviurevanahi. Vahi pémetavicaíhí —máichapa.

⁸ Ema apava ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tíjure, táijuchirapa eta apaquehe énapa ena achaneana. ⁹ Jéhesaréinehi, táetaviuchapa eta táijurevahí. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nasema-nevahí. Nacajachapa ema Viya, ema ticavanairipipa eta ecuñaraquiana.

¹⁰ Ema apava ángele máepusaicavarepa eta macarataruhi te tainahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiéquenehahíni tájahapuca eta náicharacavaya namutu ena machanerana. Ticapitiquiahechavanapa ena achaneana taicha eta tacativa nasama. ¹¹ Tacahe, tisemasamureanapa nacajachapa ema Viya taicha eta tacativahí nasama eta najarana nacarachana. Váhiquenesera téneuchavanáimahi mayehe ema Viya. Váhivare náinajicaimahi eta náichira eta tamauriqueneana.

¹² Ema apava ángele máepusaicavarepa eta macarataruhi tayehe eta ichapequene cajacure ticaijare Eufrates. Tacahe, eta cajacure tiájicupa, apaesa máejerare eta nánucuiraya ena aquenucana tiásihanahi te tinapaica eta táchusine sache, énapa ena suntaruana.

¹³ Tásiha, nímahavacapa ena mapanaqueneana ticaetemarahianahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchucahi eta tavásiyaréni eta varutete. Éreananahi eta júcana, náchanevanahi ena mapanaqueneana. ¹⁴ Éna, titupajijiacavanahi tíchanahi eta tiáramicareana tavayuaraquianahi nayehe ena aquenucana te tamutu avasareana. Navaraha nacurujicavacayare, énapa ena nayeheana ejército nasuntaruana apaesa namutu ticanaranaya ema Viya. Tíjahúchavasera muraca eta máquipapaisiravacainapa éma, taicha tétavicava eta máitupajijasirava, máituruequeneha tamutu.

¹⁵ (Nuti, tíjahúchavaya eta nítecapauchiraheyare éti. Váhisera tánecapacarremahi eta nítesira. Eta tacahe, tétavicava eta iúricacarevaya te ecunevahí, machu ímacariana eta nuchimapiraheyare, etsiriacaréipa.)

¹⁶ Tacahe, ena mapanaqueneana éreananana nacurujicapa ena aquenucana énapa ena nasuntarurana tayehe eta vámahi ticaijare Armagedón te náechajiriruva ena israelítana.

¹⁷ Ema téqueneha ángele nasiétenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tiásihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

¹⁸ Tacahe, tiúchucapa eta térameca. Ticaemapá. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava

nasamasarehini eta acane eta táepaniravahi eta apaquehe. ¹⁹ Te tamutu eta avasareana te juca apaquehe, tiáquipaicavanapa eta pétiana. Tavetijipa eta ichapequene avasare Babilonia. Tiáquipaicavapa tamutu eta pétiana. Mapana eta táejepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña! ²⁰ Énerichuvare, tamutu eta tiúrupuhiana téricapa. Eta cérroana témitiequenevarepa. ²¹ Témiricavarepa eta ichapequene uverequiana. Tájinavare táchuti eta táchapeva. Cuatro arroba eta tajitacarevavaca. Tásicha, ena achaneana tisemanaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uverequi.

17

Esu esena túhusi téjacahi te tamaiquehe eta apanavare sárare tíñehi

¹ Tásicha, tipauchanupa ema émana ángele nasiñenehi ena ticaratacanahi eta escudillana. Máichanupa:

—Yare, nímechavyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachausi eta mar. ² Ena aquenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueneanahi suíturucavaca tayehe tamutu eta tájiparacana tamauriqueneana —máichanupa.

³ Tacache, ema Espíritu Santo tímimahanuhi eta mavarahaqueneana tímechanuya ema ángele. Ema ángele tiámanupa tayehe eta mávapahi apaquehe. Ánaqui nímahapa esu esena téjacahi te tainahu eta tainahiquene sárare, máchanevahi ema Útsutsure. Titsi eta táimahi. Te taguehe, amairiha eta ajureca támijarechavahi, tímijachavahi Víyainahini. Siete eta tachutiana. Diez eta tajihuana*. ⁴ Esu suca esena, eta táimahi eta sumuiriha mularume étapa eta titsi. Tétavicavahi táurinavavacahi eta suyereruvana, amairiha oro étapa eta táurinaqueneana márijahichichana, étapa eta tiúrinana perla. Tásicha, te suvahu súcaratacachi eta ichape suéreresi oro. Tiámahi eta tájiparacana pecatuana tainemahiqueneana suíchaqueneanahi eta suítaresirahi sutuhusivahi. ⁵ Te suchuti, tatiarihihi eta ajureca eta suíjaruhi, tayumururevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana tainemahiqueneana”. ⁶ Nucaicutiarapasera eta suícharacavahi esu esena ticavahahi ésu. Táecavahachahi taicha eta suérirahi eta náitineamaini ena machanerana ema Viya, ena suímicaparuuanahi taicha eta náechajisihairahi ema Jesús. Eta nímaírahi eta juca, ichaperinehi eta náramesirahi. ⁷ Tacache, máichanupa ema ángele:

—¿Tájaha tacayema piárameca? Numetacaviyare puiti eta tacayemaquene eta juca pímaquenehi suyehe esu suca esena, étapa eta sárare superahi, eta siétequenehi tachuti, eta diésquenehi tajihuana. ⁸ Eta juca sárare pímaquenehi, tanasiqueneripahineni acane, tájinaipahisera puiti. Tiúchujicaya-revaresera tásihaya tayehe eta táupenaquene pusu. Ichape eta náramesirayare eta náimairayare ena achaneana, namutu ena tájinahai eta nalistainahini acane te tépanavainapa eta apaquehe, tayehe eta libro tiama eta nalistana ena náitareruanayare. Tatupiruvayaresera eta sárare tépenayare titaequenénapa.

⁹ “Pismanuchaha. Puiti numetacaviyare eta tacayemaquenehi eta pímaquenehi, te pivarahapuca picaicutiaraya. Esu esena tacunahi eta

* ^{17:3} Te pivarahapuca pecha eta apana, pitanuca eta capítulo 13.1-8.

ichapequene avasare. Eta juca siétequene tachuti eta sárare tacunahi eta siétequene cerro távihahi eta avasare. ¹⁰ Tacutiquene eta juca siétequene tachuti eta sárare náicutiaranahi ena siétequeneana aquenucana. Cíncopasera ena nájinaripa puiti. Matiarihisera ema émana aquenucaichaha puiti. Ema apava vuichaha títecaphi. Téhesera te máitecapapa ema téquenehayare, vaipa tiyeremahí. ¹¹ Étarichuvare eta sárare táitareruinihi acane, tájinaripa-hisera puiti. Éta, macunahi ema nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjahúchavasera eta máitaviraya.

¹² “Eta pímaquenehi diésquene tajihuana nacunahi ena apamuriana diésqueneana aquenucanayare. Vuichahasera ticatuparacásiana. Najacapayaresera eta natuparahanaya ena aquenucanaya eta te návasana. Ánipiri-chusera nacaheyare eta nacachanerayare eta sárare. ¹³ Ena nani diésqueneana aquenucana tínunana eta napanereru. Náimicatacaya eta sárare eta aquenuciranahi te návasana. ¹⁴ Tacahe, ena nani nacanarainapa ema Cordero. Váhisera náratahaimahí. Máitahacavacayarehi ema Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natarihiyareva ena macachanequeneanayare éma. Nacanerejiquenehi eta máichuirahi ema Viya. Tásiha, yátupihi eta náehisirahi éma.”

¹⁵⁻¹⁸ Tásiha, máichanuverpa ema ángele:

—Esu esena túhusi pímaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímaquenehi te tachaui eti suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímaquenehi tacunahi ena diésqueneana aquenucana. Éna, nacatichayare esu túhusi. Téhesera te táequenepa eti juca, náitaracainapa ésu eti sucayehequeneanaini. Náepachiacainapa. Náquipacayare tamutu eti supenana. Tásiha, eti náemachayare náijuchainapa te yucu. Eta nacuticacairaya, navaraha náimicataca ema Útsutsure, étapa eti nacamiti-equenehaya esu túhusi, vahi tásihahini eti napanereruana éna. Émarichuhí ema Viya tíjaracavacahi eti napanereruanayarehi, náichirayare eti mavara-haquenehi éma —macahepa ema ángele.

18

Eta táquipaisiravahí eti avasare Babilonia

¹ Nímahavarepa ema apava námasihahi te anuma. Muraca eti matuparahahi. Mamicauchaparinehi eti apaquehe eti majarai-vapahi. ² Téchajicapa muraca, ánipa macahe:

—Tájinapa táipuina táquipairuvainapa eti ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinajarajana, étapa eti cágureana tacajachacarequeneana. ³ Muracaqueneya eti táicuña taicha namutu ena achaneana te avasareana, téavicavahi eti tavayuasiravacahi eti túhusicare, étanecha nacasamurehi. Énaripa ema aque-nucana, énerichuhivare nacahehi éna táemesiavahi. Énerichuvare, ena tíjara-recarahiana eti téracare, téavicavaipahi eti náurisirahi tarricochavacaipahi eti tímítahacavacayare ena apamuriana —macahepa.

⁴ Nusamavarepa te anuma eti mahu ema apava ángele. Ánipa máichanu:

—Eti machaneranahi ema Viya, vahi ecuehica eti napecaturana ena achaneana te juca avasare. Iúchucavanesera, machu tavehahe eti táñehiquene táicuñayare taicha eti napecaturana. ⁵ Taicha téavicavapa eti

táuruquechiravahi eta napecaturana. ¡Ániquehepa! ¡Ema Viya máimaranaracahi tamutu eta tamaeperajivanahi! ⁶ ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayuaca náichahi eta tamauriqueneana ena tachichanaveana eta juca avasare! Cape juca náimicatajivachavacahi ena páureana. Puiti, ichapepanayareva eta íjarasiraya eta nátajivaya. ⁷ ¡Émecharrecayare muraca! Ichapena eta nacatajivaira taicha téavicava eta náijarasiravahi eta nacaetemaraivahi eta napanereruhi: “Tájina níchiravainahini eta návhahi. Núti néchahi. Tájina nácamunuimahi. Vahi nucatajivahini” tacahehi eta napanereruanahi. ⁸ Eta juca napanereruhi naviurevana eta tájahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa éna. Tépenaracanainapa namutu. Máijahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

⁹ Natarihivare ena aquenucana te avasareana, ena tavayuaruanahi eta túhusicare, táimiaquijiararuana eta tavayuasiravacahi. Éna, te náimahapa tipusisicapa eta yucu, tíyahanainapa ticatiquenehavanainapa. ¹⁰ Nayere-requinainapa eta náimararasirayare táichavenénahi eta napisirayare eta yucu táchuvare etá avasare. Tásicha, nacahenapa:

—Páurevisami, piti ichapequene avasare Babilonia. Tíchecuhapa puiti eta tájahúchiravapa eta pícuña —nacahepa.

¹¹ Énaripa ena comercianteana tíjararecarahiana eta tájiparacana te avasareana, tíyahanayareva ticatisamurevanaya eta náimairayarehi eta táitavirapa eta avasare. Taicha nájinainapa tiviyechaimahi eta námaqueneasana: ¹² oro, plata, taurinaqueneana márijahichichana, perla, yerérucava taurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu iápe ticaijare marfil, yucuqui taurinaquene, bronce, fierro, étapa eta mari ticaijare mármol. ¹³ Étaripa eta canela, eta apena tájiye-queneana táhiana yucuqui nasucureana, eta tátuyucuqui inciensosare, tíjiye-queneana brillantina, perfumeana. Étaripa eta téracareana, eta acéiteana, eta harina te trigo. Étaripa eta sárareana ticavanaracarevaca, eta vuiye, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana náijarareruanayarehi.

¹⁴ Tiápechavavarepa téchajica ema ángele, ánipa maicha eta avasare:

—¡Jéhesare pítítatái! Títavapa puiti eta picayeheraini eta taurinisiqueneana tinicacareana, téavicavainehi eta tavayuasiravihi. Énerichuvare titava-varepa eta picayehhevaini eta tímahacareana taurinaqueneana pipincanillavainihi —máichapa.

¹⁵ Énerichuvare ena nani tíjararecarahianaini eta juca tájiparacana ichape-muriqueneana tarricuchaqueneanahi eta avasare, nayererequinariipa eta náimararasirahi eta tacaicuñairayarehi eta avasare. Ticatisamurevana-ripahi. Tíyahanaripahi. ¹⁶ Tásicha, nacahepa:

—Páurevisami piti ichapequene avasare. Téavicavainihi eta piúrinavainihi. Picutinihi esu esena eta taurinava eta sumuiriha lino, mularume, titsi eta tayehejaca eta sumuiriha. Eta piyereruva amairiha oro, taurinaqueneana márijahiana, perla. ¹⁷ ¡Puiti, téavicavapa eta tájahúchiravaipa témitiaca tamutu eta pímaqueneanainisamihi! —nacahepa.

Énerichuvare, namutu ena comandanteana táquenuanahi eta lancha, énapa ena pasajeroana, énapa ena marineroana, énapa ena ticaemataneanahi tayehe eta lánchana te mar, nanasipa namutu te tiyerehi. ¹⁸⁻¹⁹ Eta náimairahi

eta taquijarera eta yucu táijuirahi eta avasare, tipiararecanapa eta nacatie-quenehairahi. Tíyahanapa. Nanacahivare eta máteji te nachuti. Tásicha, nacahepa:

—¡Páurevichapucaini! ¡Tamapuruji eta juca ichapequeneni avasare! ¡Tájina apanaina avasarena tacutihini eta juca ichapequenénihi avasare! ¡Títavapa tamutu eta tarricovainehi virrichochiravainihi vimutu viti tímisiapanahi eta táimahaqueneana viyereruasanahi te lánchana tayehe eta juca mar! ¡Puiti téavicavapa eta tájahúchiravahi eta táemitiequenerahi tamutu! —nacahepa.

20 Tiápechava téchajicapa ema ángele, ánipa macahe:

—¡lúrisamurecarepa puiti eyehe eti iávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsirijiequeneharipa puiti ema Viya tamutu eta táemecatajivasirahehi —macahepa.

21 Tacahe, tiúchujicapa ema émana ángele, máetaviure eta mamuracava. Manaracuhapa eta ichapequene mari ticheyarame. Máquijiecapa te une. Tásicha, macahepa:

—Tacaheyare eta tamuracavaya eta náquipaisiraya eta ichapequene avasare Babilonia. Tájinapa tímiapecháimahi náimahahini. **22-23** Tamutu timatina eta te távinenihi. Tájinapa tímiapecháimahi tacasadahuhini eta irimaraquiana te cálleana eta nacapununeraini eta guitarra, sivivire, nacajane, étapa eta nachujana. Nájinavarepa ena ticachujarahianaini. Váipavare ticasamahuimahi eta piéstana ena araimarahiana. Nájinainavarepa ena ticaemataneanaini eta tinicacareana. Títavainapa tamutu eta ematanecanaini. Étaripa eta tamicahuana, tamutupa témitiequenehana. Tamapurujipa eta náiturequenehainihi ichape ena comercianteana, nájarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticatajicaimahi eta ichapeni avasare. **24** Eta júcatataji avasare, ticaviurevahí eta nacapasiravacahi namutu ena machaneranaini ema Viya te juca apaquehe, énaripa ena profetanaini —macahepa.

19

1 Te taequenepa eta juca, nusamavarepa eta nahu ena camuriqueneana achaneana tayehe eta anuma. Muraca eta najiraira. Ánipa nacahe:

“¡Aleluya puiti!

¡Tétavicavahi eta vicunachiravihi piti Tata!

Eta picatiuchirahavihi, pímereraheta nacapasiravacahi nam etá pítupajijiasi-ravahi.

2 Taicha títauchavapa eta náicuñahi ena ticaviurevana, vahí pémetaviacavahini eta náemecharahiana ena túhusiqueneana tachichanaveanainihi etá avasare.

Ichape eta navayuareresirainihi ena achaneana te apanana avasareana etá túhusicare.

Puiti pítipa pítsirijiequenehahi eta nacapasirahavihi viti machaneranaini”.

3 Tiápechavanavarepa tijirana:

“¡Aleluya puiti, taicha acanevacainapa etá tacaicuñairahi etá juca avasaretataji!” nacahepa.

4 Tásicha, ena véinticuatroqueneana víyarahana tuparairucana énapa ena cuádroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa etá nacunachirahi. Ánipa nacahe:

—¡Amén! ¡Aleluya!

⁵ Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amape-ruana epicaurahiana mayehe —máichapa.

Eta táurinaquene mapiestara ema Cordero

⁶ Nusamavarepa eta nahu ena camuriqueneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluyapa puiti!

Taicha téjacaipa te mávacure ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

⁷ ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisirahavipa ema Cordero, tímicutijiri-cavahi te araimamuhu.

⁸ Viti véhicanahi ema Cordero, tétavicavahi eta vipachinavaipahi máicha, tacutihu súcani araimayare ticaetupirihipa, sucamuirihahivare eta táurinaquene müiriare lino, tijapu tirapepemeca” nacahepa.

(Eta juca lino, táicutiarahi eta táurivahi eta víchaqueneana viti véhicanahi ema Viya.)

⁹ Tacache, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuha-siqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajiriruvanahi ema Viya —máichapa.

¹⁰ Tacache, népuyucapa te máivapechacaya ema ángele. Nuvarahapa nutsiucayarehini. Émasera máichanupa:

—Péchepucachucha. Vahi picutsiucanu. Taicha nútirichuhi picutique-nenuhi mavanaranuhi ema Viya, énapa ena pichamurianahi títauchanahi eta mavanairipiána ema Jesús. Ema Viya, éma tatuparacavihi pitsiucayare. Taicha étirichuhi vicutiqueneana eta vicametarairuira eta máechajiriruva ema Jesús —máichanupa.

Ema Jesús, macaperahi eta tijapu cavayu

¹¹⁻¹³ Tacache, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimatirahi me Viya”* ema ticaperapahi éta. Éma, yátupiquene títaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneanahi. Énasera ena tíchanahi eta tamauri-queneana, muraca eta máicuñasiravacahi. Étapa eta macanarairavacahi ena mánarana, vahi macapacavacaimahi ena tájina naviurevaina. Énasera ena nacaviurevanahi, máitaequenehavacayare. Eta tacache, eta mamuiriha ticaepapamehi te iti. Eta máuquihana timuruhevaca tacutiyareni eta yucu. Te machuti ticayehéhi eta camuriquene coronana. Tatarihivare eta ajureca tiámahi eta apana máijare. Macarichusera ema téchahi eta tacayemaquenehi eta ajureca. ¹⁴ Náehicapahi ena mayeheana ejército, tiásihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu. ¹⁵ Te majaca ema tínapucapahi, tiúchucapa tavasi-mahiyaréni eta tacasiriquene espada eta macapasihayare ena mánarana.

* **19:11-13** Te pivarahapuca pecha eta apuna, pitanuca eta Juan 1.1-8.

Macaratacahi eta matsucurupa fiérroqui eta macurujisiravacaya. Mácataya-yajicavacayare ena mánaraná tacutiyare eta nácatayayajisirahi eta uva eta nacuchusirahi eta tachi táitivedequenehi. Éta tímereuchayarehi eta tamuracavare eta náicuñaya, taicha téavicavahi eta náimiyusemasirahi ema Viya ema máitupajijihaquenehi, máituruequenehavare tamutu. ¹⁶ Tatiarihivare eta ajureca te tacheyarapi eta mayehe capote tépacuchahi eta mapaheana. Eta táechajiruva eta ajureca, ani tacahehi: “Éma yátupiquenehi Rey, Aquenuca-hivare. Mavanecahi ena réyeana énapa ena aquenucana”.

¹⁷ Nímahavarepa ema ángele titupihahi te tamirahu eta sache. Mapiaracavaca etá cágureana tiárarairicaráhiana te anuquehe. Ánipa macahe:

—¡Yare, emutu eti cágureana, iúrujicava! Enicayare eta táurinisiqune tincacare máeniruheyare ema Viya. ¹⁸ Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, étapa etá taeche etá cavayu naperanaini. ¡Vénicaheyare namutu éna! —macahepa.

¹⁹⁻²⁰ Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarihivarehi ema Falso Profeta, ema tímerecaparacainihi etá tiáramicareana, mavayuaraquianahi nayehe ena achaneana etá náisapiravayarehi ticamar-cana, natsiusirayarehiva etá máimahi ema Útsutsure. Tacahe, namutu ena náurujiruvanahi ticanaranahi ema ticaperahi etá cavayu tijapu énapa ena téhicanahi mayeheanapahi ejército. Tacahe, ena ángeleana nacaratacaba ema Útsutsure, émapa ema Falso Profeta. Tásicha, ena apinana náitareruichaha náepujuquichapa tayehe etá tájurequene yucu táetiraraaisina etá tamuruira. Éta nacaicuñaiyahi. ²¹ Tásicha, ema ticaperahi etá cavayu tijapu, máijahúchapa macapapajicavaca ena suntaruana mánaranahi. Eta macaparaqui etá tacasi-riquene espada táuchurehi te majaca. Tásicha, járajapapa etá camuriqune cágureana, tanicapa etá náecheanaini. Tisatuhevacapa.

20

Eta táichavaqueneyava etá mil año

¹ Nímahavarepa ema émana ángele másihapahi etá te anuma. Mámapahi etá ichapepi cadena, étapa etá llave, tacaerataiyayare etá táupenaquene pusu.

² Tacahe, ema ángele macaratacaba etá taimeniquene Serpiente, etá ticaete-marerecahi acane, émarichuhi ema Váinaraji Satanás. Tacahe, ticaithapa ema Satanás tayehe etá ichapepi cadena. Mil añoyare etá macaitihairayare.

³ Tacahe, ema ángele máiyaracuhapa éma etá te mávacu pusu táupenaquenehi. Manacapa etá llave, máerataequenepahap. Manacavarepa etá ajureca, ánipa tacahe: “Machu évejiaca etá juca tapaja”. Tayerevayare etá mil año, vahi ticaetemarecaimahi nayehe ena achaneana. Te taequenepasera etá mil año, tiúchujicainavarepa etá ticaetemarecainavarepa, ánipinesera.

⁴⁻⁵ Tacahe, nímahapa ena achaneana náechepureanahi nacaparuanaainihi. Éna, taimicaparuanañi etá náehisirahi ema Jesús, étaripa etá nacometarai-ruirahi etá máechajiruva ema Viya. Ena nani, vahi náepuyumirauchahini ema Útsutsure, vahivare natsiucahini etá máimahi nasiñarajih ema apamuriana achaneana, vahivare návarahahini nacamarcahini etá te nanahu étapa te navahu. Ena nani, ena náinapurehi téchepucana te tamirahuichaha etá mil año. Nímahapa etá náejasiraipa te trono, catuparahanapa éna, juéseanaripa. Mil año etá nacatuparahairayare. Énasera ena apamuriana náepenaqueneanapa masuapajirairahanainihi, vuíchaha téchepucanaimahi.

Tiámainucava te táequenénapa eta mil año, napaenumavainapa téchepucanayare. ⁶ ¡Tiúricacareeanayare ena nani tiápechavanayare titarecana puiti juca! Masantuchainapa ema Viya. Vaipa tiápechavanaimahi tépenana. Vaipa ticaicuñanaimahi eta te tájurequene yucu. Tiyujaracarahanianaya mayehe ema Viya, étapa me Cristo. Aquenucarahanayare, taicha ema Cristo máijara-cainapa eta natuparahanayare. Mil año eta nacatuparaha-rayare.

⁷ Tásicha, te táequenénapa eta mil año, tiúchucainavarepa ema Satanás tayehe eta macaerataiyahi. ⁸ Tépanavainavarepa ticaetemarerecayare nayehe ena achaneana te tamutu avasareana. Étaripa eta apinaquene avasare ticai-jare Gog étapa eta Magog, macaetemaresihayare. Mayurucavac Cainapa eta nacatianasiraya ema Viya. Tásicha, ticurujicacanainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahi. ⁹ Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacayarehi eta nachayasirayare eta avasare máemunaruinihi ema Viya, návihahi ena machanerana. Émasera ema Viya, enevanepa máitaequenehavacahi. Tiúcupaicapa eta yucu tiásicha te anuma, tájuchavacapa namutu. Nájina tacaemachaquenéna. ¹⁰ Tásicha, ema Satanás ema tivayuarecainihi, nacaratacapa náepujuquichapa tayehe eta tájurequene yucu, táetiraraaisina eta tamuruira. Étaripa eta mávihahi ema Útsutsure, émapa ema Falso Profeta. Nájina nanarasiraimahi. Tamutu sácheana, yátiana eta nacatajivairaya, máichecuaraquireya.

Étapa tiámahaviyare eta víchaqueneanahi vicaevatainapa tayehe eta viávihayare

¹¹ Nímahavarepa eta ichapequene trono tijapu. Téjacahi ema Viya tayehe. Tétavicavahi eta máramicarevahí. Eta nímararasirahí éma, némitiacapa. Vaipa necha távihapuca návihahi téhepuca anuma, téhepuca apaquehe. ¹²⁻¹³ Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahí eta náchanevana namutu, téchepupujicanahí éna tayehe jácani náepenineanainipahí. Namutu titupihanahí te mamirahu ema Viya téjacahi te trono. Tásicha, tatiarihi eta libro tiama eta nalistana ena náitareruanaya. Tatiarihivare eta apamuriana libro tacajuiyahi eta náichavaquenevanahí ena achaneana. Ena ángeleana náechajicuhapahí. Nácani náichahí eta tamauriqueneana, étapa tiviuchahí eta nacayaseserehirayarehi, nacaicuñairayare. Te tivayuchapuca eta napecaturana, muraca eta náicuñayare. ¹⁴⁻¹⁵ Eta nacaicuñaiyahi eta tájurequene yucu, táetiraraaisina eta tamuruira. Namutu ena tájinahí eta náijarénahíni tayehe eta libro tiama eta nalistana ena náitareruanayare, náepujuquichapa tayehe eta tájurequene yucu, tamutu eta náqueheana étapa eta náchanevana. Maitavacacainapa eta nacatajivairayare. Maitujianainapa tayehe.

21

Ticasipainapa eta anuma étapa eta apaquehe

¹ Nímahavarepa eta tacasipairaripahí, tamuturipahí arairu eta anuma étapa eta apaquehe. Tájinapa eta ichapequene une mar. ² Tásicha, nímahavarepa núti tiúcupaica eta tiúrina avasare. Ticaijarehi Arairu Jerusalén. Tétavicavahi eta tasantuva, taicha tásihapahí te anuma te mávihahi ema Viya. Tiúrinapahí eta tacaetupirihi, tacutíhi te ticaetupirihi esu araimayare.

³ Nusamavarepa muraca eta mahu ema ángel, tiásihahí te anuma. Ánipa macahe:

—Puiti, ema Viya macucupaicapa eta mapena te juca apauehe. Áninapa macavasaya. Tiávaháhénapa eti achaneana. Yátupiquenénapa Ecaiyanqueneya éma. ⁴ Tacahe, ema Viya macamitiasinaheyare eta íyairana. Váipavare épenaimahi. Váipavare ecatisamurevaimahi. Tájinapa ticaiyacahémahi. Váipavare ecatajivaimahi taicha tájinapa tiviuchahémahi —macahepa ema ángele.

⁵ Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha nútí —macahepa.

Tásicha, máichanuvarepa ema ángele:

—Piájuchayare puiti eta juca, taicha yátupiqueneya eta táichararacavaya. Tamutuyare títauchava. Jéhevare eta tisuapacareana —máichanupa.

⁶ Ánivarepa macahe ema Viya:

—Títauchavapa puiti tamutu eta nupaneruruana. Nútira néchahi tamutu eta táepaniravahi eta apauehe. Nútirichuvare néchahi eta táimyaniravahi tiuri. Puiti nútí nítouchapa tamutu. Eti emaunehi, nútí níjaracaheyare eta máitavacaca une ticaitarecarahi. Tájina vahi evacharecaimahi. ⁷ Tacutiquene, eti ecamichanahi, ímyianavahi eta éhisiranuhi, níjaracaheyare tamutu eta júcana ícuchianayarehi. Nútí ecaiyaqueñeyá, taicha nuchichaheyare éti. Nútí néchaheya éti. ⁸ Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena iápemareana, ena ticasíñarajiana eta achanemirana, énapa ena tépiyahirahiana. Ticaquijianayare namutu éna tayehe eta náicuchi táijurequene yucu máitavacaca eta tamuruira, táetiraraisiná eta tamuruira. Váhiquene tiúchuca-naimahi tayehe —macahepa.

Eta arairu avasare Jerusalén

⁹ Tacahe, tipauchanupa ema émana ángele nasietenehi ena ticaratacanahi eta siétequene escudilla tiámapahi eta siétequene ecuñaraquiana táiñehiqueneana. Tásicha, máichanupa:

—Yare. Nímechaviyare eta avasare, návhahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

¹⁰ Tásicha, ema Espíritu Santo tímimahanuhi eta mavarahaquene tímechanuya ema ángele. Ema ángele tiámanupa eta te tápusi eta ichapequene cerro anuquehequene. Tímechanupa eta tácupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya. ¹¹ Eta juca avasare, tétavicavahi eta tajaraivapahi taicha tiámahi eta majaraivahi ema Viya. Eta támahi eta tajaraivahi tacutiyareni eta tajanunusira eta marijahí tijararacahi. ¹² Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, távhahi eta ajureca náijare ena dócequeneanaini náchucanaini ena israelítana. Natiarihivare ena ángeleana tayehe eta tapajacurana. ¹³ Tatiarihi mapana tapajacura te tinapaica eta táchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásicha, eta mapanaquenevare te tinapaica eta tasiapine eta sache.

¹⁴ Te apauehe eta yúchama, tatiarihi eta doce márimeana táojahameruanahi eta yúchama. Támahi eta dócequene náijareana ena apóstoleana mayeheanahi ema Cordero.

¹⁵ Ema ángele ema téchajicanuhi macaratacahi eta máicutiriqui úruqui, máicutichihayare eta tapajacurana étapa eta yúchamana. ¹⁶ Eta avasare falaru eta támahi. Eta táunava ticuticacahi eta tajuhe. Dos mil doscientos kilómetro

eta táichapeva eta avasare. Ticuticacahi eta táunava, eta tátuqueva, étapa eta tajuhe.¹⁷ Máicutichavare eta yúchama. Sesenta y cuatro metro eta tátuqueva.

¹⁸ Eta yúchama amairiha mari jaspe timájumeana. Eta avasare amairiha eta yátupiquene oro. Tijanunucahi tacuti eta cristale eta tajarahivahi.¹⁹ Eta márimeana tachunusipévanahi eta yúchama, tatiarihihi eta taurinaqueneana mari. Eta tínapuca tacayehehi eta mari ticaijare jaspe. Eta apuna tacayehehi eta ticaijare zafiro. Eta apuna tacayehehi eta ticaijare ágata. Eta apuna tacayehehi eta ticaijare esmeralda.²⁰ Eta apuna tacayehehi eta ticaijare ónica. Eta apuna tacayehehi eta ticaijare cornalina. Eta apuna tacayehehi eta ticaijare crisólito. Eta apuna tacayehehi eta ticaijare berilo. Eta apuna tacayehehi eta ticaijare topacio. Eta apuna tacayehehi eta ticaijare criso-prasa. Eta apuna tacayehehi eta ticaijare jacinto. Eta téqueneha tacayehehi eta ticaijare amatista.²¹ Eta dócequene tapajana tacayehehi eta doce perla. Tayehepachuhi eta tapaja eta étana perla. Eta tínapuca calle, tacayehe eta yátupiquene oro, tijanunucahi tacuti eta cristale eta tajarahivahi.

²² Te jena avasare, tájina nímahahini eta Templo nayujarasirarénahini. Tájina táchamunuhini eta nayujarasirareyare taicha matiarihihi ema Viya máitupajijihaquene máituruequenehavare tamutu, émapa ema Cordero. Návaháruhi namutu.²³ Tacutiquene, vahi táchamunuhini eta sache étaripa eta caje eta tamicauchirainahini eta avasare. Taicha tamicauchahai eta majaiva ema Viya, émapa ema Cordero.²⁴⁻²⁶ Tájina náimatiyaimahi ticaerata eta tapajana, taicha tájina timapicuina tayehe, tájinavare yátina. Tásicha, namutu ena achaneana te apanana avasareana macuchucureanahi ema Viya, ichape eta napicauchirayare eta Araíru Jerusalén, ichapevare eta nacunachirayare. Tisuapajirahianayarehi tayehe eta vanairipiana tásichaqueneanahai eta juca mávasa ema Viya. Énerichuvare ena aquenucana te avasareana, ichape eta námvahuanayare me Viya te jena avasare mávhahi éma.

²⁷ Tájina náimatiyaimahi tisiapanana ena nachipejiqueneana énaripa ena tícharahiana eta tamaeperajivaqueneana énaripa ena ticaetemarahiana. Nacarichu tatuparaca tisiapanayare ena tatiarihi eta nájareana tayehe eta libro macarataru ema Cordero, tiama eta nalista ena náitareruanayare.

22

¹ Tásicha, ema ángele tímechanuvarepa eta tapachinaquene cajacure. Tétavicavahi eta tacaitarecaraivahi eta tahuñera. Tacutiyareni eta cristale eta tajararaesira. Eta táuchusihahi eta mayehe trono ema Viya, émapa ema Cordero.² Tacahe, tatiarihihi eta yucuquiana, ticaitarecarahi eta tahi. Eta táchihahi te enumuhuiyapahi eta tínapuca calle, te tachausipahivare eta cajacure. Tásicha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana.³ Tájinapa tímiapechaimahi tiviuchaimahi ena achaneana ticavasana tayehe eta juca avasare, máejashahai ema Viya, émapa ema Cordero. Vimutu viti mavaranahai, máitavacacayarehi eta vijrauchirayarehi, vitsiusirayare.⁴ Vímararacayare eta mamira tamutu sácheana. Vicamarçayare eta máijare te vinahu.⁵ Aquenuhaviyare. Máiñecuaraquireya eta vicatuparahairayare. Ánaqui tájinapa yátina, tájinainapa eta timapicu. Vaipa vicamunuimahi eta tajaraiva eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

Tiánehipa eta máitesirayare ema Jesucristo

⁶ Máichanuvarepa ema ángele:

—Eta juca nímeruvihí, yátupiqueneyá etá táchicaracavaya. Tamutuyare títauchava. Jéhevare etá tisuapacareana. Taicha émarichuhi ema Viya tivane-canuhi etá nímítusiravi pítí. Acane ema Viáquenu máimitucavacahi ena profetana etá mapanereruana. Puiti mavaraha nímechaheyare eti mavane-ranahí etá táchicaracavaya. ⁷ Énerichuvare ema Viáquenu máichahehi: “Níjahúchavanénapa nútijapa”.

¡Tétavicava etá náuricacarevaya ena tisuapanahí, napanerequenehairahi etá nímechaviqueñeanahí, étaripa etá piájurequeneanahí te juca libro! — macahepa ema ángele.

⁸ Tétavicava etá náramirahí nútí etá nímirahí tamutu etá júcana, nusamirahí nuti Juan. Tásicha, te tamutupa, népuyucapa te máivapeana ema ángele ema tímechanuhi etá juca. Nuvarahapa nutsiucayarehini. ⁹ Émasera máichanupa:

—Péchepucachucha. Vahi picutsiucanu. Taicha nútirichuhi picutique-nenuhi mavanaranuhi ema Viya, énapa ena pichamurianahí ena ticametarrairuana etá máechajiruvana ema Viya, énaripa ena tisuapanahí tamutu etá tacajuqueneanahí te juca libro. Éma tatuparacahi pitsiucayare ema Viya — máichanupa.

¹⁰ Énerichuvare máichanuvarepa:

—Vahi picuañaucha. Pimetajirica etá juca pimetacasivanahí etá máechajiruvu ema Viya piájuchaqueneana etá te juca libro, taicha tiánehipa etá táchicaracavayare tamutu etá táchicaracavayarehi. ¹¹ Énasera, nácani vánarajianahí, vahi picucamesavaca. Náimiyana vachaha naicha etá navaina-rajiva. Nácani tíchanahí etá tamauriqueneana, náimiyana vachaha naicha etá tamauriqueneanahí. Nácanisera tíchanahí etá tauriqueneana, tatuparacahi náimiyana vachucha naicha etá tauriqueneana. Nácani matapiravareanahí te mamirahu ema Viya, náimiyana vavare náuri etá mayehe —máichanupa.

¹² Ánivare macahe ema Viáquenu:

—Nútijapavanénapa. Námayarepahi etá nájaracasianayrajiva. Nácani tíchanahí etá tamauriqueneana, náare ena ticaematanecanuanahí etá náitaresirahi te juca apaquehe. Énerichuvare námayarepahivare etá nayehe-nayare ena masuapajirairahana. ¹³ Nútira néchahi tamutu te tépanavainapa etá apaquehe. Nútirichuvare néchahi etá taimyaniravahí tiuri. Puiti nútí nítouchayare tamutu —macahepa.

¹⁴ Tétavicava etá náuricacarevayare nácani tépachinachana etá náchanevana, tacuti te ticasipajihana etá namuirihana. Éna tatuparacahi nanicayarehi etá tahi etá yucuqui ticitarecarahi. Tatuparacahivare nasiapayare etá Araíru Jerusalén. ¹⁵ Énasera ena masuapajirairahana vahi titujicavanimahi tisapana. Nanasiyare te aneca, énapa ena iápemareana, ena túhusiana, ena tica-pahiana, ena ticasíñarajiana etá achanemirana, énerichuvare ena tiúriganahí tépiyahirahiana ticaetemarahiana.

¹⁶ Macahevare ema Viáquenu:

—Nuti Jesús, nuvanecahi ema nuyehe ángele máimicaecherachayarehi tamutu etá juca numetarapiana puiti eyehe eti nuchanerana te avasarena. Nútí, yátupinuhi Reyhi ecuchapaquenehi, mavanerunu hivare ema Tata. Tétavicavahi etá nujaraivahí taicha etá aquenucairuhi ichape —macahepa.

¹⁷ Ema Espíritu Santo énapa ena téhicanahí ema Cordero, tíchuarecana éna:

—Yare, epauchahavi —náichapa.

Énapa nácani tisamanaya etá juca ichuárapi, énerichuvare éna náichuare-cavare:

—Yare, epauchahavi —náichapa.

Énapa nácani timauneanayare, náiteca apaesa náera eta une ticaitarerahí. Tájina vahi navacharecaimahi.

¹⁸ Emutu eti esamayare eta juca mame tarapiana ema Viya tacajuqueneanahi te juca libro, nuvaraha numetacahe nútí: Nácani navayuyupicayare eta táechajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraquianayare táechajisihaqueneanahi. ¹⁹ Énerichuvare ecaunechava eta iáñau chira eta táechajisihaqueneanahi te juca libro, machu máñau chahe ema Viya eta esiapira eta juca mávasa sántoquenehi, machu vahi macuenicahe eta tahi eta yucuquiana ticaitarecarahiana, étaripa nímahaqueneanahi nájurequeneana te juca libro.

²⁰ Émarichu ema Viáquenu titametacahi tamutu eta júcana. Énerichuvare máichahehi:

—Yátupi nútijapavaneyare —macahehi.

¡Jéheyavapuca, Tata Jesús! ¡Pítécavanepaini! Amén.

²¹ Ani táchecuiya eta juca nájurehi. Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.